

Itlajtol totajtzin

Dios = El Nuevo

Testamento



New Testament in Nahuatl, Northern Oaxaca (MX:nhy:Nahuatl,
Northern Oaxaca)

Itlajtol totajtzin Dios = El Nuevo Testamento

New Testament in Nahuatl, Northern Oaxaca

(MX:nhy:Nahuatl, Northern Oaxaca)

copyright © 2006 Wycliffe Bible Translators, Inc.

Language: Nahuatl, Northern Oaxaca

Translation by: Wycliffe Bible Translators, Inc.

Náhuatl, norte de Oaxaca [nhy], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Northern Oaxaca

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

b47d7de3-42f3-5a3f-bd32-a5fb1a3fa005

Contents

San Mateo	1
San Marcos	81
San Lucas	130
San Juan	213
Hechos	274
Romanos	351
1 Corintios	388
2 Corintios	423
Gálatas	445
Efesios	458
Filipenses	471
Colosenses	480
1 Tesalonicenses	489
2 Tesalonicenses	496
1 Timoteo	500
2 Timoteo	509
Tito	516
Filemón	520
Hebreos	522
Santiago	550
1 Pedro	559
2 Pedro	570
1 Juan	576
2 Juan	585
3 Juan	587
Judas	589
Apocalipsis	592

SAN MATEO OKIJKUILOJ YIN KUALE TLAJTOLE DE JESUCRISTO

*Iweyitajwan Jesucristo katlej oyekaj ya wejkawitl
(Lc. 3:23-38)*

¹ Yinmej yejwan katlej oyajkej ya wejkawitl iweyitajwan in Jesucristo, katlej walajtok nelwatl de David, iwan noijki walajtok nelwatl de Abraham.

² Abraham oyáj tepapan de Isaac. Isaac oyáj tepapan de Jacob. Jacob oyáj tepapan de Judá iwan oksekimej ikniwan.

³ Judá iwan isiwa Tamar okinpixkej inpilwan katlej intoka Fares iwan Zara. Iwan Fares oyáj tepapan de Esrom. Esrom oyáj tepapan de Aram. ⁴ Aram oyáj tepapan de Aminadab. Aminadab oyáj tepapan de Naasón. Naasón oyáj tepapan de Salmón. ⁵ Salmón iwan isiwa Rahab okipixkej inkone itoka Booz. Booz iwan isiwa Rut okipixkej inkone itoka Obed. Obed oyáj tepapan de Isaí. ⁶ Iwan Isaí oyáj tepapan de yen rey David.

In rey David oyáj tepapan de Salomón. Imaman in Salomón yen katlej oyeka isiwa in Urías. ⁷ Salomón oyáj tepapan de Roboam. Roboam oyáj tepapan de Abías. Abías oyáj tepapan de Asa. ⁸ Asa oyáj tepapan de Josafat. Josafat oyáj tepapan de Joram. Joram oyáj tepapan de Uzías. ⁹ Uzías oyáj tepapan de Jotam. Jotam oyáj tepapan de Acaz. Acaz oyáj tepapan de Ezequías. ¹⁰ Ezequías oyáj tepapan de Manasés. Manasés oyáj tepapan de Amón. Amón oyáj tepapan de Josías. ¹¹ Josías oyáj tepapan de Jeconías iwan noijki okinpixke oksekimej ipilwan, itech nekatej tonaltin nijuak in judiojtin okinwikakej preso-jtin para itech país de Babilonia.

¹² Ompa itech país de Babilonia, Jeconías okipixke se ikone itoka Salatiel. Salatiel oyáj tepapan de Zorobabel.

¹³ Zorobabel oyáj tepapan de Abiud. Abiud oyáj tepapan de Eliaquim. Eliaquim oyáj tepapan de Azor. ¹⁴ Azor oyáj tepapan de Sadoc. Sadoc oyáj tepapan de Aquim. Aquim oyáj tepapan de Eliud. ¹⁵ Eliud oyáj tepapan de Eleazar. Eleazar oyáj tepapan de Matán. Matán oyáj tepapan de Jacob. ¹⁶ Jacob oyáj tepapan de José. Yon José yen katlej oyeka iokich in María. Iwan yon María okitlakatilij in Jesús katlej tikixmatij yen Cristo.

¹⁷ Opanokej majtlakte iwan nawi tetajmnej desde Abraham asta David. Noijki opanokej majtlakte iwan nawi tetajmnej desde David asta ikuak okinwikakej itech país de Babilonia. Iwan noijki opanokej majtlakte iwan nawi tetajmnej desde

ijuak okinwikakej itech país de Babilonia asta ikuak ot-lakatiko in Cristo.

Ijkín nik otlakatke in Jesucristo

(Lc. 2:1-7)

¹⁸ Ijkín nik otlakatke in Jesucristo. María yokichixtoka ma ajsi tonale para monamiktis iwan José. Pero antes de mosetiliskej, María okiwalmachilij ya kipia ikone ijtkit itlalax ika ipoder in Espíritu Santo. ¹⁹ Iwan José, katlej oyeka para monamiktis iwan María, yej oyeka kuale tlakatl, iwan mach okinekke kipijpinatis in María. Por yonik okiyejyekoj kikawas ichtaka. ²⁰ Nijuak ijkón okiyejyekoj kichiwas, ovalaj se ángel katlej okualtitlanke in Señor. Yon ángel okimonextilij itech ikochteemikilis in José, iwan okilwij:

—José, tekone de David, amo ximomawti timosetilis iwan María para yetos mosiwa. Porke por yen ipoder in Espíritu Santo okichij ma kipia yon konetl. ²¹ María kipias ikone, iwan tiktokayotis JESÚS, porke Yej kimakixtis ipueblo de itlajtlakol.

²² Nochi in yin otlapanok para ma mochiwa tlan okijtoj in toSeñor por medio de yen profeta Isaías:

²³ In ichpochtle kipias se ikone,
iwan ikone yetos ítoka Emanuel,
Emanuel kijtosneki: Dios towan kajki.

²⁴ Nijuak José ojsak, okichij ijkón ken okilwij iángel in Señor, iwan omonamiktij iwan María. ²⁵ Pero in José mach semi okochke iwan María asta ikuak otlakatke ikone, iwan José okitokayotij in konetl Jesús.

2

Nijuak oyeka konetl in Jesús okitlajpalotoj sekimej ixtlamatkej de sitlaltin

¹ Jesús otlakatke itech pueblo de Belén, itech estado de Judea, iwan nijuak Herodes oyeka rey. Ijkuakón ovalajkej ik ikisayan tonale sekimej ixtlamatkej de sitlaltin iwan oe-jkokej itech weyikan de Jerusalén. ² Tlajtlantiwitzej:

—¿Kanin kajki in konetl katlej otlakatke para yetos Rey de yen judiojin? Porke isitlal otikitakej desde ik ikisayan tonale, iwan otivalajkej otikweyikixtikoj.

³ In rey Herodes okimakak tlapololistle nijuak ijkón okikakke, iwan nochtin tlakaj de Jerusalén noijki okinmakak tlapololistle. ⁴ Herodes okinnotzke nochtin tlayekankej tiopixkej iwan noijki in tlamachtijkej de itlanawatil in Moisés. Iwan okintlajtlanij kanin tlakatis in Cristo. ⁵ Iwan yejwan okilwijkej:

—Tlakatis itech pueblo de Belén itech estado de Judea. Porke ijkón okikuiloj in profeta:

⁶ Tej, Belén, katlej tikaj itech tlale de Judea,
maski titzikitzin, tej okachi tiweyikistok (tiweyititok).
Porke motech kisas se tlayekanke,
katlej kinyekanas nopolwan judiojtin.

⁷ Ijkuakón Herodes okinnotzke ichtaka in ixtlamatkej de sitlaltin, iwan okintlajtlanij itech tlan tonale meroj omonextij in sitlale. ⁸ Satepan okintitlanke itech pueblo de Belén, iwan okinmilwij:

—Ompa xiwian, iwan kuale xitlajtlanikan de yon konetl. Iwan nikuak ankajsiskej, annechilwiskej, para nej noijki nias nikweyikixtiti.

⁹ Nijuak otlanke okintlapowij in rey, yejwan oyajkej. Iwan sitlale katlej okitakej ik ikisayan in tonale, okinyekanaya asta ijkuak oajsitoj Belén, iwan sitlale omoketzato kan oyeka in konetl. ¹⁰ Iwan nikuak okitakej in sitlale sa tekitl opakej. ¹¹ Satepan okalakej kalijtik, iwan okitakej in konetl iwan María katlej imaman. Omotlankuaketzkej iwan okiweyikixtijkej. Okintlapojkej inkajajwan iwan okitlatliokolijkej ika oro, ika kopale, iwan ika ajwiakayotl katlej itoka mirra. ¹² Satepan, itech inkochteemikilis, Dios okinmilwij mach ok ma wian inawak Herodes. Toneses, oyajkej para inchan itech oksé ojtle.

Okiwikakej in konetl Jesús itech país de Egipto

¹³ Nijuak oyajkej in ixtlamatkej de sitlaltin, ijkuakón, ovalaj se ángel de toSeñor iwan okimonextilij itech ikochteemikilis in José. Okilwij:

—Ximewa, iwan xikwika in konetl iwan imaman asta itech país de Egipto. Ompa ximokawakan asta ijkuak Nej nimtz-nawatis xikisakan. Porke Herodes kitemos in konetl para kimiktis.

¹⁴ Iwan niman yon yuak nikuak oisak in José, okiwikak in konetl iwan imaman para Egipto. ¹⁵ Iwan ompa omokajkej asta ijkuak omikke in Herodes. Ijkón otlapanok para ma mochiwa tlan okijtoj in toSeñor por medio de yen profeta nikuak okijtoj: “Oniknotzke in noKone ma kisa de Egipto.”

Herodes otlanawatij ma kinmiktikan in konemej

¹⁶ Nijuak in Herodes okimomakak kuenta nik okikajkaya-jkej in nekatej ixtlamatkej de sitlaltin, sa tekitl okualanke, iwan otlanawatij ma kinmiktikan nochtin in chochokotzitz-intin de ome xiwitl para ik tlani katlej chantij itech pueblo de Belén, iwan nochtin in pueblotjin katlej katej ik ompa. Porke in ixtlamatkej de sitlaltin okilwijkaj in Herodes nik ya kipia kej ome xiwitl nikuak yakinika okinmonextilij in yon sitlale. ¹⁷ Ijkón otlamochij ken okijtoj in profeta Jeremías:

¹⁸ Itech pueblo de Ramá mokaki tzajtzilistle de tekokojkayotl,

iwan chokilistle de neyolkokole.

Yen Raquel kinchokilia ipilwan,

iwan mach kineki moyoloseewis, porke yokinmiktilijkej.

¹⁹ Iwan nijuak omikke in Herodes, se ángel de toSeñor okimonextilij in José itech ikochteemikilis ompa Egipto.

²⁰ Okilwij:

—Ximewa, iwan ximokuepa xikwika in konetl iwan imaman para mopaís de Israel. Porke yomikkej katlej okinekiaj kimiktianij in konetl.

²¹ Ijkuakón José omejke iwan omokuepke iwan konetl iwan imaman para itech país de Israel. ²² Pero nijuak José okimatke nik itech estado de Judea, mach ok yen Herodes oyeka rey sino yen itelpoch katlej itoka Arquela, tones omomawtij yas ompa. ToTajtzin Dios okilwij in José itech ikochteemikilis, ma wia itech estado de Galilea. ²³ Tones, oyáj itech yon estado iwan omochantij itech se pueblo itoka Nazaret. Ijkón otlapanok ken okijtokej in profetajtin, nik in Cristo kitokayotiskej nazareno.

3

In Juan Tlakuateekij otlamachtia y kan tlawaki

(*Mr. 1:1-8; Lc. 3:1-9,15-17; Jn. 1:19-28*)

¹ Itech nekatej tonaltin in Juan Tlakuateekij ovalaj kan tlawaki de estado de Judea, iwan okinmachtij in tlakaj katlej ovalajkej inawak. ² Okinmilwiaya:

—Ximoyolkuepakan inawak toTajtzin Dios, porke yoajsiko in tonale para Dios tlanawatis amonawak.

³ Yen yin Juan de akin otlahtoj in profeta Isaías, nijuak okijtoj:

Se tlajtole mokaki tetzajtzilia kan tlawaki, iwan kijta:

“Xikyektlalikan iwan xikmelawakan iojwi in Señor.”

⁴ Itzotzol in Juan oyeka de itzozmio kameyo iwan omotlajkoilpiaya ika se kuetlaxtle. Okinkuaya chapulimej (xolimnej) iwan okikuaya nektle. ⁵ Miekej tlakaj ovalayaj inawak Juan, ovalayaj de weyikan de Jerusalén, de nochí in estado de Judea iwan de nochtin in tlalmej katlej katej ik weyatl Jordán. ⁶ Nijuak omoyolkuitiayaj de intlajtlakol, in Juan okinkuateekiaya ijtk in weyatl Jordán.

⁷ Iwan nijuak in Juan okinmitak miekej fariseos iwan saduceos ovalayaj inawak para mokuateekiskej, okinmilwij:

—¡Namejwan kej ankoamej! ¿Akin oamechilwij ke tla amokuateekiskej welis ancholoskej de itech ikualanilis in Dios katlej amopan witz? ⁸ Xikchiwakan tlan kuale para ma mota nik ya amoyolkuepkej. ⁹ Iwan amo xikmolwikan ke ankatej kuale porke antepilwan de Abraham. Ipan melajka

namechilwia, ke asta yinmej temej in Dios welis kinkuepas ipilwan in Abraham. ¹⁰ Namejwan ankatej ken tlatokkuanmej katlej mach tlakij. Nochtin in tlatokkuanmej katlej mach tlakij motzontekiskej iwan kintlamotlaskej ijtit tlitl. In acha sa mochixtok para kintzontekis asta itech innelwayo in tlatokkuanmej katlej mach tlakij. ¹¹ Nej melawak namechkuateekia ika atl kej se señas nik melawak ammoyolkuepkej. Pero satepan de nej witz oksé katlej okachi nechpanawilia, porke okachi weyikistok (weyititok) iwan amo ken nej, iwan mach notech powi nion para nikkakkixtis. Yej amechkuateekis ika Espíritu Santo iwan ika tlitl. ¹² Yej ejkos kej se tlakatl katlej pewas kichipawas in trigo. Iwan trigo katlej ya chipawak kitlaatis ijtit kueskomatl, pero itlajsolo kitlamotlas ijtit tlitl katlej mach keman sewis.

Juan okikuateekij in Jesús

(Mr. 1:9-11; Lc. 3:21-22)

¹³ Jesús okiske de estado de Galilea iwan oejkok itech weyatl Jordán kan oyeka in Juan Tlakuateekij, ompa ovalaj para ma kikuateeki in Juan. ¹⁴ Pero in Juan mach okinekia kikuateekis. Okijtoj:

—Moneki yen tejwatzin xinechkuateeki. ¿Sejpa yej tejwatzin tikneki ma nimitzkuateeki?

¹⁵ Jesús okinankilij:

—Axan ijkón moneki tikchiwaskej, porke in Dios ijkón kineki ma tikchiwakan nochí tlan kuale.

Juan mach ok itlaj okijtoj iwan okikuateekij in Jesús. ¹⁶ Nijuak Jesús omokuateekij iwan nijuak ovalmej de ijtit atl, in ilwikak otlapowik iwan okitak in Espíritu Santo ovaltemok ipan Jesús kej se paloma. ¹⁷ Iwan omokakke se tlajtole de ilwikak. Okijtoj:

—Yen yin notlasojKone, katlej inawak nipaki.

4

In Amo Kuale Tlakatl okinekia kitlajtlakolmayawini in Jesús
(Mr. 1:12-13; Lc. 4:1-13)

¹ Satepan, in Espíritu Santo okiwikak in Jesús kan tlawaki kan diablo okinekia kitlajtlakolmayawini in Jesús.

² Okixikoj mach otlakuaj omenpoale tonale iwan omenpoale yuale, iwan satepan otiojsij. ³ Ijkuakón, in tetlajtlakolmayaj ovalaj inawak Jesús para kitlajtlakolmayawis, iwan okilwij:

—Tla melawak Tej titeKone de Dios, xikchiwa ma mokuepa pan in yinmej temej.

⁴ Jesús okinankilij:

—In tiotlajkuilole kijta: “In tlakatl mach welis yolitos san ika tlakuale, sino noijki ika noch i tlajtote katlej Dios kijta.”

⁵ Satepan, in diablo okiwikak in Jesús itech iweyikan in toTajtzin Dios, yen weyikan de Jerusalén, iwan okitlejkoltij ipan weyi tiopan. ⁶ Iwan okilwij:

—Tla melawak Tej titeKone de Dios, ximotlamotla asta ipan tlale. Porke in tiotlajkuilole kijta:
Dios kinwaltitlanis iangelwan ma mitzpalewikan.
Mitzajkokuiskej ika inma,
para amo tkmomagati itlaj tetl itech mokxi.

⁷ Jesús okilwij:

—Noijki in tiotlajkuilole kijta: “Amo xikyejyeko in Señor moDios para tikitas tlanon kichiwas.”

⁸ Satepan, in diablo okiwikak in Jesús ipan se tepetl wejkapán, iwan okinmititij nochtin paismej de ixko yin tlaltikpak, iwan noch i tlan kipiaj. ⁹ Iwan okilwij:

—Nochi in yin nimitzmakas, tla timotlankuaketzas iwan tinechweyikixtis.

¹⁰ Toneses, Jesús okinankilij:

—Xitzinkisa, Satanás, porke in tiotlajkuilole kijta: “Xikweyikixti in Señor moDios, iwan sanwel Yej xiktekipano.”

¹¹ Ijkuakón in diablo okikajtej in Jesús, iwan owalajkej sekimej angelestín iwan okimonekuitlawijkej in Jesús.

Jesús opéj tekipanoa itech estado de Galilea

(*Mr. 1:14-15; Lc. 4:14-15*)

¹² Níkuak Jesús okimatke nik in Juan Tlakuateekij okitzakej telpiloyan, ijkuakón Yej okiske de estado de Judea iwan oyáj itech estado de Galilea itech ipueblo Nazaret. ¹³ Pero mach omokaj itech ipueblo Nazaret, sino yej oyáj ochantito itech oksé pueblo itoka Capernaum, katlej kajki itempan lago, iwan kajki itech región de Zabulón iwan de Neftalí. ¹⁴ Ijkón otlapanok para ma mochiwa tlan okijkuiloj in profeta Isaías:

¹⁵ Tlale de Zabulón iwan tlale de Neftalí,
ojtle katlej panotok itempan lago, ik ne lado de yen weyatl Jordán,

tlale de Galilea kan chantij katlej mach judiojtin.

¹⁶ Nochtin yonmej tlakaj katlej oyekaj ijtik tlatleyualotl oki- takej se weyi tlanextle.

Opetlanke in tlanextle para katlej
oyekaj itech iekawilo in mikilistle.

¹⁷ Desde ijkuakón in Jesús opéj tetlapowia, iwan okijoaya:

—Ximoyolpejpenakan (ximoyolkuepakan) de amotlajtlakol, porke yoajsiko in tonale para tlanawatis in Dios amonawak.

*Jesús okinnotzke nawi michmajkej
(Mr. 1:16-20; Lc. 5:1-11)*

¹⁸ Jesú斯 onejnentiaya itempan lago de Galilea. Okinmitak omen iknimej: Se itoka Simón, noijki kinotzaj Pedro, iwan oksé itoka Andrés. Okintlamotlatokaj inmichmatlawan ijlik atl, porke yejwan oyekaj michmajkej. ¹⁹ Jesú斯 okinmilwij:

—Namejwan anmichmajkej. Pero axan xiwikikan nowan, para ankintlapowisnej in tlakaj de notlajtol para ma momakixtikan kej yeskia ankinkitziskej michimej.

²⁰ San niman okinkajtejkej inmichmatlawan iwan oyajkej iwan Jesú斯.

²¹ Ok achitzin tlayakapan, Jesú斯 okinmitak ok omen iknimej: Se itoka Santiago iwan oksé itoka Juan, itelpokawan in Zebedeo, katlej oyekaj iwan intaj itech se barko okintilichojojtokaj inmichmatlawan. Iwan Jesú斯 okinnotzke. ²² Yejwan san niman okajtejkej inbarko iwan intaj, iwan oyajkej iwan Jesú斯.

*Jesús okinmachtij miekej tlakaj
(Lc. 6:17-19)*

²³ Jesú斯 onemia itech nochí in estado de Galilea, otlamachtiaya itech intiopanwan in judiojin. Otetlapowiaya de yen kuale tlajtole katlej temakixtia de kenik in Dios tlanawatia. Iwan okinpajtiaya in tlakaj de nochí kokolistle iwan de nochí kualolistle. ²⁴ Otlapoayaj de Jesú斯 asta ik nowian (nian nepa) país de Siria. Iwan tlakaj okinwalwikiliyaj nochtin katlej okipiayaj nochí tlamantle de kualolistle iwan de kokolistle, katlej okipiayaj mach kuale ejekatl, katlej mimikij, iwan katlej wilanmej (temetlamej). Iwan Jesú斯 okinpajtij nochtin. ²⁵ Oyayaj iwan Jesú斯 miekej tlakaj de estado de Galilea iwan de se región kan oyekaj majtlakte pueblojtin katlej okitokayotiayaj Decápolis. Noijki oyayaj miekej de weyikan de Jerusalén, de estado de Judea, iwan de ik ne lado de yen weyatl Jordán.

5

Jesús otlamachtij ipan tepetl

¹ Nijuak in Jesú斯 okinmitak miekej tlakaj, otlejkok ipan se tepetl, iwan ompa omotlalij. Imomachtijkawan omikuani-jkej inawak. ² Iwan Yej opéj kinmachtia ijkín:

*Akinmej moneki ma pakikan
(Lc. 6:20-23)*

³ —Ma pakikan katlej momachiliaj pobrestin ipan inyolo, porke yejwan kipiaj parte itech ilwikak kan Dios tlanawatia.

⁴ 'Ma pakikan katlej chokaj, porke yejwan moyolosewiskej.

⁵ 'Ma pakikan katlej mach moweyinekij, porke yejwan kimoaxkatiskej in tlale katlej Dios okinkakitij kinmakas.

⁶ 'Ma pakikan katlej melawak kinekij yeskej yolchipawakej, ken nijuak akaj tiojsiwi iwan amiki. Porke yejwan ixwiskej.

⁷ 'Ma pakikan katlej teiknomatij, porke Dios noiiki kinmiknomatis.

⁸ 'Ma pakikan katlej yolchipawakej, porke yejwan kitaskej in Dios.

⁹ 'Ma pakikan katlej kichiwaj ma yeto yolosewilistle, porke Dios kinnotzas kej ikonewan.

¹⁰ 'Ma pakikan katlej kintlatlalochtiaj por kichiwaj tlan Dios kineki, porke yejwan kipiaskej parte itech ilwikak kan Dios tlanawatia.

¹¹ 'Xipakikan namejwan nijuak in tlakaj amechwikaltiskej, nijuak amechtlatlalochtiskej, iwan nijuak amechtlajtolatlaliliskej por annechneltokaj. ¹² Xipakikan, porke namejwan ankiresibiroskej se weyi tlaxtlawile ompa ilwikak. Xikelnamikikan nik in ya wejkawitl profetajtin noiiki okintlatlalochtijkej.

Namejwan ankatej ken istatl iwan ken tlanextle ixko yin tlaltikpak

(*Mr. 9:50; Lc. 14:34-35*)

¹³ 'Namejwan ankatej ken istatl ixko yin tlaltikpak. Pero tla in istatl kipolos ipuyeka, ¿kenik oksemi puyeyas? Mach ok kuale, sa se kitlamotla ipan ojtle iwan in tlakaj sa ipan tlajtlaksaj.

¹⁴ 'Namejwan ankatej ken tlanextle ixko yin tlaltikpak, ken se weyikan katlej kajki ipan se tepetl iwan mach weli motlaatia. ¹⁵ Nion amakaj kitlikuitia se tlanextle para se kitlaatis itlampa se chikiwitl. Sino se kitlalia ajkopan para ma kintlawili nochtin katlej katej kalijtik. ¹⁶ Namejwan no ijkón, ma tlawi namotlanex inmixpan nochtin in tlakaj, para ma kitakan tlan kuale ankichiwaj, iwan ijkón ma kiweyikixtikan namoPapan Dios katlej kajki ilwikak.

Jesús otlamachtij de yen itlanawatil in Moisés

¹⁷ 'Amo xikyejyekokan ke oniwalañ onikpojpoloko itlanawatil in Moisés o noso tlan okikuilojkej in profetajtin. Mach oniwalañ para nikpojpolos, sino oniwalañ para nikchiwas nochti tlan kijta. ¹⁸ Pero ipan melajka namechilwia, mientras yetos in ilwikak iwan tlaltikpak, mach poliwis nion se letra, iwan nion se punto katlej ijkuititok itech itlanawatil in Moisés, asta ma mochiwa nochti tlan omikuiloj. ¹⁹ Por yonik, tla akaj amo kichiwas kuenta kanaj se tlanawatile de Moisés, maski wel tzikitzin ma yeto, iwan tla akaj tlamachtis amo ma kichiwakan kuenta in yon tlanawatile, yon tlakatl

sa tekitl tzikitzin yetos ompa ilwikak kan Dios tlanawatia. Pero tla akaj kichiwas iwan tlamachtis tlan kijta in yon tlanawatile, yetos sa tekitl weyi ompa ilwikak kan Dios tlanawatia.²⁰ Por yonik namechilwia nik mach ankalakiskej ompa ilwikak kan Dios tlanawatia, in tla amo ankichiwaskej tlan kuale ixpan Dios okachi ke tlan kichiwaj in tlamachtijkej de itech itlanawatil in Moisés iwan fariseos.

Tlajtlakole de kualanilistle
(Lc. 12:57-59)

²¹ 'Namejwan ya ankikakej ke ya wejkawitl okinmilwijkej namoweyitajwan: "Amo xitemiki, porke akin temiktis kipia de kitemaktiskej (kitemaktiliskej) innawak tekiwajkej para kitlajtlakoltiskej."²² Pero Nej namechilwia, ke tla akaj kualanis inawak ikni, kipia de wetziti kan tlaixkomakaj (tlatzonmanaj) para kitlajtlakoltiskej. Iwan akin kilwis in ikni tonto, kipia de kixkomakaskej itech se junta para kitlajtlakoltiskej. Iwan akin kiwikaltis in ikni, yetos tlajtlakolej iwan welis yas ijtk tliko.

²³ 'Por yonik, tla ikuak ya tikitki moofrenda kan kajki in artal iwan ikuakón tikwalelnamiki nik in mokni mitzkualanijtok,²⁴ okachi kuale xikajtewa moofrenda ompa itech artal, iwan xiwia ximotlapojpolwiti iwan mokni. Iwan ikuakón ya welis timokuepas kan artal iwan xiktemaka moofrenda.

²⁵ 'Tla akaj mitztilwia kan tlaixkomakaj (tlatzonmanaj), xajsikan san se tlajtole achtoj mientras tiweli, para amo ma mitztemakti (mitztemaktili) inawak in jue. Porke in tla amo, in jue mitztemaktis inmak in mayoltin iwan mitztzakuaskej telpiloyan.²⁶ Ipan melajka nimitzilwia, nik amo tikisas de ompa asta amo xiktlaxtlawa in salúltimo sentabo para tikisas.

Tlajtlakole tla se momekatis

²⁷ 'Namejwan ya ankikakej nik ya wejkawitl okinmilwijkej namoweyitajwan: "Amo ximomekatikan."²⁸ Pero Nej namechilwia, tla akaj xikelewia se siwatl, kijtosneki ya kimomekatia ipan iyolo.

²⁹ 'Por yonik, tla moyekixtololo mitztoktia xiwetzi ipan tlajtlakole, okachi kuale xikmokixtili iwan xiktlamotla wejka. Porke okachi kuale xikpolo se parte de motlalnakayo, ke nochí motlalnakayo ma kitlamotlakan ijtk tliko.³⁰ Iwan tla moyekma mitztoktia xiwetzi ipan tlajtlakole, okachi kuale xikmotzontekili iwan xiktlamotla wejka. Porke okachi kuale xikpolo se parte de motlalnakayo, ke nochí motlalnakayo ma kitlamotlakan ijtk tliko.

Jesús otlamachtij amo ma mosiwakawakan
(Mt. 19:9; Mr. 10:11-12; Lc. 16:18)

³¹ 'Namejwan noijki ya ankikakej nik ya wejkawitl okin-milwijkej namoweyitajwan: "Akin kikajkawas isiwa, kipia de kimakas se amatl kan kijtojtos nik mokajkawa iwan isiwa." ³² Pero Nej namechilwia, tla se tlakatl mokajkawa iwan isiwa, maski isiwa mach momekatia, yon tlakatl kijtosneki kimaka parte isiwa ma momekati iwan akaj tlakatl. Iwan tla akaj monamiktis iwan yon siwatl, kijtosneki iwan momekatia.

Amo xikijtokan Dios tlachixtok

³³ 'Namejwan noijki ya ankikakej nik ya wejkawitl okin-milwijkej namoweyitajwan: "Tla tej tikipta tikchiwas itlaj tlamantle iwan asta tikipta Dios tlachixtok, tonses moneki xikchiwa." ³⁴ Pero Nej namechilwia, amo xikijtokan Dios tlachixtok, iwan nion amo xikijtokan tlachixtok in ilwikak nik melawak tlan ankijtaj, porke in Dios ompa ewatok tlanawatijtok. ³⁵ Nion amo xikijtokan tlachixtok in tlaltikpak nik melawak tlan ankijtaj, porke ompa tlaksatokej ikxiwan in toTajzin Dios. Nion amo xikijtokan tlachixtok in weyikan de Jerusalén nik melawak tlan ankijtaj, porke in toweyi Rey Dios yen yon iweyikan. ³⁶ Nion amo xikijtokan tlachixtok namotzontekon nik melawak tlan ankijtaj, porke mach welis ankichiwaskej se amotzonkal ma istaya o noso ma tliliwia. ³⁷ Amo ijkón xikchiwakan. Okachi kuale xikijtokan "kuale kaj" o noso "amo", porke tla ankijtoskej Dios tlachixtok, kijtosneki ankichiwiwaj tlan amo kuale, iwan Amo Kuale Tlakatl yen yon kineki xikchiwakan.

Jesús okijtoj amo ma tikinkuepaltikan tla itlaj techtoktiaj (Lc. 6:29-30)

³⁸ 'Namejwan ya ankikakej nik ya wejkawitl omijtoj: "Tla akaj teixkopina, ma kixkopinakan yej noijki. Tla akaj tet-lanmayawi, ma kitlanmayawikan yej noijki." ³⁹ Pero Nej namechilwia, tla akaj anmechtoktia itlaj amo kuale, amo xikkuepaltikan. Sino, tla akaj amechixtlatzinia se lado, xikkawili noijki ma mitzixtlatzini in oksé lado. ⁴⁰ Tla akaj kineki mitzwikas kan tlaixkomakaj (tlatzonmanaj) para mitzkixtilis motzotzol, xikmaka noijki mokoton. ⁴¹ Tla akaj mitznekatoktia xitlamama se kilómetro, tej xitlamama ome kilómetro. ⁴² Tla akaj mitztlajtlanilia itlaj tlamantle, tej xikmaka. Iwan tla akaj itlaj mitztlanewilia, xiktlaneti.

Xikintlasojtlakan akinmej amechkokoliaj (Lc. 6:27-28, 32-36)

⁴³ 'Noijki ya ankikakej nik ya wejkawitl omijtoj: "Xikintlasojtlakan akinmej amechkokoliaj." ⁴⁴ Pero

Nej namechilwia, xikintlasojtlakan akinmej amechkokolaj, iwan ximotiotzajtzilikan por yen akinmej amechtlalochtiaj.⁴⁵ Ijkón namejwan anyeskej antekonewan de namoPapan Dios katlej kajki ilwikak. Porke Yej kichiwa in tonale ma kisa para katlej mach kualtin iwan para katlej kualtin, iwan kichiwa ma kiawi para katlej kichiwaj tlan kuale iwan para katlej kichiwaj tlan amo kuale.⁴⁶ Porke in tla namejwan ankintlasojtlaj sanwel katlej amechtlasojtlaj, ¿tlan welis ankitlaniskej? Asta katlej tlakobraroaj ika impuestos no ijkón kichiwaj.⁴⁷ Iwan tla ankintlajpalooaj san yen namokniwan, ¿ankichiwaj itlaj tlan oksekimej mach welij kichiwaj? Asta katlej mach kixmatij Dios no ijkón kichiwaj.⁴⁸ Xiekan namejwan ipan melajka ankuaultin tlakaj, ken namoPapan Dios katlej kajki ilwikak Yej ipan melajka kuale tlakatl.

6

Kenamij se kichiwas ixpan Dios nikuak se kitemakas itlaj

¹ 'Xikpiakan kuidado nikuak ankichiwaskej tlan kuale, amo xikchiwakan inmixpan tlakaj san para ma kitakan tlan ankichiwaj. Tla ijkón ankichiwaskej, mach welis ankiresibiroskej in tlaxtlawile katlej kitemakas namoPapan Dios katlej kajki ilwikak.

² 'Por yonik, nikuak itlaj ankitetliokoliskej amo xiktematiltikan nian nepa, ken kichiwaj in tlakaj katlej ome inmixko. Porke yejwan ijkón kichiwaj itech tiopanmej iwan ipan ojtle, para ma kinmitakan iwan ma tlapoakan kuale de yejwan. Ipan melajka namechilwia, nik in yonmej tlakaj mach ok itlaj tlaxtlawile kiresibiroskej.³ Nikuak in tej itlaj tiktetliokolis, amakaj ma kimati nion yen moamigo katlej okachi iwan timuika.⁴ Tla itlaj tiktemakas xiktemaka san ichtaka. Iwan moPapan Dios katlej kita nochí tlan tikchiwa ichtaka, Yej mitzmakas motlaxtlawil.

Jesús otechmachtij kenik timotiotzajtziliskej

(Lc. 11:2-4)

⁵ 'Nikuak amejwan anmotiotzajtziliskej, amo xikchiwakan ken kichiwaj in tlakaj katlej ome inmixko, katlej kiwelitaj motiotzajtziliskej mokejketokej itech tiopanmej iwan itech eskinajtin de yen ojmej para ma kinmitakan. Ipan melajka namechilwia, nik in yonmej tlakaj mach ok itlaj tlaxtlawile kiresibiroskej.⁶ Pero tej, nikuak timotiotzajtzilis, xikalaki mokalijtik, ximokaltzakua iwan ximotiotzajtzili ompa ichtaka inawak moPapan Dios. Iwan moPapan Dios katlej kita tlan tikchiwa ichtaka, Yej mitzmakas motlaxtlawil.

⁷ 'Iwan nikuak anmotiotzajtziliskej amo san ompa xikkueptokan in tlajtole, ken kichiwaj in tlakaj katlej mach

kixmatij Dios, porke yejwan kiyeyekoaj tla san ompa kikueptoskej in tlajtole okachi kinkakilis in Dios. ⁸ Amo xikchiwakan ken yejwan, porke namoPapan Dios ya kimati tlan namechpoloa antes de ankitlajtlaniliskej. ⁹ Namejwan moneki ximotiotzajtzilikan ijkín:

ToPapan Dios katlej tejwatzin tikaj ilwikak,
Ma nochtin in tlakaj ma mitzyektenewakan.

¹⁰ Ma ajsiki in tonale nijuak tikinnawatis nochtin in tlakaj.
Ma mochiwa tlan tikmonekiltia ixko yin tlaltikpak,
ijkón ken tlan tikmonekiltia ma mochiwa ompa ilwikak.

¹¹ Xitechmaka axan tlan tikkusakej katlej nochipa ika tipanoskej.

¹² Iwan xitechtlapojpolwi de totlajtlakol,
ken tejwan noijki tikintlapojpolwiaj akinmej techtoktiaj tlan amo kuale.

¹³ Iwan amo xitechmotekawili ma techtlajtlakolmayawi in Amo Kuale Tlakatl, sino xitechmakixti de inawak.

Timitztlajtlaniliaj in yin porke tejwatzin tiknawatia nochí, tikpia poder, iwan tikpia mawisotlanextle iktlanke (ik tlami). Ijkón ma yeto.

¹⁴ 'Porke tla namejwan antetlapojpolwiaj de nochí tlan amechtoktiaj, namoPapan Dios katlej kajki ilwikak noijki amechtlapojpolwis. ¹⁵ Pero in tla namejwan amo antetlapojpolwiskej, noijki namoPapan Dios mach amechtlapojpolwis.

Jesús otlamachtij kenik se mosawas (ayunarios)

¹⁶ 'Nijuak amejwan anmosawasakej, amo ximoiknot-lachaltikan ken kichiwaj in tlakaj katlej ome inmixko, porke yejwan moiknotlachaltiaj para ma kinmitakan nik mosawtokej. Ipan melajka namechilwia, nik mach ok itlaj tlaxtlawile kiresibiroskej. ¹⁷ Tej nijuak timosawas, ximixami iwan kuale ximotizjitzikui. ¹⁸ Ijkón, mach akaj kimatis kox timosawtok, sanwel kimatis moPapan Dios katlej yetos mowan, iwan moPapan Dios katlej kimati tlan tikchiwaichtaka, Yej mitzmakas motlaxtlawil.

Ma se kololo rikoyotl itech ilwikak (Lc. 12:33-34)

¹⁹ 'Amo xikololokan rikoyotl ixko yin tlaltikpak, kan tlakuakualo iwan tlapalani, iwan tlachtekij. ²⁰ Sino xikololokan rikoyotl ompa ilwikak, kan mach tlakuakualo, iwan mach tlapalani, iwan nion mach tlachtekij. ²¹ Porke kan yetos namorikojyo, ompa yetos noijki namoyolo.

Itlanex in totlalnakayo (Lc. 11:34-36)

²² 'Namoixtololowan ankinpiaj kej se tlanextle para namoanima, iwan tla namoixtololowan kualemej, namoanima kipias tlanextle. ²³ Pero in tla namoixtololowan mach kualemej por yen tlajtlakole, nochi namoanima yetos ijlik tlatleyualotl. Ijkón kiné, tla namotlanex yomokuepke tlatleyualotl itech namoanima por yen tlajtlakole, kijtosneki ankatej itech se weyi tlatleyualotl iwan mach onkaj oksé tlatleyualotl ijkón.

*In toTajzin Dios iwan rikojyotl
(Lc. 16:13)*

²⁴ 'Mach akaj tlakatl welis kinpias ome itekowan, porke welis kitlasojtas in se iwan oksé mach kitlasojtas, o noso welis kitlakitas in se iwan oksé mach kitlakitas. Mach welis ankitekipanoskej in Dios mientras amechyoltilantok in rikojyotl.

*Amo se ma motlanemililti
(Lc. 12:22-31)*

²⁵ 'Por yonik namechilwia, amo ximotlanemililtikan por tlan ankikuaskej o noso tlan ankoniskej para anyolitoskej, nion amo ximotlanemililtikan por tlan ankonakiskej. ¿Amo ankimatij nik in tonemilis okachi ipatij ke totlakual? ¿Amo ankimatij noijki nik in totlalnakayo okachi ipatij ke tlan tikonaquiaj? ²⁶ Xikinmitakan in totomej katlej patlantinemij. Mach tookaj, mach pixkaj, iwan nion mach itlaj kitlaatiaj ijlik kueskomatl. Pero namoPapan katlej kajki ilwikak Yej kintlamaka. Iwan namejwan okachi amopatij iwan amo ken totomej. ²⁷ Tla akaj de amejwan sa tekitl tlanemilia porke kineki moskaltis ok tlajko metro, ¿kox welis moskaltis?

²⁸ ¿Tlanik namejwan wel anmotlanemililtiaj por tlan ankonakiskej? Xikitakan kenik moskaltiaj in xochimej ipan tepetl. Mach tekipanoaj iwan nion mach tlajtzomaj.

²⁹ Pero Nej namechilwia ke nion rey Salomón mach semi omotzotzoltij ken se de yon xochitl maski omotzotzoltiaya ika katlej okachi kuale itzotzol. ³⁰ Iwan tla Dios ijkón kitlakentia in xochitl katlej axan kajki ipan tepetl iwan mostla wiptla mochichinos ijlik tlitl, ¿kenik amo ma amechezotzolti namejwan? ¡Namejwan wel tzikitzin namotlaneltokalis!

³¹ Amo ximotlanemililtikan kiné, amo xikmolwikan: "¿Tlan tikkuaskej? o noso ¿tlan tikonaiskej? o noso ¿tlan tikonakiskej?"

³² Nochi in yin tlamantle ika motlanemililtiaj in tlakaj katlej mach kixmatij Dios. Pero namejwan ankipiaj namoPapan katlej kajki ilwikak katlej ya kimati tlan amechpoloa.

³³ Por yonik, namejwan achtoj xikchiwakan tlan Dios amechnawatia ipan namoyolo para xikchiwakan ken Yej kineki. Iwan ijkón Dios amechmakas noijki nochi yon

tlamantle. ³⁴ Ijkón kiné, amo ximotlanemililtikan por yen mostla, porke mostla welis oksemi anmotlanemililtiskej. Kada tonale yipa ankipiaskej tlan ika anmotlanemililtiskej.

7

Amo ma se tepojpoa
(Lc. 6:37-38, 41-42)

¹ 'Amo xikinpojpoakan oksekimej, para namejwan noijski amo ma amechpojpoakan. ² Porke tla antepojpoaskej namejwan noijski amechpojpoaskej. Porke Dios amechtuktis ijkón ken namejwan antetoktiaj. ³ ¿Kenik in tej weli tikistlakawia in mokni por yen tlajtlakole tlan kichiwa, iwan tej mach timota nik tikaj okachi titlajtlakolej? ⁴ Iwan, ¿kenik weli tikilwia in mokni: "Mach ok xitlajtlako", iwan tej tikchijtok miek tlajtlakole? ⁵ ¡Teixkajkayaj! Achtoj tej xikkawa in tlajtlakole katlej miek tikchijtok, iwan ijkón welis tikilwis in mokni mach ok ma tlajtlako.

⁶ Itlajtol in Dios katlej chipawak amo xikinmakakan in tlakaj katlej kipiaj mach kuale inyolo. Porke yon kej yeskia ankinmakaj in chichimej ma kikuakan tlan Dios iaxka, iwan noijski kej yeskia ankinmakaj in pitzomej ma kikuakan se tlamantle katlej sa tekitl patíoj. Porke yejwan san ipan tlajtlaksaskej iwan welis mokuepaskej amotech iwan amechkuaskej.

Dios techmakas tlan tiktlatlaniiskej
(Lc. 11:9-13; 6:31)

⁷ Xiktlajtlanilikan Dios tlan amechpoloa, iwan Yej amechmakas. Xiktemokan tlan amechpoloa, iwan ankajisiskej. Xik-tatalatzakan puerta, iwan Dios amechtlatlapolis. ⁸ Porke akin itlaj kitlajtlani, kiresibiroa. Iwan akin itlaj kitemoa, kajsi. Iwan akin kitatalatza in puerta, kitlatlapoliaj.

⁹ ¿Welis tikmakas mokane se tetl nijuak mitztlajtlanilis se pan? ¹⁰ ¿O noso welis tikmakas se koatl nijuak mitztlajtlanilis se michin? ¹¹ Iwan tla namejwan katlej mach ankuaultin ankimati j ankinmakaj namopilwan tlan kuale, ¿amo ankineltokaj nik in namoPapan katlej kajki ilwikak welis kinmakas itlaj tlan kuale akinmej kitlajtlaniliskej?

¹² Ijkón kiné, namejwan xikinchiwikan oksekimej ijkón ken namejwan ankinekij ma amechchiwikan. Nochi in tlanawatile de Moisés iwan nochí tlan okijkuijlojkej in profetajtin yen yon tlan kijtaj xikchiwakan.

Puerta katlej kopichtik
(Lc. 13:24)

¹³ 'Xikalakikan itech puerta kopichtik katlej yawi ilwikak. Porke in puerta katlej kuyawak iwan ojtle katlej patlaktik tewikaj kan tlaixpolojkan, iwan miekej tlakaj yawij ipan yon ojtle. ¹⁴ Pero sa tekitl kopichtik in puerta iwan sa tekitl pitzaktzin in ojtle katlej tewikaj itech nemilistle, iwan mach miekej kajsij.

*Se kuawitl mixmati por yen itlakilo
(Lc. 6:43-44)*

¹⁵ 'Xikpiakan kuidado de nekatej tlakaj teixkajkayajkej katlej mochiwaj tlapoaj de Dios. Yejwan motaj kej kualtin tlakaj, pero mach melawak, motaj kej ichkamej pero yejwan katej kej koyomej. ¹⁶ Namejwan welis ankinmixmatiskej kuale por yen tlan kichiwaj. Porke mach moteki uvas itech witztle, iwan nion mach moteki igos itech nojpale. ¹⁷ Nochi tlatoktle kuale kitemaka kuale itlakilo, pero in tlatoktle katlej mach kuale noijki kitemaka itlakilo mach kuale. ¹⁸ Se tlatoktle kuale mach kitemaka itlakilo mach kuale, iwan se tlatoktle katlej mach kuale mach weli kitemaka itlakilo kuale. ¹⁹ Nochi tlatoktle katlej mach kitemaka kuale itlakilo, se kitzonteki iwan se kitlamotla ijtit tlitl. ²⁰ Ijkón kiné, namejwan welis ankinmixmatiskej kuale por yen tlan kichiwaj.

*Mach nochtin kalakiskej ilwikak kan Dios tlanawatia
(Lc. 13:25-27)*

²¹ Miekej tlakaj nechilwiaj: "Señor, Señor", pero mach nochtin kalakiskej ilwikak kan Dios tlanawatia. Sino kalakiskej san yejwan katlej kichiwaj tlan kimonekiltia in noPapan katlej kajki ilwikak. ²² Miekej nechilwiskej itech nekáj tonale: "Señor, Señor, ¿amo tikelnamiki nik in tejwan otitetlapowijkej ika motoka, iwan ika motoka otikinkixtijkej demoniojtin, iwan ika motoka otikinchijkej miekej milagrostin?" ²³ Ikuakón Nej nikinmilwis: "Mach semi onamechixmatke. Ximachiwakan de Nej, tlajtlakolejkej."

*Omen tlakaj okichijkej inkalwan
(Lc. 6:47-49; Mr. 1:22)*

²⁴ Ijkón kiné, akin kikaki iwan kichiwa tlan nikijta, yon ken se tlakatl ixtlamatke katlej okichij ikal ipan tepejxitl. ²⁵ Owalaj se tlamawisolkiawatl, iwan otlatlawitonke ik nian nepa, iwan chikawak oejakak, iwan mach owetzke in yon kale porke kajki ipan tepejxitl. ²⁶ Pero akin nechkaki iwan amo kichiwa tlan nikijta, yon ken se tlakatl katlej mach kigmati tlakaki iwan okichij ikal ijtit xale. ²⁷ Owalaj se tlamawisolkiawatl, otlatlawitonke ik nian nepa, iwan chikawak oejakak, iwan kale owetzke iwan nochti oxitinke.

²⁸ Níjkuak Jesús otlanke okintlapowij, nochtin in tlakaj sa otlajtlachixkej (omomajmawtijkej) de kenik okinmachtiaya.
²⁹ Porke otlamachtiaya ika chikawak tlanawatilie, iwan amo ken otlamachtiayaj in tlamachtijkej de itlanawatil in Moisés.

8

Jesús okipajtij se tlakatl katlej opalania inakayo

(*Mr. 1:40-45; Lc. 5:12-16*)

¹ Níjkuak Jesús otemok de ipan tepetl, miekej tlakaj oyajkej Iwan. ² Ijkuakón omíjkuanij inawak Jesús se tlakatl katlej opalania inakayo, omotlankuaketzke iyakapan iwan okilwij:

—Señor, tla tikmonekiltiani, welini tinechpajtiani.

³ Jesús okitlalij ima ipan yon tlakatl iwan okilwij:

—Nej nikneki xipajti.

Iwan san niman opajtik de ikokolis. ⁴ Iwan Jesús okilwij:

—Xikkaki, amakaj itlaj xikilwi. San xiwia inawak in tiopixke, iwan xiktemaka moofrenda tlan Moisés otlanawatij ma motemaka, para ijkón nochtin ma kimatikan nik in Dios yomitzpajtij de mokokolis.

Jesús okipajtij itekipanoj se kapitan

(*Lc. 7:1-10*)

⁵ Níjkuak Jesús okalakke itech pueblo de Capernaum, ijkuakón se kapitan omíjkuanij inawak Jesús, iwan okitlatlawtij. ⁶ Okilwij:

—Señor, notekipanoj kajki nokalijtik mokokoa, owijwilantik iwan sa tekitl wapawiswilo.

⁷ Jesús okinankilij:

—Ompa niawi nikpajtiti.

⁸ In kapitan okilwij:

—Señor, mach notech powi xikalaki nokalijtik. Iwan mach moneki xiwia asta ompa, san nian xikijto ma pajti iwan notekipanoj pajtis. ⁹ Yon nej kuale nikmati. Porke nej noijki nimomatok nikintlakita notlayekankej. Iwan noijki nikinpia soldadojtin katlej nechtlakitaj. Iwan tla nikilwis se de yejwan: “Xiwia ne”, in yej yawi. Iwan tla nikilwis oksé: “Xiliki”, in yej witz. Iwan tla nikilwis in notekipanoj: “Xikchiwa yin tekitl”, in yej kichiwa.

¹⁰ Níjkuak ijkón okikakke in Jesús, sa otlajtlachixke (omomajmawtij), iwan okinmilwij in tlakaj katlej Iwan oyayah:

—Ipan melajka namechilwia, nik mach nikajsi nion se judío katlej kipia weyi itlaneltokalis ken yin tlakatl. ¹¹ Iwan namechilwia nik witzej miekej tlakaj de ik ikisayan tonale iwan de ik ipoliwian tonale, iwan motlaliskej tlakuaskej iwan Abraham, iwan Isaac, iwan Jacob, ompa ilwikak kan Dios tlanawatia. ¹² Pero miekej judiojtin katlej Dios okinekia

ma kalakikan ompa kan Yej tlanawatia, yeskej kalan ijтиk tlatleyualotl. Ompa chokaskej iwan motlanteteyitzaskej.

¹³ Ijkuakón Jesúس okilwij in kapitan:

—Xiwia mochan, iwan ma mochiwa ijkón ken tej tiknel-toka.

Iwan san niman ijkuakón opajtik itekipanoj in kapitan.

Jesús okipajtij imonan in Pedro

(*Mr. 1:29-31; Lc. 4:38-39*)

¹⁴ Jesúś oyáj ichan Pedro, iwan okitajsik imonan in Pedro wetok ipan itlapech kipia totonik. ¹⁵ Jesúś okimakitzkij imonan in Pedro, iwan in totonik okiske. Imonan Pedro omejke iwan okintlamakak.

Jesús okinpajtij miekej kokoxkej

(*Mr. 1:32-34; Lc. 4:40-41*)

¹⁶ Níkuak owaltlatleyuak okinwikilijkej in Jesúś miekej tlakaj katlej okipiayaj ejekamej mach kualtin. Iwan san ika se tlajtole okinkixtij in yonmej ejekamej, iwan noijki okinpajtij nochtin katlej omokokoayaj. ¹⁷ Ijkón otlapanok para ma mochiwa tlan okijtoj in profeta Isaías, níkuak okijtoj: “Yej otechpajtij de tokokolis iwan otechpojpolilij in tokualolis.”

Katlej kinekij nemiskej iwan Jesúś

(*Lc. 9:57-62*)

¹⁸ Níkuak Jesúś okitak opéj kiyawaloaj miekej tlakaj, ijkuakón okinnawatij imomachtijkawan ma panokan oksé lado de yen lago. ¹⁹ Iwan ijkuakón omikuani inawak Jesúś se tlamachtij itech tlanawatile de Moisés, iwan okilwij:

—Tlamachtij, nikneki nimitzwikas san kan Tej tias.

²⁰ Jesúś okinankilij:

—In ostomej kipiaj inkuyok, iwan totomej kipiaj intepajsol, pero Nej katlej onimochij nitlakatl mach nikpia kan nimosewis.

²¹ Oksé de yen imomachtijkawan noijki okilwij:

—Señor, xinechkawili achtoj ma niktookati nopapan.

²² Jesúś okinankilij:

—Xiwiki nowan, xikinkawa katlej mach nechneltokaj yejwan ma kintookakan inmikkawan.

Jesús okiketzaltij in ejekatl iwan atl

(*Mr. 4:35-41; Lc. 8:22-25*)

²³ Jesúś otlejkok itech se barko, iwan imomachtijkawan oyajkej Iwan. ²⁴ Ijkuakón opéj ejeka chikawak iwan atl opéj motlatlamotla ipan barko iwan oatemiaj. Pero Jesúś okochtoka.

²⁵ Tones imomachtijkawan okijxitijkej, iwan okilwijkej:

—¡Señor, xitechmakixti! ¡Tiapolakij!

²⁶ Yej okinnankilij:

—¿Tlanik wel anmomawtiaj? Namejwan wel tzikitzin namotlaneltokalis.

Ijkuakón, omoketzke, okajwak in ejekatl iwan atl, iwan san niman omokaj sa tlamantok.²⁷ Imomachtijkawan sa otlajtlachixkej (omomajmawtijkej). Iwan okijtokej:

—¿Akin yin tlakatl, porke asta yen ejekatl iwan atl kitlakitaj?

*In gadarenostlakaj katlej okipiayaj ejekamej mach kualtin
(Mr. 5:1-20; Lc. 8:26-39)*

²⁸ Nijuak Jesús oajsito oksé lado de yen lago, itech tlale de pueblo de Gadara, ijkuakón omen tlakaj katlej okipiayaj ejekamej mach kualtin owalkiskej de kan mikkakuyoktin iwan omijkuanijkej inawak Jesús. Oyekaj sa tekitl temaj-mawtijkej iwan mach akaj owelia opanoaya ipan yon ojtle.

²⁹ Nijuak okitakej in Jesús, otzajtikej, iwan okijtokej:

—¡Amo ximokalaki towan, Jesús, teKone de Dios! ¿Otiwalaj nian para titechtlajyowiltis antes de ajsiki in tonale?

³⁰ Iwan mach wejka de ompa, oyekaj miekej pitzomej ot-lakuajtokaj. ³¹ Iwan ejekamej mach kualtin okitlatlawtijkej in Jesús:

—Tla titechkixtis de intech yinmej tlakaj, toneses xitechkawili ma tikalakikan intech nekatej pitzomej.

³² Jesús okinmilwij:

—Xiwian kiné.

In ejekamej mach kualtin okiskej de intech yonmej tlakaj iwan okalakej intech nekatej pitzomej. Iwan san niman ijkuakón nochtin in pitzomej omotlalojkej iwan omotepejxi-witoj asta ijtik atl, iwan ompa omoatlanwijkej iwan omikkej.

³³ In tlajpixkej de yonmej pitzomej ocholojkej. Iwan nijuak oajsikej itech pueblo opéj kitematiltiaj nochí tlan ot-lapanok iwan de yen tlakaj katlej okipiayaj ejekamej mach kualtin. ³⁴ Satepan nochtin in tlakaj de yon pueblo oyajkej kan oyeka in Jesús, iwan nijuak okitakej okitlatlawtijkej ma wia de ompa de itech intlal.

9

*Jesús okipajtij se tlakatl katlej owijwilantik (otemetlatik)
(Mr. 2:1-12; Lc. 5:17-26)*

¹ Jesús otlejkok itech se barko, opanok oksé lado de yen lago, iwan oajsito itech pueblo de Capernaum kan Yej ochantia.

² Ompa oajsikoj sekimej tlakaj katlej okualwikiliayaj in Jesús se tlakatl ipan itlapech katlej owijwilantik. Iwan nijuak Jesús okitak intlaneltokalis in yonmej tlakaj, ijkuakón okilwij in kokoxke:

—Ximoyolojchikawa, nokone. Nimitzlapojpolwia de nochí motlajtlakol.

³ Pero sekimej tlamachtijkej de itlanawatil in Moisés okiyejyekojkej: “Yin tlakatl tlajtoa biero de Dios.” ⁴ Pero Jesús okimomakak kuenta de tlan okiyejyekoayaj, iwan okinmilwij:

—¿Tlanik namejwan mach kuale tlan ankiyejyekoaj?

⁵ ¿Katlij yen okachi mach owij nikilwis in kokoxke: “Nimitzlapojpolwia de nochí motlajtlakol”, o noso nikilwis: “Ximewa, iwan xinejnemi”? ⁶ Pero xikmatikan nik in Nej katlej onimochij nitlakatl, nikpia poder ixko yin tlaltikpak para nitelapojpolwis itech tlajtlakole.

Iwan ikuakón okilwij in tlakatl katlej owijwilantik:

—Ximewa, xikajkokui motlapech iwan xiwia mochan.

⁷ Tones in yej omoketzke iwan oyáj para ichan. ⁸ In tlakatin nikuak ijkón okitakej, sa otlaajtachixkej (omomajmawti-jkej) iwan okiweyikixtijkej in toTajzin Dios por okinmakak in tlakaj ipoder ijkón ken Jesús okimakak.

*Jesús okinotzke in Mateo
(Mr. 2:13-17; Lc. 5:27-32)*

⁹ Jesús okiske de ompa, okitak se tlakatl itoka Mateo oewatoka kan yej otlakobrarojtoka ika impuestos. Iwan Jesús okilwij:

—Xiwiki nowan.

Tones in Mateo omoketzke iwan oyáj iwan Jesús.

¹⁰ Itech se tonale, Jesús otlakuajtoka ichan Mateo inwan miejek katlej tlakobraroaj ika impuestos, iwan sekimej tlajtlakolejkej. Nochtin yejwan ovalajkej omotlalijkej san sekan iwan Jesús iwan imomachtijkawan. ¹¹ Nikuak in fariseos ijkón okitakej, okinmilwijkej in momachtijkej:

—¿Tlanik namotlamachtij tlakua inwan tlakaj tlajtlakolejkej iwan noijki tlakua inwan tlakaj katlej tlakobraroaj ika impuestos?

¹² Jesús okikakke iwan okinmilwij:

—In tlakaj katlej mach mokokoaj mach intech moneki tepajtij, sino intech moneki yen katlej mokokoaj. ¹³ Ximomachtikan tlan kijtosneki in tlajtole katlej ijkuitolitok itech tiotlajkuilole: “Nikneki xiteiknomatikan, mach nikneki xinechinmiktilikan yolkamej para ika annechweyikixtiskej.” Nej mach oniwalañ onikinnottzako katlej yolchipawakej, sino oniwalañ onikinnottzako katlej tlajtlakolejkej para ma moyolkuepakan inawak Dios.

Jesús okitlajtlanijkej tlanik san sekimej mosawaj iwan oksekimej amo

(Mr. 2:18-22; Lc. 5:33-39)

¹⁴ Imomachtijkawan in Juan Tlakuateekij omijkuanijkej inawak Jesús iwan okitlajtlanijkej:

—Tejwan iwan fariseos timosawaj (tiayunaroaj) miekpa, *¿tlanik momomachtijkawan mach mosawaj?*

¹⁵ Jesús okinnankilij:

—*¿Kox welis moyolkokoskej iinbitadoswan in novio ni-
jkuak yej inwan yetos? Pero ajsis tonale nijuak in yej mach
ok inwan yetos, iwan ijkuakón welis moyolkokoskej iwan
mosawaskej.*

¹⁶ 'Mach akaj kiyektlalia se tzotzole katlej ya tlajtlantok iwan kitilicho ika se pedaso tzotzole yankuik, porke in tzotzole yankuik mololoa iwan kitzayana in tzotzole katlej ya tlajtlantok, iwan okachi tzayani. ¹⁷ Nion mach se kitlalia vino yankuik ijtilik kulambre katlej ya tlajtlantok. In vino yankuik kitzomonia in kulambre katlej ya tlajtlantok, iwan vino iwan kulambre parejo ijtlakawij. Por yonik, in vino yankuik moneki motlalis ijtilik kulambre yankuik, para ijkón san ken omen ma tlaxikokan.

Ichpoch in Jairo iwan siwatl katlej oestlapowik

(*Mr. 5:21-43; Lc. 8:40-56*)

¹⁸ Iwan nijuak Jesús okintlapowijtoka in tlakaj de yon tla-
jtole, ijkuakón owalaj se tlayekanke judío, omotlankuaketk
iyakapan Jesús iwan okilwij:

—Nochpoch yakin tlami omikke. Pero tla tejwatzin tias iwan tla ipan tikintlalis momawan, moyolkuis (moyolitis).

¹⁹ Jesús omoketzke, oyáj iwan yon tlakatl iwan imomachti-
jkawan. ²⁰ Ijkuakón se siwatl katlej yokipiaya majtlakte iwan ome xiwitl de oestlapowik, omikuani ik ikuitlapan in Jesús iwan okitzkilij itzotzol san itempantzin. ²¹ Porke okimolwij: “Tla siera najsis niktlakenkitzkis, welis nipajtis.” ²² Pero Jesús omokuepke, okitlatak in siwatl iwan okilwij:

—Ximoyolojchikawa, nokone, yotipajtik porke otinechnel-
tokak.

Iwan san niman ijkuakón opajtik in siwatl.

²³ Nijuak Jesús oajsito ichan tlayekanke judío, okinmitak in tlapitzkej yomoyektlalijkej para kitookatiwej in ichpochtle, iwan in tlakaj okuawtzajtziaj ika chokilistle. ²⁴ Jesús okinmil-
wij:

—Xikisakan de nian, yin ichpochtle mach ya miki, sino yej kochi.

In tlakaj okiwewetzkilijkej in Jesús. ²⁵ Pero Yej okinkixtij. Ijkuakón okalakke iwan okimakitzkij in ichpochtle, iwan ichpochtle omejke. ²⁶ Iwan itech nochi nekáj país okimatkej de tlan otlapanok.

Jesús okinpajtij omen tlakaj katlej mach tlachiaj

²⁷ Nijuak Jesús okiske de ompa, omen tlakaj katlej mach tlachiaj ikuitlapan oyajkej tzajtzitiwej:

—¡Xitechiknomati tejwatzin, tekone de David!

²⁸ Nijuak Jesús okalakke kalijtik, in tlakaj katlej mach tlachiaj omijkuanijkej inawak Jesús, iwan Jesús okintlajtlanij:

—¿Ankineltokaj namejwan nik welis namechpajtis?

Yejwan okijtojkej:

—Tikneltokaj, Señor.

²⁹ Toneses Jesús okintlalij imawan ipan inmixtololowan, iwan okinmilwij:

—Ma mochiwa ijkón ken namejwan ankineltokaj.

³⁰ Iwan san niman ya kuale otlachixkej. Iwan Jesús okin-nawatij:

—Amakaj ma kimi de kenik anpajtikej.

³¹ Pero niman nijuak okiskej, opéj tetlapowiaj itech nochi in yon región de tlan Jesús okichij.

Jesús okipajtij se tlakatl nontzin

³² Nijuak okiskej in yonmej tlakaj katlej mach otlachiayaj, ikuakón oksekimej tlakaj okiwilikijkej in Jesús se tlakatl nontzin katlej okipiaya se ejekatl mach kuale. ³³ Nijuak Jesús okikixtij in ejekatl mach kuale, in tlakatl nontzin opéj tlajtoa. In tlakaj sa otlajtlachixkej (omomajmawtijkej), iwan okijtoayah:

—¡Mach semi otikitayaj yin tlamantle itech yin país de Israel!

³⁴ Pero in fariseos okijtoayah:

—Yin tlakatl kinkixtia mach kualtin ejekamej ika ipoder in tlayekanke demonio.

Onkaj miek pixkale

³⁵ Jesús onemia itech nochtin weyikantin iwan pueblojin, iwan otlamachtiaya itech intiopanwan in judiojin de kada lugar. Okitematiltiaya in kuale tlajtole katlej temakixtia de kenik in Dios tlanawatia, iwan okinpajtiaya de nochi kokolistle iwan de nochi kualolistle. ³⁶ Nijuak okinmitak in tlakaj, okinmiknomaj, porke oyekaj kej iknamej iwan mach okimatiaj tlan kichiwaskej, oyekaj kej ichkamej katlej mach kipiaj tlajpixke. ³⁷ Ijkuakón okinmilwij imomachtijkawan:

—Katej miekej tlakaj katlej moneki kikakiskej notlajtol, pero mach katej miekej katlej kitematiltiaj notlajtol. Kej yeskia onkaj miek tekitl itech pixkale iwan tekipanojkej mach miekej katej. ³⁸ Por yonik, xiktlajtlanilikan in Dios katlej iteko yon pixkale ma kintitlani okachi tekipanojkej para ma pixkatij.

10

*Jesús okinpejpenke majtlaktele iwan ome itlatitlanilwan
(Mr. 3:13-19; Lc. 6:12-16)*

¹ Jesúś okinpejpenke majtlaktele iwan ome imomachtijkawan, okinmakak poder para kinkixtiskej ejekamej mach kualtin iwan para tepajtiskej de nochí kokolistle iwan de nochí kualolistle. ² Yinmej yejwan in majtlaktele iwan ome itlatitlanilwan katlej okinpejpenke: Achtoj in Simón, katlej noijki kinotzaj Pedro, iwan noijki okipejpenke in ikni itoka Andrés. Noijki okinpejpenke in Jacobo iwan ikni Juan, katlej itelpokawan in Zebedeo. ³ Noijki okinpejpenke in Felipe, Bartolomé, Tomás, Mateo katlej okololoaya impuestos. Jacobo itelpoch in Alfeo, iwan Tadeo. ⁴ Simón katlej onemia iwan cananistas, iwan Judas Iscariote katlej satepan okitemaktij (okitemaktilij) in Jesúś.

Jesúś okintitlanke majtlaktele iwan omen imomachtijkawan para ma tetlapowitij

(Mr. 6:7-13; Lc. 9:1-6)

⁵ Jesúś okintitlanke majtlaktele iwan omen imomachtijkawan iwan ijkín okinnajnawatij:

—Amo xiwian kan katej katlej mach judiojtin, nion amo xikalakikan itech pueblojtin de Samaria. ⁶ Sino xiwian kan katej in tokniwan judiojtin katlej mopolojtinemij kej ichkamej. ⁷ Xiwian, iwan xikinmatiltikan nik yoajsiko in tonale para Dios tlanawatis ipan inyolo in tlakaj. ⁸ Xikinpajtikan in kokoxkej, xikinyolitikan in mikkamej, xikinpajtikan katlej nakayopalani, iwan xikinkixtikan in ejekamej mach kualtin. Namejwan Dios oamechtliokolij ipoder, tones moneki no amo xitlakobrarokan por ankitekipanoltiskej in yon poder.

⁹ Amo xikitkikan itlaj tomin, ¹⁰ nion amo xikitkikan amotlaxkal para ankikuaskej ipan ojtle, nion amo xikitkikan ome amotzotzol, nion ome pares amokak, nion amokarrotij. Porke akinmej ankinpalewiskej yejwan kipiaj de amechmakaskej tlan amechpolos, porke namejwan ankitekipanoaj in Dios.

¹¹ Níjkuak anmajsiskej itech se weyikan o itech se pueblo, xiktemokan se katlej kuale tlakatl iwan ompa ximokawakan ichan asta ikuak ankisaskej de yon lugar. ¹² Níjkuak ankalakiskej kalijtik, xitetlajpalokan. ¹³ Tla in chanejkej kuale amechresibiroaj, Dios kintiochiwas ika yolosewilistle. Pero tla amo amechresibiroaj kuale, Dios mach kinmakas yolosewilistle. ¹⁴ Iwan tla amo amechresibiroaj iwan nion amo kinekjí amechkakiliskej, xikisakan de yon kalijtik o noso de yon pueblo, iwan ximokxitlaltzejzelokan kej

yeskia se señas nik okixpanawijkej in Dios. ¹⁵ Ipan melajka namechilwia, ke itech nekáj tonale de tlaixkomakalistle (tlatzonmanalos), intlajyowilis in yonmej tlakaj yetos okachi weyi ke para nekatej tlakaj de Sodoma iwan de Gomorra.

Amechtlatlalochtiskej

¹⁶ '¡Kuale xikkakikan! Nej namechtitlani kej amichkamej kan katej koyomej. Xiekan anlistojtin ken koamej, pero xiekan anpasensiajtin ken palomastin iwan amo xitetotkikan tlan amo kuale. ¹⁷ Xikpiakan kuidado, porke amechtemaktiskej (omechtemaktiliskej) inmak tekiwajkej, iwan amechwitekiskej itech tiopanmej. ¹⁸ Iwan asta amechtemaktiskej inmak gobernadortin iwan inmak reytin por annechnel-tokaj. Ijkuakón namejwan moneki antlajtoskej de notlajtol inmixpan yonmej tekiwajkej, iwan inmixpan in tlakaj katlej mach judiojtin. ¹⁹ Pero nijuak amechtemaktiskej inmak tekiwajkej, amo xitlanemilikan por kenik antlajtoskej o noso tlan ankijtoskej. Porke itech yon ora Dios amechmakas tla-jtole tlan ankijtoskej. ²⁰ Porke mach amejwan antlajtoskej, sino yen iEspíritu namoPapan Dios katlej tlajtos por amejwan.

²¹ In teikni kitemaktis (kitemaktilis) in ikni ma kimiktikan, in tetaj kitemaktis ikone ma kimiktikan, in tepilwan inpan mokuepaskej in tetajmej iwan kintemaktiskej para ma kinmiktikan. ²² Nochtin amechkokoliskej por annechnel-tokaj. Pero akin xixikos nochi tlan panos, Dios kimakixtis. ²³ Nijuak amechtlatlalochtiskej itech se pueblo, xicholokan xiwian itech oksé pueblo. Ipan melajka namechilwia, nik in Nej katlej onimochij nitlakatl niwitz oksemi antes de ant-lamiskej anyaskej itech nochtin pueblojtin de Israel.

²⁴ Se katlej momachtij mach kipanawilia itlamachtij, iwan se katlej san tekipanoj mach kipanawilia iteko. ²⁵ Se katlej momachtij ma paki tla ajsiti ken itlamachtij, iwan se katlej tekipanoj ma paki tla ajsiti ken iteko. Iwan tla Nej, akin nikaj kej nitepapan de familia nechtokayotiaj niBeelzebú, namejwan noijki amechtokayotiskej san tlan amo.

Akin moneki tikimakasiskej

(Lc. 12:2-9)

²⁶ Amo xikinmiimakasikan in tlakaj. Porke nochi tlan tlatitok kipia de nesis, iwan nochi tlan amo momati kipia de momatis. ²⁷ Tlan Nej namechilwia san yen namejwan, xikijtokan inmixpan nochtin. Iwan tlan namechilwia ichtaka, xiktematiltikan kan nochtin kuale ma kikakikan. ²⁸ Amo xikinmiimakasikan in tlakaj katlej kinekij amechmiktiskej, porke mach itlaj welis kitoktiskej namoanima. Xikimakasikan in Dios katlej kipia poder para kixpolos namotlalnakayo iwan para kixpolos namoanima ijlik tliko.

²⁹ '¿Amo monamakaj ome tototzitzintin por se sentabo? Pero nion se de yejwan mach mikis tla namoPapan Dios mach kimonekiltia. ³⁰ Iwan Nej namechilwia namejwan nik in Dios kinati asta keski namotzonkal ankipiaj. ³¹ Ijkón kiné, amo ximomawtikan. Namejwan okachi anpatiojkej iwan amo ken inpatij miekej tototzitzintin.

Ma se tlajto de Cristo teixpan

(Lc. 12:8-9)

³² 'Tla akaj kijtos inmixpan tlakaj nik kineltoka nik in Nej nitemakixtij de yej, Nej noijki nikijtos ixpan noPapan katlej kajki ilwikak nik in yej noaxka. ³³ Iwan tla akaj kijtos mach nechixmati inmixpan tlakaj, Nej noijki nikijtos mach nikixmati ixpan noPapan katlej kajki ilwikak.

In tlakaj moxexeloskej por yen Cristo

(Lc. 12:51-53; 14:26-27)

³⁴ 'Amo xikyejyekokan ke Nej oniwaj para ma yeto yolosewilistle ixko yin tlaltikpak. Mach oniwaj para namechmakas yolosewilistle, sino in tlakaj moxexeloskej por Nej. ³⁵ Oniwaj para nikinxixinis in tlakaj. In tlakatl mach motlajtolnamikis iwan ipapan, iwan ichpochtle mach motlajtolnamikis iwan imaman. In siwamontle mach motlajtolnamikis iwan imonan. ³⁶ Se tlakatl welis yeskej ikontraswan mismo yejwan ifamiliareswan.

³⁷ 'Akin kitlasojtla ipapan o noso imaman okachi ke Nej, mach yetos noaxka. Iwan akin kitlasojtlas itelpoch o noso ichpoch okachi ke Nej, mach yetos noaxka. ³⁸ Iwan akin amo kinekis witz nowan iwan amo kinekis trabajojpanos asta komo para ma kimiktikan itech krus, mach powis noaxka. ³⁹ Akin kinekis kipalewis inemilis, kipolos, pero tla akaj kipoloa inemilis por Nej, kajsis inemilis katlej mach keman tlamic.

Tlatliokoliltin

(Mr. 9:41)

⁴⁰ 'Akin namejwan amechresibiroa, Nej nechresibiroa. Iwan akin Nej nechresibiroa, noijki kiresibiroaj akin onechwaltitlanke. ⁴¹ Akin kiresibiroa se profeta porke in profeta kitekipanoa in Dios, kimakaskej itlaxtlawil ijkón ken kimakaj se profeta. Iwan akin kiresibiroa se katlej kuale tlakatl, kimakaskej itlaxtlawil ijkón ken kimakaj se katlej kuale tlakatl. ⁴² Iwan akin kintliokolis siera se xikale atl sesek se de yinmej nomomachtijkawan, ipan melajka namechilwia nik kipias itlaxtlawil.

11

In Juan Tlakuateekij okintitlanke omen imomachtijkawan inawak Jesús

(Lc. 7:18-35)

¹ Nijuak Jesús otlanke okinnajnawatij in majtlakte iwan ome imomachtijkawan, ikuakón oyáj de ompa para tlamachtis iwan kitematiltis itlajtol in Dios itech pueblojtin de yon regióñ.

² In Juan Tlakuateekij otzaktoka telpiloyan, iwan nijuak okimatke tlan okichiwaya in Cristo Jesús, ikuakón okintitlanke omen imomachtijkawan inawak Jesús. ³ Iwan imomachtijkawan in Juan okitlajtlanijkej in Jesús:

—¿Yen tejwatzin tiCristo katlej Dios techilwiftiwitz kipia de witz o noso ok moneki tikchiaskej ma wiki?

⁴ Jesús okinnankilij:

—Xiwian iwan xikilwikan in Juan nochí tlan namejwan ankitakej iwan ankikakej. ⁵ Xikilwikan ke katlej mach otlachiayaj axan ya tlachiaj, in koxomej ya kuale nejnemij, katlej opalania innakayo yopajtikej de inkokolis, katlej mach otlakakiaj axan ya tlakakij, in mikkamej moyolkuij, iwan pobrestin kikakij in kuale tlajtole katlej temakixtia. ⁶ Ma paki akin amo kipoloa itlaneltokalis nonawak.

⁷ Nijuak imomachtijkawan in Juan oyajkej, ikuakón Jesús opéj kintlapowia in tlakaj de yen Juan Tlakuateekij. Okinmilwij:

—¿Akin anyajkej ankitatoj ne kan tlawaki? ¿Ankitatoj se tlakatl katlej itlaneltokalis kiitki in ejekatl no ken nijuak in ejekatl kiitki se akatl? ⁸ ¿Akin kiné ankitatoj? ¿Ankitatoj se tlakatl katlej omotzotzoltiaya ika kuale itzotzol? Namejwan kuale ankitatiy ke katlej kuale motzotzoltiay katej ichan reytin. ⁹ Pero, ¿akin anakiskej ankitatoj? ¿Se profeta? Melawak, yej okachi kipanawilia ke se profeta. ¹⁰ In tiotlajkuilole tlapoa de yen Juan, kijta:

Nej niktitlani notlatematiltij moyakapan,
ma mitzyektlalili in ojtle.

¹¹ Ipan melajka namechilwia, ke asta axan mach onkaj nion se tlakatl katlej okachi kipanawilia in Juan Tlakuateekij. Pero akin okachi tzikitzin de itech ilwikak kan Dios tlanawatia yen okachi weyi ke Juan.

¹² 'Desde ikuak in Juan Tlakuateekij opéj kitematiltia itlajtol in Dios iwan opéj tlakuateekia, in tlakaj mochikawaj kinekij kalakiskej kan Dios tlanawatia. Iwan kalakij sanwel katlej melawak mochijchikawaj. ¹³ Asta axan nochtin in profetajtin iwan tlanawatile de Moisés otlapojkej de Cristo asta ikuak ovalaj in Juan. ¹⁴ Iwan tla namejwan ankinekij

ankineltokaskej, Juan yen profeta Elías katlej okipiaya de witz.¹⁵ Akin kipia itlakakilis, ma kikaki.

¹⁶ ¿Tlan ika welis nikinkompararos in tlakaj de yin tiempo? Yejwan katej ken telpokamej katlej motlalaj mawiltiaj itech tiankistle iwan kintzajtziliaj inmamigoswan,¹⁷ kinmilwiaj: "Mach ijkón nik anmawiltiaj. Tejwan otamechtlapichili-jkej para ximijtotikan, pero mach anmijtotijkej. Otamecht-lakuikilijkej se tlakuikale teyolkokoj, pero mach ankinekej anchokakej."¹⁸ Pues, ovalaj in Juan, katlej omosawaya (oayunaroaya) iwan mach itlaj vino okonia. Iwan name-jwan ankijtojkej ke kipia se ejekatl mach kuale.¹⁹ Satepan oniwalaq Nej katlej onimochij nitlakatl, iwan nitlakua iwan nikoni. Iwan namejwan ankijtaj ke nitlakuani iwan nit-lawanke, iwan ankijtaj inwan nimuika in tlajtlakolejkej iwan katlej tlakobraroaj ika impuestos. Pero nijuak in Dios akaj kimaka tlalnamikilistle, kimomaka kuenta nik melawak tlan nikchiwa.

*Pueblojtin katlej mach tetlakitakej
(Lc. 10:13-15)*

²⁰ Toneses Jesús opéj kinmistlakawia in tlakaj itech pueblojtin kan okinchij okachi miekej milagrostín, porke in yonmej tlakaj mach omoyolkuepayaj de intlajtlakol. Okijoj:

²¹ —¡Pobre de tej, pueblo de Corazín! ¡Pobre de tej, pueblo de Betsaida! Porke tla itech weyikan de Tiro iwan itech weyikan de Sidón kitanij in milagrostín katlej amejwan ya ankitakej, ya ke tiempo yeskia yomoyolkuepkej. Iwan motzotzoltianij de luto iwan motlikonexwianij, para kiteititianij nik yomoyolkuepkej de intlajtlakol. ²² Pero Nej namechilwia, nik itech nekáj tonale de tlaixkomakalistle (tlatzonmanalos), namejwan ankipiaskej okachi weyi tlajyowilistle ke in tlakaj de weyikan de Tiro iwan de Sidón. ²³ Iwan namejwan de pueblo de Capernaum, ¿ankiyejyekoaj anyaskej ilwikak? ¡Pues amo! Namejwan anyaskej asta tliko. Porke tla in tlakaj de weyikan de Sodoma kitanij in milagrostín katlej amejwan ya ankitakej, yon weyikan yeri asta axan. ²⁴ Pero Nej namechilwia, nik itech nekáj tonale de tlaixkomakalistle (tlatzonmanalos), namejwan ankipiaskej okachi weyi tlajyowilistle ke nekatej tlakaj de región de Sodoma.

*Xiwikan nonawak iwan ximosewikan
(Lc. 10:21-22)*

²⁵ Itech yon tonale, Jesús okijoj:

—Nimitzonweyikixtia Papan, tejwatzin titlanawatia itech ilwikak iwan ixko yin tlaltikpak. Nimitzweyikixtia porke otikchij amo ma kimomakakan kuenta tlan kija motlajtol katlej momachiliaj wel kimatiq iwan momachiliaj wel kuale

intzontekon, iwan otikinmajsikamatiltij in tlakaj katlej mach moweyinekij. ²⁶ Ijkón otikchij, Papan, porke ijkón otikmonekiltij.

²⁷ 'NoPapan onechmaktilij nochí tlamantle. Iwan Nej niKone mach akaj nechixmati, sino san yej noPapan nechixmati. Iwan mach akaj kixmati noPapan, sino san yen Nej niKone nikixmati iwan noijklí nekatej tlakaj katlej Nej nikneki ma kixmatikan noPapan. ²⁸ Xiwikan nonawak, aminochtin namejwan katlej antekipanojtokej iwan antlamamajtokej itech tlajyowilistle de tlajtlakole, iwan Nej namechmakas nesewile. ²⁹ Xinechmokawilikan ma namechpalewi, iwan xinechmokawilikan ma namechmacthi, porke Nej nipasensia iwan mach nimoweyinekke. Ijkón namejwan ankipiaskej nesewile ipan amoanima. ³⁰ Porke in tekitl katlej namechmaka mach tesotlaj. Iwan in tlamahtile katlej moneki xikchiwakan yon kej se tlamahtile katlej mach etik.

12

*Jesús imomachtijkawan okitekej trigo itech weyi tonale
(Mr. 2:23-28; Lc. 6:1-5)*

¹ Itech nekatej tonaltin Jesús onejnentiaya kan toktok trigo itech weyi tonale. Imomachtijkawan Jesús opéj tiojsiwij iwan opéj kitekij trigo iwan opéj kikuaj. ² Nijuak in fariseos ijkón okitakej, okilwijkej in Jesús:

—Xikita, momomachtijkawan kitekij in trigo iwan axan weyi tonale, iwan tlanawatile de Moisés kijta mach se ma kichiwa yon itech weyi tonale.

³ Pero Jesús okinmilwij:

—¿Amo keman ankileroaj tlan okichij in rey David nikuak in yej iwan ikompañeroswan otiosijkej? ⁴ David okalakke ikalijtik in Dios iwan okikuaj in pan katlej tlatochiwaloj, katlej mach oyeka para kikuani in David iwan ikompañeroswan, sino san yejwan tiopixkej welis kikuaskej.

⁵ ¿O noso amo keman ankileroaj tlan kijta itlanawatil in Moisés, nik in tiopixkej tekipanoaj itech weyi tiopan iwan amo mosewiaj itech weyi tonale, iwan yon mach tlajtlakole? ⁶ Pero Nej namechilwia nik in Nej akin axan nian nikaj okachi niweyikistok (niweyititok) ke yon weyi tiopan.

⁷ Namejwan mach ankimomakaj kuenta tlan kijta in tiotlakuilole: “Nikneki xiteiknomatikan, mach nikneki xinechmiktilikan yolkamej para ika annechweyikixtiskej.” Tla amejwan ankimomakanij kuenta, mach ankintlajtlakolmakanij in tlakaj katlej mach kipiaj tlajtlakole. ⁸ Porke Nej katlej onimochij nitlakatl, Nej nikpia de nikijtos tlanon moneki se kichiwas itech weyi tonale.

*Jesús okipajtij se tlakatl katlej omawakke
(Mr. 3:1-6; Lc. 6:6-11)*

⁹ Satepan, Jesús oyáj de ompa iwan okalakke itech se tiopan de yen judiojtin. ¹⁰ Iwan ompa oyeka se tlakatl katlej omawakke. In fariseos okitemoliayaj in Jesús itlaj tlan ika welis kitilwiskej, iwan okitlajtlaniijkej:

—¿Kox techkawilia itlanawatil in Moisés ma tilkpajtikan se kokoxke itech weyi tonale?

¹¹ Jesús okinnankilij:

—Tla se de amejwan kipia se ichka iwan motepejxiwia ijlik kuyoktle itech weyi tonale, ¿amo anyaskej ankikixtiwej?

¹² Pues, ¿amo okachi ipatij se tlakatl ke se ichka? Por yonik, welis tikchiwaskej itlaj tlan kuale itech weyi tonale.

¹³ Toneses in Jesús okilwij in tlakatl katlej omawakke:

—Xikmelawa moma.

Iwan nikuak okimelaj, opajtik ima iwan omokaj ya kuale ken oksé ima. ¹⁴ In fariseos okiskej de itech intiopan, iwan opéj motlatlalwiaj para kimiktiskej in Jesús.

Jesús okinnawati in tlakaj amakaj itlaj ma kilwikan akin Yej

¹⁵ Nikuak Jesús okimatke, oyáj de ompa, iwan miekej tlakaj oyajkej Iwan. Jesús okinpajtiaya nochtin in kokoxkej. ¹⁶ Iwan okinnawatiaya amakaj itlaj ma kilwikan akin Yej. ¹⁷ Ijkón otlapapanok para ma mochiwa tlan okijtoj in profeta Isaías, nikuak okijtoj:

¹⁸ Yin yej notekipanoj, katlej Nej onikpejpenke, katlej Nej niktlasojtla iwan nipaki por Yej.

Niktlalis noEspíritu itech Yej,

iwan kinmatiltis nochtin in tlakaj de ixko yin tlaltikpak ke kada se tlakatl nikixkomakas según tlan okichij.

¹⁹ Mach momagatinemis, nion mach tzajtzitinemis, nion mach akaj kikakis itlajtol ipan ojtle.

²⁰ Kipias kuale iyolo para nekatej katlej mach chijchikawakej, iwan kinpalewis katlej yakin mewaj, asta ikuak ma mochiwa nochti tlan kuale ken Yej kineki.

²¹ Iwan nochtin in tlakaj de ixko yin tlaltikpak kichiaskej momakixtiskej inawak.

Jesús kipia poder de toTajzin Dios

(Mr. 3:19-30; Lc. 11:14-23; 12:10)

²² Satepan okiwikilijkej in Jesús se tlakatl katlej kipia se ejekatl mach kuale, iwan noiiki mach tlachia iwan nontzin. Jesús okipajtij in tlakatl iwan ya owelik otlachixke iwan ya owelik otlajtoj. ²³ Nochtin in tlakaj sa otlajtlachixkej (omoma-jmawtijkej), iwan okijtojkej:

—¿Kox yen yin ikone in David katlej Dios okijtoj techwaltitlanilis?

²⁴ Pero níjkuak in fariseos ijkón okikakej, okijtojkej:

—Yin tlakatl kinkixtia in ejekamej mach kualtin ika ipoder in Beelzebú, in tlayekanke demonio.

²⁵ Jesúz okimatia tlan okiyeyekoayaj, iwan okinmilwij:

—Tla in tlakaj de se país pewas momijmiktiskej entre yejwan mismo, yon país tlajtlamis. Iwan tla in tlakaj de se pueblo o noso de se familia sa tekitl pewas momagaskej, no mach wejkawitl yeskej san sekan. ²⁶ Ijkón noijski, tla Satanás kikixtis in Satanás, kijtosneki yej mismo momaga. Ipoder mach wejkawas iwan niman pojpoliwis. ²⁷ Namejwan ankij-taj ke Nej nikinkixtia in ejekamej mach kualtin ika ipoder in Beelzebú. Tla ijkón yensi, ¿tonses akin kinmaka poder namo-momachtijkawan para kinkixtaj in ejekamej mach kualtin? Yejwan kiné ma kijtokan kox melawak o noso amo tlan namejwan annechilwiaj. ²⁸ Pero Nej nikinkixtia in ejekamej mach kualtin ika ipoder iEspíritu in toTajtzin Dios, iwan yon kijtosneki nik in Dios ya pewa tlanawatia amonawak.

²⁹ ¿Wenis akaj kalakis ichan se tlakatl katlej chikawak iwan kichtekilis tlan kipia, in tla amo achtoj kijlpia? Solamente tla kijlpis welis kitlachtekis.

³⁰ Akin amo kajki nowan, kajki kontra Nej. Iwan akin amo nowan kinpixka animajtin, san kinmamayawi.

³¹ Por yonik namechilwia, nik in Dios kintlapojpolwis in tlakaj de nochí tlajtlakole iwan de nochí tlan amo kuale kijtoskej, pero tla tlapoaskej biero de yen Espíritu Santo, Dios mach kintlapojpolwis. ³² Iwan tla akaj tlajtos kontra Nej katlej onimochij nitlakatl, Dios welis kitlapojpolwis, pero akin tlajtos biero de yen Espíritu Santo, Dios mach kitlapojpol-wis, nion axan ixko yin tlaltikpak iwan nion satepan níjkuak yopanok in yin tlaltikpak.

Se kuawitl moixmati por yen itlakilo

(Lc. 6:43-45)

³³ Se katlej kuale kuawitl, kitemaka itlakilo kuale. Iwan tla in kuawitl mach kuale, noijski kitemaka itlakilo mach kuale. Porke in kuawitl moixmati por yen itlakilo. ³⁴ ¡Namejwan kej ankoamej! Mach ankuaultin, ¿kenik welis ankijtoskej itlaj tlan kuale? Porke tlan kijta se tlakatl ika iten kisa de tlan tentok ipan iyolo. ³⁵ Se kuale tlakatl kijta tlan kuale porke ipan iyolo onkaj tlan kuale, iwan se tlakatl mach kuale kijta tlan amo kuale porke ipan iyolo onkaj tlan amo kuale. ³⁶ Pero Nej namechilwia ke itech nekáj tonale de tlaixkomakalistle (tlat-zonmanalos), nochtin namejwan ankitemakaskej kuenta de nochí tlajtote tlan amo kuale katlej ankijtojkej. ³⁷ Ijkón kiné, ika namotlajtol katlej kuale mach amechtlajtlakolmakaskej,

pero ika namotlajtol katlej mach kuale ika amechtlajtlakol-makaskej.

*Okitlajtlanilijkej in Jesús se weyi milagro
(Mr. 8:12; Lc. 11:29-32)*

³⁸ Ijkuakón sekimej fariseos iwan tlamachtijkej de it-lanawatil in Moisés, okilwijkej in Jesús:

—Tlamachtij, tiknekij tikitaskej xikchiwa se milagro kej se señas nik in Tej melawak tiwitz de Dios.

³⁹ Jesús okinnankilij:

—Namejwan mach ankuaultin iwan mach ankitlakitaj in Dios. Iwan axan ankinekij ma nikchiwa se milagro para annechneltokaskej. Pero mach namechmakas oksé milagro, sino san yen milagro tlan opanok in profeta Jonás. ⁴⁰ Porke ijkón ken Jonás oyeka eyi tonale iwan eyi yuale ijtk se weyi michin, ijkón noijki in Nej katlej onimochij nitlakatl nietos ijtk tlale eyi tonale iwan eyi yuale. ⁴¹ In tlakaj de Nínive omoyolkuepkej nijuak in Jonás okintlapowij de itlajtol in Dios. Iwan itech nekáj tonale de tlaixkomakalistle (tlatzon-manalos) yejwan kinmixkomakaskej in tlakaj de yin tiempo, porke mach omoyolkuepkej, maski onikintlapowij de itlajtol in Dios, iwan Nej okachi niweyikistok (niweyititok) ke Jonás. ⁴² Iwan in reina katlej ovalaj de ik tlani kan okachi wejka de ixko yin tlaltikpak para kikakilis iixtlamachilis in rey Salomón, yej noijki itech nekáj tonale de tlaixkomakalistle (tlatzonmanalos) kinmixkomakas in tlakaj de yin tiempo, porke mach kinekij nechkakiliskej, iwan Nej okachi niweyikistok (niweyititok) ke Salomón.

*In ejekatl mach kuale katlej walmokuepa
(Lc. 11:24-26)*

⁴³ 'Nijuak se ejekatl mach kuale kisa de itech se tlakatl, nemí kan tlawaki kitemojtinemi kan mosewis. Iwan tla amo kajsis, kimolwia: ⁴⁴ "Nimokuepas oksemi itech nekáj tlakatl kan onikiske." Iwan nijuak walmokuepa, kajsitajsi in yon tlakatl kej se kale kan mach akaj chanti, tlachipawkan iwan tlayektlalitok. ⁴⁵ Satepan yawi kinnnotzatij oksekimej chikomen ejekamej okachi bierojkej ke yej, iwan nochtin yawij mochantitiwej itech yon tlakatl, iwan satepan yon tlakatl mokawa okachi pior ke antes. Ijkón noijki mochicaskej in tlakaj katlej mach kualtin de yin tiempo.

*Imaman iwan ikniwan in Jesús
(Mr. 3:31-35; Lc. 8:19-21)*

⁴⁶ Jesús ok okintlapowijtoka in tlakaj, iwan ijkuakón oe-jkokej imaman iwan ikniwan. Omokajkej kalan, iwan

okanejiaj motlapowianij Iwan. ⁴⁷ Ijkuakón se tlakatl okilwij in Jesús:

—Momaman iwan mokniwan katej kalan mitznotzaj.

⁴⁸ Pero Yej okinankilij:

—¿Akin nomaman, iwan akinmej nokniwan?

⁴⁹ Ijkuakón Jesús okinmajpilwij imomachtijkawan, iwan okijtoj:

—Yinmej yejwan nomaman iwan yejwan nokniwan.

⁵⁰ Porke akin kichiwa tlan kimonekiltia noPapan katlej kajki ilwikak, yen yon nokni tlakatl, yen yon nokni siwatl, iwan yen yon nomaman.

13

Ejemplo de se tlakatl tlatoookak

(*Mr. 4:1-9; Lc. 8:4-8*)

¹ Yon tonale Jesús okiske kalijtik iwan omotlalito itempan lago. ² Iwan como omololojkej miekej tlakaj kan Yej oyeka, okachi kuale in Jesús otlejkok itech se barko iwan ompa ipan omotlalij, iwan nochtin in tlakaj omokajkej atlatentle.

³ Ijkuakón okinmachtij miek tlamtante ika ejemplos. Okijtoj:

—Se tlakatl okiske otookato. ⁴ Iwan nijuak otookatoka, sekín semiya owetzke ipan ojtle. Toneses ovalajkej in totomej iwan okikuajkej. ⁵ Oksekin semiya owetzke ijtit teyoj, kan mach oyeka miek tlale. Yon semiya okiske totoka porke mach wejkatlan oyeka in tlale. ⁶ Pero nijuak okiske in tonale, okichichinoj, iwan como mach okipiaya wejkatlan inelwayo, owakke. ⁷ Oksekin semiya owetzke itzalko in bierojxiwitl, moskaltij okachi miek yon bierojxiwitl, iwan tlatoakte oximikke. ⁸ Pero oksekin semiya owetzke kan kuale tlale, iwan otlakke. Sekin tlatoakte okitemakak san de se semiya se siento itliolo, iwan oksekin okitemakak eyinpoale itliolo, iwan oksekin okitemakak senpoale iwan majtlakte itliolo. ⁹ Tla ankinejij ankimomakaskej kuenta, xikkakikan.

Por tlanik otlamachtij ika ejemplos

(*Mr. 4:10-12; Lc. 8:9-10*)

¹⁰ Toneses imomachtijkawan in Jesús omijkuanijkej inawak iwan okitlajtlanjikej:

—¿Tlanik tikintlapowia in tlakaj ika ejemplos?

¹¹ Yej okinnankilij:

—Namejwan Dios amechkawilia xikmatikan tlan oyeka tlatisok de kenik Dios tlanawatia ompa ilwikak. Pero Dios mach kinkawilia yejwan ma kimatikan. ¹² Porke akin kinekis moskaltis okachi itech itlajtol in Dios, moskaltis okachi. Iwan katlej amo kinekis, kipolos asta tlan ya kimati. ¹³ Por yonik nikintlapowia ika ejemplos, porke maski kitaj tlan nikchiwa

iwan maski kikakij tlan nikijta, yejwan mach kimomakaj kuenta. ¹⁴ Ijkón, mochiwa itech yejwan tlan okijtoj in profeta Isaías:

Namejwan ika amotlakakilis antlakakiskej, pero mach itlaj ankimomakaskej kuenta.

Ika amoixtololowan antlachiaskej, pero mach ankimatisej tlanon kijtosneki tlan ankitaskej.

¹⁵ Porke in yinmej tlakaj wel oyoltlakuawakej, yejwan omonakastzajtzakej,

iwan omoitzajtzakej

para amo tlachiaskej ika inmixtololowan,

iwan nion amo kinekij tlakakiskej ika intlakakilis,

nion mach itlaj kinekij kimomakaskej kuenta ipan inyolo,

iwan nion mach kinekij moyolkuepaskej nonawak para ma ninkinmakixti.

¹⁶ Pero namejwan xipakikan, porke antlachiaj ika amoixtololowan, iwan ankimatij tlan kijtosneki tlan ankitaj. Iwan ankimomakaj kuenta tlan ankikakij nikijta. ¹⁷ Ipan melajka namechilwia, ke miekej profetajtin iwan miekej tlakaj katlej kualtin de nekáj tiempo okinekiaj kitaskej iwan kikakiskej tlan namejwan axan ankitaj iwan ankikakij, pero mach okitakej iwan nion mach okikakej.

*Jesús okintomilij in ejemplo de yen tlatoookak
(Mr. 4:13-20; Lc. 8:11-15)*

¹⁸ Xikkakikan kiné tlan kijtosneki in ejemplo de yen tlatoookak. ¹⁹ Katlej okikakej in tlajtote de kenik in Dios tlanawatia, iwan amo kimomakaj kuenta, yonmej ken semiya katlej owetzke ipan ojtle. Witz in Amo Kuale Tlakatl iwan kinkixtilia in tlajtote katlej omotookak ipan inyolo. ²⁰ In semiya katlej owetzke ijtk teyoj, kijtosneki in tlakaj katlej kikakij in tlajtote iwan niman kiresibiroaj ika pakilstle, ²¹ pero como mach wejkatlan monelwayotiaj, niman nelwayowakij. Iwan nikuak pewa trabajojpanoaj o noso pewa kintlatlalochtiaj por yen itlajtol in Dios, walmosotlawaj iwan kikawaj in Dios.

²² In semiya katlej owetzke itzalko in bierojxiwitl, kijtosneki yejwan katlej kikakij itlajtol in Dios, pero sa tekitl tlanemiliaj itech tlamantin de yin nemilistle iwan kinkajkayawa in rikojyotl. Nochi in yin tlamantle kijyomiktia itlajtol in Dios katlej omotookak ipan inyolo, iwan mach tlakij. ²³ Pero in semiya katlej omotookak kan kuale tlale, kijtosneki yejwan katlej kikakij itlajtol in Dios iwan kimomakaj kuenta, iwan kitemakaj miek tlakilotl. Iwan sekimej san de se semiya kitemakaj se siento intliolo, sekimej kitemakaj eyinpoale intliolo, iwan sekimej kitemakaj senpoale iwan majtlakte intliolo.

Ejemplo de yen mach kuale xiwitl

²⁴Jesús okinmilwij oksé ejemplo, okijtoj:

—Iwan ixko yin tlaltikpak kan Dios tlanawatia no ijkón ken se tlakatl katlej okitookak kuale semiya itlalaj. ²⁵Pero nikuak in tlaltekwaj iwan itekipanojkej okochtokaj, ovalaj in tlakatl katlej kikokolia in tlaltekwaj iwan okitookak xiwitl mach kuale kan toktok trigo, iwan oyáj. ²⁶Nikuak in trigo omoskaltij iwan omiawatik, ikuakón oneske noijki in mach kuale xiwitl. ²⁷Tones in tekipanojkej oyajkej okilwitoj in tlaltekwaj: “Señor, tla tejwatzin otiktookak kuale semiya, ¿de kan okiske kiné, in mach kuale xiwitl?” ²⁸Pero yej okinmilwij: “Se katlej nechkokolia ijkón okichij.” In tekipanojkej okitlajtlanijkej: “¿Tikneki ma tiwian ma tikwiwitlatij in mach kuale xiwitl?” ²⁹Pero yej okinmilwij: “Amo, porke tla ankiwiwitlaskej in mach kuale xiwitl, welis noijki ankiwiwitlaskej in trigo. ³⁰Okachi kuale xikkawakan ma moskaltikan san sekan asta ikuak se kololos. Iwan ikuakón nikintitlanis sekimej tekipanojkej para achtoj ma kololokan in mach kuale xiwitl iwan ma kimanojoijilpikan para kichichinoskej. Iwan satepan nikinmilwis ma kololokan in trigo para niktaatis ijtk nokueskon.”

Ejemplo de iyolo in mostaza katlej okachi tzikitzin ke iyolo in miltomatl

(Mr. 4:30-32; Lc. 13:18-19)

³¹Jesús noijki okintlalilij yin ejemplo:

—Kan Dios tlanawatia yon noijki ken iyolo in mostaza katlej se tlakatl kitooka itlalaj. ³²Iwan iyolo in mostaza yen okachi tzikitzin de noctin semiyas. Pero nikuak moskaltia, yen moskaltia okachi weyi tlatoktle iwan motlami weyi kuawitl, ke asta in totomej motepajsooltiaj ipan imamayo.

Ejemplo de yen levadura

(Lc. 13:20-21)

³³Noijki okinmilwij in yin ejemplo:

—Kan Dios tlanawatia yon noijki ken levadura para pan katlej se siwatl kineloa ika eyi tlatamachiwale de arina, para kisamawas nochí in yon tixtle.

Tlanik in Jesús okintekipanoltij ejemplos

(Mr. 4:33-34)

³⁴Nochtin in yinmej tlamatín Jesús okinmilwij in tlakaj ika ejemplos. Iwan nochipa nikuak okintlapowiaya, okintlapowiaya ika ejemplos. ³⁵Para ma mochiwa tlan okijtoj in profeta:

Nitlapoas ika ejemplos.

Nikinmijtos tlamantin katlej mach akaj kinmati desde ikuak in Dios okichij in tlaltikpak.

Jesús okintomilij in ejemplo de yen mach kuale xiwitl

³⁶ Tones in Jesús okinmakaj in tlakaj iwan okalakke kalijtik, kan imomachtijkawan omikuaniijkej inawak iwan okitlajtlaniijkej:

—Xitechtomili in ejemplo de yen mach kuale xiwitl katlej okiske itzalko in trigo.

³⁷ Ijkuakón Jesús okinmilwij:

—Nej katlej onimochij nitlakatl, yen Nej in nekáj tlakatl katlej okitookak in kuale semiya. ³⁸ Iwan notlalaj, yen tlaltikpak. In kuale semiya, yejwan in tlakaj katlej kipiaskej parte kan Dios tlanawatia. In mach kuale semiya, yejwan in tlakaj katlej kinnawatia in Amo Kuale Tlakatl. ³⁹ Iwan in tekokolij de yen tlaltekwaj katlej okitookak in mach kuale xiwitl, yen diablo. Iwan níkuak kololoskej in trigo, yen yon kijtosneki níkuak tlamic in tlaltikpak. Iwan katlej kololoaj in trigo, yejwan in angelestín. ⁴⁰ Ijkón ken mowiwitla in mach kuale xiwitl iwan mochichinoa ijistik tlilti, ijkón noijki yetos níkuak tlamic in tlaltikpak. ⁴¹ Nej katlej onimochij nitlakatl nikualintitlanis noangelwan kan katej noaxkawan, para ma kinkixtikij nochtin katlej tetlajtlakolmayajkej iwan katlej kichiwaj tlan mach kuale. ⁴² Iwan kintlamotlaskej ijistik tliko, kan chokaskej iwan motlanteteyitzaskej. ⁴³ Iwan katlej kichiwaj tlan Dios kineki, petlaniskej ken tonale ompa kan tlanawatia inPapan. Akin kineki kimomakas kuenta, ma kikaki.

Ejemplo de yen tomin tlalpachitok

⁴⁴ In tlakatl katlej kikawilia in Dios ma kinawati, yon ken se tlakatl katlej okajsik tomin tlalpachitok itech se tlale. Níkuak okajsik in yon tomin, oksemi ompa okitlaatij. Iwan ika pakistile oyáj ichan, iwan okinamakak nochí tlan kipia. Iwan okikoj in yon tlale kan okajsik in tomin tlalpachitok.

Ejemplo de se perla patíoj

⁴⁵ Noijki, in tlakatl katlej kikawilia in Dios ma kinawati, no ken se tlasemanke kintemojinemi perlas patiojkej, ⁴⁶ iwan níkuak kajsi se perla katlej patíoj, yawi ichan, iwan kinamaka nochí tlan kipia, iwan kikowa yon perla.

Ejemplo de se michmatlatl

⁴⁷ Kan Dios tlanawatia yon noijki ken se michmatlatl katlej kitlamotlaj ijistik atl iwan kinmololoa nochí tlatlamantle de michimej. ⁴⁸ Níkuak temi in michmatlatl, in michmajej kikixtiaj atlatentle, iwan ompa motlaliaj kinpejpenaj in

michimej. In michimej katlej kualemej kintlalaj ijtik chikiwitl, iwan katlej mach kualemej kintlamotlaj. ⁴⁹ Ijkón yetos noijki nikuak tlamic in tlaltikpak. Kissaskej in angelestin iwan kinxeloskej in tlakaj katlej mach kualtin de intech in tlakaj katlej kualtin. ⁵⁰ Iwan kintlamotlaskej in tlakaj katlej mach kualtin ijtik tliko, kan chokaskej iwan motlanteteyitzaskej.

Tlamantle yankuik iwan tlamantle katlej mach yankuik

⁵¹ Toneses Jesús okintlajtlanij:

—¿Ankimomakaj kuenta namejwan nochi in yin tlamantle?

Yejwan otlanankilijkej:

—Aján, Señor, tikmomakaj kuenta.

⁵² Ijkuakón okinmilwij:

—Nikuak se tlamachtij itech tlanawatile de Moisés momachtia kenik in Dios tlanawatia, weli tlamachtia ika yankuik tlamachtile iwan ika katlej mach ok yankuik. No ijkón ken se chanej katlej kimati kinkixtia de tlan kintlaatijtok ikalijtik, kinkixtia ikosaswan katlej yankuikej iwan katlej mach ok yankuikej.

In tlakaj de pueblo de Nazaret mach otlaneltokakej inawak Jesús

(Mr. 6:1-6; Lc. 4:16-30)

⁵³ Nikuak in Jesús otlanke okinmilwij in yinmej ejemplos, oyáj de ompa. ⁵⁴ Iwan oajsito ipueblo. Ompa opéj tlamachtia itech tiopan, iwan tlakaj sa otlajtlachiayaj (omomajmawtiayaj), iwan okijoayaj:

—¿Kan okikuito yin tlakatl nochi yin ixtlamachilistle? ¿Kenik weli kinchiwa in yinmej milagrostin? ⁵⁵ ¿Amo yen yin itelpoch in kuawxinke? ¿Amo imaman itoka María, iwan ikniwan intoka Jacobo, José, Simón, iwan Judas? ⁵⁶ ¿Amo nian chantij noijki in siwamej katlej ikniwan? ¿Kan okikuito kiné, nochi yin ixtlamachilistle?

⁵⁷ Iwan por yonik in tlakaj mach ok okiwelitakej, iwan mach ok okinekej okikakej. Pero Jesús okinmilwij:

—Akin tlpoa de Dios se kitlakitas ik nian nepa, menos itech ipueblo iwan itech ichan.

⁵⁸ Iwan mach okinchij miekej milagrostin ompa, porke yejwan mach otlaneltokakej inawak.

14

In Juan Tlakuateekij okimiktijkej

(Mr. 6:14-29; Lc. 9:7-9)

¹ Itech nekatej tonaltin Herodes in tetrarca katlej oyeka gobernador de estado de Galilea, okikakke de tlan Jesús okichiwaya, ² iwan ikuakón okinmilwij itekipanojkawan:

—Nekáj tlakatl yen Juan Tlakuateekij. Yomoyolkuij oksemi satepan de omikke, iwan por yonik kinchiwa wejweyin milagrostin.

³ Herodes ijkón okijtoj, porke itech nekatej tonaltin yej otlanawatij ma kikitzkikan in Juan, ma kikadenaijilpikan iwan ma kitzakuakan telpiloyan. Ijkón okichij in Herodes porke okitlankuamotlatoka in Felipe maski oyeka ikni. In siwatl oyeka itoka Herodías. ⁴ Juan okilwiaya in Herodes:

—Tikchijtok se weyi tlajtlakole porke iwan tikaj mokoñada.

⁵ Herodes okinekia kimiktiani in Juan, pero okinmiimakasia in tlakaj. Porke nochtin okimatiaj nik in Juan oyeka profeta de Dios. ⁶ Pero nikuak okumpliroj xiwitl in Herodes, ichpoch in Herodías omijtotij inmixpan nochtin iinbitadoswan in Herodes, iwan Herodes sa tektil okiwelitak. ⁷ Iwan okilwij ipan melajka nik kimakas nochi san tlan yej kitlajtlanilis. ⁸ Tones in ichpochtle achtoj omotlapowij iwan imaman, iwan satepan okilwij in Herodes:

—Xinechmaka ika se plato itzontekon in Juan Tlakuateekij.

⁹ Nikuak ijkón okikakke in rey Herodes, omoyolkokoj, pero komo yokilwija ipan melajka nik kimakas nochi san tlan kitlajtlanilis iwan inmixpan iinbitadoswan, tones otlanawatij ma kimakakan. ¹⁰ Iwan otlanawatij ma kikechtzontekikan in Juan ompa telpiloyan. ¹¹ Iwan okualkuijkej ika se plato itzon-tekon, iwan okimaktijkej in ichpochtle, iwan yej okimakak imaman.

¹² Satepan oeijkej imomachtijkawan in Juan, okitkikej itlalnakayo iwan oyajkej okitookatoj. Satepan oyajkej okimatiltitoj in Jesús.

Jesús okintlamakak makuile mil tlakaj

(Mr. 6:30-44; Lc. 9:10-17; Jn. 6:1-14)

¹³ Nikuak in Jesús okimatke, oyáj de ompa iselti itech se barko, iwan oyáj se lugar kan tlalkawale kan mach akaj tlakatl nemí. Pero in tlakaj okimatkej, okiskej de inpueblojwan iwan oyajkej okajsitoj nejnentiwej. ¹⁴ Nikuak Jesús otémok de itech barko, okinmitak miekej tlakaj, iwan okinmiknomaj, iwan okinpajtij in kokoxkej katlej okualinwikayaj. ¹⁵ Nikuak yopéj tiotlaki, imomachtijkawan in Jesús omikuaniijkej inawak, iwan okilwijkej:

—Yotiotlakik, iwan nian mach akaj chanti. Xikintitlani in tlakaj para ma wian ik pueblotin, para ma kikowatij tlan kikuaskej.

¹⁶ Jesús okinmilwij:

—Mach moneki ma wian. Namejwan xikintlamakan.

¹⁷ Iwan yejwan okinankilijkej:

—Nian tikpiaj san makuile pan iwan ome michin.

¹⁸ Iwan Jesús okinmilwij:

—Xinechinwalkuikan nian.

¹⁹ Ijkuakón Jesús otlanawatij ma motlalikan in tlakaj kan xi-wyoj. Satepan okitilanke in makuile pan iwan ome michimej, oakopantlachixke omotlasojkamatke inawak Dios, iwan okipojpostekke in pan iwan okinmakak imomachtijkawan, iwan yejwan okinxejxelilijkej nochtin in tlakaj. ²⁰ Nochtin kuale otlakuajkej asta oixwikej. Satepan okintemitijkej majtlakte iwan ome chikimej de pantlapojpostektle iwan mich-intlakojkotonale de katlej osobraroj. ²¹ Iwan katlej otlakuajkej oyekaj kej makuile mil tlakaj, mach okinpojkej in si-wamej nion pilalaktin.

Jesús onejnenke ipan atl

(Mr. 6:45-52; Jn. 6:16-21)

²² Satepan Jesús okinnawatij imomachtijkawan ma tlejkokan itech barko para ma panokan oksé lado de yen lago ma sa tlayekanakan, mientras in Yej ok okinmakaway in tlakaj. ²³ Iwan satepan de okinmakaj, Jesús otlejkok itech se tepetl omotiotzajtzilito iselti. Nijuak owaltlatleyuak, Jesús ompa oyeka iselti. ²⁴ In barko yoyaya tlatlajko lago. In atl omajkokuia ipan barko porke in ejekatl inpan oyaya. ²⁵ Iwan san kualkan ok otlatleyuatoka, Jesús okinmajsito nejnentiw ipan atl. ²⁶ Iwan nijuak imomachtijkawan okitakej nejnentiw ipan atl, omomawtijkej iwan otzajtzikej:

—¡Se temawtij!

²⁷ Pero Jesús okinnotzke, iwan okinmilwij:

—Amo ximomawtikan, Nej niJesús.

²⁸ Ijkuakón Pedro otlanankilij, okijtoj:

—Señor, tla yen tejwatzin, xikchiwa ma ninejnemi ipan atl asta kan tejwatzin tikaj.

²⁹ Iwan Jesús okilwij:

—Xiwiki kiné.

Ijkuakón Pedro otemok de itech barko iwan opéj nejnemi ipan atl para yas kinamikitij in Jesús. ³⁰ Pero nijuak okimomakak kuenta nik wel chikawak ejeka, omomawtij. Iwan komo opéj apolaki, otzajtzik:

—¡Señor, xinechmakixti!

³¹ San niman Jesús okimakitzkij, iwan okilwij:

—Wel tzikitzin motlaneltokalis. ¿Tlanik mach otinechnel-tokak?

³² Iwan nijuak otlejkokej itech barko, in ejekatl omoketzke. ³³ Ijkuakón katlej oyekaj itech barko omotlankuaketzkej iyakapan Jesús iwan okiweyikixtijkej, okijtojkej:

—Melawak nik tejwatzin titeKone de Dios.

Jesús okinpajtij in kokoxkej de Genesaret

(*Mr. 6:53-56*)

³⁴ Satepan de otlankej opanokej de itech yon lago, oajsitoj itech tlale de Genesaret. ³⁵ Nijuak in tlakaj de yon lugar okixmatkej nik yen Jesús, oyajkej okitematiltitoj itech nochí yon regióñ, iwan okualinwikilijkej nochtin kokoxkej kan Yej oyeka. ³⁶ Okitlatlawtiayaj ma kinkawili ma kikitzkilikan itzotzol maski san yen itempantzín. Iwan nochtin katlej okikitzkilijkej itzotzol, opajtikej.

15

Katlej kiyolsokiotia in tlakatl

(*Mr. 7:1-23*)

¹ Ijkuakón sekimej fariseos iwan tlamachtijkej de itlanawatil in Moisés katlej ovalajkej de Jerusalén, omikuaniijkej inawak Jesús, iwan okitlajtlanijkej:

² —¿Tlanik momomachtijkawan mach kitlakitaj in kostumbres katlej otechkajtewilijkej in ya wejkawitl toweyitajwan? Porke mach momajtekiaj nijuak tlakuaj ken otechmachtiijkej.

³ Iwan Jesús okintlajtlanij:

—¿Tlanik namejwan nojki mach ankitlakitaj itlanawatil in Dios iwan yej okachi ankitlakitaj namokostumbre? ⁴ Porke in Dios okijtoj: “Xiktlakita mopapan iwan momaman”, iwan “Akin biero kitenewilis ipapan o noso imaman, ma kimiktikan.” ⁵ Pero namejwan ankijtaj ke se tlakatl welis kil-wis ipapan o noso imaman: “Mach welis nimitzpalewis ika tlan mitzpoloa, porke tlan nikpia yonikmaktilij in Dios.”

⁶ Namejwan ankijtaj ke mach ok moneki se kinpalewis in tetajmiej. Ijkón namejwan ankijtlakoaj itlanawatil in Dios porke ankichiwaj yej tlan de amejwan amokostumbre. ⁷ ¡Teixkajkayajkej! Yompa tlan okijtoj in profeta Isaías de amejwan, nijuak okijtoj:

⁸ Yinmej tlakaj nechtlakitaj san ika inten, pero inyolo kajki wejka de Nej.

⁹ San tekitl nechweyikixtiaj, tlamachtiaj ika intlayeheyekolis in tlakaj kej yeskia itlanawatil in Dios.

¹⁰ Ijkuakón Jesús okinnotzke in tlakaj, iwan okinmilwij:

—Xikkakikan iwan xikmomakakan kuenta tlan namechilwis: ¹¹ Tlan kalaki ijlik iten se tlakatl mach yon kiyolsokiotia. Sino kiyolsokiotia yen tlan kisa de ijlik iten.

¹² Ijkuakón imomachtijkawan omijkuanijkej inawak Jesús, iwan okitlatlanikej:

—¿Tikmati nik in fariseos okualankej nijuak okikakej tlan otikijtoj?

¹³ Pero Yej okinnankilij:

—NoPapan katlej kajki ilwikak, kiwiwitlas ika nochí inelwayo nochí tlatoktle katlej mach okitookak. ¹⁴ Xikinkawakan. Porke in yonmej fariseos katej kej yeskia mach tlachiaj. Iwan tla se katlej mach tlachia kiyekanas oksé katlej noijki mach tlachia, san ken omen welis wetziskej ijlik se kuyoktle.

¹⁵ Pedro otlanankilij okijtoj:

—Xitechtomili in yon ejemplo.

¹⁶ Jesús okijtoj:

—¿Noijki mach ankimomakaj kuenta namejwan? ¹⁷ ¿Amo ankimomakaj kuenta ke nochí tlan kalaki ijlik iten se tlakatl kalaki ijlik itlalax, iwan satepan kisa kalan? ¹⁸ Pero tlan kisa de ijlik iten se tlakatl, kisa de ijlik iyolo. Iwan yen yon kiyolsokiotia. ¹⁹ Porke de ipan inyolo in tlakaj kisa in mach kuale tlajejyekolistle, temiktiaj, momekatiaj katlej tlanamiktiltin iwan katlej mach tlanamiktiltin, tlachtekij, tlakajkayawaj, iwan tewikaltiaj. ²⁰ Yen yonmej tlamantin katlej kiyolsokiotia se tlakatl. Pero tla se tlakuas iwan mach se momajtekis, yon mach kiyolsokiotia in tlakatl.

*Se siwatl de Canaán okineltokak in Jesús
(Mr. 7:24-30)*

²¹ Jesús okiske de ompa iwan oyáj ik región de Tiro iwan de Sidón. ²² Se siwatl cananea katlej ochantia itech yon región, ovalaj kuawtzajtzitiwitz inawak Jesús. Okijtoj:

—¡Señor, tekone de David, xinechiknomati! Nochpoch kipia se ejekatl mach kuale iwan kitlajyowiltia.

²³ Pero Jesús mach okinankilij. Ijkuakón imomachtijkawan omijkuanijkej inawak iwan okitlatlawtijkej, okilwijkej:

—Xiknawati in siwatl ma wia, porke kuawtzajtzitiwitz tokuitlapan.

²⁴ Toneses Jesús okilwij in siwatl:

—Dios mach onechwaltitlanke para ma nikinpalewi oksekimej tlakaj, sino san yen tlakaj de Israel, katlej katej kej ichkamej katlej mopolojtokej.

²⁵ Pero in siwatl omijkuanij inawak iwan omotlankuaket-zke iyakapan, okilwij:

—Señor, xinechpalewi.

²⁶ Iwan Jesús okilwij:

—Mach kuale kaj tla yej namejwan namechmakas tlan kintokaroa in judiojtin. Porke yon kej yeskia niktlamaka se chichij ika intlakual ikonewan in Dios.

²⁷ Pero in siwatl okijtoj:

—Aján, Señor. Pero nojki in chichimej kikuaj in tlakual-payextle katlej tepewi itlampa mesa nijuak tlakuaj intekowan.

²⁸ Ijkuakón Jesús okilwij:

—Siwatl, sa tekitl weyi motlaneltokalis. Ma mochiwa ijkón ken tej tikneki.

Iwan san niman ijkuakón yon ichpoch opajtik.

Jesús okinpajtij miekej kokoxkej

²⁹ Jesús okiske de ompa iwan oyáj itempan lago de Galilea. Satepan otlejkok ipan se tepetl iwan ompa omotlalij.

³⁰ Miekej tlakaj oajsitoj kan Jesús oyeka, ompa okinwikili-
jkej katlej koxomej, katlej mach tlachiaj, katlej nontzitzintin,
katlej matepomej, iwan miekej oksekimej kokoxkej okachi.
Okintlalijkej ikxitlan Jesús, iwan Yej okinpajtij. ³¹ Iwan in
tlakaj sa otlajtlachiayaj (omomajmawtiayaj), nijuak okin-
mitayaj in nontzitzintin opéj tlajtoaj, nijuak in matepomej
okisaya oksé yankuik inma, nijuak in koxomej ya kuale
onejnemiaj, iwan nijuak ya kuale otlachixkej katlej mach
otlachiayaj. Iwan opéj kiweyikixtiaj in toTajtzin Dios de
Israel.

Jesús okintlamakak nawi mil tlakaj

(Mr. 8:1-10)

³² Ijkuakón Jesús okinnotzke imomachtijkawan, iwan okin-
milwij:

—Nikinmiknomati in yinmej tlakaj, porke ya kipia eyi
tonale katej nian nowan iwan mach itlaj kipiaj tlan kikuaskej.
Mach nikneki nikintitlanis inchan ma tiosijtiwian, porke
welis kuatleyuiliskej ipan ojtle.

³³ Tones imomachtijkawan okilwijkej:

—Nian mach akaj chanti, ¿kan tikkixtiskej tanto pan para
tikintlamakaskej asta achinmej tlakaj?

³⁴ Jesús okintlajtlanij:

—¿Keski pan ankipiaj?

Iwan yejwan okinankilijkej:

—Chikome pan iwan kanaj keskimej michimej.

³⁵ Tones Jesús otlanawatij ma motlalikan in tlakaj ipan
tlale. ³⁶ Okintilanke in chikome pan iwan michimej, iwan
omotlasojkamatke inawak Dios. Satepan okikojkotonke
in pan iwan michimej iwan okinmajmakak in imomachtijkawan,
iwan yejwan okinxejxelilijkej nochtin in tlakaj.

³⁷ Nochtin otlakuajkej asta oixwikej. Iwan asta okintemijikej chikome chikimej de yen pedasos katlej osobraroj. ³⁸ Iwan tlakaj katlej otlakuajkej oyekaj kej nawi mil tlakaj, mach okinpojkej in siwamej nion pilalaktin. ³⁹ Satepan Jesúś okinmakaj in tlakaj, otlejkok itech barko iwan oyáj itech región de Magdala.

16

In fariseos iwan saduceos okitlajtlanilijkej in Jesúś ma kichiwa se milagro

(*Mr. 8:11-13; Lc. 12:54-56*)

¹ Oejkojek in fariseos iwan saduceos para kitlajtlakol-mayawiskej in Jesúś, iwan okitlajtlanilijkej ma kichiwa se milagro kej se señas para kitaskej kox melawak in Yej witz de Dios. ² Pero Yej okinnankilij:

—Nijuak tiotlaki, namejwan ankijtaj: “Yetos kuale tiempo, porke tlachichiliwia ik ilwikak.” ³ Iwan nijuak tlanesi ankijtaj: “Axan yetos mach kuale tiempo porke tlachichiliwia iwan tlamixtemi.” ¡Teixkajkayajkej! Namejwan kuale ankixyejyekoaj tlan ankitaj itech ilwikak pero mach ankixyejyekoaj noch iwan ankitaj tlan tlamochijtok itech yin tiempo. ⁴ Namejwan mach ankualtin iwan mach ankitlakitaj in Dios. Iwan axan ankinekij ma nikchiwa se milagro para annech-neltokaskej. Pero mach namechmakas oksé milagro, sino san yen milagro tlan opanok in profeta Jonás.

Jesúś ompa okinkajtej iwan oyáj.

Jesúś okijtoj ke intlamachtilis in fariseos mach melawak

(*Mr. 8:14-21*)

⁵ Nijuak in momachtijkej opanokej oksé lado de yen lago, okelkajkej de kitkinij in pan. ⁶ Ijkuakón Jesúś okinmilwij:

—Ximotlachilikan de yen inlevadura in fariseos iwan saduceos.

⁷ Imomachtijkawan opéj kimolwiaj entre yejwan:

—Ijkón techilwia porke mach otikualkuikej in pan.

⁸ Jesúś okimomakak kuenta, iwan okinmilwij:

—¿Tlanik ankimolwiaj ke mach ankipiaj pan? Namejwan wel tzikitzin namotlaneltokalis. ⁹ ¿Ayamo ankimomakaj kuenta, iwan nion mach ok ankelnamikij de yen makuile pan katlej onikinxejxelilij in makuile mil tlakaj, iwan keski chikiwitl osobraroj? ¹⁰ ¿Iwan nion mach ok ankelnamikij de yen chikome pan katlej onikinxejxelilij in nawi mil tlakaj, iwan keski chikiwitl ankololojkej de tlan osobraroj? ¹¹ ¿Kenik mach ankimomakakej kuenta nik in Nej mach onitlapoaya de yen pan, nijuak onamechilwij ximotlachilikan de yen inlevadura in fariseos iwan saduceos?

¹² Ijkuakón imomachtijkawan okimomakakej kuenta nik in Jesús mach okinmilwiaya ma motlachilikan de yen ilevadura in pan, sino okinmilwij ma motlachilikan de yen intlamachtil in fariseos iwan saduceos.

Pedro okijtoj Jesús yen Cristo

(*Mr. 8:27-30; Lc. 9:18-21*)

¹³ Níjkuak Jesús oajsito itech regióñ kan kajki in weyikan de Cesarea de Filipo, ijkuakón okintlajtlanij imomachtijkawan:

—Níjkuak in tlakaj motlapowiaj de Nej katlej onimochij nitlakatl, ¿ken kijtaj? ¿Akin Nej?

¹⁴ Yejwan okijtojkej:

—Sekimej kijtaj tejwatzin tiJuan Tlakuateekij. Oksekimej kijtaj tejwatzin tiElías, iwan oksekimej kijtaj tejwatzin ti-Jeremías o noso akaj oksé profeta.

¹⁵ Iwan Yej okintlajtlanij:

—Iwan namejwan, ¿ken ankijtaj? ¿Akin Nej?

¹⁶ Simón Pedro okinankilij:

—Tejwatzin tiCristo, titeKone de Dios katlej nochipa yolitok.

¹⁷ Iwan Jesús okilwij:

—Xipaki tej, Simón, titekone de Jonás, porke mach akaj tlakatl mitzajsikamatiltia nik in Nej niCristo, sino yen noPan patlej kajki ilwikak. ¹⁸ Iwan Nej nojki nimitzilwia nik in tej tiPedro (kijtosneki tetl), iwan itech yin tetl nikinnotzas notlaneltokawan. Porke tej otiknextij tlan melawak. Iwan nochtin katlej nechneltokaskej, kiresibiroskej tlan melawak. Iwan ipoder in mikilistle mach semi welis kintlanis. ¹⁹ Iwan tej nimitzinmakas in yabejtin de ilwikak kan Dios tlanawatia para tikintlatlapolis in tlakaj. Iwan katlej tikijtos kipiaj intlajtlakol ixko yin tlaltikpak, ompa ilwikak in Dios nojki kijtos nik kipiaj intlajtlakol. Iwan katlej tikijtos mach kipiaj intlajtlakol ixko yin tlaltikpak, ompa ilwikak in Dios nojki kijtos nik mach kipiaj intlajtlakol.

²⁰ Ijkuakón Jesús okinnawatij imomachtijkawan amakaj itlaj ma kilwikan kox yen Cristo.

Jesús okinmilwij kenik mikis

(*Mr. 8:31-9:1; Lc. 9:22-27*)

²¹ Ijkuakón Jesús opéj kinyekilwia imomachtijkawan, nik kipia de yas Jerusalén iwan kitlajyowitziskej miek in tlayekankej tetajtzitzintin, in tlayekankej tiopixkej, iwan in tlamachtijkej de itlanawatil in Moisés. Iwan okinmilwij nik kimiktiskej, pero ipan eyi tonale moyolkuis (moyolitis).

²² Toneses in Pedro okiwikak in Jesús ik se lado iwan opéj kajwa por ijkón okijtoj, okilwij:

—Amo Dios ma kimonekilti, Señor. Amo semi ijkón xipano de tlan tikipta.

²³ Pero Jesús omokuepke iwan okilwij in Pedro:

—Xitzinkisa de Nej, Satanás. San tinechtatzakuilia. Porke mach mitztekipachoa tlan Dios kineki, sino mitztekipachoa tlan kineki in tlakaj.

²⁴ Satepan Jesús okinmilwij imomachtijkawan:

—Tla akaj kineki witz nonawak, ma wiki kiné, pero moneki ayakmo ma kichiwa san tlan yej kinekis. Sino kipia de kixikos nochí san tlan panos, ma wiki nowan iwan maski ma kimiktikan itech krus. ²⁵ Porke tla akaj kineki kipalewis inemilis, kipolos. Pero tla akaj kipolos inemilis por Nej, kipalewis inemilis. ²⁶ Mach itlaj ipatij tla se tlakatl kimoaxkatis nochí in tlaltikpak iwan satepan kipolos ianima. Porke mach itlaj onkaj ixko yin tlaltikpak tlan ika welis kitlaxtlawas para kipalewis ianima. ²⁷ Porke Nej katlej onimochij nitlakatl niwitz ika imawisotlanex in noPapan iwan iangelwan, iwan ikuakón kada se tlakatl niktlaxtlawis según tlan okichij. ²⁸ Ipan melajka namechilwia, ke sekimej tlakaj katlej nian katej, mach kixmatiskej in mikilistle asta amo ma nechitakan Nej katlej onimochij nitlakatl ma pewa nitlanawati.

17

Jesús otlakenpetlanke

(*Mr. 9:2-13; Lc. 9:28-36*)

¹ Chikuasen tonale satepan, Jesús okiwikak in Pedro, in Jacobo iwan ikni itoka Juan, oyajkej itech se weyi tepetl.

² Jesús omoixpatlak ompa inmixpan. Ixko opetlanke ken tonale, iwan itzotzol opetlankaistayak ken tlanextle. ³ Iwan owalmonextijkej in Moisés iwan Elías, motlapowijtokej iwan Jesús. ⁴ Ikuakón Pedro okilwij in Jesús:

—Señor, sa kuale nian tikatej. Tla tikneki, nian ma tikinchikanek, eyi akawalkaltin, se para tejwatzin, se para Moisés, iwan se para Elías.

⁵ Nijuak ok otlapojtoka in Pedro, ikuakón se mixtle okinkenke iwan omokakke se tlajtote de ijlik yon mixtle, okijtoj:

—Yen yin notlasojKone, akin inawak nipaki. Xikkakilikan itlajtol.

⁶ Nijuak ijkón okikakej, in momachtijkej omotlankuaketzkej asta okitennamikej in tlale, iwan sa tekitl omomawtijkej.

⁷ Ikuakón Jesús omikuani innawak imomachtijkawan, okintlatilij imawan inpan iwan okinmilwij:

—Ximoketzakan. Amo ximomawtikan.

⁸ Iwan nikuak otlajtlachixtewakej, mach ok akaj okitakej, sino sa yen Jesús.

⁹ Nikuak otemoayaj de ipan tepetl, Jesús okinnawatij:

—Amakaj itlaj xikilwikan de tlan ankitakej, asta ikuak Nej katlej onimochij nitlakatl ma nimoyolkui oksemi de itech nomikilis.

¹⁰ Tones imomachtijkawan okitlajtlaniijkej in Jesús:

—¿Tlanik kiné, kijtaj in tlamachtijkej de itlanawatil in Moisés nik in Elías yen kipia de witz achtoj antes de witz in Cristo?

¹¹ Jesús okinnankilij:

—Melawak, Elías achtoj witz, iwan yej kiyektlalis nochí.

¹² Pero Nej namechilwia ke Elías yowitzá, iwan yejwan mach okineltokilijkej iwan yej san tlan amo okitoktijkej. Iwan Nej katlej onimochij nitlakatl no ijkón nechtajyowiltiskej.

¹³ Ikuakón imomachtijkawan okimomakakej kuenta nik in Jesús okintlapowiaya de yen Juan Tlakuateekij.

Jesús okipajtij se nontzin

(Mr. 9:14-29; Lc. 9:37-43)

¹⁴ Nikuak oajsitoj kan oyekaj in tlakaj, se tlakatl omikuani inawak Jesús omotlankuaketzke iyakapan, iwan okilwij:

¹⁵ —Señor, xikiknomati notelpoch, mimiki iwan sa tekitl panoa tekokojkayotl. Miekpa wetzi ijtk tltl iwan ijtk atl.

¹⁶ Nian onikinwalwikilij momomachtijkawan, pero mach welij kipajtiaj.

¹⁷ Nikuak Jesús ijkón okikakke, okijtoj:

—¡Namejwan wel mach antetlakitakej iwan ankiyejyekoaj tlan mach kuale! ¿Asta keman nietos amowan? ¿Asta keman ijkón namechxikojtos? Xinechwalwikilikan nian in telpochtle.

¹⁸ Ikuakón Jesús okajwak in ejekatl mach kuale, iwan okiske de itech yon telpochtle. Iwan san niman ikuakón opajtik.

¹⁹ Satepan imomachtijkawan omikuaniijkej inawak Jesús se lado, iwan okitlajtlaniijkej:

—¿Tlanik in tejwan mach otiwelikej otikixtijkej in ejekatl mach kuale?

²⁰ Jesús okinmilwij:

—Porke amechpoloa miek tlaneltokalistle. Ipan melajka namechilwia, tla ankipiaskej tlaneltokalistle maski san ken se semiyajtzin de mostaza, anwelinij ankiliwanij in yin tepetl: “Ximikuani de nian iwan xiwia ik ne”, iwan in tepetl mijkuani. Nochi anwelinij ankichiwanij tla melawak namejwan ankipianij tlaneltokalistle. ²¹ Pero in yinmej ejekamej

mach kualtin welis ankinkixtiskej tla anmotiotzajtziliskej iwan anmosawaskej (onmayunaraskej).

Jesús oksemi okitematiltij imikilis

(*Mr. 9:30-32; Lc. 9:43-45*)

²² Se tonale, nikuak ok oyekaj itech estado de Galilea, Jesús okinmilwij nik in Yej katlej omochij tlakatl kitemaktiskej (kitemaktiliskej) inmak in tlakaj katlej mach kualtin, ²³ iwan nechmiktiskej, pero ipan eyi tonale nimoyolkuis (nimoyolitis).

Iwan imomachtijkawan sa tekitl omoyolkokojkej.

Jesús okitlaxtlaj impuesto para in weyi tiopan

²⁴ Nikuak Jesús iwan imomachtijkawan oajsitoj itech pueblo de Capernaum, katlej tlakobraroaj ika impuestos para in weyi tiopan omijkuanijkej inawak in Pedro, iwan okitlajtlanijkej:

—¿Namotlamachtij kox kitlaxtlawa impuesto para in weyi tiopan?

²⁵ Pedro otlanankilij:

—Kenik amo.

Satepan nikuak in Pedro okalakke kalijtik kan oyeka in Jesús, yen Jesús achtoj okilwij in Pedro:

—¿Ken tikita, Simón? In reytin de ixko yin tlaltikpak, ¿akin-mej kinkobraroaj ika impuestos? ¿Kinkobraroaj katlej chantij itech se pueblo o noso katlej mach ompa chantij?

²⁶ Pedro okinankilij:

—Katlej mach ompa chantij.

Jesús okilwij:

—Tones kijtosneki in chanejkej mach kipiaj de kitlaxtlawaskej. ²⁷ Pero maski amo tikpiaj de tiktlaxtlawaskej, iwan para amakaj ma kualani, xiwia kan lago, xikkajkawa moanzuelo ijtit atl, iwan in michin katlej achtoj tikixtis, xikkamachalolti iwan tikkajxilis se tomin, iwan ika xiktlaxtlawa in de Nej noimpuesto iwan de tej moimpuesto.

18

¿Akin okachi weyikistok?

(*Mr. 9:33-37; Lc. 9:46-48*)

¹ Itech yonmej tonaltin imomachtijkawan omijkuanijkej inawak Jesús iwan okitlajtlanijkej:

—¿Akin okachi weyikistok (weyititok) kan Dios tlanawatia?

² Ijkuakón Jesús okinotzke se chokotzin, okitlalij tlatlajko de kan yejwan oyekaj, ³ iwan okijtoj:

—Ipan melajka namechilwia, tla namejwan amo am moyolkuepaj iwan amo ammochiwaj ken pilalaktin, mach ankalakiskej kan Dios tlanawatia. ⁴ Ijkón kiné, akin

okachi weyikistok (weyititok) kan Dios tlanawatia, yen katlej moiknomati iwan mochiwa ken yin chokotzin.⁵ Iwan akin kiresibiroa se chokotzin ken yin itech notoka, kijtosneki Nej nechresibiroa.

*Dios kintlajtlakoltis katlej tlajtlakolchiwaj
(Mr. 9:42-48; Lc. 17:1-2)*

⁶ 'Tla akaj kitoktis ma wetzi ipan tlajtlakole se de yinmej tzitzikinmej katlej nechneltokaj, okachi kuale ma kilpilikan ikechtlan se metlatl iwan ma kiwitlazokan ijtit atl kan okachi tlawejkatlan. ⁷ ¡Pobrestin tlaltikpaktlakaj! Porke sa tekitl onkaj tlan ika se wetzis ipan tlajtlakole. Nochipa ijkón yetos, pero ¡pobre in tlakatl katlej kitoktis akaj oksé ma wetzi ipan tlajtlakole!

⁸ 'Por yonik, tla moma o noso mokxi mitztoktia xiwetzi ipan tlajtlakole, okachi kuale xikinmotzontekili iwan wejka xikintlamotla. Porke okachi kuale xikalaki ilwikak timatepoj o noso tikoxo, ke ma mitztlamotlakan ijtit tlitl katlej mach keman sewis ika nochí ome momawan o noso ika nochí ome mokxiwan. ⁹ Iwan tla moixtololo mitztoktia xiwetzi ipan tlajtlakole, okachi kuale xikmokixtili. Porke okachi kuale xikalaki ilwikak ika se moixtololo, ke ika nochí ome moixtololowan ma mitztlamotlakan ijtit tliko kan xotlatok in tlitl.

*Ejemplo de se ichka katlej opoliwik
(Lc. 15:3-7)*

¹⁰ 'Amo xikchiwakan menos se de yin achintzin. Porke ompa ilwikak iángel nochipa kajki ixpan noPapan katlej kajki ilwikak. ¹¹ Porke Nej katlej onimochij nitlakatl oniwalaj onikinmakixtiko katlej mopolojtinemij.

¹² '¿Kenamij ankitaj? Tla se tlakatl kinpia se siento ichkamej, iwan tla kipolos se, ¿amo kinkajtewas in nawinpoale iwan kaxtole iwan nawi ipan tepetl iwan yas kitemotij katlej opoliwik? ¹³ Iwan tla kajsi, ipan melajka namechilwia ke okachi pakis por yon ichka, ke por nekatej in nawinpoale iwan kaxtole iwan nawi katlej mach okinpoloj. ¹⁴ Ijkón noijki, namoPapan katlej kajki ilwikak mach kineki ma mopolo nion se de yinmej achintzitzintin.

*Kenik tiklapojpolwiskej in se tokni
(Lc. 17:3)*

¹⁵ 'Tla se mokni omitztoktij itlaj amo kuale, xiknotza iselti iwan xikilwi tlan omitztoktij. Tla mitzkaki, kijtosneki yotik-motlanilij, porke oksemi anmowikaskej kuale. ¹⁶ Pero tla amo mitzkaki, ikuakón xiknotza se o kanaj omen tlanel-tokakej, para ke nochí tlan mijtos ma kimatikan omen o noso eyin testigojin. ¹⁷ Iwan tla nion yejwan mach kinkaki,

ijuakón xikinmilwi nochtin in tiopantlaneltokakej. Iwan tla nion yejwan noijki mach kinkaki, toneses xikitakan yon tlakatl kej se katlej mach kineltoka Dios o noso kej se katlej tlakobraroa ika impuestos.

¹⁸ 'Ipan melajka namechilwia, ke nochti katlej tikijtos kipiaj intlajtlakol ixko yin tlaltikpak, ompa ilwikak in Dios noijki kijtos nik kipiaj intlajtlakol. Iwan katlej tikijtos mach kipiaj intlajtlakol ixko yin tlaltikpak, ompa ilwikak in Dios noijki kijtos nik mach kipiaj intlajtlakol.

¹⁹ 'Noijki namechilwia, tla omen de amejwan anmotlaliskej san se tlajtote ixko yin tlaltikpak para ankitlajtlaniskej itlaj ika tiotzajtzilistle, noPapan katlej kajki ilwikak amechmakas. ²⁰ Porke kan mololoaj omen o noso eyin katlej nechneltokaj, Nej noijki ompa inwan nikaj.

²¹ Ijkuakón Pedro omijkuanij inawak Jesús iwan okitlajtlanij:

—Señor, ¿keski buelta niktlapojojpolwis se nokni tla onechtoktij itlaj mach kuale? ¿Asta chikome buelta?

²² Jesús okinankilij:

—Mach nimitzilwia xiktlapojojpolwi san chikome buelta, sino asta eyinfoale iwan majtlakte de chikome buelta, in tej moneki nochipa xiktlapojojpolwi.

Ejemplo de se tlakatl katlej mach okinekke otetlapojojpolwij

²³ 'Por yonik, kan Dios tlanawatia yon ken se rey katlej okinekke kichiwas kuenta iwan itekipanojkawan. ²⁴ Iwan nijuak opéj kichiwa kuenta, okualwikilijkej se itekipanoj katlej okiwiliaya miek miyones de tomin. ²⁵ Komo itekipanoj mach okipiaya tomin para kikuepilis, ijkuakón in rey otlanawatij ma kinamakakan yon tlakatl iwan isiya, iwan ipilwan, iwan nochti tlan kipia, para ika ma kitlaxtlawa tlan kitewikilia. ²⁶ Ijkuakón itekipanoj omotlankuaketze iyakapan rey iwan okitlatlawtij: "Señor, nimitzlatlawtia xinechonchia ok keski tonale iwan nimitzuepilis nochti tlan nimitzwikilia." ²⁷ In rey okiknomatke, okitlapojojpolwij de nochti tlan okiwiliaya iwan okikajkaj ma wia. ²⁸ Pero niman nijuak in yon tlakatl okiske, okinamikke se ikompañero noijki tekipanoj de yen rey, katlej okiwiliaya kanaj kexkitch tomin. Okikechkitzkij iwan opéj kikechpatzka, iwan okilwij: "¡Xinechuepili tlan tinechwikilia!" ²⁹ Toneses ikompañero omotlankuaketze iyakapan iwan okitlatlawtij, okilwij: "Nimitzlatlawtia xinechonchia ok keski tonale, iwan nimitzuepilis nochti tlan nimitzwikilia." ³⁰ Pero yej mach okinekke kichias, sino yej okiwiliaya okitzakuato telpiloyan para ma kikuepili nochti tlan kiwikilia. ³¹ Nijuak oksekimej

itekipanojkawan in rey ijkón okitakej, sa tekitl omoyolkoko-jkej. Iwan oyajkej okilwitoj in rey nochí tlan okitakej ot-lapanok. ³² Ijkuakón in rey otlanawatij ma kinotzatij yon itekipanoj, iwan okilwíj: “Tej mach tikuale tinotekipanoj. Nej onimitztlapojpolwíj de nochí tlan otinechwikiliaya, porke otimotlatlawtij nonawak. ³³ Tej noijki omonekia tikiknomati-ni mokompañero, ijkón ken nej onimitziknomatke.” ³⁴ In rey sa tekitl okualanke, iwan otlanawatij ma kitlajyowiltikan asta kan ma kitlaxtlawa nochí tlan kitewikilia.

³⁵ Satepan de ijkón okinmilwíj, in Jesús okijtoj:

—NoPapan katlej kajki ilwikak, no ijkón kitoktis akin amo kinekis kitlapojpolwis se ikni ika nochí iyolo.

19

Jesús otlamachtij mach se ma mosiwakawa

(*Mr. 10:1-12; Lc. 16:18*)

¹ Nijkuak Jesús otlanke okijtoj yin tlajtole, ijkuakón okiske de estado de Galilea iwan oyáj itech estado de Judea, ik ne lado de yen weyatí Jordán ik ikisayan tonale. ² Sa tekitl miekej tlakaj ikuatlapan oyajkej, iwan ompa okinpajtij in kokoxkej.

³ Ijkuakón sekimej fariseos omijkuanijkej inawak Jesús para kitlajtlakolmayawiskej, iwan okitlajtlanijkej:

—¿Kox kuale kajki in se tlakatl kikawas isiwa san ika itlaj tzikitzin?

⁴ Jesús okinnankilij:

—¿Amo ankileróaj in tiotlajkuilole kan kijta nijkuak in Dios opéj kichiwa in tlaltikpak, iwan ijkuakón noijki okinchij in tlakatl iwan siwatl? ⁵ Iwan noijki kijta in tiotlajkuilole: “Por yonik in tlakatl kikawas ipapan iwan imaman para mosetilis iwan isiwa, iwan de omen, mochiwas sa se tlakatl.” ⁶ Mach ok yeskej omen, sino sa se. Por yonik, katlej Dios yokinsetilij mach kipia de kinxeelos akaj tlakatl.

⁷ Toneses okitlajtlanijkej:

—¿Tlanik kiné, Moisés okitekawilij tla akaj tlakatl kineki mosiwakawas, moneki kimakas isiwa se amatl kan ma kijto nik mosiwakawa?

⁸ Jesús okinmilwíj:

—Moisés okitekawilij se tlakatl ma mosiwakawa, porke mach itlaj ankinekij ankimonakaskej kuenta de tlan kuale. Pero achtoj mach ijkón oyeka. ⁹ Nej namechilwia, tla se tlakatl kikawa isiwa, iwan monamiktis iwan akaj oksé siwatl, kijtosneki iwan momekatia. Pero tla isiwa kichiwa tlajtlakole de momekatia iwan akaj tlakatl, toneses iokich welis kikawas in yon isiwa. Iwan tla akaj monamiktis iwan yon siwatl katlej yokikajkajkej, kijtosneki no iwan momekatia.

¹⁰ Ijkuakón imomachtijkawan okilwijkej:

—Tla melawak mach kuale se mokajkawas iwan isiwa, okachi kuale mach akaj ma monamikti.

¹¹ Jesús okinmilwij:

—Mach nochtin welij kimomakaj kuenta yin tlajtole, sino sanwel nekatej katlej Dios kinpalewia ma kimomakakan kuenta. ¹² Katej sekimej tlakaj katlej mach monamiktiaj porke desde intlakatilis otlakatkej mach welis kinpiaskej inkonewan. Sekimej mach monamiktiaj porke okintoktijkej amo ma welikan ma kinpiakan inkonewan. Iwan sekimej mach kinekij monamiktiskej porke kitemoaj kenik okachi kuale kitekipanoskej in Dios. Akin kinekis yetos iselti, ma yeto kiné iselti.

Jesús okintiochij in pilalaktin

(*Mr. 10:13-16; Lc. 18:15-17*)

¹³ Satepan okualinwikilijkej in Jesús sekimej pilalaktin, para inpan ma kintlali imawan, iwan para ma tiotzajtzi por yejwan. Pero imomachtijkawan opéj kinmajwaj katlej okualinwikayaj in pilalaktin. ¹⁴ Pero Jesús okinmilwij:

—Xikinkawakan in pilalaktin ma wikikan nonawak, amo xikintatzakuiliikan. Porke in tlakaj katlej yolyamankej ken pilalaktin, kalakiskej ilwikak kan Dios tlanawatia.

¹⁵ Jesús okintlalij imawan inpan pilalaktin, iwan satepan oyáj de ompa.

Se tlakatl katlej wel kimopialia omotlapowij iwan Jesús

(*Mr. 10:17-31; Lc. 18:18-30*)

¹⁶ Se tlakatl omijkuanij inawak Jesús iwan okitlajtlanij:

—Tlamachtij, tejwatzin wel tikuale tlakatl. ¿Tlan welis itlaj kuale nikchiwas para nikpias nemilistle katlej mach keman tlamic?

¹⁷ Jesús okilwij:

—¿Tlanik tinechilwia nikuale tlakatl? Mach onkaj oksé kuale tlakatl, sino san yen Dios. Pero tla tikneki tikalakis ilwikak, moneki xikintlakita itlanawatilwan in Dios.

¹⁸ Iwan tlakatl okilwij in Jesús:

—¿Katlij yejkej tlanawatiltin?

Iwan Jesús okilwij:

—Amo xitemiki, amo ximomekati, amo xitlachteki, amakaj xiktlajtolatlalili, ¹⁹ xikintlakita mopapan iwan momaman, iwan xiktlasojtlal mokni ken tej timotlasojtla.

²⁰ Iwan yon tlakatl okilwij:

—Nochi yon nikchijtiwitz desde nitzikitzin. ¿Tlan oksé nechpoloa nikchiwas?

²¹ Jesús okilwij:

—Tla tikneki tietos entero tikuale tlakatl, xiwia mochan iwan xiknamaka nochi tlan tikpia iwan tomin xikinmaka

katlej pobrestin. Ijkón welis tikpias rikoyotl ompa ilwikak. Iwan ikuakón kemaj xiwiki iwan xinemí nowan.

²² Pero in tlakatl nikuak ijkón okikakke, oyáj omoyolkoko-jtiaj, porke sa tekitl okimopialiyaya.

²³ Ikuakón Jesús okinmilwíj imomachtijkawan:

—Ipan melajka namechilwia, nik sa tekitl owij para katlej kimopialiaj kalakiskej ilwikak kan Dios tlanawatia.

²⁴ Oksemi namechilwia, ke okachi mach owij para se kameyo panos kan kuyontok in akuxaj ke para se katlej kimopialia kalakis kan Dios tlanawatia.

²⁵ Imomachtijkawan sa otlajtlachixkej (omomajmawtijkej) nikuak ijkón okikakej, iwan okimolwiayaj entre yejwan:

—¿Akin kiné welis momakixtis?

²⁶ Jesús okintlatak, iwan okinmilwíj:

—Yin tlamantle in tlakaj mach welij kichiwaj, pero Dios nochí weli kichiwa.

²⁷ Toneses in Pedro okilwíj:

—Señor, tejwan otikwalkajtejkej nochí tlan otikpiayaj porke tiknekij tiaskej mowan. ¿Tlan tikkajsiskej kiné?

²⁸ Jesús okinankilij:

—Ipan melajka namechilwia, itech nekatej tonaltin nikuak nochí moyankuilis, nikuak Nej katlej onimochij nit-lakatl nimotlalis itech nosiya katlej kipia weyi imawisot-lanex, namejwan noijki katlej nowan anwalajkej anmot-laliskej noijki ipan majtlakte iwan ome siyajtin, para ankinmixkomakaskej in majtlakte iwan ome familias de Israel.

²⁹ Iwan akinmej okiwalkajtejkej inkal, inmikniwan okichtin o noso siwamej, inpapan, inmaman, insiwa, inpilwan, o noso intlal, por Nej, kiresibiroskej sien buelta okachi de tlan okikajtejkej, iwan noijki Dios kinmakas nemilistle katlej mach keman tlamic. ³⁰ Pero miekej yeskej salúltimo katlej axan katej achtoj, iwan yeskej achtoj katlej axan katej salúltimo.

20

Ejemplo de sekimej tlapalewijkej

¹ Porke ompa ilwikak kan Dios tlanawatia yon ken se tlaltekowaj, katlej okiske kualkan okintemoto sekimej tlapalewijkej para kitekiskej uvas. ² Iwan omokajkej kintlaxtlawis se denario tomin por se tonale. Iwan okintitlanke ma tekipanotij itlalaj. ³ Satepan in tlaltekowaj okiske kej las nuebe de kualkan, iwan okinmitak itech tiankistle oksekimej tlapalewijkej katlej omajxilijtokaj. ⁴ Iwan okinmilwíj: “Xiwian namejwan noijki xitekipanotij notlalaj, iwan namechtlahtlawis ijkón ken moneki ankitlaniskej.” Iwan yejwan oyajkej. ⁵ In tlaltekowaj oksemi okiske kej tlajko

tonale, iwan noijki kej las tres de tiotlakke, okintemoto oksekimej tlapalewijkej.⁶ Iwan kej las sinko de tiotlakke, oksemi oyáj itech tiankistle iwan okinmajsik oksekimej tlapalewijkej katlej omajxilijtokaj, iwan okinmilwij: “¿Tlanik nian antleyuilijkej iwan mach antekipanoaj?”⁷ Yejwan okinankilijkej: “Porke mach akaj techtlakewa.” Ijkuakón in tlaltekwaj okinmilwij: “Namejwan xiwian noijki xitekipanotij notlalaj, iwan namechtlaxtlawis ijkón ken moneki ankitlaniskej.”⁸ Nijuak otleyuak, in tlaltekwaj okilwij itekipanoj katlej kita in tekitl: “Xikinnotza in tlapalewijkej iwan xikintlaxtlawi, achtoj xikintlaxtlawi katlej okalakej satepan, iwan satepan xikintlaxtlawi katlej achtoj okalakej.”⁹ Toneses oe jkokej in tlapalewijkej katlej okalakej kej las sinko de tiotlakke, iwan kada se de yejwan okitlaxtlawijkej se denario tomin.¹⁰ Iwan nijuak okintokaroto kintlaxtlawiskej in tekipanojkej katlej achtoj okalakej, okiyeyekojej kintlaxtlawianij okachi. Pero noijki okintlaxtlawijkej kada se de yejwan se denario tomin.¹¹ Pero nijuak okintlaxtlawijkej, opéj kixnamikij in tlaltekwaj,¹² iwan okilwijkej: “Nekatej katlej okalakej satepan otekipanojkej san se ora, iwan otikintlaxtlawij no ken tejwan.”¹³ Pero in tlaltekwaj okinankilij se de yejwan: “Amigo, mach nimitztoktia itlaj tlan amo kuale. ¿Amo otimokajkej ke nimitztlaxtlawis se denario tomin por tinechpalewis?”¹⁴ Xikitzi motlaxtlawil iwan xiwia. Nej nikneki nikmakas katlej okalakke satepan noijki ken tej onimitzmakak.¹⁵ ¿Amo welis nikchiwas san tlan nej niknekis ika notomin? ¿O noso timoxikoa por wel nikuale tlakatl?”

¹⁶ Ijkón kiné, miekej katlej axan katej salúltimo, yeskej achtoj. Iwan katlej axan katej achtoj, yeskej salúltimo. Porke Dios kinnotza miekej tlakaj pero san sekimej kinpejpena para ma yekan iaxkawan.

*Jesús okitematiltij de imikilis ya eyi buelta
(Mr. 10:32-34; Lc. 18:31-34)*

¹⁷ Nijuak Jesús yoyaya para Jerusalén, okinwikak ik se lado in majtlakte iwan ome imomachtijkawan iwan okinmilwij:

¹⁸ —Axan tejwan tiawij Jerusalén. Iwan Nej katlej onimochij nitlakatl nechtemaktiskej (nechtemaktiliskej) inmak in tlayekankej tiopixkej iwan inmak in tlamachtijkej de itlanawatil in Moisés. Iwan yejwan nechtla tlakoltiskej para ma nechmiktikan.¹⁹ Nechtemaktiskej inmak in tlakaj katlej mach judiojtin para ma nechpijpinatikan, para ma nechwitekikan iwan para ma nechmajmasoltikan itech krus. Pero ipan eyi tonale nimoyolkuis (nimoyolitis).

*Jacobo iwan Juan iwan inmaman okitlajtlankej se favor
(Mr. 10:35-45)*

²⁰ Ijkuakón isiwa in Zebedeo, omijkuanij inawak Jesús inwan omen itelpokawan, omotlankuaketzke iyakapan para kitlajtlanilis se favor. ²¹ Jesús okilwij:

—¿Tlan tikneki?

In tenan okijtoj:

—Nimitztlatlawtia xitlanawati ma motlalikan in yinmej notelpokawan, se ik moyekma iwan oksé ik moopochma, nikuak tejwatzin pewas titlanawatis.

²² Pero Jesús okinankilij:

—Namejwan mach ankimatij tlan ankitlajtlanij.

Jesús okintlajtlanij itelpokawan in yon tenan:

—¿Kox welis namejwan ankixikoskej anpanoskej ken tlan Nej nipanos? ¿Kox welis anmokuateekiskej ika tekokojkayotl katlej ika nimokuateekis?

Iwan yejwan okijtojkej:

—Tiweliskej.

²³ Jesús okinmilwij:

—Ipan melajka, namejwan anpanoskej ken Nej nipanos, iwan anmokuateekiskej ika tekokojkayotl katlej ika nimokuateekis. Pero tla anmotlaliskej ik noyekma o noso ik noopochma, mach Nej nikijtos, sino noPapan kintlalis ompa katlej Yej yokinpejpenke.

²⁴ In oksekimej majtlakin momachtijkej nikuak ijkón okikakej, okualankej innawak in yonmej omen iknimej.

²⁵ Pero Jesús okinnutzke, iwan okinmilwij:

—Namejwan kuale ankimatij ke akinmej mochiwaj gobiernojtin de se país, tlanawatiaj ika miek tlanawatile. Iwan tlakaj katlej okachi weyikistokey (weyititokey), yejwan okachi tlanawatiaj chikawak itech se pueblo. ²⁶ Pero namejwan mach ijkón xiekan, sino tla se de amejwan kineki weyikistos, kipia por kintekichiwilis in oksekimej. ²⁷ Iwan akin kineki tlayekantos de yen namejwan, kipia por kintekichiwilis nochtin in oksekimej, ²⁸ ijkón ken Nej katlej onimochij nitlakatl mach oniwalaj para ma nechpalewikan, sino Nej oniwalaj para nitlapalewis iwan para niktemakas nonemilis, iwan ijkón niktlaxtlawas para nikinmakixtis miekej de intlatlakol.

*Jesús okintlachialtij omen tlakaj katlej mach otlachiayaj
(Mr. 10:46-52; Lc. 18:35-43)*

²⁹ Nijuak yejwan yokistiatyaj de itech weyikan de Jericó, miekej tlakaj oyajkej ikuilapan Jesús. ³⁰ Omen tlakaj katlej mach tlachiaj oewatokaj ipan ojtle, iwan nikuak okikakej nik in Jesús opanoaya ik ompa, otzajtikej chikawak okijtojkej:

—Señor, iKone in David, xitechiknomati.

³¹ In tlakaj okinmajwakej para ayakmo ma tzajtzikan, pero yejwan okachi otzajtikej chikawak:

—Señor, iKone in David, xitechiknomati.

³² Ijkuakón Jesú斯 omoketzke, okinnottzke in omen tlakaj katlej mach tlachiaj, iwan okintlajtlanij:

—¿Tlan ankinekij ma namechtokti?

³³ Toneses yejwan okilwijkej:

—Señor, tiknekij titlachiaskej.

³⁴ Jesú斯 okinmiknomatke, okintlalij imawan ipan inmixtololowan, iwan san niman ijkuakón ya kuale otlachixkej, iwan oyajkej iwan Jesú斯.

21

Jesú斯 okalakke itech weyikan de Jerusalén

(*Mr. 11:1-11; Lc. 19:28-40; Jn. 12:12-19*)

¹ Nijuak oajsitoj itech pueblo de Betfagé, inakastlan Olivostepetl mach ok wejkatzin de Jerusalén, ijkuakón Jesú斯 okintitlanke omen imomachtijkawan ² iwan okinmilwij:

—Xiwian itech nekáj pueblo katlej kajki tlayakapan. Ompa ankajtsitiwej se burra ilpitok iwan ikone. Xikintotomakan iwan xinechinwalwikilikan. ³ Iwan tla akaj itlaj amechilwis, xikilwikan nik in Señor kinneki, iwan san niman amechinkawiliki.

⁴ Ijkón otlapanok para ma mochiwa tlan okijtoj in profeta:

⁵ Xikinmilwikan in tlakaj de Sión:

“Xikita, moRey walmuika monawak,
pasensiatzin, yetiwitz ipan se burrajtzin,
ipan ikone in burra katlej tlamama.”

⁶ Ijkuakón imomachtijkawan oyajkej iwan okichijkej ijkón ken Jesú斯 okinmilwij. ⁷ Okualwikakej in burra iwan ikonetzin, iwan okinkentilijkej intlakenwan inpan iwan Jesú斯 oteljok ipan burra. ⁸ Iwan tlakaj, sa tekitl miekej oyekaj, okinsojokej intlakenwan ipan ojtle, iwan oksekimej okisojokej ixiwyo in kuanmej. ⁹ In tlakaj katlej oyayaj tlayakapan iwan katlej oyayaj tlakuitlapan, otzajtiazaj okijtoayaj:

—¡Hosana! ¡Oejkok iKone in rey David! ¡Ma Dios kitiochiwa katlej okiwaltitlanke para tlanawatis! ¡Hosana! ¡Ma weyijkatlalito in toTajtzin Dios katlej kajki ilwikak!

¹⁰ Nijuak Jesú斯 okalakke itech weyikan de Jerusalén, nochtin oyomonkej iwan otlajtlaniaj:

—¿Akin yin tlakatl?

¹¹ Iwan tlakaj okijtoayaj:

—Yin yen Jesú斯, in profeta de pueblo de Nazaret, de estado de Galilea.

*Jesús okinkixtij in tlanamakakej de ijtik in weyi tiopan
(Mr. 11:15-19; Lc. 19:45-48; Jn. 2:13-22)*

¹² Satepan Jesús okalakke ijtik weyi tiopan de Dios, iwan okinkixtij nochtin katlej ompa otlanamakatokaj iwan otlakojtokaj. Okintlatlamochilij inmesajwan in tominpatlakej, iwan okintlatlamochilij insiyajwan in palomasnamakakej.

¹³ Iwan okinmilwij:

—Itech tiotlajkuilole kijta: “Nokal kinotzaskej kale de tiotzajtzilistle”, pero namejwan ya ankikuepkej se kale de ichtekej.

¹⁴ Ompa ijtik in weyi tiopan omijkuaniijkej inawak Jesús sekimej tlakaj katlej mach tlachiaj iwan sekimej koxomej, iwan Jesús okinpajtij. ¹⁵ Pero in tlayekankej tiopixkej iwan tlamachtijkej de itlanawatil in Moisés, sa tekitl okualankej nikuak okitakej in milagrostin katlej Jesús okinchiwaya, iwan nikuak okinkakej kenik in pilalaktin otzajtziaj chikawak ijtik in weyi tiopan, nikuak okijtoayah: “¡Hosana! ¡Oejkok iKone in David!” ¹⁶ Ijkuakón okilwijkej in Jesús:

—¿Tikkaki tlan kijtaj in yinmej pilalaktin?

Iwan Jesús okinnankilij:

—Aján, nikinkaki. ¿Amo semi ankileroaj in tiotlajkuilole kan tlapoa de yon tlajtole? Kan kijta:

Otokchij ke in pilalaktin iwan konemej katlej ok chiichij, ma mitztlakuikilikan ika melajka kuale weyikixtilistle.

¹⁷ Ijkuakón Yej okinkajtej, okiske de itech yon weyikan, iwan oyáj itech pueblo de Betania iwan ompa omokaj yon yuak.

*Jesús okajwak in igoskuawitl
(Mr. 11:12-14, 20-26)*

¹⁸ In kualkan, nikuak Jesús yomokuepaya para Jerusalén, otiossj. ¹⁹ Okitak ipan ojtle se igoskuawitl, omijkuani jí kan oyeka yon kuawitl, pero mach itlaj igos okajsik, sino okipiaya san puro ixiwyo. Ijkuakón, Jesús okilwij in igoskuawitl:

—Mach ok semi xitlaki.

Iwan san niman ijkuakón in igoskuawitl owakke.

²⁰ Nikuak imomachtijkawan ijkón okitakej, sa otlajtlachixkej (omomajmawtijkej) iwan okitlajtlanijkej in Jesús:

—Kenik in igoskuawitl owakke san niman?

²¹ Jesús okinnankilij:

—Ipan melajka namechilwia, tla ankipiaj tlaneltokalistle iwan amo anmoijtitlapowiskej, amo san yen igoskuawitl welis ankiwatzaskej, sino asta welis ankilwiskej yin tepetl: “Ximijuani de nian iwan ximotlamotla ijtik atl”, iwan ijkón

tlapanos. ²² Tla amejwan ankineltokaj nik in Dios amechmakas nochi tlan ankitlajtlaniliskej, tones xikmatikan nik in Dios melawak amechmakas nijuak anmotiotzajtziliskej.

*Jesús okitlajtlanijkej akin okimakak tlanawatijkayotl
(Mr. 11:27-33; Lc. 20:1-8)*

²³ Iwan ikuakón Jesús okalakke ijlik in weyi tiopan, iwan mientras otlamachtijtoka, ikuakón omijkuanijkej inawak in tlayekankej tiopixkej iwan tlayekankej tetajtzitzintin judio-jtin, iwan okitlajtlanijkej:

—¿Ika tlan tlanawatijkayotl tikchiwa nochi yin tlamentle tlan tikchijtinemi? ¿Akin omitzmakak yon tlanawatijkayotl?

²⁴ Jesús okinnankilij:

—Nej noijki namechtlatlantis se tlajtole, tla namejwan annechnankiliskej, tones Nej noijki namechilwis ika tlan tlanawatijkayotl nikchiwa. ²⁵ ¿Akin okinawatij in Juan ma tlakuateeki? ¿Yen Dios okinawatij, o noso yen tlakaj okinawatijkej?

Iwan opéj kimolwiaj entre yejwan, okijoayaj:

—Tla tikijtoskej yen Dios okinawatij, techilwis: “¿Tlanik mach ankineltokakej?” ²⁶ Iwan tla tikilwiskej ke okinawatijkej in tlakaj, kualaniskej nochtin. Tejwan tikinmiimakasij in tlakaj porke nochtin kimatij nik in Juan oyeka profeta.

²⁷ Tones okinankilijkej in Jesús:

—Mach tikmatij akin okinawatij.

Ikuakón Jesús noijki okinmilwij:

—Pues Nej noijki mach namechilwis ika tlan tlanawatijkayotl nikchiwa.

Ejemplo de se tlakatl iwan omen itelpokawan

²⁸ Jesús okinmilwij:

—¿Kenamij ankiyejyekoaj yin ejemplo? Se tlakatl okinpiaya omen itelpokawan. Omijkuanij inawak se, iwan okilwij: “Nokone, xiwia xitekipanoti axan itech nouvasyoj.”

²⁹ Itelpoch okinankilij: “Mach nias.” Pero satepan okipatlak itlayeheyekol iwan oyáj otekipanoto. ³⁰ In tetaj omijkuanij inawak oksé itelpoch, iwan noijki okilwij ma wia ma tekipanoti itech iuvasyoj, iwan itelpoch okinankilij: “Kuale kajki, nias.” Pero mach oyáj. ³¹ ¿Katlij yen de yonmej omen okichij tlan okinekia in tetaj?

Yejwan okijoayaj:

—Yen katlej achtoj okinawatij.

Tones in Jesús okinmilwij:

—Ipan melajka namechilwia, ke katlej tlakobraroaj ika impuestos iwan siwamej momekatijkej, yejwan achtoj kalakiskej kan Dios tlanawatia iwan namejwan satepan. ³² Porke Juan owalaj oamechmatiltiko kenik welis

anmoyolkuepaskej inawak Dios, iwan namejwan mach ankineltokakej. Pero katlej tlakobraroaj ika impuestos iwan siwamej momekatijkej, yejwan okineltokakej. Pero namejwan maski ankitakej nik in yejwan omoyolkuepkej, namejwan mach anmoyolkuepkej iwan nion mach ankineltokakej tlan oamechilwij in Juan.

In tlatookakej mach kualtin

(*Mr. 12:1-12; Lc. 20:9-19*)

³³ 'Xikkakikan yin oksé ejemplo: Oyeka se tetaj katlej ouvastookak. Okikorraltij ika kuawitl. Okichij se tanke para ompa kipatzkas uvas, iwan okichij se torre wejkapan para ipan tlejkos para kimonekuitlawis iuvasyoj.

'Satepan okinkajtewili j sekimej tekipanojkej para ma kimonekuitlawikan iwan satepan kimokawiskej tlaatlajko de tlan kisas, iwan yej oyáj wejka itech oksé país. ³⁴ Nijuak oajsik in tonale para uvastekiskej, ikuakón okintitlanke sekimej itekipanojkawan para ma kikuitij tlan kitokaroa. ³⁵ Pero in tekipanojkej okinkitzkijkej iwan okinmagakej itekipanojkawan in tlaltekwaj. In se okimagakej, in se okimiktijkej, iwan oksekimej okinmojmotlakej ika tetl. ³⁶ In tlaltekwaj oksemi okintitlanke oksekimej itekipanojkawan, okachi miekej ke achtoj. Pero in tekipanojkej no ijkón okintoktijkej ken katlej achtoj okintitlanke.

³⁷ 'Salúltimo okititlanke ikone, iwan okimolwij: "Kitlakitaskej in nokone." ³⁸ Pero nijuak okitakej ikone, in tekipanojkej okimolwijkej entre yejwan: "Yin ikone yen kimokawis in tlale. Ma tikmiktikan, iwan tejwan tikmoaxkatiskej it-lal." ³⁹ Ikuakón kiné, okikitzkijkej, okikixtijkej de itech yon uvasyoj, iwan okimiktijkej.

⁴⁰ 'Nijuak witz in tlaltekwaj de yon uvasyoj, ¿tlan kintoktis in yonmej tekipanojkej katlej okinkajtewili j iuvasyoj?

⁴¹ Okilwijkej:

—Kinmiktis in yonmej tekipanojkej mach kualtin, iwan mach kinmiknomatis. Iwan satepan kinmaktilis iuvasyoj oksekimej tekipanojkej, katlej kimakaskej tlan kitokaros nikuak ajsis tonale.

⁴² Toneses Jesús okintlajtlanij:

—¿Amo semi ankileroaj in tiotlajkuilole? In tiotlajkuilole ijkín kijta:

In tetl katlej in kalchijkej mach okixitakej,
omochij yen tetl katlej okachi kichikajtok in kale.

Yin tetl ovalaj de yen toSeñor iwan tejwan tikmotetzawiaj.

⁴³ Por yonik namechilwia, nik namejwan mach ok amechtokaros anyeskej kan Dios tlanawatia, sino kintokaros in tlakaj katlej kitemakaskej in tlakilotl katlej Dios kineki.

⁴⁴ Iwan akin wetzis ipan yon tetl, kipojpostekis. Iwan tla yon tetl wetzis ipan akaj, sa tekitl kikuejkuechos.

⁴⁵ Nijuak in tlayekankej tiopixkej iwan fariseos okinkakej yonmej ejemplos katlej Jesús okinmijtoj, okimomakakej kuenta nik yejwan okimilwiftoka. ⁴⁶ Ijkuakón okinekiaj kikitckianij in Jesús, pero okinmiimakaskej in tlakaj, porke in tlakaj okineltokayañ nik in Jesús Yej se profeta.

22

Ejemplo de kan monamiktiaj

¹ Jesús oksemi opéj kintlapowia ika ejemplos, okinmilwij:

² —Kan Dios tlanawatia yon ken se rey katlej okichij se ilwitl nijuak okinamiktij itelpoch. ³ In rey okintitlanke itekipanojkawan ma kinnotzatij iinbitadoswan, pero iinbitadoswan mach okinekej oyajkej. ⁴ In rey oksemi okintitlanke oksekimej itekipanojkawan, okinmilwij: “Xikinmilwikan noinbitadoswan, in tlakuale yokualtik. Notorojwan iwan noyolkawan katlej tojtomawakej yonkinmiktij, iwan nochti ya tlayektlalitok. Ma wikan ilwitl.” ⁵ Pero iinbitadoswan mach okichijkej kuenta. Se oyáj otekipanoto itlalaj, se oyáj otlaesmanato, ⁶ iwan oksekimej okinkitzkijkej itekipanojkawan in rey, okinmagakej iwan okinmiktijkej. ⁷ Ijkuakón in rey sa tekitl okualanke, iwan okintitlanke isoldadojwan para ma kinmiktij katlej otemiktijkej iwan para ma kinchichinilikan inpueblo. ⁸ Tones okinmilwij itekipanojkawan: “In tlakuale yokualtik para yen ilwitl, pero nochtin katlej onikinminbitaroj mach okintokaroaya para witzej porke mach kualtin. ⁹ Xiwian ipan ojtle iwan xikinminbitarokan nochtin akinmej ankinmajisikej, ma wikan nian itech ilwitl kan monamiktiaj.” ¹⁰ Ijkuakón itekipanojkawan in rey oyajkej ipan ojtle iwan okinmololojkej nochtin katlej okinmajisikej, katlej mach kualtin iwan katlej kualtin. Iwan ijkón in kalijtik otenke de tlakaj itech yon ilwitl kan monamiktiaj.

¹¹ Ijkuakón in rey okalakke kalijtik para kinmitas katlej inbitadostin, okitak ompa oyeka se tlakatl katlej mach omotzotzoltij ken omonekia motzotzoltiani para yon ilwitl kan monamiktiaj. ¹² Iwan rey okitlajtlanij: “Amigo, ¿kenik otikalakke nian iwan mach otimotzotzoltij ken moneki para tietos itech yin ilwitl kan monamiktiaj?” Pero in tlakatl mach okinankilij. ¹³ Tones in rey okinmilwij katlej otlaesbirojtokaj: “Xikijilpijan itech ikxiwan iwan itech imawan, iwan xiktlamotlakan kalan ijtk tlatleyualotl, kan chokas iwan motlanteteyitzas.”

¹⁴ Porke Dios kinnotza miekej tlakaj pero san sekimej kinpejpena para ma yekan iaxkawan.

*Kox se kitlaxtlawas impuestos para César
(Mr. 12:13-17; Lc. 20:19-26)*

¹⁵ Ijkuakón in fariseos oyajkej, iwan omotlatlalwijkej kenik kimayawiskej in Jesús ika itlaj tlajtole para ika kitilwiskej. ¹⁶ In fariseos okintitlankej sekimej intekipanojkawan iwan sekimej itekipanojkawan in Herodes, para ma kitlajtlaniitij in Jesús:

—Tlamachtij, tikmatij nik tejwatzin tikipta tlan melawak, iwan titlamachtia ipan melajka kenik se nemis ken Dios kineki, iwan mach timotekawilia akaj ma mitzkajkayawa, porke mach tikita akin tejwan kox tirikojtin o noso tipobrestin. ¹⁷ Xitechilwi kiné, kenamij tkiyejyekoa: ¿Kox kuale se kitlaxtlawas impuestos para César o noso amo?

¹⁸ Pero Jesús okimatis nik mach kuale tlan yejwan okiyejyekoayaj, iwan okinmilwij:

—¿Tlanik ankinekij annechmayawiskej ika itlaj tlajtole? Namejwan san anteixkajkayakej. ¹⁹ Xinechititikan se tomin katlej ika motlaxtlawa impuesto.

Yejwan okimakakej se denario tomin. ²⁰ Ijkuakón Jesús okintlajtlanjij:

—¿De akin ixko in yin iwan de akin itoka katlej nian ikuilitok?

²¹ Okinankilijkej:

—De César.

Iwan Jesús okinmilwij:

—Xikmakakan in César tlan de yen César, iwan xikmakakan Dios tlan de yen Dios.

²² Nijuak ijkón okikakej, sa otlajtlachixkej (omomajmawtijkej). Satepan okikajtejkej iwan oyajkej.

*Okitlajtlanjikej in Jesús kox moyolkuiskej in mikkamej
(Mr. 12:18-27; Lc. 20:27-40)*

²³ Itech yon tonale noijki, in saduceos omijkuaniijkej in awak Jesús, katlej kijtaj mach melawak moyolkuiskej (moyolitiskej) in mikkamej. Iwan okitlajtlanjikej:

²⁴ —Tlamachtij, Moisés okijtoj tla se tlakatl yomonamiktij iwan miki iwan mach okinpixke ipilwan, in ikni in yon difunto kipia de monamiktis iwan viuda para kinpialis ipilwan in ikni in difunto. ²⁵ Ijkón kiné, nian entre tejwan oyekaj chikomen iknimej. In tetiachka achtoj omonamiktij, iwan omikke. Komo amo okinpixke ipilwan, okajtej isiwa para ikni. ²⁶ No ijkón omochij ikni katlej kiwaltoka, iwan satepan no ijkón omochij in oksé katlej kiwaltoka, iwan ijkón omochijkej san ken noctin chikomen iknimej. ²⁷ Iwan satepan de omijmikkej noctin iknimej noijki omikke in siwatl. ²⁸ Toneses, itech nekáj tonale nijuak moyolkuiskej

(moyolitiskej) in mikkamej, ¿katlij yej de nochtin yonmej chikomen iknimej yetos isiwa? Porke nochtin omonamikti-jkej iwan yon siwatl.

²⁹ Jesús okinnankilij:

—Namejwan mach ompa tlan ankijtaj, porke mach ankimomakaj kuenta in tiotlajkuilole nion mach ankimomakaj kuenta de ipoder in Dios. ³⁰ Porke nikuak moyolkuiskej (moyolitiskej) in mikkamej, in tlakaj iwan siwamej mach monamiktiskej, sino yeskej kej angelestín de Dios ompa il-wikak. ³¹ Pero ken ya timotlapowijtokej de yen mikkamej moyolkuiskej, ¿amo ankileroraj tlan Dios oamechilwij? Porke okijtoj: ³² “Nej niDios de Abraham, de Isaac iwan de Jacob.” In Dios mach Dios de mikkamej, sino de katlej yolitokej.

³³ In tlakaj nikuak ijkón okikakej, sa otlajtlachixkej (omomajmawtijkej) por yen itlamachtil in Jesús.

Itlanawatil in toTajtzin Dios katlej okachi kuale

(Mr. 12:28-34)

³⁴ Nikuak in fariseos okimatkej nik in Jesús okinkamatza-kke in saduceos, ikuakón yejwan omololojkej inawak Jesús.

³⁵ Iwan se de yejwan katlej tlamachtij itech tlanawatile de Moisés, okitlajtlanij para kitlajtlakolmayawis:

—Tlamachtij, ¿katlij yen tlanawatile okachi weyi de nochtin in tlanawatiltin?

³⁷ Jesús okilwij:

—“Xiktlasojtla in Señor moDios ika nochí moyolo, ika nochí moanima, iwan ika nochí motlalnamikilis.” ³⁸ Yen yin tlanawatile okachi weyi iwan yen tlayekantok. ³⁹ Iwan onkaj oksé tlanawatile, ikniyo: “Xiktlasojtla mokni ken tej timotlasojtla.” ⁴⁰ Yinmej omen tlanawatiltin kijtosneki yen nochí tlan kijta itlanawatil in Moisés iwan nochí tlan kijta intlamachtil in profetajtin.

¿De akin iKone in Cristo?

(Mr. 12:35-37; Lc. 20:41-44)

⁴¹ Iwan mientras ok oololitokaj in fariseos, Jesús okintlajtlanij, ⁴² okinmilwij:

—¿Tlan ankiyejyekoaj namejwan de yen Cristo? ¿De akin iKone?

Yejwan okilwijkej:

—De yen rey David.

⁴³ Toneses Jesús okinmilwij:

—Tla namejwan ijkón ankiyejyekoaj, toneses, ¿tlanik kiné in David ika Espíritu Santo okinotzke “noSeñor”? Porke David okijtoj:

⁴⁴ In toTajtzin Dios okilwij in noSeñor yin tlajtole:

“Ximotlali ik noyekma,

asta ikuak Nej nimitztlalis titlayekanke de yejwan katlej mitzkokoliaj."

⁴⁵ Ijkón kiné, tla David okinotzke "noSeñor", ¿kenijki kiné ma yeto ikone?

⁴⁶ Iwan mach akaj owelik okinankilij nion se tlajtote, iwan desde yon tonale nion se mach ok omixewij ok itlaj okitlajtlanij.

23

Jesús okijtoj mach kuale tlan kichiwaj in fariseos iwan tlamachtijkej de itlanawatil in Moisés

(*Mr. 12:38-40; Lc. 11:37-54; 20:45-47*)

¹ Ijkuakón Jesús okinmilwij in tlakaj iwan imomachti-jkawan:

² —In tlamachtijkej de itlanawatil in Moisés iwan fariseos motlaliaj para amechmachtiskej ken otlamachtij in Moisés.

³ Ijkón, nochí tlan amechilwiskej xikneltokakan iwan xikchiwakan. Pero amo xikchiwakan tlan yejwan kichiwaj, porke yejwan mach kichiwaj tlan kijtaj. ⁴ Porke yejwan kintoktiaj in tlakaj ma kinmamakan miekjé tlanawatiltin, katlej sa tekitl owijtitok para se kinxikos. Pero yejwan nion siera ika se inmajpil mach kinekjí kajkokuiskej yon tlamamale.

⁵ Teixkajkayawaj kichiwaj tlan kuale para ma kinmitakan. Noijki teixkajkayawaj ke yolchipawakej, kitkij wejweyin textos de tiotlajkuilole ijlik kajajtzitzintin de kuetlaxtle iwan kimotlaliliaj inmixkuak iwan itech inma. Iwan noijki ki-welitaj kitlaliskej intlaken okachi tenweweyakej ken katlej kinmonakiaj oksekimej tlakaj. ⁶ Iwan itech se tlakuale kite-moaj katlej okachi kuale lugar para tlakuaskej, iwan itech tiopanmej kinekjí motlaliskej tlayakapan kan motlaliaj katlej okachi tlayekantojej, ⁷ iwan kinekjí ma kinyektlajpalokan itech tiankistle iwan kinekjí ma kinmilwikan tlamachtijkej.

⁸ Pero namejwan amo xikchiwakan de ma amechilwikan antlamachtijkej, porke nochtin namejwan anmiknimej iwan ankipiaj san se amoTlamachtij, yen Cristo. ⁹ Iwan amakaj xik-ilwikan "papan" ixko yin tlaltipak, porke san se namoPapan ankipiaj, katlej kajki ilwikak. ¹⁰ Nion amo xikchiwakan ma amechilwikan antlayekankej, porke san se namoTlayekanke ankipiaj, yen Cristo. ¹¹ Akin kintekichiwilis oksekimej, yen okachi weyikistos de yen namejwan. ¹² Porke akin moweyinekis, mopinatis. Pero akin amo moweyinekis, weyikistos.

¹³' Ay de amejwan, antlamachtijkej de itlanawatil in Moisés iwan amejwan anfariseos, anteixkajkayajkej! Porke ankint-latzakuiaj in tlakaj para amo ma kalakikan ilwikak kan Dios

tlanawatia. Iwan nion amejwan mach ankalakij, iwan nion amo ankinkawiliaj ma kalakikan akinmej kinekij kalakiskej.

¹⁴'¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankinkalkixtiliaj in viudajtin, iwan antlaixkajkayawaj anmotiotzajtziliaj sa tekitl para ma amechitakan ke ankichiwaj tlan kuale. Iwan por yonik namejwan ankitlaxtlawaskej okachi weyi namotlajtlakol.

¹⁵'¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke ik nowian (nian nepa) tlaltikpak ankitemoaj akin welis ankitlaneltokitiskej ika namotlamachtil. Iwan nijuak ya ankajsikej, ankikuepaj okachi sa tekitl yolbierotik de ke namejwan. Iwan ijkón aminochtin anyaskej ijlik tliko.

¹⁶'¡Ay de amejwan, ankatej kej antlayekankej katlej mach antlachiaj! Porke namejwan ankijtaj tla se tlakatl kijtos nik melawak tlan kijta iwan asta kijtos tlachixtok in weyi tiopan, yon mach itlaj kijtosneki, pero tla se tlakatl kijtos nik melawak tlan kijta iwan asta kijtos tlachixtok in oro katlej kajki ijlik in weyi tiopan, yon kipia por kichiwas. ¹⁷¡Melawak mach antlachiaj iwan antzontemej! ¿Katlij yen okachi importante: yen oro, o noso yen weyi tiopan katlej kitiochijtok in oro? ¹⁸Iwan noijki namejwan ankijtaj tla se tlakatl kijtos nik melawak tlan kijta iwan asta kijtos tlachixtok in artal, yon mach itlaj kijtosneki. Pero tla se tlakatl kijtos nik melawak tlan kijta iwan asta kijtos tlachixtok in ofrenda katlej kajki ipan artal, yon kipia por kichiwas. ¹⁹¡Melawak mach antlachiaj iwan antzontemej! ¿Katlij yen okachi importante: yen ofrenda, o noso yen artal katlej kitiochijtok in ofrenda? ²⁰Porke tla se tlakatl kijtos nik melawak tlan kijta iwan asta kijtos tlachixtok in artal, kijtosneki noijki tlachixtok nochí tlan ompa kajki ipan artal. ²¹Iwan tla se tlakatl kijtos nik melawak tlan kijta iwan asta kijtos tlachixtok in weyi tiopan, kijtosneki noijki tlachixtok in Dios katlej ompa chanti. ²²Iwan noijki tla se tlakatl kijtos nik melawak tlan kijta iwan asta kijtos tlachixtok in ilwikak, kijtosneki noijki kijtojtok tlachixtok isiya in Dios, iwan noijki kijtojtok tlachixtok in Dios katlej motlalia itech yon siya.

²³'¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankitemakaj namodiesmo de xiwitl ajwiakayotl de menta, de anís iwan de komino. Pero mach ankichiwaj katlej okachi importante tlan kijta in tlanawatile, de se ma kichiwa tlan melawak, de se ma teiknomati, iwan de se ma tlaneltoka inawak Dios. Kuale in tla se kitemakas diesmo,

pero noijki moneki se kichiwas katlej okachi importante.²⁴ Namejwan ankatej kej antlayekankej katlej mach tlachiaj, ankitzejtzeloa tlan ankonij para amo ma pano kanaj itlaj sayolintzin, ¡pero ankitoloaj asta se kameyo!

²⁵ ¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankicheipawaj in vaso iwan plato san ik tlixko, pero ik tlijtik anyolbierotikej. Porke namoijtik antentokej de ichtekayotl iwan de noch iwan amo kuale tlan namejwan ankichiwaj.²⁶ Namejwan anfariseos mach antlachiaj. Achtoj xikchipawakan in vaso iwan plato ik tlijtik, iwan ijkón anyeskej anchipawakej noijki ik tlixko.

²⁷ ¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan ankatej ken mikkakuyoktin katlej ik tlixko motaj kuakuaultzitzintin, pero ik tlijtik tentokej de omitl de mikkamej iwan de noch pitzyotl.²⁸ Ijkón noijki namejwan, ik tlixko anmotaj kej ankuaultin tlakaj, pero ik tlijtik antentokej de teixkajkayawalistle iwan de tlajtlakole.

²⁹ ¡Ay de amejwan, antlamachtijkej de itlanawatil in Moisés iwan namejwan anfariseos, anteixkajkayajkej! Porke namejwan kuakuaultzin ankinchiwilaj inmikkakuyokwan in profetajtin, iwan antlachijchiwaj kan toktokej katlej oyajkej kualtin tlakaj.³⁰ Iwan ankijtaj: “Tla tejwan ya tienij itech nekatej tonaltin nijuak oyekaj in ya wejkawitl toweyitajwan, mach tikinpalewianij tikinmiktianij in profetajtin.”³¹ Ika yon, namejwan amonewian ankimokuitiaj nik antepilwan de nekatej tlakaj katlej okinmiktijkej in profetajtin.³² Xikyakatlamicán kiné, in tlajtlakole katlej okipewaltijkej in ya wejkawitl namoweyitajwan.

³³ ¡Koamej! ¡Namejwan kej ankoamej! ¿Kenik ancholoskej de yen tlajyowilistle de ijtk tliko?³⁴ Por yonik, Nej ok namechinwalintitlanilijtos sekimej profetajtin iwan sekimej tlamachtijkej itech yankuik tlanawatile. Pero namejwan sekimej ankinmiktiskej iwan sekimej ankinmajmasoltiskej itech krus, iwan oksekimej ankinwitekiskej itech namotiopanwan, iwan oksekimej ankintlatlalochtijtinemiskej nian nepa itech pueblojin kan ajsiskej.³⁵ Ijkón kiné, amopan wetzis in tlajtlakole de nochtin in tlakaj katlej kualtin katlej okinmiktijkej, desde yen Abel katlej oyáj kuale tlakatl asta Zacarías ikone in Berequías, katlej namejwan ankimiktijkej ijtk in weyi tiopan iyakapan artal.³⁶ Ipan melajka namechilwia, nik noch i yon tlajtlakole wetzis inpan tlakaj katlej axan katej.

*Jesús ochokak por yen weyikan de Jerusalén
(Lc. 13:34-35)*

³⁷ ¡Ay, Jerusalén, Jerusalén, tej tikinmiktia in profetajtin iwan tikinmojmotla ika tetl katlej Dios kualintitlani monawak! ¡Miekpa oniknekke nikinmololos mokonewan, ken se pio kinmololoa ikonewan itlampa iajaswan, pero mach otiknekke! ³⁸ Axan Dios mach ok amechpalewis, sino amechkawas. ³⁹ Por yonik kiné, namechilwia nik mach oksemi annechitaskej asta ma ajsiki nekáj tonale nikuak namejwan ijkín ankijtoskej: “¡Ma Dios kitiochiwa katlej okiwaltitlanke para tlanawatis!”

24

*Jesús okijtoj in weyi tiopan xitinis
(Mr. 13:1-2; Lc. 21:5-6)*

¹ Jesús okiske de kan weyi tiopan, iwan nikuak yoyaya, ikuakón imomachtijkawan omikuanikey inawak iwan opéj kititaj in wejweyin kalmej katlej iaxkawan in weyi tiopan.

² Iwan Jesús okinmilwí:

—¿Ankinmitaj nochtin in yonmej wejweyin kalmej? Ipan melajka namechilwia, nian mach ok mokawas pepechitos nion se tetl ipan oksé tetl, nochi xitinis.

*Ijkín tlapanos antes de tlamis in tlaltikpak
(Mr. 13:3-23; Lc. 21:7-24; 17:22-24)*

³ Satepan oyajkej ipan tepetl katlej itoka Olivostepetl. Iwan nikuak Jesús omotlalij ompa, imomachtijkawan omikuanikey inawak ichtaka, iwan okilwijkey:

—Xitechilwi, ¿keman tlapanos iwan katlij yen señas tikchiaskej nikuak tiwalmuikas? ¿Iwan keman tlamis in tlaltikpak?

⁴ Jesús okinnankilij:

—Xikpiakan kuidado, amakaj ma amechkajkayawa.

⁵ Porke miekeye witzej ika notoka kijtoskej: “Nej niCristo”. Iwan miekeye kinkajkayawaskej. ⁶ Namejwan ankimatiskéj onkaj guerra iwan motlapowiskej yetos guerra, pero amo ximomawtikan, ijkón kipia de tlapanos. Pero ayamo tlamis in tlaltikpak. ⁷ Se país momagas iwan oksé país, iwan se pueblo momagas iwan oksé pueblo. Yetos apostle, yetos kokolistle, iwan tlalolinis nian nepa. ⁸ Pero nochí yon tlajyowilistle yakin ik pewas ken nikuak se siwatl pewa ijtkualo nikuak ya ajsi ora kitlakatilis ikone.

⁹ Ijkuakón namejwan amechtemaktiskej (omechtemaktiliskej) para amechkojkokoskej iwan amechmiktiskej. Nochtin amechkokoliskej por annechneltokaj. ¹⁰ Itech nekatej tonaltin miekeye wetziskej ipan tlajtlakole iwan mach ok tlaneltokaskej inawak Dios, mokokoliskej se iwan oksé,

iwan motemaktiskej se iwan oksé. ¹¹ Monextiskej miekej tekajkayajkej profetajtin, iwan kinkajkayawaskej miekej. ¹² Sa tekitl momiekilis miek tlajtlakole, iwan miekej mach ok motlasojtlaškej nion se iwan oksé. ¹³ Pero akin kixikos nochí tlan panos, Dios kimakixtis. ¹⁴ Iwan yin kuale tlajtote katlej temakixtia de kenik in Dios tlanawatia, motematiltis itech nochí in tlaltikpak, para ke nochtin in tlakaj de nochtin paismej ma kimatikan. Iwan ikuakón tlamic in tlaltikpak.

¹⁵ 'Noijki namejwan ankitaskej tlapanos tlan okikuiloj in profeta Daniel, okijoj ajsis tonale namejwan ankitaskej moketos itlaj bierotik Kan Tlatiochiwalojkan de yen weyi tiopan kan amo kipia de ompa yetos —akin kileros yin tlan okikuiloj in Daniel, ma kimomaka kuenta—, ¹⁶ ikuakón katlej yeskej Judea, ma cholokan asta inpan tepemej. ¹⁷ Iwan akin yetos ipan ikal amo ma temo ma kixtiti itlaj ikalijitik. ¹⁸ Iwan akin yetos itlalaj, amo ma mokuepa ichan para ma kikuiti itzotzol. ¹⁹ ¡Pobrestin siwamej katlej itech nekatej tonaltin kipiaskej inkone intlalaxko iwan katlej selikkonewajke! ²⁰ Xiknotzakan Dios amo ma amechtokaro ancholoskej nikuak meroj sewa, iwan nion nikuak weyi tonale. ²¹ Porke ikuakón yetos miek tlajyowilistle iwan temawtij, ken mach semi ijkón tlamochiwa desde ikuak opéj in tlaltikpak asta axan, iwan nion mach oksemi ijkón tlamochiwas satepan. ²² Iwan tla Dios amo kitzikitziniliani in yonmej tonaltin mach akaj momakixtiani. Pero yokitzikitzinilij por yejwan katlej Dios kintlasojtla katlej Yej yokinpejpenke.

²³ 'Ikuakón, tla akaj amechilwis: "Xikitakan, nian kajki in Cristo", o noso "Xikitakan, nepa kajki", amo xikneltokakan. ²⁴ Porke monextiskej Cristo jtin iwan profetajtin tekajkayajkej, iwan kinchiwaskej señalestin iwan milagrostin, para ika tlakajkayawaskej, iwan kinekiskej kinkajkayawaskej noijki katlej Dios yokinpejpenke. ²⁵ Nej yonamechilwij antes de tlamochiwas. ²⁶ Por yonik, tla amechilwiskej: "Xikitakan, nepa kajki kan tlawaki", amo xiwian. Iwan tla amechilwiskej: "Xikitakan, nian kajki itech kuarto", amo xikneltokakan. ²⁷ Porke ijkón ken ikuak tlapejpetlani ik ikisayan tonale iwan tlawia asta ik ipoliwian tonale, ijkón Nej noijki akin onimochij nitlakatl ik nian nepa nechitaskej nikuak niwitz. ²⁸ Ijkón ken nikuak tikinmitaj in tzojpilomej peva mololoaj kan kajki se mikkat.

Jesús walmokuepas oksemi

(Mr. 13:24-37; Lc. 21:25-33; 17:26-30, 34-36)

²⁹ Iwan san niman nikuak panos in tlajyowilistle itech nekatej tonaltin, in tonale tlanexosewis, in metztle sewis, mach ok metztonas, in sitlaltin wetziskej de ilwikak,

iwan chikawalistin katlej katej ilwikak papatlakaskej (bibiokaskej). ³⁰ Iwan ikuakón motas se señal de Nej katlej onimochij nitlakatl, ninesis itech ilwikak, iwan ikuakón nochtin in tlajtlakolejkej de ixko yin tlaltikpak chokaskej niikuak nechitaskej niwitz ijtk mixtle de ilwikak, ika miek nopoder iwan ika weyi nomawisotlanex. ³¹ Iwan nikinwalintilanis noangelwan, iwan ika se chikawak tlapitzalistle, kinmololoskej in tlakaj katlej Nej yonikinpejpenke de ik nowian (nian nepa) ixko yin tlaltikpak.

³² 'Xikmomakakan kuenta in ejemplo de yen igoskuawitl: Nijuak pewa moselialtia imamayo iwan pewa moxiwyotia, namejwan ya ankimatij nik ya pewas tlaxiwoyas. ³³ Ijkón nojki, niikuak namejwan ankitaskej nochti in yon ya pewas tlapanos, ikuakón nojki xikmatikan nik in Nej katlej onimochij nitlakatl ya niwalkistiwitz kaltempán. ³⁴ Ipan mela jka namechilwia, nik nochti in yin tlapanos antes de mikiskej in tlakaj katlej katej itech yinmej tonaltin. ³⁵ In ilwikak iwan yin tlaltikpak mach ok yetoskej, nochti polewiskej, pero notlajtol mach polewis, sino kipia de mochiwas.

³⁶ 'Mach akaj kimati tlan tonale iwan tlan ora niikuak niwalmokuepas, nion yen angelestín de ilwikak mach kimati, nion Nej niiKone in Dios no mach nikmati, san yen noPapan Dios kimati.

³⁷ 'Iwan ijkón ken oyeka itech tiempo de Noé, no ijkón yetos niikuak niwitz Nej katlej onimochij nitlakatl. ³⁸ Itech nekatej tonaltin, antes de mokajkawani in tlamawisolkiawatl, in tlakaj oilwitlakuayaj iwan okoniaj, omonamikiayaj iwan okintlajtlaniaj ichpokamej. Ijkón okichijtokaj asta itech nekáj tonale niikuak in Noé okalakke ijtk in weyi barko. ³⁹ In tlakaj mach okichijkej kuenta asta ikuak ovalaj in tlamawisolkiawatl iwan nochtin okinmiktij. No ijkón tlapanos niikuak niwitz Nej katlej onimochij nitlakatl. ⁴⁰ Nijuak Nej niwitz, omen tlakaj sepantekipanojtoskej intlalaj. Se kiwikaskej iwan oksé kikajtewaskej. ⁴¹ Omen siwamej sepantostoskej inkalijtik. Se kiwikaskej iwan oksé kikajtewaskej.

⁴² 'Xiijsatokan, kiné, porke mach ankimatij tlan ora witz namoSeñor. ⁴³ Xikmomakakan kuenta yin tlamantle, tla se tetaj kimatin tlan ora witz in ichtekke, ijsatoni iwan amo kitekawiliiani akaj ma kalaki ikalijtik para ma kitlachteki. ⁴⁴ Por yonik, namejwan nojki kuale ximoyektlalikan. Porke Nej katlej onimochij nitlakatl niwitz niikuak namejwan mach annechchiaj.

*In tekipanojkej katlej kualtin iwan katlej mach kualtin
(Lc. 12:41-48)*

⁴⁵ ¿Namejwan kox antekipanojkej de konfiansa iwan antlalnamikilisejkej, katlej toSeñor oamechtlalij xikitakan in tekitlitech ichan iwan xikintlamakakan in tekipanojkej nikuak ajsis ora? ⁴⁶ Xipakikan namejwan tla ikuak niwalmokuepas namechajsiki ankichijtokej tlan onamechnawatij. ⁴⁷ Ipan melajka namechilwia, nik namechtlalis xikitakan nochi tlan noaxka. ⁴⁸ Pero tla amejwan mach ankualtin antekipanojkej iwan ankiyejyekoskej ke niwejkawas para niwalmokuepas, ⁴⁹ iwan tla pewa ankinwitekij in oksekimej tekipanojkej, iwan pewa anmiilwitlakuaj iwan antlawanaj, ⁵⁰ namoSeñor witz itech se tonale nikuak namejwan mach ankchiaj, iwan itech se ora katlej namejwan mach ankimatij. ⁵¹ Sa tekitl amechwitekis, iwan amechtlalis inwan teixkajkayajkej kan anchokaskej iwan anmotlanteteyitzaskej.

25

Se ejemplo de majtlaktin ichpokamej

¹ Kan Dios tlanawatia tlamochiwas ken omochijkej in majtlaktin ichpokamej katlej okitkikej inkandil iwan oyajkej okinamikitoj in novio. ² Makuile de yonmej ichpokamej oyekaj tlalnamikilisejkej iwan ok makultin amo. ³ Katlej mach oyekaj tlalnamikilisejkej, nikuak okitkikej inkandil, mach okitkikej inmaseite para kintemitiskej oksemi. ⁴ Pero oksekimej ichpokamej katlej tlalnamikilisejkej okitkikej inboteya de aseite iwan inkandil. ⁵ Iwan como in novio mach oejkoya totoka, okochisnekkej in ichpokamej, iwan okochkej. ⁶ Satepan, kej tlajko yuak, okikakej se tlajtole: “¡Ompa witz in novio, xiknamikitij!” ⁷ Tones noctin in ichpokamej omejtewakej iwan okinyektlalijkej inkandilwan. ⁸ Iwan in makultin ichpokamej katlej mach tlalnamikilisejkej okinmilwijkej in oksekimej makultin katlej tlalnamikilisejkej: “Xitechmakakan sekin namoaseite, porke tokandilwan ya sewtokej.” ⁹ Pero in ichpokamej tlalnamikilisejkej okinnankilijkej: “Amo, porke tla tamechmakaskej mach kajxilis nion para tejwan. Okachi kuale xiwan xikmokowitzij kan kinamakaj.” ¹⁰ Pero nikuak in makultin ichpokamej katlej mach tlalnamikilisejkej oyajkej okimokowitoj inmaseite, ikuakón oejkok in novio. In ichpokamej katlej yomoyektlalijkej okalakej iwan novio itech yon ilwitz kan monamiktia in novio, iwan omotzakke in puerta. ¹¹ Satepan oejkokej in oksekimej makultin ichpokamej katlej mach okipiayaj inmaseite, otlatatalatzkej iwan okijtokej: “¡Señor, xitechtlatlapholi!” ¹² Pero yej okinnankilij: “¡Mach namechix-mati akin namejwan! ¡Xiwan!”

¹³ Ikuakón Jesús okinmilwij:

—Por yonik, namejwan xiijsatokan, porke mach ankimatiij tlan tonale nion tlan ora nijuak Nej katlej onimochij nitlakatl niwitz.

Ejemplo de sekimej tekipanojkej iwan de sekin tomin

¹⁴ 'Kan Dios tlanawatia yon ken se tlakatl katlej antes de kisas para oksé país, okinnotzke itekipanojkawan iwan okinmakak itomin para ika ma tekipanokan.

¹⁵ 'Se itekipanoj okimakak makuile mil pesos, oksé okimakak ome mil pesos, iwan oksé okimakak mil pesos. Okimakak según tlan yejwan welinij kitekipanoltianij. Satepan yon tlakatl okiske iwan oyáj wejka. ¹⁶ In tekipanoj katlej okimakakej makuile mil pesos, okichij negosio ika, iwan okitlanke ok makuile mil pesos. ¹⁷ Iwan tekipanoj katlej okimakakej ome mil pesos, noijki okitlanke ok ome mil pesos. ¹⁸ Pero oksé tekipanoj katlej okimakakej mil pesos, okitookak in tomin ijlik tlale para amo kipolos.

¹⁹ 'Opanok tiempo, inteko omokuepato, iwan opéj kinchwililia kuenta. ²⁰ In tekipanoj katlej okimakakej makuile mil pesos, okimakak iteko ok makuile mil pesos, iwan okilwij: "Señor, otinechmakak makuile mil pesos, nian kajki ok makuile mil katlej oniktlanke." ²¹ Iwan iteko okilwij: "Kuale otikchij. Tej tikuale tinotekipanoj iwan de konfiansa. Iwan komo kuale otiktekipanoltij tlan tzikitzin onimitzmakak, por yonik axan nimitztlalis xikita okachi miek tlamantle. Axan, xikalaki iwan nowan xipaki." ²² In tekipanoj katlej okimakakej ome mil pesos okitemakak ikuenta ijkín: "Señor, otinechmakak ome mil pesos, nian kajki ok ome mil katlej oniktlanke." ²³ In iteko okilwij: "Kuale otikchij. Tej tikuale tinotekipanoj iwan de konfiansa. Iwan komo kuale otiktekipanoltij tlan tzikitzin onimitzmakak, por yonik axan nimitztlalis xikita okachi miek tlamantle. Axan, xikalaki iwan nowan xipaki." ²⁴ Pero in tekipanoj katlej okimakakej mil pesos, okilwij in iteko: "Señor, como nikmati nik wel chikawak titlanawatia, iwan tikmoaxkatia tlan amo otiktlanke iwan tikmopixkia tlan amo otiktookak, ²⁵ onimomawtij, iwan okachi kuale oniktlaatij motomin. Pero nian kajki, ajsitok nochí motomin." ²⁶ Iteko okinankilij: "Tej mach tikuale tinotekipanoj iwan titlatziwke, tla otikmatia nik oniknekia nikmokawiani tlan tiktlanini, ²⁷ siera tikonkawani notomin itech banko para kitlanini ikoneyo, para nijuak niejkoni, nikresibiroani notomin iwan tlan yokitlanke." ²⁸ Ijkuakón iteko okinmilwij katlej ompa oyekaj: "Xikixtilikan in mil pesos, iwan xikmakakan katlej kipia majtlakte mil. ²⁹ Porke akin kipia, okachi kimakaskej, iwan kipias okachi miek. Iwan akin amo kipia, kikixtiliskej asta yen tzikitzin tlan kipia.

30 Iwan yin tekipanoj tlatziwke, xiktlamotlakan kalan ijтиk tlatleyualotl kan chokas iwan motlanteteyitzas.”

Tlaixkomakalistle para nochtin tlaltikpaktlakaj

³¹ 'Iwan nikuak Nej katlej onimochij nitlakatl niwitz ika nomawisotlanex inwan nochtin noagelwan, ikuakón nimotlalis itech nosiya katlej kipia imawisotlanex para nitlaixkomakas (nitlatzonmanas). ³² Iwan nochtin in tlakaj de nochtin paismej mololoskej noyakapan, iwan ninkinsealdojkixtis ken se tlajpixke kinseladojkixtia ichkamej iwan tentzomej. ³³ Nochkawan nikintlalis ik noyekma iwan tentzomej nikintlalis ik noopochma. ³⁴ Ikuakón Nej niRey ninkinmilwis katlej yeskej ik noyekma: “Xiwikan namejwan, katlej oamechtioc'hij noPapan. Xiwikan iwan xikalakikan kan nitlanawatia kej niRey, kan Dios otlayektlalij para amejwan desde ikuak okichij in tlaltikpak. ³⁵ Porke nikuak Nej onitiosij, namejwan annechatlitijkej. Nikuak Nej onamikke, namejwan annechatlitijkej. Nikuak mach onikpiaya kan nimokalotis (nimotepialtis), namejwan annechkalotijkej. ³⁶ Nikuak mach onikpiaya tlan nikonakis, namejwan annechmakakej notzotzol. Nikuak onimokokoj, namejwan annechtajpalotoj. Nikuak onitzaktoka telpiloyan, namejwan annechitatoj.” ³⁷ Ikuakón katlej oyajkej kualtin tlakaj kijtoskej: “Señor, ¿keman otimitzitakej otitiosij, iwan otimitzlamakakej? ¿O noso keman otimitzitakej otamikke, iwan otimitzatlitijkej? ³⁸ ¿O noso keman otimitzitakej amo otikpiaya kan timokalotis, iwan otimitzkalotijkej, o noso amo otikpiaya tlan tikonakis, iwan otimitzmakakej motzotzol? ³⁹ ¿O noso keman otimitzitakej otimokokoj, o noso otitzaktoka telpiloyan, iwan otajakej otimitzitatoj?” ⁴⁰ Nej niRey nikinnankilis: “Ipan melajka namechilwia, ke nochi tlan ankichijkej por nochtin yinmej nokniwan maski sensiy-ojtzitzintin, kijtosneki yen Nej nannechchiwilijkej.”

⁴¹ 'Ikuakón nojki Nej niRey ninkinmilwis katlej yeskej ik noopochma: “Xitzinkisan de Nej, namejwan mach ankuaultin. Xiwian ijтиk tlilt katlej mach keman sewis katlej Dios okichij para yen diablo iwan iangelwan. ⁴² Porke ikuak onitiosij, namejwan mach annechatlitijkej. Nikuak onamikke, namejwan mach annechatlitijkej. ⁴³ Nikuak amo onikpiaya kan nimokalotis, namejwan mach annechkalotijkej. Nikuak amo onikpiaya tlan nikonakis, namejwan mach annechmakakej notzotzol. Nikuak onimokokoj iwan nikuak onitzaktoka telpiloyan, namejwan mach annechitatoj.” ⁴⁴ Iwan ikuakón yejwan nechilwiskej: “Señor, ¿keman otimitzitakej otitiosij o noso otamikke, o noso amo otikpiaya kan timokalotis, o noso amo otikpiaya tlan tikonakis, o noso

otimokokoj, o noso otitzaktoka telpiloyan, iwan amo otimitz-palewijkej?"⁴⁵ Ijkuakón Nej niRey nikinnankilis: "Ipan mela-jka namechilwia, ke njikuak namejwan mach ankinekej ank-inpalewijkej nokniwan, maski sensiyojtzitzintin, kijtosneki yen Nej mach annechpalewijkej."⁴⁶ Iwan yonmej katlej mach kualtin yaskej itlanke (ik tlami) kan tlajyowiskej, iwan katlej yolchipawakej kalakiskej kan kipiaskej nemilstle kan mach keman tlamis.

26

Okitemojkej kenik kimiktiskej in Jesús

(Mr. 14:1-2; Lc. 22:1-2; Jn. 11:45-53)

¹ Njikuak in Jesús otlanke okijtoj nochí in yon tlajtole, okinmilwij imomachtijkawan:

² —Namejwan ya ankimatij, nik sa ome tonale polowi para yen ilwitl itoka pascua. Iwan Nej katlej onimochij ntlakatl nechtemaktiskej (nechtemaktiliskej) para nechma-jmasoltiskej itech krus.

³ Itech yonmej tonaltin in tlayekankej tiopixkej, iwan tlamahtijkej de itlanawatil in Moisés iwan tlayekankej tetajtzitzintin judiojtin, omololojkej kan patio de yen palacio kan chanti in weyi tiopixke itoka Caifás. ⁴ Ompa omotlapowijkej para kitemoskej kenik kikitzkiskej in Jesús ika itlaj tlakayawalistle para ijkón welis kimiktiskej. ⁵ Pero okijtoayaj:

—Mach tikitzkiskej itech ilwitl, para amo kualaniskej in tlakaj iwan yomoniskej.

Se siwatl okiteekilij ajwiakayotl in Jesús ipan itzontekon

(Mr. 14:3-9; Jn. 12:1-8)

⁶ Jesús oyeka itech pueblo de Betania, ichan Simón, katlej Jesús okipajtij njikuak opalania inakayo. ⁷ Ijkuakón se siwatl omijkuanij inawak Jesús katlej okitkia se boteyajtzin de alabastro tentok de ajwiakayotl katlej patíoj, iwan okiteekilij in Jesús ipan itzontekon kan oewatoka itech mesa. ⁸ Njikuak imomachtijkawan ijkón okitakej, okulankej iwan okijtokej:

—¿Tlanik yin siwatl san okawiltij in ajwiakayotl? ⁹ Porke welini monamakaní patíoj, iwan se kinmakani in tomin katlej pobrestin.

¹⁰ Jesús okikakke, iwan okinmilwij:

—¿Tlanik anmokuejsoaj inawak yin siwatl? Porke kuale tlan okichij. ¹¹ In pobrestin nochipa ankinpiaskej, pero Nej mach nochipa annechpiaskej. ¹² Yin siwatl njikuak onechteekilij ajwiakayotl itech notlalnakayo, kijtosneki okiyekt-lalij notlalnakayo para njikuak nimotookas. ¹³ Ipan mela-jka namechilwia, ke ik nowian (nian nepa) ixko yin tlaltik-pak kan motematiltis in tlajtole katlej temakixtia, noijki se

kitemakas kuenta de tlan okichij in yin siwatl iwan ijkón se kelnamikis.

Judas okitemaktij (okitemaktij) in Jesús

(*Mr. 14:10-11; Lc. 22:3-6*)

¹⁴ Ijkuakón se imomachtijkaw itoka Judas Iscariote de yen majtlakte iwan omen momachtijkej, oyáj omotlapowito inwan tlayekankej tiopixkej ¹⁵ iwan okinmilwij:

—¿Kech annechmakaskej tla namechmaktilis in Jesús?

Toneses yejwan okilwijkej kimakaskej senpoale iwan majtlakte tomin de plata. ¹⁶ Iwan desde ijkuakón Judas opéj kitemoa kenik welis kinmaktilis in Jesús.

Tiotlakantlakuale de toSeñor

(*Mr. 14:12-25; Lc. 22:7-23; Jn. 13:21-30; 1Co. 11:23-26*)

¹⁷ Nijuak opéj in ilwitl de pascua yakin se tonale, nikuak mokua in pan katlej mach kipia levadura, ijkuakón imomachtijkawan Jesús omijkuanijkej inawak, iwan okitlajtlanijkej:

—¿Kan tikneki ma tkiyektlalitij in tiotlakantlakuale de pascua para tkmomajsewis?

¹⁸ Yej okinmilwij:

—Xiwian itech weyikan de Jerusalén, ichan se tlakatl katlej iwan yonimotlapowij iwan xikilwikan: “In Tlamachtij kitja: Yoajsiko noora, moneki mochan nikmomajsewis in tiotlakantlakuale de pascua iwan nomomachtijkawan.”

¹⁹ Imomachtijkawan okichijkej ijkón ken okinnawatij in Jesús, iwan okiyektlalijkej in tiotlakantlakuale de pascua.

²⁰ Nijuak otlatleyuak, Jesús omotlalij itech mesa inwan majtlakte iwan omen imomachtijkawan. ²¹ Iwan nikuak otakuajtokaj, Jesús okinmilwij:

—Ipan melajka namechilwia, nik se de amejwan nechtemaktis (nechtemaktilis).

²² Yejwan sa tekitl omoyolkokojkej, iwan opéj kitlajtlaniaj kada se de yejwan:

—Señor, ¿kox yen nej?

²³ Jesús okinnankilij:

—Katlej kajakia ipan ijtk plato kan Nej noiiki nikajakia nopen, yen yon katlej nechtemaktis (nechtemaktilis). ²⁴ Nej katlej onimochij nitlakatl nimikis ijkón ken kitja in tiotlakuirole. Pero ipobre in tlakatl katlej nechtemaktis! Okachi kuale mach tlakatini yon tlakatl.

²⁵ Ijkuakón okitlajtlanij in Judas, katlej kitemaktis, iwan okilwij:

—Tlamachtij, ¿kox yen nej?

Jesús okinankilij:

—Aján, tej meroj.

²⁶ Mientras otlakuajtokaj, Jesús okitilanke in pan, iwan omotlasojkamatke inawak Dios, satepan okipojpostekke in pan iwan okinmajmakak imomachtijkawan, iwan okinmilwij:

—Xikkuakan. Yin yen notlalnakayo.

²⁷ Ijkuakón okitilanke in kopa, iwan omotlasojkamatke inawak Dios, satepan okinpanoltij imomachtijkawan, iwan okinmilwij:

—Xikonikan yin kopa aminochtin. ²⁸ Yin yen noeso, katlej yankuik akuerdo, katlej toyawis para ijkón miekej tlapojpolwiloskej de intlajtlakol. ²⁹ Pero namechilwia, ke desde axan mach ok nikonis iayo uvas asta nekáj tonale nikuak amowan nikonis iayo uvas yankuik katlej onkaj kan noPapan tlanawatia.

*Pedro okijtoj mach kixmati in Jesús
(Mr. 14:26-31; Lc. 22:31-34; Jn. 13:36-38)*

³⁰ Satepan de okitlakuikakej se tiotlakuikale, oyajkej ipan Olivostepetl. ³¹ Iwan ijkuakón Jesús okinmilwij:

—Namejwan aminochtin annechkajtewaskej noselti yin yuak, porke in tiotlajkuilole kija: “Nikmiktis in tlajpixke iwan ichkamej xixiniskej.” ³² Pero satepan de nimoyolkuis (nimoyolitis), Nej sa nitlayekanas para Galilea iwan satepan namejwan ompa annechitajsij.

³³ Ijkuakón Pedro, okilwij:

—Maski nochtin ma mitzkajtewakan, nej mach nimitzkawas.

³⁴ Tones Jesús okinankilij:

—Ipan melajka nimitzilwia nik yin yuak, antes de tzajtzis in kaxtil, ijkuakón tej yotikijtoj eyi buelta nik mach tinechixmati.

³⁵ Iwan Pedro okilwij:

—Maski mowan ma nechmiktikan, nej mach keman nimitzkawas.

Iwan nochtin imomachtijkawan no ijkón okijtojkej.

*Jesús omotiotzajtzili kan tlatokkuawayo itoka Getsemaní
(Mr. 14:32-42; Lc. 22:39-46)*

³⁶ Ijkuakón Jesús okinwikak imomachtijkawan se lugar tlatokkuawayo itoka Getsemaní, iwan okinmilwij:

—Nian ximotlalikan, mientras Nej niawi nimotiotzajtziliti ik ne.

³⁷ Okiwikak in Pedro iwan omen ipilwan in Zebedeo, iwan Jesús opéj sa tekitl mosentiroa iwan opéj moyolkokoa sa tekitl. ³⁸ Ijkuakón Jesús okinmilwij:

—Nikmachilia itech noanima ya niixpoliwi de neyolkokole. Nian ximokawakan xiijsatokan nowan.

³⁹ Jesú oyáj ok achitzin ik tlayakapan, ompa omotlankuaketzke asta okitennamikke in tlale, iwan omotiotzajtzilij okijtoj:

—Papan, in tla welis, xinechkixtili in yin tekokojkayotl. Pero amo ma mochiwa ken Nej nikneki, sino ken tejwatzin tikmonekiltia.

⁴⁰ Ijkuakón Jesú omokuepke kan oyekaj eyin imomachtijkawan, iwan okinmajsitajsik kochtokej. Iwan okilwij in Pedro:

—¿Amo ankixikojkej nion se ora anmijsatokej nowan?
⁴¹ Xiijsatokan iwan ximotiotzajtzilijtokan, para amo ma amechmayawi in tlajtlakole. Namoespíritu kineki kichiwas tlan kuale, pero namotlalnakayo mach tlaxikoa.

⁴² Jesú oyáj ipan ojpatian omotiotzajtzilito, iwan omotiotzajtzilij ijkín:

—Papan, tla amo welis nimakisas de itech yin tekokojkayotl, tonses ma mochiwa kiné tlan tejwatzin tikmonekiltis.

⁴³ Oksemi omokuepke kan oyekaj imomachtijkawan, iwan oksemi okinmajsitajsik kochtokej, porke inpan omopachoj in kochilistle. ⁴⁴ Oksemi okinkajtej, iwan oyáj omotiotzajtzilito ya eyi buelta, iwan oksemi okijtoj tlan achtoj okijtoj.
⁴⁵ Satepan oyáj kan oyekaj imomachtijkawan, iwan okinmilwij:

—Axan keman xikochikan iwan ximosewikan. Yoajsik ora, Nej katlej onimochij nitlakatl ya nechtemaktiskej (nechtemaktiliskej) inmak in tlakaj tlajtlakolejkej.

⁴⁶ Ximewakan, ma tiwian. Yompa witz katlej nechtemaktis.

Jesú okikitzkijkej

(Mr. 14:43-50; Lc. 22:47-53; Jn. 18:2-11)

⁴⁷ Jesú ok otlapojtoka nikuak oejkok in Judas, katlej oyeka se de yejwan majtlakte iwan omen imomachtijkawan, okualinwikaya miekej tlakaj kiwalkuij espada iwan kiwalkuij kuawitl. Yinmej tlakaj okualintitlankej in tlayekankej tiopixkej iwan tlayekankej tetajtzitzintin judiojtin. ⁴⁸ Pero in Judas antes de kinmaktilis in Jesú, achtoj okinmilwij in tlakaj kenik kinmititis. Okinmilwij:

—Katlej nej nikixpipitzos, yen yon Jesú. Xikitzkikan iwan xikwikakan.

⁴⁹ Satepan in Judas omijkuanij inawak Jesú iwan okijtoj:

—¡Noltij Tlamachtij!

Iwan okixpipitzoj. ⁵⁰ Iwan Jesú okinankilij:

—Amigo, ¿tlan otikchiwako?

Ijkuakón omijkuanijkej okitzkijkej in Jesú, iwan okiwakakej.

⁵¹ Ijkuakón se imomachtijkaw in Jesús okikixtij iespada iwan okinakastzontekke itekipanoj in weyi tiopixke.
⁵² Ijkuakón Jesús okilwij:

—Xiktlaati moespada. Porke nochtin akinmej kimomagasej ika espada, nojki mikiscej ika espada. ⁵³ ¿Amo tikmati tla Nej niknekini, welini niktlajtlaniliani noPapan, ma kualintitlani miles de angelestín para ma nechpalewíkij iwan san niman kualintitlanini? ⁵⁴ Pero tla ijkón nikchiwas, ¿kenik mochiwas tlan kijta tiotlajkuilole, katlej kijta nik ijkón nipanos?

⁵⁵ Toneses Jesús okinmilwij in tlakaj:

—¿Annechkitzkikoj namejwan ika espada iwan ika kuawitl kej yeskia niichtekke? Nochipa onieka amowan itech in weyi tiopan onitlamachtijtoka iwan mach keman annechkitzkijkej. ⁵⁶ Pero nochí yin nipanoa para ma mochiwa tlan kijta in tiotlajkuilole katlej okíkuilojkej in profetajtin.

Ijkuakón nochtin imomachtijkawan okikajtejkej iselti in Jesús iwan ocholojkej.

Jesús okiwikakej kan tlaixkomakaj (tlatzonmanaj)
(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Katlej okitzkijkej in Jesús okiwikakej ixpan weyi tiopixke Caifás, kan oololitokaj in tlamachtijkej de itlanawatil in Moisés iwan tlayekankej tetajtzitzintin. ⁵⁸ Pero in Pedro inkuitlapan oyáj de wejka asta kan patio de ichan in weyi tiopixke, ompa okalakke iwan omotlalij inwan mayoltin para kitas tlanon tlapanos.

⁵⁹ In tlayekankej tiopixkej, iwan tlayekankej tetajtzitzintin, iwan nochtin de yen junta, okitemoayaj kenik kimayawiskej in Jesús ika tlajtoltlatlaliliste para kimiktiskej. ⁶⁰ Pero mach itlaj okajxiliayaj tlan ika kistlakawiskej, maski miekej okijtojkej tlan amo melawak. Pero satepan omoketzkej omen tlakaj teistlakawijkej katlej mach kualtin, ⁶¹ iwan okijtojkej:

—Yin tlakatl okijtoj: “Nej welis nikxitinis in weyi tiopan de Dios, iwan san ika eyi tonale nikkewaltis oksemi.”

⁶² Toneses in tlayekanke tiopixke omoketzke, iwan okilwij in Jesús:

—¿Amo titlanankilis? ¿Melawak tlan yejwan mitzistlakawiaj?

⁶³ Pero Jesús mach otlanankilij. Ijkuakón in tlayekanke tiopixke okilwij:

—Nimitznawatia ika itoka in toTajzin Dios katlej nochipa yolitok, xitechilwi kox yen tej tiCristo, iKone in Dios.

⁶⁴ Jesús okinankilij:

—Aján yen Nej, ijkón ken tej yotikijtoj. Iwan noijki namechilwia, nik namejwan annechitaskej Nej katlej onimochij nitlakatl niewatos ik iyekma in Dios katlej kipia weyi ipoder, iwan niwitz de ilwikak ijtk mixtle.

⁶⁵ Ijkuakón in tlayekanke tiopixke omotlakentzayanke, iwan okijtoj:

—¡Yin tlakatl kixpanawia in Dios! ¿Tlan para moneki ok akaj ma kistlakawi de tlan yokijtoj? Namejwan ya ankikakej tlan yej inewian yokimokuitij. ⁶⁶ ¿Namejwan ken ankijtaj?

Iwan yejwan okijtojkej:

—¡Tlajtlakolej, moneki ma miki!

⁶⁷ Ijkuakón okixchijchakej iwan okimaitenkej. Oksekimej okixtlajtlatzinijkej ⁶⁸ iwan okilwijkej:

—Tej como tiCristo, ¡tla xitlajto (xikadibinaro) akin omitzmaak!

Pedro okijtoj mach kixmati in Jesús

(*Mr. 14:66-72; Lc. 22:56-62; Jn. 18:15-18, 25-27*)

⁶⁹ Pedro oewatoka kalan kan patio, iwan ijkuakón se tlapalewijkasiwatl omijkuanij inawak iwan okilwij:

—Tej noijki otinemia iwan Jesús katlej de estado de Galilea.

⁷⁰ Pedro mach okimokuitij, okijtoj:

—Mach nikmati tlan tikipta.

⁷¹ Pedro yokistiaya ik puertajko, oksé siwatl okitak, iwan okinmilwij katlej ompa oyekaj:

—Yin tlakatl noijki onemia iwan Jesús de pueblo de Nazaret.

⁷² Pedro oksemi mach okimokuitij, iwan asta okijtoj nik in Dios tlachixtok. Okijtoj:

—Mach nikixmati in yon tlakatl.

⁷³ Okachitzin satepan, katlej ompa oyekaj omijkuanijkej inawak in Pedro, iwan okilwijkej:

—Ya nele, tej noijki se de yejwan, porke mokaki oksé nik titlapoa.

⁷⁴ Ijkuakón opéj tlawikaltia iwan asta okijtoj nik in Dios tlachixtok mach melawak. Okijtoj:

—Mach nikixmati in yon tlakatl.

Iwan san niman ijkuakón owaltzajtzik in kaxtil. ⁷⁵ Ijkuakón Pedro okelnamikke tlan achtoj okilwij in Jesús: “Antes de tzajtzis in kaxtil, tej ijkuakón yotikijtoj ya eyi buelta nik mach tinechixmati.” Iwan Pedro okiske de ompa iwan ochokak sa tekitl.

27

Jesús okiwikakej inawak Pilato

(*Mr. 15:1; Lc. 23:1-2; Jn. 18:28-32*)

¹ Nijkuak otlaneske, nochtin in tlayekankej tiopixkej in wan tlayekankej tetajtzitzintin judiojtin, omotlalijkej san se tlajtote kenamij kichiwaskej para kimiktiskej in Jesús. ² Okiwikakej ilpitiw iwan okimaktijkej in gobernador Ponce Pilato.

Judas omokechpiloj

³ Satepan Judas, katlej okitemaktij (okitemaktilij) in Jesús, nijkuak okitak nik in Jesús yokitlajtlakoltijkej para mikis, omoyolpejpenke (omoyolkuepke) de tlan okichij, iwan oyáj okinkuepilito in senpoale iwan majtlakte tomin de plata in tlayekankej tiopixkej iwan tlayekankej tetajtzitzintin. ⁴ Iwan okinmilwij:

—Yonitlajtlakoj, porke oniktemaktij yon tlakatl katlej mach itlaj tlajtlakole okichij.

Pero yejwan okilwijkej:

—Tejwan mach totekiw. ¡Ompa tej xikita!

⁵ Ijkuakón Judas okitlamotlak in tomin ijtk in weyi tiapan, okiske, iwan oyáj omokechpiloto.

⁶ In tlayekankej tiopixkej okololojkej in tomin iwan okijtokej:

—Mach welis tiktlaliskej yin tomin ijtk kaja kan motlalia in ofrenda, porke ika okitlaxtlajkej imikilis se tlakatl.

⁷ Iwan satepan omotlalijkej san se tlajtote para ika yon tomin kikowiliskej itlal in Xoktzinchij, para kipiaskej kan kintookaskej in tlakaj katlej mach ompa chanejkej. ⁸ Por yonik yon tlale itoka asta axan, Tlale de Estle. ⁹ Iwan ijkón omochij tlan okijtoj in profeta Jeremías, nijkuak okijtoj: “Okitilankej (okonankej) in senpoale iwan majtlakte tomin de plata, achón tomin katlej okitemakakej in tlakaj de Israel por Yej. ¹⁰ Iwan ika yon tomin okikowilijkej itlal in Xoktzinchij, ijkón ken onechnawatij in Señor.”

Pilato okitlatzintokij in Jesús

(Mr. 15:2-5; Lc. 23:3-5; Jn. 18:33-38)

¹¹ Jesús oyeka ixpan gobernador itoka Pilato, iwan yin gobernador okitlatlanij in Jesús:

—¿Yen tej tiRey de judiojtin?

Jesús okilwij:

—Aján, ijkón ken tej yotikijtoj.

¹² Iwan maski in tlayekankej tiopixkej iwan tlayekankej tetajtzitzintin opéj kistlakawiaj, in Jesús mach itlaj okijtoj.

¹³ Ijkuakón Pilato okilwij:

—¿Amo tikkaki tlan yejwan kijtaj de tej?

¹⁴ Pero Jesús mach itlaj okinankilij. Iwan Pilato sa otlajtachixke (omomajmawtij).

*Jesús okitemaktijkej (okitemaktilijkej) para ma kimiktikan
(Mr. 15:6-20; Lc. 23:13-25; Jn. 18:38-19:16)*

¹⁵ In gobernador okipiaya kostumbre ke itech ilwitl de pascua kikajkawas se preso, san katlij yej kitlajtlaniliskej in tlakaj. ¹⁶ Ijkuakón otzaktoka telpiloyan se tlakatl katlej ik nowian (nian nepa) okitokayomatiaj itoka Barrabás. ¹⁷ Iwan nikuak omololojkej miekej tlakaj, in Pilato okintlajtlanij:

—¿Katlij yej namejwan nankinekij ma nikkajkawa: yen Barrabás, o noso yen Jesús, katlej kinotzaj Cristo?

¹⁸ Porke in Pilato okimomakak kuenta nik in tiopixkej omoxikoayaj, iwan por yonik okitemaktijkej (okitemaktilijkej) in Jesús.

¹⁹ Mientras Pilato oewatoka ipan isiya para tlaixkomakas (tlatzonmanas), isiwa otlatitlanke ma kilwitij: “Amo ximokalaki iwan yon tlakatl yolchipawak, porke yin yuak wel onechmajmawtij tlan onikteemikke de yej.”

²⁰ Pero in tlayekankej tiopixkej iwan tlayekankej tetajtzitz-intin okintlatlalwijkej in tlakaj para ma kitlajtlanilikan ma kikajkawakan in Barrabás, iwan ma kimiktikan in Jesús. ²¹ In gobernador oksemi okinmilwij:

—¿Katlij yej de yinmej omen ankinekij ma nikkajkawa?

Iwan yejwan okijtokej:

—Xikkajkawa in Barrabás.

²² Pilato okintlajtlanij:

—¿Iwan tlan nikchiwas iwan Jesús, katlej kinotzaj Cristo?

Nochtin okilwijkej:

—¡Xikmajmasolti itech krus! ¡Ma miki!

²³ Toneses in Pilato okinmilwij:

—Pero, ¿tlan okichij?

Pero yejwan oksemi otzajtiskej:

—¡Xikmajmasolti itech krus! ¡ma miki!

²⁴ Nikuak in Pilato okitak nik mach itlaj owelia okichiwaya iwan yej okachi oyomoniaj, ijkuakón otlanawatij ma kikuitij atl iwan omomajtekij inmixpan nochtin tlakaj, iwan okijtoj:

—Nej mach nikmati de imikilis in yin tlakatl. Ompa amejwan xikitakan.

²⁵ Iwan nochtin in tlakaj okijtokej:

—¡Yon xitechkawili tejwan iwan topilwan ma yeto tejwan totlajtlakol de imikilis!

²⁶ Toneses in Pilato okikajkaj in Barrabás. Iwan satepan otlanawatij ma kiwitekikan in Jesús, iwan okinmaktilij in tlakaj para ma kimajmasoltikan itech krus.

²⁷ Satepan isoldadojwan in gobernador okiwikakej in Jesús kan palacio, iwan okiyawalojkej nochtin in soldadojtin.

²⁸ Satepan okixixinijkej (okixipetzojkej), iwan okonakiltijkej

se tlakemidl weyak chichiltatlilmiktik ken katlej konakiaj in reytin.²⁹ Okichijkej se korona de witztle iwan okitlalilijkej ipan itzontekon. Okitzkiltijkej se vara itech iyekma kej tekiwaj. Iwan omotlankuaketzaya iyakapan, okipinawiayaj okijtoayah:

—¡Viva in Rey de judiojtin!

³⁰ Iwan okichijchayaj, iwan okikixtilijkej in vara iwan ika okikuawiwitekiaj.³¹ Satepan de okipinawijkej, okikixtilijkej in tlakemidl chichiltatlilmiktik iwan oksemi okonakiltijkej itzotzol. Satepan okiwikakej para kimajmasoltiskej itech krus.

Jesús okimajmasoltijkej itech krus

(Mr. 15:21-32; Lc. 23:26-43; Jn. 19:17-27)

³² Nijuak yoyayaj ipan ojtle, okinamikej se tlakatl de pueblo de Cirene itoka Simón. Iwan okitoktijkej ma kimamali ikrus in Jesús.

³³ Nijuak oajsitoj se lugar itoka Gólgota, kijtosneki Mikkat-zontekomatl,³⁴ okimakakej ma koni vino katlej okinelojkej ika se pajtle chichik. Pero nijuak okiyekoj, mach okinekke okonik.

³⁵ Nijuak yokimajmasoltijkej itech krus, in soldadojtin omotlaankej para kimoxejxeliliskej entre yejwan itzotzol in Jesús. Ijkón omochij tlan ya wejkawitl okijtoj in profeta: “Omotlaankej, iwan okimoxejxelilijkej notzotzol entre yejwan.”³⁶ Iwan satepan omotlalijkej para kitlatoskej (kikuidarojtoskej).³⁷ Ik ikuapak okitlalilijkej se letrero ikuilitok por tlanik okimajmasoltijkej itech krus. Kijtojtok: “Yin yen Jesús, inRey in judiojtin.”

³⁸ Nojki omen ichtekej okimajmasoltijkej itech krus san sekan iwan Jesús, se ik iyekma iwan oksé ik iopochma.

³⁹ Iwan katlej ik ompa opanoayaj otlajtoayaj biero de Yej, iwan okoliniayaj intzontekon⁴⁰ okijtoayaj:

—¿Amo otikijoaya nik welini tikxitiniani in weyi tiopan iwan san ika eyi tonale welini oksemi tikewaltiani? Ma titikitakan kiné. Xitemo de itech krus tla melawak tej titeKone de Dios.

⁴¹ No ijkón okipinawiayaj in tlayekankej tiopixkej iwan tlamachtijkej de itlanawatil in Moisés, nojki in fariseos iwan tlayekankej tetajtzitzintin, okijtoayaj:

⁴² —Okinmakixtij oksekimej, pero yej inewian mach weli momakixtia. Tla melawak yen Rey de Israel, ma temo de itech krus, para tikneltokaskej nik melawak yen Cristo.⁴³ Tla okitlalij itlaneltokalis inawak Dios, tonses ma kimakixti in Dios, tla melawak kitlasojtla. Porke Yej okijtoj nik in Yej teKone de Dios.

⁴⁴ In ichtekej katlej okinmajmasoltijkej itech krus iwan Jesús noijki otlajtoayah biero de Yej.

Jesús omikke

(*Mr. 15:33-41; Lc. 23:44-49; Jn. 19:28-30*)

⁴⁵ Ijkuakón itech nochí in tlaltikpak olatleyuak, desde tla-jko tonale asta las tres de tiotlakke. ⁴⁶ Iwan itech yon ora kej las tres de tiotlakke, Jesús otzajtzik chikawak:

—Elí, Elí, ¿lama sabactani? —kijtosneki: Dios mío, Dios mío, ¿tlanik otinechkaj noselti?

⁴⁷ Sekimej katlej ompa oyekaj, okikakej iwan okijtojkej:

—Yin tlakatl kinotza in profeta Elías.

⁴⁸ San niman ijkuakón se de yejwan omotlaloj okikuito se esponja, iwan satepan de okisiaj ika iayo uvas xokok, okilpij itech se kuawitl iwan okiyaktlij para ma koni. ⁴⁹ Pero oksekimej okijtojkej:

—Xikkawa. Ma tikitakan kox witz kimakixtiki in Elías.

⁵⁰ Jesús oksemi otzajtzik chikawak, iwan omikke. ⁵¹ Iwan san niman ijkuakón in kortina de yen weyi tiapan otlajkotza-yanke, desde tlakpak asta tlakxitlan. Otlalolinke ixko yin tlaltikpak, in temej otlajlapankej, ⁵² in mikkakuyoktin otlalapokej. Iwan miekej mikkamej omoyolkuikej katlej otlanel-tokakej inawak Dios. ⁵³ Yinmej katlej omoyolkuikej okiskej de ijtk imikkakuyok satepan de omoyolkui in Jesús, iwan okalakej itech weyikan de Jerusalén, katlej tlatiochiwaloj, kan miekej tlakaj okinmitakej.

⁵⁴ In kapitan iwan katlej iwan oyekaj okitlatokaj in Jesús, nijuak okitakej otlalolinke iwan nochí tlan otlapanok, sa tekitl omomawtijkej iwan okijtojkej:

—Yin tlakatl melawak nik yen iKone in Dios.

⁵⁵ Ompa oyekaj miekej siwamej okonitokaj de wejka, katlej owalajkej iwan Jesús desde estado de Galilea asta Jerusalén katlej okipalewijkej. ⁵⁶ Ompa oyeka in María de pueblo de Magdala, iwan María katlej inmaman in Jacobo iwan José, iwan noijki ompa oyeka inmaman katlej ipilwan in Zebedeo.

Jesús okitookakej ijtk se mikkakuyoktle

(*Mr. 15:42-47; Lc. 23:50-56; Jn. 19:38-42*)

⁵⁷ Nijuak owalixtlamikke, oejkok se tlakatl de pueblo de Arimatea katlej okimopialaya, itoka José, iwan katlej noijki oyeka imomachtijkaw in Jesús. ⁵⁸ Yon José oyáj okitato in Pilato iwan okitlajtlanilij itlalnakayo in Jesús. Tones in Pilato otlanawatij ma kimakakan. ⁵⁹ José okitemowij itlal-nakayo in Jesús de itech krus iwan okimiloj ika se sábana chipawak ⁶⁰ iwan okitlalij ijtk imikkakuyok yankuik, katlej okikuyonijkej ikxitlan se tepejxitl. Okitankachojtiaj se weyi

tetl tankachtik para ika okikamatzakke, iwan satepan oyáj.
 61 Ompa oyeka in María de pueblo de Magdala iwan oksé María, oewatokaj iyakapan mikkakuyoktle.

In soldadojtin katlej okitlatokaj in mikkakuyoktle

⁶² Owalmostlatik, satepan de yen tonale nijuak in judiojtin omotlayektlaliliayaj para mosewiskej itech weyi tonale, in tlayekankej tiopixkej iwan fariseos, oyajkej okitatoj in Pilato

⁶³ iwan okilwijkej:

—Nian otimitzitakoj tejwatzin, porke otikelnamikej ke nekáj tekajkayaj, nijuak ok onemia, okijtoj ke satepan de mikini ipan eyi tonale moyolkui. ⁶⁴ Por yonik, xitlanawati ma kitlatokan in mikkakuyoktle asta ma ajsi eyi tonale, amo san kichiwa imomachtijkawan yaskej kikixtiwej de yuak, iwan satepan kijtojtinemiskej nik omoyolkuik satepan de omikke. Porke in tlamo, okachi kinkajkayawas in tlakaj iwan amo san ken achtoj okinkajkayaj.

⁶⁵ Pilato okinmilwij:

—Nian katej nosoldadojwan. Xikinwikakan iwan ompa namejwan xikitakan de kuale ma tlachixtokan asta kan welij.

⁶⁶ Tones oyajkej iwan kuale okiyekkamatzakej in mikkakuyoktle iwan okiseyarojkej in tetl katlej ika okikamatzakej, iwan ompa okinkajtejkej in soldadojtin.

28

Jesús omoyolkuik

(*Mr. 16:1-8; Lc. 24:1-12; Jn. 20:1-10*)

¹ Nijuak yopanok in weyi tonale, iwan yotlanestiwalaya de yen yakinika tonale de yen samana, María de pueblo de Magdala, iwan oksé María, oyajkej okitatoj in mikkakuyoktle.

² Iwan san niman ikuakón owalatlalolinke, porke se iángel in Señor owaltemok de ilwikak iwan ovalaj kan kajki in mikkakuyoktle, okikuanij in tetl katlej ika okamatzaktoka iwan ipan omotlalij. ³ In ángel opetlania kej se tlapetlanalistle, iwan itzotzol oyeka istak kej mixtle katlej sa tekitl istak. ⁴ In soldadojtin nijuak okitakej sa tekitl opapatlakakej (obibiokek) de nemajmawtile, iwan omokajkej kej mikkamej. ⁵ Ikuakón in ángel okinmilwij in siwamej:

—Amo ximomawtikan. Nej nikmati nik ankitemoaj in Jesús, katlej okimajmasoltijkej itech krus. ⁶ Mach nian kajki, porke in Yej yomoyolkuik, ijkón ken Yej okijtoj. Xiwikan xikitakij kan ankitlalijkej. ⁷ Iwan xiwian totoka iwan xikinmilwikan imomachtijkawan nik in Yej yomoyolkuik de itech imikilis. Iwan Yej tlayekanas yas para Galilea iwan namejwan ompa ankitajsiskej. Yen yin tlan omonekia namechilwiani.

⁸ Ijkuakón in siwamej okiskej de kan mikkakuyoktle iwan oyajkej totoka ika miek nemajmawtile iwan ika miek pakilistle. Omotlalojkej okinmatiltitoj imomachtijkawan in Jesús. ⁹ Pero, Jesús okinnamikke ipan ojtle iwan okintlajpaloj. Toneses in siwamej omijkuanijkej inawak Jesús, okimetznapalokej iwan okiweyikixtijkej. ¹⁰ Jesús okinmilwij:

—Amo ximomawtikan. Xiwian xikinmilwitij nokniwan ma wian para Galilea, iwan ompa nechitajsij.

In soldadojtin okintlaxtlawijkej para otlakajkayajkej

¹¹ Mientras in siwamej oyajkej kan oyekaj in momachtijkej, sekimej soldadojtin katlej okitlatokaj in mikkakuyoktle oyajkej itech weyikan de Jerusalén okinmatiltitoj in tlayekankej tiopixkej nochí tlan otlapanok. ¹² Yonmej tlayekankej tiopixkej oyajkej omotlapowitoj inwan tlayekankej tetajtzitzintin, iwan satepan de omotlalijkej san se tlajtole, okinmakakej miek tomin in soldadojtin, ¹³ iwan okinmilwijkej:

—Namejwan xikijtokan ke imomachtijkawan oyajkej de yuak okichtekitoj itlalnakayo, mientras namejwan ankochtokaj. ¹⁴ Iwan tla in gobernador kimatis ke ankochtokaj iwan kualanis, tejwan iwan timotlapowiskej para amitlaj ma amechilwi.

¹⁵ Toneses in soldadojtin okitilankej in tomin iwan okichijkej ijkón ken okinmilwijkej. Iwan asta axan ijkón kineltokaj in judiojtin.

Jesús okinnajnawatijtewak imomachtijkawan

(*Mr. 16:14-18; Lc. 24:36-49; Jn. 20:19-23*)

¹⁶ In majtlaktin iwan se momachtijkej oyajkej para Galilea, ipan se tepetl kan Jesús okinmilwij ompa motaskej. ¹⁷ Iwan nikuak okitakej in Jesús okiweyikixtijkej. Maski sekimej mach okineltokayah kox yen Jesús. ¹⁸ Jesús omijkuanij inawak iwan okinmilwij:

—NoPapan Dios onechmakak nochí tekiwajkayotl para ma nitlanawati ompa ilwikak iwan ixko yin tlaltikpak. ¹⁹ Por yonik, xiwan iwan xikinmachtikan nochtin in tlakaj de ixko yin tlaltikpak para ma yekan nomomachtijkawan. Iwan xikinkuateekikan ika itoka noPapan, ika itoka iKone, iwan ika itoka in Espíritu Santo. ²⁰ Iwan xikinmachtikan ma kichiwakan nochí tlan Nej yonamechnawatij. Iwan xikelnamiktokan nik in Nej amowan nietos nochí tonale, asta ijkuak tlamic in tlaltikpak. Ijkón ma yeto.

SAN MARCOS OKIJKUILOJ YIN KUALE TLAJTOLE DE JESUCRISTO

*In Juan Tlakuateekij ottlamachtij kan tlawaki
(Mt. 3:1-12; Lc. 3:1-9, 15-17; Jn. 1:19-28)*

¹ Ijkín nik opéj in kuale tlajtole katlej temakixtia de Jesucristo iKone in toTajtzin Dios.

² In profeta Isaías ya wejkawitl ijkín okijkuijloj:
Niktitlani notlatematiltij moyakapan,
ma mitzyektlalili in ojtle.

³ Se tlajtole mokaki tetzajtzilia kan tlawaki kijta:
“Xikyektlalikan iwan
xikmelawakan iojwi in Señor.”

⁴ Se tonale in Juan Tlakuateekij oyeka kan tlawaki okinkuateekijtoka in tlakaj, okinmilwiaya ma moyolkuepakan inawak toTajtzin Dios para ma kintlapojpolwi de intlajtlakol iwan ijkón welis mokuateekiskej. ⁵ Nochtin de yen estado de Judea, iwan nochtin de yen weyikan de Jerusalén, owalayaj okiwalkakiaj iwan okimokuitiayaj intlajtlakol. Juan okinkuateekiaya ijtk in weyatl Jordán.

⁶ Itzotzol in Juan oyeka de itzomio kameyo iwan omotlajkoilpiaya ika se kuetlaxtle, iwan okinkuaya chapulimej (xolinmej) iwan okikuaya nektle. ⁷ Iwan Juan otetlapowiaya ijkín:

—Nokuitlapan witz se katlej nechpanawilia, porke okachi weyikistok (weyititok) ke nej, iwan mach notech powi nion para nimotoolos nikaktotomas. ⁸ Nej onamechkuateekij ika atl pero Yej amechkuateekis ika Espíritu Santo.

*Juan okikuateekij in Jesús
(Mt. 3:13-17; Lc. 3:21-22)*

⁹ Itech yonmej tonaltin, Jesús owałaj de itech ipueblo Nazaret de estado de Galilea, iwan Juan okikuateekij in Jesús ijtk in weyatl Jordán. ¹⁰ Nijuak Jesús owałej de ijtk atl, ikuakón okitak in ilwikak otlapowik iwan in Espíritu Santo owałtemok ipan Jesús kej se paloma. ¹¹ Iwan omokakke se tlajtole de ilwikak. Okijtoj:

—Tej tinotlasojKone, iwan sa tekitl nipaki monawak.

*In Amo Kuale Tlakatlokinekia kitlajtlakolmayawini in Jesús
(Mt. 4:1-11; Lc. 4:1-13)*

¹² Ikuakón in Espíritu Santo okiwikak in Jesús kan tlawaki.

¹³ Ompa omokaj omenpoale tonale, oyeka innawak yolkamej

tekuanimej. Iwan ompa in Satanás okinekia kitlajtlakol-mayawini in Jesús, pero satepan ovalajkej in angelestín iwan yejwan okimonekuitlawijkej in Jesús.

*Jesús opéj tekipanoa itech estado de Galilea
(Mt. 4:12-17; Lc. 4:14-15)*

¹⁴ Satepan de okitzakej in Juan ijtk telpiloyan, Jesús oyáj Galilea okitematiltito in kuale tlajtote katlej temakixtia de kenik in Dios tlanawatia. ¹⁵ Okijtoaya:

—Yoajsiko in tonale para Dios tlanawatis amotech. Ximoy-olkuepakan inawak Dios iwan xikneltokakan in kuale tlajtote katlej temakixtia.

*Jesús okinnotzke nawi michmajkej
(Mt. 4:18-22; Lc. 5:1-11)*

¹⁶ Jesús opanotiaya itempan lago de Galilea iwan ompa okinmitak in Simón iwan Andrés katlej iknimej, okintlamotlatokaj inmichmatlawan ijtk atl porke yejwan oyekaj michmajkej. ¹⁷ Jesús okinmilwij:

—Namejwan anmichmajkej. Pero axan xiwikikan non-awak, para ankintlapowiskej in tlakaj de notlajtol para ma momakixtikan kej yeskia ankinkitziskej michimej.

¹⁸ San niman okinkajtejkej inmichmatlawan iwan oyajkej iwan Jesús.

¹⁹ Jesús oyáj ok achitzin tlayakapan, iwan okinmitak in Jacobo iwan Juan katlej iknimej, itelpokawan Zebedeo, oyekaj ijtk se barko okinyejeyletlalijtokaj inmichmatlawan. ²⁰ Jesús san niman okinnotzke, iwan yejwan kiné okikajtejkej intaj Zebedeo ijtk barko iwan itekipanojkawan, iwan yejwan oyajkej iwan Jesús.

*Jesús okipajtij se tlakatl katlej okipiaya se ejekatl mach kuale
(Lc. 4:31-37)*

²¹ Jesús oajsito itech pueblo de Capernaum, iwan itech se sábado, níjkuak weyi tonale, Jesús okalakke itech se tiopan de yen judiojtin iwan opéj kinmachtia. ²² In tlakaj sa ot-lajtlachiayaj (omomajmawtiayaj) de kenik okinmachtaya, porke Yej okinmachtaya ika chikawak tlanawatilie iwan amo ken otlamachtiayaj in tlamachtijkej de itlanawatil in Moisés. ²³ Itech yon tiopan oyeka se tlakatl katlej okipiaya se ejekatl mach kuale, iwan okualankatzajtzik. ²⁴ Okijtoj:

—¿Tlan tikneki towan, Jesús de Nazaret? ¿Otiwalaj otechxixiniko? Nej nikmati akin Tej, Tej tiiyolchipawkaKone in Dios.

²⁵ Jesús okajwak in ejekatl mach kuale, iwan okilwij:

—¡Xitzakua moten, iwan xikisa de itech yin tlakatl!

²⁶ In ejekatl mach kuale okitoktij in tlakatl ma mimiki chikawak, iwan okiske de itech. ²⁷ Nochtin omomawtijkej iwan omotlajtlaniayaj:

—¿Tlanon kijtosneki yin? ¡Tlamachtia ika se tlamatle yankuik iwan ika chikawak tlanawatile! Asta yen ejekamej mach kualtin kinnawatia iwan kitlakitaj.

²⁸ Iwan totoka omomatke tlan Jesús okichiwaya itech nochí in estado de Galilea.

Jesús okipajtij imonan Simón Pedro

(Mt. 8:14-15; Lc. 4:38-39)

²⁹ Nijuak okiskej de itech yon tiapan, Jesús, Jacobo iwan Juan, oyajkej ichan Simón iwan noijki ichan Andrés.

³⁰ Imonan Simón owetoka ika miek totonik. Jesús okilwijkej mokokoa imonan Simón. ³¹ Iwan Yej omijkuanij inawak, okimakitzkij iwan okewaltij. Iwan ikuakón san niman okiske in totonik iwan opéj kintlamaka.

Jesús okinpajtij miekej kokoxkej

(Mt. 8:16-17; Lc. 4:40-41)

³² Nijuak opoliwito in tonale iwan otlatleyuak, okinwikili-jkej in Jesús nochtin kokoxkej, iwan katlej okipiayaj ejekamej mach kualtin. ³³ Iwan nochtin tlakaj de yon pueblo omololo-jkej kaltempan. ³⁴ Jesús okinsewij (okinpajtij) de nochí kokolistle, iwan okinkixtij miekej demoniojtín pero mach okinkawilij ma tlajtokan porke yejwan okixmatiaj in Jesús.

Jesús okitematiltij in kuale tlajtole katlej temakixtia ik nowian estado de Galilea

(Lc. 4:42-44)

³⁵ San kualkan ok otlatleyuatoka, Jesús omejke iwan okiske, iwan oyáj se lado kan yetos san Yej iselti para motiotzajtzilis.

³⁶ Simón iwan oksekimej katlej iwan oyekaj, oyajkej okitemotoj in Jesús. ³⁷ Nijuak okajsikej okilwijkej:

—Nochtin mitztemoaj.

³⁸ Iwan Yej okinnankilij:

—Ma tiwian intech oksekimej pueblobjin katlej katej serka, para nikinmatiltis in kuale tlajtole porke por yonik oniwalaj.

³⁹ Ijkón Jesús onenke itech nochí in estado de Galilea okintlapowij de yen kuale tlajtole iwan okinkixtij in demoniojtín.

Jesús okipajtij se tlakatl katlej opalania inakayo

(Mt. 8:1-4; Lc. 5:12-16)

⁴⁰ Se tlakatl katlej opalania inakayo omijkuanij inawak Jesús, omotlankuaketzke iwan okilwij:

—Tla tikmonekiltis, tiwelis tinechpajtis.

⁴¹ Jesús okiknomaj, okitlalij ima ipan yon tlakatl iwan okilwij:

—Aján, nikneki. Axan san niman xipajti.

⁴² San niman okiske ikokolis iwan omokaj chipawak.

⁴³ Jesús okimakaj san niman, iwan okinajnawatij okilwij:

⁴⁴ —Xikkaki, iwan amakaj xiktlapowi, san xiwia inawak in tiopixke, iwan xiktemaka moofrenda tlan Moisés otlanawatij ma motemaka para ijkón nochtin ma kimatikan nik in Dios yomitzpajtij de mokokolis.

⁴⁵ Pero nijuak in tlakatl oyáj, opéj nochtin kintlapowia de kenik opajtik. Por yonik in Jesús mach ok owelia okalakia itech pueblojtin, okalakia san ichtaka. Iwan omokawaya kalan kan amakaj chanti, pero in tlakaj owalayaj de nochtin pueblojtin okiwalitayah.

2

Jesús okipajtij se tlakatl katlej owijwilantik (otemetlatik)
(Mt. 9:1-8; Lc. 5:17-26)

¹ Kanaj keski tonale satepan, Jesús oksemi omokuepke para Capernaum. In tlakaj okimatkej nik in Yej oyeka itech se kale. ² Omololojkej miekej tlakaj, iwan mach ok oakej kalijtik iwan miekej omokajkej kaltempán, iwan Yej okinmatiltiaya in kuale tlajtole. ³ Ijkuakón owalajkej nawin tlakaj kan Jesús oyeka, okualwikiliayah se tlakatl katlej owijwilantik. ⁴ Komo sa tekitl miekej tlakaj oyekaj, mach owelik okikalaki-jkej kalijtik. Ijkuakón in kale okikuatlapojkej iwan ik ompa okitemowijkej ika nochí itlapech. ⁵ Níjkuak Jesús okitak intlaneltokalis, ijkuakón okilwij in kokoxke:

—Nokone, nimitztlapojojpolwia de nochí motlajtlakol.

⁶ Sekimej tlamachtijkej de itlanawatil in Moisés ompa oe-watokaj, iwan okiyejyekojej: ⁷ “¿Tlanik yin tlakatl ijkón kijta? Tlajtoa biero de Dios. San yen Dios welis tetlapojpolwis.” ⁸ Jesús okimatia tlan yejwan okiyejyekoayah, iwan okinmil-wij:

—¿Tlanik namejwan ankiyejyekoaj mach kuale? ⁹ ¿Katlij yen okachi mach owij nikilwis in kokoxke: “Nimitztlapojojpolwia de nochí motlajtlakol”, o noso nikilwis: “Ximewa. Xikajkokui motlapech iwan xinejnemi”? ¹⁰ Ijkín Nej nikchiwa para ijkón namejwan xikmatikan nik in Nej katlej onimochij nitlakatl, nikpia poder ixko yin tlaltikpak para nikintlapojpolwis in tlakaj de intlajtlakol.

Ijkuakón okilwij in tlakatl katlej owijwilantik:

¹¹ —Tej nimitzilwia, ximewa, xikajkokui motlapech iwan xiwia mokalijtik.

¹² San niman in kokoxke omejke, okajkokke itlapech iwan oyáj. Nochtin katlej okitakej sa otlaajtlachixkej (omomaj-mawtijkej) iwan okiweyikixtijkej in toTajtzin Dios, iwan okijtojkej:

—¡Mach semi otikitayaj yin tlamantle!

Jesús okinotzke in Levi

(Mt. 9:9-13; Lc. 5:27-32)

¹³ Jesúz oksemi oyáj itempan lago de Galilea, miekej tlakaj omololojkej ompa iwan okinmachtij. ¹⁴ Oyáj okachi tlayakan iwan okitak in Leví, itelpoch in Alfeo, oewatoka kan yej kololoa impuestos. Jesúz okilwij:

—Xiwiki nowan.

Leví omoketzke iwan okiwikak.

¹⁵ Jesúz oyáj otakuato ichan Leví. Miekej katlej tlakobraroaj ika impuestos iwan sekimej tlajtlakolejkej, noijki oyajkej, iwan omotlalijkej iwan Jesúz iwan imomachtijkawan. ¹⁶ In fariseos iwan katlej tlamachtijkej de itlanawatil in Moisés, okitakej in Jesúz otakuajtoka inwan katlej tlakobraroaj ika impuestos iwan tlajtlakolejkej, iwan okintlajtlaniijkej imomachtijkawan:

—¿Tlanik in Jesúz tlakua iwan koni inwan tlakaj tlajtlakolejkej iwan katlej tlakobraroaj ika impuestos?

¹⁷ Jesúz okinkakke iwan okinmilwij:

—In tlakaj katlej mach mokokoaj mach intech moneki tepejtij. Nej mach oniwalaj onikinnotzako katlej yolchipawakej, onikinnotzako katlej tlajtlakolejkej para ma moyolkuepakan inawak Dios.

Otlajtlankej tlanik sekimej mosawaj iwan sekimej mach mosawaj (ayunaroaj)

(Mt. 9:14-17; Lc. 5:33-39)

¹⁸ Imomachtijkawan in Juan iwan fariseos mach otakuayaj porke omomatokaj omosawayaj. Sekimej ovalajkej kan Jesúz oyeka iwan okilwijkej:

—¿Tlanik imomachtijkawan in Juan iwan fariseos mosawaj iwan momomachtijkawan mach mosawaj?

¹⁹ Jesúz okinmilwij:

—Katlej iinbitadoswan in novio mach kinekiskej mosawaskej nikuak yej monamiktijtok, nikuak ok ilwichijtoskej iwan novio mach welis mosawaskej. ²⁰ Porke ajsis tonale nikuak in novio mach ok inwan yetos, iwan ikuakón welis mosawaskej. ²¹ Mach akaj kiyektlalia se tzotzole katlej ya tlajtlantok iwan kitilicho ika se pedaso tzotzole yankuik, porke in tzotzole yankuik mololoa iwan kitzayana in tzotzole katlej ya tlajtlantok, iwan okachi tzayani. ²² Mach akaj kitlalia vino yankuik ijlik kulambre katlej ya tlajtlantok. In vino

yankuik kitzomonia in kulambre katlej ya tlajtlantok, iwan nokiwi in vino iwan kulambre ijtlakawi. In vino yankuik moneki motlalis ijtk in kulambre yankuik.

In Señor iaxka in weyi tonale

(Mt. 12:1-8; Lc. 6:1-5)

²³ Se tonale Jesús onejnentiaya kan toktok trigo meroj ni-
jkuak weyi tonale. Nijuak ik ompa opanotiyaj imomachti-
jkawan opéj kitekij in trigo. ²⁴ In fariseos okitlajtlanijkej in
Jesús:

—Xikita, ¿tlanik in yejwan kichiwaj tlan itlanawatil in
Moisés kijta amo se ma kichiwa itech weyi tonale?

²⁵ Iwan Yej okinmilwij:

—¿Amo ankileroaj tlan okichij in rey David nijuak yej
iwan ikompañeroswan otiojsijkej? ²⁶ David okalakke ikalijtik
in Dios iwan okikuaj in pan katlej tlatichiwaloj, nijuak
Abiatar oyeka weyi tiopixke. In tlanawatile de Moisés kijta
nik san yen tiopixkej welis kikuaskej in pan, pero in David
okikuaj iwan asta okinmajmakak ikompañeroswan.

²⁷ Nojki in Jesús okinmilwij:

—Dios achtoj okinchij in tlakaj, iwan satepan okichij in
weyi tonale para kinpalewis in tlakaj. Pero Dios mach okichij
in weyi tonale para ma kinnawati in tlakaj. ²⁸ Por yonik, Nej
katlej onimochij nitlakatl, Nej nikpia de nikijtos tlanon kuale
se kichiwas nijuak weyi tonale.

3

Jesús okipajtij se tlakatl katlej omawakke

(Mt. 12:9-14; Lc. 6:6-11)

¹ Jesús oksemi oyáj itech se tiopan iwan ompa oki-
tak se tlakatl katlej owakke se ima. ² Sekimej fariseos
moxikoanimej, okonitokaj in Jesús kox kipajtis yon tlakatl
itech weyi tonale para ika welis kitilwiskej in Jesús. ³ Ijkuakón
Jesús okilwij in tlakatl katlej owakke ima:

—Ximoketza tlayakapan.

⁴ Tones, Jesús okintlajtlanij in fariseos:

—¿Tlan kijta itlanawatil in Moisés, kipia de mochiwas tlan
kuale itech weyi tonale, o noso mochiwas tlan mach kuale?
¿Moneki se kipalewis in tlakatl itech inemilis o noso se kixpo-
los?

Pero yejwan mach ok itlaj okijtojkej. ⁵ Jesús okintlatak in
fariseos iwan okualanke, iwan omoyolkokoj porke sa tekitl
yoltlakuawakej. Ijkuakón okilwij in kokoxke:

—Xikmelawa moma.

In kokoxke okimelaj ima iwan san niman ijkuakón opajtik.
⁶ In fariseos okiskej omotatlalwitoj inwan itekipanojkawan Herodes, para kitemoskej kenik welis kimiktiskej in Jesús.

Jesús otlapajtij inakastlan lago de Galilea

⁷ Jesús oyáj itempan lago inwan imomachtijkawan, miekej tlakaj noijkej oyajkej, de estado de Galilea iwan de estado de Judea. ⁸ De weyikan de Jerusalén iwan de estado de Idumea, iwan katlej katej ikuitlapan in weyatl Jordán, iwan de yen pueblojtin katlej katej serka de yen weyikan de Tiro iwan de Sidón. Sa tekitl miekej tlakaj oyajkej inawak Jesús nijuak okimatkej tlan Yej okichiwaya. ⁹ Jesús okinmilwij imomachtijkawan ma kijkuanilikan se barko para itech tlejkos, para amo ma kipajpatzmiktikan in tlakaj. ¹⁰ Sa tekitl miekej okinpajtij, asta oksekimej kokoxkej sa omopatzmiktayaj entre yejwan, porke nochtin okinekiaj kitilkoanij in Jesús para pajtiskej. ¹¹ Nijuak in demoniojtin okitakej in Jesús, omotlankuaketzkej iyakapan iwan okuawtzajtikej:

—¡Tej titeKone de Dios!

¹² Pero Yej okinmajwak chikawak iwan okinmilwij mach itlaj ma kijtowan de Yej.

*Jesús okinpejpenke majtlakte iwan ome itlatitlanilwan
(Mt. 10:1-4; Lc. 6:12-16)*

¹³ Jesús otlejkok ipan se tepetl, okinnutzke katlej Yej okinpejpenke iwan yejwan ovalajkej inawak. ¹⁴ Ijkón okinpejpenke in majtlakte iwan ome itlatitlanilwan para ma yetokan inawak, iwan para kintitlanis ma kitematiltikan itlajtol in toTajzin Dios. ¹⁵ Jesús okinmakak poder para kinpajtiskej kokoxkej iwan para kinkixtiskej demoniojtin. ¹⁶ Yinmej tlakaj yejwan katlej Jesús okinpejpenke: In Simón okitokayotij Pedro, noijkej ¹⁷ okinpejpenke in Jacobo iwan Juan katlej iknimej, itelpokawan Zebedeo, katlej Jesús okintokayotij Boanerges, kijtosneki kuejsijkej. ¹⁸ Noijkej okinpejpenke: Andrés, Felipe, Bartolomé, Mateo, Tomás, Jacobo itelpoch in Alfeo, Tadeo, Simón katlej onemia inwan cananistas, ¹⁹ iwan Judas Iscariote, katlej satepan okitemaktij (okitemaktilij) in Jesús inmak tekiwajkej.

*Jesús kipia poder de toTajzin Dios
(Mt. 12:22-32; Lc. 11:14-23; 12:10)*

²⁰ Satepan Jesús oyáj itech se kale. Oksemi omololojkej miekej tlakaj, por yonik Yej iwan imomachtijkawan asta mach ok oweliaj oyektlakuayaj. ²¹ Nijuak okimatkej ifamiliareswan in Jesús, oyajkej okinotzatoj, yejwan okimolwiayaj yokuatlapoloj.

²² Sekimej tlamachtijkej de itlanawatil in Moisés owalajkej de weyikan de Jerusalén. Iwan yejwan okijtojkej:

—Yin Jesús kipia se ejekatl mach kuale itoka Beelzebú, katlej tlayekanke demonio, yen Beelzebú okimakak ipoder para ma kinkixti ejekamej mach kualtin.

²³ Jesús okinnotzke iwan okintlapowij ika ejemplos. Okinmilwij:

—¿Kenik welis in Satanás kikixtis in Satanás? ²⁴ Se país mach welis motlajkoxelos porke mach ok welis monawatis. ²⁵ Tla se familia tlajkoxelitos noijki mach welis san sekan chantitoskej. ²⁶ Tla Satanás momagas inewian iwan motlajkoxelos, tones mach ok yetos, sino san niman pojpoliwis.

²⁷ 'Se ichtekke mach welis kalakis ichan se tlakatl katlej chikawak para kitlachtekis. Sino achtoj moneki kijilpis iwan ikuakón welis kitlachtekis.

²⁸ 'Ipan melajka namechilwia, nochtin katlej kichiwaj tlajtlakole iwan tlajtoaj biero, Dios welis kintlapojpolwis. ²⁹ Pero tla akaj tlajtoa biero de yen Espíritu Santo, Dios mach keman kitlapojpolwis, sino yetos tlajtlakolej para iktlanke (ik tlami).

³⁰ Jesús ijkón okinmilwij, porke yejwan okijtojkej ke Yej kipia se ejekatl mach kuale.

Imaman iwan ikniwan Jesús

(Mt. 12:46-50; Lc. 8:19-21)

³¹ Ikuakón oejkokej imaman iwan ikniwan in Jesús pero omokajkej kalan. Katlej ompa oyekaj kalan okinmilwijkej ma konnotzakan in Jesús. ³² In tlakaj katlej oewatokaj iwan okiyawalojtokaj in Jesús, okilwijkej:

—Momaman iwan mokniwan mitztemoaj.

³³ Yej okinnankilij:

—¿Akin nomaman iwan akin nokniwan?

³⁴ Okintlatak katlej ompa okiyawalojtokaj iwan okijtoj:

—Yinmej yejwan nomaman iwan yejwan nokniwan.

³⁵ Nochtin katlej kichiwaj tlan Dios kineki, yen yon nokni tlakatl, yen yon nokni siwatl iwan yen yon nomaman.

4

Ejemplo de se tlakatl tlatoookak

(Mt. 13:1-9; Lc. 8:4-8)

¹ Jesús oksemi opéj tlamachtia inakastlan lago de Galilea. Sa tekitl miekej tlakaj omololojkej inawak, iwan okachi kuale otlejkok itech se barko katlej oyeka tlatentle ijlik atl iwan ompa ipan omotlalij. In tlakaj oyekaj itempan atl.

² Okinmachtij de miek tlamantle iwan okintlapowij ika ejemplos para ma kimomakakan kuenta. Okinmilwij:

³ —¡Xikkakikan kuale tlan namechilwis! Se tlakatl okiske otookato. ⁴ Nijuak otookatoka, sekin semiya owetzke ipan ojtle. In totomej ovalajkej iwan okikuajkej in semiya. ⁵ Oksekin owetzke ijlik teyoj, okiske totoka porke mach okipiaya miek tlale. ⁶ Pero nijuak chikawak otonak, okichichinoj porke mach okipiaya wejkatlan inelwayo. ⁷ Oksekin owetzke itzalko in bierojxiwitl, omoskaltij okachi miek yon xiwitl, iwan tlatoktle mach semi omoskaltij porke oxiwmikke iwan mach otlakke. ⁸ Oksekin owetzke kan kuale tlale, okiske iwan otlakke miek. Sekin semiya okitemakak senpoale iwan majtlakte itliolo san de se semiya, iwan oksekin okitemakak eyinfoale itliolo iwan oksekin asta se siento itliolo.

⁹ Iwan okinmilwij:

—Tla ankinekij ankimomakaskej kuenta, xikkakikan.

*Jesús okitlajtlanijkej tlanik tlamachtia ika ejemplos
(Mt. 13:10-17; Lc. 8:9-10)*

¹⁰ Nijuak omokaj sa yen Jesús, in majtlakte iwan omen iwan kanaj keskimej oksekimej, ikuakón okitlajtlanijkej in Jesús tlan kijtosneki in ejemplo de yen tlatookak. ¹¹ Yej okinmilwij:

—Namejwan Dios yoamechkawilij xikmatikan tlan oyeka tlatitok de kenik in Dios tlanawatia. Oksekimej katlej mach ya kimatij, se kinmatiltia ika ejemplos. ¹² Para ijkón, maski ma kitakan, mach ma kimomakakan kuenta tlan kitaj. Iwan maski ma kikakikan, mach ma kimatikan tlanon kijtosneki tlan kikakij. Iwan ijkón yejwan mach moyolkuepaskej, iwan Dios mach kintlapojpolwis de intlajtlakol.

*Jesús okintomilij in ejemplo de yen tlatookak
(Mt. 13:18-23; Lc. 8:11-15)*

¹³ Jesús okinmilwij:

—Tla amo ankimomakaj kuenta yin ejemplo, tonses ¿kenik welis ankimomakaskej kuenta de yen oksekimej ejemplos?

¹⁴ Tlan omotookak yon kej yeskia yen itlajtol in Dios. ¹⁵ In semiya katlej owetzke ipan ojtle yon kej yeskia yejwan katlej kikakij in tlajtole, pero san niman ejko in Satanás iwan kikixtia in tlajtole katlej omotookak ipan iyolo. ¹⁶ In semiya katlej owetzke ijlik teyoj, yon ken se tlakatl katlej kiresibiroa itlajtol in toTajtzin Dios ika pakilstle nijuak kikaki. ¹⁷ Pero mach wejkatlan monelwayotia iwan san niman nelwayowaki ipan iyolo. Pewa trabajojpanoa iwan pewa kitlatlalochtiaj por yen itlajtol in toTajtzin Dios, walmosotlawa iwan kikawa in Dios. ¹⁸ In semiya katlej owetzke itzalko in bierojxiwitl, yon ken sekimej katlej kikakij in tlajtole, ¹⁹ pero sa tekitl tlanemiliaj itech tlamantin de yin nemilistle, kawiliaj ma moskalti in bierojxiwitl ipan iyolo. Kinekij kipiaskej miek tomin iwan

kinelij kipiaskej miek tlamatle, yon ken bierojxiwitl katlej mach kikawilia ma tlaki in tlatoktle de yen itlajtol in Dios ipan inyolo.²⁰ In semiya katlej omotookak kan kuale tlale, yon ken tlakaj katlej melawak kikakij itlajtol in Dios iwan kiresibiroaj ipan inyolo. Yonmej tlakaj katej ken semiya katlej kitemakaj senpoale iwan majtlakte intliolo san de se semiya, iwan sekimej kitemakaj eyinpoale intliolo, iwan sekimej kitemakaj asta se siento intliolo.

Ejemplo de se tlanextle

(Lc. 8:16-18)

²¹ Jesús okinmilwij:

—Mach akaj kitlalia se tlanextle itlampa se chikiwitl o noso itlampa se tlapechtle. Sino motlalia ajkopan para ma tlawi.²² Nochi katlej amo momati kipia por momatis, iwan nochi katlej kajki tlatitok kipia por nesis.²³ Tla ankinej kankimomakaskej kuenta, xikkakikan.

²⁴ Jesús okinmilwij:

—Moneki kuale xikkakikan tlan ankikakij. Ijkón ken tlan namejwan ankitemakaskej, Dios no ijkón amechmakas iwan amechmakas asta okachi.²⁵ Porke akin kinejis moskaltis okachi itech itlajtol in Dios, moskaltis okachi. Iwan katlej amo kinejis, kipolos asta tlan ya kimati.

Ejemplo de se semiya katlej moskaltia wejkapan

²⁶ Jesús okijtoj:

—Namechilwis se ejemplo para xikmatikan kenik in Dios tlanawatia: se tlakatl otlatookak itlalaj.²⁷ Tla kochis nochi yuale iwan tla mewas o noso amo mewas nochi kualkan, in tlatoktle moskaltijiw, pero yej mach kimati kenik moskaltia,²⁸ inewian in tlale kitlakiltia in tlatoktle, achtoj kisa iwan moxiwyotia iwan satepan miawati, xiloti iwan motliolatia.²⁹ Iwan nikuak walchikawa, in tlakatl kipixka porke yokualtik.

Ejemplo de iyolo in mostaza katlej okachi tzikitzin ke iyolo in miltomatl

(Mt. 13:31-32, 34-35; Lc. 13:18-19)

³⁰ Satepan Jesús okinmilwij:

—¿Tlan ika welis tikparejaroskej para xikmomakakan kuenta kenik in Dios tlanawatia? O noso, ¿tlan ejemplo welis namechilwis para okachi xikmomakakan kuenta?³¹ Yon ken iyolo mostaza, katlej okachi tzikitzin de miek oksekin semiya.³² Pero nikuak se kitooka, kisa iwan moskaltia okachi weyi de nochi namotlatok. Momamayotia iwan totomej asta itech motepajsooltiaj.

³³ Jesús okintlapowij ika miek ejemplos asta kan okimomakayaj kuenta in tlakaj.³⁴ Pero nikuak oyeka san Yej iwan

imomachtijkawan, okinyekilwiaya para ma kimomakakan kuenta.

Jesús okiketzaltij in ejekatl iwan atl

(Mt. 8:23-27; Lc. 8:22-25)

³⁵ Itech yon tonale nijuak otleyuak, Jesús okinmilwij imomachtijkawan:

—Ma tipanokan oksé lado.

³⁶ Tones, imomachtijkawan okinkajtejkej in tlakaj katlej ompa inwan oyekaj iwan okiwikakej in Jesús itech se barko katlej itech yoyeka. Oksekimej barkojtin noijki no oyajkej. ³⁷ Satepan ovalaj se ejekatl chikawak iwan atl opéj motlamotla ipan barko iwan opéj atemi. ³⁸ Jesús okochtoka tlakuitlapan ipan se ikpale. Iwan okijxitijkej okilwijkej:

—¡Tlamachtij! ¿Amo tigmomaka kuenta nik tiapolakij?

³⁹ Yej ovalmej iwan okajwak in ejekatl iwan okilwij in atl:

—¡Ximoketza! ¡San xieto!

San niman in ejekatl omoketzke iwan atl sa omokaj. ⁴⁰ Jesús okinmilwij imomachtijkawan:

—¿Tlanik wel anmomawtiaj? ¿Ayamo antlaneltokaj inawak Dios?

⁴¹ Yejwan sa tekitl omomawtijkej iwan okimolwijkej entre yejwan:

—¿Akin Yin tlakatl, porke asta yen ejekatl iwan atl kitlakitaj?

5

Jesús okinkixtij ejekamej mach kualtin de itech se tlakatl

(Mt. 8:28-34; Lc. 8:26-39)

¹ Jesús iwan imomachtijkawan oajsitoj oksé lado de yen lago asta ipan intlal in gadarenostlakaj. ² Nijuak Jesús otémok de itech barko, san niman ikuakón se tlakatl omikuani inawak Jesús. Yon tlakatl ochantia ijtil mikkakuyoktin iwan okipiaya se ejekatl mach kuale. ³ Mach akaj owelia okipiaya nion por ika kadena. ⁴ Miek buelta okimaijilpiayaj iwan okimetzijilpiayaj (okikxijilpiayaj) ika kadena, pero yej omokotonaya. Mach akaj owelia okitlania. ⁵ Tonayan iwan yuak, onemia kan teyoj iwan ijtil kuyoktin kan okinkalaki-ayaj mikkamej. Otzajtzitinemia iwan omotejtekia ika tetl. ⁶ Nijuak yon tlakatl okitak in Jesús desde wejka, omotlaloj iwan omotlankuaketze iyakapan. ⁷ Iwan otzajtzik chikawak:

—¿Tlan tikneki nowan, Jesús, iKone in Dios Weyikistok (Weyititok)? ¡Nimitztlatlawtia ika itoka in Dios amo xinechtitlani ijtil tliko!

⁸ Jesús okilwij:

—¡Tej ejekatl mach tikuale, xikisa de itech yin tlakatl!

⁹ Iwan Jesús okitlatlajtlanij:

—¿Tlan motoka?

Yej okilwij:

—Notoka miek porke timiekej.

¹⁰ In ejekamej mach kualtin omotlatlawtijkej amo ma kin-titlani wejka de itech yon régión. ¹¹ Ik ompa oyekaj miekej pitzomej otlakuajtokaj inakastlan tepetl. ¹² Iwan ejekamej mach kualtin okitlatlawtijkej, okilwijkej:

—Xitechkawili ma tikalakikan intech nekatej pitzomej.

¹³ Jesúś okinkawilij kiné, iwan in ejekamej mach kualtin okiskej de itech in tlakatl iwan okalakej intech yonmej pitzomej, iwan yonmej pitzomej okikistewakej iwan omotepe-jxiwitoy ijtit atl iwan ompa omoatlanwijkej iwan omikkej. Oyekaj kej ome mil pitzomej.

¹⁴ Katlej okinmonekuitlawiayaj in pitzomej omotlalojkej oyajkej itech pueblo iwan itech tlalmej, otetlapowitoj de tlan otlamochij. Miekej omololojkej iwan okitakoj tlan otlamochij. ¹⁵ Níkuak oajsikoj kan oyeka in Jesúś, okitakej in tlakatl katlej okinpiaya ejekamej mach kualtin, ewatok iwan ya tzotzoltitok iwan ya kipia kuale itlalnamikilis. In tlakaj omomawtijkej. ¹⁶ In tlakaj katlej okitakej tlan otlamochij otetlapowijkej de tlan otlapanok de yen tlakatl iwan de yen pitzomej. ¹⁷ Ijkuakón okitlatlawtijkej in Jesúś ma wia de ompa.

¹⁸ Jesúś otlejkok itech se barko. In tlakatl katlej okinpiaya in ejekamej mach kualtin, okitlatlawtij in Jesúś ma kiwika.

¹⁹ Pero in Jesúś mach okawilij, iwan okilwij:

—Xiwia mochan kan katej mofamiliareswan, iwan xikin-maka kuenta in wejweyin tlamantin tlan Dios okinchij por tej, iwan kenik in Señor omitziknomaj.

²⁰ In tlakatl oyáj, iwan opéj tetlapowia itech nekáj régión kan oyekaj majtlakte pueblotin kan kitokaxtiaj Decápolis, ompa opéj kintlapowia nochtin tlakaj tlan Jesúś okichij por yej, iwan nochtin sa otlajtlachiayaj (omomajmawtiayaj).

*In siwatl katlej okitzotzolkitzkij in Jesúś iwan opajtik
(Mt. 9:18-26; Lc. 8:40-56)*

²¹ Jesúś oksemi opanok oksé lado de yen lago itech barko, iwan miekej tlakaj omijkuanijkej inawak inakastlan lago. ²² Satepan se tlakatl itoka Jairo, katlej oyeka se de yen tlayekankej de itech intiopan in judiojtin de yon lugar, níkuak okitak in Jesúś, omijkuanij iwan omotlankuaketze iyakapan. ²³ Iwan okitlatlawtij:

—Nochpoch ya ixpolitok. Xiwia nochan iwan xiktlali moma ipan nochpoch para ma pajti.

²⁴Jesús oyáj, iwan miekej tlakaj noiji oyajkej asta sa okipajpatzmiktiayaj.

²⁵Ompa tlatzalko oyaya se siwatl kokoxke. Yoki piaya majtlakte iwan ome xiwitl de oestlapowik. ²⁶Yomotlamij de inwan tepajtijkej iwan yokitlamij nochitomin katlej okipaiya. Mach opajtia yej okachi omochiwaya. ²⁷Nikuak okimaj otlapoayaj de Jesús, oyáj okitato, omotitzke intzalko in tlakaj iwan okitzotzolkitzkij in Jesús. ²⁸Okimolwiaya: “Tla siera najsis niktlakenkitzkis, welis nipajtis.”

²⁹San niman nikuak okitzotzolkitzkij omoketzke iestlapowilis iwan san niman okimachilij opajtik. ³⁰Jesús totoka okimomakak kuenta ke ika ipoder okipajtij akaj. Omokuepke ik tlakuitlapan iwan okinmilwij in tlakaj katlej Iwan oyayaj:

—¿Akin okikitzkij notlaken?

³¹Imomachtijkawan okilwijkej:

—Tikita miekej tlakaj towan witzej asta sa techpajpatzmiktitiwitzej. ¿Tlanik titlajtlani? “¿Akin okikitzkij notlaken?”

³²Jesús okintlatak nochtin tlakaj para kitas akin ijkón okichij. ³³In siwatl omomajmawtij iwan opapatlakak (obibiokak) porke okimomakak kuenta tlan yotlamochij itech. Omijkuanij, omotlankuaketzke iyakapan Jesús iwan okimakak kuenta de yen tlan omochiwaya. ³⁴Iwan Jesús okilwij:

—Nokone, motlaneltokalis omitzpajtij. Xiwia ika pakilstle, yotisewik de mokokolis.

Jesús okiyolitij ichpoch in tlayekanke Jairo

³⁵Nikuak ok otlapoijtoka in Jesús, sekimej tlakaj ovalajkej de ichan Jairo iwan okilwijkej:

—Mochpoch yomikke, ayakmo xikkuejsokan in Tlamachtij.

³⁶Jesús okikakke iwan okilwij in Jairo:

—Amo ximomawti, tej sanwel xiktlali motlaneltokalis nonawak.

³⁷Jesús mach okinekke ma wia akaj Iwan, san yen Pedro, iwan omen iknimej katlej intoka Jacobo iwan Juan. ³⁸Oajsitoj ichan Jairo iwan okinmitajsikej motlatlaloaj in tlakaj, moyolkokoaj iwan kuawtzajtzij. ³⁹Jesús omijkuanij iwan okintlajtlanij:

—¿Tlanik wel ankuawtzajtzij iwan anchokaj? Yin ichpochtle mach ya miki, yej kochi.

⁴⁰In tlakaj okiwewetzkilijkej in Jesús, pero Yej okinkixtij nochtin de ompa kalijtik. Ijkuakón okinnotzke in tetajmey de yen ichpochtle, iwan eyin imomachtijkawan, iwan okalakej kalijtik kan oyeka yon ichpochtle. ⁴¹Okimakitzkij yon ichpochtle iwan okilwij:

—Talita, kum —kijtosneki: Ichpochtle, Nej nimitzilwia, ximewa.

⁴² San niman yon ichpochtle katlej okipiaya majtlakte iwan ome xiwitl, omejke iwan opéj nejnemi, iwan nochtin sa otlajtlachixkej (omomajmawtijkej). ⁴³ Jesúś okinnawatij amitlaj ma kijtokan de tlan otlamochij. Iwan okinmilwij ma kitlamakakan yon ichpochtle.

6

*Jesúś oyáj itech ipueblo Nazaret kan Yej omoskaltij
(Mt. 13:53-58; Lc. 4:16-30)*

¹ Jesúś okiske de Capernaum iwan oyáj itech ipueblo Nazaret. Imomachtijkawan nojki oyajkej Iwan. ² Itech weyi tonale, opéj tlamachtia itech se tiopan de yen judiojtin, miekej tlakaj omijkuaniijkej para kikakiskej in Jesúś. Miekej sa otlajtlachiayaj (omomajmawtiayaj) iwan okijoayaj:

—¿Kan okuito yin tlakatl nochí tlan kichiwa, tlan ixtlamachilstle kipia? ¿Kenik weli kinchiwa nochtin yinmej milagrostín? ³ Yin yen kuawtlaixinke, itelpoch in María iwan tikinmixmatij ikniwan intoka Jacobo, José, Judas iwan Simón. Nojki tikinmixmatij ikniwan katlej siwamej katlej nian chantij itech yin pueblo.

Iwan omokuejsojkej inawak. ⁴ Jesúś okinmilwij:

—Akin tlapoa de Dios se kitlakitas ik nowian (nian nepa), pero mach kitlakitaskej itech ipueblo, nion iparenteswan iwan nion itech ichan.

⁵ Por yonik Jesúś mach okinchij miekej milagrostín ompa. San inpan sekimej kokoxkej okitlalij ima, iwan opajtikej.

⁶ Jesúś sa otlajtlachixke (omomajmawtij) porke mach otlaneltokayaj inawak. Iwan oyáj itech pueblotin katlej katej ik ompa serka, ompa oyáj otlamachtito.

Jesúś okinnotzke majtlakte iwan ome imomachtijkawan para ma tetlapowitij

(Mt. 10:5-15; Lc. 9:1-6)

⁷ Jesúś okinnotzke majtlakte iwan ome imomachtijkawan iwan opéj kintitlani ojomen. Okinmakak poder para ma kinkixtikan ejekamej mach kualtin. ⁸ Iwan okinmilwij mach itlaj ma kitkikan nion se bolsa, nion tlakuale iwan nion tomin, san se karrotij ma kitkikan. ⁹ Welis kitkiskej inkakuan iwan intzotzol san yej tlan konakijtiwej. ¹⁰ Okinmilwij:

—Nikuak ankalakiskej itech se kale, ximokawakan ompa asta ikuak ankisaskej de itech yon pueblo. ¹¹ Tla kanaj mach amechresibiroaj o noso mach amechkakiliaj, san niman nikuak ankisaskej de yon lugar, ximokxitlaltzejtzelokan. Ma kimomakakan kuenta nik mach kuale tlan yejwan kichiwaj.

¹² Oyajkej iwan otetlapowijkej de itlajtol in toTajtzin Dios, okinmilwiayaj nochtin tlakaj ma moyolkuepakan de intlajtlakol. ¹³ Okinkixtijkej miekej ejekamej mach kualtin, iwan okintlalilijkej aseite miekej kokoxkej iwan opajtikej.

Juan Tlakuateekij okimiktijkej

(Mt. 14:1-12; Lc. 9:7-9)

¹⁴ In rey Herodes okikakke motlapowiaj de yen Jesús ik nowian (nian nepa). Iwan Herodes okijtoj:

—In Juan Tlakuateekij yomoyolkuik satepan de omikke iwan por yonik kinchiwa milagrostin.

¹⁵ Oksekimej okijtoayaj:

—Yon yen profeta Elías.

Iwan oksekimej okijtoayaj:

—Yon se profeta ken katlej ya wejkawitl oyekaj profetajtin.

¹⁶ Nijuak in Herodes ijkón okikakke okijtoj:

—Yin yen Juan Tlakuateekij, katlej nej onitlanawatij ma kikechzontekikan iwan axan yomoyolkuik oksemi satepan de omikke.

¹⁷ Herodes otlanawatij ma kikitzkikan in Juan, ma kijilpijan ika kadena iwan ma kitzakuakan telpiloyan. Herodes ijkón okichij para kipaktis isiwa katlej itoka Herodías. Herodías achtoj oyeka tesiba de yen Felipe ikni in Herodes, pero satepan Herodes okisiwakixtilij in Felipe maski oyeka ikni. ¹⁸ In Juan Tlakuateekij okilwiaya in rey Herodes:

—Tikchijtok se weyi tlajtlakole porke iwan tikaj mokoñada.

¹⁹ Herodías okikokoliaya in Juan iwan okinekia kimiktis. Pero mach okajsia kenik kichiwas. ²⁰ Herodes mach okinekia kimiktis in Juan porke okimatia nik in yej kuale tlakatl, por yonik Herodes okipiaya kuidado de amitlaj kitoktiskej in Juan. Herodes okiwelitaya ma kitlapowi in Juan, pero nikuak okikakia, sa otlaajtlachiaya (omomajmawtiaya) iwan mach ok okimatia tlan kijtos.

²¹ Pero se tonale in siwatl Herodías okajsik kenik kimiktis in Juan. Herodes okitemakak se tlaxkale nikuak omixtonaltij (ikumpleaños). Okinnatzke nochtin tekiwajkej de yon país, kapitanmej de soldadojtin iwan katlej okachi tlatlayekantokej de itech estado de Galilea. ²² Ichpoch in Herodías ovalaj iwan omijtotij inyakapan nochtin katlej ompa oyekaj. Herodes iwan iihibitadoswan sa tekitl okiwelitakej. Ijkuakón Herodes okilwij in ichpochtle:

—Xinechtlajtlanili san tlan tej tiknekis iwan nimitzmakas.

²³ Iwan asta okilwij:

—Ipan melajka, san tlanon tinechtlajtlanilis, nimitzmakas asta tlajko de tlan niknawatia.

²⁴Yon ichpochtle oyáj okitlajtlaniito imaman para ma kilwi tlanon kitlajtlanilis. Iwan imaman okijtoj:

—Xiktlajtlanili itzontekon in Juan Tlakuateekij.

²⁵ San niman omotlaloj in ichpochtle inawak Herodes iwan okilwij:

—Nikneki xinechmaka axan san niman, ika se plato itzon-tekon in Juan Tlakuateekij.

²⁶ Herodes sa tekitl omoyolkokoj, pero komo yokisentlalij itlajtol inmixpan iinbitadoswan, tones okichij ijkón ken okijtoj. ²⁷Tones okinawatij se soldado ma kikuiti itzontekon in Juan Tlakuateekij. In soldado oyáj telpiloyan okechtzontekito in Juan. ²⁸Satepan okitkik ika se plato iwan okimaktilij in ichpochtle. Iwan ichpochtle okimakak imaman. ²⁹Nijuak imomachtijkawan in Juan okimatkej, okitlajtlanitoj in mikkatl para kitookaskej.

Jesús okintlamakak makuile mil tlakaj

(Mt. 14:13-21; Lc. 9:10-17; Jn. 6:1-14)

³⁰ In momachtijkej ovalajkej inawak Jesús para kimatiltiskej nochí tlan okichijkej iwan tlan otlamachtijkej.

³¹ Jesús okinmilwij:

—Xiwikan nowan ik se lado iwan ximosewikan achitzin.

Ijkón okinmilwij porke sa tekitl miekej tlakajtin ovalayaj inawak Jesús, iwan asta mach ok omajxiliayaj otlakuayaj.

³² Otlejkokej kiné itech se barko iwan oyajkej se lugar kan tlalkawale kan mach akaj tlakatl nemí. ³³ Miekej okinmitakej iwan okinmixmatkej nijuak oyajkej, ikuakón noijki miekej oyajkej totoka okinnamiktajkej, otlakotontiajkej ik pueblotin iwan oajsitoj ompa achtoj ke yejwan. ³⁴ Nijuak Jesús otémok de itech barko, okinmitak sa tekitl miekej tlakaj ompa yokichixtokaj, okinmiknomaj porke oyekaj kej ichkamej katlej mach kipiaj tlajpixke. Iwan okinmachtij de miek tlamantle. ³⁵ Sa tiotlakke imomachtijkawan omikuani-kej inawak Jesús iwan okilwijkej:

—Nian mach itlaj onkaj iwan yotiotlakik. ³⁶ Xikintitlani in tlakaj ma wian ik rancherías iwan ik pueblotin katlej katej serka, para ma kikowatij tlan kikuaskej.

³⁷ Jesús okinmilwij:

—Namejwan xikintlamakan.

Yejwan okilwijkej:

—Mach kajxilis tikkowaskej ome siento denarios de pan para tikinmajmakaskej nochtin.

³⁸ Yej okinmilwij:

—¿Keski pan ankipiaj? Xikitakan.

Nijuak okitakej, okilwijkej:

—Tikpiaj makuile pan iwan ome michimej.

³⁹ Ijkuakón Jesús okinnawatij ma motlalikan in tlakaj por grupojtin, kan xiwyoj. ⁴⁰ Omotlalijkej grupojtin de sejsen siento iwan de tlatlajko siento. ⁴¹ Jesús okitilanke in makuile pan iwan ome michimej, oajkopantlachixke iwan omotlaso-jkamatke inawak Dios. Okipojpostekke in pan iwan okin-makak imomachtijkawan para ma kinxejxelilikan in tlakaj. Nojki Jesús okinkojkotonke in ome michimej iwan nochtin okinxejxelilijkej. ⁴² Nochtin kuale otlakuajkej asta oixwikej. ⁴³ Satepan, imomachtijkawan okololojkej majtlakte iwan ome chikimej tentokej de pantlapojpostektle iwan de micht-lakojkotonale. ⁴⁴ Iwan katlej otlakuajkej oyekaj kej makuile mil tlakaj.

*Jesús onejnenke ipan atl
(Mt. 14:22-27; Jn. 6:16-21)*

⁴⁵ Satepan, Jesús okintilanke imomachtijkawan itech se barko, ma tlayekanakan asta itech oksé lado de yen lago, ma ajsitij itech pueblo de Betsaida. Yej ok okinmakawaya in tlakaj. ⁴⁶ Iwan nijuak oyajkej nochtin, Jesús oyáj ik ajko ipan tiliwik iwan ompa omotiotzajtzilij. ⁴⁷ Nijuak otleyuak, in barko oyeka itlajko in lago, iwan Jesús oyeka iselti itempan atl. ⁴⁸ Yej okinmitak imomachtijkawan yosotlawakej porke in ejekatl okinmixnamikiwalaya iwan barko mach ok owelia oyaya totoka. Kej las tres de kualkan, Jesús oyáj nejnentiw ixko atl iwan ya kinpanawiskia. ⁴⁹ Nijuak imomachtijkawan okitakej, okijtojkej xamo se temawtij, omomawtijkej iwan otzajtzikey. ⁵⁰ Porke nochtin okitakej iwan omomawtijkej. San niman Yej, okinnotzke iwan okinmilwij:

—Amo ximomawtikan, Nej niJesús. Ximoyolojchikawakan.

⁵¹ Otlejkok itech barko, iwan omoketzke in ejekatl, iwan yejwan sa otlajtlachixkej (omomajmawtijkej). ⁵² Ayamo oki-momakayaj kuenta de yen milagro katlej Jesús okichij de yen pan iwan de yen michimej, iwan oyekaj ok yoltlakuawakej.

*Jesús okinpajtij kokoxkej itech se lugar itoka Genesaret
(Mt. 14:34-36)*

⁵³ Okiatrabesarojkej in lago iwan oajsitoj se lugar itoka Genesaret. Ompa inakastlan lago okilpijkej in barko.

⁵⁴ Nijuak Jesús otémok de itech barko, in tlakaj san ni-man okixmatkej. ⁵⁵ Ijkuakón nochtin tlakaj de yon lugar omotlatlalojkej okitematiltijkej nik in Jesús oejkok itech yon lugar. Nochtin tlakaj de yon regióñ okualinwikakej nochtin kokoxkej asta kan oyeka in Jesús. ⁵⁶ Iwan san kan Yej oyaya, itech weylkantin, rancherías, pueblotín, tlalkawaltin o noso ipan ojtle, ompa okintlaliliyaj in kokoxkej, iwan okitlat-lawtiyaj ma kinkawili maski san ma kikitzkilikan itzotzol

para ma pajtikan. Iwan nochtin katlej okikitzkilijkej itzotzol opajtikej.

7

Jesús okinmajwak in tlamachtijkej de itlanawatil in Moisés (Mt. 15:1-20)

¹ In fariseos iwan sekimej tlamachtijkej de itlanawatil in Moisés ovalajkej de weyikan de Jerusalén iwan omolololijkej inawak Jesús. ² Miekpa okinmitayaj imomachtijkawan otlakuayaj iwan mach omomajtekiayah. Pero in fariseos omomajtekiayah. ³ (In fariseos iwan oksekimej judiojtin omomajtekiayah miekpa nijuak otlakuayaj porke ijkón okinimititijkej inweyitajwan. ⁴ Iwan nijuak owalmokuepayaj de tiankisko, tla amo momajtekiskej miekpa mach tlakuaskej, iwan okipiayaj oksekimej kostumbres okachi: okinpajpakayaj basojtin, jarrojtin iwan oksekimej trastestin de tepostin, iwan asta kamajtin.) ⁵ In fariseos iwan tlamachtijkej de itlanawatil in Moisés okitlajtlanijkej in Jesús:

—¿Tlanik momomachtijkawan mach kineltokaj tlan otechmachtijkej in ya wejkawitl toweyitajwan? ¿Tlanik tlakuaj iwan mach momajtekiaj ken tejwan?

⁶ Yej okinnankilij:

—Melawak ken okijtoj Isaías nik namejwan san anteixkajkayajkej. Nijuak okikuiloj ken Dios okilwij:

Yinmej tlakaj nechtlakitaj san ika inten,
pero inyolo kajki wejka de Nej.

⁷ Mach itlaj ipatij intiotzajtzilis.

Tlan yejwan tlamachtiaj yon mach witz de Dios, sino yon kisa
san de itech yejwan intlayejyekolis.

⁸ Namejwan mach ankineltokaj tlan otechnawatij in Dios, iwan namejwan yej oksé tlamantle tlan ankichiwaj, yej anmotlapajpaciaj iwan ankineltokaj se tlanawatile de amejwan.

⁹ Jesú斯 noijki okinmilwij:

—Namejwan ankikawaj se lado tlan Dios otechnawatij, iwan yej ankichiwaj de tlan namejwan anmotlayejyekol.

¹⁰ Moisés okijtoj: “Xikintlakita mopapan iwan momaman.” Noijki okijtoj: “Akin biero kitewilia ipapan o noso imaman, ma kimiktikan.” ¹¹ Pero namejwan ankijtaj ke se tlakatl welis kilwis ipapan o noso imaman: “Mach welis nimitzpalewis ika tlan mitzpoloa porke ya Corbán.” (Corbán kijtosneki tlan nikpia yonikmaktilij in Dios.) ¹² Ijkón, namejwan mach ankitekawiliaj ma se kipalewi ipapan o noso imaman.

¹³ Namejwan ankikawaj se lado itlajtol in Dios iwan yej

ankichiwaj tlan de amejwan anmokostumbre. Iwan noijki ankinchiwaj oksekimej tlamatín ken yinmej.

¹⁴ Jesús okinnotzke nochtin tlakaj iwan okinmilwij:

—Xinechkakikan aminochtin iwan xikmomakakan kuenta tlan nikija. ¹⁵ Nochi tlan kalakis ijtk se tlakatl mach kiyolsokiotis. Tlan kisa de ipan iyolo in tlakatl yej yon kiyolsokiotia. ¹⁶ Tla ankinekij ankimomakaskej kuenta, xikkakikan.

¹⁷ Satepan de okinkajtej in tlakaj se lado, Jesús okalakke itech se kale, imomachtijkawan opéj kitlajtlaniaj tlan kijtosneki de tlan okinmakak kuenta. ¹⁸ Yej okinnankilij:

—¿Namejwan no mach ankimomakaj kuenta? ¡Xikkakikan! Tlan kalaki ijtk se tlakatl mach itlaj kitoktia. ¹⁹ Porke mach kalaki ijtk iyolo, sino ijtk itlalax iwan satepan kisa kalan.

Ijkón Jesú okinmilwij nik chipawak nochí tlan mokua.

²⁰ Noijki okijtoj:

—In tlajtlakole katlej kisa de itech se tlakatl, yen yon kiyolsokiotia. ²¹ De ijtk inyolo in tlakaj kisa katlej mach kuale tlnamikilistle, momekatiaj katlej tlanamiktilltin iwan katlej mach tlanamiktilltin, temiktiq, ²² tlachtekij, tominpitzyem, kitetoktiaj tlan amo kuale, tekajkayajkej, kiwelitaj mopaktiskej ika intlnakayo, moxikoanimej, tepojpoaj, moweyinekij, iwan mach kimati tlakakij. ²³ Nochi yon mach kuale tlamanyotl kisa de ijtk inyolo in tlakaj iwan kinyolsokiotia.

*Jesús okikixtij se ejekatl mach kuale de itech se ichpochtle
(Mt. 15:21-28)*

²⁴ Jesús oyáj ik región de Tiro iwan ik región de Sidón. Okalakke itech se kale, iwan okinekia mokawani ompa para mach akaj ma kimati kanin kaj, pero mach owelik omotlaatij de nochtin. ²⁵ Se tenan okipiaya ichpoch katlej okipiaya se ejekatl mach kuale. In tenan okimatke kan oyeka in Jesús, oyáj inawak iwan omotlankuaketze ikxitlan. ²⁶ Yin tenan mach judía, yej oyeka griega, otlakatke Sirofenicia. Okitlatlawtij in Jesús ma kikixtili in ichpoch in ejekatl mach kuale. ²⁷ Iwan Jesús okilwij:

—Achtoj ma nirkinpalewi nojudiojikniwan. Tej mach ti-judía. Tla tej nimitzpalewis, yon kej yeskia niktlamaka se chichij ika intlakual ikonewan Dios.

²⁸ In tenan okinankilij:

—Aján, Señor. Pero nikuak ikonewan Dios tlakuaj ipan mesa, tepewi sekín intlakualpayex, iwan chichimej kikuaj yon tlakualpayextle.

²⁹ Jesús okilwij:

—Kuale otitlanankilij, xiwia, in ejekatl mach kuale yokiske de itech mochpoch.

³⁰ In tenan oyáj para ichan iwan okitajsik ichpoch wetok ipan itlapech, iwan ejekatl mach kuale yokiske.

Jesús okipajtij se tlakatl nontzin iwan mach otlakakia

³¹ Jesús okiske de región de Tiro iwan opanok ik región de Sidón. Satepan opanok itech tlalmej kan katej majtlakte pueblojtin kan noijki kitokaxtiaj Decápolis, iwan oajsito kan lago de Galilea. ³² Ompa okiwikilijkej se tlakatl nontzin iwan mach otlakakia. Okitlatlawtijkej in Jesús ma kitlali ima ipan yon tlakatl. ³³ Jesús okiwikak ik se lado iselti, okinkalakij imajpilwan ijtk inakaswan in yon tlakatl, ochijchak iwan okikitzkilij inenepil. ³⁴ Satepan Jesús otlachixke ik ilwikak, oelsijsij iwan okilwij:

—¡Efata! —kijtosneki: ¡Ximotlapokan!

³⁵ San niman ikuakón yon tlakatl onakastlapowik, noijki onenepilkaxanke iwan opéj tlajtoa kuale. ³⁶ Satepan, Jesús okinnawatij in tlakaj mach itlaj ma kijtokan de tlan okichij, pero yejwan okachi okixoyawayaj in tlajtole.

Jesús okinpajtij oksekimej kokoxkej

³⁷ Nochtin sa otlajtlachixkej (omomajmawtijkej) de tlan otlamochij, iwan okijoayaj:

—Yin Jesús kuale kinchiwa nochtin yinmej tlamantin. Katlej mach tlakakij kintlakakitia iwan katlej mach tlajtoaj kintlajtoltia.

8

Jesús okintlamakak nawi mil tlakaj

(Mt. 15:32-39)

¹ Se tonale omololojkej miekej tlakaj iwan mach okipiayaj tlan kikuaskej, Jesús okinnotzke imomachtijkawan iwan okinmilwij:

² —Nikinmiknomati in yinmej tlakaj ya kipiaj eyi tonale nowan iwan mach kipiaj tlan kikuaskej. ³ Tla amo nikintlamakas iwan nikinmilwis ma wian inchan, welis kuatleyuiliskej ipan ojtle, porke sekimej de yejwan ovalajkej de wejka.

⁴ Imomachtijkawan okilwijkej:

—Nian mach akaj chanti, ¿kan tikkuitiwej pan para tikintlamakaskej?

⁵ Jesús okinmilwij:

—¿Keski pan ankipiaj?

Yejwan okijtojkej:

—Chikome pan.

⁶ Ijkuakón okinmilwij in tlakaj ma motlalikan. Okitilanke in chikome pan iwan omotlasojkamatke inawak Dios, okipoj-postekke in pan iwan okinmakak imomachtijkawan para ma kinxejxelilikan in tlakaj iwan yejwan ijkón okichijkej. ⁷ Noijki okinpiayaj sekimej michintzitzintin. Jesús noijki omotlasojkamatke inawak Dios iwan okinmilwij imomachtijkawan ma kinxejxelilikan in tlakaj. ⁸ Nochtin kuale otlakuajkej asta oixwikej. Iwan satepan okololojkej tlan osobraroj iwan asta otенke chikome chikiwitl. ⁹ Otlakuajkej kej nawi mil tlakaj. Iwan satepan Jesús okinmakaj. ¹⁰ Satepan Jesús otlejkok itech se barko iwan imomachtijkawan iwan oyajkej. Iwan oajsitoj se lugar itoka Dalmanuta.

*In fariseos okitlajtlankej se weyi milagro de Jesús
(Mt. 16:1-4; Lc. 12:54-56)*

¹¹ In fariseos oejkokej inawak Jesús iwan opéj Iwan motlatlajtolkuepaj. Okitlajtlanilijkej ma kichiwa se milagro kej se señas para kitaskej nik melawak kichiwa ika ipoder in Dios.

¹² Jesús oelsijsij iwan okinmilwij:

—Namejwan ankinekij annechtlajtlakolmayawiskej, annechtlajtlaniliaj se weyi milagro. Ipan melajka namechilwia ke namejwan mach ankitaskej nion se milagro de ilwikak.

¹³ Ompa okinkajtej iwan oksemi otlejkok itech barko iwan opanok oksé lado de yen lago de Galilea.

*Jesús okijtoj intlamachtilis in fariseos mach melawak
(Mt. 16:5-12)*

¹⁴ Imomachtijkawan in Jesús mach okitkikej pan itech barko, porke okelkajkej iwan okitkikej san se pan. ¹⁵ Jesús okinmilwij:

—Ximotlachilikan de itech inlevadura in fariseos iwan de itech ilevadura in Herodes.

¹⁶ Imomachtijkawan opéj kimolwiaj se iwan oksé:

—Ijkón techilwia porke otikelkajkej in pan. ¹⁷ Jesús okimatiá tlan okiyejyekoayaj iwan okinmilwij:

—¿Tlanik ankimolwiaj ke ankelkajkej in pan? Wel ankuatlakuawakej, mach ankimomakaj kuenta. ¹⁸ Ankipiaj anmixtololowan pero mach antlachiaj. Ankipiaj ammonakaswan pero mach antlakakij. ¹⁹ Xikelnamikikan nikuak onikinpojpostekke in makuile pan iwan onikinmajmakak makuile mil tlakaj para ma tlakuakan. ¿Keski chikiwitl otенke de pan katlej osobraroj?

Yejwan otlanankilijkej:

—Majtlakte iwan ome chikiwitl.

²⁰ —Iwan nikuak onikinpojpostekke in chikome pan para nawi mil tlakaj, ¿keski chikiwitl otенke de yen pedasos katlej osobraroj?

Yejwan okilwijkej:

—Chikome chikiwitl.

²¹ Ijkuakón okinmilwij:

—¿Mach ya ankimomakaj kuenta? ¿Ankiyejyekoaj Nej nit-lanemilia por amo ankualkuijkej in pan?

Jesús okitlachialtij se tlakatl katlej mach otlachiaya

²² Satepan ovalajkej itech pueblo de Betsaida, iwan okualwikilijkej se tlakatl katlej mach tlachia, okitlatlawtijkej in Jesús ma kintlali imawan ipan yon tlakatl para ma pajti. ²³ Jesús okimatinlanke iwan okixtij de itech yon pueblo. Satepan okitlalilij ichijchi itech ixtololowan, okint-lalilij imawan ipan iwan okitlajtlanij kox ya weli itlaj kita.

²⁴ Ijkuakón opéj tlachia iwan okilwij:

—Nikinmita in tlakaj kej kuanmej iwan nikinmita nejne-mij.

²⁵ Jesús oksemi okintlalilij imawan ipan ixtololowan yon tlakatl iwan okinawatiq kuale ma tlachia. Iwan ijkuakón yon tlakatl opajtik iwan opéj kuale tlachia. ²⁶ Ijkuakón Jesús okititlanke ma wia para ichan, iwan okilwij:

—Amo xikalaki itech pueblo iwan amo akaj itlaj xikilwi.

Pedro okijtoj Jesús yen Cristo

(Mt. 16:13-20; Lc. 9:18-21)

²⁷ Satepan Jesús iwan imomachtijkawan oyajkej itech se región kan oyekaj sekimej pueblojtin. Yonmej pueblojtin okinnawatiaya se weyikan itoka Cesarea de Filipo. Nijuak onejnentokaj okintlajtlanij:

—¿Ken kijtaj in tlakaj? ¿Akin Nej?

²⁸ Yejwan okilwijkej:

—Sekimej kijtaj tejwatzin tiJuan Tlakuateekij, sekimej kij-taj tejwatzin tiElías o noso akaj oksé profeta.

²⁹ Yej okinmilwij:

—Iwan namejwan, ¿ken ankijtaj? ¿Akin Nej?

Pedro okilwij:

—Tejwatzin tiCristo.

³⁰ Jesús okinmilwij amakaj itlaj ma kilwikan de Yej.

Jesús okinmilwij kenik mikis

(Mt. 16:21-28; Lc. 9:22-27)

³¹ Jesús opéj kinmachtia nik in Yej akin omochij tlakatl tlajyowis de miek tlamantle. In tlayekankej tetajtzitzintin, in tlayekankej tiopixkej iwan in tlamachtijkej de itlanawatil in Moisés mach kiresibiroskej. Yejwan kimiktiskej pero ipan eyi tonale moyolkuis (moyolitis). ³² Jesús okinmilwij ipan melajka nochí tlan panos, iwan mach itlaj okintlaatilij. Pero ijkuakón Pedro okiwikak in Jesús ik se lado, iwan opéj kajwa

por ijkón okijtoj. ³³ Pero Jesús omokuepke para okonimitak imomachtijkawan, iwan ikuakón okajwak in Pedro iwan okilwij:

—¡Xitzinkisa, Satanás! Porke tej mach mitztekipachoa tlan Dios kineki, sino mitztekipachoa tlan kinekij in tlakaj.

Kenik se nemis iwan Jesús

³⁴ Jesús okinnotzke in tlakaj iwan imomachtijkawan iwan okinmilwij:

—Tla akaj kineki witz nonawak, ma wiki kiné, pero moneki ayakmo ma kichiwa san tlan yej kinekis. Sino kipia de kixikos nochí san tlan panos, maski ma kimiktkian itech krus. ³⁵ Tla akaj kineki kipalewis inemilis, kipolos, pero tla akaj kipoloa inemilis por Nej iwan por yen itlajtol in toTajzin Dios, kipalewis inemilis. ³⁶ Mach itlaj ipatij tla se tlakatl kimoaxkatis nochí in tlaltikpak iwan satepan kipolos ianima. ³⁷ Mach weli mokowa se anima. ³⁸ Akin pinawa de Nej iwan de notlajtol inmixpan yinmej tlaltikpaktlakaj momekatijkej iwan tlajtlakolejkej, Nej katlej onimochij nitlakatl noijki nipiñawas de yej nikuak niwitz ika imawisotlanex in noPapan iwan noijki niwitz inwan angelestín yolchipawakej.

9

¹Jesús okinmilwij:

—Ipan melajka namechilwia, sekimej katlej nian katej, mach kixmatiskej in mikilistle asta amo ma kitakan kenik in Dios tlanawatis ika miek ipoder.

Jesús otlakenpetlanke

(Mt. 17:1-13; Lc. 9:28-36)

² Chikuasen tonale satepan, Jesús oyáj ipan tepetl okinwikak in Pedro, Jacobo iwan Juan. Iwan ompa inmixpan omopatlak itzotzol in Jesús. ³ Itzotzol opetlanke sa tekitl istak, iwan mach akaj tlakatl de nian tlaltikpak welis ijkón kikawas, maski sa tekitl ma kipaka mach ijkón nik istayas. ⁴ Iwan ikuakón omonextijkej in Moisés iwan Elías omotlapowijtokaj iwan Jesús. ⁵ Pedro okilwij in Jesús:

—Tlamachtij, sa kuale nian tikatej mowan. Ma tikinchikanek, eyi akawalkaltin, se para tejwatzin, se para Moisés iwan se para Elías.

⁶ Pedro mach okimatke tlan okijtoj, porke yejwan omomawtijkej. ⁷ Ikuakón se mixtle okinkenke iwan se tlajtote omokakke okijtoj:

—Yin yen notlasojKone, xikkakiliikan itlajtol.

⁸ Nikuak omotlachilijtewakej nian nepa, mach ok akaj okitakej sino sa yen Jesús. ⁹ Nikuak owaltemoayaj de ipan

tepetl, Jesús okinmilwij imomachtijkawan mach itlaj ma kijtokan de tlan okitakej, asta ikuak in Yej akin omochij tlakatl ma moyolkui oksemi satepan de mikis.¹⁰ Okitlaatijkej kiné ipan inyolo iwan omotlajtlaniayaq tlan kijtosneki moyolkuis (moyolitis) oksemi satepan de mikis.¹¹ Okitlajtlanijkej in Jesús:

—¿Tlanik in tlamachtijkej de itlanawatil in Moisés kijtaj ke Elías yej kipia de witz achtoj antes de witz in Cristo?

¹² Jesús okinnankilij:

—Ipan melajka namechilwia, Elías achtoj witz iwan yej tlayektlalis nochí, kajki ikuilitok nik in Nej katlej onimochij nitlakatl nimoyolkokos sa tekitl iwan nechkokoliskej in tlakaj.¹³ Pero nikneki xikmatikan nik in Elías yowitza iwan tlakaj okitoktijkej san tlan yejwan okinekej, ijkón ken ikuilitok de tlan panoani in yej.

Jesús okipajtij se telpochtle katlej okipiaya se ejekatl mach kuale

(Mt. 17:14-21; Lc. 9:37-43)

¹⁴ Nijuak omokuepato in Jesús kan oyekaj imomachtijkawan, okinmitak miekej tlakaj okinyawalojtokaj, iwan sekimej tlamachtijkej de itlanawatil in Moisés omokuejsoayaj iwan imomachtijkawan.¹⁵ Nochtin sa otlajtlachixkej (omomajmawtijkej) nijuak okitlatewakej in Jesús, iwan niman omotlalojkej inawak okitlajpalotoj.¹⁶ Jesús okintlajtlanij:

—¿Tlanik wel anmotlajtolnanankiliaj inwan nomomachtijkawan?

¹⁷ Se tlakatl katlej ompa oyeka okijtoj:

—Tlamachtij, nian nimitzwawlikilia notelpoch, kipia se ejekatl mach kuale iwan onontik.¹⁸ San kan yawi, in ejekatl mach kuale kikitzkia iwan kitlalwiteki, kamaposoni, motlanteteyizza iwan sojsosoka. Onikintlatlawtij momomachtijkawan ma kikixtilikan in ejekatl mach kuale iwan mach owelikej.

¹⁹ Jesús okinmilwij:

—¡Namejwan wel mach antlaneltokakej! ¿Asta keman nietos amowan? ¿Asta keman ijkón nanmechxikojtos? Xinechwalwikilian in telpochtle.

²⁰ Ikuakón okiwikakej in telpochtle inawak Jesús, iwan nijuak in ejekatl mach kuale okitak in Jesús, niman okitoktij in telpochtle ma motlalwiteki chikawak iwan omijtikueptinenke iwan okamaposonke.²¹ Jesús okitlajtlanij in tetaj de yon telpochtle:

—¿Ya wejkawitl ijkón mochiwa?

In tetaj okinankilij:

—Desde chokotzin. ²² Miekpa kitoktia ma wetzi ijtik tlitl iwan ijtik atl para ma miki. Tla tejwatzin tiwelini itlaj tikchiwani, xitechiknomati iwan xitechpalewi.

²³ Jesúś okinankilij:

—Amo xikijo: “Tla tejwatzin tiwelini itlaj tikchiwani.” Tla tej tikneltoka, tones Dios welis mitzpalewis itech nochi tlamantle.

²⁴ San niman in tetaj otzajtzik chikawak okijtoj:

—¡Señor, nikneltoka! ¡Xinechpalewi ma nitlaneltoka okachi ken moneki!

²⁵ Nijuak Jesúś okitak opéj mololoaj miekej tlakaj, okijtoj:

—¡Tej, ejekatl mach tikuale, tinakastzajtzaktok iwan tinonotle! ¡Nimitznawatia xikisa de ijtik yin telpochtle iwan mach oksemi xikalaki ijtik!

²⁶ In ejekatl mach kuale okuawtzajtzik, okimimiktij iwan okikuekuepke in telpochtle iwan okiske de ijtik. In telpochtle omokaj kej mikkatl. Iwan miekej okijtojkej yomikke in telpochtle.

²⁷ Ijkuakón Jesúś, okimakitzkij iwan okewaltij. Iwan telpochtle omoyekketzke.

²⁸ Nijuak in Jesúś okalakke itech se kale iwan imomachtijkawan, ompa yejwan inselti okitlajtlanijkej in Jesúś:

—¿Tlanik in tejwan mach otiwelikej otikixtijkej in ejekatl mach kuale?

²⁹ Yej okinmilwij:

—Yinmej ejekamej mach kualtin, welis ankinkixtiskej tla anmotiotzajtziliskej iwan anmosawaskej (onayunaroskej).

Jesúś oksemi okitematiltij imikilis

(Mt. 17:22-23; Lc. 9:43-45)

³⁰ Jesúś iwan imomachtijkawan okiskej de ompa iwan opanokej ik estado de Galilea. Pero Jesúś mach okinekke akaj ma kimati kanin kajki. ³¹ Porke okinekia kinmachtis imomachtijkawan. Okinmilwiaya:

—Nej katlej onimochij nitlakatl nechtemaktiskej (nechtemaktiliskej) inmak in tlakaj iwan nechmiktiskej, pero eyi tonale satepan de yonimikke nimoyolkuis (nimoyolitis).

³² Yejwan mach okimomakakej kuenta de tlan okinmilwiaya, iwan okimakaskej de kitlajtlaniiskej tlan kijtosneki.

¿Akin okachi weyikistok?

(Mt. 18:1-5; Lc. 9:46-48)

³³ Oajsitoj itech pueblo de Capernaum, nijuak in Jesúś oyeka kalijtik, okintlajtlanij:

—¿Tlan nankimolwijitiwalayaj ipan ojtle?

³⁴ Yejwan mach otlanankilijkej, porke okimolwijitiwalayaj akin de yejwan okachi weyikistok (weyititok). ³⁵ Ijkuakón

Jesús omotlalij iwan okinnotzke in majtlakte iwan omen imomachtijkawan. Okinmilwij:

—Tla akaj kineki tlayekantos, kipia de motzikitzinilis, iwan yej yetos tekipanoj de nochtin.

³⁶ Jesús okitlalij se chokotzin tlatlajko de kan yejwan oyekaj, omotlalij iwan okinapaloj iwan okinmilwij:

³⁷ —Akin kiresibiros se chokotzin ken yin, kijtosneki Nej nechresibiroa, iwan akin nechresibiroa, amo san Nej nechresibiroa, sino noiiki akin onechwaltitlanke.

Akin amo kajki kontra tejwan towan kajki

(Lc. 9:49-50; Mt. 10:42)

³⁸ Juan okilwij in Jesús:

—Tlamachtij, otiktakej se tlakatl kinkixtia ejekamej mach kualtin ika motoka, iwan otikilwijkej mach ijkón ma kichiwa, porke yej mach towan nemi.

³⁹ Jesús okinmilwij:

—Xikkawilikan, porke akin kichiwa milagro ika notoka, mach welis tlajtos biero de Nej. ⁴⁰ Akin amo kajki kontra tejwan, towan kajki. ⁴¹ Ipan melajka namechilwia, akin anmechmakas se xikale de atl ika notoka, san akin, porke amejwan annoaxkawan, ipan melajka namechilwia nik kiresibiros itlaxtlawil.

Dios kintlajtlakoltis katlej tlajtlakolchiwaj

(Mt. 18:6-9; Lc. 17:1-2)

⁴² 'In chochokomej nechneltokaj, pero tla akaj kichiwa se de yin tzikitzin ma wetzi ipan tlajtlakole, okachi kuale ma kilpilikian ikechtlan se metlatl iwan ma kitlamotlakan ijtk atl.

⁴³ Tla moma mitztoktia xieto titlajtlakolej, xikmotzontekili. Okachi kuale xikalaki ilwikak timatepoj ke tias ika noch ome momawan ijtk tliko, kan tlilt mach keman sewis, ⁴⁴ kan okuilimej mach mikij iwan in tlilt mach keman sewi. ⁴⁵ Tla mokxi mitztoktia xieto titlajtlakolej, xikmotzontekili. Okachi kuale xikalaki ilwikak tikoxo ke ma mitztlamotlakan ijtk tliko ika noch ome mokxiwan, ⁴⁶ kan okuilimej mach mikij iwan in tlilt mach keman sewi. ⁴⁷ Iwan tla moixtololo mitztoktia xieto titlajtlakolej, xikmokixtili. Porke okachi kuale xikalaki kan Dios tlanawatia ika se moixtololo ke ika noch ome moixtololowan ma mitztlamotlakan ijtk tliko, ⁴⁸ kan okuilimej mach mikij iwan in tlilt mach keman sewi.

⁴⁹ 'Porke nochtin in tlakaj weliaskej ika tlilt, ken in tlakuale welia ika istatl. ⁵⁰ In istatl sa tekitl kuale, pero tla in istatl kipolos ipuyeka, ¿kenik oksemi puyeyas? Namejwan xipuyextokan iwan kuale ximoyekwikakan.

10

*Jesús otlamachtij mach se ma mosiwakawa
(Mt. 19:1-12; Lc. 16:18)*

¹ Jesús okiske de pueblo de Capernaum iwan oyáj ik estato de Judea iwan oksé lado de yen weyatl Jordán, ompa omololojkej in tlakaj iwan Yej opéj kinmachtia ijkón ken nochipa okichiwaya. ² Sekimej fariseos omikuaniijkej para kitlajtlakolmayawiskej iwan okitlajtlanijkej:

—¿Kox kuale kaj tla se tlakatl kikawas isiwa?

³ Jesús okinnankilij:

—¿Tlan kijta itlanawatil in Moisés?

⁴ Yejwan otlanankilijkej:

—Moisés okitekawilij ma mosiwakawa in tlakatl, tla kitemaka se amatl kan ma kijto nik mokajkawa iwan isiwa.

⁵ Jesús okinmilwij:

—Moisés okitemakak in tlanawatile de yen mosiwakawaj, porke mach ankinekij ankimomakaskej kuenta de itlaj tlan kuale. ⁶ Pero nijuak Dios okichij in tlaltikpak, noijki okichij in tlakatl iwan siwatl. ⁷ Por yonik in tlakatl kikajtewas ipapan iwan imaman para mosetilis iwan isiwa. ⁸ Iwan de omen yetos sa se tlakatl. Iwan ijkón mach ok yetoskej omen sino sa se. ⁹ Por yonik, mach akaj ma kinxeelo katlej Dios yokinsetilij.

¹⁰ Nijuak yokatkaj kalijtik imomachtijkawan okitlajtlanijkej oksemi de yen yon tlajtole. ¹¹ Jesús okinmilwij:

—Akin kikawa isiwa iwan monamiktia iwan oksé siwatl, kijtosneki ya kimomekatia. ¹² Tla se siwatl kikawa iokich iwan monamiktia iwan oksé tlakatl, kijtosneki noijki ya kimomekatia.

Jesús okintiochij in pilalaktin

(Mt. 19:13-15; Lc. 18:15-17)

¹³ Jesús okinwikilijkej sekimej pilalaktin para inpan ma kintlali imawan. Imomachtijkawan opéj kinmajwaj katlej okinwikayaj in pilalaktin. ¹⁴ Jesús okinmitak, okualanke iwan okinmilwij imomachtijkawan:

—Xikinkawakan in pilalaktin ma wikikan nonawak, amo xikintzatzakuillian. Porke in tlakaj katlej yolyamankej ken pilalaktin, kalakiskej kan Dios tlanawatia. ¹⁵ Ipan melajka namechilwia, tla se tlakatl amo kikawilis in Dios ma tlanawati ipan iyolo ken se chokotzin kimokawilia, yon tlakatl mach kalakis kan Dios tlanawatia.

¹⁶ Jesús okinnapaloj in pilalaktin, satepan okintlalij imawan inpan yonmej pilalaktin iwan okintiochij.

*Se tlakatl katlej wel kimopialia omotlapowij iwan Jesús
(Mt. 19:16-30; Lc. 18:18-30)*

¹⁷ Jesúś oksemi ya oonewaya para kiseguiroani iojwi, ikuakón se tlakatl omotlaloj inawak, omotlankuaketze iwan okilwij:

—Tlamachtij, Tej wel tikuale tlakatl. ¿Tlan welis nikchiwas para nikpias nemilstle katlej mach keman tlamis?

¹⁸ Jesúś okilwij:

—¿Tlanik tinechilwia nikuale tlakatl? Mach onkaj oksé kuale tlakatl, sanwel yen Dios. ¹⁹ Ya tikmati tlan kijtaj in tlanawatiltin: “Amo xitemikti, amo ximomekati, amo xitlachteki, amakaj xiktlajtoltlatlalili, amo xitlakajkayawa, iwan xikintlakita mopapan iwan momaman.”

²⁰ In tlakatl otlanankilij:

—Tlamachtij, nochi in yon nikchijtiwitz desde nitzikitzin.

²¹ Jesúś okitlatak ika tla sojtlalistle iwan okilwij:

—Oksé mitzpoloa tikchiwas. Xiwia iwan xiknamaka nochi tlan tikpia, iwan tomin xikinmaka in pobrestin. Ijkón tikpias rikojoyótl ompa ilwikak. Iwan nompa, xiwiki nonawak iwan pewa xinemí nowan.

²² Nijuak ijkón okikakke in tlakatl oyáj omoyolkokojtiaj porke sa tekitl okimopialiaya.

²³ Jesúś otlachixke ik nian nepa iwan okinmilwij imomachtijkawan:

—In tlakaj katlej kimopialiaj sa tekitl owij para kalakiskej kan Dios tlanawatia.

²⁴ Imomachtijkawan sa otlajtlachixkej (omomajmawtijkej) de tlan okijo pero Jesúś okinmilwij oksemi:

—Nokonewan, sa tekitl owij para katlej kimopialiaj kalakiskej kan Dios tlanawatia. ²⁵ Okachi mach owij para se kameyo panos kan kuyontok in akuxaj, ke para se katlej kimopialiaj kalakis kan Dios tlanawatia.

²⁶ Yejwan sa otlajtlachixkej (omomajmawtijkej) iwan okimolwiayaj entre yejwan:

—Tla ijkón, ¿akin kiné welis momakixtis?

²⁷ Jesúś okintlatak iwan okijo:

—In tlakaj mach weli kichiwaj, pero Dios nochi weli kichiwa.

²⁸ Pedro opéj kilwia in Jesúś:

—Tejwan otikajkej nochi tlan otikpiayaj para tiaskej mowan.

²⁹ Jesúś okijo:

—Ipan melajka namechilwia, nochtin akinmej okikajkej inkal, ikniwan, inpapan, inmaman, insiwa, inpilwan o noso intlal por Nej iwan por yen kuale tlajtole katlej temakixtia, ³⁰ kajsiskej axan itech yin tiempo sien buelta okachi de inkalwan, ikniwan, inmaman, inkonewan iwan intlalwan maski kintlatlalochtiskej. Pero itech nekáj tiempo katlej witz

satepan kipiaskej in nemilistle katlej mach keman tlamis.
31 Pero miekej katlej axan weyikistokey (weyititokey), satepan mach ok weyikistoskej. Iwan miekej katlej axan mach weyikistokey, satepan weyikistoskej.

*Jesús okitematiltij de imikilis ya eyi buelta
(Mt. 20:17-19; Lc. 18:31-34)*

32 Oyayaj para weyikan de Jerusalén, iwan Jesús otlayekanaya. Imomachtijkawan sa otlajtlachiayaj (omoma-jmawtiayaj) iwan oyayaj tlakuitlapan ika nemajmawtile. Ijkuakón Jesús okinnotzke in majtlakte iwan omen imomachtijkawan, iwan opéj kinmilwia tlan mochiwas in Yej.
33 Jesús okinmilwij:

—Xikkakikan. Ma tiwian para weyikan de Jerusalén kan Nej katlej onimochij nitlakatl nechtemaktiskej (nechtemaktiliskej) inmak in tlayekankej tiopixkej iwan inmak in tlamachtijkej de itech tlanawatile de Moisés. Yejwan nechtlajtakoltiskej para ma nechmiktikan, iwan nechtemaktiskej inmak in tlakaj katlej mach judiojtin.
34 Nechpijinatiskej, nechwitekiskej, nechchijchijchaskej iwan nechmiktiskej, pero eyi tonale satepan nimoyolkuis (nimoyolitis).

*Jacobo iwan Juan okinekej yejwan okachi tlayekantoskej
(Mt. 20:20-28)*

35 Jacobo iwan Juan, ipilwan Zebedeo, omikuanikey inawak Jesús iwan okilwijkej:

—Tlamachtij, tiknekij xitechchiwili tlan timitzlajtlaniliskej.

36 Yej okinmilwij:

—¿Tlan ankinekj?

37 Yejwan okilwijkej:

—Xitechkawili ma timotlalikan ik monakastlan, se ik moyekma iwan se ik moopochma itech momawisotlanex.

38 Jesús okinnankilij:

—Namejwan mach ankimatiy tlan ankitlajtlanij. ¿Kox welis namejwan ankixikoskej anpanoskej ken tlan Nej nipanos? ¿Kox welis anmokuateekiskej ika tekokojkayotl katlej Nej ika nimokuateekis?

39 Yejwan okijtokey:

—Tiweliskej.

Jesús okinmilwij:

—Ipan melajka namechilwia, satepan namejwan anpanoskej ken Nej nipanos, anmokuateekiskej ika tekokojkayotl katlej Nej ika nimokuateekis. **40** Tla anmotlaliskej ik noyekma o noso ik noopochma, mach Nej nikijtos. Dios kintalis ompa akinmej yokinpejpenke.

⁴¹ Nijuak in oksekimej majtlaktin okikakej, okualankej inawak Jacobo iwan inawak Juan. ⁴² Jesús okinnutzke iwan okinmilwij:

—Namejwan ankimatij akinmej mochiwaj gobiernojtin de se país, tlanawatiaj ika miek tlanawatijkayotl. In tlakaj katlej okachi wejweyikistojej (wejweyititojej), yejwan okachi tlanawatiaj chikawak itech se pueblo. ⁴³ Pero namejwan mach ijkón kipia de yetos, akin kineki weyikistos de yen namejwan, kipia por kinpalewis in oksekimej. ⁴⁴ Akin kineki tlayekantos de yej namejwan, kipia por kintekichiwilis nochtin in oksekimej. ⁴⁵ Porke Nej katlej onimochij nidlakatl mach oniwalaj para ma nechpalewikan, sino oniwalaj para nitepalewis iwan para niktemakas nonemilis, iwan ijkón miekej nikinmakixtis de intlajtlakol.

Jesús okitlachialtij se tlakatl katlej mach otlachiaya

(Mt. 20:29-34; Lc. 18:35-43)

⁴⁶ Satepan Jesús iwan imomachtijkawan oajsitoj itech weyikan de Jericó. Iwan nijuak Jesús iwan imomachtijkawan iwan miekej oksekimej tlakaj yoyayaj de ompa, ikuakón Bartimeo ikone in Timeo, ik ompa oewatoka ipan ojtle omijtlanijtuka porke mach otlachiaya. ⁴⁷ Iwan okikakke nik in Jesús de Nazaret ik ompa panoa, iwan ikuakón okitzatzilij:

—¡Jesús, iKone in David, xinechiknomati!

⁴⁸ Miekej okilwijkej ma mokamatzakua pero yej okachi chikawak otzajtzik:

—¡IKone in David, xinechiknomati!

⁴⁹ Jesús omokuepke iwan okinmilwij:

—¡Xiknotzatij!

Yejwan okinotzatoj iwan okilwijkej:

—¡Ximoketza iwan xipaki, Jesús mitznotza!

⁵⁰ Ikuakón yej okitlamotlak ikoton, omoketewak iwan oyá inawak Jesús. ⁵¹ Jesús okilwij:

—¿Tlan tikneki ma nimitztokti?

Bartimeo okinankilij:

—Tlamachtij, nikneki nitlachias.

⁵² Jesús okilwij:

—Ya welis timuikas. Yotipajtik porke otikneltokak nik welis nimitzpajtis.

Iwan san niman ikuakón ya owelik otlachixke kuale iwan opéj yawi iwan Jesús ipan iojwi.

Jesús okalakke itech weyikan de Jerusalén

(Mt. 21:1-11; Lc. 19:28-40; Jn. 12:12-19)

¹ Oajskoj itech pueblo de Bettagé iwan itech pueblo de Betania iyakapan in Olivostepetl, mach ok wejka de yen weyikan de Jerusalén. Ijkuakón Jesús okintitlanke omen imomachtijkawan. ² Okinmilwij:

—Xiwian itech pueblo katlej kajki tlayakapan, iwan san niman nijuak anmajsitiwej ompa ankitaskej se burro ilpitok katlej mach ya semi akaj ipan tlejko. Xiktotomakan iwan xinechwalwikilikan. ³ Tla akaj anmechilwis: “¿Tlanik ankitotomaj?”, xikilwikan nik in Señor kineki iwan san niman mitzkawili.

⁴ Oyajkej, iwan okajtsajikej in burro ilpitok kaltempan itempan ojtle iwan okitonkej. ⁵ Iwan sekimej katlej ompa oyekaj okinmilwijkej:

—¿Tlanik ankitotomaj yon burro?

⁶ Imomachtijkawan in Jesús okijtojkej ijkón ken Yej okinmilwij, iwan okinkawilijkej ma kiwikakan. ⁷ Tones okiwikakej yon burro kan oyeka in Jesús, iwan okinkentilijkej intlakenwan ipan burro, iwan Jesús ipan otlejkok. ⁸ Miekej tlakaj okisojsojkej intlakenwan ipan ojtle, iwan oksekimej okisojsojkej ixiwyo in kuanmej. ⁹ Nochtin katlej otlayekanaya iwan katlej oyayaj tlakuitlapan otzajtziaj chikawak:

—¡Hosana! ¡Ma Dios kitiochiwa katlej okiwaltitlanke para tlanawatis! ¹⁰ ¡Ma Dios kitiochiwa katlej ya tlanawatis ken otlanawatij in toweyitaj David! ¡Hosana! ¡Ma weyikisto in toTajzin Dios katlej kajki ilwikak!

¹¹ Jesús okalakke itech weyikan de Jerusalén iwan okalakke ijtk in weyi tiopan iwan otlachixke ik nowian (nian nepa). Satepan oyáj inwan majtlakte iwan omen para Betania porke yotiotlakijkej.

*Jesús okajwak in igoskuawitl
(Mt. 21:18-19)*

¹² Ipan oksé tonale, nijuak owalkiskej de Betania, Jesús otiojsij. ¹³ Okitak de wejka se igoskuawitl okipiaya ixiwyo. Omíkuanij inakastlan kuawitl para kitas kox kipia igos, pero mach itlaj okipiaya porke mach ya oyeka itiempo, sino okipiaya san puro ixiwyo. ¹⁴ Ijkuakón Jesús okilwij in igoskuawitl:

—Mach ok keman ok akaj ma kikua motlakilo.

Iwan imomachtijkawan okikakej.

*Jesús okinkixtij in tlanamakakej de ijtk in weyi tiopan
(Mt. 21:12-17; Lc. 19:45-48; Jn. 2:13-22)*

¹⁵ Satepan oksemi oejkokej itech weyikan de Jerusalén. Jesús okalakke ijtk in weyi tiopan iwan opéj kinkixtia in

tlakaj. Okinkixtij in tlanamakakej iwan tlakojkej. Okintlatlamochilij inmesajwan in tominpatlakej iwan okintlatlamochilij insiyajwan in palomasnamakakej.¹⁶ Mach okitekawilij akaj ma kitki itlaj tlanamakte ijtik in weyi tiopan.¹⁷ Okinmachtij okinmilwij:

—Kajki ijkuitlitol: “Nokal kinotzaspakej kale de tiotzajtzilistle para nochin in tlaltikpak.” Pero namejwan ya ankikuepkej se kale de ichtekej.

¹⁸ In tlamachijkej de itlanawatil in Moisés iwan tlayekankej tiopixkej okikakej iwan opéj kitemoaj kenik kimiktiskej. Pero mach oweliaj itlaj okichiwayaj porke okinmiimakasiaj in tlakaj de inpan ma wikikan, porke nochtin sa otlaatlachiayaj (omomajmawtiayaj) iwan okiwelitayaj tlan Jesúś okinmachiaya.¹⁹ Sa tiotlakke Jesúś iwan imomachtijkawan okiskej de Jerusalén.

Igoskuawitlowakke

(Mt. 21:20-22)

²⁰ San kualkan opanokej kan oyeka in igoskuawitl iwan okitakej ya owarekke ik nochin inelwayo.²¹ Pedro okualelnamikke iwan okilwij in Jesúś:

—¡Tlamachtij, xikita! ¡Yowakke in igoskuawitl katlej otikajwak!

²² Jesúś okijtoj:

—Xikpiakan tlaneltokalistle inawak Dios.²³ Ipan melajka namechilwia tla akaj kilwis yin tepetl: “Ximikuani iwan ximotlamotla ijtik atl.” Iwan tla amo kiyeykojtos kox mijkuanis o noso amo mijkuanis, sino kineltokas ika nochin iyoloni mijkuanis, tones ipan melajka in tepetl mijkuanis.²⁴ Por yonik namechilwia, nijuak ankitlajtlaniliskej toTajzin Dios ma amechmaka itlaj tlamentle, moneki xikneltokakan nik melawak amechmakas, iwan ijkón welis ankipiaskej tlan ankitlajtlanij.²⁵ Iwan nijuak anmotiotzajtziliskej, tla amo kuale ankatej iwan akaj, xiktlapoypolwikan para ijkón noijki namoPapan Dios katlej kajki ilwikak ma amechtlapoypolwi de amotlajtlakol.²⁶ Tla namejwan amo antetlapoypolwiaj, Dios noijki mach amechtlapoypolwiaj.

Jesúś okitlajtlanijkej akin okimakak tlanawatijkayotl

(Mt. 21:23-27; Lc. 20:1-8)

²⁷ Oksemi oyajkej itech weyikan de Jerusalén. Mientras onemia ompa kan weyi tiopan, in tlayekankej tiopixkej, in tlamachijkej de itlanawatil in Moisés iwan tlayekankej tetajtzitzintin judiojtin, omijkuanijkej inawak Jesúś.²⁸ Okitlajtlanijkej:

—¿Ika tlan tlanawatijkayotl otikinkixtij in tlanamakakej de ijtit in weyi tiopan? ¿Akin omitzmakak in yon tlanawatijkayotl?

²⁹ Jesúś okinnankilij:

—Nej noiiki namechtatlajtlanis se tlajtole, xinechnankilikan iwan namechilwis ika tlan tlanawatijkayotl nikchiwa. ³⁰ In tlakuateekilistle de Juan Tlakuateekij, ¿yon se tlanawatile de tlakaj o noso de Dios? Xinechnankilikan.

³¹ Yejwan omotlajtlajkej, iwan okimolwijkej:

—Tla tikilwiskej de toTajzin Dios, techilwis: “¿Tlanik mach ankineltokakej?” ³² Pero, mach welis tikilwiskej nik yon tlanawatile de tlakaj.

Yejwan okinmiimakaskej in tlakaj iwan okiyejyekojej amo san kichiwa nochtin inpan mokuepaskej, porke nochtin okineltokayah nik in Juan melawak oyeka se profeta de Dios.

³³ Yejwan okinankilijkej in Jesúś:

—Mach tikmatij.

Toneses in Jesúś noiiki okinmilwij:

—Nej noiiki mach namechilwis akin onechmakak yin tlanawatijkayotl para ijkón ma nikchiwa.

12

In tlatookakej mach kualtin

(Mt. 21:33-46; Lc. 20:9-19)

¹ Jesúś opéj kintlapowia ika ejemplos, okinmilwij:

—Se tlakatl okitookak uvas itlalaj. Okitlatzakuij iwan okichij se tanke kan kipatzkas uvas. Noiiki okichij se torre wejkapan para kimonekuitlawis itlatok. Satepan okinkajtewilij sekimej tekipanojkej ma kimonekuitlawikan iwan omokajkej kimokawiskej tlaatlajko de tlan tlakis, iwan oyáj wejka itech oksé país.

² Níkuak ya kuale para kitekiskej in uvas, iteko in uvasyoj okititlanke se itekipanoj innawak in yonmej tekipanojkej, para ma kikuiti tlan kitokaroa. ³ In tekipanojkej okikitckijkej iwan okimagakej iwan okikuepkej san ijki. ⁴ Toneses iteko yon uvasyoj okititlanke oksé itekipanoj, iwan tekipanojkej okikuatlajtlapankej ika tetl, iwan okilwijkej san tlan amo. ⁵ Iteko yon uvasyoj okititlanke oksé itekipanoj, iwan tekipanojkej okimiktijkej. Iwan miekej oksekimej okintitlanke, sekimej okinmagakej iwan oksekimej okinmiktijkej.

⁶ 'Omokaj sa yen itelpoch, san yej se itlasojkone, okititlanke iwan okimolwij: “Komo notelpoch, kitlakitaskej.”

⁷ In tekipanojkej okimolwijkej: “Yin itelpoch kimokawis nochí níkuak in tetaj mikis, ma tigmiktikan iwan tejwan

tikmokawiskej nochí.”⁸ Okikitzkijek iwan okimiktijkej ompa itlalaj iwan okikixtijkej okitlamotlatoj.

⁹ Ijkuakón Jesúś okintlajtlanij:

—¿Tlan kichiwas iteko de yon uvasyoj? Witz iwan kinmiktis in tekipanojkej mach kualtin. Satepan in uvasyoj kinmactilis oksekimej tekipanojkej.

¹⁰ ’¿Amo ankilerajoj itlajtol in toTajtzin Dios tlanon kijta? Sekan ijkin kijta:

In tetl katlej in kalchijkej mach okixitakej,
omokuepke yen tetl katlej okachi kichikajtok in kale.

¹¹ Yin tetl owalaj de yen toSeñor iwan tikitaj sa tekitl kuakualtzin.

¹² Ijkuakón okinekiaj kitzakuanij in Jesúś, porke okimakakej kuenta nik okinmixnamikke ika yon ejemplo. Iwan komo ompa oyekaj miekej tlakaj, mach ok itlaj okijtojkej, mejor oyajkej.

*Kox se kitlaxtlawas impuestos para César
(Mt. 22:15-22; Lc. 20:20-26)*

¹³ In fariseos iwan sekimej itekipanojkawan in Herodes oyajkej kan Jesúś oyeka. Okitemoliayaj kanaj se tlajtole tlan ika kualtis kitilwiskej. ¹⁴ Omijkuanijkej inawak Jesúś iwan okilwijkej:

—Tlamachtij, tikmatokej nik in tejwatzin tikipta tlan melawak, mach timotekawilia ma mitzkajkayawakan in tlakaj, mach tikita akin tejwan kox tirikojtin o noso tipobrestin. Tej titlamachtia ipan melajka kenik se nemis ken Dios kimonekiltia. ¿Kox kuale se kitlaxtlawas impuestos para César o noso amo? ¿Tiktlaxtlawaskej o noso amo tiktlaxtlawaskej?

¹⁵ Pero Jesúś yokimatia nik san teixkajkayajkej, iwan okinmilwij:

—¿Tlanik ankinekij annechmayawiskej ika itlaj tlajtole? Xinechwalkuilikan se tomin ma nikita.

¹⁶ Nijuak okimakakej se tomin, ijkuakón okintlajtlanij:

—¿De akin ixko yin iwan de akin itoka katlej nian ijkuilitok? Iwan yejwan okilwijkej:

—De César.

¹⁷ Ijkuakón Jesúś okinmilwij:

—Xikmakakan in César tlan de yen César, iwan xikmakakan Dios tlan de yen Dios.

Iwan yejwan sa otlajtlachixkej (omomajmawtijkej) de kenik okinnankilij.

*Okitlajtlanijkej in Jesúś kox moyolkuiskej in mikkamej
(Mt. 22:23-33; Lc. 20:27-40)*

¹⁸ Satepan ovalajkej sekimej saduceos katlej kijtaj mach melawak moyolkuiskej (moyolitiskej) in mikkamej. Por yonik okitlajtlanijkej in Jesús, okijtojkej:

¹⁹ —Tlamachtij, Moisés otechkajtewilij ikuilitok, tla se tlakatl omonamiktij, miki iwan mach okinpixke ikonewan iwan isiwa, in ikni in difunto kipia de monamiktis iwan viuda para kinpialis ikonewan ipatka in difunto. ²⁰ Semi oyekaj, chikomen iknimej. In tetiachka achtoj omonamiktij pero omikke iwan mach okinpixke ikonewan. ²¹ Tones katlej kiwaltoka omonamiktij iwan viuda, pero yej noijki omikke iwan mach okinpixke ikonewan. No ijkón opanok in oksé katlej kiwaltoka. ²² Iwan nochtin in chikomen iknimej ijkón opanokej, iwan nion se mach okipixke ikone. Satepan noijki omikke in siwatl. ²³ Nijuak nochtin moyolkuiskej (moyolitiskej), iwan ya yolitoskej, ¿katlij yej de yejwan yetos isiwa? Porke san ken nochtin iknimej omonamiktijkej iwan yon siwatl.

²⁴ Jesús okinnankilij:

—Namejwan mach ompa tlan ankijtaj, porke mach ankimomakaj kuenta de yen tiotlajkuilole iwan nion de yen ipoder in Dios. ²⁵ Porke nijuak in mikkamej moyolkuiskej (moyolitiskej), in tlakaj iwan siwamej mach monamiktiskej, yejwan yeskej ken angelestín ken katlej katej ilwikak. ²⁶ Komo ya timotlapowijtokej de yen mikkamej moyolkuiskej, ¿amo ankileroaj in libro de Moisés, kan tlapoa de se kuatlanwitztle katlej otlatlaya? Dios okilwij in Moisés: “Nej niDios de Abraham, de Isaac iwan de Jacob katlej yolitokej nowan.” ²⁷ ¡In Dios, mach Dios de mikkamej, sino de katlej yolitokej! Melawak nik mach ompa tlan ankijtaj namejwan.

Itlanawatil in toTajtzin Dios katlej okachi kuale

(Mt. 22:34-40)

²⁸ Se tlamachtij itech tlanawatile de Moisés omijkuanij, okinkakke omotlatlajtolkuepayaj iwan okikakke nik Jesús kuale otlanankilij. Ijkuakón okitlajtlanij in Jesús:

—¿Katlij yen tlanawatile okachi importante de nochtin?

²⁹ Jesús okinankilij:

—In tlanawatile katlej okachi importante yen yin: “Xikkaki, Israel, in Señor toTeko, yen toDios, san Yej se Señor onkaj. ³⁰ Xiktlasojtla in Señor moDios ika nochí moyolo, ika nochí moanima, ika nochí motlalnamikilis iwan ika nochí mochikawalis.” ³¹ Oksé tlanawatile katlej ikniyo yen yin: “Xiktlasojtla in mokni ken tej timotlasojtla.” Mach katej oksekimej tlanawatiltin okachi ken yinmej omen.

³² Iwan tlamachtij itech tlanawatile de Moisés okilwij:

—Kuale kajki, Tlamachtij. Melawak tlan tikipta. Onkaj san se Dios, iwan mach onkaj oksé ken Yej.³³ Iwan moneki tiktlasojtlaskej in Dios ika noch toyolo, ika noch totlalnamikilis iwan ika noch tochikawalis. Iwan moneki tikintlasojtlaskej oksekimej ken tejwan timotlasojtlaj, yon okachi kuale iwan amo ken nochtin in yolkamej katlej tikinmiktiaj iwan tikinchichinoaj ipan artal katlej tikinmakaj kej se tlamanale in toTajtzin Dios.

³⁴ Jesúz komo okitak in tlamachtij itech tlanawatile de Moisés otlanankiliij ika kuale itzontekon, okilwij:

—Mach tikaj wejka para tikalakis kan Dios tlanawatia. Iwan mach ok akaj omixewij okitlajtlanij ok itlaj.

¿De akin ikone in Cristo?

(Mt. 22:41-46; Lc. 20:41-44)

³⁵ Jesúz oksemi otlamachtijtoka ompa ijtk weyi tiopan iwan okijtoj:

—¿Tlanik in tlamachtijkej de itlanawatil in Moisés kijtaj ke in Cristo yen ikone in David?³⁶ Porke in Espíritu Santo okitlajtoltij in David iwan inewian in David okijtoj:

In toTajtzin Dios okilwij in noSeñor yin tlajtole:

“Ximotlali ik noyekma,
asta ikuak Nej nimitztlalis
titlayekanke de yejwan katlej mitzkokoliaj.”

³⁷ ¿Ankineltokaj namejwan nik in David kilwiani ikone noSeñor?

Ompa oyekaj sa tekitl miekej tlakaj iwan okikakiaj in Jesúz ika pakilstle.

Jesúz okijtoj mach kuale tlan okichiwayaj in tlamachtijkej de itlanawatil in Moisés

(Mt. 23:1-36; Lc. 11:37-54; 20:45-47)

³⁸ Jesúz itech itlamachtil okijtoaya:

—Xikpiakan kuidado de yen tlamachtijkej de itlanawatil in Moisés, kiwelitaj nemiskej ika kuajkuale intlaken weweyak, iwan kinekij ma kinyektlajpalokan nikuak nemij itech tiankistle.³⁹ Yejwan noijki kiwelitaj motlaliskej itech tiopanmej asta tlakapan kan okachi kuale lugar, iwan itech se ilwitl noijki kitemoaj katlej okachi kuale lugar kan tlakuaskej.⁴⁰ Iwan kinnekatktiaj in viudajtin ma kitemakakan asta tlan amo kipiaj, iwan tlaixkajkayawaj motiotzajtziliaj sa tekitl. Yonmej kitlaxtlawaskej okachi weyi tlajtlakole.

In viuda katlej okitemakak noch tlan okipiaya

(Lc. 21:1-4)

⁴¹ Jesúz oewatoka iyakapan kaja kan konkajkawaj in tomin para in weyi tiopan. Jesúz okonimitoka in tlakaj kenik

okonkajkawayaj in tomin ijtk in kaja. Miekej katlej okimopialaiyaj okonkajkawayaj okachi miek tomin.⁴² Ijkuakón oejkok se viuda pobre, okoninkajkaj ome tominmej de cobre katlej mach okachi itlaj ipatij.⁴³ Ijkuakón Jesú斯 okinnotzke imomachtijkawan iwan okinmilwij:

—Ipan melajka namechilwia, nik in yin viuda pobre, okonkajkaj okachi miek ke nochtin oksekimej katlej okonkajkajej intomin ijtk kaja.⁴⁴ Porke nochtin okonkajkajej katlej kinsobraroa porke kipiaj tomin, pero yin viuda pobre okonkajkaj nochí tlan okipiaya tlan ika motlamakani.

13

Jesú斯 okijtoj in weyi tiopan xitinis

(Mt. 24:1-2; Lc. 21:5-6)

1 Nijkuak Jesú斯 okiske de ijtk in weyi tiopan, se de yen imomachtijkaw okijtoj:

—¡Tlamachtij! Xikinmita in yinmej kuajkualtin temej iwan kuajkualtin kalmej.

² Jesú斯 okilwij:

—¿Tikinmita nochtin yinmej kuajkualtin kalmej? Satepan nochtin xitiniskej, mach ok mokawas nion oksé tetl pepechitos ipan oksé tetl.

Ijkín tlapanos antes de tlamis in tlaltikpak

(Mt. 24:3-28; Lc. 21:7-24; 17:22-24)

³ Satepan Jesú斯 iwan imomachtijkawan oyajkej ipan Olivostepetl, katlej kajki iyakapan weyi tiopan. Iwan nijkuak Jesú斯 ompa yoewatoka, ijkuakón Pedro, Jacobo, Juan iwan Andrés okitlajtlanijkej in Jesúsan ichtaka:

⁴ —Xitechilwi, ¿kemanian tlapanos iwan katlij yen tikchiaskej kej señas iwan kemanian tlapanos de yen tlán tikijta?

⁵ Iwan Jesúś opéj kinmilwia:

—Xikpiakan kuidado, amakaj ma amechkajkayawa.

⁶ Miekej witzej ika notoka kijtoskej: “Nej niCristo.” Iwan miekej kinkajkayawaskej.

⁷ Nijkuak namejwan ankikakiskej nik onkaj guerra o noso motlapowiskej yetos guerra, amo ximomawtikan ijkón kipia de tlapanos pero mach ya tlamis in tlaltikpak.⁸ Porke se país momagas iwan oksé país, iwan se pueblo momagas iwan oksé pueblo. Tlalolinis chikawak miek lado iwan yetos apostle. Yon yakin se ik pewas de itech tekokojkayotl ken se siwatl nijkuak yoajsik ora para kitlakatilis ikone.

⁹ Namejwan ximotlachilikan porke anmechtemaktiskej (omechtemaktiliskej) inmak tekiwajkej iwan anmechwitekiskej itech tiopanmej. Anmechwikaskej inmak gobernadortin iwan inmak reytin por yen notlajtol,

iwan ompa inmixpan namejwan welis antetlapowiskej de Nej.¹⁰ Pero achtoj moneki ma motematilti notlajtol katlej temakixtia itech noch i tlaltikpak.¹¹ Amo ximotekipachokan por tlan ankijtoskej nikuak amechtemaktiskej inmak tekiwajkej, ikuakón xtlajtokan, porke mach amejwan antlajtoskej, sino yen Espíritu Santo katlej tlajtos.¹² In teikni kitemaktis ikni ma kimiktikan, in tetaj kitemaktis ikone ma kimiktikan, in tepilwan inpan mokuepaskej in tetajmej iwan kintemaktiskej para ma kinmiktikan.¹³ Nochtin amechkokoliskej por Nej, pero akin kixikos noch i panos, Dios kimakixtis.

¹⁴ 'Nikuak ankitaskej itlaj bierotik moketos itech weyi tiopan, kan mach kipia de ompa yetos, ikuakón katlej yeskej Judea, ma cholokan asta ipan tepemej. (Akin kineki kimo-makas kuenta, ma kilero itlajkuillol in Daniel.)¹⁵ Iwan akin yetos ipan ikal amo ma temo ma kixtiti itlaj.¹⁶ Iwan akin yetos itlalaj amo ma mokuepa ichan para ma kikuiti itzotzol.¹⁷ ¡Pobrestin in siwamej katlej itech yonmej tonaltin kipi-askej inkone intlalaxko iwan katlej yeskej selikkonewajkej!¹⁸ Xiklatlawtikan Dios de mach ma tlapano nikuak sewa.¹⁹ Porke itech yonmej tonaltin yetos weyi tekokojkayotl, ken mach semi ijkón tlamochiwa desde ikuak opéj in tlaltikpak katlej Dios okichij, iwan nion mach oksemi ijkón tlamochiwas satepan.²⁰ Iwan tla in Señor amo kitzikitziniliani in yonmej tonaltin mach akaj mopalewiani. Pero yokitzikitzinilij por yejwan katlej kintlasojtla katlej Yej yokinpejpenke.

²¹ 'Ikuakón tla akaj amechilwis: "Xikitakan nian kajki in Cristo", o noso "Xikitakan nepa kajki", amo xikneltokakan.²² Monextiskej Cristojtin iwan profetajtin tekajkayajkej, iwan kinchiwaskej señaleston iwan milagrostin para ika tlakajkayawaskej, iwan kinekiskej kinkajkayawaskej noijki katlej Dios yokinpejpenke.²³ ¡Ximotlachilikan! Nej yonamechilwij antes de tlamochiwas.

*Jesús walmokuepas oksemi
(Mt. 24:29-35, 42-44; Lc. 21:25-36)*

²⁴ 'Satepan de itech nekatej tonaltin, nikuak noch i yotlapanok de yen weyi tekokojkayotl, in tonale tlanexosewis, in metztle sewis, mach ok metztonas.²⁵ In sitlaltin wetziskej de ilwikak iwan chikawalistin katlej katej ilwikak papatlakaskej (bibiokaskej).²⁶ Ikuakón in tlakaj nechitaskej Nej katlej onimochij nitlakatl niwitz ijlik mixtle ika miek nopoder iwan ika weyi nomawisotlanex.²⁷ Iwan ikuakón nikinwalinti-tlanis noangelwan iwan kinmololoskej in tlakaj katlej Nej yonikinpejpenke de ik nian nepa itech noch i tlaltikpak.

²⁸ 'Xikmomakakan kuenta in ejemplo de yen igoskuawitl: Níjkuak pewa moselialtia imamayo iwan pewa moxiwyotia, namejwan ya ankimatiij nik ya pewas in tiempo de tlaxiwyoas. ²⁹ No ijkón níjkuak ankitaskej ya pewas tlapanos itech in yonmej nemajmawtiltin, ijkuaokón noijki xikmatikan nik in Nej katlej onimochij nitlakatl ya niwalkistiwitx itech puerta. ³⁰ Ipan melajka namechilwia, nochi yin tlapanos antes de mikiskej in tlakaj de yin tiempo. ³¹ In ilwikak iwan yin tlaltikpak mach ok yetoskej, pojpoliwiwskiej, pero notlajtol mach pojpoliwiw, sino kipia de mochiwas.

Mach akaj kimati tlan tonale walmokuepas in Jesús

³² 'Mach akaj kimati tlan tonale iwan tlan ora níjkuak niwalmokuepas, nion yejwan angelestín de ilwikak mach kimatiij, nion Nej niiKone in Dios no mach nikmati, san yen noPapan Dios kimati.

³³ 'Por yonik, xijsatokan, xitlachixtokan iwan ximotiotzatzilijtokan, porke mach ankimatiij kemanian ajsiki in yon tonale. ³⁴ Yon kej yeskia se tlakatl oyáj de viaje, okinkajtwilij itekipanojkawan ma kimonekuitlawikan in kale, kada se okikajtwilij itekiwi, iwan se okinawatij ma tlachixto. ³⁵ Ijkón kiné, namejwan xitlachixtokan porke mach ankimatiij kemanian ejkoki iteko in kale, kox tiotlakke, o noso tlajkoyuak, o noso ijkuaak waltzajtzis in kaxtil, o noso ijkuaak walanesis. ³⁶ Amo san kichiwa onkisaki iwan anmechajsiki ankochtokej. ³⁷ Tlan namechilwia namejwan, noijki níkinmilwia nochtin: Xitlachixtokan.

14

Okitemojkej kenik kimiktiskej in Jesús

(Mt. 26:1-5; Lc. 22:1-2; Jn. 11:45-53)

¹ Sa ome tonale opoliwia para ilwtl de pascua níjkuak mokua in pan katlej mach kipia levadura. In saduceos iwan tlamachtijkej de itlanawatil in Moisés, okitemoliayaj in Jesús kenik welis kikitziskej ika tlakajkayawalistle iwan ijkón kimiktiskej. ² Pero okimolwiayaj:

—Mach tikitziskej itech ilwtl para amo kualaniskej in tlakaj iwan yomoniskej.

Se siwatl okiteekiliij ajwiakayotl in Jesús ipan itzontekón

(Mt. 26:6-13; Jn. 12:1-8)

³ Jesús oyeka itech pueblo de Betania ichan Simón katlej okipiaya se kokolistle, katlej opalania inakayo. Jesús ijkuaokón oewatoka itech mesa, oejkok se siwatl kiwalkui se boteyajtzin de alabastro tentok de ajwiakayotl de nardo katlej kuale iwan patíoj, okitlapanke in boteyajtzin iwan okiteekiliij in

ajwiakayotl ipan itzontekon in Jesús. ⁴ Sekimej katlej ompa oyekaj okualankej iwan okimolwiayaj:

—¿Tlanik san okawiltij in ajwiakayotl? ⁵ Welini monamakaní patíoj ken tlan kitlani se tlakatl katlej tlapalewia de se xiwitl, iwan se kinmakaskia in tomin katlej pobrestin.

Iwan okajwakej chikawak in yon siwatl. ⁶ Jesús okijtoj:

—Xikkawakan, ¿tlanik ankajwaj? Yej kuale tlan onechtoktij. ⁷ In pobrestin nochipa ankinpiaskej iwan welis ankipalewiskej san keman ankinekiskej, pero Nej mach nochipa annechpiaskej. ⁸ Yin siwatl okichij tlan owelik. Yonecha-jwialij para ikuak nimotookas. ⁹ Ipan melajka namechilwia ke nian nepa ixko yin tlaltikpak, kan motematiltis in tlajtole katlej temakixtia, noijki motematiltis tlan okichij in yin siwatl iwan ijkón se kelnamikis.

Judas okitemaktij (okitemaktilij) in Jesús

(Mt. 26:14-16; Lc. 22:3-6)

¹⁰ Judas Iscariote, se de yen majtlakte iwan omen, oyáj okinmitato in tlayekankej tiopixkej para kinmaktilis in Jesús.

¹¹ San niman nikuak okikakej, opakej iwan okilwijkej kimakaskej tomin in Judas. Ijkón yej okitemoaya keman okachi kuale para kinmaktilis in Jesús.

Tiotlakantlakuale de toSeñor

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Nikuak opéj ilwítl de pascua yakin se tonale, nikuak mokua in pan katlej mach kipia levadura, nikuak noijki okimikiayaj in ichkatzin de pascua, in momachtijkej okitlatlaniijkej in Jesús:

—¿Kan tikneki ma tikyektlalitij in tiotlakantlakuale de pascua?

¹³ Ikuakón okintitlanke omen imomachtijkawan okinmilwij:

—Xiwian itech pueblo, ompa ankajsiwej se tlakatl katlej kitki iatekon. Xiwian iwan. ¹⁴ Iwan kan ajsiti ompa xiktlajtlanikan iteko in kale: “In Tlamachtij tlajtlani: ¿Katlij yen kuarto kan nikuas in tiotlakantlakuale de pascua inwan nomomachtijkawan?” ¹⁵ Yej amechititis se kuarto weyi katlej kajki ajkopan iwan ya tlayektlalitok. Ompa xikchiwakan in tiotlakantlakuale de pascua.

¹⁶ In momachtijkej okiskej iwan oyajkej itech pueblo. Okajsitaisikej nochí ken Jesús okinmilwij iwan okichijkej in tiotlakantlakuale de pascua.

¹⁷ Nikuak owaltlatleyuak, Jesús iwan majtlakte iwan omen imomachtijkawan oejkokej kalijtik. ¹⁸ Nikuak otlakua-jtokaj ipan mesa, Jesús okinmilwij:

—Ipan melajka namechilwia, nik se de amejwan katlej nian nowan tlakuajtok, nechtemaktis (nechtemaktilis).

¹⁹ Yejwan omoyolkokojkej iwan opéj kitlajtlaniaj se por se:

—¿Kox nej?

²⁰ Jesús okinmilwij:

—Se de yen namejwan anmajtlakin iwan amomen, katlej kajakia ipan ijistik in plato kan Nej noiji nikajakia. ²¹ Nej katlej onimochij nitlakatl nipanos ijkón ken kijta in tiotlajkuilole, pero ipobre akin nechtemaktis (nechtemaktilis)! Mejor amo tlakatini.

²² Nijuak otlakuajtokaj, in Jesús okitilanke in pan iwan omotlasojkamatke inawak Dios. Okipojpostekke in pan iwan okinmajmakak imomachtijkawan, iwan Jesús okijtoj:

—Xikuakan, yin yen notlalnakayo.

²³ Ijkuakón okitilanke in kopa iwan omotlasojkamatke inawak Dios, satepan okinpanoltilij imomachtijkawan iwan nocthin okonikej. ²⁴ Okinmilwij:

—Yin yen noeso, katlej yankuik akuerdo inawak Dios, katlej toyawis para miekej. ²⁵ Ipan melajka namechilwia, ke mach ok nikonis iayo uvas asta itech nekáj tonale nikuak nikonis iayo uvas yankuik katlej onkaj kan Dios tlanawatia.

Pedro okijtoj mach kixmati in Jesús

(Mt. 26:30-35; Lc. 22:31-34; Jn. 13:36-38)

²⁶ Satepan de okitlakuikakej se tiotlakuijate, oyajkej ipan Olivostepetl. ²⁷ Ijkuakón Jesús okinmilwij:

—Namejwan aminochtin annechkajtewaskej noselti, porke kajki ijkuitilitok kijta: “Nikmiktis in tlajpixke iwan ichkamej xixiniskej.” ²⁸ Satepan de ijkuak nimoyolkuis (nimoyolitis), namechyekanas ik estado de Galilea.

²⁹ Pedro okijtoj:

—Maski nocthin ma mitzkajtewakan, nej mach nimitzkawas.

³⁰ Jesús okilwij:

—Ipan melajka, yin yuak antes de tzajtzis in kaxtil ome buelta, tej ijkuakón yotikijtoj ya eyi buelta nik mach tinechixmati.

³¹ Pedro okachi omochijchikawayá:

—Maski mowan ma nechmiktikan, nej mach keman nimitzkawas.

Iwan nocthin ijkón okijtokej.

Jesús omotiotzajtzilij kan tlatokkuawyoj itoka Getsemani

(Mt. 26:36-46; Lc. 22:39-46)

³² Satepan oyajkej ik tlatokkuawyoj kan kilwaj Getsemani, iwan Jesús okinmilwij imomachtijkawan:

—Ximotlalikan nian mientras Nej niawi nimotiotzajtziliti.

³³ Okinwikak in Pedro, Jacobo iwan Juan, iwan opéj moyolkokoa iwan opéj mosentiroa sa tekitl. ³⁴ Okinmilwij:

—Nikmachilia itech noanima ya niixpoliwi de neyolkokole. Nian ximokawakan iwan xiijsatokan.

³⁵ Oyáj achitzin ik tlayakapan, ompa omotlankuaketzke asta okitennamikke in tlale. Iwan okimotlatlawtilij in Dios, tla kualtini, amo ma kawili ma pano tekokojkayotl itech nekáj ora. ³⁶ Itech itiotzajtzilis okijtoj:

—Abba, Papan, tejwatzin nochí tiweli tikchiwa, xinechkixtili yin tekokojkayotl, pero amo ma mochiwa ken Nej nikneki, sino ken tejwatzin tigmonekiltia.

³⁷ Satepan omokuepke kan oyekaj eyin imomachtijkawan iwan okinmajsito kochtokej, iwan okilwij in Pedro:

—Simón, ¿tikochi? ¿Amo otikxikoj tuijsatok nion se ora?

³⁸ Xiijsatokan iwan ximotiotzajtzilijtokan, para amo ma amechmayawi in tlajtlakole, namoespíritu kineki kichiwas tlan kuale, pero namotlalnakayo mach tlaxikoa.

³⁹ Jesús oyáj oksemi omotiotzajtzilito iwan oksemi okijtoj tlan achtoj yokijtoj. ⁴⁰ Nijuak omokuepato, oksemi okinmitajsik kochtokej porke inpan omopachoj in kochilistle. Iwan mach ok okimatiaj tlan kijtoskej. ⁴¹ Nijuak omokuepato ya eyi buelta, okinmilwij:

—¿Ankiseguiroaj anmosewiaj iwan ankochij? ¡Xiijsakan! Yoajsk ora, porke Nej katlej onimochij nitlakatl ya nechtemaktiskej (nechtemaktiliskej) inmak in tlakaj tlajtlakolejkej.

⁴² ¡Ximewakan ma tiwian! Xikitakan, ya ompa witz katlej nechtemaktis.

Jesús okikitzkijkej

(Mt. 26:47-56; Lc. 22:47-53; Jn. 18:2-11)

⁴³ Jesús ok otlapojtoka iwan ikuakón oejkok in Judas, se de yen majtlakte iwan omen imomachtijkawan, kualinwika miekej tlakaj kiwalkuij espada iwan kiwalkuij kuawitl. In yonmej tlakaj okualintitlankej in tlayekankej tiopixkej, in tlamachtijkej de itlanawatil in Moisés iwan tlayekankej tetatzitzintin. ⁴⁴ Iwan Judas antes de kitemaktis (kitemaktilis) in Jesús, ijkín okinmilwij in tlakaj:

—Akin nej nikixpipitzos yen yon Jesús, xikitzkikan kuale iwan xikwikakan.

⁴⁵ Niman nijuak oejkok in Judas, omikuani inawak Jesús iwan okilwij:

—¡Tlamachtij!

Iwan ikuakón okixpipitzoj. ⁴⁶ San niman ikuakón omikuani jkej in tlakaj iwan okitzkijkej in Jesús. ⁴⁷ Pero se imomachtijkaw in Jesús okikixtij iespada iwan okinakastzon-tekke itekipanoj in weyi tiopixke. ⁴⁸ Iwan Jesús okinmilwij:

—¿Tlanik anwalajkej annechkitzkikoj ika espada iwan ika kuawitl? Mach niichtekke. ⁴⁹ Nochipa onieka amowan itech in weyi tiopan onitlamachtijtoka iwan mach keman annechkitzkijkej. Pero ijkín nipanoa para ma mochiwa tlan kijta in tiotlajkuilole.

⁵⁰ Nochtin imomachtijkawan ochocholojkej iwan okikajtejkej iselti in Jesús.

⁵¹ Se telpochtle ompa oyaya otlakentitiaya san ika se sábana katlej kuale, pero nikuak okitzkijkej, ⁵² oxomolkopinke iwan ocholoj sa xitlatztk.

Jesús okiwikakej kan tlaixkomakaj (tlatzonmanaj)
(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Okiwikakej in Jesús imak in weyi tiopixke, iwan omololokej in tlayekankej tiopixkej, in tlayekankej tetajtzitzintin iwan tlamachtijkej de itlanawatil in Moisés. ⁵⁴ Pedro oyaya san wejka iwan omokaj kan patio de yen ichan in weyi tiopixke, iwan ompa omotlalij omototonijtoka itech tlikuile inwan sekimej tlamonekuitlawijkej de ompa.

⁵⁵ In tlayekankej tiopixkej iwan nochtin katlej tlatlanawatiijkej tlaixkomakakej (tlatzonmankej), okistlakawiayaj ika san tlan amo, tlan ika welis kimayawiskej in Jesús iwan ijkón kualtis kimiktiskej, pero mach itlaj okajxiliayaj. ⁵⁶ Miekej okijtoijkej tlan amo melawak (tlen amo ijkón). Sekimej okijtoayaj se tlamantle iwan oksekimej okijtoayaj oksé tlamantle. ⁵⁷ Sekimej tlakaj mach kualtin omoketzkej iwan okistlakawiijkej in Jesús okijtoijkej:

⁵⁸ —Tejwan otikkakej okijtoj: “Nikxitinis yin weyi tiopan katlej okichijkej in tlakaj, iwan san ika eyi tonale nikkewaltis oksé katlej mach akaj tlakatl kichiwas.”

⁵⁹ Maski ijkón okijtoayaj mach oajsiaj san se tlajtote.

⁶⁰ Ijkuakón omoketzke tlatlajko in weyi tiopixke iwan okitlajtlanij in Jesús:

—¿Amitlaj tikijtos de tlan yinmej mitzistlakawiaj?

⁶¹ Jesúz mach otlanankilij. Iwan in weyi tiopixke oksemi okitlajtlanij:

—¿Yen tej tiCristo titeKone de Dios katlej tikweyitenewaj?

⁶² Jesúz okinankilij in weyi tiopixke:

—Aján, yen Nej, iwan namejwan annechitaskej Nej katlej onimochij nitlakatl niewatos ik iyekma in Dios katlej kipia weyi ipoder, iwan namejwan annechitaskej niwitz de il-wikak ijtk mixtle.

⁶³ Iwan in weyi tiopixke omotlakentzayanke iwan okijtoj:

—¿Tlan para moneki okachi ankistlakawiskej? ⁶⁴ ¡Namejwan ya ankikakej nik otlajtoj kej yeskia yen Dios! ¿Tlan ankijtaj?

Nochtin okijtojkej nik tlajtlakolej iwan moneki ma kimiktikan. ⁶⁵ Sekimej opéj kichijchijchaj, okixilpiayaj iwan okimaitemayaj, iwan okilwiayaj:

—¡Tla xitlajto (xikadibinaro), akin omitzmaak!
Iwan mayoltin noijki okixtlajtlatziniaya.

Pedro okijtoj mach kixmati in Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedro oyeka tlatlampa kan patio, iwan ik ompa opanok se siwatl itlapalewij in weyi tiopixke. ⁶⁷ Nijuak okitak in pedro mototonijtok, omoketzke iwan okitlatak, iwan okijto:

—Tej noijki otinemia iwan Jesús de pueblo de Nazaret.

⁶⁸ Pedro mach okimokuitij iwan okijto:

—Mach nikixmati iwan nion mach nikmati tlan tikipta.

Iwan okiske ik kalan iwan ijkuakón otzajtzik in kaxtil.

⁶⁹ In tlapalewijkasiwatl, oksemi okitak in Pedro iwan opéj kinmilwia katlej ompa oyekaj:

—Yin se de yejwan.

⁷⁰ Pedro oksemi mach okimokuitij. Ok achitzin satepan, katlej ompa oyekaj oksemi okilwijkej in Pedro:

—Ipan melajka, tej se de yejwan, porke in tej noijki de estado de Galilea.

⁷¹ Ijkuakón Pedro opéj tlawikaltia iwan okijto nik in Dios tlachixtok nik melawak tlan kijta. Okijto:

—Mach nikixmati yon tlakatl katlej namejwan ankite-newaj.

⁷² Ijkuakón in kaxtil otzajtzik oksemi. Pedro ijkuakón okelnamikke tlan achtoj okilwijka in Jesús: “Antes de tzajtzis in kaxtil ome buelta, tej ijkuakón yotikijto ya eyi buelta nik mach tinechixmati.” Iwan ochokak sa tekitl.

15

Jesús okiwikakej inawak Pilato

(Mt. 27:1-2, 11-14; Lc. 23:1-5; Jn. 18:28-38)

¹ San kualkan, omololojkej katlej tlayekantokej tiopixkej, in tlayekankej tetajtzitzintin, in tlamachtijkej de itlanawatil in Moisés iwan nochtin de yen junta, okiwikakej in Jesús ilpitiw okimaktilitoj in Pilato. ² In Pilato okitlajtlanij:

—¿Yen tej tiRey de judiojtin?

Jesús okilwij:

—Ijkón ken tej yotikijto.

³ Iwan katlej tlayekantokej tiopixkej okistlakawiayaj de miek tlamantle. ⁴ Pilato oksemi okitlajtlanij:

—¿Mach itlaj tikiitos de nochí tlan mitzistlakawiaj?

⁵ Jesús mach itlaj okijtoj. In Pilato sa otlajtlachixke (omomajmawtij) por amo otlanankilij in Jesús.

*Jesús okitemaktijkej (okitemaktilijkej) para ma kimiktikan
(Mt. 27:15-31; Lc. 23:13-25; Jn. 18:38-19:16)*

⁶ Nochi xiwitl itech ilwitzl, Pilato okikajkawaya se de yen katlej tzaktokej san katlij yej okitlajtlaniliayaj ma kikajkawa. ⁷ Se tlakatl itoka Barrabás otzaktoka inwan itemktijikniwan, yonmej otemktijkej itech se pleito inawak gobieno. ⁸ Iwan miekej tlakaj omololojkej inawak Pilato iwan okilwijkej ma kichiwa ken nochi xiwitl kichiwa. ⁹ Pilato okinnankilil:

—¿Ankinekij ma nikajkawa yen Rey de judiojtin?

¹⁰ Pilato okimatia nik in tlayekankej tiopixkej okitemaktijkej (okitemaktilijkej) in Jesús porke itech omoxikoayaj. ¹¹ Pero in tlayekankej tiopixkej okintlatlalwijkej in tlakaj para ma kilwikan in Pilato okachi kuale ma kikajkawa yen Barrabás. ¹² Pilato okintlatlaniy oksemi:

—¿Tlan ankinekij ma nikchiwa iwan yin tlakatl katlej ankiliwiaj Rey de judiojtin?

¹³ Yejwan otlanankilijkej chikawak:

—¡Xikmajmasolti itech krus, ma miki!

¹⁴ Pilato okinmilwij:

—¿Tlanik? ¿Tlan okichij?

Pero yejwan okachi okuawtzajtziaj:

—¡Xikmajmasolti itech krus, ma miki!

¹⁵ Pero in Pilato okinekke mokawas kuale inwan tlakaj iwan okikajkaj in Barrabás. Iwan otlanawatij ma kiwitekikan in Jesús iwan satepan okitemaktij (okitemaktilij) para ma kimajmasoltikan itech krus.

Ikorona de witztle

¹⁶ In soldadojtin okiwikakej in Jesús kan patio de yen palacio iwan okinmololojkej nochtin in soldadojtin.

¹⁷ Okonakiltijkej se kapa chichiltikatlilmiktik iwan okitlalilijkej se korona de witztle itech itzontekon. ¹⁸ Iwan opéj tzajtzij:

—¡Viva in Rey de judiojtin!

¹⁹ Iwan okikuawijwitekiaj ika tlakotl, okichijchijchayaj, iwan omotlankuaketzayaj omochiwayaj kej yeskia kiyektlajpalooaj. ²⁰ Satepan de otlanke okipinawijkej, okixtilijkej ikapa chichiltikatlilmiktik iwan okonakiltijkej itzotzol, iwan satepan okiwikakej para kimajmasoltiskej itech krus.

Jesús okimajmasoltijkej itech krus

(Mt. 27:32-44; Lc. 23:26-43; Jn. 19:17-27)

²¹ Ik ompa opanotiaya se tlakatl de país de Cirene itoka Simón katlej tetaj de yen Alejandro iwan de yen Rufo, witz de itlalaj. Iwan nikuak Simón opanotoka ik ompa, okitoktijkej ma kimamali ikrus in Jesús.

²² Okiwikakej in Jesús itech se lugar katlej kitokayotiaj Gólgota (kijtosneki mikkatzontekomatl). ²³ Iwan okimakakej vino nelitok iwan mirra pero mach okinekke okonik. ²⁴ Níjkuak in Jesús okimajmasoltijkej itech krus, in soldadojtin omotlaankej para kitaskej akin de yejwan kimokawis itzotzol in Jesús.

²⁵ Oyeka kej las nuebe de kualkan níjkuak okimajmasoltijkej itech krus. ²⁶ Iwan ik ikuapak okitlalilijkej se letrero ikuilitok por tlanik okimajmasoltijkej itech krus, kijtojtok: “Rey de yen judiojtin.”

Omen tlakaj katlej ichtekej

²⁷ Noijki okinmajmasoltijkej itech krus omen ichtekej ik inajnakastlan in Jesús, se ik iyekma iwan oksé ik iopochma. ²⁸ Otlapanok ijkón ken kijta in tiotlajkuilole: “Okitakej kej yeskia tlajtlakolej.”

²⁹ Katlej opanoayaj ik ompa okoliniayaj intzontekon iwan otlajtoayaj biero de yen Jesús iwan okilwiayaj:

—Tej otiknekia tiktlamotlani in weyi tiopan iwan otikijtoj tikchiwani san ika eyi tonale. ³⁰ Axan ximomakixti tej monewian iwan xitemo de itech krus.

³¹ In tlayekankej tiopixkej iwan tlamachtijkej de itlanawatil in Moisés, noijki okipinawiayaj in Jesús, okimolwiayaj:

—Okinpalewij oksekimej pero yej inewian mach weli mopalewia. ³² Ma tikitakan ma temo de itech krus in Cristo, Rey de yen judiojtin, iwan tikneltokaskej.

In ichtekej katlej okinmajmasoltijkej itech krus noijki otlajtoayaj biero de yen Jesús.

Jesús omikke

(Mt. 27:45-56; Lc. 23:44-49; Jn. 19:28-30)

³³ Desde tlajko tonale iwan asta las tres de tiotlakke sa tekitl olatleyuak ixko yin tlaltikpak. ³⁴ Iwan kej las tres, Jesús otzajtzik chikawak okijtoj:

—Eloí, Eloí, ¿lama sabactani? —kijtosneki: Dios mío, Dios mío, ¿tlanik otinechkaj noselti?

³⁵ Iwan sekimej katlej ompa oyekaj okikakej iwan okijtojkej:

—¡Xikkakikan! Kinotza in profeta Elías.

³⁶ Se de yejwan omotlaloj iwan okisiawato se tzotzole ika iayo in uvas katlej xokok. Okilpij iyak se kuawitl weyak iwan okimakak ma koni iwan okijtoj:

—Xikkawakan, tikitaskej kox in profeta Elías witz kite-mowiki de itech in krus.

³⁷ Jesús otenak chikawak iwan omikke.

Miek otlapanok níjkuak Jesús omikke

³⁸ In kortina de yen weyi tiopan otlajkotzayanke desde tlakpak asta tlakxitlan. ³⁹ In kapitan de yen soldadojtin, okonitoka in Jesús nijuak otenak iwan nijuak omikke, iwan okijtoj:

—Ipan melajka, yin tlakatl oyeka iKone in Dios.

In siwamej katlej oyekaj ikxitlan krus

⁴⁰ Sekimej siwamej oyekaj ompa okonitokaj de wejka, ompa oyeka in María de pueblo de Magdala, María imaman in José iwan de Jacobo xokoyotl, iwan oksé in siwatl itoka Salomé. ⁴¹ In yonmej siwamej okiwikatinemiaj in Jesús iwan okipalewiayaj nijuak oyeka itech estado de Galilea. Noijki ompa oyekaj miekej oksekimej siwamej katlej ovalajkej iwan Jesús itech weyikan de Jerusalén.

Jesús okitookakej ijtit se mikkakuyoktle

(Mt. 27:57-61; Lc. 23:50-56; Jn. 19:38-42)

⁴² Ijkuakón yon tiotlakke omotlayektlalilijtokaj para walmostlatis moseewiskej porke ya yetos weyi tonale. ⁴³ Se tlakatl itoka José de pueblo de Arimatea, oyeka kuale tlakatl iwan oyeka tewan tlanawatij de itech injunta in judiojtin. José noijki okichiaya keman pewas tlanawatis in Dios. Omixchikaj oyáj inawak Pilato okitlajtlanilito itlalnakayo in Jesús. ⁴⁴ Pilato sa otlahtlachixke (omomajmawtij) nijuak okikakkenik in Jesús yomikke. San niman okinotzke in kapitan de yen soldadojtin iwan okitlajtlanij kox yomikke in Jesús. ⁴⁵ Nijuak in kapitan okilwij nik yomikke, in Pilato okawilij in José ma kiwika in mikkat. ⁴⁶ José okikoj se kuale sábana de lino, okitemowij in tlalnakatl de itech krus, okikimiloj iwan okitookak ijtit se weyi mikkakuyoktle katlej okikuyonijkej ikxitlan se tepejxitl, iwan ika se weyi tetl patlaktik iwan tankachtik ika okikamatatzakke. ⁴⁷ In María de pueblo de Magdala iwan María imaman José okitakej kan okitookakej in Jesús.

16

Jesús omoyolkui

(Mt. 28:1-10; Lc. 24:1-12; Jn. 20:1-10)

¹ Nijuak opanok in weyi tonale, in María de pueblo de Magdala, in María imaman Jacobo iwan Salomé, okikijkej ajwiakayotl para kitlaliliskej itlalnakayo in Jesús. ² In yakinika tonale de yen samana, san kualkan yakin okisako tonale, oyalkej kan okitookakej in Jesús. ³ Oyayaj motlapowijtiwej entre yejwan:

—¿Akin techijkuanilis in tetl de itech mikkakuyoktle?

⁴ Pero nijuak oajsitoj, okitakej in weyi tetl katlej ika okamatzaktoka in mikkakuyoktle, mach ok okatka ken okikajtejkej. ⁵ Iwan nijuak okalakej ijtk in mikkakuyoktle okitakej ik inyekma ewatok se telpochtle ika itzotzol weyak iwan istak. Iwan siwamej omomawtijkej. ⁶ Pero yej okinmilwij:

—Amo ximomawtikan, namejwan ankitemoaj in Jesús de pueblo de Nazaret katlej okimajmasoltijkej itech krus, ¡Yej yomoyolkui! ¡Mach ok nian kajki! Xikitakan kan ankitlali-ijkaj. ⁷ Axan xiwan iwan xikinmilwikan imomachtijkawan iwan Pedro, nik in Jesús Yej tlayekanas yas para Galilea iwan namejwan ompa ankitajsiskej ijkón ken Yej achtoj yoamechilwij.

⁸ Ijkuakón in siwamej okikistewakej de ijtk in mikkakuyoktle, porke omomawtijkej iwan asta opapatlakatokaj (obibiokatokaj), iwan mach akaj itlaj okilwijkej porke omomawtiayaj.

*Jesús okimotitij in María de pueblo de Magdala
(Jn. 20:11-18)*

⁹ Nijuak Jesús omoyolkui, yon domingo kualkan, achtoj okimotitij in María de pueblo de Magdala katlej okinkixtilij chikome ejekamej mach kualtin. ¹⁰ Yej oyáj iwan okinmatiltij imomachtijkawan Jesús katlej omoyolkokojtokaj iwan ochokatokaj. ¹¹ Iwan nijuak okinmilwij nik in yej okitak in Jesús yolitok, yejwan mach okineltokakej.

*Jesús okinmotitij omen imomachtijkawan
(Lc. 24:13-35)*

¹² Jesús omoixpatlak iwan satepan okinmotitij omen imomachtijkawan katlej oyayaj ik tlalkawale. ¹³ Yejwan noijki okinmatiltijkej in oksekimej momachtijkej iwan noijki mach okinneltokilijkej.

*Jesús okinnajnawatijtewak imomachtijkawan
(Mt. 28:16-20; Lc. 24:36-49; Jn. 20:19-23)*

¹⁴ Okachi satepan okinmotitij san ken majtlakte iwan se imomachtijkawan, nijuak yejwan oewatokaj otlakuajtokaj. Jesús okinmajwak porke mach tlaneltokakej iwan por yoltlakuawakej, porke mach okinneltokilijkej katlej okinmilwijkej nik okitakej in Jesús yolitok. ¹⁵ Iwan okinmilwij:

—Xiwian itech nochi in tlaltikpak iwan xikintlapowikan nochtin de yen kuale notlajtol katlej temakixtia. ¹⁶ Akin kineltokas iwan mokuateekis, mopalewis. Iwan akin amo kineltokas, Dios mach kitlapojpolwis. ¹⁷ Iwan akinmej kineltokaskej welis kinchiwaskej miekej señalestín ken yinmej: Ika notoka kinkixtiskej demoniojtin iwan tlajtoskej ika oksekimej yankuikej tlajtoltin. ¹⁸ Kinkitziskej koamej, iwan

tla koniskej itlaj katlej pajyoj, mach itlaj mochiwaskej, kint-laliskej inmawan inpan kokoxkej iwan pajtiskej.

*Jesús omotlejkawij ik ilwikak
(Lc 24:50-53)*

¹⁹ Nijuak otlanke okintlapowij, in Señor Jesús omotlejkawijtiaj (otlejkok) ik ilwikak, iwan omotlalij ik iyekma in toTajtzin Dios. ²⁰ Imomachtijkawan okiskej otetlapowitoj ik nowian (nian nepa) de yen tlajtole katlej temakixtia. In Señor Jesús okinpalewiaya iwan okinmititiaya nik melawak nochitlan kijta itlajtol in toTajtzin Dios, iwan yejwan okinchiwayaj wejweyin milagrostin ika ipoder in toTajtzin Dios. Ijkón ma yeto.

SAN LUCAS OKIJKUILOJ YIN KUALE TLAJTOLE DE JESUCRISTO

Lucas okitlajkuililij in Teófilo de tlan Jesús okichij ixko yin tlaltikpak

¹ Nokni Teófilo, miekej tlakaj yokijkuijolokej nochí tlan otlapanok de tlan Jesucristo okichij de tlan tejwan kuale tikmatij. ² In Señor imomachtijkawan okitakej ika inmixtololowan tlan otlapanok desde ikuak opéj nemij iwan toSeñor Jesús, iwan noijki otetlapowijkej de itlajtol in toTajzin Dios. ³ Nej noijki kuale onimomachtij ika kuidado nochí yin tlamantle tlan otlapanok, iwan noijki tlan otlapanok desde ikuak ayamo ovalaya in toSeñor Jesucristo ixko yin tlaltikpak. Por yonik, tejwatzin Teófilo, nikita kuale nimitztlajkuililis de yin tlan otlapanok iwan nochí yolik nimitzmakatias kuenta, ⁴ para okachi xikyekmati tlan melawak de tlan yomitzmachtijkej.

Se ángel okijtoj tlakatis in Juan Tlakuateekij

⁵ Nijuak Herodes oyeka rey de Judea, itech yon tiempo oyeka se tiopixke itoka Zacarías, katlej oyeka tewan de se grupo de tiopixkej de Abías. Isiwa in Zacarías oyeka itoka Elisabet, katlej noijki walajtok nelwatl de Aarón. Yon Aarón yen katlej yakinika oyáj tiopixke. ⁶ Zacarías iwan isiwa Elisabet oyekaj yolchipawakej inawak Dios, iwan okichiwayaj nochí tlan kijta itlanawatil in Señor, asta mach okipiayaj de tlanon ika se kinmistlakawis. ⁷ Pero mach okipiayaj inkone, porke Elisabet mach owelia okinpiaya, iwan san ken omen yoyekaj tetajtzitzintin.

⁸ Se tonale, nijuak Zacarías otekipanojtoka kej tiopixke ijlik in weyi tiopan, nijuak okitokaroj in grupo de Abías de tekipanos, ⁹ iwan komo okipiayaj kostumbre, motlanij para aber akin kitokaros kichichinos in kopale, ikuakón yen Zacarías otlatlanke iwan yej okitokaroj kalakis tlapopochwis ijlik in weyi tiopan de toSeñor. ¹⁰ Mientras Zacarías otlapopochwiftoka tliltik, nochtin in tlakaj omotiotzajtzilijtokaj kalan de yen weyi tiopan. ¹¹ Ikuakón se iángel in Señor okimonextilij in Zacarías. Yon ángel omoketoka ik yekmaitl de yen artal kan kichichinoaj in kopale. ¹² Zacarías sa otlaajtlachixke (omomajmawtij) iwan omomajmawtij nijuak okitak in ángel. ¹³ Pero in ángel okilwij:

—Zacarías, amo ximomawti, porke Dios yokikakke motiotzajtzilis, iwan mosiwa Elisabet kipias se ikone, katlej tiktokayotis Juan. ¹⁴ Sa tekitl tikpias pakilistle, iwan noijki

miekej pakiskej nijuak yej tlakatis. ¹⁵ Porke yej weyikistos inawak Dios. Mach konis vino iwan nion mach konis itlaj oksé katlej teiwintij, iwan tentos de Espíritu Santo desde antes de tlakatis. ¹⁶ Yej kichiwas miekej tlakaj de Israel ma moyolkuepakan inawak in Señor katlej yejwan inDios. ¹⁷ Yej achtoj kinyektlalilis inyolo in tlakaj para ma kiresibirokan in toSeñor katlej satepan witz. Kipias iyolo iwan kipias poder ken Elías okipixke. Kichiwas ma moyekwikakan in tetajmey inwan inpilwan, iwan katlej mach kitlakitaj Dios ma kipiakan tlalnamikiliste, ijkón ken kipiaj katlej kualtin tlakaj. Para ijkón kinyekketzas in tlakaj para weliskej kiresibiroskej in Señor.

¹⁸ Zacarías okitlajtlanij in ángel:

—¿Kenik nikmatis kox melawak? Porke nej iwan nosiwa ya titetajtzitzintin.

¹⁹ In ángel okinankilij:

—Nej niGabriel, niktekipanoa in toTajzin Dios. Yej onech-waltitlanke para ma nimitzilwiki yin kuale tlajtote. ²⁰ Pero axan, como mach otikneltokak tlan onimitzilwíj, axan tinontis iwan mach ok welis titlajtos asta ijkuak tlakatis in mokone. Iwan nochí yin tlan nimitzilwijtok ijkón mochiwas nijuak ajsis tonale.

²¹ Ijkuakón in tlakaj oyekaj kalan okichixtokaj in Zacarías, iwan otlanemilitokaj de tlanik wejkajtok iwan mach walkisa totoka de ijtk in weyi tiopan. ²² Nijuak in Zacarías okiske, mach ok owelik okintlapowij. Ijkuakón okimomakakej kuenta nik in Dios okititij itlaj tlamantle kej yeskia se teemiktle ijtk in weyi tiopan. Zacarías okintlapowiaya sa ika señas, porke onontik.

²³ Nijuak otlankej in tonaltin de otekipanoj in Zacarías itech in weyi tiopan, oyáj para ichan. ²⁴ Satepan de yon, Elisabet omokonetij, iwan mach okiske de ichan kej makuile metztle, okijtoj: ²⁵ “Axan in Señor onechchiwiliq tlan kuale ika itlasojoatlalis, para mach ok ma nechpinawikan por amo niweli nikinpia nokonewan.”

Se ángel okijtoj tlakatis in Jesús

²⁶ Nijuak Elisabet yokipiaya chikuasen metztle de omokonetij, Dios okualtitlanke iángel Gabriel itech se pueblo de estado de Galilea itoka Nazaret, ²⁷ kan ochantia se ichpochtle itoka María. Yon María yokatka para monamiktis iwan se tlakatl itoka José, katlej walajtok nelwatl de yen rey David. ²⁸ In ángel okalakke kan okatka in María iwan okilwíj:

—Xipaki tejwatzin María. Dios sa tekitl tikpaktia. In Señor mowan kajki iwan Dios omitzpejpenke de nochtin siwamej.

²⁹ Pero níjkuak okitak in ángel, sa otlajtlachixke (omomaj-mawtij) iwan mach ok okimatke tlan kijtos, iwan okimolwíj tlan kijtosneki yon tlan kijta in ángel. ³⁰ Ijkuakón in ángel okilwíj:

—María, amo ximomawti, porke Dios tikpaktia. ³¹ Axan tikpias mokone, iwan tiktlakatilis se chokotzin, iwan tik-tokayotis Jesús. ³² Yej sa tekitl weyikistos (weyititos), iwan kinotzaskej iKone in Dios weyikistok, iwan toSeñor Dios kit-lalis ma yeto Rey para ma tlanawati ijkón ken otlanawatij in ya wejkawitl iweyitaj David, ³³ Yej nochipa yetos tekiwaj itech país de Israel, iwan itekiwajkayo mach keman tlamis.

³⁴ Toneses María okitlajtlanij in ángel:

—¿Kenik ma nikpia nokone iwan mach nikpia nookich?

³⁵ In ángel okinankilij:

—In Espíritu Santo witz mopan, iwan ipoder in Dios weyikistok (weyititok) mitzkemis kej mixtle. Por yonik, in konetl tlakatis yolchipawak iwan kinotzaskej iKone in Dios. ³⁶ Moprima Elisabet noijki kipias se iKone maski ya tenantzin, katlej miekej okijoayaj mach weli kinpia ikonewan, pero axan ya kipia chikuasen metztle de omokonetij. ³⁷ Dios nochí weli kichiwa.

³⁸ Toneses in María okijtoj:

—Nej niitekipanoj in Señor. Ma kichiwa nowan ijkón ken yotikijtoj.

Ijkuakón in ángel owalpoliwik.

María okitlajpaloto in Elisabet

³⁹ Itech yonmej tonaltin María oyáj totoka itech se pueblo katlej oyeka ik tepeyoj de Judea. ⁴⁰ Níjkuak oajsito itech yon pueblo, okalakke ichan Zacarías iwan okitlajpaloj in Elisabet. ⁴¹ Iwan níjkuak Elisabet okikakke okitlajpaloj in María, in konetl omolinij itlalaxko in Elisabet, iwan otenke de Espíritu Santo. ⁴² Iwan okijtoj chikawak:

—Dios omitziochij okachi ke noctin in siwamej, iwan okitiochij mokone katlej tikpixtok motlalaxko. ⁴³ ¿Akin nej, como para ma wiki ma nechtalajpaloki imaman in noSeñor? ⁴⁴ Porke san niman níjkuak onikakke otinechtalajpaloj, nokone omolinij noijtik ika pakilistle. ⁴⁵ Xipaki, porke otikneltokak, porke mochiwas nochí tlan toSeñor omitzilwíj.

⁴⁶ Ijkuakón María okijtoj:

Noanima kiweyikixtia in Señor,

⁴⁷ iwan noyolo paki inawak Dios noTemakixtij.

⁴⁸ Porke maski nitzikitzin iwan san niitekipanoj, Yej onechel-namikke,

iwan desde axan noctin in tlaltikpaktlakaj kijtoskej nik in Dios onechtiochij sa tekitl.

- 49 Porke Dios katlej yolchipawak iwan katlej kipia nochí poder notech okinchij wejweyin tlamantin.
- 50 Nochipa kinmiknomatis nochtin akinmej kitlakitaskej.
- 51 Kinchiwa wejweyin tlamantin ika ipoder. Okinkaj se lado katlej moweyinekij.
- 52 In tekiwajkej okinkixtij de itech intlanawatijkayo, iwan okinmakak weyikixtilistle katlej moiknomatiij.
- 53 Katlej otiojsiwiaj okinmakak nochí tlan kuale, iwan katlej kimopialiaj mach itlaj okinmakak.
- 54 Okipalewij in país de Israel katlej itekipanoj, mach okelkaj de kinmiknomatis,
- 55 okichij ijkón ken okinmilwinka in ya wejkawitl toweyita-jwan,
ijkón ken tlan okilwinka in Abraham iwan nochtin ipilwan, nik kintlasojtlas nochipa.
- 56 María omokaj iwan Elisabet kej eyi metztle, iwan satepan omokuepke para ichan.

Otlakatke in Juan Tlakuateekij

57 Nijuak oajsik tonale para kitlakatilis ikone in Elisabet, okitlakatilij se chokotzin. 58 Nijuak ibesinoswan iwan iparenteswan okimatkej kenik in Señor okiknomatke iwan okichij tlan kuale, ijkuakón oyajkej okitlapalotoj iwan opakej iwan Elisabet. 59 Owalchikometik oyajkej okisirkunsidarotoj in chokotzin, iwan okinekiaj kitokayotianiij Zacarías ijkón ken itoka in tetaj. 60 Pero in tenan okijtoj:

—Amo. Moneki tiktokayotiskej Juan.

61 Iwan okilwijkej:

—¿Tlanik? Mach akaj ijkón itoka itech mofamilia.

62 Ijkuakón okitlajtlanijkej ika señas in tetaj, para kimatiskej kenamij kineki kitokayotis ichokotzin. 63 In tetaj okitlajtlanke se amatl para itech kijkilos, iwan ijkín okijkuiloj: “Yetos itoka Juan.” Iwan nochtin sa otlajtlachixkej (omomajmawti-jkej). 64 Iwan san niman ijkuakón Zacarías oksemi owelik otajtoj, iwan opéj kiweyikixtia in toTajtzin Dios. 65 Nochtin ibesinoswan sa otlajtlachixkej. Iwan oxoyawik (oxitinki) in tlajtole de tlan otlamochij itech nochí in yon región tepeyoj de Judea. 66 Nochtin akinmej okikakiaj, okiyejeckoayaj iwan omotlajtlaniayaaj se iwan oksé:

—¿Tlan itekiw yetos in yon chokotzin?

Ijkón okijtoayaj porke ya nele melawak in Señor okimakak ipoder in yon chokotzin.

Itlakuikalis in Zacarías

67 Zacarías, ipapan Juan, otenke de Espíritu Santo iwan okijtoj tlan Dios okimakak ma kijo. Ijkín okijtoj:

- 68 Ma tikweyikixtikan in Señor, Dios de Israel, porke owalaj otechpalewiko, tejwan katlej tikatej kej ipueblo para techmakixtis.
- 69 Yotechmakak se chikawak toTemakixtij katlej walajtok nelwatl de yen rey David katlej itekipanoj.
- 70 Ijkón ken Dios yokijtojka ya wejkawitl itech inten in profetajtin yolchipawakej.
- 71 Nik techmakixtis de inmak tokontraswan iwan de nochtin akinmej techkokoliaj.
- 72 Iwan kipias iteiknotlamachilis towan ijkón ken okinmilwi-jka in ya wejkawitl toweyitajwan, iwan mach kelkawas in akuerdo tlan okijtoj.
- 73 Dios ijkón okilwij in ya wejkawitl toweyitaj Abraham.
- 74 Okilwij nik techmakixtis de inmak tokontraswan, para ma tiktekipanokan ika ixchikawalistle.
- 75 Okilwij ma tiekan tiyolchipawakej iwan ma tiekan tikuaultin tlakaj inawak Dios asta ikuak timikiskej.
- 76 Iwan tej, tinokane, mitznotzaskej tiprofeta de Dios weyik-istok (weyititok), porke tej titlayekanas para tikyektlalijtias iojwi in Señor.
- 77 Para tikinmatiltis in tlakaj de ipueblo kenik momakixtiskej, para ijkón Dios kintlapojpolwis de intlajtlakol.
- 78 In toTajtzin Dios kintlapojpolwia porke sa tekitl kipia weyi iteiknotlamachilis. Iwan ika iteiknotlamachilis techwaltitlanilis se yankuik tonale.
- 79 Para kinmakas tlanextle katlej nemij ijistik tlatleyualotl iwan katlej nemij ijistik mikilistle, iwan para techyekanas ipan ojtle de yolosewilistle.
- 80 In chokotzin Juan omoskaltiaya iwan Dios okichikawayá ipan ianima, iwan ochantito kan tlawaki asta ikuak oajsik tonale nikuak okinmotitij in tlakaj de Israel iwan opéj kintlapowia de itlajtol in toTajtzin Dios.

2

Nikuak otlakatke in Jesús

(Mt. 1:18-25)

¹ Itech nekatej tonaltin in weyi tlanawatij Augusto César otlanawatij ma majkokui se censo itech nochtin in tlakaj de nochti in tlaltikpak. ² Yin yakinika censo omochij nikuak Cirenio oyeka gobernador de Siria. ³ Nochtin oyayaj para inpueblo para ompa moikuiloskej itech censo. ⁴ Por yonik, in José okiske de pueblo de Nazaret, de estado de Galilea, iwan oyáj itech estado de Judea, itech pueblo de Belén, kan otlakatke in rey David, porke in José owalajtoka nelwatl de David. ⁵ José oyáj ompa Belén san sekan iwan María

para moiukuiloskej itech censo. Porke María iwan José yakin omonamiktiijkej, iwan María yokipiaya ikone ijlik itlalax. ⁶ Iwan nijuak oyekaj Belén, oajsík in tonale para tlakatis ikone in María. ⁷ Ompa okitlakatilij ikone katlej yankuiotl, okimiloj ika tzinkuemej iwan okitekak ijlik se kajon katlej okipiaya sakatl kan otlakuayaj in yolkamej. Porke mach ok oyeka lugar itech yon kale kan tekalotiaj.

In angelestín iwan tlajpixkej

⁸ Mach wejka de Belén oyekaj sekimej tlajpixkej okinmonekuitlawijtokaj de yuak inmichkawan. ⁹ San niman ikuakón okinmonextilij se iángel in Señor, iwan okintlawilij imawisotlanex in Señor, iwan yejwan sa tekitl omomawtijkej. ¹⁰ Pero in ángel okinmilwíj:

—Amo ximomawtikan, porke oniwala j para namechmatiltis se kuale tlajtole, katlej welis kinpaktis nochtin in tlakaj. ¹¹ Axan itech ipueblo in David otlakatke namoTemakixtij, yen Cristo in toSeñor. ¹² Iwan para welis ankixmatiskej, namejwan ankitemoskej iwan ankajsiskej in konetzintle kimilitok ika tzinkuemej, iwan wetok ijlik se kajon katlej kipia sakatl kan tlakuaj in yolkamej.

¹³ Ijkuakón omonextijkej ik inakastlan ángel, oksekimej miekej angelestín de ilwikak, katlej okiweyikixtiayaj in toTajzin Dios. Okijoaya:

¹⁴ Dios ma kipia yektenewalistle ompa ilwikak, iwan ixko yin tlaltikpak ma yeto yolosewilistle itech nochtin katlej kipaktiaj in toTajzin Dios.

¹⁵ Nijuak in angelestín omokuepkéj para ilwikak, in tlajpixkej opéj kimolwíaj se iwan oksé:

—Ma tiwian kiné para Belén. Ma tikitati j tlan otlamochij, tlan otechmatiltij in Señor.

¹⁶ Oyajkej totoka iwan okitajsikej in María iwan José, iwan konetl wetok ijlik kajon kan tlakuaj in yolkamej. ¹⁷ Nijuak okitakej in konetl, okitemakakej kuenta nochti tlan okinmilwíj in ángel de yon konetl, ¹⁸ iwan nochtin katlej okikakej de tlan okijokey in tlajpixkej sa otlajtlachixkej (omomajmawtijkej). ¹⁹ Pero María nochti in yon okitlaati j ipan iyolo, iwan nochipa okelnamikia nochti tlan otlapanok. ²⁰ In tlajpixkej omokuepkéj kan oyekaj inmichkawan. Oyajkej okiweyikixtijiajkej iwan okiyektenejtiajkej in toTajzin Dios por nochti tlan okikakej iwan okitakej, ijkón ken okinmilwíj in ángel.

In konetl Jesús okiteixpantitoj kan weyi tiopan

²¹ Nijuak ochikometik de otlakatke in konetl, okisirkunisdarójkej iwan okitokayotijkej Jesús, ijkón ken ángel okilwíj in María antes de mokonetis.

²² Nijuak opanokej in tonaltin de omochipajkej, ijkón ken kijta in tlanawatile de Moisés, okiwikakej in konetl Jesús itech weyikan de Jerusalén para kixpantiliskej in Señor. ²³ Ijkón okichiijkej porke itech itiotlajkuilol in Señor kijta: "Nochtin katlej konemej yankuiomej kipiaj de kinmixpan-tiliskej in Señor para yeskej iaxkawan." ²⁴ Oyajkej kiné, para kitemakaskej ome yolkamej para ma kinmiktikan ipan artal iwan kimakaskej toTajtzin Dios kej se tlamanale, ijkón ken kijta itlanawatil in Señor, omen kokolotzitzintin o noso omen palomastin.

²⁵ Itech nekáj tiempo ochantia Jerusalén se tlakatl itoka Simeón. Oyeka kuale tlakatl iwan sa tekitl omotemaktiaya inawak Dios, iwan okichiaya kemanian tlakatis akin kinmak-ixtis in tlakaj de Israel. Simeón otentoka de Espíritu Santo, ²⁶ iwan okimatiltijka nik mach mikis asta amo ma kita in Cristo, katlej toSeñor kiwaltitlanis. ²⁷ Iwan in Espíritu Santo okitoktij in Simeón ma wia kan weyi tiopan. Iwan nijuak in tetajmej de yen konetl Jesús okiwikakej ompa kan weyi tiopan para kichiwaskej según tlan kijta itlanawatil in Moisés, ²⁸ Simeón okinapaloj in konetl Jesús iwan okiweyikixtij in Dios. Okijtoj:

²⁹ Señor, axan ya welis tinechkawilis ma nimiki ika kuale, porke axan yotikchij tlan otinechilwinka nej nimotekipanoj.

³⁰ Yonikitak ika noixtololowan in toTemakixtij katlej yotikkualtitlanke,

³¹ iwan katlej yotiktlalij inmixpan nochtin in tlakaj de ixko yin tlaltikpak.

³² Yej kajki kej se tlanextle katlej kintlawilis katlej mach judiojtin,

iwan kinmakas tetlakitalistle mokonewan katlej judiojtin.

³³ José iwan imaman Jesús sa otlajtlachixkej (omomaj-mawtijkej) de tlan okijtoj in Simeón de yen konetl Jesús.

³⁴ Ijkuakón Simeón okintiochij, iwan okilwij in María imaman in Jesús:

—Yin mokone, Dios okitlalij para miekej tlakaj de Israel moixpoloskej porke mach kineltokaskej. Pero miekej tlakaj momakixtiskej inawak porke kineltokaskej. Iwan Yej kiteitis in ojtle para kalakiskej ilwikak inawak Dios, pero miekej mach kinekiskej. ³⁵ Iwan ijkón miekej tlakaj tlan kiyeyekoaj ipan inyolo nochí momatis. Pero para tej nochí in yin yetos kej se espada katlej kitzopitis moanima.

³⁶ Ompa oyeka noijki se siwatl profeta, itoka Ana, ichpoch in Fanuel, de familia de Aser. Yoyeka tenantzin. Omonamik-tika wel ok ichpochtle, iwan oyeka iwan iokich san chikome xiwitl, ³⁷ iwan axan yoyeka viuda ya nawinpoale iwan nawi

xiwitl. Mach okisaya de kan weyi tiopan, sino okitekipanoaya in toSeñor yuale tonale, omosawaya (oayunaroaya) iwan omotiotzajtziliaya. ³⁸ Yon viuda Ana ovalaj itech yon ora, iwan omotlasojkamatke inawak Dios. Iwan opéj kintlapowia de yon konetl Jesúś nochtin in tlakaj de Jerusalén katlej okichiayaj ma wiki in Cristo para kinmakixtis.

Jesús iwan itajwan omokuepkej para Nazaret

³⁹ Satepan de okichijkej nochti tlan kijta itlanawatil in Señor, omokuepkej para Galilea, itech inpueblo de Nazaret. ⁴⁰ In chokotzin Jesúś omoskaltiaya iwan omochikawaya, iwan okajsia miek ixtlamachilistle. Iwan toTajtzin Dios okitiochiwaya miek.

In chokotzin Jesúś omokaj itech weyi tiopan

⁴¹ Itajwan in Jesúś nochti xiwitl oyabaj Jerusalén itech il-witl de pascua. ⁴² Nijuak Jesúś okipixke majtlakte iwan ome xiwitl, Yej iwan itajwan oyajkej Jerusalén ijkón ken okichiawayaj nochti xiwitl. ⁴³ Nijuak otlanke ilwitl, iwan yomokuepayaj para inpueblo Nazaret, in chokotzin Jesúś omokaj Jerusalén, pero imaman iwan ipapan mach okimomakakej kuenta kox omokaj. ⁴⁴ Itajwan okiyejyekojkej nik in Jesúś ompa ovalaya inwan oksekimej tlakaj. Pero nijuak yonejenkej se tonale, opéj kitemoaj kan ovalayaj infamiliareswan iwan inmamigoswan, ⁴⁵ pero mach okajsikej. Toneses oksemei omokuepkej para Jerusalén okitemotoj.

⁴⁶ Eyi tonale satepan okajsikej kan weyi tiopan, ompa oewatoka inwan tlamachtijkej de itlanawatil in Moisés, okinkaktoka iwan okintlatlajtlaniaya. ⁴⁷ Iwan nochtin ak-inmej okikakiaj sa omotlatlachialtiayaj (omomajmawtiayaj) porke okipiaya kuale ixtlamachilistle iwan porke kuale okinnankiliaya. ⁴⁸ Nijuak itajwan okitakej, sa otlajtlachixkej. Iwan imaman okilwij:

—Nokone, ¿tlanik ijkón otitechtoktij? Mopapan iwan nej sa tekitl titlanemiliaj timitztemojtinemij.

⁴⁹ Ijkuakón Jesúś okinmilwij:

—¿Tlanik annechtemoaj? ¿Amo ankimatij nik moneki nikchiwas in tekitl de noPapan?

⁵⁰ Pero yejwan mach okimomakakej kuenta tlan okinmilwij.

⁵¹ Ijkuakón Jesúś omokuepke inwan para Nazaret iwan okintlakitaya itajwan. María okitlaatiaya ipan iyolo nochti yon tlamantle. ⁵² Jesúś okachi omoskaltiaya iwan okajsia okachi ixtlamachilistle, iwan okipaktiaya in toTajtzin Dios iwan noijki okinpaktiaya in tlakaj.

3

*In Juan Tlakuateekij otlamachtia y kan tlawaki
(Mt. 3:1-12; Mr. 1:1-8; Jn. 1:19-28)*

¹ Nijkuak Tiberio César yokipiaya kaxtole xiwitl de weyi tekiwaj de Roma, Poncio Pilato oyeka gobernador itech estado de Judea, Herodes oyeka gobernador itech estado de Galilea, iwan Felipe ikni in Herodes oyeka gobernador de estado de Iturea iwan de estado de Traconite, iwan Lisanias oyeka gobernador de estado de Abilinia. ² Anás iwan Caifás oyekaj wejweyin tiopixkej. Itech yon tiempo Dios okitlapowij in Juan, itelpoch in Zacarías, kan tlawaki. ³ Por yonik, in Juan oyáj itech nochtin in tlalmej katlej katej inakastlan weyatl itoka Jordán. Okinmilwiaya in tlakaj ma moyolkuepakan inawak Dios para ma kintlapojpolwi de intlajtlakol, iwan ijkón ma mokuateekikan. ⁴ Ijkón ken profeta Isaías okikuiloj: Se tlajtole mokaki tetzajtzilia kan tlawaki:

“Xikyektlalikan iwan
xikmelawakan iojwi in Señor.

⁵ Nowian (nian nepa) kan tlawewejkatlan moixmanas, nochtin tepemej iwan tepetzitzintin moixmanaskej, in ojmej katlej chichijkoltikej momelawaskej, in ojmej kan tlawewejkatlan kipia de moixmanaskej.

⁶ Iwan nochtin in tlaltikpaktlakaj kitaskej kenik temakixtis in Dios.”

⁷ Miekej tlakaj owalayaj inawak Juan para ma kinkuateeki, iwan Juan okinmilwiaya:

—¡Namejwan kej ankoamej! ¿Akin oamechilwij tla anmokuateekiskej welis ancholoskej de itech ikualanilis in Dios katlej amopan witz? ⁸ Xikchiwakan tlan kuale para ma motanik melawak ya anmoyolkuepkej. Iwan amo xikmolwikan: “Tejwan tiwalajtokej nelwatl de Abraham.” Porke ipan mela jka namechilwia, ke asta yinmej temej Dios welis kinkuepas nelwamej de Abraham. ⁹ In acha sa mochixtok para kintzontekis in kuanmej. Iwan nochtin in kuanmej katlej mach kitemakaj kuale intlakilo, se kintzontekis iwan se kintlamot las ijtik tlilt.

¹⁰ Ijkuakón in tlakaj okitlajtlanjkej:

—¿Tlan moneki tikchiwaskej kiné?

¹¹ Juan okinnankilij:

—Akin kipia ome ikamisa, ma kimaka se akin amo kipia. Iwan akin kipia tlan kikuas, ma kimaka sekin akin amo kipia tlan kikuas.

¹² Nojki owalajkej sekimej katlej tlakobraroaj ika impuestos para mokuateekiskej, iwan okitlajtlanjkej in Juan:

—Tlamachtij, ¿tlanon moneki tikchiwaskej in tejwan?

¹³ Juan okinmilwij:

—Amo xitlakobrarokan okachi de tlan moneki antlakobrарoskej.

¹⁴ Noijki sekimej soldadojtin okitlajtlanijkej:

—Iwan tejwan, ¿tlanon moneki tikchiwaskej?

Iwan yej okinmilwij:

—Amakaj itlaj xikixtilikan, nimpor amo xikmajmawtikan iwan nion amo xikistlakawikan de itlaj tlan amo okichij. Iwan xikixitakan namotlaxtlawil.

¹⁵ Komo nochtin in tlakaj okichixtokaj ma wiki in Cristo san niman, por yonik in yejwan okiyejyekoayaj xamo yen Juan in Cristo. ¹⁶ Pero in Juan okinmilwij nochtin:

—Nej, melawak, namechkuateekia ika atl. Pero witz se tlakatl katlej amechkuateekis ika Espíritu Santo iwan ika titl. Yej okachi kipia poder iwan amo ken nej, iwan nion mach notech powi nion para nikaktotomas. ¹⁷ Yej ejkos kej se tlakatl katlej pewas kichipawas in trigo. In trigo katlej ya chipawak kitlaatis ijtk ikueskon, pero itlajsolo kitlamotlas ijtk titl katlej mach keman sewis.

¹⁸ Ijkón, iwan ika okachi miek oksekin tlajtole de tlanaj-nawatilistle, Juan okintlapowiaya in tlakaj de yen yankuik kuale tlajtole. ¹⁹ Noijki okajwak in gobernador Herodes, porke okimosiwatij in Herodías katlej oyeka ikuñada. Yon Herodías oyeka isiwa in Felipe, ikni in Herodes. Juan noijki okajwak in Herodes porke okichij miek oksekin tlamantle tlan mach kuale. ²⁰ Pero Herodes mach okinekke okikakke, sino okichij oksé tlamantle tlan mach kuale, okitzakke in Juan ijtk telpiloyan.

Juan okikuateekij in Jesús

(Mt. 3:13-17; Mr. 1:9-11)

²¹ Pero nijuak ayamo okitzakuayaj in Juan, otlamochij ke nijuak in Juan okinkuateekijtoca miekej tlakaj, ikuakón noijki omokuateekij in Jesús. Iwan mientras Jesús omotiotzatziliaya inawak Dios, in ilwikak otlapowik ²² iwan in Espíritu Santo owaltemok ipan Jesús kej se paloma. Iwan omokakke se tlajtole de ilwikak, ijkín okijtoj:

—Tej tinotlasojKone, iwan sa tekitl nipaki monawak.

Iweyitajwan Jesucristo katlej oyekaj ya wejkawitl

(Mt. 1:1-17)

²³ Jesús okipiaya kej senpoale iwan majtlakte xiwitl nijuak opéj tetlapowia de itlajtol in toTajtzin Dios. In tlakaj kiyeyjyekoaj nik in Jesús oyáj tekone de José. José oyáj tekone de Elí, ²⁴ iwan Elí oyáj tekone de Matat, Matat oyáj tekone de Leví, Leví oyáj tekone de Melqui, Melqui oyáj tekone de Jana, Jana oyáj tekone de José, ²⁵ José oyáj tekone de

Matatías, Matatías oyáj tekone de Amós, Amós oyáj tekone de Nahúm, Nahúm oyáj tekone de Eslí, Eslí oyáj tekone de Nagai,²⁶ Nagai oyáj tekone de Maat, Maat oyáj tekone de Matatías, Matatías oyáj tekone de Simei, Simei oyáj tekone de José, José oyáj tekone de Judá,²⁷ Judá oyáj tekone de Joana, Joana oyáj tekone de Resa, Resa oyáj tekone de Zorobabel, Zorobabel oyáj tekone de Salatiel, Salatiel oyáj tekone de Neri,²⁸ Neri oyáj tekone Melqui, Melqui oyáj tekone de Adi, Adi oyáj tekone de Cosam, Cosam oyáj tekone de Elmodam, Elmodam oyáj tekone de Er,²⁹ Er oyáj tekone de Josué, Josué oyáj tekone de Eliezer, Eliezer oyáj tekone de Jorim, Jorim oyáj tekone de Matat,³⁰ Matat oyáj tekone de Leví, Leví oyáj tekone de Simeón, Simeón oyáj tekone de Judá, Judá oyáj tekone de José, José oyáj tekone de Jonán, Jonán oyáj tekone de Eliaquim,³¹ Eliaquim oyáj tekone de Melea, Melea oyáj tekone de Mainán, Mainán oyáj tekone de Matata, Matata oyáj tekone de Natán,³² Natán oyáj tekone de David, David oyáj tekone de Isaí, Isaí oyáj tekone de Obed, Obed oyáj tekone de Booz, Booz oyáj tekone de Salmón, Salmón oyáj tekone de Naasón,³³ Naasón oyáj tekone de Aminadab, Aminadab oyáj tekone de Aram, Aram oyáj tekone de Esrom, Esrom oyáj tekone de Fares, Fares oyáj tekone de Judá,³⁴ Judá oyáj tekone de Jacob, Jacob oyáj tekone de Isaac, Isaac oyáj tekone de Abraham, Abraham oyáj tekone de Taré, Taré oyáj tekone de Nacor,³⁵ Nacor oyáj tekone de Serug, Serug oyáj tekone de Ragau, Ragau oyáj tekone de Peleg, Peleg oyáj tekone de Heber, Heber oyáj tekone de Sala,³⁶ Sala oyáj tekone de Cainán, Cainán oyáj tekone de Arfaxad, Arfaxad oyáj tekone de Sem, Sem oyáj tekone de Noé, Noé oyáj tekone de Lamec,³⁷ Lamec oyáj tekone de Matusalén, Matusalén oyáj tekone de Enoc, Enoc oyáj tekone de Jared, Jared oyáj tekone de Mahalaleel, Mahalaleel oyáj tekone de Cainán,³⁸ Cainán oyáj tekone de Enos, Enos oyáj tekone de Set, Set oyáj tekone de Adán, Adán oyáj tekone de Dios.

4

*In Amo Kuale Tlakatl okinekia kitlajtlakolmayawini in Jesús
(Mt. 4:1-11; Mr. 1:12-13)*

¹ Jesús okiske de ijtik in weyatl Jordán tentok de Espíritu Santo. Iwan in Espíritu Santo okiwikak kan tlawaki. ² Ompa omokaj omenpoale tonale, iwan in diablo okinekia kitlajtlakolmayawini in Jesús. Mach itlaj okikuaj nion tlenon itech yon omenpoale tonale, iwan satepan otiojsij. ³ Satepan in diablo okilwij:

—Tla melawak titeKone de Dios, xikilwi in yin tetl ma mokuepa pan.

⁴ Jesús okinankilij:

—In tiotlajkuilole kijta: “In tlakatl mach yolitos san ika tlakuale, sino noijki ika nochti tlajtole katlej Dios kijta.”

⁵ Satepan in diablo okiwikak ipan se tepetl wejkapan, iwan san niman okinmititij nochtin in paismej katlej katej ixko yin tlaltikpak. ⁶ Iwan in diablo okilwij:

—Nej nimitzmakas nochti tlanawatijkayotl iwan weyikixtilistle itech yinmej paismej. Porke nej nochti noaxka, iwan welis nikmakas san akin nej niknekis. ⁷ Tla timotlankuaketzas noyakapan iwan tinechweyikixtis, nochti in yin yetos moaxka.

⁸ Pero Jesús okinankilij:

—Xitzinkisa de Nej, Satanás, porke in tiotlajkuilole kijta: “Xikweyikixti in Señor moDios, iwan sanwel Yej xiktekipano.”

⁹ Satepan in diablo okiwikak itech weyikan de Jerusalén iwan okitlejkoltij ikpak in weyi tiopan, iwan okilwij:

—Tla melawak titeKone de Dios, ximotlamotla asta ipan tlale. ¹⁰ Porke itech in tiotlajkuilole kijta:

Dios kinnawatis iangelwan ma mitzpalewikan.

¹¹ Mitzajkokuiskej ika inma,

para amo tkmomagati itlaj tetl itech mokxi.

¹² Jesús okinankilij:

—In tiotlajkuilole noijki kijta: “Amo xikyejyeko in Señor moDios para tikitas tlanon kichiwas.”

¹³ In diablo ayakmo owelia ken kichiwas para kitlajtlakol-mayawini in Jesús, iwan okikaj por se tiempo.

Jesús opéj tekipanoa itech estado de Galilea

(Mt. 4:12-17; Mr. 1:14-15)

¹⁴ Jesús omokuepke itech estado de Galilea tentok de ipoder in Espíritu Santo, iwan nochtin in tlakaj de yon región omotlapowiayaj de Jesús. ¹⁵ Itech nochtin pueblobjin otlamachtiaya itech tiopanmej de yen judiojtin, iwan nochtin okiweyikixtiayaj.

Jesús oyáj itech ipueblo Nazaret kan Yej omoskaltij

(Mt. 13:53-58; Mr. 6:1-6)

¹⁶ Satepan Jesús oyáj para Nazaret, itech ipueblo kan Yej omoskaltij. Nijuak weyi tonale okalakke itech se tiopan de yen judiojtin, ijkón ken Yej okimatia okichiwaya, iwan omoketzke para kileros in tiotlajkuilole. ¹⁷ Okimakakej in libro katlej okikuiloj in profeta Isaías. Iwan nijuak okitlapoj, okajsik kan ijkuitlak ijkín:

¹⁸ IEspíritu in Señor notech kajki,

porke Dios onechtlalij para ma nikintlapowi in pobrestin de
yen yankuik kuale tlajtole.

Onechwaltitlanke para ma nikinpajti katlej moyolkokoaj,
para ma nikinmatilti in tlajtole katlej temakixtia katlej ilpi-
tokej ipan tlajtlakole,

para ma nikintlachialti katlej mach tlachiaj,
para ma nikinmakixti katlej kintlajyowiltiaj.

¹⁹ Iwan para ma niktematilti nik yoajsiko in tonale para Dios
kintiochiwas nochtin akinmej witzej inawak.

²⁰ Satepan Jesús okitzakke in libro, okimakak katlej tla-
palewia itech yon tiopan iwan omotlalij. Iwan nochtin katlej
oyekaj itech yon tiopan sa okitlajtlatakej. ²¹ Ijkuakón Yej opéj
ijkín kijta:

—Yin tiotlajkuilole katlej yakin tlami ankikakej axan
yomochij tlan kijta.

²² Nochtin kuale otlajtoayaj de Jesús, iwan sa omotlajt-
lachialtiayaj (omomajmawtiayaj) de yen kuakualtzin tlajtole
katlej okinmilwiaya. Iwan omotlajtlaniayaj:

—¿Amo yen yen ikone in José?

²³ Jesús okinmilwij:

—Namejwan xamo ankinekij annechilwiskej in yin tlaj-
tote: “Tepajtij, tej monewian ximopajti.” Iwan noijki xamo
ankinekij annechilwiskej ke nochí tlamantle katlej ankikakej
onikchij Capernaum, noijki ankinekij ma nikchiwa nian itech
nopueblo.

²⁴ Noijki okinmilwij:

—Ipan melajka namechilwia, nik mach akaj profeta kire-
sibiroaj ika kuale itech ipueblo. ²⁵ Noijki ipan melajka
namechilwia nik oyekaj miekej viudajtin itech país de Israel
itech nekáj tiempo nijuak Elías oyeka profeta, nijuak mach
okiarwik kej eyi xiwitl iwan tlajko, iwan oyeka miek apostle
itech nochí in país de Israel. ²⁶ Pero Dios mach okititlanke in
Elías nion siera inawak se viuda de Israel, sino okititlanke in-
awak se viuda katlej ochantia itech pueblo de Sarepta, katlej
serka motok iwan weyikan de Sidón. ²⁷ Noijki itech nekáj
tiempo nijuak Eliseo oyeka profeta, noijki oyekaj miekej
tlakaj katlej opalania innakayo itech país de Israel. Pero
Eliseo mach okipajtij nion se de yejwan, sino okipajtij san yen
Naamán, katlej oyeka de país de Siria.

²⁸ Nijuak okikakej yon tlan okinmilwij, nochtin
katlej oyekaj itech yon tiopan sa tekitl okualankej.

²⁹ Omokeketewakej iwan okikixtijkej in Jesús de itech yon
pueblo, iwan okiwikakej asta ikpak in tepetl kan oyeka yon
pueblo, para ompa kitepejxiwianij. ³⁰ Pero Jesús opanok
intzalko iwan oyáj.

Jesús okipajtij se tlakatl katlej okipiaya se ejekatl mach kuale

(*Mr. 1:21-28*)

³¹ Satepan Jesús oyáj para Capernaum, se pueblo katlej kajki itech estado de Galilea, iwan ompa opéj kinmachtia in tlakaj nikuak weyi tonale. ³² Sa omotlajtlachialtiayaj (omomajmawtiayaj) de kenik okinmachiaya, porke otlamachtiaya ika miek tlanawatile.

³³ Itech se tiopan de yen judiojtin oyeka se tlakatl katlej okipiaya se ejekatl mach kuale, iwan otzajtzik okijtoj:

³⁴ —¡Xitechkawa! ¿Tlan tikpia towan, Jesús de Nazaret? Nej nikmati akin Tej. Tej tiiyolchipawkaKone in Dios.

³⁵ Jesús okajwak in ejekatl mach kuale, iwan okilwij:

—¡Xiktzakua moten, iwan xikisa de itech yon tlakatl!

Ijkuakón in ejekatl mach kuale okitlalwitekke in tlakatl inyakapan, iwan okiske de itech, iwan mach ok itlaj okitoktij.

³⁶ Nochtin omomajmawtijkej, iwan okimolwiayaj se iwan oksé:

—¿Tlan kijtosneki yin tlamachtile? Itlajtol kipia tlanawatile iwan kipia poder porke kinnawatia in ejekamej mach kualtin, iwan yejwan kitlakitaj iwan kisaj.

³⁷ Iwan itech nochti yon región omotlapowiayaj de tlan Jesús okichiwaya.

Jesús okipajtij imonan in Simón Pedro

(*Mt. 8:14-15; Mr. 1:29-31*)

³⁸ Jesús okiske de itech yon tiopan iwan okalakke ichan Simón. Imonan in Simón sa tekitl ototonkawiloaya, iwan okitlatlawtijkej in Jesús ma kipajti. ³⁹ Jesús omijkuanij kan oyeka in siwatl iwan okajwak in totonik, iwan totonik okiske. Iwan san niman in siwatl omejke iwan opéj kintlamaka.

Jesús okinpajtij miekej kokoxkej

(*Mt. 8:16-17; Mr. 1:32-34*)

⁴⁰ Nijuak ya ompolitiw in tonale, nochtin in tlakaj katlej okinpiayaj inkokoxkawan okualinwikilijkej in Jesús. In kokoxkej okipiayaj tlatlamantle kokolistle, pero Jesús okintlatlaj imawan inpan nochtin kokoxkej iwan opajtikej. ⁴¹ Miekej de yonmej kokoxkej okinpiayaj ejekamej mach kualtin. Nijuak okisayaj in ejekamej mach kualtin, otzajtziaj chikawak, okijtoayaj:

—¡Tej titEkone de Dios!

Pero Jesús okinmajwak in ejekamej mach kualtin iwan mach okinkawilij ma tlajtakan, porke yejwan okimatiaj nik in Jesús yen Cristo.

*Jesús okitematiltij in kuale tlajtole katlej temakixtia itech
nochi in estado de Galilea
(Mr. 1:35-39)*

⁴² Níjkuak owalmostlatik, Jesús okiske de itech yon pueblo de Capernaum iwan oyáj se lugar kan yetos san Yej iselti. Pero in tlakaj okitemojkej, iwan níjkuak okajsikej okitlatlawtijkej amo ma wia. ⁴³ Pero Jesús okinmilwij:

—Nojki moneki niktematiltis itech oksekimej pueblojin in kuale tlajtole katlej temakixtia de kenik in Dios tlanawatia, porke por yonik oniwalaj.

⁴⁴ Ijkón, Jesús otlamachtijtinemia itech nochtin tiopanmej de yen judiojtin de estado de Galilea.

5

Okinkitzkijkej miekej michimej

(Mt. 4:18-22; Mr. 1:16-20)

¹ Se tonale, Jesús oyeka itempan lago itoka Genesaret, iwan sa tekitl miekej tlakaj oyekaj iwan asta sa ipan omotojtope-wayaj, para kikakiskej itlajtol in toTajzin Dios. ² Jesús okinmitak ome barkojtin oyekaj itempan atl, iwan michmajkej yokiskej okinpakatoj inmichmatlawan. ³ Otlejkok itech se bárko, katlej iaxka in Simón, iwan okilwij ma kitzinkixti achitzin de itempan atl. Omotlalij itech yon bárko iwan desde ompón opéj kinmachtia in tlakaj. ⁴ Níjkuak otlanke otlapoj, okilwij in Simón:

—Xikíjkuani in bárko kan okachi tlawejkatlan, iwan ompa xikintlamotlakan namomichmatlawan. Ompa ximichmakan.

⁵ In Simón okinankilij:

—Tlamachtij, nochi in se yuale ya otitekipanojkej iwan mach itlaj otikaisikej, pero komo tejwatzin tinechilwia ompa ma niktlamotla nomichmatlaw, ijkón nikchiwas kiné.

⁶ Níjkuak ijkón okichijkej, okinkitzkijkej sa tekitl miekej michimej asta okojkotonía imichmatlaw. ⁷ Ijkúakón okinchwilijkej señas inkompañeroswan katlej oyekaj itech oksé bárko para ma kinpalewitij. Yejwan oyajkej iwan okinsepantemítijkej inbarkojwan asta ya meroj apolakinij. ⁸ Níjkuak ijkón okitak in Simón Pedro, omotlankuaketzke iyakapan Jesús, iwan okilwij:

—Xitzinkisa de nej, Señor, porke nej nitlajtlakolej.

⁹ In Simón ijkón okilwij in Jesús, porke yej iwan nochtin ikompañeroswan sa otlajtlachixkej (omomajmawtijkej) por yen sa tekitl miekej michimej okinkixtijkej. ¹⁰ Nojki sa otlajtlachixkej in Jacobo iwan Juan ipilwan in Zebideo, katlej oyekaj iamigoswan in Simón. Pero Jesús okilwij in Simón:

—Amo ximomawti, porke desde axan ya pewas tikintlapowis in tlakaj de notlajtol para ma momakixtikan kej yeskia tikinkitzkis michimej.

¹¹ Satepan okintilankej inbarkojwan asta ipan tlale, ompa okajtejkej nochi iwan oyajkej iwan Jesú.

*Jesús okipajtij se tlakatl katlej opalania inakayo
(Mt. 8:1-4; Mr. 1:40-45)*

¹² Níjkuak Jesú oyeka itech se pueblo, ompa oejkok se tlakatl kokoxke katlej opalania inakayo, iwan níjkuak okitak in Jesú, omotlankuaketzke iyakapan asta okitennamikke in tlale iwan okitlatlawtij okilwij:

—Señor, tla tiknekini, tiwelis tinechpajtis.

¹³ Ijkuakón Jesú okitlalij ima ipan kokoxke, iwan okilwij:

—Aján, nikneki. Axan san niman xipajti.

Iwan san niman ijkuakón in kokolistle opojpoliwik.

¹⁴ Satepan Jesú okinawatij in tlakatl amakaj itlaj ma kilwi. Okilwij:

—Xiwia, ximoteitititi inawak in tiopixke, iwan xiktemaka moofrenda tlan Moisés kijta itech itlanawatil, de ke nochtin katlej pajtij de innakayopalanalisis, kipiaj de kitemakaskej inmofrenda, para ijkón nochtin ma kimatikan nik yotipajtik.

¹⁵ Ik nowian (nian nepa) omotlapowiayaj okachi de Jesú, iwan miekej tlakaj omololoayaj para kikakiskej iwan para ma kinpajti de inkokolis. ¹⁶ Pero Jesú miekpa omoseladojkixtiaya de innawak in tlakaj, iwan oyaya ik se lugar kan yetos iselti para motiotzajtzilis.

*Jesús okipajtij se tlakatl katlej owijwilantik (otemetlatik)
(Mt. 9:1-8; Mr. 2:1-12)*

¹⁷ Se tonale, kan Jesú otlamachtijtoka, ik ompa oewatokaj sekimej fariseos, iwan sekimej tlamachtijkej de itlanawatil in Moisés, katlej ovalajkej de nochtin pueblobjin de estado de Galilea, de estado de Judea iwan de weyikan de Jerusalén. ToTajzin Dios okimakak poder in Jesú para okinpajtiaya in kokoxkej. ¹⁸ Ijkuakón oejkokej sekimej tlakaj okiwalwikayaj se tlakatl wilan (temetlatzin) ipan itlapech, iwan okinekiaj kikalakianij kalijtik para kitlaliskej iyakapan Jesú. ¹⁹ Pero mach owelik okikalakijkej, porke ompa oyekaj miekej tlakaj. Toneses otlejkokej ikpak kale. Okikuatlajpojkej in kale, iwan ik ompa okitemowijkej in wilan ipan itlapech asta tlatlajko de kan oyekaj in tlakaj iwan kan oyeka in Jesú. ²⁰ Níjkuak in Jesú okitak nik melawak okineltokayaj in yonmej tlakaj, ijkuakón okilwij in kokoxkej:

—Tlakatl, nimitztlapojpolwia de nochi motlajtlakol.

²¹ Ijkuakón in tlamachtijkej de itlanawatil in Moisés iwan fariseos opéj kiyeyekoaj: “¿Akin yin tlakatl? ¿Tlanik tlajtoa biero de Dios? Mach akaj welis tetlapojojpolwis itech tlajtlakole, sino san yen Dios welis tetlapojojpolwis.”

²² Pero Jesús yokimatia tlan okiyeyekojtokaj, iwan okinmilwij:

—¿Tlanik ijkón ankiyeyekoaj? ²³ ¿Katlij yen okachi mach owij nikijtos: “Nimitzlapojojpolwia de nochí motlajtlakol”, o noso nikijtos: “Ximewa iwan xinejnemi”? ²⁴ Pero axan Nej nikneki namechititis nik in Nej katlej onimochij nitlakatl, nikpia tlanawatile ixko yin tlaltikpak para nikintlapojojpolwis in tlakaj de intlajtlakol.

Ijkuakón okilwij in tlakatl katlej wilan:

—Tej nimitzilwia, ximewa, xikajkokui motlapech iwan xiwia mochan.

²⁵ San niman ijkuakón, in wilan (temetlatzin) omoketzke in yakapan, okajkokke itlapech iwan oyáj para ichan okiweiyikixtijtaj in toTajtzin Dios. ²⁶ Nochtin sa omotlajtlachialtijkej (omomajmawtijkej) iwan okiweiyikixtijkej in toTajtzin Dios, iwan ika miek nemajmawtile okijtojkej:

—Axan yotikitakej se weyi tlamanter katlej mach semi otikitayaj.

Jesús okinotzke in Leví

(Mt. 9:9-13; Mr. 2:13-17)

²⁷ Satepan de yon, Jesús okiske iwan okitak se tlakatl katlej tlakobraroa ika impuestos itoka Leví. Oewatoka kan otlakobraroaya ika impuestos, iwan Jesús okilwij:

—Xiwiki nowan.

²⁸ Leví omoketzke, okikajtej nochí, iwan oyáj iwan Jesús.

²⁹ Satepan, Leví okichij se weyi ilwítl ichan para yen Jesús. Ompa oyekaj miekej tlakaj tlakobrarojkej ika impuestos iwan miekej oksekimej tlakaj oewatokaj inwan itech mesa. ³⁰ Pero in fariseos iwan in tlamachtijkej de itlanawatil in Moisés opéj kinpojpoaj imomachtijkawan in Jesús, iwan okinmilwijkej:

—¿Tlanik namejwan antlakuaj iwan ankonij inwan tlakaj tlajtlakolejkej iwan noijki inwan tlakaj katlej tlakobraroaj ika impuestos?

³¹ Jesús okinnankilij:

—Se tepajtij mach moneki ma kinpajti katlej kualtin iwan katlej mach mokokoaj, sino moneki ma kinpajti katlej mokokoaj. ³² Nej mach oniwalaj onikinnottzako katlej yolchipawakej, sino onikinnottzako katlej tlajtlakolejkej para ma moyolkuepakan de intlajtlakol.

Jesús otlamachtij kenik se mosawas (ayunarios)

(Mt. 9:14-17; Mr. 2:18-22)

³³ Ijkuakón yejwan okitlajtlanijkej in Jesús:

—¿Tlanik imomachtijkawan in Juan iwan fariseos mosawaj iwan motiotzajtziliaj miekpa, pero momomachtijkawan tlakuaj iwan konij?

³⁴ Jesús okinnankilij:

—¿Welis namejwan ankintoktiskej ma mosawakan katlej inbitadostin nikuak katej itech se ilwilt kan monamiktiaj, mientras in novio ompa kajki inwan? ³⁵ Pero ajsis tonale nikuak kinkixtiliskej in novio, iwan ijkuakón kemaj welis mosawaskej.

³⁶ Noijki okinmilwij yin ejemplo:

—Mach akaj kiteki se pedaso tzotzole yankuik para ika kitilichos se tzotzole katlej ya tlajtlantok. Tla ijkón se kichiwas, tzayanis in tzotzole katlej ya tlajtlantok, iwan in pedaso de tzotzole yankuik mach kinamikis in tzotzole katlej ya tlajtlantok. ³⁷ Noijki mach akaj kitlalia vino yankuik ijtk kulambre katlej ya tlajtlantok. Porke in vino yankuik kitzomonia in kulambre katlej ya tlajtlantok, iwan nokiwi in vino iwan kulambre ijtlakawi. ³⁸ In vino yankuik moneki motlalis ijtk kulambre yankuik, iwan ijkón san ken omen kixikoskej. ³⁹ Iwan akin konis in vino katlej ya wejkawitl ewa, satepan mach ok kinekis konis vino katlej yankuik, porke kijtos: “In vino katlej ya wejkawitl ewa, okachi welik.”

6

In Señor iaxka in weyi tonale

(Mt. 12:1-8; Mr. 2:23-28)

¹ Ya semi nikuak weyi tonale, Jesús onejnentiaya kan toktok trigo, iwan imomachtijkawan okitektiayaj in trigo. Okitoxomayaj iwan okikuayaj itliolo in trigo. ² Ijkuakón sekimej fariseos okintlajtlanijkej:

—¿Tlanik ijkón ankichiwaj namejwan tlan amo techkawilia in totlanawatil ma tikchiwakan nikuak weyi tonale?

³ Jesús okinnankilij:

—¿Amo keman ankileroaj tlan okichij in rey David nikuak yej iwan ikompañeroswan oapismikiaj? ⁴ David okalakke ijtk in weyi tiopan, iwan okitilanke in pan katlej tlatiochivaloj, okikuaj in pan, iwan asta okinmajmakak noijki ikompañeroswan para ma kikuakan. Maski itlanawatil in Moisés kijita nik san yen tiopixkej welis kikuaskej yon pan.

⁵ Noijki okinmilwij:

—Nej katlej onimochij nitlakatl, Nej nikpia de nikijtos tlanon welis mochiwas nikuak weyi tonale.

Jesús okipajtij se tlakatl katlej omawakke

(Mt. 12:9-14; Mr. 3:1-6)

⁶ Itech oksé weyi tonale, Jesús okalakke itech se tiopan de yen judiojtin iwan ompa opéj tlamachtia. Ompa oyeka se tlakatl katlej owakke iyekma. ⁷ In tlamachtijkej de itlanawatil in Moisés iwan fariseos sa okixpixtokaj in Jesús para kitaskej kox kipajtis in yon tlakatl itech weyi tonale, iwan ijkón welis kitilwiskej. ⁸ Pero Jesús okimatia tlan yejwan okiyejyekotokaj, iwan okilwij in tlakatl katlej omawakke:

—Ximoketza iwan xiwiki nian tlatlajko.

In tlakatl omoketzke tlatlajko. ⁹ Ijkuakón Jesús okinmilwij in oksekimej:

—Namechtlajtlanis se tlajtole: ¿Tlanon techkawilia itlanawatil in Moisés ma se kichiwa nijuak weyi tonale? ¿Ma se kichiwa tlan kuale o noso tlan amo kuale? ¿Ma tikmakixtikan se tlakatl itech inemilis, o noso ma tikmiktikan?

¹⁰ Toneses Jesús okintlatak nochtin katlej okiyawalojtokaj, iwan okilwij in tlakatl:

—Xikmelawa moma.

In tlakatl okimelaj ima, iwan opajtik. ¹¹ Pero in tlamachtijkej de itlanawatil in Moisés iwan fariseos sa tekitl okualankej, iwan opéj kimolwiaj se iwan oksé tlanon welis kitoktiskej in Jesús.

*Jesús okinpejpenke majtlakte iwan ome itlatitlanilwan
(Mt. 10:1-4; Mr. 3:13-19)*

¹² Itech yonmej tonaltin Jesús oyáj ipan se tepetl omotiotzatzilito, iwan nochti in se yuale omotiotzajtzilijtoka inawak Dios. ¹³ Nijuak otlaneske, okinnotzke imomachtijkawan, iwan okinpejpenke majtlakte iwan ome de yonmej imomachtijkawan, katlej okintokaxtij tlatitlaniltin. ¹⁴ Ijkín intoka in tlatitlaniltin: Simón, katlej Jesús okitokayotij Pedro, Andrés ikni in Simón, Jacobo, Juan, Felipe, Bartolomé, ¹⁵ Mateo, Tomás, Jacobo itelpoch in Alfeo, Simón katlej onemia inwan cananistas, ¹⁶ Judas ikni in Jacobo, iwan Judas Iscariote, katlej satepan okitemaktij (okitemaktilij) in Jesús.

*Jesús okinmachtij miekej tlakaj
(Mt. 4:23-25)*

¹⁷ Jesús otemok de ipan tepetl iwan omoketzke se lugar kan tlalixtlawak iwan imomachtijkawan iwan miekej oksekimej tlakaj. Miekej tlakaj ovalajkej de nochti in estado de Judea, de weyikan de Jerusalén iwan de región de weyikan de Tiro iwan de weyikan de Sidón katlej katej itempan atl. Ovalajkej para kikakiskej in Jesús iwan para ma kinpajti de inkokolis. ¹⁸ Akinmej okipiayaj ejekamej mach kualtin iwan otlajyowiyaj por yon, noijki opajtikej. ¹⁹ Nochtin in tlakaj okinekiaj kikitziskej in Jesús, porke Yej okinpajtiaya nochtin ika ipoder.

Xipakikan

(Mt. 5:1-12)

²⁰ Ijkuakón Jesú斯 okintlatak imomachtijkawan iwan okin-milwij:

—Xipakikan namejwan katlej anpobrestin, porke namejwan ankipiaj parte kan Dios tlanawatia.

²¹ 'Xipakikan namejwan katlej axan antiojsiwij, porke namejwan anmixwiskej.

'Xipakikan namejwan katlej axan anchokaj, porke satepan namejwan anpakiskej.

²² 'Xipakikan namejwan nikuak in tlakaj amechkokoliskej, nikuak mach amechresibiroskej, nikuak amechwikaltiskej, iwan nikuak tlajtoskej biero de amejwan porke annechnel-tokaj Nej katlej onimochij nitlakatl. ²³ Sa tekil xipakikan nikuak ijkón anpanoskej, porke namejwan anpiresibiroskej se weyi tlaxtlawile ompa ilwikak. Porke in ya wejkawitl in-weyitajwan no ijkón okintoktijkej in ya wejkawitl profetajtin.

²⁴ 'Pero anpobrestin namejwan katlej ankimopialiaj, porke in pakistle katlej axan ankipiaj tlamis nochí san ixko yin tlaltikpak.

²⁵ 'Anpobrestin namejwan katlej axan anmixwitonej, porke satepan antiojsiwiskej.

'Anpobrestin namejwan katlej axan anwetzkaj, porke satepan namejwan anchokaskej de neyolkokole.

²⁶ 'Anpobrestin namejwan nikuak nochtin in tlakaj tlapoaskej kuale de amejwan, porke in ya wejkawitl namoweyitajwan noiiki otlapoayaj kuale de yen profetajtin tekajkayaijkej.

Ma se kintlasojtla tokontraswan

(Mt. 5:38-48; 7:12)

²⁷ 'Pero namejwan katlej annechkakij namechilwia: Xik-intlasojtlakan namokontraswan. Xikinchiwilikan tlan kuale akinmej amechkokoliaj. ²⁸ Xiktlajtlanilikan in Dios ma kintiochiwa akinmej amechwikaltiaj. Xiktlajtlanilikan in Dios ma kintiochiwa akinmej amechtoktiaj tlan amo kuale. ²⁹ Tla akaj mitzixtlatzinia ik se lado, xikkawili noiiki ma mitzixtlatzini in oksé lado. Iwan tla akaj mitzkixtilia mokoton, xikkawili noiiki ma kitki mokamisa. ³⁰ Tla akaj mitztlajtlanilis itlaj, xikmaka. Iwan akin mitzkixtilis itlaj tlan moaxka, ayakmo xiktlajtlanili. ³¹ Xikinchiwilikan in oksekimej ijkón ken namejwan ankinekij ma amechchiwilikan.

³² 'Tla namejwan ankintlasojtlaj san yen katlej amechtlasojtlaj, ¿kox kuale tlan ankichiwaj? Asta in tlajtlakolejkej no ijkón kichiwaj. ³³ O noso tla ankinchiwiliaj tlan kuale san yen akinmej amechchiwiliani tlan kuale, ¿kox kuale tlan

ankichiwaj? In tlajtlakolejkej no ijkón kichiwaj.³⁴ Iwan tla ankintlanetiaj itlaj san yen akinmej ankiyejyekoaj ankiresibroskej noiiki itlaj de yejwan, ¿kox kuale tlan ankichiwaj? Porke noiiki in tlajtlakolejkej kimotlatlanetiaj itlaj entre yejwan, iwan kichiaj noiiki itlaj kiresibroskej.³⁵ Pero namejwan moneki xikintlasoxtlakan namokontraswan, iwan xikinchiwilikan tlan kuale iwan xikintlanetikan tlan kinekij iwan amo xikchiakan ma amechmakakan itlaj por ankintlanetiaj. Ijkón ankipiaskej miek amotlaxtlawil, iwan namejwan anyeskej antekonewan de Dios weyikistok (weyititok). Porke Yej sa tekitl yolyamanke iwan kinchiwilia tlan kuale in tlakaj katlej mach kimatij motlasojkamatij iwan katlej mach kualtin.³⁶ Namejwan xiekan anteiknomatkej, ijkón ken namoPapan Dios Yej teiknomatke.

Amo ma se tepojpoa

(Mt. 7:1-5)

³⁷ 'Amo xikinpojpoakan in oksekimej iwan nion amo xikintlajtlakoltikan para ijkón Dios noiiki amo ma amechtlajtlakolti. Xitetlapojpolwikan, iwan Dios amechtlapojpolwis.³⁸ Xiktemakakan, iwan Dios amechmakas. Dios amechmakas miek, ken ikuak se kitemaka se tlatamachiwale tentok de tliale, tijtilintok, kuale tetentok iwan tzontitok, porke Dios amechmakas ijkón ken namejwan ankitemakaj.

³⁹ Jesús noiiki okijtoj se ejemplo:

—¿Welis se tlakatl katlej mach tlachia kiyekanas oksé katlej noiiki mach tlachia? ¿Amo san ken omen welis wetzitiwej ijtk se kuyoktle?⁴⁰ Se katlej momachtij mach kipanawilia katlej itlamachtij. Pero nikuak tlamic momachtis, noiiki yetos ken itlamachtij.

⁴¹ 'Kenik in tej weli tikistlakawia in mokni por yen tlajtlakole katlej kichiwa, iwan tej mach timota nik tikchijtok okachi weyi tlajtlakole?⁴² ¿O noso kenik weli tikilwia in mokni: "Mach ok xitlajtlako", iwan tej tikchijtok miek tlajtlakole? ¡Teixkajkayaj! Achtoj tej xikkawa in tlajtlakole katlej miek tikchijtok, iwan ijkón welis tikilwis in mokni mach ok ma tlajtlako maski mach miek tlajtlakole tlan kichiwa.

Se kuawitl mixmati por yen itlakilo

(Mt. 7:17-20; 12:33-35)

⁴³ 'Se tlatoxtle kuale mach kitemaka itlakilo mach kuale, iwan se tlatoxtle katlej mach kuale mach weli kitemaka itlakilo kuale.⁴⁴ Porke nochí kuawitl moixmati por yen itlakilo. Mach moteki igos itech nojpale, nion mach moteki uvas itech kuatlanwitztle.⁴⁵ Se kuale tlakatl kijta tlan kuale porke ipan iyolo onkaj tlan kuale, iwan se tlakatl katlej mach kuale kijta

tlan amo kuale porke ipan iyolo onkaj tlan amo kuale. Porke ika iten kijta tlan onkaj ipan iyolo.

*Omen tlakaj okichijkej inkalwan
(Mt. 7:24-27)*

⁴⁶ '¿Tlanik namejwan annechnotzaj, "Señor, Señor", iwan mach ankichiwaj tlan namechilwia? ⁴⁷ Akin witz nonawak, iwan nechkakilia notlajtol iwan kichiwa tlan nikijta, yon ken se tlakatl ⁴⁸ katlej okichij ikal, pero achtoj otlakuyonij wejkatlan, iwan okitlalij in cimiento ipan tetl. Nijuak oweiyiyak in kiawalatl, in atl okimomagato chikawak in kale, pero mach okolinij porke okipiaya icimiento ipan tetl. ⁴⁹ Pero akin nechkaki iwan amo kichiwa tlan nikijta, yon ken se tlakatl katlej okichij ikal ipan tlale, iwan mach kipia icimiento. Iwan nijuak oweiyiyak in kiawalatl iwan okimomagato chikawak in kale, owetzke iwan nochi oxitinke.

7

*Jesús okipajtij itekipanoj de se kapitan
(Mt. 8:5-13)*

¹ Nijuak Jesús otlanke okintlapowij in tlakaj, oyáj para pueblo de Capernaum. ² Ompa oyeka se kapitan romano katlej okipiaya se itekipanoj katlej okitlaosojtlaya, iwan katlej omokokoaya iwan ya oixpolitoka. ³ Nijuak in kapitan okikakke otlapoayaj de Jesús, ikuakón okintitlanke sekimej tlayekankej tetajtzitzintin judiojtin para ma kitlatlawtitij ma wiki ma kipajtiki itekipanoj. ⁴ Yejwan omikuaniijkej inawak Jesús iwan opéj kitlatlawtiaj miek, okilwiayaj:

—Yin kapitan moneki xikpalewi, ⁵ porke yej kintlasojtla in judiojtin, iwan yej inewian otlanawatij ma kichiwakan totiopan ika itomin.

⁶ Toneses Jesús oyáj inwan. Pero nijuak ya onajsiaj ichan kapitan, in kapitan okintitlanke sekimej iamigoswan para ma kilwikan in Jesús:

—Señor, amo xitlanemili, porke mach notech powi xikalaki nokalijtik. ⁷ Por yonik nion mach onimixewij oniaj onimitztemoto nonewian. San xikijto ma pajti notekipanoj iwan yej pajtis. ⁸ Porke nej noijki nimomatok nikintlakita notlayekankej. Iwan noijki nikinpia soldadojtin katlej nechtakitatij. Iwan tla nikilwis se de yejwan: "Xiwia ne", in yej yawi. Iwan tla nikilwis oksé: "Xiliki", in yej witz. Iwan tla nikilwis in notekipanoj: "Xikchiwa yin tekitl", in yej kichiwa.

⁹ Nijuak Jesús ijkón okikakke, sa omotlajtlachialtij (omomajmawtij). Ikuakón omokuepke iwan okintlatak in tlakaj katlej oyajay ikuatlapan iwan okijtoj:

—Ipan melajka namechilwia, ke mach nikaksi nion se judío katlej kipia weyi itlaneltokalis ken yin tlakatl.

¹⁰ In tlakaj katlej okintitlankaj omokuepkej ichan kapitan iwan okajsitajsikej itekipanoj in kapitan yopajtik.

Jesús okiyolitij ikone de se viuda

¹¹ Satepan de yon, Jesús oonewak ik se pueblo itoka Naín. Imomachtijkawan iwan miekej tlakaj noiiki oyayaj iwan Jesús. ¹² Níkuak oajsitoj kalyakapan de yon pueblo, okitak yawij kitookatiwej se mikkatl. Yon mikkatl oyeka ikone se viuda katlej okipixke san yon se ikone. Miekej tlakaj de yon pueblo okiakompañaroayaj in viuda. ¹³ Níkuak in Señor okitak in viuda, okiknomatke iwan okilwij:

—Amo xichoka.

¹⁴ Iíkuakón Jesús omíkuanij iwan okitlalij ima ipan kaja. Iwan katlej okikechpanoayaj in kaja omoketzkej. Iwan Jesús okilwij in mikkatl:

—Telpochtle, Nej nimitzilwia: ¡Ximoketza!

¹⁵ Tones katlej omikka, omotlalij iwan opéj tlpoa, iwan Jesús okimaktilij imaman. ¹⁶ Nochtin omomawtijkej níkuak ijkón okitakej, iwan opéj kiweyikixtiaj in toTajzin Dios, okij-toayaj:

—Omonextij se weyi profeta tonawak.

Noiki okijtoayaj:

—Dios ovalaj para kinpalewis in judiojtin.

¹⁷ Nochi in estado de Judea iwan nochtin pueblotin katlej okiyawalojtokaj, okimatkej tlan Jesús okichij.

In Juan Tlakuateekij okintitlanke omen imomachtijkawan inawak Jesús

(Mt. 11:2-19)

¹⁸ Imomachtijkawan in Juan Tlakuateekij okilwiayaj nochi tlan Jesús okichiwaya. Tones in Juan okinnotzke omen imomachtijkawan, ¹⁹ iwan okintitlanke inawak Jesús para ma kitlajtlaniitij kox melawak yen Cristo katlej kipia de witz, o noso ok moneki kichiaskej ma wiki. ²⁰ Itlatitlanilwan in Juan omíkuanijkej inawak Jesús, iwan okitlajtlaniijkej:

—In Juan Tlakuateekij otechwaltitlanke ma timitztlajtlaniijkej kox yen tejwatzin tiCristo katlej kipia de witz, o noso ok moneki tikchiaskej ma wiki.

²¹ Níkuak imomachtijkawan in Juan oajsitoj inawak Jesús, Yej iíkuakón meroj okinpajtijtoka miekej tlakaj katlej okipaiyaj tlatlamantle kokolistle, iwan okinkixtiaya ejekamej mach kualtin, iwan okintlachialtiaya katlej mach otlachiayaj.

²² Iíkuakón Jesús okinnankilij:

—Xiwian iwan xikilwikan in Juan tlan namejwan ya ankitakej iwan ya ankikakej. Xikilwikan nik in tlakaj katlej mach

otlachiayaj axan ya tlachiaj, in koxomej ya kuale nejnemij, katlej opalania innakayo axan ya chipawij de inkokolis, katlej mach otlakakiaj axan ya tlakakij, in mikkamej moyolkuij, iwan in pobrestin kikakij in kuale tlajtole katlej temakixtia.²³ Ma paki akin amo kipolos itlaneltokalis nonawak.

²⁴ Nijuak oyajkej katlej Juan okintitlanka, ikuakón Jesús opéj kintlapowia in tlakaj de yen Juan Tlakuateekij:

—¿Tlan anyajkej ankitatoj ne kan tlawaki? ¿Ankitatoj se tlakatl katlej itlaneltokalis kiitki in ejekatl no ken ikuak in ejekatl kiitki se akatl? ²⁵ ¿Akin kiné ankitatoj? ¿Ankitatoj se tlakatl katlej omotlakentiaya ika kuale itzotzol? Namejwan kuale ankimatiij ke katlej kuale motlakentiaj katej ichan reytin. ²⁶ Tones, ¿tlan anakiskej ankitatoj? ¿Se profeta? Melawak, yej okachi kipanawilia ke se profeta. ²⁷ In tiotlajkuijole tlapoa de yen Juan kan kijta:

Nej niktitlani notlatematiltij moyakapan,
ma mitzyektlalili in ojtle.

²⁸ Iwan namechilwia, ke entre nocthin in tlakaj mach akaj onkaj katlej okachi ma kipanawili in Juan Tlakuateekij. Pero se tlaneltokak katlej okachi tzikitzin de kan Dios tlanawatia yen yon okachi weyi ke Juan.

²⁹ Nochtin in tlakaj iwan asta katlej tlakobraroaj ika impuestos nijuak okikakej tlan okintlapowij in Juan, omotemakakej ma kinkuateeki, porke okineltokakej iwan okitakej nik sa tekitl kuale tlajtol in toTajtzin Dios katlej Juan okinmacthiaya. ³⁰ Pero in fariseos iwan in tlamachtijkej de itlanawatil in Moisés mach okineltokakej, mach okinekej ma kinkuateeki in Juan, iwan ijkón yejwan mach okinekej tlan Dios okinekia para yejwan. ³¹ Iwan toSeñor Jesús okijtoj:

—¿Tlan ika welis nikinkompararos in tlakaj de yin tiempo?
³² Yejwan ken telpokamej katlej motlaliaj mawiltiaj itech tiankistle iwan kintzajtziliaj inmamigoswan, kinmilwiaj: “Mach ijki nik anmawiltiaj. Tejwan otamechtlapichilijkej para ximijtotikan, pero mach anmijtotijkej. Otamechtlakuikilijkej se tlakuikale teyolkokoj, pero mach ankinekej anchokakej.” ³³ Porke, owalaj in Juan katlej mach otlakuaya porke omosawaya (oayunaroaya) iwan mach okonia vino, iwan namejwan ankijtaj ke kipia se ejekatl mach kuale. ³⁴ Satepan, oniwala Nej katlej onimochij nitlakatl, iwan nitlakua iwan nikoni. Iwan namejwan ankijtaj wel nitlakuani iwan nitlawanke, iwan ankijtaj inwan nimowika in tlajtlakolejkej iwan katlej tlakobraroaj ika impuestos. ³⁵ Pero in ixtlamachilistle de Dios mota por tlan se kichiwa ika Dios iixtlamachilis.

Jesús oyáj ichan se fariseo itoka Simón

³⁶ Se fariseo okinbitaroj in Jesús ma tlakuati ichan. Jesús oyáj ichan fariseo iwan omotlalij itech mesa. ³⁷ Ijkuakón se siwatl momekatij de yon pueblo, nikuak okimatke nik in Jesús oyáj otlakuato ichan fariseo, ijkuakón yej ompa oajsito okitkia se boteyajtzin de alabastro tentok de ajwiakayotl. ³⁸ Omotlalij ikxitlan Jesús chokatok iwan opéj kikxipaka ika ixayo. Satepan opéj kikxiwajwazta ika itzonkal, okikxipipitzoj iwan okiteekilij ajwiakayotl ipan ikxiwan. ³⁹ Nikuak ijkón okitak in fariseo katlej okinbitaroj in Jesús, okiyejyekoj: “Tla yin tlakatl melawak yeskia profeta, kimomakani kuenta akin kikikitzkijtok iwan tlan itekiw in siwatl, porke yin siwatl tlajtlakolej.” ⁴⁰ Ijkuakón Jesús okilwij in fariseo:

—Simón, nikneki nimitzilwis se tlajtole.

In fariseo okinankilij:

—Xinechilwi, Tlamachtij.

⁴¹ Jesús okijtoj:

—Omen tlakaj okiwiliaya tomin se katlej tetomintlanetij. Se okiwiliaya makuile siento denariojtomín, iwan oksé okiwiliaya omenpoale iwan majtlakte denariojtomín. ⁴² Iwan komo mach oweliaj okikuepiliaya, in tetomintlanetij okintlapojpolwíj san ken omen. Axan xinechilwi, ¿akin okachi okipialij tlasojoatlaliste de yonmej omen?

⁴³ Simón okinankilij:

—Nej nikijta yen katlej okachi okintlapojpolwíj de tlan okiwiliaya.

Jesús okilwij:

—Melawak tlan tikipta.

⁴⁴ Toneses Jesús okitlatak in siwatl, iwan okilwij in Simón:

—¿Tikita yin siwatl? Onikalakke mokalijtik, iwan mach otinechmakak atl para nokxiwan. Pero yin siwatl onechikxipakke ika ixayo, iwan onechikxiwajwatzke ika itzonkal. ⁴⁵ Tej mach otinechixpipitzoj, pero yej nechikxipipitzotok desde onikalakke. ⁴⁶ Tej mach otinechtlalilij aseite ipan notzontekon, pero yej onechteekilij ajwiakayotl ipan nokxiwan. ⁴⁷ Por yonik nimitzilwia, yin siwatl mota nik okichij miek tlajtlakole iwan axan Nej yoniktlapojpolwíj de nochitlajtlakol porke nikita nik sa tekitl nechtlasojtla. Nikuak se tlakatl kimachilia mach okachi moneki ma kitlapojpolwikan, toneses noijki san achitzin motlasojkamatis nikuak kitlapojpolwiskej.

⁴⁸ Ijkuakón okilwij in siwatl:

—Nimitztlapojpolwia de nochitlajtlakol.

⁴⁹ Iwan inbitadostin katlej ompa oewatokaj iwan Jesús, opéj kimolwiaj entre yejwan:

—¿Akin yin tlakatl? ¿Tlanik mixewia tetlapojojpolwia itech tlajtlakole?

⁵⁰ Pero Jesús okilwij in siwatl:

—Motlaneltokalis yomitzmakixtij. Xiwia ika kuale.

8

In Siwamej katlej okipalewiayaj in Jesús

¹ Satepan de yon, Jesús onemia itech miekej weyikantin iwan itech miekej pueblotin, okitematiltijtinemia iwan otetlapowijtinemia de yen kuale tlajtole katlej temakixtia de kenik Dios tlanawatia. In majtlakte iwan omen imomachtijkawan oyaya iwan Jesús. ² Noijki Iwan oyaya sekimej siwamej katlej okinpajtij de mach kualtin ejekamej iwan de tlatlamantle kokolistle. Sekimej de yejwan katlej oyaya iwan Jesús itoka María katlej noijki kinotzaj Magdalena katlej de pueblo de Magdala. Itech yon María okiskej chikomen ejekamej mach kualtin. ³ Noijki oyaya in Juana, isiwa in Chuza, yon tlakatl Chuza yej okitaya nochi tlan iaxka in rey Herodes. Noijki oyaya in Susana, iwan miekej oksekimej siwamej katlej okipalewiayaj in Jesús ika tlan okipiayaj.

Ejemplo de se tlakatl tlatoookak

(Mt. 13:1-9; Mr. 4:1-9)

⁴ Miekej okiskej de inpueblo para kitaskej in Jesús. Iwan nijuak omololojkej miekej tlakaj, ikuakón okintlapowij ika se ejemplo. Okinmilwij:

⁵ —Se tlakatl oyáj otookato. Nijuak otookatoka, sekin semiya owetzke ipan ojtle. In tlakaj ipan otlajtlaksakej, iwan totomej okikuajkej. ⁶ Oksekin semiya owetzke ijlik teyoj. Iwan nijuak yon semiya okiske, niman owakke porke okipoloaya kuechawalotl. ⁷ Oksekin semiya owetzke itzalko xiwitl witzoj, iwan in xiwitl witzoj okixiwmiktij in semiya katlej okiske. ⁸ Iwan oksekin semiya owetzke kan kuale tlale. Iwan nijuak okiske, omoskaltij iwan okipixke kuale itlakilo, iwan kada se semiya okitemakak asta se siento itliolo.

Nijuak Jesús otlanke ijkón okijtoj, ikuakón okinmilwij chikawak:

—Tla ankinekij ankimomakaskej kuenta, xikkakikan.

Jesús okitlajtlanjkej tlanik tlamachtia ika ejemplos

(Mt. 13:10-17; Mr. 4:10-12)

⁹ Imomachtijkawan okitlajtlanjkej tlan kijtosneki yon ejemplo. ¹⁰ Iwan Jesús okinmilwij:

—Namejwan Dios yoamechkawilij xikmatikan tlan oyeka tlatitok de kenik Dios tlanawatia. Pero oksekimej se kinmachtia ika ejemplos, para ijkón, maski ma kitakan tlan nikchiwa, mach ma kimomakakan kuenta tlan kitaj. Iwan

maski ma kikakikan notlajtol, mach ma kimatikan tlan kikakij.

Jesús okintomilij in ejemplo de yen tlatookak
(Mt. 13:18-23; Mr. 4:13-20)

¹¹ 'In ejemplo katlej yonamechilwij kijtosneki yen yin: In semiya yon kej yeskia itlajtol in Dios. ¹² In semiya katlej owetzke ipan ojtle yon ken akinmej kikakij itlajtol in Dios, pero witz in diablo iwan kinkixtilia in tlajtole katlej omotookak ipan inyolo, para amo ma kineltokakan iwan amo ma momakixtikan. ¹³ In semiya katlej owetzke ijtitk teyoj, yon ken akinmej kikakij itlajtol in Dios iwan kiresibiroaj ika pakilistle, pero mach wejkatlan monelwayotiaj. Kineltokaj san kanaj keski tonale, pero nikuak pewa tlajyowiaj ikuakón mosotlawaj iwan kikawaj in Dios. ¹⁴ In semiya katlej owetzke itzalko in xiwitl witzoj, yon ken akinmej kikakij itlajtol in Dios pero mach welij tlakij porke sa tekitl tlanemiliaj de kenik mopanoltiskej, iwan kenik morikojtiliskej iwan kenik mopaktiskej itech innemilis. ¹⁵ Pero in semiya katlej owetzke kan kuale tlale, yon ken akinmej ika kuale inyolo melawak kikakij itlajtol in Dios iwan nochipa kichiwaj tlan kijta itlajtol. Yonmej melawak kitemakaj kuale intlakilo.

Ejemplo de se tlanextle
(Mr. 4:21-25)

¹⁶ 'Mach akaj kitlikuitia se tlanextle para satepan kixtzakuas ika itlaj o noso kitlalis itlampa se kuawtlapechtle, sino motlalia ajkopan, para ma kintlawili nochtin akinmej kalakiskej kalijtik. ¹⁷ Porke nochti katlej amo momati kipia por momatis, iwan nochti katlej kajki tlatitok kipia por nesis iwan motas.

¹⁸ Ijkón kiné, kuale xikkakikan. Porke akin kinekis moskaltis okachi itech itlajtol in Dios, moskaltis okachi. Iwan katlej amo kinekis, kipolos asta tlan ya kimati.

Imaman iwan ikniwan Jesús
(Mt. 12:46-50; Mr. 3:31-35)

¹⁹ Satepan imaman iwan ikniwan Jesús oejkokej kan Yej oyeka, pero mach owelikej oasitoj asta inawak porke oyekaj miekej tlakaj. ²⁰ Iwan se tlakatl okilwij in Jesús:

—Momaman iwan mokniwan katej kalan iwan kinekij mitzitaskej.

²¹ Pero Jesús okinmilwij:

—In tlakaj katlej kikakij itlajtol in Dios iwan kichiwaj tlan kijta, kijtosneki yejwan nomaman iwan yejwan nokniwan.

Jesús okiketzaltij in ejekatl iwan atl
(Mt. 8:23-27; Mr. 4:35-41)

²² Se tonale Jesús otlejkok itech se barko iwan imomachtijkawan, iwan okinmilwij:

—Ma tipanokan oksé lado de yin atl.

Iwan oyajkej. ²³ Iwan nijuak opanotiayaj, Jesús okochke. Ijkuakón ovalaj se ejekatl chikawak iwan atl opéj motlamotla ipan barko iwan opéj atemi asta ya meroj apolakini. ²⁴ Ijkuakón okijxitijkej in Jesús, iwan okilwijkej:

—¡Tlamachtij! ¡Tlamachtij! ¡Tiapolakij!

Jesús omoketzke iwan okajwak in ejekatl iwan atl katlej omotlatlamotlaya. Ijkuakón omoketzke in ejekatl iwan atl iwan nochí omokaj sa tlamantok. ²⁵ Ijkuakón Jesús okinmilwij imomachtijkawan:

—¿Kanin kajki namotlaneltokalis?

Yejwan sa tekitl omomawtijkej iwan sa otlajtlachixkej (omomajmawtijkej), iwan omotlatlaniayaj se iwan oksé:

—¿Akin yin tlakatl? ¿Kenik weli kinnawatia in ejekatl iwan atl iwan kitlakitaj?

*Jesús okinkixtij ejekamej mach kualtin de itech se tlakatl
(Mt. 8:28-34; Mr. 5:1-20)*

²⁶ Satepan oejkokej ipan intlat in gadarenostlakaj, katlej kajki oksé lado de yen atl iwan kixnamiktok in estado de Galilea. ²⁷ Nijuak Jesús otemok de itech barko, ijkuakón se tlakatl de yon pueblo omijkuanij inawak Jesús. Yon tlakatl ya wejkawitl okinpiaya ejekamej mach kualtin. Mach omotzotzoltiaya iwan nion mach ochantia itech se kale, sino ochantia ijtik mikkakuyoktin. ²⁸ Nijuak in tlakatl okitak in Jesús, otzajtzik chikawak iwan omotlankuaketze ikxitlan, iwan okijtoj chikawak:

—¿Tlan tikneki nowan, Jesús, teKone de Dios Weyikistok (Weyititok)? Nimitzlatlawtia amo xinechtitlani ijtik tliko.

²⁹ Ijkón okijtoj porke Jesús okinawatijtoka in mach kuale ejekatl ma kisa de ijtik in tlakatl. Ya wejkawitl in ejekatl mach kuale yokimoaxkatijka in tlakatl. Iwan miek buelta okijilpiayaj ika kadena itech imawan iwan itech ikxiwan. Pero yej okinkojkotonaya in kadenajtin, iwan in mach kuale ejekatl okitktiaya ma wia kan tlawaki. ³⁰ Jesús okitlatlaniij:

—¿Tlan motoka?

Iwan yej okinankilij:

—Nej nikpia miek notoka.

Ijkón okijtoj porke oyekaj sa tekitl miekej ejekamej mach kualtin katlej okalakej ijtik in tlakatl. ³¹ Iwan in ejekamej mach kualtin okitlatlawtijkej in Jesús amo ma kintitlani ijtik in kuyoktle weyi katlej mach kipia kan ontlami. ³² Komo oyekaj miekej pitzomej otlakuajtokaj ipan tepetl, in mach kualtin ejekamej okitlatlawtijkej in Jesús ma kinkawili ma

kalakikan inmijtik in pitzomej. Jesús okinkawilij kiné.
 33 Ijkuakón in ejekamej mach kualtin okiskej de ijtk in tlakatl iwan okalakej inmijtik in pitzomej, iwan pitzomej nochtin okikistewakej iwan omotepejxiwitoj ixkuak se tepejxitl iwan owetzkej asta ijtk atl, nochtin omoatlanwijkej iwan omikkej.

34 In tlajpixkej de yonmej pitzomej, nikuak okitakej tlan otlamochij, omotlalojkej oyajkej okitematiltitoj itech pueblo iwan ik tetlalaj. 35 In tlakaj oyajkej okitatoj tlan otlamochij. Nikuak oajsitoj kan oyeka in Jesús, okajsitsajsikej in tlakatl katlej ijtk okiskej in ejekamej mach kualtin, ewatok ikxitlan Jesús. Ya tzotzolejtok iwan ya ika kuale itlalnamikilis. Iwan omomajmawtijkej. 36 Akinmej okitakej tlan otlamochij, otetlapowijkej kenik opajtik in tlakatl katlej ijtk okiskej in ejekamej mach kualtin. 37 Tones nochtin in tlakaj de yon región de Gadara opéj kitlatlawtiaj in Jesús ma wia de ompa, porke sa tekitl omomawtiayaj. Ijkuakón kiné, Jesús otlejkok itech barko iwan oyáj. 38 In tlakatl katlej ijtk okiskej in ejekamej mach kualtin, okitlatlawtij in Jesús ma kikawili ma wia Iwan, pero Jesús okinawatij ma mokawa. Okilwij:

39 —Ximokuepa mochan, iwan xitetlapowi de nochti in wejweyin tlamantin tlan Dios okichij por tej.

In tlakatl oyáj, iwan otetlapowij itech nochti in pueblo de nochti tlan Jesús okichij por yej.

*In siwatl katlej okitzotzolkitzkij in Jesús iwan opajtik
 (Mt. 9:18-26; Mr. 5:21-43)*

40 Nikuak Jesús omokuepke oksé lado de yen lago, in tlakaj okiresibirojkej ika pakistle. Porke nochtin okichixtokaj. 41 Ijkuakón ovalaj se tlakatl itoka Jairo, katlej oyeka tlayekanke de itech se tiopan de yen judiojtin. Yon tlakatl omotlankuaketkze ikxitlan Jesús iwan okitlatlawtij ma wia ichan, 42 porke okipiaya san se itakkoj de majtlakte iwan ome xiwitl, katlej yomiktoka. Nikuak Jesús yoyaya ichan Jairo, miejek tlakaj no Iwan oyayaj iwan asta sa okipajpatzmiktiayaj.

43 Ompa intzalko oyaya se siwatl katlej okipiaya majtlakte iwan ome xiwitl de oestlapowik, iwan yokitlamij nochti itomin innawak in tepajtijkej, iwan mach akaj owelia okipajtiaya. 44 Yon siwatl omijkuanij ikuilapan Jesús iwan okitempankitzkilij itzotzol, iwan san niman ijkuakón omoketzke iestlapowilis.

45 Ijkuakón Jesús okijtoj:

—¿Akin okitzkij notlaken?

Nochtin okijtoayaj nik in yejwan mach okikitzkilijkej, ijkuakón Pedro iwan ikompañeroswan okijtojkej:

—Tlamachtij, in tlakaj mitzpajpatzmiktiaj iwan mitztoj-topewaj, ¿tlanik ok titlajtlani akin okitzkij motlaken?

⁴⁶ Pero Jesús okijtoj:

—Akaj onechtlakenkitzkij. Porke onikmachilij notech okiske poder iwan nikmati nik akaj opajtik ika nopoder.

⁴⁷ Nijuak in siwatl okimomakak kuenta nik mach welis kitlaatis de kenik opajtik, ovalaj papatlakatiwitz (bibiokatitz) iwan omotlankuaketzke ikxitlan Jesús. Okimokuitij nochi inmixpan nochtin tlakaj por tlanik okitzotzolkitzkij, iwan kenik opajitiwetzke san niman nijuak okitzotzolkitzkij. ⁴⁸ Ijkuakón Jesús okilwij in siwatl:

—Nokone, yotipajtik porke otinechneltokak. Xiwia ika kuale.

⁴⁹ Nijuak in Jesús okitlapowijtoka in siwatl, ijkuakón oejkok se tlakatl katlej ovalaj de ichan Jairo, yon Jairo yen katlej tlayekanke de tiopan, iwan yon tlakatl okilwij in Jairo:

—Motakkoj yomikke. Ayakmo xiktekimaka in Tlamachtij.

⁵⁰ Pero nijuak Jesús okikakke, okilwij:

—Amo ximomawti. Tej san xitlaneltokato, iwan motakkoj pajtis.

⁵¹ Nijuak Jesús oajsito ichan Jairo, Jesús mach akaj okawilij ma kalaki Iwan, san yen Pedro, Jacobo, Juan iwan tetajmey de yen takkoj. ⁵² Nochtin okichokilijtokaj iwan omoyolkokojtokaj. Pero Jesús okinmilwij:

—Amo xichokakan. In takkoj ayamo miki, sino yej san kochi.

⁵³ Yejwan san okiwewetzkilijkej, porke okimatiaj nik yomikke. ⁵⁴ Toneses in Jesús okimakitzkij in takkoj iwan okilwij chikawak:

—Takkoj, ximewa.

⁵⁵ San niman ianima omokuepke oksemi itech inemilis iwan owalmejtewak. Jesús okinnawatij ma kitlamakakan in takkoj. ⁵⁶ In tetajmey de yon takkoj sa otajtlachixkej (omomajmawtijkej). Pero Jesús okinnawatij amakaj itlaj ma kilwikan de tlan otlamochij.

9

Jesús okinnotzke majtlakte iwan ome imomachtijkawan para ma tetlapowitij

(Mt. 10:5-15; Mr. 6:7-13)

¹ Jesús okinmololoj in majtlakte iwan omen imomachtijkawan iwan okinmakak poder iwan tlanawatijkayotl para kinkixtiskej nochi tlamtante de ejekamej mach kualtin, iwan

para tepajtiskej de nochí kokolistle.² Okintitlanke ma kitematiltitij de kenik Dios tlanawatia, iwan ma kinpajtikan in kokoxkej.³ Iwan okinmilwij:

—Amitlaj xikitkikan níjkuak anyaskej ipan ojtle, nion kartotij, nion bolsa, nion pan, nion tomin, iwan nimpó amo xikitkikan ome namotzotzol.⁴ San katlij yej kalijtik kan anmajsiskej, ompa ximokawakan asta iikuak ankisaskej de itech yon pueblo.⁵ Iwan kan amo kinekiskej anmechresibirosej, xikisakan de itech yon pueblo iwan ximokxitlaltzejzelokan, para ma kimomakakan kuenta nik mach kuale tlan yejwan kichiwaj.

⁶ Yejwan, kiné, oyajkej itech nochtin pueblojtzitzintin, okitematiltijtiajkej in kuale tlajtole katlej temakixtia iwan okinpajtijtiajkej in kokoxkej.

In Juan Tlakuateekij okimiktijkej

(Mt. 14:1-12; Mr. 6:14-29)

⁷ In gobernador o noso rey Herodes okimatke nochí tlan Jesúś okichiwaya, iwan mach ok okimatia tlan kichiwas, porke sekimej okijoayaj ke Juan Tlakuateekij yomoyolkuij oksemi satepan de omikke.⁸ Oksekimej okijoayaj yen profeta Elías yomonextij. Iwan oksekimej okijoayaj yon se katlej ya wejkawitl profeta yomoyolkuij.⁹ Pero Herodes okijtoj:

—Nej nonewian onitlanawatij ma kikechtzontekikan in Juan. ¿Akin yin, kiné, wel nikkaki motlapowiaj de yej?

Iwan Herodes okitemoaya kenik welis kitas in Jesúś.

Jesúś okintlamakak makuile mil tlakaj

(Mt. 14:13-21; Mr. 6:30-44; Jn. 6:1-14)

¹⁰ Níjkuak in tlatitlaniltin omokuepatoj, okimatiltijkej in Jesúś nochí tlan okichijkej. Satepan okinwikak iwan oyajkej san yejwan inselti ik se lugar kan tlalkawale kan mach akaj tlakatl nemí, iwan mach wejka de pueblo de Betsaida.¹¹ Pero níjkuak in tlakaj okimatkej, oyajkej okajsitoj. Jesúś okiresibiroj iwan okintlapowij de kenik Dios tlanawatia iwan okinpajtij in kokoxkej.

¹² Níjkuak otiotlakik, in majtlakte iwan omen imomachti-jkawan omíjkuaniijkej inawak Jesúś iwan okilwijkej:

—Xikintitlani in tlakaj para ma mosewitij iwan ma kite-motij tlan kikuaskej. Ma wian ik pueblojtzitzintin iwan ik rancherías katlej katej serka, porke nian kan tikatej mach itlaj onkaj.

¹³ Jesúś okinmilwij:

—Namejwan xikintlamakakan.

Yejwan okilwijkej:

—Mach tikpiaj tlanon tikinmakaskej, sanwel tikpiaj makuile pan iwan ome michimej. ¿O noso tikneki ma tiwian ma tikkowatij sekin tlakuale para nochtin?

¹⁴ Oyekaj kej makuile mil tlakaj. Ijkuakón Jesús okinmilwij imomachtijkawan:

—Xikinnawatikan ma motlalikan por grupojin de ojomen poale iwan majtlakte.

¹⁵ Ijkón okichijkej iwan nochtin omotlalijkej. ¹⁶ Ijkuakón Jesús okintilanke in makuile pan iwan ome michimej. Oajkopantlachixke, omotlasojkamatke inawak Dios por yon pan iwan michimej, iwan satepan de okinkojkotonke, okinmakak imomachtijkawan para ma kinxejxelilikan in tlakaj. ¹⁷ Nochtin kuale otlakuajkej asta oixwikej. Satepan okintemitijkej majtlakte iwan ome chikimej de pedasos katlej osobraroj.

Pedro okijtoj Jesús yen Cristo

(Mt. 16:13-19; Mr. 8:27-29)

¹⁸ Se tonale nikuak Jesús omotiotzajtzilitoka iselti iwan noiiki ompa Iwan oyekaj imomachtijkawan, okintlajtlanij:

—¿Ken kijta in tlakaj? ¿Akin Nej?

19 Yejwan okinankilijkej:

—Sekimej kijtaj tejwatzin tiJuan Tlakuateekij. Oksekimej kijtaj tejwatzin tiElías, iwan sekimej kijtaj tejwatzin tiprofeta katlej ya wejkawitl otimikke iwan axan yotimoyolkui.

²⁰ Toneses Jesús okintlajtlanij:

—Iwan namejwan, ¿ken ankijtaj? ¿Akin Nej?

Iwan Pedro okilwij:

—Tejwatzin tiCristo katlej Dios omitzwaltitlanke.

Jesús okinmilwij kenik mikis

(Mt. 16:20-28; Mr. 8:30—9:1)

²¹ Pero Jesús kuale okinnawatij amakaj itlaj ma kilwikan.

²² Iwan okinmilwij:

—Nej katlej onimochij nitlakatl sa tekitl nitlajyowis miek. In tlayekankej tetajtzitzintin, in tlayekankej tiopixkej, iwan tlamachtijkej de itlanawatil in Moisés mach nechnekiskej iwan nechmiktiskej. Pero ipan eyi tonale nimoyolkuis (nimoyolitis).

²³ Iwan okinmilwij nochtin:

—Tla akaj kineki witz nonawak, ma wiki kiné, pero moneki ayakmo ma kichiwa san tlan yej kinekis. Sino kipia de kixikos nochipa nochia san tlan panos iwan ma wiki nowan maski ma kimiktiikan itech krus. ²⁴ Porke akin kinekis kimakixtis inemilis, kipolos, pero akin kipolos inemilis por Nej, kimakixtis inemilis. ²⁵ Porke mach itlaj ipatij tla se tlakatl kimoaxkatis nochia tlan onkaj ixko yin tlaltikpak, iwan satepan ianima

yas ijtk tliko. ²⁶ Tla se tlakatl pinawas de Nej iwan de notlajtol, Nej noijki akin onimochij ntlakatl nppinawas de yon tlakatl nikuak niwitz ika nomawisotlanex, iwan ika imawisotlanex in noPapan iwan angelestin yolkchipawakej. ²⁷ Pero ipan melajka namechilwia, sekimej katlej nian katej, mach kixmatiskej in mikilistle asta amo ma kitakan kenik in Dios tlanawatia.

*Jesús otlakenpetlanke
(Mt. 17:1-8; Mr. 9:2-8)*

²⁸ Satepan de opanok kanaj chikueyi tonale de ikuak okijtoj in yon tlamantle, Jesús otlejkok ipan se tepetl omotiotzajtzilito, okinwikak in Pedro, Jacobo iwan Juan. ²⁹ Nikuak Jesús omotiotzajtzilitoka, ixko omopatlak, iwan noijki omopatlak itzotzol iwan sa tekitl oistayak iwan opetlanke. ³⁰ Ikuakón omonextijkej omen tlakaj omotlapowijtokaj iwan Jesús. Yen Moisés iwan Elías. ³¹ Omonextijkej kinyawalojtok imawisotlanex in Dios petlantok sa tekitl, omotlapowijtokaj iwan Jesús de kenik tlajyowis iwan kenik ixpoliwis itech weyikan de Jerusalén. ³² Maski in Pedro iwan ikompañeroswan sa tekitl okochisnekiaj, omokajkej ijsatokej, iwan okitakej imawisotlanex in Jesús iwan ok omen tlakaj katlej Iwan oyekaj. ³³ Nikuak nekatej tlakaj okajtejtiayaj in Jesús, ikuakón Pedro okilwij:

—Tlamachtij, sa kuale nian tikatej. Ma tикиnchiwakan eyi akawalkaltin, se para tejwatzin, se para Moisés iwan se para Elías.

Pero Pedro mach okimatis tlan okijtoaya. ³⁴ Iwan mientras Pedro ijkón okijtojtoka, ikuakón ovalaj se mixtle iwan okinkenke, iwan nikuak yoyekaj ijtk in mixtle, omomawtijkej. ³⁵ Ikuakón omokakke se tlajtole de ijtk mixtle. Ijkín omokakke okijtoj:

—Yin yen notlasojKone, xikkakilikan itlajtol.

³⁶ Nikuak otlanke omokakke yon tlajtole, ikuakón okitakej in Jesús sa iselti. Yejwan mach ok itlaj okijtojkej, iwan itech nekatej tonaltin mach akaj itlaj okilwijkej de tlan okitakej.

Jesús okipajtij se telpochtle katlej okipiaya se ejekatl mach kuale

(Mt. 17:14-21; Mr. 9:14-29)

³⁷ Owalmostlatik, nikuak otemokej de ipan tepetl, miekej tlakaj okinamikitoj in Jesús. ³⁸ Ikuakón se tlakatl katlej oyaya intzalko in tlakaj, okijtoj chikawak:

—Tlamachtij, nimitztlatlawtia xinechitili nokone, porke san yen se nikpia. ³⁹ Se ejekatl mach kuale kikitzkia iwan kitzajtzitia iwan kitoktia ma mimiki iwan ma kamaposoni.

Kikojkokoa iwan mach kineki kikajkawas. ⁴⁰ Onikintlatlawtij momomachtijkawan ma kikixtilikan in ejekatl mach kuale, pero mach owelikej.

⁴¹ Jesús okinankilij:

—¡Namejwan mach antlaneltokakej iwan ankiyejyekoaj tlan mach kuale! ¿Asta keman nietos amowan? ¿Asta keman ijkón namechxikojtos? Nian xinechwalwikili mokone.

⁴² Pero nikuak in telpochtle yomijkuanijtia ya inawak Jesús, in ejekatl mach kuale okitlalwitekke iwan okitktij ma mimiki. Pero Jesús okajwak in ejekatl mach kuale, iwan okipajtij in telpochtle iwan okimaktilij ipapan. ⁴³ Nochtin sa otlajtlachixkej (omomajmawtijkej) de yen ipoder in toTajzin Dios.

Jesús oksemi okitematiltij imikilis

(Mt. 17:22-23; Mr. 9:30-32)

Mientras nochtin sa otlajtlachiaj de tlan Jesús okichiwaya, Jesús okinmilwij imomachtijkawan:

⁴⁴ —Kuale xikkakikan yin tlan namechilwis iwan amo xikelkawakan: Nej katlej onimochij nitlakatl nechtemaktiskej (nechtemaktiliskej) inmak in tlakaj.

⁴⁵ Pero imomachtijkawan mach okimomakaya j kuenta tlan okinmilwiaya, porke Dios ayamo okinkawiliaya ma kimo-makakan kuenta. Iwan okimakasiaj de kitlajtlaniiskej tlan kijtosneki.

¿Akin okachi weyikistok?

(Mt. 18:1-5; Mr. 9:33-37)

⁴⁶ Satepan imomachtijkawan opéj motlatlajtolcuepaj de akin okachi weyikistok (weyititok) de entre yejwan. ⁴⁷ Pero Jesús okimomakak kuenta de tlan yejwan okiyejyekoayaj. Ijkuakón okitilanke se chocotzin, iwan okitlalij inakastlan.

⁴⁸ Iwan okinmilwij:

—Akin kiresibiros se chocotzin ken yin ika notoka, kijtosneki Nej nechresibiroa. Iwan akin Nej nechresibiroa, noijki kiresibiroa akin onechwaltitlanke. Porke akin kintekichiwilis in oksekimej, yen yon okachi weyikistos.

Akin amo kajki kontra tejwan towan kajki

(Mr. 9:38-40)

⁴⁹ Ijkuakón Juan okilwij:

—Tlamachtij, otiktakej se tlakatl kinkixtia ejekamej mach kualtin ika motoka. Iwan tejwan otikilwijkej ayakmo ijkón ma kichiwa, porke mach towan nemi.

⁵⁰ Pero Jesús okilwij:

—Xikkawilikan ma kichiwa, porke akin amo kajki kontra tejwan, towan kajki.

Jesús okajwak in Jacobo iwan Juan

⁵¹ Nijuak yoajsia in tonale para Jesús tlejkos ilwikak, opéj nejnemi ika yolchikawalistle para Jerusalén. ⁵² Okintitlanke sekimej itlatitlanilwan ma tlayekanakan ma wian itech se pueblo de estado de Samaria, para ma kitemolitij kan motepi-altis (mokalotis). ⁵³ Pero in tlakaj samaritanojtin katlej ochantiaj itech yon pueblo mach okinekej okiresibirojkej porke okitakej nik in Yej yawi para Jerusalén. ⁵⁴ Nijuak imomachtijkawan Jacobo iwan Juan ijkón okitakej, okilwijkej in Jesús:

—Señor, ¿tikneki ma titlanawatikan ma wetzi tlilt de ilwikak para ma kinmixpolo nochtin, ijkón ken okichij in profeta Elías?

⁵⁵ Ijkuakón Jesús okintlatak iwan okinmajwak, okinmilwij:

—Namejwan mach ankimatiж akin namechtoktia para xikualanikan. ⁵⁶ Porke Nej katlej onimochij nitlakatl mach oniwalaj onikinmixpolilikó inmanima in tlakaj, sino oniwalaј para nikinmakixtis.

Satepan oyajkej para oksé pueblo.

Katlej kinekij nemiskej iwan Jesús

(Mt. 8:19-22)

⁵⁷ Nijuak oyayaj ipan ojtle, ijkuakón se tlakatl okilwij in Jesús:

—Señor, nikneki nimitzwikas san kanik tias.

⁵⁸ Jesús okinankilij:

—In ostomej (astomej) kipiaj inkuyok, in totomej kipiaj intepajsol. Pero Nej katlej onimochij nitlakatl mach nikpiation kan nimosewis.

⁵⁹ Jesús okilwij oksé tlakatl:

—Xiliki nowan.

Pero yej okilwij:

—Señor, xinechkawili achtoj ma niktookati nopapan.

⁶⁰ Jesús okinankilij:

—Xikinkawili katlej amo nechneltokaj yejwan ma kintookakan inmikkawan. Pero tej, xiwia iwan xiktematilti de kenik in Dios tlanawatia.

⁶¹ Iwan oksé tlakatl noijki okilwij in Jesús:

—Señor, nikneki nimitzwikas, pero achtoj xinechkawili ma nikinyolopachoti katlej katej nochan.

⁶² Pero Jesús okilwij:

—Akin nemí itech iojwi in Dios iwan satepan kinekis mokuepas kan achtoj oyeka, yon ken se tlakatl katlej kitzkiti in arado nijuak tlaxawa iwan tlachia ik ikuitlapan. Yon tlakatl mach serbiros kan Dios tlanawatia.

10

Jesús okintitlanke eyinpoale iwan majtlakte imomachti-jkawan

¹ Satepan de yin, in Señor Jesús okinpejpenke eyinpoale iwan majtlakte imomachtijkawan, iwan okintitlanke ojomen itech nochtin pueblojtin iwan itech nochtin lugartin kan satepan Yej yas. ² Okinmilwij:

—Sa tlalwis miekej tlakaj katej kej se pixkale sa tekitl weyi, pero tejwan katlej tipixkakej mach timiekej. Por yonik, xiktlajtlanilikan in Dios katlej iteko in yon pixkale ma kualintitlani oksekimej tekipanojkej para ma pixkakij. ³ Xiwian. Nej namechtitlani kej amichkamej kan katej koyomej. ⁴ Amo xikitkikan bolsa, nion tomin, nion kakmej. Iwan nion amo ximoketzakan ipan ojtle para akaj xiktlajpalokan. ⁵ Nijuak ankalakiskej itech se kalijtik, achtoj xitetlajpalokan, xikijtokan: “Ximoyolosewikan aminochtin namejwan katlej nian ankatej.” ⁶ Tla akaj katlej ompa chanti kuale amechresibiroa, Dios kitiochiwas ika yolosewilistle. Pero tla amo amechresibiroa, Dios mach kimakas yolosewilistle. ⁷ Ompa ximokawakan itech yon kale, iwan xikkuakan iwan xikonikan tlan yejwan amechmakaskej. Porke se tekipanoj moneki kimakaskej itlaxtlawil. Amo san nian nepa ximotepialtijtinemikan (ximokalotijtinemikan). ⁸ Nijuak anmajsiskej itech se pueblo kan amechresibiroskej, xikkuakan tlan amechmakaskej. ⁹ Xikinpajtikan in kokoxkej katlej ompa yeskej, iwan xikinmilwikan: “Yoajsiko in tonale para Dios tlanawatis amonawak.” ¹⁰ Pero tla anmajsiskej itech se pueblo kan amo amechresibiroskej, xikisakan ipan ojtle iwan xikijtokan: ¹¹ “Asta yen tlale de amopueblo katlej otechajsik ipan tokxi, tiktzejtzeloaj para xikmatikan nik mach kuale tlan ankichiwaj. Pero xikmatikan, nik in Dios ya meroj amechnawatis.” ¹² Nej namechilwia, ke itech nekáj tonale de tlaixkomakalistle (tlatzonmanalos), intlajyowilis in yonmej tlakaj yetos okachi weyi ke para nekatej tlakaj de Sodoma.

*Pueblojtin katlej mach tetlakitakej
(Mt. 11:20-24)*

¹³ ¡Pobre de tej, pueblo de Corazín! ¡Pobre de tej, pueblo de Betsaida! Porke tla itech pueblo de Tiro iwan itech pueblo de Sidón kitanij in milagrostin katlej amejwan ankitaj, ya ke tiempo yeskia yomoyolkuepkej. Iwan motzotzoltianij de luto iwan motlikonexwianij, para kiteititianij nik yomoyolkuepkej de intlajtlakol. ¹⁴ Pero itech nekáj tonale de tlaixkomakalistle (tlatzonmanalos), namejwan ankipiaskej okachi weyi tlajyowilistle ke in tlakaj de pueblo de Tiro iwan de

Sidón. ¹⁵ Iwan namejwan de pueblo de Capernaum, ¿ankiye-jyekoaj ke antlejkoskej asta ilwikak? Namejwan anyaskej asta ijtik tliko.

¹⁶ 'Akin amechkaki namejwan, kijtosneki yen Nej nechkaki. Iwan akin amo amechresibiroa, kijtosneki yen Nej mach nechresibiroa. Iwan akin Nej mach nechresibiroa, kijtosneki noijki mach kiresibiroa akin onechwaltitlanke.

Omokuepatoj eyinpoale iwan majtlaktin imomachtijkawan

¹⁷ In eyinpoale iwan majtlaktin imomachtijkawan omokuepatoj ika pakilstle, iwan okilwijkej in Jesús:

—Señor, asta in ejekamej mach kualtin otechtlakitakej ni-kuak otikinkixtijkej ika motoka.

¹⁸ Jesús okinmilwij:

—Aján, Nej onikitak in Satanás kenik owetzke de ilwikak kej se tlaltetlanalistle. ¹⁹ Nej onamechmakak poder para inpan antlajtlaksaskej in koamej iwan kolomej, iwan para ankitlaniskej nochí ipoder in Amo Kuale Tlakatl, iwan mach itlaj anmochiwaskej tlan mach kuale. ²⁰ Pero amo xi-pakikan porke amechtlakitaj in ejekamej mach kualtin, sino xi-pakikan porke namotoka ya kajki ijkuilitok ompa ilwikak.

Jesús opakke

(Mt. 11:25-27; 13:16-17)

²¹ Itech yon ora in Espíritu Santo okimakak in Jesús miek pakilstle, iwan Jesús okijoj:

—Papan, nimitzonweyikixtia tejwatzin tiiTeko in ilwikak iwan tlaltikpak. Nimitzonweyikixtia porke otikintlaatilij in tlamantin para amo ma kimatikan in tlakaj katlej momachiliaj wel kimatij iwan momachiliaj wel kuale intzontekon, iwan otikinnextilij in tlakaj katlej mach moweyinekij. Ijkón otikchij, Papan, porke ijkón otikmonekiltij.

²² 'NoPapan onechmactilij nochí tlamtante. Nej niiKone mach akaj kimiati akin Nej, sino san yen noPapan kimiati akin Nej. Iwan mach akaj kimiati akin noPapan, sino san Nej niiKone nikmati akin Yej iwan noijki nekatej tlakaj akinmej Nej nikneki ma kimatikan akin noPapan.

²³ Ijkuakón okintlatak imomachtijkawan iwan okinmilwij san yejwan inselti:

—Xipakikan namejwan porke ankitaj ika namoixtololo tlan axan ankitaj. ²⁴ Porke ya wejkawitl miekej profetajtin iwan reytin okinekiaj kitanij tlan axan namejwan ankitaj, pero mach okitakej. Okinekiaj kikakinij tlan axan namejwan ankikakij, pero mach okikakej.

Ejemplo de se kuale tlakatl de Samaria

²⁵ Se tlamachtij itech tlanawatile de Moisés okinekke kitla-tlakolmayawis in Jesús, iwan okitlajtlanij:

—Tlamachtij, ¿tlanon moneki nikchiwas para nikpias nemilistle katlej mach keman tlamis?

²⁶ Jesús okinankilij:

—¿Tlanon kijta itlanawatil in Moisés? ¿Tlanon tikmomaka kuenta?

²⁷ In tlamachtij itech tlanawatile de Moisés okijtoj:

—“Xiktlasojtla in Señor moDios ika nochí moyolo, ika nochí moanima, ika nochí mochikawalis iwan ika nochí motl-namikilis. Iwan xiktlasojtla mokni ken tej timotlasojtla.”

²⁸ Ijkuakón Jesús okilwij:

—Kuale otitlanankilij. Tla ijkón tikchiwas tikpias nemilistle katlej mach keman tlamis.

²⁹ Pero in tlamachtij itech tlanawatile de Moisés okinekke mokawas kuale teixpan, iwan okilwij in Jesús:

—¿Iwan akin yon nokni?

³⁰ Ijkuakón Jesús okinankilij:

—Se tlakatl oyaya de Jerusalén para Jericó, iwan ipan ojtle okitlachtekijkej sekimej ichtekiej iwan okitkilikeye nochí tlan okitkia, iwan okitkilikeye asta itzotzol. Okimagakej iwan oyajkej, iwan yej okikajtejkej medio mikkatl. ³¹ Satepan oonkisako se tiopixke katlej ik ompa opanok itech yon ojtle. Pero nijuak okitak, san okitlayawalwij iwan okipanawij.

³² Noijki se levita katlej tekipanoa itech tiopan no ik ompa opanok, iwan nijuak okitak, noijki san okitlayawalwij iwan okipanawij. ³³ Pero se tlakatl de estado de Samaria katlej opanoaya ipan yon ojtle, nijuak okitak, okiknomatke.

³⁴ Omijkuani inawak, iwan okipajtilij ika aseite iwan ika vino kan okiejeskixtijkej, iwan okimililij ika se tzotzole. Satepan, okitlejkoltij ipan iburro, iwan okiwikak itech se kale kan motepialtiaj (mokalotiaj) iwan ompa okimonekuitlawij. ³⁵ Owalmostlatik, nijuak in tlakatl de Samaria ya yani, okix-tij ome tomin iwan okimakak iteko in kale kan motepialtiaj, iwan okilwij: “Xikmonekuitlawi yin tlakatl, iwan tla monekis itlaj okachi, nimitztlaxtlawilijtejko nijuak nimokuepati.”

³⁶ Axan kiné, ¿katlij yej de yonmej eyin tlakaj tikita omochij kej ikni in tlakatl katlej okitlachtekijkej?

³⁷ In tlamachtij itech tlanawatile de Moisés okijtoj:

—Yen katlej okiknomatke.

Ijkuakón Jesús okilwij:

—Kuale kajki. Axan xiwia iwan no ijkón xikchiwa.

Jesús okintlajpaloto Marta iwan María

³⁸ Jesús iwan imomachtijkawan okiseguiroayaj oyayaj para Jerusalén, iwan oajsitoj itech se pueblobjitzin. Se siwatl itoka

Marta okinkalotij itech ikalijtik. ³⁹ Marta okipiaya se ikni siwatl itoka María. Iwan yin María omotlalij ixitlan Jesús para kikakis tlan okijoaya in Jesús. ⁴⁰ Pero Marta okachi omotekipachoaya itech iteki, omijkuanij inawak Jesús iwan okilwij:

—Señor, ¿amo tikkomaka kuenta nik in nokni nechkawilia in tekitl san nej ma nikchiwa? Xikilwi ma nechpalewi.

⁴¹ Pero Jesús okinankilij:

—Marta, Marta, sa tekitl timotekipachoa iwan timotlane-mililtia ika miek tlamantle. ⁴² Pero onkaj san se tlamanle katlej moneki okachi ika se motekipachos. María okipejpenke yon tlamanle iwan mach akaj welis kikixtilis.

11

Jesús otechmachtij kenik timotiotzajtziliskej

(Mt. 6:9-15; 7:7-11)

¹ Se tonale Jesús omotiotzajtzilitoka se lugar, iwan nikuak otlanke omotiotzajtzilij, se de imomachtijkaw okilwij:

—Señor, xitechmachtí kenik timotiotzajtziliskej, ijkón ken Juan Tlakuateekij okinmachtij imomachtijkawan.

² Jesús okinmilwij:

—Nikuak anmotiotzajtziliskej, xikijtokan:

ToTajzin Dios katlej tikaj ilwikak,
ma nochtin kiyektenewakan motoka.

Ma ajsiki yon tonale nikuak titlanawatis.

Ma mochiwa tlan tikkonekiltia ixko yin tlaltikpak ijkón ken
mochiwa ompa ilwikak.

³ Xitechmaka axan tlan tikkuskej katlej ika tipanoskej yin
tonale.

⁴ Xitechtlapojojpolwi de totlajtlakol, porke tejwan noijki tik-intlapojpolwiaj nochtin akinmej techtoktiaj tlan amo
kuale.

Iwan amo xitechmotekawili ma techtlajtlakolmayawi in Amo
Kuale Tlakatl para ma titlajtlakokan.

⁵ Jesús noijki okinmilwij:

—Tla akaj de amejwan kipia se iamigo iwan yawi ichan
kej tlajko yuak, iwan kilwia: “Amigo, xinechtlaneti eyi pan,

⁶ porke se noamigo yakin oejkok nokalijtik iwan witz de
wejka, iwan mach nikpia tlan nikmakas ma kikua.” ⁷ Iwan
tla nekáj tlakatl waltlanankilis desde ikalijtik, iwan kilwis:
“Amo xinechkuejso. Ya tzaktok in puerta, iwan nokonewan
ya kochtokej nowan ipan totlapech. Mach welis nimoket-
zas para nimitzinmakati.” ⁸ Ipan melajka namechilwia, tla
okachi mochikawas kitlajtlanilis, iamigo moketzas iwan ki-
makas tlan kinekis, pero amo por wel iamigo, sino porke

mochikawa kitlajtlanilia. ⁹ Por yonik Nej namechilwia: Xiktlajtlanilikan Dios tlan amechpoloa, iwan Yej amechmakas. Xiktemokan tlan amechpoloa, iwan ankajsiskej. Xiknotzakan Dios, iwan Yej amechtlatlapolis. ¹⁰ Porke akin kitlajtlani, kiresibiroa. Akin kitemoa, kajsi. Iwan akin tlatatalatza itech puerta, kitlatlapoliaj.

¹¹ ¿Akaj de amejwan antetajmej mixewis kimakas ikone se tetl nijuak kitlajtlanilis se pan? ¿O noso mixewis kimakas se koatl nijuak kitlajtlanilis se michin? ¹² ¿O noso mixewis kimakas se kolotl nijuak kitlajtlanilis se teksistle? ¹³ Axan kiné, tla namejwan katlej mach ankualtin, ankimatij ankinmakaj namokonewan itlaj tlan kuale, kenik namoPapan katlej kajki ilwikak amo ma kinmaka in Espíritu Santo akinmej kitlajtlaniskej.

Jesús kipia poder de toTajzin Dios

(Mt. 12:22-30; Mr. 3:19-27)

¹⁴ Jesús okikixtijtoka se ejekatl mach kuale de ijlik se tlakatl katlej okitoktijtoka ma yeto nontle. Iwan nijuak in ejekatl mach kuale okiske, in tlakatl ya owelik otlajtoj. In tlakaj sa otlajtlachixkej (omomajmawtijkej) nijuak ijkón okitakej, ¹⁵ pero sekimej okijtojkej:

—Yin tlakatl kinkixtia ejekamej mach kualtin ika ipoder in tlayekanke demonio itoka Beelzebú.

¹⁶ Oksekimej, okinekiaj kitlajtlakolmayawiskej in Jesús, iwan okitlajtlaniliyaj ma kichiwa se milagro de ilwikak.

¹⁷ Pero Yej okimatis tlan okiyejyekoayaj, iwan okinmilwij:

—Tla in tlakaj de se país momijmiktiskej san entre yejwan, yon país pojpoliwis. Iwan tla itech se familia mokualaniskej entre yejwan, yon familia noijki xixinis. ¹⁸ Ijkón noijki, tla Satanás moxelos de inwan ejekamej mach kualtin, ¿kenik welis wejkawas ipoder? Ijkín Nej namechilwia porke namejwan ankijtaj ke Nej nikinkixtia ejekamej mach kualtin ika ipoder in Beelzebú. ¹⁹ Pero tla ijkón yeri, ¿welis ankijtoskej namejwan ke namomomachtijkawan noijki kinkixtiaj ejekamej mach kualtin ika ipoder in Beelzebú? Xikintlajtlanikan aber tlan kijtoskej. ²⁰ Pero tla Dios nechmaka ipoder para ma nikinkixti ejekamej mach kualtin, tenses kijtosneki in Dios yowalaj para tlanawatis amonawak.

²¹ Nijuak se tlakatl chikawak kimonekuitlawia ikalijtik ika miekej iteposwan, tlan kipixtok ompa ikalijtik mach akaj welis kikixtilis. ²² Pero tla witz oksé tlakatl okachi chikawak ke yej iwan kitlanis, tenses kinkixtilis iteposwan katlej ika mopalewiani, iwan kitkiliis nochí tlan iaxka.

²³ Akin amo kajki nowan, kajki kontra Nej. Iwan akin amo nowan kinpixka animajtin, san kinxixinia.

*In ejekatl mach kuale katlej walmokuepa
(Mt. 12:43-45)*

²⁴ 'Nijuak se ejekatl mach kuale kisa de ijtiik se tlakatl, nemi kan tlawaki, kitemojtinemi kan mosewis. Iwan nijuak amo kaksi, kimolwia: "Nimokuepas oksemi itech nekáj tlakatl kan onikiske." ²⁵ Iwan nijuak mokuepa, kaksitaksi in yon tlakatl kej se kale kan tlachipawkan iwan tlayektlalitok. ²⁶ Tones yawi kinnottzatij oksekimej chikomen ejekamej okachi piorestin ke yej, iwan nochtin yawij mochantitiwej itech yon tlakatl, iwan satepan yon tlakatl mokawa okachi pior ke antes.

Ma pakikan katlej kichiwaj tlan Dios kinmilwia

²⁷ Mientras Jesús ijkón otlapojtoka, ijuakón se siwatl owaltzajtzik de intzalko in tlakaj:

—Ma paki in siwatl katlej omitztlakatilij iwan omitzchichij.

²⁸ Pero Jesús okijtoj:

—Okachi kuale, ma pakikan akinmej kikakij itlajtol in Dios iwan kichiwaj tlan kinmilwia.

In tlakaj mach kualtin okitlajtlanilijkej in Jesús se weyi milagro

(Mt. 12:38-42; Mr. 8:12)

²⁹ In tlakaj opéj okachi kiyawaloaj in Jesús, iwan Yej opéj kinmilwia:

—In tlakaj de yin tiempo sa tekitl mach kualtin, iwan axan kinekij ma nikchiwa se milagro. Pero mach nikinmakas oksé milagro, sino san yen milagro tlan opanok in profeta Jonás.

³⁰ Porke ijkón ken Jonás omochij kej se señas para nekatej tlakaj katlej ochantiaj itech weyikan de Nínive, ijkón noijki Nej katlej onimochij nitlakatl nimochiwas kej se señas para in tlakaj de yin tiempo. ³¹ Itech nekáj tonale de tlaixkomakalistle (tlatzonmanalos), nijuak kimmixkomakaskej in tlakaj de yin tiempo, in reina katlej ovalaj de ik tlani kan okachi wejka de ixko yin tlaltipak para kikakilis iixtlamachilis in rey Salomón, yej noijki itech nekáj tonale de tlaixkomakalistle moketzas iwan kintlajtlakoltis in tlakaj de yin tiempo, porke mach kinekij nechkakiskej, iwan Nej okachi niweyikistok (niweyititok) ke Salomón. ³² In tlakaj katlej ochantiaj itech weyikan de Nínive, yejwan noijki moketzaskej itech nekáj tonale de tlaixkomakalistle (tlatzonmanalos) iwan kintlajtlakoltiskej in tlakaj de yin tiempo. Porke yejwan omoyolkuepkej de intlajtlakol nijuak okintlapowij in Jonás. Iwan axan, Nej okachi niweyikistok (niweyititok) ke Jonás iwan mach kinekij nechkakiskej.

Itlanex in totlalnakayo
(Mt. 5:15; 6:22-23)

³³ 'Mach akaj kitlikuitia se tlanextle para kitlaatis, o noso para kitlalis itlampa se chikiwitl, sino se kitlalia ajkopan, para ma kintlawili nochtin akinmej kalakiskej kajitik. ³⁴ Namoixtololowan yejwan katej kej yeskia se tlanextle para namotlalnakayo. Tla namoixtololowan kualemej, noijki namotlalnakayo kipias tlanextle. Pero in tla namoixtololowan mach kualemej, noijki nochi namotlalnakayo kipias tlatleyualotl. ³⁵ Xikpiakan kuidado kiné, amo ma mokuepa tlatleyualotl katlej yeskia tlanextle para namotlalnakayo. ³⁶ Porke tla nochi namotlalnakayo kipia tlanextle, iwan amo kipia nion se tlatleyualotl, nochi welis ankitaskej, ken nijuak se tlanextle amechtlawilia.

Jesús okijtoj mach kuale tlan kichiwaj in fariseos iwan tlamachtijkej de itlanawatil in Moisés

(Mt. 23:1-36; Mr. 12:38-40; Lc. 20:45-47)

³⁷ Nijuak Jesús otlanke otlapoj, ijkuakón se fariseo okilwij ma tlakuati ichan. Jesús okalakke ikalijtik in fariseo iwan omotlalij itech mesa. ³⁸ In fariseo sa omotlajtlachialtij (omomajmawtij) nijuak okitak nik in Jesús mach omomajtekij antes de tlakuas. ³⁹ Pero in Señor Jesús okijtoj:

—Namejwan anfariseos ankichiwas in vaso iwan plato ik tlixko, pero ik tlijtik namejwan anyolbierotikej. Porke namoijtik antentokej de ichtekayotl iwan nochi tlan amo kuale. ⁴⁰ ¡Wel antzontemej! Dios okichij namotlalnakayo, pero noijki okichij namoyolo. ⁴¹ Xikchiwakan tlan kuale ika nochi amoyolo, iwan ijkón nochi namoyolo yetos chipawak.

⁴² '¡Ay de amejwan, anfariseos! Namejwan ankitemakaj namodiesmo de menta, de ruda iwan de nochi tlamantle xiwitl. Pero mach ankichiwas tlan Dios kijta, nik moneki se kinchiwilis in tlakaj tlan intech powi iwan moneki se kitlasojtlas in Dios. Kuale in tla se diesmaros, pero noijki moneki se kichiwas katlej okachi importante.

⁴³ '¡Ay de amejwan, anfariseos! Ankiwelitaj anmotlaliskej itech kuale lugar itech tiopanmej, iwan ankinekij ma amechyektlajpalokan nijuak annemij tiankistle.

⁴⁴ '¡Ay de amejwan, anfariseos iwan antlamachtijkej de itlanawatil in Moisés, anteixkajkayajkej! Namejwan ankatej ken mikkakuyoktin katlej mach motaj, in tlakaj inpan panoaj iwan mach kimatij kox tlabiero nik tlijtik.

⁴⁵ Ijkuakón okinankilij se tlamachtij de itlanawatil in Moisés, okilwij:

—Tlamachtij, nijuak ijkón tikitja, tejwan noijki titechpi-jpinatia.

⁴⁶ Pero Jesús okijtoj:

—¡Ay de amejwan noijke, antlamachtijkej de itlanawatil in Moisés! Porke namejwan ankintoktiaj in tlakaj ma kin-mamakan miekej tlanawatiltin, katlej sa tekitl owij para se kinxikos, iwan namejwan nion siera ika se amomajpil mach ankinekij ankitilkoskej.

⁴⁷ ¡Ay de amejwan, porke ankinchiwiliaj inmikkakuyok in profetajtin katlej okinmiktijkej in ya wejkawitl namoweyita-jwan! ⁴⁸ Para amejwan ankitaj kuale tlan yejwan okichijkej. Porke yejwan okinmiktijkej in profetajtin, iwan namejwan ankinchiwiliaj inmikkakuyok.

⁴⁹ Por yonik Dios itech iixtlamachilis okijtoj: “Namechintit-lanilis profetajtin iwan tlatitlaniltin, iwan sekimej de yejwan kinmiktiskej iwan oksekimej kintlatlalochtiskej.” ⁵⁰ Porke in tlakaj de yin tiempo, inpan wetzis in tlajtlakole de inmikilis de nochtin profetajtin katlej okinmiktijkej desde ikuak opéj in tlaltikpak. ⁵¹ Desde ikuak okimiktijkej in Abel iwan asta ikuak okimiktijkej in Zacarías, katlej okimiktijkej ijlik in weyi tiopan iyakapan artal. Por yonik namechilwia, yon tlajtlakole inpan wetzis in tlakaj de yin tiempo.

⁵² ¡Ay de amejwan, antlamachtijkej de itlanawatil in Moisés! Porke mach ankinkawiliaj in tlakaj ma kimomakakan kuenta tlan Dios techmachtia. Porke nion amejwan mach ankinekij ankimomakaskej kuenta, iwan nion mach ankinkawiliaj in oksekimej ma kimomakakan kuenta.

⁵³ Nijuak Jesús okinmilwij yin tlajtole, in tlamachtijkej de itlanawatil in Moisés iwan fariseos sa tekitl okualankej, iwan opéj kitlajtlania de miek tlamantle. ⁵⁴ Okinekaj kajxilianij kanaj itlaj tlajtole tlan Yej kijtoani para ijkón welis ika kitil-wiskej.

12

Amo se ma yeto ome ixko

¹ Satepan miekej tlakaj opéj mololoaj, sa tekitl miekej omololojkej asta sa omotojtopewayaj entre yejwan. Jesús opéj achtoj kinmilwia imomachtijkawan:

—Ximotlachilikan de itech inlevadura in fariseos, kijtosneki, ximotlachilikan de itech inteixkajkayawalis. ² Porke nochí katlej amo momati kipia por momatis, iwan nochí katlej kajki tlatitok kipia por nesis. ³ Por yonik, nochí tlan amejwan ankijtojkej ijlik tlatleyualotl, nochí mokakis kan tlanestok. Iwan tlan ankijtojkej ichtaka amokalijtik, kijtoskej chikawak kan nochtin kuale kikakiskej.

Akin moneki tikimakasiskej
(Mt. 10:26-31)

⁴ 'Namejwan katlej annoamigoswan namechilwia, amo xikinmiimakasikan katlej weliskej kimiktiskej namotlalnakayo, iwan satepan mach ok welis ok itlaj amechtoktiskej. ⁵ Pero Nej namechilwis akin moneki ankimakasiskej: xikimakasikan toTajtzin Dios katlej welis amechmiktis, iwan ika ipoder welis kititlanis namoanima ijlik tliko. Ijkón kiné, moneki xikimakasikan yen toTajtzin Dios.

⁶ '¿Amo monamakaj makuile tototzitzintin por makuile sentabo? Pero maski amo okachi itlaj inpatij, Dios mach kelkawa nion se tototzin. ⁷ Iwan Dios asta kimatí keski amotzonkal ankipiaj. Amo ximomawtikan. Namejwan okachi amopatij iwan amo ken inpatij miekej tototzitzintin.

*Ma se tlajto de Cristo teixpan
(Mt. 10:32-33; 12:32; 10:19-20)*

⁸ 'Iwan nej namechilwia, ke akin kijtos inmixpan tlakaj ke kineltoka nik in Nej nitemakixtij de yej, Nej noiiki akin onimochij nitlakatl, nikijtos inmixpan iangelwan Dios nik in yej noaxka. ⁹ Pero tla akaj kijtos inmixpan tlakaj ke amo nechixmati, Nej noiiki nikijtos inmixpan iangelwan Dios nik mach nikixmati.

¹⁰ 'Iwan akin tlajtos kontra Nej katlej onimochij nitlakatl, Dios welis kitlapojpolwis. Pero akin tlajtos biero de yen Espíritu Santo, Dios mach kitlapojpolwis.

¹¹ 'Nikuak amechwikaskej itech tiopanmej, o noso inmixpan juestin o noso inmixpan tekiwajkej, amo xitlanemilikan por kenik antlanankiliskej o noso tlan ankijtoskej. ¹² Pero nikuak ajsis ora de antlajtoskej, in Espíritu Santo amechilwis tlan ankijtoskej.

Se tlakatl katlej kimopialia

¹³ Se tlakatl katlej oyeka intzalko in tlakaj okilwij in Jesús:
—Tlamachtij, xikilwi nokni ma nechmaka in herencia katlej nechtokaroa.

¹⁴ Pero Jesús okilwij:
—Tlakatl, ¿akin onechtlalij ma nieto Nej kej nijues o noso ma nieto kej nitlaxeloj?

¹⁵ Iwan okinmilwij nochtin:
—Ximotlachilikan, amo ma kineki namoyolo tlan kita. Porke se tlakatl maski ma kipia miek rikoyotl yon mach welis kimakas nemistle.

¹⁶ Ijkuakón okinmilwij se ejemplo:
—Oyeka se tlakatl katlej sa tektil okimopialaya, opixkak sa tektil miek, porke otlamochiwili. ¹⁷ Iwan okimolwij:
—¿Tlan nikchiwas? Mach nikpia kan niktlaatis nochti tlan

onikpixkak.”¹⁸ Iwan okimolwij: “Ya nikmati tlan nikchiwas. Nikinxixinis nokueskonwan iwan nikinchivas okachi wejweyin, ompa niktlaatis noch iwan onikpixkak iwan noch iwan nikpia.¹⁹ Satepan nikmolwis ipan noanima: Nikpia miek tlatitok tlan noaxka para miek xiwitl, ma nimosewi, ma nitlakua, ma natli, iwan ma nipaki.”²⁰ Pero in Dios okilwij: “¡Tzontetl! Yin yuak timikis, iwan tlan yotiklaatij, ¿akin kimokawis?”²¹ Ijkón mochiwaj in tlakaj katlej kipiaj miek tlamantle san para yejwan, pero mach itlaj kipiaj inawak Dios.

*Amo se ma motlanemililti
(Mt. 6:25-34)*

²² Satepan Jesús okinmilwij imomachtijkawan:

—Namechilwia, kiné, amo ximotlanemililtikan por tlan ankikuaskej para anyolitoskej, nion por tlan ankonakiskej.²³ Namonemilis okachi ipatij ke tlan ankikuaj, iwan namotlalnakayo okachi ipatij ke tlan ankonakiaj.²⁴ Xikinmitakan in kakalomej, mach tookaj, mach pixkaj, mach kipiaj inkueskon iwan nion mach kanaj kipiaj kan kitlaatiaj intlakual. Pero Dios kintlamaka. Iwan namejwan okachi amopatij iwan amo ken totomej.²⁵ Tla akaj de amejwan sa tekitl tlanemilia porke kineki moskaltis ok tlajko metro, ¿kox welis moskaltis?²⁶ Tla mach anwelij ankichiwaj se tlamantle tzikitzin, ¿tlanik, kiné, antlanemiliaj itech oksekimej tlamantin?

²⁷ 'Xikitakan kenik moskaltiaj in xochimej, mach tekipanoaj iwan nion mach ijkitij (tlajtzomaj). Pero Nej namechilwia ke nion rey Salomón mach semi omotlakentij ken se de yinmej xochimej maski omotlakentiaya ika itzotzol katlej okachi patíoj.²⁸ Iwan tla Dios ijkón kitlakentia in xochitl, katlej axan ompa kajki ipan tepetl iwan mostla wiptla mochichinos ijtik tlitl, ¿kenik amo ma amechtlakenti namejwan? ¡Namejwan wel tzikitzin namotlaneltokalis!²⁹ Por yonik, amo sa tekitl xitlanemilikan por tlan ankikuaskej o noso tlan ankoniskej.³⁰ Porke in tlakaj katlej mach kixmatij Dios kitemoaj noch i yon tlamantle. Pero namejwan ankipiaj namoPapan Dios katlej ya kimati tlan amechpoloa.³¹ Pero namejwan achtoj xiktemokan ma Dios tlanawati ipan namoyolo. Iwan ijkón Dios amechmakas noch i yon tlamantle.

*Ma se kololo rikoyotl itech ilwikak
(Mt. 6:19-21)*

³² 'Amo ximomawtikan, namejwan maski mach anmiektzitzintin annochkawan, namoPapan Dios kipia pakilistle para amechkawilis xitlanawatikan noijki kan Yej tlanawatia.³³ Xiknamakakan tlan ankipiaj, iwan tomin xikinmakakan in

pobrestin. Xiktemitikan rikojoyotl ika bolsa katlej mach tlajtlamis ompa ilwikak. Yon rikojoyotl mach keman tlamic. Mach welis kuakualos iwan nion mach welis kitkis akaj ichtekke. ³⁴ Porke kan yetos namorikojyo, noijki ompa yetos namoyolo.

Ma se ijsato

³⁵ 'Sa xitzotzoltitokan iwan sa xikpixtokan namokandil ma xotlato. ³⁶ Xiekan kej antekipanojkej katlej kichixtokej inteko ma mokuepati kan monamiktaj, para san niman kitlatlapoliskej nijuak tlatatalatzas nijuak yej ejkos. ³⁷ Ma pakikan in tekipanojkej katlej kinmajsiki inteko ijsatokej nijuak yej ejkos. Ipan melajka namechilwia, nik inewian inteko kinsiyajtlalis itech mesa iwan kintlamakas. ³⁸ Maski ma ejko kej tlajko yuak o noso ya tlanestiowitz, iwan tla kinmajsiki ijsatokej, ma pakikan yonmej tekipanojkej. ³⁹ Xikmatikan kiné, tla se tetaj kimatini tlan ora witz in ichtekke, ijsatoni iwan amo kitekawiliani akaj ma kalaki ikalijtik para ma kitlachteki. ⁴⁰ Namejwan noijki xiijsatokan. Porke Nej katlej onimochij nitlakatl niwitz nijuak namejwan mach annechchiaj.

In tekipanojkej kualtin iwan tekipanojkej mach kualtin (Mt. 24:45-51)

⁴¹ Ijkuakón Pedro okitlajtlanij:

—Señor, ¿otikijtoj yon ejemplo san para tejwan, o noso para nochtin?

⁴²⁻⁴⁴ In Señor okijtoj:

—Nikilwia san akin yetos, katlej tekipanoj de konfiansa iwan tlalnamikilisej, katlej kitlalia in Señor ma kintlamaka in oksekimej tekipanojkej. Tla ijkuak ejkos iteko iwan kajsiki kichijtok tlan okinawatij, ipan melajka namechilwia, ke yon iteko kitlalis ma kitili nochí tlan iaxka. ⁴⁵ Pero tla yon tekipanoj kiyejyekos ke wejkawas iteko para walmokuepas, iwan pewas kinmagas in oksekimej tekipanojkej iwan kri-adajtin, iwan pewas ilwitlakuas iwan konis iwan iwintis, ⁴⁶ ijkuakón ejkos iteko itech se tonale nijuak itekipanoj mach kichia, iwan itech se ora katlej mach kimati. Sa tekitl kitlajyowiltis iwan kitlalis ma yeto inwan katlej mach tlaneltokakej.

⁴⁷ 'In tekipanoj katlej kimati tlanon kineki iteko, pero mach motlalia listo para nijuak yej witz nimpot amo kichiwa tlan yej kineki, sa tekitl kiwitekis. ⁴⁸ Pero in tekipanoj katlej mach okimatke tlanon okinekia iteko, iwan okinchij sekin tlamantin katlej moneki ika ma kiwitekikan, kiwitekiskej kiné pero mach sa tekitl. Porke nijuak in Dios kichiwa se tlakatl ma yeto moesoj, noijki kitlajtlanilia ma kichiwa miek tekitl. Iwan nijuak in Dios kimaka se tlakatl ma yeto moesoj de miek tlamantle, noijki okachi miek tekitl kitlajtlanilis.

*In tlakaj moxexeloskej por yen Cristo
(Mt. 10:34-36)*

⁴⁹ 'Nej oniwalaixko yin tlaltikpak para nikinmakas in tlakaj yankuik tlaneltokalistle katlej xotlas kej tlitl ipan inyolo. Iwan sa tekitl niknekiskia ya ma xotlato. ⁵⁰ Pero nikpia de nimokuuateekis ika se tlakuateekilistle de tlajyowilistle. Iwan sa tekitl nitlajyowia asta ma mochiwa tlan kipia de mochiwas notech. ⁵¹ Amo xikyejyekokan ke Nej oniwalaix para ma yeto yolosewilistle ixko yin tlaltikpak. ¡Amo! Sino in tlakaj moxexeloskej por yen Nej. ⁵² Porke de nian para tlayakapan, makultin de itech se familia mach ok yeskej san se tlajtole, eyin mach motlajtolnamikiskej inwan omen, iwan omen no mach ok motlajtolnamikiskej inwan eyin. ⁵³ In tepapan mach ok motlajtolnamikis iwan ikone, iwan tekone mach motlajtolnamikis iwan ipapan. In temaman mach motlajtolnamikis iwan ichpoch, iwan ichpoch mach motlajtolnamikis iwan imaman. In temanan mach motlajtolnamikis iwan siwamontle, iwan siwamontle mach motlajtolnamikis iwan imonan.

*Ma tikmomakakan kuenta itech tlan tiempo tikatej
(Mt. 16:1-4; Mr. 8:11-13)*

⁵⁴ Jesús noijski okinmilwij in tlakaj:

—Nikuak namejwan ankitaj motlalia in mixtle ik ipoliwian tonale, namejwan ankijtaj nik kiawis, iwan ijkón tlamocheja. ⁵⁵ Iwan nikuak in ejekatl witz ik tlani, namejwan ankijtaj nik tonas, iwan ijkón tlamocheja. ⁵⁶ ¡Teixkajkayajkej! Namejwan kuale ankixyejyekoaj tlanon tlamocheja itech ilwikak iwan ixko in tlaltikpak. ¿Kenik kiné, mach ankixyejyekoaj tlan nikchiwa itech yin tiempo?

*Ma motlapojpolwikan katlej mokualaniaj
(Mt. 5:25-26)*

⁵⁷ ¿Tlanik mach ankiyejyekoaj namejwan amonewian para ankichiwaskej tlan kuale? ⁵⁸ Tla akaj mitztilwia innawak tekiwajkej, xikchiwa de iwan ximotlapojpolwi mientras anyawij ipan ojtle, para amo ma mitzwika ixpan jues. Porke in tla amo, in jues mitztemaktis (mitztemaktilis) imak in mayol, iwan mayol mittzakuas telpiloyan. ⁵⁹ Iwan mach tikisas de ompa asta amo xiktlaxtlawa in salúltimo sentabo para tikisas.

13

Moneki ma se moyolkuepa

¹ Itech nekatej tonaltin sekimej tlakaj okilwijkej in Jesús nik in Pilato okinmiktij sekimej tlakaj de estado de Galilea, iwan inmeso de yonmej tlakaj okineloj iwan inmeso de sekimej

yolkamej katlej yejwan okinmiktijkej para kixpantiliskej in toTajtzin Dios. ² Jesús okinmilwij:

—¿Ankiyejyekoaj namejwan nik ijkón opanokej in tlakaj de Galilea porke oyekaj okachi tlajtlakolejkej ke oksekimej tlakaj de Galilea? ³ ¡Amo! Namejwan noijki anmikiskej tla amo amoyolkuepaskej inawak Dios. ⁴ ¿O noso ankineltokaj namejwan ke nekatej kaxtoltin iwan eyin tlakaj katlej omikkej nijuak in torre de Siloé inpan owetzke, oyekaj okachi tlajtlakolejkej ke oksekimej katlej ochantiaj Jerusalén? ⁵ ¡Amo! Namejwan noijki anmikiskej tla amo amoyolkuepaskej inawak Dios.

Ejemplo de se igoskuawitl katlej mach tlaki

⁶ Ijkuakón Jesús okinmilwij yin ejemplo:

—Se tlakatl okipiaya se igoskuawitl otoktoka itech iuvasyoj, se tonale oyáj okitato kox yotlakke, pero mach itlaj igos okajsik. ⁷ Toneses okilwij in tlakatl katlej kimonekuitlawia in uvasyoj: “Ya kipia eyi xiwitl nikkualiita yin igoskuawitl xamo kipia itlaj igos, iwan mach keman itlaj nikaksi. Xiktzonteki, porke san tlatzakuilijtok itech yin tlale.” ⁸ Pero in tlakatl katlej kimonekuitlawia yon uvasyoj okinankili: “Señor, ok xikkawa yin xiwitl. Niktlayamanilis iwan nikmajadajtemis. ⁹ Xamo tlakis. Pero tla amo tlaki, ijkuakón keman tiktzon-tekiskej.”

Jesús okipajtij se siwatl kuitlapantomotztik nijuak weyi tonale

¹⁰ Nijuak weyi tonale Jesús otlamachtijtoka itech se tiopan de yen judiojin. ¹¹ Iwan ompa oyeka se siwatl katlej yokipiaya kaxtole iwan eyi xiwitl de kokoxke. Se ejekatl mach kuale okikaj kuitlapantomotztik yon siwatl iwan mach owelia omokuitlapanmelawaya. ¹² Nijuak Jesús okitak, okinotzke iwan okilwij:

—Siwatl, axan yotipajtik de mokokolis.

¹³ Jesús okintlalij imawan ipan yon siwatl, iwan san niman ijkuakón okuitlapanmelawik in siwatl, iwan opéj kiweiyikitia in toTajtzin Dios. ¹⁴ Pero in tlayekanke de yon tiopan okualanke porke Jesús okipajtij in siwatl nijuak weyi tonale, iwan okinmilwij in tlakaj:

—Onkaj chikuasen tonale para se tekipanos. Itech yonmej tonaltin xiwikikan kiné para ximopajtikan, iwan amo ximopajtikan nijuak weyi tonale.

¹⁵ Ijkuakón in Señor Jesús okinankili:

—Teixkajkayajkej, ¿amo ankitotomaj namejwan namotoro o noso namoburro nijuak weyi tonale iwan anyawij ankatiitiwej? ¹⁶ Iwan yin siwatl katlej walajtok nelwatl de Abraham, iwan katlej Satanás okilpijtoka ika yin kokolistle ya

kaxtole iwan eyi xiwitl, ¿amo omonekia noiiki se kitotomas de ikokolis maski ma yeto weyi tonale?

¹⁷ Nijuak Jesús ijkón okijtoj, nochtin ikontraswan sa opinakej. Pero nochtin in tlakaj opakiaj por yen wejweyin tlamantin katlej Jesús okinchiwaya.

Ejemplo de iyolo in mostaza katlej okachi tzikitzin ke iyolo in miltomatl

(Mt. 13:31-32; Mr. 4:30-32)

¹⁸ Ijkuakón Jesús okijtoj:

—¿Tlan ika welis nikkompararos para xikmomakakan kuenta kenik in Dios tlanawatia? ¿Tlan ejemplo welis namechilwis para xikmomakakan kuenta? ¹⁹ Yon ken iyolo in mostaza katlej se tlakatl kitooka itlalaj. Achtoj kisa, satepan moskaltia iwan motlami se weyi kuawitl, iwan asta itech motepajsooltiaj in totomej ipan imamayo.

Ejemplo de yen levadura

(Mt. 13:33)

²⁰ Jesús noiiki okijtoj:

—¿Tlan ika welis nikkompararos para xikmomakakan kuenta kenik in Dios tlanawatia? ²¹ Yon ken levadura katlej se siwatl kineloa ika eyi tlatamachiwale de arina, iwan levadura kisamawa nochí in tixtle.

Puerta katlej kopichtik

(Mt. 7:13-14, 21-23)

²² Jesús nijuak oyaya para Jerusalén, opanotiaya iwan otlamachtijtiaya itech pueblojtin iwan itech pueblojtzitzintin.

²³ Iwan se tlakatl okitlajtlanij:

—Señor, ¿keskimej tlakaj kinmakixtis in toTajtzin Dios de intlajtlakol? ¿San kanaj keskimej?

Jesús okinankilij:

²⁴ —Xikchiwakan de xikalakikan itech puerta kopichtik katlej yawi ilwikak. Porke Nej namechilwia, nik miekej tlakaj kinekiskej kalakiskej, pero mach weliskej. ²⁵ Yetos kej se chanej katlej mewas iwan kitzakuas in puerta. Toneses namejwan katlej anyeskej kalan, antlatatalatzaskej itech puerta iwan ankijtoskej: “Señor, xitechtlatlapoli.” Pero yej amechnankilis: “Mach namechixmati akin namejwan.” ²⁶ Ijkuakón namejwan pewas ankijtoskej: “Tejwan otitlakuajkej iwan otikonikej mowan, iwan tejwatzin otitlamachtij ipan ojmej de topueblo.” ²⁷ Pero yej amechnankilis: “Yonamechilwij nik mach namechixmati akin namejwan. Ximachiwakan de Nej aminochtin namejwan katlej antlajtlakolejkej.” ²⁸ Ompa anchokaskej iwan anmotlanteteyitzaskej, nikuak ankitaskej in Abraham, Isaac, Jacob iwan nochtin in profetajtin katlej

katej kan Dios tlanawatia, iwan namejwan amechwalkixtiskej. ²⁹ Porke witzej tlakaj de ik ajko, de ik tlani, de ik ikisayan tonale iwan de ik ipoliwian tonale, para motlaliskej tlakuaskej kan Dios tlanawatia. ³⁰ Iwan sekimej katlej axan mach wejweyikistokej (weyititokej) satepan wejweyikistoskej, iwan katlej axan wejweyikistokej satepan mach ok wejweyikistoskej.

*Jesús ochokak por yen weyikan de Jerusalén
(Mt. 23:37-39)*

³¹ Ijkuakón itech yon tonale oejkokej sekimej fariseos iwan okilwijkej in Jesús:

—Xiwia de nian, porke in rey Herodes kineki mitzmiktis.

³² Pero Jesús okinnankilij:

—Xiwian xikilwitij yon ostotl Herodes: “Axan iwan mostla ok nikinkixtijos ejekamej mach kualtin iwan ok nikinpajtijos in kokoxkej, iwan asta ipan eyi tonale nitlamis.” ³³ Pero nikpia de nikseguiros noojwi axan, mostla iwan wiptla, porke nochtin in profetajtin kipiaj de mikiskej itech weyikan de Jerusalén.

³⁴ ¡Jerusalén, Jerusalén, tej tikinmiktia in profetajtin, iwan tikinmojmotla ika tetl katlej Dios kualintilani monawak! ¡Miekpa oniknekke nikinmololos mokonewan, kej se pio kinmololoa ikonewan itlampa iajaswan, pero mach otiknekke! ³⁵ Xikitakan kiné, Dios mach ok yetos amowan, sino amechkawas. Iwan Nej namechilwia, nik mach oksemi annechitaskej asta ma ajsiki in nekáj tonale nijuak namejwan ijkín ankijtoskej: “Ma Dios kitiochiwa katlej okiwaltitlanke para tlanawatis.”

14

Jesús okipajtij se tlakatl katlej otetenke

¹ Nijuak weyi tonale Jesús oyáj otlakuato ichan se tlayekanke fariseo, iwan oksekimej fariseos sa okixpixtokaj.

² Noijklímpa oyeka iyakapan Jesús se tlakatl katlej otetenke.

³ Ijkuakón Jesús okintlajtlanij in tlamachtijkej de itlanawatil in Moisés iwan fariseos:

—¿Kuale se kipajtis se kokoxke nijuak weyi tonale, o noso amo?

⁴ Pero yejwan mach itlaj okijtokej. Toneses Jesús okimakitzkij in kokoxke iwan okipajtij, iwan okilwij ma wia. ⁵ Iwan Jesús okinmilwij in fariseos:

—¿Akin de amejwan amo kikixtia iburro o noso itoro tla wetzi ijtil se kuyoktle maski ma yeto weyi tonale?

⁶ Iwan yejwan mach ok owelikej ok itlaj okijtokej.

Nijuak se kiinbitaroaj kan monamiktiaj

⁷ Níjkuak Jesúś okitak kenik in inbitadostin okipejpenayaj katlej okachi kuale lugar para motlaliskej itech mesa, ikuakón okinmakak yin ejemplo:

⁸ —Níjkuak akaj mitzinbitaros itech se ilwitl kan monamiktaj, amo ximotlali kan okachi kuale lugar, porke welis ejkos oksé inbitado katlej okachi weyikistok (weyititos) ke tej. ⁹ Iwan katlej oamechinbitaroj, welis mitzilwis: “Xikkawili yin tlakatl ompa ma motlali.” Ikuakón tej tiixpinawas iwan tias timotlaliti asta tlatentle. ¹⁰ Okachi kuale, níjkuak mitzinbitaroskej, ximotlali asta tlatentle. Para ke níjkuak mitzitas akin omitzinbitaroj, mitzilwis: “Amigo, ximotlali nian kan okachi kuale lugar.” Ijkón mitzweyimatiskej katlej ompa inwan timotlalis. ¹¹ Porke akin moweyinekis, mopinatis. Pero akin amo moweyinekis, weyikistos (weyititos).

¹² Jesúś noiiki okilwij in tlakatl katlej okinbitaroj ma tlakuati ichan:

—Níjkuak tiknekis tiktemakas se tlaxkale tonayan o noso tiotlakke, amo xikinminbitaro moamigoswan, nion mokniwan, nion moparientejwan, nion mobesinoswan katlej kimopialiaj. Porke yejwan welis noiiki mitzinbitaroskej, iwan ijkón yejwan momakuepaskej mowan. ¹³ Okachi kuale, níjkuak tiilwichiwas, xikinminbitaro in pobrestin, wilanmej (temetlamej), koxomej, iwan katlej mach tlachiaj. ¹⁴ Iwan ijkón tikpias pakilstile. Porke yejwan mach welis momakuepaskej mowan, pero Dios mitzkuepilis níjkuak moyolkuiskej (moyolitiskej) in yolchipawakej.

Ejemplo de se tiotlakantlakuale

¹⁵ Se tlakatl katlej oewatoka itech mesa níjkuak ijkón okikakke, okilwij in Jesúś:

—Ma paki akin tlakuas kan Dios tlanawatia.

¹⁶ Ikuakón Jesúś okilwij:

—Se tlakatl okitemakak se weyi tiotlakantlakuale, iwan otlanawatij ma kinminbitarokan miekej tlakaj. ¹⁷ Iwan níjkuak oajsik ora para tlakuaskej, okititlanke se itekipanoj ma kinmilwiti iinbitadoswan: “Xiwickan, porke nochí ya kuale kajki.” ¹⁸ Pero nochtin opéj kijtaj ma kintlapojpolwilkan porke mach welis yaskej. Achtoj se okijtoj: “Yakin onikoj se tlale, iwan nikneki nias nikitati. Nimitztlatlawtia xinechtlapojpolwi porke mach welis nias.” ¹⁹ Oksé okijtoj: “Onikinkoj makuile yunta de torojtin, iwan niawi nikinyejyekoti. Nimitztlatlawtia xinechtlapojpolwi porke mach welis nias.” ²⁰ Iwan oksé okijtoj: “Yakin onimonamiktij, iwan por yonik mach welis nias.” ²¹ Níjkuak in tekipanoj omokuepato, okimakak kuenta iteko nochí tlan okilwijkej. Toneses iteko okualanke iwan okilwij itekipanoj:

“Xiwia totoka ipan ojmej iwan ipan ojpitzaktin de yen pueblo, iwan nian xikinwalinwika in pobrestin, wilanmej (temetlamej), koxomej iwan katlej mach tlachiaj.”²² Okachi satepan itekipanoj okijtoj: “Señor, yonikchij ken otinechnawatij, iwan ok onkaj miek lugar.”²³ Ijkuakón iteko okilwij itekipanoj: “Xiwia ipan ojmej iwan itech tlalmej, iwan xikintokti ma kalakikan para ma temi nokalijtik.”²⁴ Porke Nej namechilwia ke nion se de nekatej katlej achtoj onikinminbitaroj mach tlakuas itech notiotlakantlakual.”

Owijtitok se kitekipanos in Cristo

²⁵ Miekej tlakaj oyayaj iwan Jesús. Iwan Yej omokuepke iwan okinmilwij:

²⁶ —Tla akaj kineki witz nowan, iwan okachi kitlasojtas ipapan, imaman, isiwa, ipilwan, ikniwan iwan asta inemilis, mach welis yetos nomomachtijkaw tla okachi kintlasojtas yejwan iwan amo yen Nej.²⁷ Akin amo kinekis witz nowan iwan amo kinekis tlajyowis asta como para ma kimiktikan itech krus, mach welis yetos nomomachtijkaw.²⁸ Tla akaj de amejwan kineki kichiwas se kale, ¿amo achtoj motlalis kichiwas kuenta para kixyejyekos kox kajxilis tlan kipia para welis kitlamis?²⁹ Tla kichiwa in cimiento iwan satepan mach weli kitlamia, nochtin akinmej kitaskej pewas kipinawiskej³⁰ iwan kijtoskej: “Yin tlakatl opéj kichiwa se kale, iwan mach owelik okitlamij.”³¹ O noso tla se rey kineki kipias guerra iwan oksé rey, ¿amo achtoj motlalis para kixyejyekos kox ika majtlakte mil soldadojtin welis mokitzkis iwan oksé rey katlej witz ika senpoale mil soldadojtin?³² Iwan tla amo welis, nijuak in oksé rey ok wejka witz, ijkuakón kin-titlanilis sekimej itlatitlanilwan para ma motlapojpolwikan para ayakmo momagaskej.³³ Ijkón kiné, tla se de amejwan amo kikawas nochti tlan kipia, mach welis yetos nomomachtijkaw.

Nikuak in istatl kipoloa ipuyeka

(Mt. 5:13; Mr. 9:50)

³⁴ 'In istatl sa tekitl kuale, pero tla in istatl kipolos ipuyeka, ¿kenik oksemi puyeyas?³⁵ Mach ok welis se kitekipanoltis nion para yen tlale iwan nion para majada, sino sa se kitlamotla. Akin kineki kimomakas kuenta, ma kikaki.

15

Ejemplo de se ichka katlej opoliwик

(Mt. 18:10-14)

¹ Nochtin katlej tlakobraroaj ika impuestos iwan tlajt-lakolejkej omololoaya j inawak Jesús para kikakiskej,² iwan

por yonik in fariseos iwan tlamachtijkej de itlanawatil in Moisés opéj tlapoaj de Yej, okijtoayah:

—Yin tlakatl moneloa inwan tlajtlakolejkej, iwan inwan tlakua.

³ Ijkuakón Jesús okinmilwij in yin ejemplo:

⁴ —Tla se de amejwan kipia se siento ichkamej iwan kipolos se, ¿amo kinkajtewas in nawinpoale iwan kaxtole iwan nawi ichkamej kan tlajpixtos, iwan yas kitemotij ichka katlej opoliwik, asta kan kajsis? ⁵ Iwan tla yokajskik, kimokechpanoltia ika pakilstle, ⁶ iwan ejko ichan, kinmololoa iamigoswan iwan ibesinoswan iwan kinmilwia: “Nowan xipakikan, porke yonikajskik nochka katlej onikpolo-jka.” ⁷ Nej namechilwia, itech ilwikak no ijkón tlamochiwa. Ompa onkaj miek pakilstle nikuak se tlajtlakolej moyolkuepa de itlajtlakol, ke por nawinpoale iwan kaxtole iwan nawi yolchipawakej katlej mach ok moneki moyolkuepaskej de intlajtlakol.

Ejemplo de se tomin katlej opoliwik

⁸ ¿Tlan kichiwa se siwatil tla kipia majtlakte tomin de plata iwan kipoloa se? ¿Amo kitlikuitia se tlanextle iwan tlachpana yolk ikalijtik asta ijkuak kaksi itomin? ⁹ Iwan nikuak kaksi, kinmololoa amigaswan iwan ibesinaswan iwan kinmilwia: “Nowan xipakikan, porke yonikajskik notomin katlej onikpolo-jka.” ¹⁰ Nej namechilwia, iangelwan in toTajtzin Dios noiiki pakij miek nikuak se tlajtlakolej moyolkuepa de itlajtlakol.

Ejemplo de se telpochtle katlej san okawiltij itomin

¹¹ Jesús noiiki okijtoj:

—Se tlakatl okinpiaya omen itelpokawan, ¹² iwan katlej okachi xokoyotl okilwij ipapan: “Papan, xinechmaka in herencia katlej nechtokaroa.” Toneses in tetaj okinxejxelilij tlan okipiaya. ¹³ Kanaj keski tonale satepan, in telpochtle katlej okachi xokoyotl okinamakak nochitlan okimakak ipapan, iwan oyáj wejka itech oksé estado, kan san okawiltij itomin iwan mach kuale tlan okichijtinemia. ¹⁴ Nikuak otlanke okitlajtlamij itomin, owalaj se apostle itech nekáj estado, iwan yej mach ok okipiaya tlan kikuas. ¹⁵ Satepan oyáj okitemoto tekitl inawak se tlakatl de yon estado, yon tlakatl okimakak tekitl iwan okitlanke itlalaj ma kinmonekuitlawiti pitzomej. ¹⁶ Iwan okinekia kikuani xiwitl itoka algarrobas katlej okikuayaj in pitzomej, pero mach akaj okimakaya. ¹⁷ Ijkuakón opéj moomelia (moyejyekoa) iwan okimolwij: “Nochan katej tekipanojkej katlej kipiaj miek tlan kikuaj, iwan nej nian nipanotok apostle. ¹⁸ Nimokuepas inawak

nopapan, iwan nikilwis: Papan, onitlajtlakoj inawak Dios iwan onitlajtlakoj monawak.¹⁹ Mach ok notech powi para xinechita kej nimokone, xinechita sa kej nekatej tlakaj katlej mitzpalewiaj.”²⁰ Toneses omoketzke iwan omokuepke ichan ipapan.

’Nijuak ok wejka owalaya, ipapan okitak iwan okiknomatke. Omotlaloj okinamikito, okinanapaloj (okinawajtekke) iwan okixpijpipitzoj.²¹ Ijkuakón itelpoch okilwij: “Papan, onitlajtlakoj inawak Dios iwan onitlajtlakoj monawak. Mach ok notech powi xinechita kej nimokone.”²² Pero ipapan okinmilwij itekipanojkawan: “Xikkualkuikan totoka katlej okachi kuale tzotzole, iwan xiktzotzoltikan. Xikaniy-ojtkan itech imajpil iwan xikkaktikan.²³ Xikuaskekakan in torojkonetl katlej tomawak iwan xikmiktikan. Tikkusakej iwan tikchiwaskej ilwitl.²⁴ Porke yin nokone yomikka, iwan axan oksemi omoyolkui. Opolika, iwan axan yotikajsikej.” Iwan opéj kichiwaj ilwitl.

²⁵ ’Oksé itelpoch katlej tetiachka otekipanojtoka itlalaj. Iwan nijuak omokuepato iwan yoejkotiwalaya ichan, okikakke tlapitzaj ichan iwan okinmitak mijtotiaj.²⁶ Ijkuakón okinotzke se katlej ompa tekipanoa iwan okitlajtlanj tlan onkaj ichan.²⁷ In tekipanoj okilwij: “Mokni yomokuepato. Iwan mopapan otlanawatij ma kimiktikan in torojkonetl katlej tomawak, porke mokni oejkok kuale iwan chikawak.”²⁸ In telpochtle katlej tetiachka sa tekitl okualanke iwan mach okinekia kalakini ikalijtik. In tetaj okiske iwan opéj kitlatlawtia ma kalaki.²⁹ Pero itelpoch okilwij ipapan: “Tejwatzin kuale tikmati nik ya miek xiwitl nimitztekipanoa, nochipa nimitztlakita, iwan mach semi tinechmaka nion se tentzonkonetl para nikchiwas se ilwitl inwan noamigoswan.³⁰ Pero axan oejkok yin mokone, katlej san okawiltij motomin inwan siwamej momekatijkej, iwan asta otikmiktilij se torojkonetl tomawak.”³¹ Ijkuakón ipapan okilwij: “Nokone, tej nochipa nowan tikaj, iwan nochi tlan nikpia moaxka.³² Pero axan moneki tikchiwaskej ilwitl iwan ma tipakikan, porke mokni yomikka, iwan axan yomoyolkui. Opolika, iwan axan yotikajsikej.”

16

Ejemplo de se tekipanoj katlej mach kuale iyolo

¹ Jesús noijski okinmilwij imomachtijkawan:

—Oyeka se tlakatl katlej okimopialiya iwan okipiaya se itekipanoj katlej okitaya nochi tlan okipiaya. Pero iteko okilwijkej ke itekipanoj san kawiltilia tlan iaxka.² Ijkuakón iteko okinotzke itekipanoj iwan okilwij: “¿Tlanik ijkón nechilwiaj

de tej? Xinechmactili nochí in kuenta de tlan titekipano-
jiwitzi, porke mach ok tietos tinotekipanoj.”³ Ijkuakón in
tekipanoj okimolwíj: “¿Axan tlan nikchiwas porke note ko
nechkixtilis in tekitl? Mach nikxikos nitekipanos ika ajsalon,
iwan nipinawa nimijtlanijtinemis.⁴ Ya nikmati tlan nikchi-
was, para ke nikuak nechkixtis note ko nikinpias akinmej
nechresibiroskej inchan.”⁵ Tones okinnotzke katlej okiwik-
iliaj iteko. Katlej achtoj okinotzke okilwíj: “¿Kexkich tikwik-
ilia in note ko?”⁶ Iwan yej okijtoj: “Nikwikilia se siento bar-
riltin de aseite.” In tekipanoj okilwíj: “Nian kajki moresibo.
Niman ximotlali iwan xikchiwa oksé resibo san de tlajko
siento barriltin.”⁷ Satepan okitlajtlanij oksé katlej kiwikilia
iteko: “Tej, ¿kexkich tikwikilia in note ko?” Iwan yej okilwíj:
“Se siento koxtal de trigo.” Tones in tekipanoj okilwíj: “Nian
kajki moresibo. Xikchiwa oksé resibo san de nawinpoale
koxtal.”⁸ Nikuak okimatke iteko, okijtoj nik in yon itekipanoj
omotlalij listo porke okitemoj kenik kichiwas satepan. Porke
in tlaltikpaktlakaj okachi listojtin para kitekipanoltiskej itlaj
tlamantle iwan amo ken ikonewan Dios.

⁹ ’Nej namechilwia ke okachi kuale xiktekipanoltikan in
rikojyotl katlej onkaj ixko yin tlaltikpak, para ijkón xiwelikan
xikinpiakan namoamigoswan, iwan nikuak tlamis in rikojy-
otl welis amechresibiroskej kan anchantiskej nochipa.

¹⁰ ’Akin kímati kitekipanoltia itlaj tlamantle tzikitzi nika
kuale iyolo, tones noijklí welis kitekipanoltis itlaj tlamantle
mieks. Iwan akin amo kímati kitekipanoltia itlaj tlamantle
tzikitzi porke mach kipia kuale iyolo, tones noijklí mach
welis kitekipanoltis itlaj tlamantle mieks.¹¹ Axan
kiné, tla itech in rikojyotl katlej onkaj ixko yin tlaltikpak
namejwan mach ankitekipanoltiaj ken moneki, tones mach
welis amechmaktiliskej katlej melawak rikojyotl.¹² Iwan
tla namejwan mach kuale ankitekipanoltiaj itlaj tlamantle
katlej amo amoaxka, tones mach welis amechaxkatiskej itlaj
tlamantle para xiktekipanoltikan.

¹³ ’Mach akaj tekipanoj welis kinpias ome itekowan, porke
welis kitlasojtas in se iwan oksé mach kitlasojtas, o noso
welis kitlakitas in se iwan oksé mach kitlakitas. Mach welis
ankitekipanoskej in Dios mientras amechyoltilantok in riko-
jyotl.

¹⁴ In fariseos katlej okiwelitayaj tomin, okikaktokaj nochí
tlan Jesús okijtoaya iwan san okiwetzkiliayaj.¹⁵ Tones Jesús
okinmilwíj:

—Namejwan ammochiwaj ke yeskia melawak ankualtin in-
mixpan tlakaj, pero Dios kixmati namoyolo. Onkaj tlamantle
katlej in tlakaj kiweyimati, pero toTajtzin Dios kikokolia.

In tlanawatile de Moisés mach ya tlami

¹⁶ 'Itlanawatil in Moisés iwan intlamachtil in profetajtin omotekipanoltijkej asta ikuak ovalaj in Juan Tlakuateekij. Desde ikuakón motematiiltjiwitz in kuale tlajtole de kenik Dios tlanawatia. Iwan axan nochtin mochijchikawaj kinekij kalakiskej kan Dios tlanawatia.

¹⁷ 'Okachi mach owij pojpoliwis in ilwikak iwan tlaltikpak, ke se letra katlej ikuilitok itech itlanawatil in Moisés amo ma mochiwa.

Jesús otlamachtij mach se ma mosiwakawa

(Mt. 19:1-12; Mr. 10:1-12)

¹⁸ 'Tla se tlakatl kikawa isiwa iwan monamiktia iwan oksé siwatl, kijtosneki ya kimomekatia. Iwan akin monamiktia iwan se siwatl katlej omokajkaj iwan iokich, noijki kijtosneki ya kimomekatia.

In tlakatl katlej okimopialiaya iwan Lázaro

¹⁹ 'Oyeka se tlakatl katlej okimopialiaya. Omotzotzoltiaya ika tzotzole moradotik sa tekitl patíoj iwan omochijchiwaya kej yeskia se rey. Iwan momostla okichiwaya ilwitl iwan okikowaya miek tlakuale katlej sa tekitl kuale. ²⁰ Noijki oyeka se pobre itoka Lázaro, katlej nochti tlalnakayo otentoka de tzotzotl. Iwan omotlaliaya ipan tlale ikaltempan in tlakatl katlej okimopialiaya. ²¹ Yon pobre okinekia kikuani tlan owetzia de ipan imesa in tlakatl katlej okimopialiaya. Iwan asta in itzkuinmej okipajpaliliayaj itzotzowan. ²² Se tonale in pobre omikke, iwan angelestin okiwikakej inawak Abraham kan ilwikak. In tlakatl katlej okimopialiaya noijki omikke, iwan okitookakej. ²³ In tlakatl katlej okimopialiaya sa tekitl otlajyowiaya ijtki tlico, oajkopantlachixke iwan okitak de wejka in Abraham iwan Lázaro. ²⁴ Ikuakón otzajtzik okijtoj: "Papan Abraham, xinechiknomati, iwan xiknawati in Lázaro ma kisiawa imajpil, iwan ma wiki ma kiseseliki nonenepil. Porke sa tekitl ntlajyowia ijtki yin tlitl." ²⁵ Pero Abraham okilwij: "Nokone, xikelnamiki nik in tej otikpixke miek tlamantle nikuak otinemia ixko in tlaltikpak, iwan Lázaro opanok miek tlamantle mach kuale. Axan yej nian kipia pakistle, iwan tej titlajyowia. ²⁶ Iwan onkaj se tlamantle katlej sa tekitl tlawejkatlan katlej techxelojtok. Iwan akinmej kinekiskej yaskej de nian para ompa, mach weliskej, nion akinmej kinekiskej witzej de ompa para nian noijki mach weliskej." ²⁷ Tones in tlakatl katlej okimopialiaya okilwij: "Nimitzlatlawtia kiné, papan Abraham, xiktitlani in Lázaro ichan nopapan,²⁸ kan nikinpia makultin nokniwan, para ma kintlapowiti, iwan ijkón amo ma wikikan yejwan noijki itech yin tlajyowilistle." ²⁹ Pero Abraham okilwij: "Yejwan kipiaj

tlan okikuiloj in Moisés iwan tlan okikuilojkej in profetajtin. Ma kikakikan tlan yejwan kijtaj.”³⁰ In tlakatl katlej okimopialaya okinankilij: “Amo, mach ijkón, papan Abraham, pero tla akaj katlej yomikke iwan moyolkuis (moyolitis) oksemi iwan yas kintlapowiti, yejwan moyolkuepaskej de intlajtlakol.”³¹ Pero Abraham okilwij: “Tla amo kinekij kikakiskej itlajtol in Moisés iwan intlajtol in profetajtin, tonses maski ma moyolkui akaj tlakatl no mach kinekiskej kikakiskej maski ma kintlapowi.”

17

Kenik se wetzi ipan tlajtlakole

(Mt. 18:6-7, 21-22; Mr. 9:42)

¹ Jesúś okinmilwij imomachtijkawan:

—Nochipa yetos tlan ika tlajtlakoskej in tlakaj. Pero ipobre in tlakatl katlej kitoktis akaj oksé ma wetzi ipan tlajtlakole!

² Okachi kuale ma kilpilikan ikechtlan se metlatl iwan ma kitlamotlakan ijtk atl, ke ma kitokti ma wetzi ipan tlajtlakole se de yinmej tzitzikinmej.³ Xikpiakan kuidado.

‘Tla se mokni tlajtlakoa motech, xiknotza iwan xikajwa. Tla mitzkaki iwan moyolpejpena (moyolkuepa), xiktlapojpolwi.⁴ Maski ma tlajtlako motech chikome buelta se tonale, iwan chikome buelta witz monawak mitzilwiki: “Mach ok ijkón nikchiwas”, in tej xiktlapojpolwi.

Ma titlaneltokakan okachi

⁵ In tlatitlaniltin okilwijkej in Señor:

—Xitechmaka okachi tlaneltokalistle.

⁶ Ijkuakón in Señor okinmilwij:

—Tla amejwan ankipianij tlaneltokalistle, maski tzikitzin kej isemiya in mostaza, welini ankilwianij yin sicomorejkuawitl: “Ximowiwitla de nian iwan ximotooka ijtk atl”, iwan kuawitl amechtlakitani.

In tekipanoj iwan itekiw

⁷ ‘Tla akaj de amejwan kipia se itekipanoj iwan tla yomokuepato otanaxawato o noso otajpiato, ¿kox ankilwiaj: “Xiliki ximotlali xitlakua”? ⁸ Amo, sino ankilwiaj: “Xinechchiwili tlan nikuas, xiktlejtleykolti momakamisa iwan xinechtlamaka asta ma tlami ma nitlakua iwan ma natli. Satepan tej welis titlakuas iwan tatlis.” ⁹ ¿Kox ankitlasojkamatij namejwan namotekipanoj por kichiwa tlan ankinawatiaj? Namejwan kuale ankintij nik amo.¹⁰ Ijkón noiiki namejwan, nikuak antlamiskej ankichiwaskej nochí tlan Dios amechnawatia, moneki xikijtokan: “Tejwan mach tikualtin titekipanojkej, porke mach otikchijkej okachi de tlan otechnawatijkej ma tikchiwakan.”

Jesús okinpajtij majtlakin tlakaj katlej opalania innakayo

¹¹ Nijuak Jesús oonewak para Jerusalén, opanok ik estado de Samaria iwan ik estado de Galilea. ¹² Nijuak oajsik itech se pueblojtzin, owalajkej okinamikikoj majtlakin tlakaj katlej opalania innakayo, pero san wejka omoketzkej ¹³ iwan otzajtzikej chikawak:

—Jesús, Tlamachtij, xitechiknomati!

¹⁴ Nijuak in Jesús okinmitak, okinmilwij:

—Xiwian ximoteititij innawak in tiopixkej.

Iwan nijuak yoyayaj ipan ojtle, opajtikej iwan ochipawikej itech innakayo. ¹⁵ Ijkuakón se de yejwan, nijuak omotlatak yochipawik de ikokolis, omokuepke, kiweyikixtiw in toTajtzin Dios chikawak. ¹⁶ Omotlankuaketzke iyakapan Jesús, asta okitennamikke in tlale iwan omotlasojkamatke inawak. Yon tlakatl oyeka de estado de Samaria. ¹⁷ Ijkuakón Jesús okijtoj:

—¿Amo anmajtlakin katlej anpajtikej? ¿Kanin katej in oksekimej chiknawin? ¹⁸ ¿San yen yin tlakatl katlej mach judío omokuepke para kiweyikixtis in Dios?

¹⁹ Toneses in Jesús okilwij in tlakatl:

—Ximoketza iwan xiwia. Otipajtik porke otinechneltokak.

Kenik yetos nijuak witz in Jesús para tlanawatis

(Mt. 24:23-28, 36-41)

²⁰ In fariseos okitlajtlanijkej in Jesús keman ajsis tonale nijuak Dios pewas tlanawatis. Iwan Jesús okinnankilij:

—In tlakaj mach welis kitaskej nijuak Dios pewas tlanawatis. ²¹ Nimpot mach kijtoskej: “Xikitakan, nian kajki”, o noso “Xikitakan nepa kajki”. Porke Dios ya tlanawatijtok ipan inyolo in tlakaj.

²² Ijkuakón okinmilwij imomachijkawan:

—Ajsis tonale namejwan ankinakiskej annechitaskej Nej katlej onimochij nitlakatl iwan ankinakiskej oksemi ma nieto amowan, pero mach ok annechitaskej. ²³ Iwan sekimej tlakaj amechilwiskej: “Xikitakan, nian kajki”, o noso “Xikitakan, ne kajki.” Amo xikneltokakan, nion amo xiwian xinechtemotij. ²⁴ Porke ijkón ken nijuak tlapetlani ik se lado de itech ilwikak iwan tlawia asta itech oksé lado de ilwikak, ijkón Nej nojki akin onimochij nitlakatl ik nowian (nian nepa) nechitaskej itech nekáj tonale nijuak niwitz. ²⁵ Pero achtoj moneki nitlajyowis miek, iwan nechkokoliskej in tlakaj katlej nemij itech yinmej tonaltin. ²⁶ Ijkón ken otlamochij itech nekáj tiempo de Noé, no ijkón tlamochiwas nijuak niwitz Nej katlej onimochij nitlakatl. ²⁷ In tlakaj otlakuayaq iwan okoniaj, omonamikiayaj iwan okintlajtlaniaj ichpokamej. Ijkón okichijtokaj asta itech nekáj tonale nijuak in Noé

okalakke ijtk in weyi barko, iwan ijkuakón omokajkaj in tlamawisolkiawatl iwan nochtin okinpojpoloj.²⁸ Ijkón noijsi otlamochij itech nekáj tiempo de Lot: otlakuayaj iwan okoniaj, otlakowayaj iwan otlanamakayaj, otlatookayaj iwan okalchiwayaj.²⁹ Pero nijuak Lot okiske de itech weyikan de Sodoma, owetzke tlilt iwan azufre de ilwikak, iwan nochtin okinmiktij.³⁰ Ijkón noijsi tlamochiwas itech nekáj tonale nijuak niwalmonextis Nej katlej onimochij nitlakatl.

³¹ 'Itech nekáj tonale, tla akaj yetos ipan ikal, amo ma temo para kikixtiti tlan kipia itech ikalijtik. Iwan tla akaj kajki itlalaj, amo ma walmokuepa para ichan.³² Xikelnamikikan tlan omochij isiwa in Lot.³³ Akin kinekis kipalewis inemilis, kipolos. Pero akin kipolos inemilis por Nej, kipalewis inemilis.

³⁴ 'Namechilwia nik in yon yuak kochtoskej omen ipan se tlapechtle. Se kiwikaskej iwan oksé kikajtewaskej.³⁵ Omen siwamej sepantistoskej inkalijtik. Se kiwikaskej iwan oksé kikajtewaskej.³⁶ Omen tlakaj sepantekipanojtoskej intlalaj. Se kiwikaskej iwan oksé kikajtewaskej.

³⁷ Nijuak ijkón okikakej, okitlajtlaniijkej:

—¿Kan ijkón tlamochiwas, Señor?

Iwan Jesús okinnankilij:

—Kan wetos se mikkatl, ompa mololoskej in tzopilomej.

18

Ejemplo de se viuda iwan se jue

¹ Jesús okinmilwij se ejemplo para kinmachtis nik moneki se motiotzajtzilis nochipa, iwan amo se ma mosotlawa.

² Okinmilwij:

—Oyeka itech se pueblo se jue se viuda mach okimakasia in Dios, iwan okinkokoliaya nochtin tlakaj.³ Itech yon pueblo oyeka noijsi se viuda, katlej okonitaya in yon jue para ma kipalewi itech se pleito porke okinekiaj kitojtoktiskej.⁴ Opanok miek tonale in jue mach okinekiaj kipalewis, pero satepan okimolwij: “Maski mach nikimakasi in Dios iwan maski nikinkokolia in tlakaj,⁵ nikpalewis in yin siwatl, porke san mokueptok nechwaliita, para ayakmo okachi ma nechkuejso iwan ma nechyolajxiti.”

⁶ Iwan Señor okijtoj:

—Xikkakikan tlan okijtoj in mach kuale jue.⁷ ¿In Dios kox amo welis kinpalewis noijsi itlapejpenalwan, katlej tonayan iwan yuak kimotlatlawtiliaj ma kinpalewi? ¿Kox wejkawas para kinpalewis?⁸ Nej namechilwia nik mach wejkawas. Pero Nej katlej onimochij nitlakatl nijuak niwitz, ¿kox ok

nakinmajsiki in tlakaj katlej tlaneltokaj nonawak ixko yin tlaltikpak?

Ejemplo de se tlakatl fariseo iwan se tlakatl katlej tlakobraroa ika impuesto

⁹ Jesúś okinmilwij oksé ejemplo, okinmilwij katlej momachiliaj kualtin tlakaj iwan okinmitayaj kej yeskia mach itlaj inpatij in oksekimej. Okijtoj:

¹⁰ —Omen tlakaj oyajkej kan weyi tiopan omotiotzajtzilitoj: se oyeka fariseo, iwan oksé oyeka tlakobraroj ika impuestos. ¹¹ In fariseo omoketoka iwan omotiotzajtzilijtokaj ijkín: “Dios, nimitzlasojkamachilia porke nej mach nikchiwa ken oksekimej, katlej ichtekej, katlej mach kualtin iwan katlej momekatijkej. Iwan nion mach nikchiwa ken yin tlakobraroj ika impuestos. ¹² Nej nimosawa (niayunaroa) ome buelta se samana, iwan nimitzmaka in diesmo de nochí tlan niktlani.” ¹³ Pero in tlakatl katlej tlakobraroj ika impuestos san wejka omoketzke iwan nion mach omixewiaya ajkopantlachias, sino san omoelpantlatzinaya iwan okijtoaya: “¡Dios, xinechiknomati, porke nej nitlajtlakolej!” ¹⁴ Nej namechilwia nik in yon tlakobraroj ika impuestos omokuepke para ichan ya chipawak de itlajtlakol. Pero in fariseo amo. Porke akin moweyinekis, mopinatis. Pero akin amo moweyinekis, weyikistos (weyititos).

Jesúś okintiochij in pilalaktin

(Mt. 19:13-15; Mr. 10:13-16)

¹⁵ In tlakaj okinwalinwikayaj inpilalakkonewan para Jesúś ma kintlali imawan inpan. Pero nijuak imomachtijkawan okitakej, opéj kinmajwaj katlej okinwalinwikayaj in pilalaktin. ¹⁶ Pero Jesúś okinnotzke iwan okinmilwij:

—Xikinkawakan in pilalaktin ma wikikan nonawak, amo xikintatzakuilikan. Porke in tlakaj katlej yolyamankej ken pilalaktin, kalakiskej kan Dios tlanawatia. ¹⁷ Ipan melajka namechilwia, akin amo kikawilis Dios ma tlanawati ipan iyolo ken se chokotzin kimokawilia, in yon tlakatl mach kalakis kan Dios tlanawatia.

Se tlakatl katlej wel kimopialia omotlapowij iwan Jesúś

(Mt. 19:16-30; Mr. 10:17-31)

¹⁸ Se tlakatl tlayekanke judío okitlajtlanij in Jesúś:

—Tlamachtij, tejwatzin tikuale tlakatl, ¿tlan moneki nikchiwas para nikpias nemilistle katlej mach keman tlamis?

¹⁹ Jesúś okilwij:

—¿Tlanik tinechilwia nikuale tlakatl? Mach onkaj oksé kuale tlakatl sanwel yen Dios. ²⁰ Ya tikmati tlan kijtaj in

tlanawatiltin: “Amo ximomekati, amo xitemikti, amo xitlachteki, amakaj xiktlajtoltlatlalili, xiktlakita mopapan iwan momaman.”

²¹ In tlakatl okilwij:

—Nochi in yon nikchijtiwitz desde nichokkoj.

²² Nijuak ijkón okikakke in Jesús, okilwij:

—Oksé tlamantle mitzpoloa tikchiwas: xiknamaka nochi tlan tikpia iwan in tomin xikinmaka in pobrestin. Ijkón tikpias rikojoyotl ompa ilwikak. Iwan nompa, xiwiki nonawak iwan pewa xinemí nowan.

²³ Pero yon tlakatl nijuak ijkón okikakke, sa tekitl omoyolkokoj, porke sa tekitl okimopialaya. ²⁴ Nijuak Jesús okitak nik sa tekitl omoyolkokoj yon tlakatl, okijoj:

—Sa tekitl owij para nekatej katlej kimopialiaj kalakiskej kan Dios tlanawatia. ²⁵ Okachi mach owij para se kameyo panos kan kuyontok in akuxaj, ke para se katlej kimopialia kalakis kan Dios tlanawatia.

²⁶ Iwan katlej ijkón okikakej okijtojkej:

—Toneses, ¿akin kiné welis momakixtis?

²⁷ Jesús okinmilwij:

—Tlan amo welij kichiwaj in tlakaj, Dios weli kichiwa.

²⁸ Pedro okilwij:

—Señor, tejwan otikajtejkej nochi tlan otikpiayaj para tiaskej mowan.

²⁹ Ijkuakón Jesús okinnankilij:

—Ipan melajka namechilwia, ke akin okikajtej ikal, o noso ipapan, o noso iknawan, o noso isiwa, o noso ipilwan, para kichiwas tlan Dios kinawatia, ³⁰ kiresibiros okachi miek de tlan okikajtej. Kiresibiros okachi miek itech yin tiempo, iwan kipias nemilistle katlej mach keman tlamis itech nekáj tiempo katlej satepan yetos.

Jesús okitematiltij de imikilis ya eyi buelta

(Mt. 20:17-19; Mr. 10:32-34)

³¹ Jesús okinwikak ik se lado in majtlakte iwan omen imomachtijkawan, iwan okinmilwij:

—Axan ma tiwian para Jerusalén, kan mochiwas nochi tlan okikuilojkej in profetajtin de yen Nej katlej onimochij nitlakatl. ³² Nechtemaktiskej (nechtemaktiliskej) inmak in tlakaj katlej mach judiojtin, nechpijpinatiskej, nechwiktiskej iwan nechchijchijchaskej. ³³ Iwan satepan de nechwitekiskej, nechmiktiskej. Pero ipan eyi tonale nimoyolkuis (nimoyolitis).

³⁴ Yejwan mach okimomakakej kuenta tlan okinmilwij, nion mach okimatiaj de tlanon okintlapowiaya. Mach okimomakakej kuenta yon tlamantle porke ok otlatitoka para yejwan.

*Jesús okitlachialtij se tlakatl katlej mach otlachiaya
(Mt. 20:29-34; Mr. 10:46-52)*

³⁵ Nijuak Jesús yojsitiaya itech weyikan de Jericó, se tlakatl katlej mach tlachia oewatoka itempan ojtle omoijtlanijtoka. ³⁶ Nijuak okikakke opanoayaj miekej tlakaj ik ompa, in tlakatl katlej mach tlachia otlajtlanke tlan tlamochiwa. ³⁷ Iwan okilwijkej nik in Jesús de Nazaret ik ompa panoti. ³⁸ Ijkuakón otzajtzik chikawak okijtoj:

—¡Jesús, iKone in David, xinechiknomati!

³⁹ Katlej oyayaj tlayakapan okajwakej para ma mokamatza-kua, pero yej okachi chikawak otzajtzik:

—¡Jesús, iKone in David, xinechiknomati!

⁴⁰ Tones in Jesús omoketzke iwan otlanawatij ma kiwal-wikilian. Nijuak oejkok iyakapan, okitlajtlanij:

—¿Tlan tikneki ma nimitztoki?

In tlakatl katlej mach tlachia okijtoj:

—Señor, nikneki nitlachias.

⁴² Jesús okilwij:

—¡Xitlachia! Motlaneltokalis yomitzmakixtij.

⁴³ San niman ijkuakón in tlakatl ya owelik otlachixke. Satepan yej oyáj iwan Jesús kiweyikixtijtiw in toTajtzin Dios. Iwan nochtin in tlakaj katlej okitakej, nojki okiweyikixtijkej in toTajtzin Dios.

19

Jesús iwan Zaquo

¹ Satepan Jesús okalakke itech weyikan de Jericó iwan onejnentiaj itech se ojtle, ² iwan ompa oyeka se tlakatl katlej okimopialiya itoka Zaquo, katlej tlayekanke tlakobraroj ika impuestos, ³ iwan yon Zaquo okinekia kixmatis in Jesús. Pero mach owelia okitaya porke oyekaj sa tekitl miekej tlakaj iwan Zaquo oyeka chaparrotzin. ⁴ Ijkuakón omotlaloj tlayakapan, iwan para welis kitas in Jesús, otlekkok itech se kuawitl itoka sicómoro serka de kanik Jesús panos. ⁵ Nijuak Jesús opanok ik ompa, otlachixke ik ajkopan iwan okilwij:

—Zaquo, xitemo totoka, porke axan nikneki nimokalotis mokalijtik.

⁶ Tones in Zaquo otemok totoka, iwan okiresibiroj in Jesús ika pakilistle. ⁷ Nijuak ijkón okitakej, nochtin opéj kipojpoaj, okijtoayaj ke Jesús okalakke omokalotito ichan se

tlakatl tlajtlakolej. ⁸ Satepan Zaqueo omoketzke iwan okilwij in Señor:

—Señor, nikinmakas in pobrestin tlajko de nochí tlan nikpia. Iwan tla akaj onikajkayaj para oniktlachtekij, nikkuepilis nawi buelta okachi de tlan onikixtilij.

⁹ Jesús okilwij:

—Axan yomomakixtijkej in tlakaj de yin kale. Porke yin Zaqueo noijki walajtok nelwatl de Abraham iwan tlaneltoka ken Abraham otlaneltokak. ¹⁰ Porke Nej katlej onimochij nitlakatl oniwalaj onikintemoko iwan onikinmakixtiko katlej mopolojtokej.

Ejemplo de majtlakte tominmej

¹¹ Mientras in tlakaj okikakiaj yon tlajtole, Jesús okinmilwij se ejemplo, porke yoyeka serka de Jerusalén iwan yejwan okiyejyekoayaj nik in Dios san niman ya pewas tlanawatis ixko yin tlaltikpak. ¹² Ijkuakón okinmilwij:

—Oyeka se tlakatl katlej kimopialia iwan weyikistok (weyititok), oyáj wejka para kiresibiros itekiwajkayo de rey iwan satepan oksemi walmokuepas. ¹³ Antes de yas, okinnotzke majtlaktin itekipanojkawan, kada se okimakak se tomin katlej miek ipatij, iwan okinmilwij: “Xiktekipanoltikan yin tomin para xiktlanikan okachi mientras ma nimokuepati.” ¹⁴ Pero in tlakaj de ipueblo okikokoliayaj, iwan por yonik okintitlankej sekimej tlakaj para ma kijtotij: “Mach tiknekij yin tlakatl ma technawati kej rey.” ¹⁵ Pero okiresibiroj itekiwajkayo de rey, iwan omokuepke para ipueblo. Nijuak oejkok, okintekuitlanke itekipanojkawan katlej okinmakak in tomin, para kimatis kexkich okitlanke kada se. ¹⁶ Achtoj se oejkok iwan okijtoj: “Señor, motomin okitlanke majtlakte buelta okachi.” ¹⁷ In rey okinankilij: “Kuale kajki. Tej tikuale titekipanoj. Iwan como kuale otiktekipanoltij tlan san tzikitzin onimitzmakak, por yonik axan nimitztlalis xitlanawati itech majtlakte pueblotin.” ¹⁸ Oksé oejkok iwan okijtoj: “Señor, motomin okitlanke makuile buelta okachi.” ¹⁹ In rey noijki okilwij: “Tej noijki nimitztlalis xitlanawati itech makuile pueblotin.” ²⁰ Satepan oksé oejkok iwan okijtoj: “Señor, nian kajki motomin. Oniktlaatij ika se panito. ²¹ Porke onimitzimakaske, porke tejwatzin wel chikawak titlanawatia, iwan tikmoaxkatia tomin katlej mach otiktlanke iwan tkmopixkia tlan amo otiktookak.” ²² Ijkuakón in rey okilwij: “Tej mach tikuale titekipanoj, ika tlan tej monewian yotikijtoj ika yon nimitztlajtlakoltis. Tla tikmati nik chikawak nitlanawatia, iwan nikmoaxkatia in tomin katlej mach oniktlanke iwan nikmopixkia tlan amo oniktookak, ²³ ¿tlanik amo otikkawato notomin itech banko, para nijuak niejkoni,

nikresibiroani notomin iwan ikoneyo?”²⁴ Iwan okinmilwij katlej ompa oyekaj: “Xikixtilikan in tomin katlej onikmakak, iwan xikmakakan katlej kipia majtlakte tomin.”²⁵ Iwan yejwan okilwijkej in rey: “Pero Señor, yej ya kipia majtlakte tomin.”²⁶ Pero in rey okinmilwij: “Nej namechilwia, ke akin kipia, kimakaskej okachi miek. Iwan akin amo kipia, kikixtiliskej asta yen tzikitzin tlan kipia.”²⁷ Iwan nekatej nokontraswan katlej mach kineki ma nieto nirey para ma nikinnawati, xikinwalinwikakan iwan noixpan xikinmiktikan.”

*Jesús okalakke itech weyikan de Jerusalén
(Mt. 21:1-11; Mr. 11:1-11; Jn. 12:12-19)*

²⁸ Satepan de ijkón okijtoj, Jesús oksemi oonewak para weyikan de Jerusalén.²⁹ Nijuak ya onajsitiw itech pueblo de Betfagé iwan itech pueblo de Betania, ya serka kan kajki in Olivostepetl, ikuakón okintitlanke ome imomachtijkawan,³⁰ okinmilwij:

—Xiwian itech nekáj pueblojtzin katlej kajki ne tlayakapantzin, iwan nijuak anmajsitiwej ankitaskej se burro ilpitok, katlej mach ya semi akaj ipan tlejko. Xiktotomakan iwan xikualwikakan.³¹ Tla akaj amechtlajtlanis tlanik ankitotomaj, xikilwikan nik in Señor kineki.

³² Imomachtijkawan oyajkej, iwan okajsitaisikej nochin ken Jesús okinmilwij.³³ Iwan nijuak okitotontokaj in burro, itekowan in burro okintlajtlanijkej:

—¿Tlanik ankitotomaj in burro?

³⁴ Iwan yejwan otlanankilijkej:

—Porke in Señor kineki.

³⁵ Ikuakón okiwilikijkej in Jesús, okinkixtijkej intlakenwan iwan okinkentilijkej in burro iwan ipan okitlejkoltijkej in Jesús.³⁶ Nijuak Jesús oyaya ipan burro, in tlakaj okinsojtiayaj intlakenwan ipan ojtle.³⁷ Iwan nijuak Jesús oajsik kan pewa temolistle de kan Olivostepetl, nochtin se monton imomachtijkawan opéj tzajtzij chikawak ika pakilistle iwan okiweyikixtayaj in toTajtzin Dios por nochtin in milagrostin katlej yokitakej.³⁸ Okijoayaj:

—¡Ma Dios kitiochiwa in Rey katlej okualtitlanke in toTajtzin Dios! ¡Ma tlayolosewto itech ilwikak, iwan ma tikweyikixtikan toTajtzin Dios katlej kajki ilwikak!

³⁹ Ikuakón sekimej fariseos katlej ompa oyekaj inwan in tlakaj, okilwijkej in Jesús:

—Tlamachtij, xikinmajwa momomachtijkawan katlej ijkón kijtaj.

⁴⁰ Pero Jesús okinnankilij:

—Nej namechilwia, tla yejwan mokamatzakuaskej, in temej tzajtziskej.

⁴¹ Nijkuak oajsito serka de itech weyikan de Jerusalén, iwan nijkuak okitak, ochokak, ⁴² iwan okijtoj:

—¡Ay, Jerusalén! ¡Ojalá tikmomakani kuenta itech yin tonale katlej mitzmakani yolosewilistle! Pero axan mach tikmomakas kuenta porke Dios yomitzaatilij. ⁴³ Porke witzej tonaltin, nijkuak mokontraswan mitzyawaloskej iwan mitzlatzakiskej. Ik nowian (nian nepa) mitzyawaloskej iwan mitzmagaskej. ⁴⁴ Mitztlamotlaskej ipan tlale. Kinmiktiskej katlej motech chantij, iwan mach kikawaskej nion se tetl nepanitos ipan oksé tetl. Porke mach otikmomakak kuenta nijkuak Dios omitzitako para mitzmakixtis.

*Jesús okinkixtij in tlanamakakej de ijtk in weyi tiopan
(Mt. 21:12-17; Mr. 11:15-19; Jn. 2:13-22)*

⁴⁵ Satepan Jesús okalakke ijtk in weyi tiopan iwan opéj kinkixtia de ompa katlej otlanamakayaj iwan katlej otlakowayaj, ⁴⁶ iwan okinmilwij:

—Itech tiotlajkuilole kijta: “Nokal yetos kale de tiotzajtziliste”. Pero namejwan ya ankikuepkej se kale de ichtkej.

⁴⁷ Nochi tonale Jesús otlamachtiaya itech weyi tiopan. Pero in tlayekankej tiopixkej iwan tlamachtijkej de itlanawatil in Moisés, iwan in tlayekankej de itech yon weyikan opéj kitemoaj kenik welis kimiktiskej. ⁴⁸ Pero mach okajsiaj kenik kichiwaskej, porke nocthin in tlakaj okinekiaj kikakiskej nochi tlan Jesús okijoaya.

20

*Jesús okitlajtlanijkej akin okimakak tlanawatijkayotl
(Mt. 21:23-27; Mr. 11:27-33)*

¹ Se tonale nijkuak Jesús oyeka kan weyi tiopan okinmachtijtoka in tlakaj, iwan okinmatiltijtoka in kuale tlajtole katlej temakixtia, ijkuakón oejkokej in tlayekankej tiopixkej iwan in tlamachtijkej de itlanawatil in Moisés, iwan in tlayekankej tetajtzitzintin judiojtin, ² iwan okilwijkej:

—Xitechilwi, ¿ika tlan tlanawatijkayotl tikchiwa in yin tlamanter? ¿Akin omitzmakak in yon tlanawatijkayotl?

³ Ijkuakón Jesús okinnankilij:

—Nej noijki namechtlajtlanis se tlajtole. Xinechnankilikan:

⁴ ¿Akin okinawatij in Juan ma tlakuateeki? ¿Yen Dios okinawatij, o noso yen tlakaj okinawatijkej?

⁵ Ijkuakón opéj kimolwiaj entre yejwan ijkín:

—¿Ken tikilwiskej? Tla tikijtoskej yen Dios okinawatij, techilwis: “¿Tlanik kiné mach ankineltokakej?” ⁶ Iwan tla tikijtoskej yejwan in tlakaj okinawatijkej, nocthin in tlakaj

techmiktiskej ika tetl, porke yejwan kuale kimatij nik in Juan oyeka profeta de Dios.

⁷ Iwan okinankilijkej ke mach kimatij akin okinawatij in Juan ma tlakuateeki. ⁸ Toneses in Jesús okinmilwij:

—Pues Nej noiiki mach namechilwis ika tlan tlanawatijkay-otl nikchiwa in yon tlamantle.

In tlatookej mach kualtin

(Mt. 21:33-44; Mr. 12:1-11)

⁹ Satepan Jesús opéj kintlapowia in tlakaj, iwan okinmilwij yin ejemplo:

—Oyeka se tlakatl katlej okitookak miek uvas, iwan satepan okinkajtewilij sekimej tekipanojkej para ma kimonekuitlawikan iwan satepan kimokawiskej tlaatlajko de tlan tlakis, iwan oyáj de ompa iwan owejkawato kan oyáj. ¹⁰ Nijuak ya kuale para kitekiskej in uvas, okititlanke se itekipanoj innawak in yonmej tekipanojkej para ma kitlajtlaniti tlan kitokaroa. Pero in tekipanojkej okimagakej iwan okikuepkej san ijki. ¹¹ Satepan iteko in uvasyoj okititlanke oksé itekipanoj. Pero noiiki okimagakej. San tlan amo okilwijkej iwan okikuepkej san ijki. ¹² Iteko in uvasyoj oksemi okititlanke oksé itekipanoj, pero in tekipanojkej noiiki okikokojkej iwan okikixtijkej kalan.

¹³ 'Satepan, iteko in uvasyoj okimolwij: "¿Tlan nikchiwas? Niktitlanis notlasojkone. Nijuak kitaskej, xamo kitlakitaskej." ¹⁴ Pero nijuak in tekipanojkej okitakej, okimolwijkej se iwan oksé: "Yin ikone yen katlej kimokawis tlan iaxka in tetaj. Ma tikmiktikan, para tejwan tikmoaxkatiskej in uvasyoj." ¹⁵ Ijkuakón okikixtijkej in tekone de kan uvasyoj iwan okimiktijkej.

Satepan Jesús okintlajtlanij:

—Axan kiné, ¿tlan kichiwas iteko in uvasyoj? ¿Tlan kintoktis in tekipanojkej? ¹⁶ Yon iteko in uvasyoj yas iwan kinmixpolos nekatej tekipanojkej, iwan iuvasyoj kinmakas oksekimej para ma kimonekuitlawikan.

Nijuak in tlakaj ijkón okikakej, okijtojkej:

—¡Amo ma Dios kimonekilti!

¹⁷ Pero Jesús okintlatak, iwan okijtoj:

—¿Tlan kijtosneki kiné tlan kijta in tiotlajkuilole? Kan kijta: In tetl katlej in kalchijkej mach okixitakej,

omochij yen tetl katlej okachi kichikajtok in kale.

¹⁸ Iwan akin wetzis ipan yon tetl, pojpostekis. Iwan tla in tetl wetzis ipan akaj, kikuejkuechos.

Kox se kitlaxtlawas impuesto para César

(Mt. 21:45-46; 22:15-22; Mr. 12:13-17)

¹⁹ In tlayekankej tiopixkej iwan tlamachtijkej de itlanawatil in Moisés okinekiaj kikitzkianij in Jesús itech yon ora, porke okimomakakej kuenta nik okinkakkakitij ika yon ejemplo. Pero mach okikitzkijkej, porke okinmiimakasiaj in tlakaj. ²⁰ Satepan okintitlankej sekimej tlakaj para ma kixpiakan in Jesús iwan omochiwayaj kej kualtin tlakaj, para welis kikakiskej itlaj tlajtole katlej ika welis kimayawiskej iwan ijkón welis kitemaktiskej (kitemaktiliskej) imak in gobernador. ²¹ Por yonik yejwan okitlajtlanijkej in Jesús:

—Tlamachtij, tikmatij nik tikija tlan melawak iwan noijki titlamachtia tlan melawak, iwan tejwatzin mach tikanmita in tlakaj kox rikojtin o noso pobrestin, sino titlamachtia ipan melajka kenik se nemis ken Dios kineki. ²² Xitechilwi: ¿Kox kuale se kitlaxtlawas impuesto para César o noso amo?

²³ Pero Jesús okimatisa nik mach kuale tlan okiyejyekojtokaj iwan nik okinekiaj kimayawiskej ika itlaj tlajtole. Iwan okinmilwij:

—¿Tlanik ankinekij annechmayawiskej ika itlaj tlajtole? ²⁴ Xinechititikan se tomin. ¿De akin ixko iwan akin itoka katlej nestok itech yin tomin?

Yejwan okijtojkej:

—De César.

²⁵ Toneses in Jesús okinmilwij:

—Pues xikmakakan in César tlan de yen César, iwan xikmakakan Dios tlan de yen Dios.

²⁶ Iwan mach owelikej okitlajtolmayajkej de tlan okijtoaya inmixpan tlakaj. Sino okachi sa omotlajtlachialtiayaj (omomajmawtiayaj) de kenik otlanankiliaya, iwan mach ok itlaj okijtojkej.

Okitlajtlanijkej in Jesús kox moyolkuiskej in mikkamej

(Mt. 22:23-33; Mr. 12:18-27)

²⁷ Satepan, sekimej saduceos oyajkej okitatoj in Jesús. In yonmej saduceos mach kineltokaj kox welis moyolkuiskej (moyolitiskej) in mikkamej. Iwan okitlajtlanijkej in Jesús:

²⁸ —Tlamachtij, Moisés otechkajtewilij ikuilitok, ke tla se tlakatl omonamiktij, miki iwan mach okipixke nion se ikone iwan isiwa, ikni in difunto kipia de monamiktis iwan yon viuda para kinpias ikonewan para ijkón welis yeskej kej yeskia ikonewan in difunto. ²⁹ Axan kiné, oyekaj chikomen iknimej. In yankuiotl achtos omonamiktij, pero omikke iwan mach okinpixke ikonewan. ³⁰ Oksé ikni katlej kiwaltoka omonamiktij iwan yon viuda, iwan noijki omikke iwan mach okinpixke ikonewan. ³¹ Ijkuakón oksé katlej kiwaltoka omonamiktij iwan yon viuda, iwan ijkón okichijkej nochtin in oksekimej, iwan san ken chikomen iknimej omikkej iwan

mach okipixkej nion se inkone. ³² Satepan noijki omikke in viuda. ³³ Toneses, nijuak moyolkuiskej (moyolitiskej) in mikkamej, ¿katlij yen de yonmej chikomen yetos isiwa? Porke nochtin chikomen omonamiktijkej iwan yon siwatl.

³⁴ Toneses in Jesús okinnankilij:

—Itech yin tlaltikpak, in tlakaj iwan siwamej monamiktiaj. ³⁵ Pero nijuak in tlakaj iwan siwamej moyolkuiskej oksemi de itech inmikilis, iwan katlej Dios kinkawilis ajsiskej ompa ilwikak, mach ok motlajtlaniskej iwan nion mach ok monamiktiskej. ³⁶ Porke mach ok mikiskej. Yeskej kej angelestín, iwan yeskej ikonewan in Dios porke yokinyolitij. ³⁷ Inewian Moisés, okiteititij nik in mikkamej moyolkuiskej, kan tlapoa de se kuatlanwitztle katlej otlatlaya. Kan Dios okilwij in Moisés nik yen Dios de Abraham, de Isaac iwan de Jacob. ³⁸ Iwan Dios amo Dios de mikkamej, sino de katlej yolitokej. Porke nochtin katlej iaxkawan Dios, yonmej nochtin yolitokej.

³⁹ Ijkuakón sekimej tlamachtijkej de itlanawatil in Moisés okilwijkej:

—Tlamachtij, kuale tlan otikijtoj.

⁴⁰ Iwan mach ok omixewijkej ok itlaj okitlajtlanijkej.

¿De akin iKone in Cristo?

(Mt. 22:41-46; Mr. 12:35-37)

⁴¹ Ijkuakón Jesús okinmilwij:

—¿Tlanik kijtaj nik in Cristo katlej Dios okipejpenke yen ikone in David? ⁴² Porke inewian in David kijta itech libro de Salmos:

In toTajtzin Dios okilwij in noSeñor yin tlajtole:

“Ximotlali ik noyekma,

⁴³ asta ijkuak Nej nimitztlalis titlayekanke de yejwan katlej mitzkokoliaj.”

⁴⁴ Tla inewian David okinotzke in Cristo “noSeñor”; ¿kenik kiné in Cristo ma yeto iKone in David?

Jesús okijtoj mach kuale tlan kichiwaj in tlamachtijkej de itlanawatil in Moisés

(Mt. 23:1-36; Mr. 12:38-40; Lc. 11:37-54)

⁴⁵ Nochtin in tlakaj otlakaktokaj nijuak in Jesús okinmilwij imomachtijkawan:

⁴⁶ —Ximotlachilikan de yen tlamachtijkej de itlanawatil in Moisés, porke kiwelitaj nemiskej ika intlaken weweyak, iwan kinekij ma kinyektlajpalokan nijuak nemij tiankistle. Iwan itech tiopanmej kiwelitaj motlaliskej kan motlaliaj in tlayekankej, iwan kitemoaj motlaliskej kan okachi kuale lugár itech ilwimej. ⁴⁷ Iwan yejwan noijki kinkixtiliaj inkalwan in viudajtin, iwan tlaixkajkayawaj motiotzajtziliaj sa tekitl

para ma kinmitakan kichiwaj tlan kuale. Por yonik in yejwan kitlaxtlawaskej okachi weyi intlajtlakol.

21

*In viuda katlej okitemakak nochí tlan okipiaya
(Mr. 12:41-44)*

¹ Jesús oyeka ijtit in weyi tiopan iwan ompa okinmitak in tlakaj katlej kimopialiaj, okonkajkawayaj intomin ijtit in kaja kan mololoa in ofrenda. ² Noijki ompa okitak se viuda pobre katlej okonkajkaj ijtit in yon kaja ome tomintzitzintin de cobre. ³ Iwan Jesús okijtoj:

—Ipan melajka namechilwia, nik in yin viuda pobre okonkajkaj okachi miek ke nochtin oksekimej. ⁴ Porke nochtin konkajkawaj intomin katlej kinsobraroa, pero yin viuda pobre okonkajkaj nochí tlan okipiaya tlan ika motlamakani.

*Jesús okijtoj in weyi tiopan xitinis
(Mt. 24:1-2; Mr. 13:1-2)*

⁵ Nijuak sekimej omotlapowijtokaj de yen weyi tiopan, iwan de yen temej kualtzitzintin, iwan de yen tlamantin kualtzitzintin katlej ompa oyekaj kej ofrendajtin, ikuakón Jesús okijtoj:

⁶ —Ajsis tonale nijuak nochí yin tlamantle katlej namejwan axan ankitaj xitinis, iwan nion se tetl mach ok mokawas nepanitos ipan oksé tetl.

*Ijkín tlapanos antes de tlamis in tlaltikpak
(Mt. 24:3-28; Mr. 13:3-23)*

⁷ Ikuakón okitlajtlanijkej:

—Tlamachtij, ¿keman ijkón tlapanos? ¿Tlan señas tikitasej nijuak ijkón pewas tlapanos?

⁸ Jesús okijtoj:
—Xikpiakan kuidado de amakaj ma amechkajkayawa. Porke miekej witzej ika notoka kijtoskej: “Nej niCristo”, iwan noijki kijtoskej: “Yoajsik ora.” Pero amo xikinneltoki likan. ⁹ Nijuak ankimatiskej onkaj guerra iwan momagaj ik nowian (nian nepa), amo ximomawtikan, porke ijkón kipia de tlapanos achtoj. Pero ikuakón mach ya tlamis in tlaltikpak.

¹⁰ Jesús noijki okinmilwij:
—Se país momagas iwan oksé país, iwan se pueblo momagas iwan oksé pueblo. ¹¹ Miek lado tlalolinis chikawak, yetos apostle iwan yetos kokolistle. Motaskej tlamantin temajmawtijkej iwan señalestin wejweyin de ilwikak.

¹² ‘Pero achtoj, namejwan amechtlatlalochtiskej, amechkukuyotzaskej asta itech tiopanmej iwan asta

itech telpiloyan, iwan amechwikaskej inyakapan reytin iwan inyakapan gobernadortin. Ijkón anpanoskej por annechneltokaj.¹³ Pero ikuakón namejwan xikintlapowikan de Nej.¹⁴ Iwan xikchiwakan de amo ximotlanemiltikan de kenik antlanankiliskej para anmopalewiskej.¹⁵ Porke Nej namechmakas tlajtote iwan tlalnamikiliste ke namokontraswan mach kixikoskej iwan nion mach weliskej amechnankiliskej.¹⁶ Iwan asta amotajwan, amokniwan, amoparienteswan, iwan amoamigoswan yejwan mismo amechtemaktiskej (omechtemaktiliskej). Sekimej de amejwan amechmiktiskej,¹⁷ iwan nochtin in tlakaj amechkokoliskej por Nej.¹⁸ Pero nion se amotzonkal de amotzontekon mach poliwis.¹⁹ Tla anmoyekketoskej itech namotlaneltokalis, se tonale welis anmomakixtiskej.

²⁰ Níjkuak ankitaskej in weyikan de Jerusalén yokiyawalo-jkej miekej soldadojtin, xikmatikan nik san níman kixixititzaskej.²¹ Ijkuakón katlej yeskej Judea ma cholokan asta ipan tepemej. Katlej yeskej itech weyikan de Jerusalén ma kisakan de ompa, iwan katlej yeskej intlalaj amo ma mokuepakan oksemi para Jerusalén.²² Porke itech nekatej tonaltin Dios kintlajyowiltis in tlakaj katlej mach kuale ote-toktijkej, para ma mochiwa nochti tlamantle tlan kijta in tiotlajkuilole.²³ ¡Pobrestin in siwamej katlej itech nekatej tonaltin kipiaskej inkone intlalaxko iwan katlej yeskej selikkonewajkej! Porke yetos weyi tlajyowilistle ixko yin tlaltikpak, iwan ikualanilis in Dios witz inpan yinmej tlakaj.²⁴ Sekimej mikiskej itech guerra, iwan oksekimej kintzakuaskej itech oksekimej paismej. Iwan katlej mach judiojtin ipan tlajtlaksaskej in weyikan de Jerusalén, asta kan Dios kijtos ma lami yon tiempo de ijkón ma kichiwakan in tlakaj katlej mach judiojtin.

Jesús walmokuepas oksemi (Mt. 24:29-35, 42-44; Mr. 13:24-37)

²⁵ Ijkuakón motaskej señalestín itech tonale, itech metztle iwan itech sitlaltin. Iwan itech tlaltikpak in tlakaj momajmawtiskej iwan mach ok kimatiskej tlanon kichiwaskej, porke in atl kukuyokas chikawak iwan motlatlamotlas.²⁶ In tlakaj sa tekitl momawtiskej asta kuatleyuiliskej de nemajmawtile níjkuak kimomakaskej kuenta tlan tlapanos ixko yin tlaltikpak. Porke asta in chikawalistin katlej katej ilwikak papatlakaskej (bibiokaskej).²⁷ Ijkuakón kemaj nechitaskej, Nej katlej onimochij nitlakatl, niwitz ijtek mixtle ika nopoder iwan ika nomawisotlanex.²⁸ Níjkuak pewas ijkón tlapanos,

ximoyolojchikawakan iwan xiajkopantlachiakan, porke ni-man namechmakixtis.

²⁹ Jesú斯 noijki okinmakak yin ejemplo:

—Xikitakan in igoskuawitl, o noso itlaj oksé kuawitl.

³⁰ Níkuak ankitaj pewa selia, namejwan ankimatij yoajsiko in tiempo de tonalko. ³¹ Ijkón noijki, níkuak ankitaskej pe-was panoskej in yonmej tlamantin, xikmatikan nik ya meroj pe-was tlanawatis in toTajtzin Dios.

³² Ipan melajka namechilwia, nik nochí in yin tlapanos antes de mikiskej in tlakaj de yin tiempo. ³³ In ilwikak iwan yin tlaltikpak mach ok yetoskej, poliwiskej, pero notlajtol mach poliwis, kipia de mochiwas.

³⁴ Xikpiakan kuidado. Amo xiyo tlakuawakan ika tlan amo kuale. Amo san xitlakuajtinemikan, amo xitlawantinemikan iwan nion amo xikkawilikan in tlanemilile de yin nemilstle ma amechijtlako. Porke Nej san nonkisaki itech nekáj tonale, iwan amo nikneki ijkón namechajsiki. ³⁵ Porke yetos kej se trampa katlej kinkitzkis nochtin tlakaj katlej nemij ixko yin tlaltikpak. ³⁶ Xiijsatokan kiné. Ximotiotzajtzilijtokan nochí tonale para amo xipanokan itech yonmej tlamantin katlej panoskej, para ijkón welis anmajsitiwej noyakapan Nej katlej onimochij nitlakatl.

³⁷ Jesú斯 otlamachtiaya tonayan itech weyi tiopan, iwan de yuak oyaya kan Olivostepetl iwan ompa omokawayá. ³⁸ Iwan nochtin tlakaj oyayaj kan weyi tiopan nochí kualkan para kikakiskej in Jesú斯.

22

Okitemojkej kenik kimiktiskej in Jesú斯

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Yoajsia ilwitl níkuak mokua in pan katlej mach kipia levadura, kijtosneki yen ilwitl de pascua. ² In tlayekankej tiopixkej iwan tlamachtijkej de itlanawatil in Moisés okitemoayaj kenik kimiktiskej in Jesú斯, pero mach oweliaj porke okinmiimakasaj in tlakaj.

³ Ijkuakón Satanás okalakke ipan iyolo in Judas, katlej kinotzaj Iscariote. Yej oyeka se de yejwan majtlakte iwan omen imomachtijkawan in Jesú斯. ⁴ Oyáj okinmitato iwan okintlapowito in tlayekankej tiopixkej iwan tlayekankej de tiopan, de kenik kinmaktilis in Jesú斯. ⁵ Yejwan opakej iwan okilwijkej kimakaskej tomin. ⁶ Judas okijtoj kuale kajki iwan opéj kitemoa kenik kitemaktis (kitemaktilis) níkuak mach ma kimomakakan kuenta in tlakaj.

Tiotlakantlakuale de toSeñor

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Oajsiko yon tonale de ilwitr nijuak mokua in pan katlej mach kipia levadura, nijuak kimiktaj se ichkatzin para ika kelnamikij nijuak in Dios okinkixtij de Egipto. ⁸ Iwan Jesú斯 okintitlanke in Pedro iwan Juan ika yin tlanawatilé:

—Xiwian xikchiwatij in tiotlakantlakuale de pascua.

⁹ Yejwan okitlajtlanijkej:

—¿Kan tikneki ma tikchiwatij?

¹⁰ Jesú斯 okinnankilij:

—Nijuak ankalakiskej itech weyikan, ankinamikiskej se tlakatl katlej kitki iaxoktzin. Xiwian ikuitlapan asta itech kale kan yej kalakis, ¹¹ iwan xikilwikan iteko in kale: “In Tlamachtij kijta: ¿Katlij yen kuarto kan nikmomajsewis in tiotlakantlakuale de pascua inwan nomomachtiwkawan?” ¹² Ijkuakón yej amechitis se weyi kuarto ik ajkopan, ya tlayektlalitok. Ompa xikchiwakan in tiotlakantlakuale.

¹³ Yejwan oyajkej iwan okajtsaisikej nochí ken Jesú斯 okimilwij, iwan okichijkej in tiotlakantlakuale de pascua.

¹⁴ Nijuak oajsik ora, Jesú斯 iwan itlatitlanilwan omotlalijkej itech mesa. ¹⁵ Ijkuakón Jesú斯 okimilwij:

—Ya wejkawitl niknektiwitz nikuas amowan yin tiotlakantlakuale de pascua antes de nimikis. ¹⁶ Pues namechilwia nik mach ok semi nikuas, asta ijkuak ma mochiwa de tlanon kijtosneki in yin tlakuale kan Dios tlanawatia.

¹⁷ Satepan okitilanke in kopa, omotlasojkamatke inawak Dios iwan okijtoj:

—Xikonikan yin, iwan xikmoxejxelilikan aminochtin namejwan. ¹⁸ Pues namechilwia nik mach ok semi nikonis iayo uvas asta ma ejko in tonale nijuak in Dios pewas tlanawatis.

¹⁹ Satepan, okitilanke in pan iwan omotlasojkamatke inawak Dios. Satepan okipojpostekke in pan iwan okinmakak imomachtiwkawan. Okijtoj:

—Yin yen notlalnakayo, iwan niktemaka por yen namejwan. Xikchiwakan yin para ika xinechelnamikikan.

²⁰ No ijkón okichij ika in kopa, satepan de otiotlakantlakuajej, okijtoj:

—Yin kopa kijtosneki yen yankuik akuerdo katlej mochivas ika noeso, iwan nokiwis por amejwan.

²¹ Pero xikitakan, in tlakatl katlej nechtemaktis (nechtemaktilis), nowan kajki itech mesa. ²² Melawak, Nej katlej onimochij nitlakatl nimikis ijkón ken Dios kimonekiltia. Pero ipobre in tlakatl katlej nechtemaktis!

²³ Ijkuakón entre yejwan opéj motlajtlaniaj akin de yejwan ijkón kichiwas.

Motlatlajtolkuepaj de akin okachi weyikistok (weyititok)

²⁴ Noijki opéj motlatlajtolkuepaj akin de yejwan okachi weyikistok. ²⁵ Pero Jesús okinmilwij:

—In reytin de ixko yin tlaltikpak mochiwaj kej tekomej itech paismej kan tlanawatiaj. Iwan tlakaj kinmilwiaj “tekiwajkej katlej kichiwaj tlan kuale”. ²⁶ Pero namejwan mach ijkón xikchiwakan. Sino, akin kineki weyikistok de amejwan, kipia de kintekipanos nochtin oksekimej ijkón ken se telpochtle kimonekuitlawia se tetajtzin. Iwan akin okachi tlayekantos, ma mochiwa kej se tlapalewij. ²⁷ ¿Akin okachi weyikistok, katlej motlalia itech mesa o noso katlej tetlamaka? ¿Amo yen katlej motlalia itech mesa? Pero Nej maski namotlayekanke, nikaj amowan ken se katlej tetlamaka.

²⁸ 'Namejwan nochipa ya antlajyowijtinenkej nowan.

²⁹ Por yonik, Nej namechtlalis para xitlanawatikan, ijkón ken noPapan Nej onechtlalij ma nitlanawati. ³⁰ Namejwan antlakuaskej iwan antlaoniskej itech nomesa ompa kan nitlanawatis. Anmotlaliskej ipan siyajtin para ankimixkomakaskej in majtlakte iwan ome familias de Israel.

Jesús okijtoj nik in Pedro kijtos mach kixmati

(Mt. 26:31-35; Mr. 14:27-31; Jn. 13:36-38)

³¹ In Señor noijki okijtoj:

—Simón, Simón, xikkaki. Satanás yokitlajtlanke para amechtzejzelos ken trigo. ³² Pero Nej yonikmotlatlawtilij in Dios para amo xikpolo motlaneltokalis. Iwan nikuak oksemi timokuepas nonawak, xikinpalewi mokniwan para ma moyekketokan itech intlaneltokalis.

³³ Simón okilwij:

—Señor, nimotemaka nias mowan maski ma nechta-kuakan o noso maski ma nechmiktikan.

³⁴ Jesús okilwij:

—Pedro, nimitzilwia nik axan, antes de tzajtzis in kaxtil, ikuakón tej yotikijtoj eyi buelta nik mach tinechixmati.

Ma kitkikan bolsa, morral, iwan espada

³⁵ Ijkuakón Jesús okintlajtlanij:

—Nikuak onamechtitlanke iwan onamechilwij amo xikitkikan itlaj bolsa, nion tomin, nion kaktle, ¿kox itlaj oamechpoloj?

Yejwan okijtojkej:

—Mach itlaj.

³⁶ Toneses okinmilwij:

—Pero axan, akin kipia ibolsa, ma kitki iwan noijki ma kitki imorral. Iwan akin amo kipia iespada ma kinamaka itzotzol iwan ma kimokowi se iespada. ³⁷ Porke namechilwia

nik kipia de mochiwas notech yin tlan kijta in tiotlajkuilole: "Okitakej kej yeskia se tlakatl mach kuale." Porke noch i tlan kajki ijkuitilitok de Nej, kipia nik mochiwas.

³⁸ Ijkuakón yejwan okijtojkej:

—Señor, nian katej ome espadajtin.

Jesús okinmilwij:

—Ya kuale kajki, ayakmo itlaj xikijtokan.

Jesús omotiotzajtzili kan tlatokkuawyoj itoka Getsemaní (Mt. 26:36-46; Mr. 14:32-42)

³⁹ Satepan Jesús okiske. Ijkón ken Yej okimati okichiwaya, oyáj ipan Olivostepetl. Imomachtijkawan noijki oyajkej ikuitlapan. ⁴⁰ Nijuak Jesús ompa oajsito, okinmilwij:

—Ximotiotzajtzilikan, para amo amopan ma wiki in Amo Kuale Tlakatl.

⁴¹ Jesús omijkuanij de innawak iwan oyáj ik se lado wejkatzin ken nijuak se kitlamotla se tetl de wejka, ompa omotlankuaketzke iwan omotiotzajtzili. ⁴² Okijtoj:

—Papan, tla tejwatzin tkmonekiltia, xinechmakixti de itech yin tlajyowilistle. Pero amo ma mochiwa ken Nej nikneki, sino ken tejwatzin tkmonekiltia.

⁴³ Ijkuakón okimonextilij se ángel de ilwikak para kimakas chikawalistle. ⁴⁴ Iwan nijuak omoyolkokojtoka sa tekitl, omotiotzajtziliaya okachi. Wejweyi itonil ochipinia ipan tlale kej estle.

⁴⁵ Nijuak otlanke omotiotzajtzili, omoketzke iwan oyáj kan oyekaj imomachtijkawan, iwan okinmajsitajsik kochtokej, porke in sotlawalistle iwan neyolkokole okinkochpachoj. ⁴⁶ Jesús okinmilwij:

—¿Tlanik ankochij? Ximewakan, iwan ximotiotzajtzilikan para amo amopan ma wiki in Amo Kuale Tlakatl.

Jesús okikitzijkej

(Mt. 26:47-56; Mr. 14:43-50; Jn. 18:2-11)

⁴⁷ Jesús ok otlapojtoka, iwan ijkuakón oejkokej miekej tlakaj. Katlej itoka Judas, katlej oyeka se de yen majtlaktele iwan omen imomachtijkawan Jesús, okualinyekanaya. Omi jkuanij inawak Jesús iwan okixpipitzoj. ⁴⁸ Ijkuakón Jesús okilwij:

—Judas, ¿ijkín tinechixpipitzoa para tinechtemaktia (techtemaktilia) Nej katlej onimochij nitlakatl?

⁴⁹ Katlej oyekaj iwan Jesús, nijuak okitakej tlan pewa tlapanoa, okitlajtlanijkej:

—Señor, ¿tikneki ma tikmomagakan inwan ika espada?

⁵⁰ Iwan se de yejwan okinakastzon tekke se tlakatl itekipanoj in tlayekanke tiopixke, okitzontekili iyeknakas.

⁵¹ Pero Jesús okijtoj:

—Xikinkawakan. Ya kuale kajki.

Ijkuakón Jesúś okitzkilij inakas in yon tlakatl iwan opajtik.
⁵² Jesúś okinmilwij in tlayekankej tiopixkej, in tlayekankej de tiopan iwan tlayekankej tetajtzitzintin, katlej ovalajkej okikitzkikoj:

—¿Anwalajkej annechkitzkikoj ika espada iwan ika kuawitl kej yeskia niichtekke? ⁵³ Nochipa onieka amowan itech weyi tiopan, iwan mach annechkitzkijkej. Pero itech yin ora Dios amechkawilia xikchiwakan tlan amejwan ankinekij, iwan tlan kineki in Amo Kuale Tlakatl katlej tlanawatia ijlik tlatleyualotl.

Pedro okijtoj mach kixmati in Jesúś

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Iwan ijkuakón okitzkijkej in Jesúś, iwan okiwikakej ichan tlayekanke tiopixke. Pedro san wejka okonitiaya. ⁵⁵ Ompa tlatlajko patio, in tlakaj okitlalijkej se tlikuile, iwan omotlalijkej okiyawalojkej. Pedro noijki omotlalij intzalko. ⁵⁶ Satepan se tlapalewijkasiwatl, nijuak okitak in Pedro ewatok iyakapan tlikuile, okitlatak kuale iwan okijtoj:

—Yin tlakatl noijki onemia iwan Jesúś.

⁵⁷ Pero in Pedro mach okimokuitij, iwan okijtoj:

—Siwatl, nej mach nikixmati.

⁵⁸ Achitzin satepan, oksé tlakatl okitak iwan okilwij:

—Tej noijki se de yejwan.

Pero in Pedro okijtoj:

—Amo, nej mach inwan nipowi.

⁵⁹ Kej se ora satepan, oksé okiyekijtoj:

—Ipan melajka, yin tlakatl onemia iwan Jesúś, porke yin noijki de estado de Galilea.

⁶⁰ Ijkuakón Pedro okijtoj:

—Tlakatl, mach nikmati tlan tikipta.

Iwan san niman ijkuakón, nijuak in Pedro ok otlapojtoka, otzajtzik in kaxtil. ⁶¹ Ijkuakón in Señor omokuepke iwan okitlatak in Pedro, iwan Pedro okelnamikke tlan Señor okilwijka: “Axan, antes de tzajtzis in kaxtil, ijkuakón tej yotikijtoj eyi buelta nik mach tinechixmati.” ⁶² Iwan ijkuakón Pedro okiske iwan ochokak sa tekitl.

Okipijpinatijkej iwan okiwitekej in Jesúś

(Mt. 26:67-68; Mr. 14:65)

⁶³ In tlakaj katlej okipixtokaj in Jesúś, okipinawiayaj iwan okiwitekiaj. ⁶⁴ Okixilpiayaj iwan okixwijwitekiaj, iwan okilwiayaj:

—¡Tla xitlajto (xikadibinaro), akin omitzmaak!

⁶⁵ Iwan san tlan amo okilwiayaj para ika okipijpinatijkej.

Jesús okiwikakej kan tlaixkomakaj (tlatzonmanaj)
(Mt. 26:59-66; Mr. 14:55-64; Jn. 18:19-24)

⁶⁶ Níkuak otlaneske, omololojkej in tlayekankej tetajtzitz-intin judiojtin, in tlayekankej tiopixkej, iwan tlamachtijkej de itlanawatil in Moisés, iwan okiwikakej in Jesús kan tlaixkomakaj (tlatzonmanaj) in judiojtin. Ompa okitlajtlanijkej:

⁶⁷ —Xitechilwi, ¿kox tej in tiCristo?

Jesús okinnankilij:

—Tla namechilwis nik yen Nej, namejwan mach annechneltokiliskej. ⁶⁸ Iwan tla itlaj namechtajtlanis, mach annechnankiliskej, iwan nion mach annechkajkawaskej. ⁶⁹ Iwan desde axan Nej katlej onimochij nitlakatl niewatos ik iyekma in toTajzin Dios katlej kipia nochí poder.

⁷⁰ Ijkuakón nochtin okitlajtlanijkej:

—¿Toneses kijtosneki tej titeKone de Dios?

Jesús okinnankilij:

—Aján, yen Nej. Ijkón ken namejwan ya ankijtojkej.

⁷¹ Toneses yejwan okijtojkej:

—Mach ok moneki ok akaj ma kistlakawi. Yotikkakej tlan Yej inewian yokimokuitij.

23

Jesús okiwikakej inawak Pilato

(Mt. 27:1-2, 11-14; Mr. 15:1-5; Jn. 18:28-38)

¹ Ijkuakón nochtin omoketzkej, iwan okiwikakej in Jesús inawak Pilato. ² Ompa opéj kistlakawiaj, okijtoayaj:

—Otikajsikej yin tlakatl kinkuatlapololtijtinemi in tlakaj. Kijta nik mach moneki se kitlaxtlawas impuestos para César, iwan kijta nik yen Cristo, kijtosneki Yej se Rey.

³ Toneses in Pilato okitlajtlanij:

—¿Yen tej tiRey de judiojtin?

Jesús okinankilij:

—Ijkón ken tej tikija.

⁴ Ijkuakón Pilato okinmilwij in tlayekankej tiopixkej iwan tlakaj:

—Mach itlaj tlajtlakole nikkajxilia yin tlakatl.

⁵ Pero yejwan okachi chikawak okijtojkej:

—Kinkuatlapololtijtinemi in tlakaj ika itlamachtil itech nochí in estado de Judea. Opéj kinkuatlapololtia itech estado de Galilea, iwan axan asta nian ijkón kichijtinemi.

Jesús okiwikakej inawak Herodes

⁶ Níkuak in Pilato ijkón okikakke, otlajtlanke kox in Jesús Yej de Galilea. ⁷ Níkuak okilwijkej nik in Yej de ompa, ijkuakón okititlanke inawak Herodes, katlej oyeka gobernador de yon estado de Galilea, katlej noijki ompa omajsia

itech weyikan de Jerusalén itech yonmej tonaltin.⁸ Níkuak Herodes okitak in Jesús, Herodes sa tekitl opakke. Ya wejkawitl okinekia kitas, porke okikakia otlapoayaj de Yej, iwan okinekia kitas ma kichiwa se milagro.⁹ Herodes miek okitlatlajtlanij, pero Jesús mach itlaj okinankilij.¹⁰ Ompa oyekaj noijki in tlayekankej tiopixkej iwan tlamachtijkej de itlanawatil in Moisés, katlej okistlakawiayaj chikawak ika miek tlajtole.¹¹ Tones Herodes iwan isoldadojwan okitojtoktijkej san tlan amo iwan okipinawijkej, okitzotzoltijkej ika se kuale tzotzole ijkón ken motzotzoltia se rey. Satepan Herodes oksemi okititlanke inawak Pilato.¹² Itech yon tonale Pilato iwan Herodes omochijkej amigostin. Porke achtoj mach omoyekwikayaj.

*Jesús okitemaktijkej (okitemaktılık) para ma kimiktikan
(Mt. 27:15-26; Mr. 15:6-15; Jn. 18:39—19:16)*

¹³ Satepan Pilato okinmololoj in tlayekankej tiopixkej, in tekiwajkej iwan nochtin in tlakaj,¹⁴ iwan okinmilwij:

—Namejwan annechwalwikilijkej yin tlakatl, ankijtaj kinkuatlapololtijtinemi in tlakaj. Pero nej yoniktlatzintokij amoixpan, iwan ya ankitakej nik mach itlaj onikkajxilij itlaj tlan amo kuale de tlan ika amejwan ankitilwiaj.¹⁵ Nion Herodes mach itlaj okajxilij, porke oksemi onechwaltitlanilij. Yin tlakatl mach itlaj okichij como para ma se kimiki.¹⁶ San nitlanawatis ma kiwitekikan iwan satepan nikkajkawas.

¹⁷ Pilato ijkón okinmilwij, porke kada xiwitl itech ilwitl de pascua in tekiwajkej romanostin okipiayaj kostumbre de okikajkawayaj se preso.¹⁸ Pero nochtin opéj kuawtzajtzij:

—¡Xikmiki yon tlakatl iwan xikkajkawa in Barrabás!

¹⁹ Yon Barrabás okitzakej telpiloyan porke okintlatlalwij miejek tlakaj ma momagakan iwan gobierno ompa itech weyikan de Jerusalén, iwan noijki porke otemiktij.²⁰ Pilato oksemi okintlapowij in tlakaj, porke okinekia kikajkawani in Jesús.²¹ Pero yejwan oksemi otzajtzaika chikawak:

—¡Xikmajmasolti itech krus! ¡Xikmajmasolti itech krus! ¡Ma miki!

²² Pilato okinmilwij ya eyi buelta:

—¿Tlanik? ¿Kox itlaj okichij mach kuale? Nej mach itlaj nikkajxilia itlaj tlan mach kuale como para ma se kimiki. Nitlanawatis ma kiwitekikan iwan satepan nikkajkawas.

²³ Pero yejwan okachi otzajtzaika chikawak, okijtoayaj ma kimajmasoltikan itech krus. Yejwan iwan tlayekankej tiopixkej sa tekitl otzajtzaika, astakan okajsikej tlan okinekiaj.

²⁴ Ijkuakón kiné in Pilato okichij tlan yejwan okinekiaj.

²⁵ Iwan ijkón, okikajkaj in tlakatl katlej otzaktoka por okintlatlalwika in tlakaj ma momagakaj iwan gobierno iwan

por otemiktij. Porke yejwan ijkón okitlajtlankej. Pero Pilato okinmaktilij in Jesús para ma kitoktikan san tlan yejwan kinekiskej.

*Jesús okimajmasoltijkej itech krus
(Mt. 27:32-44; Mr. 15:21-31; Jn. 19:17-27)*

²⁶ Nijuak opéj kiwikaj in Jesús para kimajmasoltiskej itech krus, ikuakón okikitzkijkej se tlakatl de estado de Cirene itoka Simón, katlej ovalaya de itlalaj, iwan okitoktijkej ma kimama in krus iwan ma kitki ikuitlapan Jesús.

²⁷ Miekej tlakaj oyayaj ikuitlapan Jesús, iwan nojki oyayaj miekej siwamej katlej ochokayaj iwan otzajtziaj de neyolkokole por Yej. ²⁸ Pero Jesús omokuepke iwan okinmilwij:

—Namejwan ansiwamej de Jerusalén, amo xichokakan por Nej, sino xichokakan por amejwan iwan por amopilwan.

²⁹ Porke ajsis tonale nijuak ijkín mijtos: “Ma pakian in siwamej katlej mach welij kinpiaj inkonewan, iwan katlej mach keman okintlakatilijkej inkonewan, iwan katlej mach keman otlachichitijkej.” ³⁰ Ikuakón in tlakaj pewas kinmilwiskej in tepemej: “Topan xiwetzikij”, iwan kinmilwiskej in tepeztitzintin: “Xitechtlaatikan.” ³¹ Tla Nej katlej mach nikpia tlajtlakole nipanoa tlajyowilistle, ¿kenik amo ma panokan tlajyowilistle in oksekimej katlej kipiaj tlajtlakole? No ken se kuawitl xoxowik, tla welij kichichinoaj maski xoxowik, ¿kenik amo ma kichichinokan katlej wakke?

³² Nojki okinwikayaj omen tlakaj katlej mach kualtin para kinmiktiskej itech krus iwan Jesús. ³³ Nijuak oajsitoj itech nekáj lugar kan kitokayotiaj Mikkatzon tekamatl, ompa okimajmasoltijkej itech krus in Jesús, iwan nojki okinmajmasoltijkej omen tlakaj katlej mach kualtin: se ik iyekma in Jesús iwan oksé ik iopochma. ³⁴ Nijuak in Jesús okimajmasoltijkej itech krus, okijtoj:

—Papan, xikintlapojpolwi, porke mach kimatij tlan kichiwaj.

In soldadojtin omotlankej para kitaskej kenik kimoxejxeliliskej entre yejwan itzotzol in Jesús. ³⁵ Miekej tlakaj ompa otlachixtokaj. In tekiwajkej sa tekitl okiwetzkiliayaj in Jesús, okijtoayaj:

—Okinmakixtij oksekimej. Axan Yej inewian ma momakixti, tla melawak yen Cristo katlej Dios okipejpenke.

³⁶ In soldadojtin nojki okiwetzkiliayaj in Jesús, omikuaniijkej inawak iwan okimakakej ma koni iayo uvas xokok, ³⁷ iwan okilwiayaj:

—Tla tej tiRey de judiojtin, ximomakixti tej monewian.

³⁸ Iwan ikuapak okipiaya se letrero ikuilitok ika tlajtole griego, latín iwan hebreo, okijoaya: “YIN YEN REY DE JUDIO-JTIN.”

³⁹ Se de yen omen tlakaj katlej mach kualtin katlej ompa opilkatoka itech krus, noijki san tlan amo okilwij, okijoj:

—Tla tej tiCristo, monewian ximomakixti, iwan xitechmakixti in tejwan noijki.

⁴⁰ Pero in oksé katlej noijki mach kuale, okajwak iwan okilwij:

—¿Amo tikimakasi in Dios, maski ya tikmati nik san sekan timikiskej? ⁴¹ Tejwan technamiki ma techtlajyowiltikan, porke ya tiktlaxtlajtoej tlan otikchijkej, pero yin tlakatl mach itlaj okichij.

⁴² Iwan okilwij in Jesús:

—Jesús, xinechelnamiki itech nekáj tonale nikuak oksemi tiwalmuikas para titlanawatis.

⁴³ Jesús okinankilij:

—Ipan melajka nimitzilwia, axan tias nowan itech paraíso.

Jesús omikke

(Mt. 27:45-56; Mr. 15:33-41; Jn. 19:28-30)

⁴⁴ Nikuak oajsik kej tlajko tonale, otlatleyuak itech nochí in tlaltikpak iwan owejkaj asta las tres de tiotlakke. ⁴⁵ In tonale mach ok otlawij, iwan kortina de yen weyi tiopan otlajkotzayanke. ⁴⁶ Ijkuakón Jesús otzajtzik chikawak:

—Papan, ipan momatzin niktlalia noanima.

Nikuak otlanke ijkón okijoj, omikke.

⁴⁷ Nikuak in kapitan romano okitak tlan otlamochij, okiweyikixtij in toTajtzin Dios, okijoj:

—Yin tlakatl melawak nik oyeka kuale tlakatl.

⁴⁸ Nochtin in tlakaj katlej ompa oyekaj iwan okitakej nochí tlan otlamochij, omokuepkej moyolkokojtiwej iwan moelpantlatzinjitiwej. ⁴⁹ Pero nochtin katlej inwan omixmatia in Jesús, iwan siwamej katlej ovalajkej iwan Jesús desde estado de Galilea, san wejka omokajkej konitokej nochí yon tlamantle.

Jesús okitookakej ijtek se mikkakuyoktle

(Mt. 27:57-61; Mr. 15:42-47; Jn. 19:38-42)

⁵⁰ Oyeka se tlakatl itoka José. Oyeka kuale tlakatl iwan oyeka yolchipawak inawak Dios, ipueblo itoka Arimatea katlej kajki itech estado de Judea. José noijki tewan opowia kan tlaixkomakaj (tlatzonmanaj) in judiojtin. ⁵¹ José okichiaya keman Dios pewas tlanawatis, iwan yej mach inwan oyeka san se tlajtole in tlakaj katlej powij kan tlaixkomakaj, porke okitak nik mach ijki tlan okitoktijkej in Jesús. ⁵² Ijkuakón oyáj okitato in Pilato iwan okitlajtlanilij ma

kikawili ma kitki itlalnakayo in Jesús. ⁵³ Satepan de okitemowij de itech krus, okikimiloj ika se sábana iwan okitlalij ijtik se mikkakuyoktle katlej okikuyonijkej itech se tepejxitl, kan mach ya semi akaj kitookaj. ⁵⁴ Iwan itech yon tonale oyeka nijuak otlayektlaliajaj in judiojtin, para amo tekipanoskej nijuak walmostlatis porke ya weyi tonale, iwan itech yon tonale in judiojtin mosewiaj. Iwan yoajsia ora para pewas in weyi tonale.

⁵⁵ In siwamej katlej ovalajkej iwan Jesús desde estado de Galilea, nojki oyajkej iwan José. Yejwan okitakej in mikkakuyoktle, iwan okitakej kenik okitlalijkej itlalnakayo in Jesús. ⁵⁶ Nijuak omokuepkej inkalijtik, okiyektlalijkej sekin ajwiakayotl iwan sekin aseite para kaltliskej itlalnakayo in Jesús. Iwan nijuak oajsik in weyi tonale, omosewi-jkej ijkón ken kijta itlanawatil Moisés.

24

Jesús omoyolkui

(Mt. 28:1-10; Mr. 16:1-8; Jn. 20:1-10)

¹ In yakinika tonale de yen samana, in siwamej omokuepkej kan mikkakuyoktle san kualkan mach ya owalkisaya in tonale, okitkaj in ajwiakayotl katlej okiyektlalijkej. Oksekimej siwamej nojki inwan oyayaj. ² Nijuak oajsikej kan mikkakuyoktle, okajsitaisikej in tetl katlej ika okamatzatzoka, yoyeka ik se lado. ³ Iwan nijuak okalakej tliltik, mach okajsikej itlalnakayo in Señor Jesús. ⁴ Mach ok okimatiaj tlan kichiwaskej, iwan ikuakón okinmitakej omen tlakaj moke-tokej ik innakastlan, otlakentitokaj ika intlaken petlantok. ⁵ In siwamej omomawtijkej iwan omotlankuaketzkej iwan omootoolijkej asta ipan tlale. Pero in yonmej tlakaj okinmilwijkej in siwamej:

—¿Tlanik ankitemoaj se katlej yolitok nian kan kintookaj in mikkamej? ⁶ Jesús mach nian kajki. Yej yomoyolkui. Xikel-namikan tlan oamechilwij nijuak ok oyeka itech estado de Galilea. ⁷ Okijtoj nik in Yej, katlej omochij tlakatl, nik yipa kitemaktianij (kitemaktilianij) inmak in tlakaj tlajtlakolejkej, iwan nik yipa kimajmasoltianij itech krus, iwan nik okipiaya por moyolkuis (moyolitis) ipan eyi tonale.

⁸ Ikuakón in siwamej okelnamikej tlan Jesús okinmilwij. ⁹ Iwan satepan de omokuepatoj de kan mikkakuyoktle, okin-matiltijkej noch iwan otlapanok in majtlakte iwan se tlatitlaniltin iwan nochtin oksekimej. ¹⁰ In yonmej siwamej oyekaj yen María de pueblo de Magdala, Juana, María imaman Jacobo, iwan oksekimej siwamej. ¹¹ Pero in tlatitlaniltin

okiyeyekojkej mach melawak tlan okijtoayaj in siwamej, iwan mach okinneltokilijkej.

¹² Ijkuakón Pedro okistewak iwan omotlaloj oyáj kan mikkakuyoktle. Iwan níjkuak ompa oajsito, oontlachixke ik tliltik, okinmitak sa yen sabanajtin ompa oyekaj. Oyáj para ichan iwan sa omotlajtlachialtij (omomajmawtij) de tlan otapanok.

*Ojtle katlej yawi para Emaús
(Mr. 16:12-13)*

¹³ Itech yon mismo tonale, omen tlakaj katlej okineltokayah in Jesús onejnentiayaj ipan ojtle oyayaj asta se pueblo itoka Emaús, katlej oyeka de wejka kanaj majtlakte iwan se kilómetro de Jerusalén. ¹⁴ Omotlapowijtiayaj de nochí tlan otapanok. ¹⁵ Iwan mientras omotlapowijtiayaj de nochí tlan otapanok, ijkuakón Jesús inewian omijkuanij innawak iwan opéj inwan nejnemi. ¹⁶ Pero maski yejwan okitayah, oyeka kej itlaj tlamentle katlej okintzakuiliaya para amo ma kixmatikan.

¹⁷ Ijkuakón Jesús okintlajtlanij:

—¿De tlan namotlapowiaj mientras annejnemij? ¿Tlanik wel anmoyolkokoaj?

¹⁸ Se de yejwan katlej itoka Cleofas, okinankilij:

—Nochtin kimatiij tlan otlamochij Jerusalén itech yinmej tonaltin. Asta katlej mach ompa chantij kimatiij. ¿San yen tejwatzin in amo tikmati?

¹⁹ Toneses in Jesús okinmilwij:

—¿Tlan otlamochij?

Yejwan okilwijkej:

—De yen Jesús de pueblo de Nazaret, katlej oyeka profeta iwan okipiaya poder de nochí tlan okichiwaya, iwan de nochí tlan okijtoaya inawak Dios iwan innawak nochtin in tlakaj.

²⁰ In tlayekankej tiopixkej iwan totekiwajkawan, okitemaktijkej (okitemaktilijkej) inmak in tlanawatijkej romanostin, para ma kitlajtlakoltikan ma miki, iwan okimajmasoltijkej itech se krus. ²¹ Tejwan otikchiayaj Yej kimakixtiani in topaís de Israel. Pero axan, ya kipia eyi tonale de ijkón otlamochij. ²² Maski sekimej siwamej katlej towan powij yotechmajmawtijkej de tlan techmakaj kuenta, porke oyajkej san kualkan kan mikkakuyoktle, ²³ iwan komo mach okajsikej itlalnakayo in Jesús, ovalajkej otechilwikoj nik okitakej kej yeskia se teemikte, okinmitakej sekimej angelestín katlej okinmilwijkej nik in Jesús yolitok. ²⁴ Sekimej tlakaj de tejwan oyajkej kan mikkakuyoktle, iwan okajsitaísikej ijkón ken siwamej otechilwijkej, pero mach okitakej in Jesús.

²⁵ Ijkuakón Jesús okinmilwij:

—¡Melawak amechpoloa tlalnamikilistle, iwan sa tekitl owij ankineltokaj nochí tlan okijtojkej in profetajtin! ²⁶ ¿Amo okipiaya de tlajyowis in Cristo itech nochí in yon tlamantle, antes de kalakis kan imawisotlanex?

²⁷ Ijkuakón opéj kinyekilwia tlan okijuiloj in Moisés iwan nochí tlan okijuilojkej in profetajtin de yon tlamantle kan tlapoa de Yej.

²⁸ Nijuak oajsikej itech pueblo kan yejwan oyayaj, Jesús omochij como kej yawi okachi wejka. ²⁹ Pero yejwan okichijkej de ma mokawa inwan. Okilwijkej:

—Ximokawa towan, porke yotiotlakik, iwan ya tlatleyuas.

Jesús mach ok oyáj iwan ompa inwan omokaj. ³⁰ Iwan nikuak inwan yoewatoka itech mesa, okitilanke in pan iwan okitiochij. Satepan okipojpostekke iwan okinmajmakak. ³¹ Iwan san niman ijkuakón oixtlajtlapokej, iwan okiyekixmatkej. Pero Yej san owalpoliwik. ³² Iwan okimolwijkej se iwan oksé:

—¿Amo otikpiayaj miek pakilistle ipan toyolo ne ipan ojtle nikuak otechtlapowijtiwalaya, iwan otechyekilwiaya tlan kitja in tiotlajkuilole?

³³ Tones san niman ijkuakón, omokuepkej para Jerusalén. Iwan okinmajsitajsikej in majtlaktin iwan se tlatitlaniltin oo lolitokaj inwan oksekimej katlej ompa inwan oyekaj. ³⁴ In majtlaktin iwan se tlatitlaniltin okijtojkej:

—Melawak nik omoyolkuik in Señor, iwan Simón noiiki yokitak.

³⁵ Ijkuakón, in omen tlakaj katlej okineltokayah in Jesús noiiki opéj kintlapowiaj de tlan opanokej ipan ojtle, iwan kenik okiyekixmatkej in Jesús nikuak okipojpostekke in pan.

*Jesús okinmotitij imomachtijkawan
(Mt. 28:16-20; Mr. 16:14-18; Jn. 20:19-23)*

³⁶ Yejwan ok omotlapowijtokaj de yon tlamantle, iwan Jesús ijkuakón owalmonextij ik tlatlajko iwan okintlajpaloj, okinmilwij:

—Ximoyolosewikan.

³⁷ Yejwan omomawtijkej iwan opapatlakakej (obibiokakej) de majkayotl. Yejwan okiyejyekojkej xamo se anima. ³⁸ Pero Jesús okinmilwij:

—¿Tlanik anmomawtiaj? ¿Tlanik anmoijtitlapowiaj ipan namoyolo? ³⁹ Xikinmitakan nomawan iwan nokxiwan. Yen Nej. Xinechmachilikan iwan xinechitakan. Porke se anima mach kipia inakayo nion iomio, ken namejwan ankitaj nikpia.

⁴⁰ Níjkuak ijkón okinmilwij, okinmititij imawan iwan ikxiwan. ⁴¹ Pero yejwan mach oweliaj okineltokayaj, pero sa tektl opakiaj iwan sa omotlajtlachialtijkej (omomajimawtijkej). Iwan Jesús okinmilwij:

—¿Ankipiaj itlaj para nikuas?

⁴² Ijkuakón okimakakej se pedaso michin tliwakej iwan se nepale (tlanepale) de nektle. ⁴³ Jesús okitilanke (okitzkij) iwan okikuaj inmixpan. ⁴⁴ Ijkuakón okinmilwij:

—Tlan onipanok, yen tlan onamechilwij níjkuak ok onieka amowan: nik okipiaya por mochiwani nochí tlan ijkuitlók de Nej itech itlanawatil in Moisés, iwan itech intlajkuilol in profetajtin, iwan noijki tlan kijta in Salmos.

⁴⁵ Ijkuakón okintlapolij intlahnamikilis para ma kimo-makakan kuenta tlan kijta in tiotlajkuilole. ⁴⁶ Iwan okinmilwij:

—Ijkón kajki ijkuitlók, Nej niCristo onikpiaya por nimikini, iwan ipan eyi tonale nimoyolkuiñi oksemi. ⁴⁷ Iwan moneki xipewakan desde nian Jerusalén iwan asta itech nochtin pais-mej de ixko yin tlaltípkak, xikinmilwikan ke nochtin akinmej kikawaskej de tlajtlakoskej iwan mokuepaskej inawak Dios, Dios kintlapojpolwis de intlajtlakol. ⁴⁸ Namejwan ankitakej nochí tlan otlamochij iwan nochí tlan onipanok. ⁴⁹ Iwan axan xikkakikan, Nej namechwaltitlanilis amopan tlan noPapan oamechilwij. Pero ximokawakan nian Jerusalén asta xikre-sibirokan in poder katlej witz de ilwikak.

*Jesús omotlejkawij (otlejkok) ik ilwikak
(Mr. 16:19-20)*

⁵⁰ Satepan, Jesús okinkixtij de itech yon weyikan iwan okinwikak asta pueblo de Betania. Satepan okinmajkokke imawan iwan okintiochij. ⁵¹ Iwan mientras okintiochiwaya, okinkajtejtiaj iwan omotlejkawijtiaj (otlejkok) ik ilwikak. ⁵² Yejwan, satepan de okiweyikixtijkej, omokuepkej para Jerusalén ika miek pakilistle. ⁵³ Iwan nochipa oyekaj itech weyi tiopan okiweyikixtiayaj in toTajzin Dios. Ijkón ma yeto.

SAN JUAN OKIJKUILOJ YIN KUALE TLAJTOLE DE JESUCRISTO

Itlajtol in toTajtzin Dios omokuepke tlakatl

¹ Nijuak ayamo otzinpewaya in tlaltikpak, yoyeka in Cristo, iwan Cristo oyeka iwan Dios, iwan Cristo yen Dios.

² Cristo yoyeka iwan Dios desde itzintian tlaltikpak. ³ Cristo okichij nochi tlan onkaj, iwan tla amo por yen Cristo, mach yeri nochi tlan axan onkaj. ⁴ Itech Cristo oyeka nemilistle, iwan yon nemilistle oyeka yen tlanextle para nochtin in tlakaj. ⁵ Yon tlanextle tlawia kan tlatleyua. Iwan yon tlatleyualotl mach weli kisewia in tlanextle.

⁶ Oyeka se tlakatl itoka Juan katlej Dios okualtitlanke.

⁷ Okualtitlanke para yetos testigo para ma tetlapowi de yon tlanextle, para ijkón nochtin ma kineltokakan. ⁸ Juan mach oyeka yen tlanextle, sino yej ovalaj para tetlapowis de yon tlanextle. ⁹ Cristo yen katlej melawak tlanextle, katlej kintlawilia nochtin in tlakaj, iwan ovalaj ixko yin tlaltikpak.

¹⁰ Cristo oyeka ixko yin tlaltikpak, iwan yen okichij in tlaltikpak. Pero in tlaltikpaktlakaj mach okimomakakej kuuenta akin Yej. ¹¹ Cristo ovalaj innawak in tlakaj katlej iaxkawan, pero katlej iaxkawan mach okiresibirojkej. ¹² Pero sekimej katlej okiresibirojkej iwan otlaneltokakej inawak, Cristo okimmakak poder para ma yekan ipilwan toTajtzin Dios. ¹³ Otlakatkej kej ipilwan, pero mach otlakatkej ken nijuak tlakati se konetl. Nion mach otlakatkej por yen tetajmej okinekej kinpiaskej inkonewan, sino otlakatkej kej ipilwan Dios porke yen toTajtzin Dios okimonekiltij ma tlakatikan inawak.

¹⁴ Cristo omochij tlakatl iwan towan onenke ixko yin tlaltikpak, iwan otikitakej imawisotlanex, imawisotlanex de san Yej se iKone in toTajtzin Dios. Otechmakak miek itlasojtlalis iwan otechmachtij tlan melawak.

¹⁵ Juan otetlapowij de Cristo, iwan chikawak okijtoj:

—Yen yin tlakatl de akin nej onikijoaya nijuak onikijojo: “Katlej witz satepan de nej, okachi weyikistok (weyititok) ke nej, porke Yej yoyeka desde okachi achtoj antes de nej nitlakatin.”

¹⁶ Tinochtin tejwan tikresibirojtokej miek tlamantle tlan kuale de Cristo. Porke Yej techtlasojtla iwan techmachtia tlan melawak. ¹⁷ Dios otechmakak itlanawatil por medio de Moisés. Pero itlasojtlalis iwan tlan melawak ovalaj por medio de Jesucristo. ¹⁸ Dios mach semi akaj kita. Pero iKone

katlej san Yej se, katlej noijki Dios, iwan katlej kajki iwan iPapan, yen otechixmatiltiko in Dios.

In Juan Tlakuateekij otetlapowij de Cristo

(Mt. 3:11-12; Mr. 1:7-8; Lc. 3:15-17)

¹⁹ In judiojtin de Jerusalén okintitlankej sekimej tiopixkej iwan sekimej levitas para ma kitlajtlaniikan in Juan akin yej.

²⁰ Iwan Juan okinmilwij ipan melajka:

—Mach nej niCristo.

²¹ Iwan okitlajtlanjikej:

—Toneses, ¿akin tej? ¿Tej tiElías?

Juan okijtoj:

—Amo, nej mach niElías.

Oksemi okitlajtlanjikej:

—¿Yen tej tiprofeta katlej kipia de witz?

Juan okinnankilij:

—Amo, mach nej.

²² Ijkuakón kiné okilwijkej:

—¿Akin tej kiné? Moneki xitechilwi para ijkón welis tikkimakaskej itlaj rason katlej otechwaltitlankej. ¿Tlan welis titechilwis de tej?

²³ Juan okinnankilij:

—Yen Nej katlej nitetzajtzilia kan tlawaki: “Xikmelawakan iojwi in Señor” —ijkón ken ya wejkawitl okijtoj in profeta Isaías nik ijkón nikchiwas.

²⁴ Katlej oyajkej okitatoj in Juan oyekaj intlatitlanilwan in fariseos. ²⁵ Iwan okitlajtlanjikej:

—¿Tlanik kiné titlakuateekia tla amo yen tej tiCristo, nion amo yen tej tiElías, nion amo yen tej tiprofeta katlej tikchiaj ma wiki?

²⁶ Juan okinnankilij ijkín:

—Nej nitlakuateekia ika atl. Pero amowan kajki se akin namejwan mach ankixmatij. ²⁷ Yen yon katlej witz satepan de nej. Iwan nion mach notech powi para nikaktotomas.

²⁸ Yon otlamochij itech tlale de pueblo de Betábara, ik ne lado de yen weyatl Jordán, kan Juan otlakuateekiaya.

Jesús yen iichkatzin in toTajtzin Dios

²⁹ Owalmostlatik, Juan okitak in Jesús owalaya inawak, iwan okijtoj:

—Xikitakan iichkatzin in toTajtzin Dios, katlej kintlapojpolwis in tlaltikpaktlakaj de intlajtlakol. ³⁰ Yen yin tlakatl de katlej nej onikijtoj: “Satepan de nej witz se tlakatl katlej okachi weyikistok (weyititok) ke nej. Yej yipa yoyeka desde okachi achtoj, antes de nej nitlakatini.” ³¹ Nej mach onikixmatia. Pero por yonik nej nitlakuateekijtiwitz ika atl para ijkón in tlakaj de Israel ma kixmatikan.

³² Juan noijki okijtoj:

—Nej onikitak in Espíritu Santo owaltemok de ilwikak kej se paloma iwan ipan omotlalij. ³³ Nej mach ya onikixmatia, pero akin onechwaltitlanke ma nitlakuateeeki ika atl, onechilwij: “Nijuak tikitas in Espíritu Santo waltemos iwan motlalis ipan se tlakatl, yen yon katlej tlakuateekis ika Espíritu Santo.” ³⁴ Iwan nej yonikitak, iwan por yonik namechilwia nik yen yon iKone in toTajtzin Dios.

Katlej yakinika okinnotzke imomachtijkawan in Jesús

³⁵ Owalmostlatik, in Juan oksemi ompa oyeka iwan omen imomachtijkawan. ³⁶ Iwan nijuak okitak nik in Jesús ik ompa opanoaya, okijtoj:

—Xikitakan iichkaKone in toTajtzin Dios.

³⁷ Iwan yonmej omen imomachtijkawan in Juan okikakej tlan okijtoj. Iwan satepan oyajkej iwan Jesús. ³⁸ Nijuak in Jesús omokuepke iwan okinmitak nik ikuitlapan oyayaj, okinmilwij:

—¿Tlan ankitemoaj?

Iwan yejwan okijtojkej:

—Rabí—kijtosneki Tlamachtij—, ¿kan tichanti?

³⁹ Iwan Jesús okinmilwij:

—Xiwikikan iwan xikitakan.

Ijkuakón yejwan oyajkej iwan Jesús iwan okitakej kan chanti, iwan ompa omokajkej iwan Jesús yon tonale, porke yoyeka kej las cuatro de tiotlakke. ⁴⁰ Andrés, ikni in Simón Pedro, oyeka se de yonmej omen katlej okikakej tlan okijtoj in Juan iwan satepan oyajkej iwan Jesús. ⁴¹ Andrés niman oyáj okitemoto ikni katlej itoka Simón, iwan okilwij:

—Yotikajsikej in Mesías —kijtosneki Cristo o noso Tlapejpenale de Dios.

⁴² Iwan okiwikak inawak Jesús. Nijuak in Jesús okitak, okilwij:

—Tej tiSimón, titekone de Jonás. Tej yetos motoka tiCefas —kijtosneki Pedro o noso Tetl.

Jesús okinotzke in Felipe iwan Natanael

⁴³ Owalmostlatik, in Jesús okiyejyekoj yas ik estado de Galilea. Ompa okitak in Felipe iwan okilwij:

—Xiwiki nowan.

⁴⁴ Felipe oyeka de pueblo de Betsaida, kan ochantiaj Andrés iwan Pedro. ⁴⁵ Felipe okitemoto in Natanael, iwan okilwij:

—Yotikajsikej in tlakatl de katlej Moisés okijtoj walani iwan okikuiloj itech itlanawatil. In ya wejkawitl profetajtin noijki okikuilojkej de yon tlakatl. Iwan yon tlakatl yen Jesús ikone in José de pueblo de Nazaret.

⁴⁶ Natanael okijtoj:

—¿Welis kisas itlaj kuale itech pueblo de Nazaret?

Felipe okinankilij:

—Xiwiki xikitaki.

⁴⁷ Níjkuak in Jesús okitak in Natanael yowalaya inawak, okijtoj:

—Nian witz se katlej melawak israelita, katlej amo tlaka-jkayawa.

⁴⁸ Natanael okitlajtlanij in Jesús:

—¿Kenik tinechixmati?

Iwan Jesús okinankilij:

—Antes de mitznotzati in Felipe, níjkuak otieka itlampa igoskuawitl, Nej onimitzitak.

⁴⁹ Ijkuakón Natanael okijtoj:

—Tlamachtij, tejwatzin titeKone de Dios. Tejwatzin tiRey de Israel.

⁵⁰ Jesús okinankilij:

—Por onimitzilwij nik onimitzitak itlampa igoskuawitl, ¿por yonik tinechneltoka? Okachi wejweyin tlamantin tikimmitas ke yon.

⁵¹ Jesús noijki okijtoj:

—Ipan melajka namechilwia, namejwan ankitaskej in il-wikak tlapotos, iwan angelestin de Dios tlejkoskej iwan temoskej napan Nej katlej onimochij nitlakatl.

2

Kan otlanamiktijkej itech pueblo de Caná

¹ Owiptlatik, omochij se ilwitl kan monamiktiaj itech pueblo de Caná itech estado de Galilea. Ompa oyeka imaman in Jesús. ² Noijki okinminbitarojkej in Jesús iwan imomachti-jkawan itech yon ilwitl. ³ Iwan níjkuak otlanke in vino, imaman in Jesús okilwij:

—Mach ok kipiaj vino.

⁴ Jesús okinankilij:

—Tejwatzin nanan, mach moneki xinechilwi tlanon mon-eki nikchiwas. Mach ya ajsi ora para pewas nitekipanos.

⁵ Imaman okinmilwij katlej otlaserbirojtokaj:

—Xikchiwakan nochí tlan Yej amechilwis.

⁶ Ompa oyekaj chikuasen wejweyin xoktzinmej katlej ika okitlaliayaj atl in judiojtin, para ika omomajtekiaj kej se kostumbre para omochipawayaj inawak Dios. Ijtik kada se xoktzin oakia kanaj se sien litros de atl. ⁷ Jesús okinmilwij in tlaserbirojkej:

—Xikintemitan yinmej xoktzinmej ika atl.

Yejwan okintemitijkej asta otenkej. ⁸ Iwan Jesús okinmilwij:

—Axan xikixtikan achitzin, iwan xikitkilikan in tlakatl katlej tlayekanke de yen tlaserbirojkej.

Okitkilijkej kiné. ⁹ In yon tlayekanke okiyekoj in atl katlej omokuepke vino, mach okimatia de kan ovalaj, san yen katlej tlaserbiroaj katlej okixtijkej atl okimatiaj de kan ovalaj. Iwan ikuakón in tlayekanke okinotzke in novio. ¹⁰ Okilwij:

—Nochtin in tlakaj kitemaka achtoj katlej kuale vino, iwan nikuak ya miek yokonikej, ikuakón kitemakaj katlej okachi barato. Pero tejwatzin otikaj katlej kuale vino para satepan tiktemakas.

¹¹ Yen yin katlej yakinika milagro okichij in Jesús itech pueblo de Caná de Galilea. Ika yon milagro okiteitij ipoder. Iwan imomachtijkawan otlaneltokakej inawak. ¹² Satepan de yon, Jesús oyáj para Capernaum, ompa opanok kanaj keski tonale iwan imaman, iwan ikniwan, iwan imomachtijkawan.

*Jesús okinkixtij in tlanamakakej de ijtk in weyi tiopan
(Mt. 21:12-13; Mr. 11:15-18; Lc. 19:45-46)*

¹³ Nikuak yoajsia inmilwiw in judiojtin katlej itoka pascua, Jesús oyáj para Jerusalén. ¹⁴ Iwan okinmitajsik ijtk in weyi tiopan in bakajnamakakej, in ichkanamakakej, in palomasnamakakej, iwan in tominpatlakej katlej ompa oewatokaj itech inmesa. ¹⁵ Jesús okichij se chikotejmekatl, iwan okinkixtij de kan patio de yen weyi tiopan ika noch iinmichkawan iwan inbakajwan. Okinxoyawilij intomin in tominpatlakej, iwan okintlatlamochilij inmesajwan. ¹⁶ Jesús okinmilwij in palomasnamakakej:

—Xikinkixtikan namopalomaswan de nian. Amo xikkuepakan kej se tiankistle ikalijtik in noPapan.

¹⁷ Ikuakón okelnamikej imomachtijkawan nik in tiotlakuilole kijta: “Sa tekitl niktlasojtla mokalijtik ika noch noyolo.”

¹⁸ In judiojtin okitlajtlanijkej:

—¿Kenik otimixewij otikinkixtij? Tla Dios omitzilwij ijkón xikchiwa, xitechititi kiné se milagro.

¹⁹ Jesús okinnankilij:

—Xikxitinikan yin weyi tiopan iwan san ika eyi tonale oksemi nikchiwas.

²⁰ In judiojtin okijtojkej:

—Yin weyi tiopan omochij ika omenpoale iwan chikuasen xiwitl. ¿Iwan Tej san ika eyi tonale tikneki tikchiwas oksemi?

²¹ Pero in weyi tiopan de katlej Jesús okijtoaya, kijtosneki yen itlalnakayo. ²² Por yonik, nikuak omoyolkuik oksemi satepan de omikke, imomachtijkawan okelnamikej yon tlan

okijtoj, iwan okineltokakej tlan kijta in tiotlajkuilole iwan tlan Jes s okinmilwij.

Jes s kinmixmati nochtin in tlakaj ipan inyolo

²³ Iwan nijuak Jes s oyeka Jerusal n itech ilwitl de pas-cua, miekej otlaneltokakej inawak porke okitakej wejweyin se nalestin okinchiwaya. ²⁴ Pero Jes s mach okinneltokiliaya, porke Yej kuale okinmixmatia nochtin ipan inyolo. ²⁵ Mach omonekia akaj ma kilwi tlanon kiyejyekoaj in tlakaj, porke Yej inewian yokimatia tlanon kiyejyekoaj.

3

Jes s iwan Nicodemo

¹ Oyeka se tlakatl fariseo itoka Nicodemo, iwan oyeka tlayekanke jud o. ² Yon Nicodemo oy j de yuak okitato in Jes s iwan okilwij:

—Tlamachtij, tejwan tikmatij nik tejwatzin omitzwaltit-lanke in toTajtzin Dios para xitechmachtiki. Porke mach akaj tlakatl welis kinchiwas in milagrosti tla Dios amo iwan yetos. Tla Dios iwan yetos, toneses welis kinchiwas in mila-grosti ijk n ken tejwatzin tikinchiwa.

³ Jes s okilwij in Nicodemo:

—Ipan melajka nimitzilwia: Akin amo tlakatis oksemi, mach welis kalakis kan Dios tlanawatia.

⁴ Iwan Nicodemo okitlajtlanij:

—¿Kenik welis oksemi tlakatis se katlej ya weyi tlakatl? ¿Kox welis kalakis ijtk imaman iwan tlakatis oksemi?

⁵ Iwan Jes s okinankilij:

—Ipan melajka nimitzilwia: Akin amo tlakatis ika atl iwan akin amo tlakatis ika Esp ritu Santo, mach welis kalakis kan Dios tlanawatia. ⁶ Se tlakatl katlej tlakati itech imaman kipia inakayo iwan iomio, pero se tlakatl katlej tlakati itech Esp ritu Santo kiresibiroa se yankuik nemilistle ipan ianima. ⁷ Amo ximotlajtlachialti (ximomajmawti) por nimitzilwia: “Moneki titlakatis oksemi.” ⁸ In ejekatl yawi san kanik kineki, iwan tikkaki kokuyoka. Pero mach tikmati de kan witz iwan nion mach tikmati kan yawi. Ijk n noijkei akin tlakati itech Esp ritu Santo.

⁹ Nicodemo oksemi okitlajtlanij:

—¿Yon kenamij?

¹⁰ Jes s okinankilij:

—¿Tej tiweyitlamachtij de Israel, iwan amo tikmomaka kuenta? ¹¹ Ipan melajka nimitzilwia, tejwan tikijtaj de tlan tikmatij. Titetlapowiaj de tlan yotikitakej, pero namejwan mach ankineltokaj tlan tamechilwiaj. ¹² Tla nimitzilwia itlaj

tlamantle de nian tlaltikpak, iwan amo tinechneltoka, ¿kenik kiné tikneltokas tla nimitzilwis itlaj tlamantle de ilwikak?

¹³ 'Mach semi akaj tlejko ilwikak, sino san Nej akin oniwaltemok de ilwikak, Nej katlej onimochij nitlakatl. ¹⁴ Iwan ijkón ken Moisés okajkokke in koatl kan tlawaki, ijkón noijki nechajkokuiskej Nej katlej onimochij nitlakatl. ¹⁵ Para ijkón, nochtin akinmej nechneltokaskej ma kipiakan nemilstle katlej mach keman tlamic.

¹⁶ 'Dios sa tekitl kintlasojtla in tlaltikpaktlakaj, iwan por yonik okitemakak in san Yej se iKone, para ke nochtin akinmej kineltokaskej, amo ma mopolokan, sino ma kipiakan nemilstle katlej mach keman tlamic. ¹⁷ Dios mach okualtitlanke iKone itech yin tlaltikpak para ma kinpojpolo in tlaltikpaktlakaj, sino okualtitlanke para ma kinmakixti. ¹⁸ Akin kineltoka iKone in Dios, mach mopoloa. Pero akin amo kineltoka, kijtosneki yomopoloj porke amo otaneltokak inawak katlej san Yej se iKone in Dios. ¹⁹ Akinmej amo kineltokaj, kijtosneki yomopolojkej. Porke Nej oniwalaj itech yin tlaltikpak kej se tlanextle. Pero in tlaltikpaktlakaj okachi okiwelitakej in tlatleyualotl (tlatleyuwalistle) iwan amo yen tlanextle. Okachi kiwelitaj in tlatleyualotl porke kichiwaj tlan mach kuale. ²⁰ Nochtin akinmej kichiwaj tlan mach kuale, kikokoliaj in tlanextle iwan amo mijkuaniaj inawak, para amo ma mota intlajtlakol. ²¹ Pero akinmej kichiwaj tlan melawak, mijkuaniaj kan kajki in tlanextle, para ma mota nik kichijtokej tlan Dios kineki.

In Juan Tlakuateekij oksemi otlapoj de Jesús

²² Satepan de yon, Jesús oyáj iwan imomachtijkawan itech región de Judea, iwan ompa inwan omokaj kanaj keski tonale, iwan okinkuateekij miekej tlakaj. ²³ Juan noijki otlakuateekijtoka itech pueblo de Enón, inakastlan pueblo de Salim, porke ompa oyeka miek atl. Iwan in tlakaj oyayaj inawak in Juan iwan omokuateekiayaj. ²⁴ Porke ijkuakón in Juan mach ya okitzakuayaj telpiloyan.

²⁵ Imomachtijkawan in Juan opéj motlatlajtolkuepaj inwan sekimej judiojtin de kenik moneki se yetos chipawak inawak Dios. ²⁶ Iwan oyajkej okilwitoj in Juan:

—Tlamachtij, in tlakatl katlej oyeka mowan ik ne lado itech weyatl Jordán, de katlej tejwatzin otitechtlapowij, axan nochtin yawij inawak para mokuateekiskej.

²⁷ Juan okinnankilij:

—Kada se tlakatl Dios okimakak itekiw para ma kichiwa tlan Dios kineki. ²⁸ Namejwan amonewian annechkakej onikijtoj nik mach nej niCristo, sino Dios onechwaltitlanke antes de Yej witz. ²⁹ Nijuak akaj monamiktia, in novio yen

katlej kipixtok in novia, iwan iamigo in novio sa tekitl paki nikuak kikaki tlajtoa in novio. Ijkón nej noijki, sa tekitl nipaki nikuak nikkaki nik nochtin tlakaj yawij inawak Jesús. ³⁰ Yej kipia de weyikistias (weyititias) iwan nej nitzikitzinixtias.

Jesús owaltemok de ilwikak

³¹ 'Katlej owaltemok de ilwikak, okachi weyikistok (weyititok) de nochtin. In tlaltikpaktlakaj katlej powij de nian tlaltikpak, tlajtoaj de tlan onkaj ixko yin tlaltikpak. Pero katlej owaltemok de ilwikak okachi weyikistok de nochtin. ³² Yej kitemaka kuenta de tlan okitak iwan de tlan okikakke, pero mach akaj kineltoka tlan Yej kijta. ³³ Akin kineltoka tlan Yej kijta, kimomaka kuenta nik in Dios kijta tlan melawak. ³⁴ Pero Jesús katlej Dios okiwaltitlanke, noijki tlapoa de tlan Dios kijta, porke Dios kimaka nochi in poder katlej kipia iEspíritu. ³⁵ ToPapan Dios kitlasojtla iKone, iwan okimaktilij ma kinawati nochi tlan onkaj. ³⁶ Akin kineltoka iKone in toTajtzin Dios, kipia nemilstle katlej mach keman tlamis. Pero akin amo kineltoka yon iKone, mach kipias yon nemilstle, sino ipan witz ikualanilis in Dios.

4

Jesús iwan se siwatl de estado de Samaria

¹ In fariseos okimatkej nik in Jesús okinpiaya okachi miekej imomachtijkawan iwan okinkuateekiaya okachi miekej ke Juan. ² Maski amo yen Jesús okinkuateekiaya, sino yen imomachtijkawan otlakuateekiayaj. ³ Iwan nikuak Jesús ijkón okimatke, okiske de estado de Judea, iwan omokuepke oksemi para estado de Galilea. ⁴ Iwan Jesús okipiaya para panos ik estado de Samaria. ⁵ Oajsito kiné, itech se pueblo de Samaria itoka Sicar, inakastlan in tlale katlej Jacob okimakak ikone José. ⁶ Iwan ompa oyeka in poso de Jacob. Jesús osotlawak de onejnenke iwan omotlalij itempan yon poso. Oyeka kej tlajko tonale.

⁷ Ijkuakón owałaj se siwatl de Samaria para kikixtis atl. Iwan Jesús okilwij:

—Xinechmaka achitzin atl ma natli.

⁸ Ijkuakón imomachtijkawan meroj yajtokej itech pueblo okikowatoj tlan kikuaskej. ⁹ In siwatl samaritana okinankilij:

—¿Tlanik tinechtatlajtlanilia ma nimitzmaka atl? Tej tijudío iwan nej nisamaritana.

(Ijkón okijtoj porke in judiojtin mach monekij inwan samaritanojtin.) ¹⁰ Iwan Jesús okilwij:

—Tej mach tikmati tlan Dios kitetliokolia, iwan mach tinechixmati akin Nej. Nej nimitztlajtlanilia xinechmaka achitzin moaw. Tla tej tikmatini akin Nej, tonses yen Nej

tinechtlatlaniliani ma nimitzmaka noaw. Nej welis nimitzmakas yon atl katlej kitemaka nemilstle.

¹¹ Iwan siwatl okilwij:

—Señor, mach tikpia tlan ika tikkixtis atl, iwan in poso wekatlan. Toneses, ¿kan tikkuiti yon atl katlej kitemaka nemilstle para tinechmakas? ¹² ¿Okachi tiweyikistok (tiweyititok) in Tej ke in ya wejkawitl toweyitaj Jacob? Porke yen toweyitaj Jacob katlej otechmakak yin poso, kan yej oatlia iwan noiiki nian oatliaj ipilwan iwan iyolkawan.

¹³ Jesús okinankilij:

—Nochtin akinmej koniskej yin atl, oksemi amikiskej. ¹⁴ Pero akin konis in atl katlej Nej nikmakas, mach oksemi amikis. Porke in atl katlej Nej nikmakas yetos kej se ameyale katlej mextos ipan iyolo iwan kimakas nemilstle katlej mach keman tlamis.

¹⁵ Ijkuakón in siwatl okilwij:

—Señor, xinechmaka yon atl para mach ok keman ma namiki, iwan nion mach ok keman ma nikixtiki atl itech yin poso.

¹⁶ Jesús okilwij:

—Xiwia xiknotzati mookich iwan xiwikikan nian.

¹⁷ In siwatl okinankilij:

—Mach nikpia nookich.

Jesús okilwij:

—Melawak tlan tikipta nik mach tikpia mookich. ¹⁸ Porke yotikinpixke makultin mookichwan, iwan katlej axan tikpia mach mookich. Melawak tlan tikipta.

¹⁹ Nijuak ijkón okikakke in siwatl, okilwij:

—Señor, nikmomaka kuenta nik tejwatzin tiprofeta. ²⁰ In ya wejkawitl toweyitajwan samaritanojtin okiweyikixtiayaj in toTajzin Dios itech yin tepetl, pero namejwan anjudiojtin ankijtaj nik moneki se kiweyikixtis in Dios itech weyikan de Jerusalén.

²¹ Iwan Jesús okinankilij:

—Siwatl, xinechneltokili. Ajsis tonale, nijuak mach ok monekis anwitzej itech yin tepetl, iwan nion mach ok monekis anyaskej Jerusalén para ankiweyikixtiskej in Dios.

²² Namejwan ansamaritanojtin mach ankimatij akin nankiweyikixtiaj. Pero tejwan katlej tijudiojtin tikmatij akin tikweyikixtiaj. Porke por yen judiojtin ovalaj tlajtol in Dios para ma kimatikan in tlaltikpaktlakaj kenik welis momakixtiskej de itech tlajtlakole, para ijkón welis kipiaskej yankuik nemilstle katlej mach keman tlamis. ²³ Pero ajsiki se tonale nijuak in tlakaj kiweyikixtiskej in toPapan Dios ika nochinyolo iwan ipan melajka ken Dios kineki, iwan axan yon tonale yoajsiko. ToPapan Dios, ijkón kineki ma kichiwakan

akinmej kiweyikixtiaj. ²⁴ Dios Yej Espíritu, iwan akinmej kiweyikixtiskej moneki ma kiweyikixtikan ika nochí inyolo iwan ipan melajka.

²⁵ In siwatl okilwij:

—Nikmati nik witz in Mesías, katlej kilwiaj Cristo. Iwan nijkuak Yej witz techtomilis nochí yin tlamantle.

²⁶ Jesús okilwij:

—Yen Nej niCristo, katlej axan Nej mowan nimotlapowijtok.

²⁷ Iwan ijkuakón oejkokej imomachtijkawan. Sa otlatlachixkej (omomajmawtijkej) por okitakej motlapowijtok iwan se siwatl samaritana. Pero mach akaj omixewij okitlatlanij tlan kineki yon siwatl, o noso de tlanon motlapowiaj.

²⁸ Ijkuakón in siwatl okikajtej iaxoktzin, iwan oyáj ompa ipueblo, iwan okinmilwij in tlakaj:

²⁹ —Xiwikikan, xikitakij se tlakatl katlej onechilwij nochí tlan onikchij. Xamo yen Cristo.

³⁰ Ijkuakón okiskej de itech yon pueblo, iwan oyajkej kan oyeka in Jesús. ³¹ Mientras, imomachtijkawan okitlatlawtiayaj in Jesús ma tlakua, okilwiayaj:

—Tlamachtij, ximotlamajsewi.

³² Pero Yej okinmilwij:

—Nej nikpia se tlakuale katlej namejwan mach ankitaj.

³³ Imomachtijkawan opéj kimolwiaj entre yejwan:

—¿Xamo akaj okiwalkuilij itlaj tlan kikuas?

³⁴ Pero Jesús okinmilwij:

—Notlakual kijtosneki moneki nikchiwas tlan kimonekiltia akin onechwaltitlanke. Iwan nixwis nijkuak niktlamis in tekitl katlej onechmakak. ³⁵ Nijkuak namejwan antookaj ankitaj: “Moneki tikchiaskej nawi metztle para tipixkaskej.” Pero Nej namechilwia: Xitlachiakan kuale kan tlatokyoj, yotlachikawak iwan ya kuale para se pixkas. In tlakaj katej kej tlatoxtin katlej yochikawakej iwan moneki se kinpixkas para Dios. ³⁶ Iwan akin kinpixka animajtin kipias itlaxtlawil, iwan katlej kinpixkaj kipiaskej nemilistle katlej mach keman tlamis. Iwan ijkón, katlej tooka iwan katlej pixka san sekán ma pakikan. ³⁷ Melawak ijkón ken kijta in tlajtole: “Se tlakatl katlej tooka iwan satepan oksé tlakatl katlej pixka.” ³⁸ Nej onamechtitlanke xiwian xikpixkatij katlej namejwan mach ankitookakej. Oksekimej katlej otekipanojkej iwan namejwan sa anpixkaskej.

³⁹ Miekej samaritanojtin de yon pueblo otlaneltokakej inawak Jesús por yej tlan okinmilwij in siwatl: “Onechilwij nochí tlan onikchij.”

⁴⁰ Níjkuak in samaritanojtin ovalajkej inawak Jesúś, okitlatlawtijkej inwan ma mokawa. Jesúś ompa omokaj ome tonale. ⁴¹ Iwan itech yon ome tonale otlaneltokakej inawak Jesúś okachi miekej tlakaj por tlan Yej inewian okinmilwij. ⁴² Iwan okilwijkej in siwatl:

—Axan tikneltokaj amo san por tlan tej otitechilwij, sino porke tejwan tonewian yotikkakej noijki, iwan yotikmatkej ipan melajka nik Yej kinmakixtis in tlaltikpaktlakaj.

Jesúś okipajtij ikone de yen itekipanoj in rey

⁴³ Satepan de yon ome tonale, Jesúś okiske de ompa, iwan oyáj itech estado de Galilea. ⁴⁴ Ken okijtoj in Jesúś, se profeta mach kitlakitaj itech ipueblo. ⁴⁵ Níjkuak oajsito Galilea, nochtin in tlakaj de ompa okiresibirojkej ika pakilistle. Yonmej tlakaj oyekaj Jerusalén níjkuak okitakej in Jesúś nochti tlan okichij itech ilwítl de pascua.

⁴⁶ Satepan Jesúś oksemi oyáj itech pueblo de Caná de Galilea, kan Yej okikuepke vino in atl. Iwan itech pueblo de Capernaum oyeka se weyi tekiwaj de yen rey, katlej okipiaya se ikone kokoxke. ⁴⁷ Níjkuak yon tekiwaj okimatke nik in Jesúś yomokuepato de estado de Judea iwan yoejkoko itech estado de Galilea, oyáj para Caná okitato in Jesúś. Okitlatlawtij iwan ma wia para Capernaum ma kipajtiliti ikone, porke yamiktok. ⁴⁸ Iwan Jesúś okilwij:

—Namejwan mach itlaj ankineltokaj tla amo ankitaj itlaj milagro o noso itlaj señal.

⁴⁹ Iwan yon tekiwaj okilwij:

—Señor, san niman xiwiki antes de mikis nokone.

⁵⁰ Ijkuakón Jesúś okilwij:

—Ximokuepa mokalijtik, mokone yopajtik.

In tlakatl okineltokak tlan Jesúś okilwij, iwan oyáj para ichan. ⁵¹ Níjkuak yoajsitiaya ichan, itekipanojkawan okinamikitoj, iwan okilwijkej:

—¡Mokone yopajtik!

⁵² Iwan yej okintlajtlanij tlan ora opéj mijmati ikone, iwan yejwan okilwijkej:

—Yala kej la una de tiotlakke, okiske in totonik.

⁵³ Ijkuakón in tetaj okimomakak kuenta ke meroj itech yon ora in Jesúś okilwij: “Mokone yopajtik.” Iwan yej iwan nochti ifamilia otlaneltokakej inawak Jesúś.

⁵⁴ Yin milagro ya ipan ojpa okichij in Jesúś itech estado de Galilea, okichij satepan de ovalaj de estado de Judea.

¹ Satepan de yon tlan okichij in Jesús, oyáj para Jerusalén, kan judiojtin kichiwaskej se ilwitl itech yon weyikan.

² Iwan itech weyikan de Jerusalén, inakastlan puerta katlej kitokayotiaj puerta de ichkamej, ompa oyeka se tanke katlej ika tlajtole hebreo itoka Betesda, katlej okinpiaya makuile korredortin. ³ Iwan itech yonmej korredortin oyekaj miekej kokoxkej owejwetokaj ipan tlale. Sekimej mach otlachi-ayaj, sekimej oyekaj koxomej iwan sekimej oyekaj wilanmej (temetlamej). ⁴ Se iángel in Señor kemanti owaltemoaya iwan okoliniaya in atl. Iwan nochtin okichiayaj yon ora nikuak owaltemoaya in ángel. Iwan akin achtoj omoapolakiaya, opajtia san tlan kokolistle okipiaya. ⁵ Ompa oyeka se tlakatl katlej yokipiaya senpoale iwan kaxtole iwan eyi xiwitl de mokokoa. ⁶ Iwan nikuak in Jesús okitak ompa wetok in yon tlakatl, okimomakak kuenta nik yokipiaya miek xiwitl de kokoxke, iwan okitlajtlanj:

—¿Tikneki tipajtis?

⁷ Iwan in kokoxke okinankilij:

—Señor, mach nikpia akin nechapolakis ijlik in tanke nikuak molinia in atl. Porke nochipa nikuak nej nikneki nimoapolakis, oksé achtoj moapolakijtiwetzi.

⁸ Jesús okilwij:

—Ximoketza, xikajkokui mopetl iwan xiwia.

⁹ San niman ikuakón yon tlakatl opajtik, okajkokke ipetl iwan opéj nejnemi. Yon tonale oyeka sábado nikuak weyi tonale. ¹⁰ Ikuakón in tlayekankej judiojtin okilwijkej in tlakatl katlej opajtik:

—Axan sábado, mach welis tikmamas mopetl.

¹¹ Iwan yej okinnankilij:

—Katlej onechpajtij, onechilwij: “Xikajkokui mopetl iwan xiwia.”

¹² Yejwan okitlajtlanjkej:

—¿Akin yon tlakatl katlej omitzilwij: “Xikajkokui mopetl iwan xiwia”?

¹³ Pero in tlakatl katlej opajtik mach okimatia akin okipajtij, porke in Jesús okalakke intzalko in tlakaj katlej oyekaj itech nekáj lugar iwan mach ok okitak. ¹⁴ Satepan, Jesús okitak in yon tlakatl kan weyi tiopan, iwan okilwij:

—Xikkaki, yotipajtik, ayakmo xitlajtlako, para amo timochiwas itlaj okachi temawtij.

¹⁵ Yon tlakatl oyáj okinmilwito in tlayekankej judiojtin nik yen Jesús katlej okipajtij. ¹⁶ Por yonik in tlayekankej judiojtin okijtojkej kimiktiskej in Jesús, porke otepajtiaya nikuak weyi tonale. ¹⁷ Pero Jesús okinmilwij:

—NoPapan nochipa tekipanojtok kichijtok tlan kuale, iwan Nej no ijkón nikchiwa.

¹⁸ Por yonik in tlayekankej judiojtin okachi okinekej kimiktiskej, porke amo okitlakitaya in weyi tonale iwan porke omoteixmachtiaya nik in Yej iwan toTajtzin Dios san se, iwan ijkón omochiwaya noiiji ken Dios.

Jesús okijtoj kenik tekipanoa

¹⁹ Jesús okinmilwij:

—Ipan melajka namechilwia: Nej katlej niiKone in Dios, mach welis itlaj nikchiwas san tlan Nej niknekis, sino Nej nikchiwa tlan nikita kichiwa noPapan. Nochi tlan kichiwa noPapan, yen yon noiiji tlan Nej nikchiwa. ²⁰ Porke noPapan nechtasojtla Nej katlej niiKone, iwan nechititia nochi tlan kichiwa. Iwan nechititis okachi wejweyin tlamantin iwan amo ken yinmej, iwan namejwan sa anmotlatlachialtiskej (ommomajmawtiskej). ²¹ Porke noPapan kinyolitia in mikkamej iwan kinmaka nemilistle. Ijkón noiiji Nej katlej niiKone in Dios nikmakas nemilistle katlej Nej niknekis nikmakas. ²² NoPapan mach teyolkuitia, yen Nej katlej onechtlalij para ma nikinyolkuiti nochtin in tlakaj. ²³ Para ijkón nochtin ma nechtakitan Nej katlej niiKone in Dios, ijkón ken kitlakitaj noPapan. Akin amo nechtakita Nej katlej niiKone in Dios, tonses noiiji mach kitlakita noPapan katlej onechwaltitlanke.

²⁴ Ipan melajka namechilwia: Akin kikaki notlajtol, iwan kineltoka katlej onechwaltitlanke, kipias nemilistle katlej mach keman tlamic. Iwan mach akaj kitlajtlakoltis, yon kijtosneki yokiske de itech mikilistle iwan axan yakipia nemilistle. ²⁵ Ipan melajka namechilwia: Ajsis tonale iwan yon tonale yoajsiko. Axan, in tlakaj katlej katej kej mikkamej, kikakiskej notlajtol de Nej katlej niiKone in Dios. Iwan nochtin katlej kikakiskej notlajtol Nej nikinmakas yankuik nemilistle. ²⁶ Ijkón ken noPapan kipia nemilistle itech Yej iwan weli kitemaka nemilistle, ijkón noiiji okichij Nej katlej niiKone in Dios ma nikpia nemilistle notech para ijkón noiiji ma niktemaka nemilistle. ²⁷ Iwan noiiji onechmakak tlanawatijkayotl para nikinmixkomakas (nikintzonmanas) in tlaltikpaktlakaj, porke Nej katlej onimochij nitlakatl yen Nej niiKone in Dios. ²⁸ Amo ximotlajtlachialtikan (ximomajmawtikan) de tlan namechilwia, porke ajsis tonale nikuak nochtin katlej toktokej kikakiskej notlajtol, ²⁹ iwan kisaskej de ijtik inmikkakuyok. Akinmej okichijkej tlan kuale moyolkuiskej (moyolitiskej) iwan kipiaskej nemilistle katlej mach keman tlamic. Iwan akinmej okichijkej tlan amo kuale, moyolkuiskej para kintlajtlakoltiskej.

Jesús otlapoj de Yej

³⁰ 'Nej mach welis itlaj nikchiwas san tlan Nej niknekis. Nitlayolkuitia ijkón ken noPapan nechnawatia ma nikchiwa. Iwan nitlayolkuitia ijkón ken moneki porke mach nikchiwa san tlan Nej nikneki, sino Nej nikchiwa tlan kineki noPapan katlej onechwaltitlanke. ³¹ Tla namechtlapowiani itlaj katlej kisa san de Nej, toneses yeni mach itlaj ipatij tlan nikijta. ³² Onkaj oksé akin tlajtoa de Nej, iwan nikmati ke tlan kijta de Nej yon melawak. ³³ Namejwan ankintitlankej sekimej tlakaj inawak in Juan Tlakuateekij, iwan tlan yej okinmilwíj de Nej yon melawak. ³⁴ Pero mach moneki akaj tlakatl ma amechmatilti akin Nej. Sino Nej san namechelnamiktia tlan Juan okijtoj para xitlaneltokakan iwan ximomakixtikan. ³⁵ Juan oyeka kej tlanextle katlej otlikuitoka iwan otlawiaya, iwan miekej tlakaj okiwelitakej. Iwan ijkón namejwan anpakej kanaj keski tonale itech itlajtol. ³⁶ Pero Nej nikpia se testigo katlej okachi weyi ke Juan. Tlan Nej nikchiwa yen tlan noPapan onechtlalij ma nikchiwa, iwan yon tlan nikchiwa kiteititia nik melawak yen noPapan onechwaltitlanke. ³⁷ Iwan noPapan katlej onechwaltitlanke noijki kiteititia nik in Nej niitlatitlanil, maski namejwan mach semi ankikakij iwan nion mach semi ankitaj. ³⁸ Nion itlajtol mach weli kalaki ipan amoyolo, porke mach annechneltokaj Nej katlej noPapan onechwaltitlanke. ³⁹ Namejwan anmomachtiaj in tiotlajkuilole porke ankiyejyekoaj welis amechmakas nemilstle katlej mach keman tlamis. Pues yon tiotlajkuilole tlapoa de Nej. ⁴⁰ Iwan namejwan mach ankinekij anwitzej nonawak para xikpiakan nemilstle katlej mach keman tlamis.

⁴¹ 'Nej mach niktemoa namejwan kuale xitlapoakan de Nej. ⁴² Porke Nej kuale namechixmati, nik mach melawak ankipiaj itlasoijtlalis in Dios ipan namoyolo. ⁴³ Nej oniwalaj porke noPapan onechwaltitlanke ma niwiki, iwan namejwan mach annechneltokaj. Pero tla witz akaj oksé tlakatl katlej san yej inewian kiyeyekos witz, yen yon okachi ankineltkiliskej. ⁴⁴ ¿Kenik welis annechneltokiliskej namejwan, tla san entre amejwan anmoweyikixtiaj se iwan oksé, iwan mach keman ankiyejyekoaj tlanon moneki ankichiwaskej para ma amechweyikixti in Dios katlej onkaj san Yej se? ⁴⁵ Amo xikyejyekokan nik in Nej namechtilwis inawak noPapan. Sino onkaj oksé akin namechtilwis, kijtosneki yen itlanawatil in Moisés, katlej namejwan ankichiha amechmakixtis. ⁴⁶ Porke tla amejwan ankineltokanij tlan Moisés okijtoj, toneses namejwan annechneltokanij, porke tlan yej okikuiloj tlapoa de Nej. ⁴⁷ Pero tla amo ankineltokaj tlan yej okikuiloj, ¿kenik welis ankineltokaskej tlan Nej namechilwia?

6

*Jesús okintlamakak makuile mil tlakaj
(Mt. 14:13-21; Mr. 6:30-44; Lc. 9:10-17)*

¹ Satepan de yon, Jesús opanok oksé lado de yen mar de Galilea katlej noijki itoka Tiberias. ² Miekej tlakaj oyajkej iwan Jesús porke okinmitayaj in señalestin katlej Yej okinchiwaya ika ipoder itech in kokoxkej. ³ Toneses Jesús otlejkok itech se tepetl, iwan ompa omotlalij iwan imomachtijkawan. ⁴ Ijkuakón yoajsia in tonale de yen inmilwiw in judiojtin katlej itoka pascua. ⁵ Níjkuak in Jesús okitak nik sa tekitl miekej tlakaj ovalayaj inawak, ijkuakón okilwij in Felipe:

—¿Kan tikkowatiwej pan para ma tlakuakan nochtin yinmej tlakaj?

⁶ Jesús ijkón okitlajtlanij in Felipe para kitas tlan kijtos, porke in Jesús yokimatis tlanon kichiwas. ⁷ Iwan Felipe okinankili:

—Mach kajxilis tikkowaskej ome siento denarios de pan para ma tlakuakan nochtin, porke mach kajxilis kikuaskej nion ajachintzitzin.

⁸ Ijkuakón in Andrés, ikni in Simón Pedro, katlej noijki oyeka imomachtijkaw in Jesús, okijtoj:

⁹ —Nian kajki se chokkoj katlej kipia makuile pan de sebada iwan ome michin, pero mach kajxilis para nochtin.

¹⁰ Ijkuakón Jesús okijtoj:

—Xikinmilwikan nochtin ma motlalikan.

Itech yon lugar oyeka xiwyoj, iwan nochtin omotlalijkej. Iwan oyekaj kej makuile mil tlakaj. ¹¹ Jesús okitilanke in pan, omotlaosojkamatke inawak Dios, iwan okinxejxelilij in tlakaj katlej oewatokaj. Iwan noijki ijkón okichij ika michimej, iwan tlakaj kuale otlakuajkej asta oixwikej. ¹² Iwan níjkuak nochtin yoixwikej, in Jesús okinmilwij imomachtijkawan:

—Xikololokan nochti tlan osobraroj para amitlaj ma ijt-lakawi.

¹³ Yejwan okololojkej katlej osobraroj de yon makuile pan de sebada, iwan okintemitikey majtlakte iwan ome chikimej. ¹⁴ Níjkuak in tlakaj okitakej yon milagro katlej Jesús okichij, okijtokej:

—Ipan melajka, yen yin profeta katlej otikchixtokaj ma wiki ixko yin tlaltikpak.

¹⁵ Pero níjkuak in Jesús okimomakak kuenta nik okinekiaj kiwikani ika chikawak para ma yeto rey, in Yej oksemi oyáj ik ajko ipan tepetl para ompa yetos iselti.

*Jesús onejnenke ipan atl
(Mt. 14:22-27; Mr. 6:45-52)*

¹⁶ Níjkuak otlatleyuak, imomachtijkawan otemokej de ipan tepetl iwan oyajkej itempan mar de Galilea, ¹⁷ otlejkokej itech se barko iwan opéj panoaj oksé lado de yen atl asta pueblo de Capernaum. Ijkuakón yotlatleyuak iwan Jesú mach ya oejkoya. ¹⁸ Opéj ejeka iwan atl opéj motlatlamotla chikawak. ¹⁹ Iwan níjkuak yoyayaj kej makuile o chikuasen kilómetro itech barko, okitakej in Jesú walnejnemi ipan atl iwan yokualinmajsia. Iwan yejwan omomawtijkej. ²⁰ Pero Yej okinmilwij:

—Amo ximomawtikan, Nej niJesú.

²¹ Ijkuakón yejwan sa tekitl opakej iwan okitlejkoltijkej ijtk barko. Iwan san niman oajsitoj itech tlale kan yejwan oyayaj.

In tlakaj okitemoayaj in Jesú

²² Sekimej tlakaj omokajkej oksé lado de yen atl. Owalmostlatik, okitakej nik in Jesú mach otlejkok iwan imomachtijkawan itech barko. Okimatiaj nik san yejwan imomachtijkawan oyajkej inselti, iwan Jesú omokaj. ²³ Pero oksekimej barkojtin de pueblo de Tiberias, ovalajkej serka de yon lugar kan okikuajkej pan satepan de ijkuak in toSeñor okimakak tlasojkamachilistle in toTajtzin Dios. ²⁴ Iwan níjkuak in tlakaj okimomakakej kuenta nik in Jesú mach ompa oyeka, nion imomachtijkawan, otlejkokej itech sekimej barkojtin, iwan oyajkej para Capernaum okitemotoj in Jesú.

Jesú yen pan katlej kitemaka nemilstle

²⁵ Níjkuak okajsitoj in Jesú itech oksé lado de yen atl, okilwijkej:

—Tlamachtij, ¿keman otejkok nian?

²⁶ Iwan Jesú okinnankilij:

—Ipan melajka namechilwia, namejwan annechtemoaj amo porke melawak ankimomakakej kuenta tlan kijtosneki in seña, sino porke onamechtlamakak iwan anmixwikej. ²⁷ Amo xitekipanokan por yen tlakuale katlej tlami, sino xitekipanokan por yen tlakuale katlej mach keman tlami iwan katlej kitemaka nemilstle katlej mach keman tlamis. Nej katlej onimochij nitlakatl namechmakas yon tlakuale, por yonik onechwaltitlanke noPapan Dios.

²⁸ Iwan yejwan okitlajtlanijkej:

—¿Tlan moneki tikchiwaskej para ma tikchiwakan tlan Dios kineki?

²⁹ Jesú okinnankilij:

—Yen yin tlan Dios kineki xikchiwakan. Yej kineki xinech-neltokakan Nej porke Yej onechwaltitlanke.

³⁰ Iwan yejwan okilwijkej:

—¿Tlan milagro titechititis para ma tikitakan iwan para ma timitzneltokakan? ¿Tlan milagro titechititis? ³¹ In ya wejkawitl toweyitajwan okikuajkej in pan katlej itoka maná, ne kan tlawaki. Ijkón ken kijta in tiotlajkuilole: “Dios okinmakak pan de ilwikak para ma kikuakan.”

³² Iwan Jesús okinmilwij:

—Ipan melajka namechilwia: Mach yen Moisés akin okinmakak in pan de ilwikak, sino yen noPapan katlej kitemaka in melawak pan de ilwikak. ³³ Porke in pan katlej Dios kitemaka yen katlej owaltemok de ilwikak iwan kinmaka nemilistle in tlaltikpaktlakaj.

³⁴ Ijkuakón yejwan okilwijkej:

—Señor, xitechmaka nochipa yon pan.

³⁵ Iwan Jesús okinmilwij:

—Yen Nej nípan katlej niktemaka nemilistle. Akin witz nonawak, mach ok keman tiojsiwis. Iwan akin tlaneltokas nonawak, mach ok keman amikis. ³⁶ Pero Nej yonamechilwij nik namejwan maski ya annechtlatokej mach annechneltokaj. ³⁷ Nochtin katlej noPapan kimonekiltis ma wikikan nonawak, Nej nikinresibiros iwan mach nikijtos amo. ³⁸ Porke mach oniwaltemok de ilwikak para nikchiwas san tlan Nej niknekis, sino para nikchiwas tlan kineki akin onechwaltitlanke. ³⁹ Iwan noPapan katlej onechwaltitlanke, amo kineki ma nikpolo nion se de nochtin katlej onechinmakak, sino kineki ma nikinyoliti itech nekáj sa iyakatlanka tonale. ⁴⁰ Porke noPapan katlej onechwaltitlanke, kineki nochtin akinmej kimatiskej nik Nej niiKone in Dios iwan tlaneltokaskej nonawak, ma kipiakan nemilistle katlej mach keman tlamis. Iwan kineki ma nikinyoliti itech nekáj sa iyakatlanka tonale.

⁴¹ Ijkuakón in judiojtin opéj mokualankatlapowiaj de Jesús, porke okijtoj: “Nej nípan katlej oniwaltemok de ilwikak.”

⁴² Iwan okijtojkej:

—¿Amo yen yin Jesús, ikone in José? Tejwan tikixmatij ipapan iwan imaman. ¿Kenik kijta nik in Yej owaltemok de ilwikak?

⁴³ Iwan Jesús okinmilwij:

—Amo xikualankatljotokan entre namejwan. ⁴⁴ Mach akaj tlakatl welis witz nonawak san por yej kinekis. Sino san yen noPapan katlej onechwaltitlanke welis kichiwas akaj tlakatl ma wiki nonawak. Iwan Nej nikyolitis itech nekáj sa iyakatlanka tonale. ⁴⁵ Kajki ijkuilitok itech in tiotlajkuiloltin katlej okijkuilojkej in profetajtin: “Dios kinmachtis nochtin.” Ijkón kiné, nochtin akinmej kikakiskej noPapan iwan kimmakaskej kuenta tlan kinmachtia, witzej nonawak.

⁴⁶ 'Amo kijtosneki akaj yokitak in noPapan Dios, sino san yen Nej katlej oniwalaj kan Yej kajki, yen Nej katlej yonikitak. ⁴⁷ Ipan melajka namechilwia: Akin tlaneltoka nonawak kipia nemilistle katlej mach keman tlamic. ⁴⁸ Nej nidan katlej niktemaka nemilistle. ⁴⁹ In ya wejkawitl namoweyitajwan okikuajkej in pan katlej itoka maná ne kan tlawaki, iwan maski yejwan okikuajkej yon pan, omikkej. ⁵⁰ Pero akinmej kikuaskej in pan katlej ovaltemok de ilwikak, mach mikiskej. ⁵¹ Nej nidan katlej niktemaka nemilistle katlej oniwaltemok de ilwikak. Akin kikuas yin pan, yolitos nochipa. In pan katlej nej niktemakas kijtosneki yen notlalnakayo, iwan niktemakas para ma kipiakan nemilistle in tlaltikpaktlakaj.

⁵² Ijkuakón in judiojtin opéj kualanij iwan okijoayaj entre yejwan:

—¿Kenik yin tlakatl kineki techmakas itlalnakayo ma tikuakan?

⁵³ Jesús okinmilwij:

—Ipan melajka namechilwia: Tla namejwan amo ankikuaskej notlalnakayo de Nej katlej onimochij nitlakatl, iwan tla amo ankoniskej noeso, mach ankipiaskej nemilistle. ⁵⁴ Akin kikua notlalnakayo iwan koni noeso, kipia nemilistle katlej mach keman tlamic, iwan Nej nikyolitis itech nekáj sa iyakatlanka tonale. ⁵⁵ Porke notlalnakayo yon melawak tlakuale, iwan noeso yon melawak tlaonistle. ⁵⁶ Akin kikua notlalnakayo iwan koni noeso, kijtosneki kajki nonawak iwan Nej nikaj inawak. ⁵⁷ NoPapan katlej onechwaltitlanke, kipia nemilistle, iwan Nej nikpia nemilistle inawak. Ijkón noiiki akin nechmomajsewia, noiiki kipia nemilistle nonawak. ⁵⁸ Yen yin pan katlej ovaltemok de ilwikak, iwan yin pan mach ken pan katlej itoka maná katlej okikuajkej in ya wejkawitl namoweyitajwan, iwan maski okikuajkej yon pan yejwan omikkej. Akin kikuas yin pan yolitos nochipa.

⁵⁹ Jesús okinmachtij in tlakaj de yin tlamantle ompa Caper-naum itech se tiopan de yen judiojtin.

Tlajtole katlej kitemaka nemilistle katlej mach keman tlamic

—⁶⁰ Nijuak ijkón okikakej in tlakaj katlej onemaij iwan Jesús, okijoakej:

—Wel owijtitok para se welis kimomakas kuenta. ¿Akin welis kimomakas kuenta?

⁶¹ Pero Jesús okimomakak kuenta nik in yonmej tlakaj mach okiwelitakej tlan okinmilwij, iwan Yej okinmilwij:

—¿Ankualanij por yen tlan namechilwia? ⁶² ¿Tlan ankiye-jyekoskej kiné, tla namejwan annechitaskej Nej katlej onimochij nitlakatl nitlejkos ilwikak kan achtoj onieka? ⁶³ Se

tlakatl ianima yen yon kimaka nemilistle itlalnakayo. Itlalnakayo mach itlaj kipalewia tla kipoloa ianima. Notlajtol katlej yonamechilwij amechmaka nemilistle ijkón ken ianima se tlakatl kimaka nemilistle itlalnakayo.⁶⁴ Pero katej sekimej de amejwan katlej mach nechneltokaj.

Jesús yokimatis desde achtoj akinmej amo otlaneltokayaj iwan akin kitemaktis (kitemaktilis).⁶⁵ Iwan Jesús okijtoj:

—Por yonik namechilwia ke mach akaj tlakatl welis witz nonawak tla noPapan amo kimonekiltis.

⁶⁶ Desde ijkuakón, miekej tlakaj katlej onemias iwan Jesús, okikajkej iwan mach ok Iwan onenkej. ⁶⁷ Ijkuakón Jesús okinmilwij in majtlakte iwan omen imomachtijkawan:

—¿Nojki namejwan ankinekij anyaskej?

⁶⁸ Simón Pedro okinankilij:

—Señor, ¿akin oksé inawak tiaskej? Tejwatzin tikpia tlajtote katlej kitemaka nemilistle katlej mach keman tlamis.⁶⁹ Iwan tejwan yotkneltokakej iwan ya tikmatokej nik tejwatzin tiyolchipawkaKone in toTajtzin Dios katlej yolitok.

⁷⁰ Iwan Jesús okinmilwij:

—Nej onamechpejpenke namejwan anmajtlaktin iwan amomen, pero se de amejwan itekipanoj in diablo.

⁷¹ Jesús otlajtoaya de yen Judas Iscariote itelpoch in Simón, porke satepan yen okitemaktij (okitemaktilij) in Jesús, maski oyeka se de yen majtlakte iwan omen imomachtijkawan.

7

Ikniwan Jesús mach otlaneltokayaj inawak

¹ Satepan de yon, Jesús onemias itech estado de Galilea. Mach okinekia nemis itech estado de Judea, porke in tlayekankej judiojtin okinekiaj kimiktiskej. ² Iwan yoajsia inmilwiw in judiojtin itoka tabernáculos. ³ Ikniwan Jesús okilwijkej:

—Amo nian ximokawa. Xiwia Judea, para ijkón momomachtijkawan katlej ompa katej ma kinmitakan nojki in milagrostin katlej Tej tикиnchiwa.⁴ Níkuak akaj tlakatl kineki ma kixmatikan mach kichiwa itlaj tlamantle san ichtaka sino kichiwa teixpan. Tones, in Tej moneki xikchiwa inmixpan nochtin in tlakaj para ijkón nochtin ma kitakan tlan tikchiwa.

⁵ Nion yen ikniwan mach okineltokayaj. ⁶ Iwan Jesús okinmilwij:

—Mach ya ajsi tonale para nias ompa, pero para amejwan san katlij yej tonale welis anyaskej.⁷ In tlaltikpaktlakaj mach welis amechkokoliskej namejwan. Pero Nej nechkokoliaj, porke Nej nikinmilwia nik yejwan kichiwaj tlan mach kuale.

⁸ Namejwan xiwan ilwitl. Nej mach nias, porke mach ya ajsi tonale para nias ompa.

⁹ Iwan satepan de ijkón okinmilwij, Jesús ompa omokaj itech estado de Galilea.

Jesús oyáj itech ilwitl itoka tabernáculos

¹⁰ Satepan de ikuak yoyajkej ikniwan, Jesús noijki oyáj itech yon ilwitl, oyáj san ichtaka para amo ma kitakan nochtin tlakaj. ¹¹ In tlayekankek judiojtin okitemoayaj ompa itech ilwitl, iwan okijoayaj:

—¿Kanin kajki in yon tlakatl itoka Jesús?

¹² Nochtin tlakaj omotlapowiayaj de Yej. Sekimej okijoayaj: “Jesús kuale tlakatl.” Iwan oksekimej okijoayaj: “Jesús mach kuale, san kinkajkayajtinemi in tlakaj.”

¹³ Pero mach akaj otlapoaya de Yej inmixpan tlakaj porke okinmiimakasiaj in tlayekankek judiojtin.

¹⁴ Iwan nikuak ya tlajko yawi in yon ilwitl, Jesús okalakke ijlik in weyi tiapan iwan ompa opéj tlamachtia. ¹⁵ In judiojtin sa omotlajtlachialtiayaj (omomajmawtiayaj) iwan okijoayaj:

—¿Kenik in yin tlakatl wel kinati miek iwan nion amo omoixtlamachtij?

¹⁶ Jesús okinnankilij:

—Notlamachtilis mach kisa de Nej, sino yon witz de noPan Dios katlej onechwaltitlanke. ¹⁷ Tla akaj kineki kichiwas tlan Dios kimonekiltia, welis kimomakas kuenta nik notlamachtilis witz de Dios, iwan mach de Nej. ¹⁸ Akin tlapoa san de yej itlayejyekolis, kijtosneki kineki ma kiweyikixtikan. Pero Nej nikneki nikweyikixtis katlej onechwaltitlanke. Nej nikija tlan melawak, iwan mach nitlakajkayawa.

¹⁹ Moisés oamechmakak namejwan in tlanawatile pero nion se de amejwan mach kichiwa tlan kijta yon tlanawatile. ¿Tlanik namejwan ankinekij annechmiktiskej?

²⁰ In tlakaj okinankilijkej:

—Tej tikpia demonio. ¿Akin kineki mitzmiktis?

²¹ Jesús okinmilwij:

—Aminochtin sa anmotlajtlachialtijkej (omomajmawtiijkej) san por onikpajtij se kokoxke nikuak weyi tonale.

²² Moisés oamechilwij xikchiwakan in sirkunsisión (maski mach yen Moisés okipewaltij in sirkunsisión sino katlej ya wejkawitl iweyitajwan). Iwan namejwan ankisirkunsidaroaj se chokotzin maski ma yeto weyi tonale. ²³ Axan kiné, tla namejwan ankisirkunsidaroaj se chokotzin nikuak weyi tonale porke itech yon tonale okitokaroj mosirkunsidaroas, namejwan maski ma yeto weyi tonale ankisirkunsidaroaj porke ankinekij anmokawaskej kuale itech itlanawatil in Moisés. ¿Tlanik kiné namejwan ankualanij nonawak por

onikpajtij se tlakatl nijuak weyi tonale? ²⁴ Amakaj xikist-lakawikan san por ankinekiliskej. Sino xikistlakawikan tla melawak ankimatij nik mach kuale tlan okichij.

Jesús okijtoj de kan ovalaj

²⁵ Sekimej katlej ochantiaj Jerusalén okijtoayaj:

—¿Amo yen yin tlakatl katlej kitemojtinemij para kimiktiskej? ²⁶ Xikitakan, tlapojtok inmixpan nochtin in tlakaj, iwan mach akaj itlaj kilwia. ¿Xamo in tekiwajkej melawak yokineltokakej nik in yin tlakatl yen Cristo? ²⁷ Pero tejwan tikmatij de kan ovalaj in yin tlakatl. Iwan nijuak witz in Cristo, mach akaj kimatis de kan witz.

²⁸ Jesús ok otlamachtijtoka ijtik in weyi tiopan, iwan nijuak ijkón okikakke, okijtoj chikawak:

—Namejwan annechixmatij iwan ankimatij de kan oniwalaj. Nej amo oniwalaj san por Nej nikneki, sino oniwalaj porke onechwaltitlanke in Dios katlej itech onkaj tlan melawak, iwan katlej namejwan mach ankixmatij. ²⁹ Pero Nej nikixmati porke Nej oniwalaj de Yej inawak, iwan Yej onechwaltitlanke.

³⁰ Por yonik okinekiaj kikitzkianij. Pero amakaj okikitzkij porke mach ya oajsia in tonale para kikitzkiskej. ³¹ Iwan miejek otaneltokakej inawak, iwan okijtoayaj:

—Tejwan tikneltokaj nik yen yin Cristo porke mach akaj oksé welis witz iwan kinchiwas okachi wejweyin milagrostin ken yin Jesús.

In fariseos okintitlankej sekimej mayoltin para ma kitzkikan in Jesús

³² In fariseos okikakej tlan okijtoayaj in tlakaj de yen Jesús. Ikuakón in tlayekankej tiopixkej iwan in fariseos okintitlankej sekimej mayoltin para ma kikitzkikan in Jesús. ³³ Iwan Jesús okijtoj:

—Sa kanaj keski tonale namowan nietos, iwan satepan nimokuepas inawak noPapan Dios katlej onechwaltitlanke.

³⁴ Namejwan annechtemoskej, pero mach annechajsiskej. Porke kan Nej nias, namejwan mach welis anyaskej.

³⁵ In judiojin opéj motlajtlaniaj entre yejwan:

—¿Kanin yas iwan amo welis tikajsiskej? ¿Kox yas innawak in tojudiojikniwan katlej chantitokej ipan intlal in griegojin? ¿Kox yas kinmachtitij in griegojin? ³⁶ ¿Tlan kijtosneki tlan kijta: “Annechtemoskej, pero mach annechajsiskej, porke kan Nej nias, namejwan mach welis anyaskej”?

Ameyale katlej kitemaka yankuik nemilistle

³⁷ In sa iyakatlanka tonale de yon ilwitl, katlej okachi weyi tonale, Jesús omoketzke iwan okijtoj chikawak:

—Tla akaj amiki, ma wiki nonawak iwan ma atli. ³⁸Tla akaj nechneltokas, tonses ipan iyolo meyas atl katlej kitemaka yankuik nemilistle, ijkón ken kijta in tiotlajkuilole.

³⁹ Jesú斯 ijkón okijtoj kijtosneki akinmej kineltokaskej in Jesú斯 kiresibiroskej in Espíritu Santo. Ijkuakón ayamo owalaya in Espíritu Santo porke in Jesú斯 mach ya oyaya ilwikak para kiweyikixtiskej.

In tlakaj omoxelojkej

⁴⁰ Sekimej de yonmej tlakaj nijuak ijkón okikakej okijtojkej:

—Ipan melajka yin yen profeta katlej otikchixtokaj ma wiki.

⁴¹ Iwan oksekimej okijtoayaj:

—Yin yen Cristo.

Pero sekimej okijtoayaj:

—Amo. Mach yen Cristo. Porke in Cristo mach witz de Galilea. ⁴² In tiotlajkuilole kijta nik in Cristo kipia de witz nelwatl de yen rey David. Iwan noijki kijta nik witz de pueblo de Belén kan ochantia in David.

⁴³ Por yonik in tlakaj omoxelojkej por yen Jesú斯. ⁴⁴ Sekimej de yejwan okinekiaj kikitzkianij. Pero mach akaj okikitzkij.

In tlayekankej judiojtin mach okineltokakej in Jesú斯

⁴⁵ In mayoltin oyajkej innawak in tlayekankej tiopixkej iwan innawak in fariseos. Iwan yejwan okintlajtlanijkej in mayoltin:

—¿Tlanik mach ankiwalwikakej?

⁴⁶ In mayoltin otlanankilijkej:

—Mach keman tikkakij akaj tlakatl ijkón nik tlapoa.

⁴⁷ Tones in fariseos okinmilwijkej in mayoltin:

—¿Noijki namejwan yoamechkajkayaj? ⁴⁸ ¿Kox ya ankitakej akaj de totekiwajkawan o noso akaj de tejwan tifariseos yotilaneltokakej inawak Jesú斯? ⁴⁹ Pero nekatej tlakaj katlej mach kixmatij in tlanawatile de Moisés iwan tlaneltokaj inawak yon Jesú斯, Dios kintlajtlakoltis.

⁵⁰ Nicodemo, katlej okachi achtoj oyáj de yuak okitato in Jesú斯, iwan katlej oyeka noijki fariseo, okinmilwij:

⁵¹ —Totlanawatil kijta nik mach welis tiktlajtlakolma-maltiskej se tlakatl san tekitl, tla mach achtoj tikyolkuitiaj para tikmatiskej tlan okichij.

⁵² Iwan yejwan okilwijkej:

—¿Tej noijki xamo tiwitz de Galilea? Xiktemo itech tiotlajkuilole iwan tikmomakas kuenta nik mach keman kisas nion se profeta de Galilea.

⁵³ Ijkuakón kada se de yejwan oyajkej para inchan.

8

Se siwatl momekatij

¹ Pero Jesús oyáj kan Olivostepetl. ² Owalmostlatik san kualkan, oksemi oyáj itech in weyi tiopan, iwan miekej tlakajtin omijkuaniijkej inawak. Iwan Jesús omotlalij opéj kinmachtia. ³ Ijkuakón in tlamachtijkej de itlanawatil in Moisés iwan in fariseos okiwikakej ompa se siwatl katlej okajsikej momekatijtok iwan se tlakatl. Iwan okiketzkej tlatlajko.

⁴ Iwan okilwijkej in Jesús:

—Tlamachtij, yin siwatl otikajsikej kimomekatijtok se tlakatl. ⁵ In tlanawatile de Moisés otechnawatij ma tikmiktikan ika tetl akin ijkón kichiwa. ¿Iwan Tej ken tikipta?

⁶ Okitlajtlaniijkej ijkón porke okinekiaj kitlajtlakol-mayawiskej para kajsiskej itlaj tlan ika kitilwiskej. Pero Jesús omotooloj iwan opéj tlajkuiloa ipan tlale ika imajpil. ⁷ Pero como okachi okitlajtlaniaya, Yej omoyekketzke iwan okinmilwij:

—Tla akaj de amejwan mach kipia itlaj tlajtlakole, ma yen achtoj ma kimotla ika tetl.

⁸ Iwan oksemi omotooloj iwan oksemi opéj tlajkuiloa ipan tlale. ⁹ Iwan yejwan nikuak ijkón okikakej, okistajkej sejsen por sejsen. Opéj achtoj kisaj katlej okachi tetajtztzintin. Ni-jkuak omokaj sa yen Jesús iwan siwatl katlej oyeka tlatlajko, ¹⁰ ijkuakón oksemi omoyekketzke in Jesús iwan okitlajtlaniij in siwatl:

—Siwatl, ¿katlimej katlej omitztilwiaya? ¿Amakaj omitztlajtlakoltij?

¹¹ In siwatl okinankilij:

—Amo, Señor. Nion se.

Iwan Jesús okilwij:

—Nion Nej mach nimitztlajtlakoltia. Xiwia, iwan ayakmo xitlajtlako.

Jesús kajki ken se tlanextle de yen tlaltikpaktlakaj

¹² Jesús oksemi okintlapowij in tlakaj, iwan okinmilwij:

—Nej nitlanextle de yen tlaltikpaktlakaj, akin walmukas nonawak, mach semi nemis ijtk tlatleyualotl, sino kipias tlanextle katlej kitemaka nemilistle katlej mach keman tlamis.

¹³ Iwan in fariseos okilwijkej:

—Tlan Tej tikipta kisa san de Tej. Iwan tlan tikipta mach melawak.

¹⁴ Jesús okinnankilij:

—Tlan Nej nikijta yon melawak, maski kisa de Nej tlan nikijta, porke Nej nikmati de kan oniwalaj iwan kan niawi. Pero namejwan mach ankimatij de kan oniwalaj nion kan

niawi. ¹⁵ Namejwan antetlajtlakoltiaj ijkón ken kichiwaj in tlaltikpaktlakaj. Nej mach akaj niktajtlakoltia. ¹⁶ Pero tla Nej nitetlajtlakoltis, nitetlajtlakoltis itech tlan melawak, porke mach nitetlajtlakoltia san Nej, sino titetlajtlakoltiaj Nej iwan noPapan katlej onechwaltitlanke. ¹⁷ Namejwan itech namotlanawatil ankipiaj ikuilitok ke nikuak omen testigojin parejo kijtaj san se tlajtole, tonses melawak tlan kijtaj. ¹⁸ Nej namechmatiltia tlan de Nej, iwan noPapan katlej onechwaltitlanke noiiki amechmatiltia de Nej.

¹⁹ Iwan yejwan okitlajtlanijkej:

—¿Kanin kajki moPapan?

Jesús okinnankilij:

—Namejwan mach annechixmatij, iwan nion mach ankixmatij noPapan. Tla amejwan annechixmatinij, noiiki ankixmatinij noPapan.

²⁰ Jesús okijtoj yon tlajtole nikuak otlamachtijtoka ijtik in weyi tiopan, kan oyeka in kaja kan okonkajkawayaj in tomin para yen weyi tiopan. Iwan mach akaj okikitzkij, porke mach ya oajsia tonale para kikitzkiskej.

Kan Nej nias namejwan mach welis anyaskej

²¹ Jesús oksemi okinmilwij:

—Nej nias, iwan namejwan annechtemoskej, pero anmikiskej ipan namotlajtlakol porke kan Nej nias namejwan mach welis anyaskej.

²² Ikuakón in judiojtin okijtojkej:

—¿Xamo momiktis, por yonik kijta nik mach welis tiaskej kan Yej yawi?

²³ Iwan Jesús okinmilwij:

—Namejwan anpowij de nian tlaltikpak, pero Nej nipowi de ilwikak. Namejwan san antlaltikpaktlakaj, pero Nej amo.

²⁴ Por yonik namechilwia nik anmikiskej ipan namotlajtlakol, porke tla amo annechneltokaj nik in Nej niCristo, anmikiskej ipan namotlajtlakol.

²⁵ Ikuakón yejwan okitlajtlanijkej:

—Tones, ¿akin Tej?

Jesús okinnankilij:

—Yonamechilwij desde achtoj akin Nej. ²⁶ Nikpia miek tlamantle tlan namechilwis iwan miek tlan namechtlajtlakoltis namejwan. Melawak tlan nikijta, ijkón ken katlej onechwaltitlanke Yej melawak. Iwan tlan Nej onikakke de Yej, yen yon tlan nikimilwia in tlaltikpaktlakaj.

²⁷ Pero in judiojtin mach okimomakakej kuenta ke okintlapowiaya de yen iPapan. ²⁸ Por yonik okinmilwij:

—Nikuak namejwan annechajkokuiskej ajkopan Nej katlej onimochij nitlakatl, ikuakón ankimomakaskej kuenta

nik yen Nej. Iwan ankimmakaskej kuenta nik mach itlaj nikchiwa san tlan kisa de Nej, sino sanwel nikijta tlan noPapan yonechmachtij. ²⁹ Porke katlej onechwaltitlanke Yej nowan kajki. NoPapan mach nechkawa noselti, porke Nej nochipa nikchiwa tlan Yej kipaktia.

³⁰ Nijuak in Jesús otlanke okijtoj nochi yon tlajtole, miekej otlaneltokakej inawak.

Jesús okijtoj kenik welis timakisaskej de ijtik tlajtlakole

³¹ Jesúś okinmilwij in judiojtin katlej otlaneltokakej inawak:

—Tla namejwan ankichijtoskej tlan kijta notlamachtil, tones melawak anyeskej annomomachtijkawan. ³² Iwan ankixmatiskej tlan melawak, iwan yon tlan melawak amechmakixtis de inawak namoteko para ayakmo ma amechnawatijto.

³³ Iwan yejwan okinankilijkej:

—Tejwan tiwalajtokej nelwatl de Abraham, iwan mach semi akaj tikpiaj oksé kej toteko. ¿Kenik tikipta in Tej nik titechmakixtis de inawak toteko?

³⁴ Iwan Jesúś okinmilwij:

—Ipan melajka namechilwia, nochtin akinmej kichiwaj tlajtlakole, kijtosneki yon tlajtlakole yen inteko. ³⁵ Iwan se tlakatl katlej yen yon iteko mach welis powis itech ifamilia in toTajtzin Dios, pero se katlej tekone de Dios yon kemaj powi iktlanke (ik tlami) itech ifamilia in toTajtzin Dios. ³⁶ Ijkón kiné, tla Nej niiKone in Dios namechmakixtis de inawak namoteko, tones namejwan anmokawaskej melawak antlamakixtiltin. ³⁷ Nikmati nik namejwan anwalajtokej nelwatl de Abraham. Pero ankinekij annechmiktiskej porke mach ankiresibiroaj ipan namoyolo tlan namechilwia. ³⁸ Nej nikijta tlan noPapan nechititia, iwan namejwan ankichiwaj tlan namopapan amechnawatia.

³⁹ Iwan yejwan okilwijkej:

—Tejwan topapan yen Abraham.

Iwan Jesúś okinmilwij:

—Tla Abraham yeni yen namopapan, tones ankichiwanij tlan yej okichij. ⁴⁰ Maski yonamechilwij tlan melawak tlan Dios nechititia, namejwan ankinekij annechmiktiskej. Abraham mach ijkón okichij. ⁴¹ Namejwan ankichiwaj ijkón ken tlan kichiwa namopapan.

Yejwan okilwijkej:

—Tejwan mach tiichtakapiltin, tejwan tikpiaj san se topapan, topapan yen toTajtzin Dios.

⁴² Ijkuakón Jesúś okinmilwij:

—Tla yen Dios yeskia namopapan, namejwan annecht-lasojtlanij, porke Nej oniwala de Dios ixko yin tlaltikpak. Mach oniwala san por Nej oniknekke, sino porke Dios onech-waltitlanke. ⁴³ ¿Ankimati por tlanik mach ankimomakaj kuenta tlan namechilwia? Mach ankimomakaj kuenta porke mach ankinekij ankikakiskej tlan namechilwia. ⁴⁴ Namejwan namopapan yen diablo, iwan namejwan ankichiwaj tlan yej kineki. In diablo yej temiktij desde opejke in tlaltikpak. Mach keman itlaj kijta tlan melawak porke mach itlaj kipia ipan iyolo tlan melawak. Nochipa san tlakajkayajtinemi porke yen yon itekiw, porke yipa tekajkayaj, iwan yen tetaj de nochtin akinmej tlakajkayawaj. ⁴⁵ Pero komo Nej nikijta tlan melawak, por yonik namejwan mach annechneltokaj. ⁴⁶ ¿Akin de amejwan welis nechnextilis nik nikpia itlaj tlajt-lakole? Iwan tla nikijta tlan melawak, ¿tlanik mach annechneltokaj? ⁴⁷ Akin powi inawak Dios, kikaki itlajtol in Dios, pero komo namejwan mach anpowij inawak Dios, por yonik mach ankinekij ankikakiskej.

Cristo yokatka okachi achtōj ke Abraham

⁴⁸ Iwan ijkuakón in judiojtin okilwijkej:

—Yompa tlan tikijtaj, Tej tisamaritano iwan tikpia demonio.

⁴⁹ Iwan Jesús okinnankilij:

—Nej mach nikpia nion se demonio, sino Nej nikweyimati in noPapan. Pero namejwan mach annechweyimati. ⁵⁰ Nej mach nikintemoa in tlakaj para ma nechweyikixtikan, onkaj se katlej kintemoa para ma nechweyikixtikan, iwan katlej kinmixkomakas akinmej amo nechweyikixtiskej. ⁵¹ Ipan melajka namechilwia, akin kichiwas tlan Nej nikijta, mach keman mikis.

⁵² Ijkuakón in judiojtin okinankilijkej:

—Axan kuale tkmomakaj kuenta nik melawak tikpia demonio. Abraham iwan nochtin in profetajtin omikkej, iwan Tej tikijta: “Akin kichiwas tlan Nej nikijta, mach keman mikis.” ⁵³ ¿Kox okachi tiweyikistok in Tej ke topapan Abraham? Yej omikke iwan in profetajtin noiiki omikkej. ¿Akin timomachilia in Tej?

⁵⁴ Iwan Jesús okinnankilij:

—Tla Nej niktemoani noweyikixtilis, tonses noweyikixtilis mach itlaj ipatij. Pero katlej nechweyikixtia, yen noPapan, katlej namejwan ankijtaj yen namoDios. ⁵⁵ Namejwan mach ankixmatij. Nej nikixmati, iwan tla nikijtoani mach nikix-mati, nietoskia noiiki nitekajkayaj ken namejwan. Pero Nej melawak nikixmati, iwan nikchiwa tlan Yej kijta. ⁵⁶ In ya wejkawitl namopapan Abraham, opakke porke okimatke nik

niwitz ixko yin tlaltikpak. Yej itech itlaneltokalis onechitak iwan por yonik opakke.

⁵⁷ Ijkuakón in judiojtin okilwijkej in Jesús:

—Ayamo tikpia omenpoale iwan majtlakte xiwitl, ¿iwan tikitja otikitak in Abraham?

⁵⁸ Iwan Jesús okinmilwij:

—Ipan melajka namechilwia, desde antes de tlakatis in Abraham, Nej yipa yonieka.

⁵⁹ Ijkuakón in judiojtin okonintilankej sekimej temej para kimojmotlaskej in Jesús. Pero Yej omotlaatij, opanok intzalko iwan okiske de ijtit in weyi tiopan.

9

Jesús okipajtij se tlakatl katlej mach otlachiaya desde itlakatilis

¹ Nijuak Jesús oyaya ipan ojtle, okitak se tlakatl katlej mach otlachiaya desde itlakatilis. ² Iwan imomachtijkawan okitlajtlanijkej:

—Tlamachtij, ¿tlanik yin tlakatl otlakatke mach tlachia? ¿Por otlajtlakojej ipapanwan, o noso porke yej otlajtlako?

³ Jesús okinnankilij:

—Mach por yej otlajtlakoj nion mach por otlajtlakojej ipapanwan. Sino para itech ma mota tlan Dios weli kichiwa.

⁴ Itech yinmej tonaltin Nej nikpia de nikchiwas in tekitl de noPapan Dios katlej onechwaltitlanke, porke ajsis tonale nikuak mach ok akaj welis tekipanos. ⁵ Mientras Nej nikaj ixko yin tlaltikpak, nikaj kej se tlanextle katlej kinyoltlawilia in tlaltikpaktlakaj.

⁶ Satepan de ikuak ijkón okijtoj, ochijchak ipan tlale, okipaaatlak achitzin akuitlatl iwan okixaltilij ipan ixtololowan in tlakatl katlej mach tlachia. ⁷ Iwan okilwij:

—Xiwia ximixpaki itech ameyale katlej itoka Siloé —Siloé kijtosneki Tlatitlanile.

In tlakatl katlej mach tlachia oyáj omixpakato. Iwan nikuak omokuepato ya owelik otlachixke. ⁸ Ijkuakón nochtin katlej ibesinoswan iwan nochtin katlej achtoj okitayaj omijtlanijinemia, okijtoajej:

—¿Amo yen yin tlakatl katlej omijtlanijinemia?

⁹ Sekimej okijtoayaj:

—Yej yin tlakatl.

Oksekimej okijtoayaj:

—Amo, mach yej. Maski ijkón mota.

Pero in tlakatl yej inewian okijtoaya:

—Yen nej.

¹⁰ Iwan okitlajtlanijkej:

—¿Iwan kenik axan ya kuale titlachia?

¹¹ Yej okinnankilij:

—In tlakatl katlej itoka Jesús okichij achitzin akuitlatl, iwan onechixaltlij ipan noixtololowan, iwan onechilwij: “Xiwia ximixpakati itech ameyale katlej itoka Siloé.” Oniaj, iwan nikuak onimixpakke, ya kuale onitlachixke.

¹² Iwan okitlajtlanjikej:

—¿Kanin kajki in yon tlakatl?

Iwan yej okinnankilij:

—Mach nikmati.

In fariseos okitlatzintokijkej in tlakatl katlej mach otlachiaya

¹³ Satepan okiwikakej in tlakatl katlej mach otlachiaya okinmixpantilijtoj in fariseos. ¹⁴ Oyeka weyi tonale nikuak in Jesús okichij akuitlatl, iwan okitlachialtij in tlakatl. ¹⁵ In fariseos okitlajtlanjikej in tlakatl kenik ya weli tlachia. Iwan yej okinmilwij:

—Onechixaltlij akuitlatl itech noixtololowan, onimixpakke, iwan axan ya kuale nitlachia.

¹⁶ Ijkuakón sekimej fariseos okijtojkej:

—In tlakatl katlej ijkón okichij mach ovalaj de Dios, porke mach kitlakita in weyi tonale.

Iwan oksekimej okijtoayaj:

—Pero, ¿kenik weli kinchiwa milagrostín in tla Yej tlajtlakolej?

Iwan mach oyekaj san se tlajtole entre yejwan iwan omoxelobjej. ¹⁷ Iwan oksemi okitlajtlanjikej in tlakatl katlej mach otlachiaya:

—¿Iwan tej, tlan tikija de nekáj tlakatl katlej omitzt-lachialtij?

Iwan yej okijtoj:

—Nej nikija nik in yon tlakatl profeta.

¹⁸ Pero in tlayekankej judiojtin mach okineltokayaj kox melawak mach otlachiaya iwan axan ya kuale tlachia, iwan asta okinnotzkej itajwan. ¹⁹ Iwan okintlajtlanjikej:

—¿Yen yin namotelpoch katlej namejwan ankijtaj otlakatke mach tlachia? ¿Kenik in axan ya kuale tlachia?

²⁰ Itajwan otlanankilijkej:

—Tikmatij nik in yej totelpoch, iwan tikmatij nik otlakatke mach tlachia. ²¹ Pero mach tikmatij kenik ya weli tlachia, nion mach tikmatij akin okitlachialtij. Xiktlajtlanikan yej, mach ok tzikitzin, yej welis amechilwis kenik opajtik.

²² Itajwan ijkón okijtojkej porke okinmiimakasij in tlayekankej judiojtin, porke in tlayekankej judiojtin yokichijkaj san se tlajtole ke tla akaj kijtos nik Jesús yen Cristo,

kikixtiskej iktlanke (ik tlami) de itech intiopan. ²³ Por yonik okijtojkej itajwan: "Xiktlajtlanikan yej, mach ok konetl."

²⁴ In tlayekankej judiojtin oksemi okinotzkej in tlakatl katlej mach otlachiaya, iwan okilwijkej:

—Xikijo tlan melawak ixpan Dios. Porke tejwan tikmatij nik in Jesús Yej tlajtlakolej.

²⁵ Iwan yej okinnankilij:

—Nej mach nikmati kox tlajtlakolej o noso amo. San tlan nej nikmati, mach onitlachiaya iwan axan ya weli nitlachia.

²⁶ Iwan oksemi okitlajtlanikej:

—¿Tlan omitztoktij? ¿Kenik omitztlachialtij?

²⁷ Iwan yej okinnankilij:

—Yonamechilwij, iwan mach ankineltokaj, ¿tlanik ankinékij oksemi ma namechilwi? ¿Noijki namejwan ankinekij anyeskej imomachtijkawan?

²⁸ Ijkuakón okajwakej iwan okilwijkej:

—Tej tiimomachtijkaw de Yej. Pero tejwan tiimomachtijkawan de Moisés. ²⁹ Tejwan tikmatij nik in Dios okinotzke in Moisés, pero yin tlakatl nion mach tikmatij de kan ovalaj.

³⁰ In tlakatl katlej mach otlachiaya okinnankilij:

—¿Kenijki? ¡Kenik namejwan mach ankimati de kan ovalaj, iwan nej yonechtlachialtij! ³¹ Tikmatij nik in Dios mach kinkaki in tlajtlakolejkej. Kinkaki san yen katlej kiweyikixtaj iwan kichiwaj tlan Dios kimonekiltia. ³² Desde ijkuak opéj in tlaltikpak mach semi tikkakij akaj tlakatl ma kitlachialti se katlej mach tlachia desde itlakatilis. ³³ Tla yin tlakatl amo walani de Dios, mach itlaj welini kichiwani.

³⁴ Iwan yejwan okilwijkej:

—Tej otitlakatke titentok de tlajtlakole, ¿iwan axan tikneki titechmachtis?

Iwan okikixtijkej iktlanke (ik tlami) de itech intiopan.

In tlakaj katlej mach tlachiaj ipan intlamachilis

³⁵ Jesús okimatke nik in tlakatl katlej mach otlachiaya okikixtijkej iktlanke (ik tlami) de itech intiopan. Iwan nijuak in Jesús okinamikke yon tlakatl, okitlajtlani:

—¿Titlaneltoka inawak iKone in Dios?

³⁶ Iwan yej okilwij:

—Señor, xinechilwi akin yon, para ma nitlaneltoka inawak.

³⁷ Iwan Jesús okilwij:

—Tej yotikitak. Yen Nej katlej axan Nej mowan nimotlapowijtok.

³⁸ Ijkuakón in tlakatl omotlankuaketzke iyakapan Jesús, iwan okilwij:

—Nimitzneltoka, tejwatzin noSeñor.

³⁹ Iwan Jesús okilwij:

—Nej oniwalaixko yin tlaltikpak para nikinmilwis kox kuale o noso amo kuale tlan kichiwaj in tlaltikpaktlakaj. Iwan ijkón, katlej mach tlachiaj ma tlachiakan, iwan katlej tlachiaj mach ma tlachiakan.

⁴⁰ Sekimej fariseos katlej ik ompa oyekaj, nikuak ijkón okikakej, okitlajtlanijkej:

—¿Kijtosneki tejwan noiji mach titlachiaj?

⁴¹ Iwan Jesús okinnankilij:

—Tla melawak namejwan yeskia mach antlachianij, mach ankipianij tlajtlakole. Pero komo namejwan ankijtaj nik kuale antlachiaj, tones namotlajtlakol amotech kajki, porke mach melawak ankimomakaj kuenta tlan kijta notlajtol.

10

Ejemplo de se ichkakorral

¹ 'Ipan melajka namechilwia, in tlajpixke kalaki itech puerta de yen korral, iwan akin kalakis oksé lado iwan amo itech puerta de yen korral, yon ichtekke. ² Porke in tlajpixke katlej kinmonekuitlawia ichkamej kalaki itech puerta. ³ Se tlakatl kitlapolia puerta in tlajpixke para ma kalaki, iwan ichkamej kitenkakij. Iichkawan kinnotza ika intoka, iwan kinkixtia de ijtk inkorral. ⁴ Iwan nikuak nochtin yokinkixtij, kinwika kinyekana. Iwan ichkamej ikuitlapan yawij, porke kitenkakij. ⁵ Pero se katlej mach kixmatij mach iwan yawij, sino kicholiliaj, porke mach kitenkakij se katlej mach kixmatij.

⁶ Jesús okintlalilij yon ejemplo, pero yejwan mach okimomakakej kuenta tlan Jesús okinekia ma kimatikan.

Jesús yen kuale tlajpixke

⁷ Jesús oksemi okinmilwij:

—Ipan melajka namechilwia, Nej nikaj kej se puerta kanik kalakij ichkamej. ⁸ Nochtin akinmej ovalajkej antes de Nej niwitz, oyajkej ichtekkej, iwan ichkamej mach okintenkakej nikuak okinnotzkej. ⁹ Nej nikaj kej nipurta. Iwan akin notech kalakis, momakixtis. Yetos kej se ichka katlej kalaki iwan kisa kan puerta iwan kajsi itlakual.

¹⁰ In ichtekke ovalaj san para tlachtekis, san temiktia iwan san teixpoloa. Pero Nej oniwalaixko para in tlakaj ma kipiakan nemilistle. Iwan yon nemilistle tentok de nochti tlamantle tlan kuale. ¹¹ Yen Nej katlej nikuale nitlajpixke. In kuale tlajpixke kitemaka inemilis por yen ichkamej. ¹² Pero akin san tetlajpialia, nikuak kita witz in koyotl, kinkajtewa in ichkamej iwan chloa, porke mach melawak tlajpixke iwan ichkamej mach iaxkawan. In koyotl kinkitzkia sekimej ichkamej iwan oksekimej kinchochololtia. ¹³ Yon katlej san

tetlajpialia choloa porke san tekipanoj iwan por yonik mach kinchiwa kuenta in ichkamej.

¹⁴⁻¹⁵ 'Yen Nej katlej nikuale nitlajpixke. Ijkón ken noPapan nechixmati iwan Nej nikixmati noPapan, no ijkón Nej nikinmixmati nochkawan iwan yejwan nechixmatij. Iwan Nej niktemaka nonemilis por yen ichkamej. ¹⁶ Noijki nikinpia oksekimej ichkamej katlej mach katej ijtit yin korral, iwan moneki nikinwalwikkas noijki. Yejwan nechtenkakiskej, iwan nochtin yeskej san sekan, iwan yetos san se tlajpixke.

¹⁷ 'NoPapan nechtlaejtla porke niktemaka nonemilis por yen nochkawan, para satepan oksemi nikajsis nonemilis nikuak nimoyolkuis (nimoyolitis). ¹⁸ Mach akaj welis nechkitilis nonemilis, sino Nej nonewian niktemaka. Nikpia poder para niktemakas nonemilis, iwan nikpia poder para oksemi nikajsis nonemilis. Ijkón noPapan onechnawatij ma nikchiwa.

¹⁹ Nikuak in judiojtin okikakej yon tlajtole, oksemi omoxelokjej. ²⁰ Miekej de yejwan okijtoayaj:

—¿Tlanik ankineltokaj tlan amechilwia? Kipia se demonio iwan kualoko.

²¹ Oksekimej okijtoayaj:

—Akin kipia demonio mach ijkón nik tlapoa. Se tlakatl katlej kipia demonio mach welis kitlachialtis se katlej mach tlachia.

In judiojtin mach otlaneltokakej inawak Jesús

²² Ompa Jerusalén okichijtokaj ilwitl katlej okichiwayaj kada xiwitl para kelnamikij nikuak okiyankuilkij in weyi tiopan. Iwan oyeka meroj nikuak sewa. ²³ Jesús ik ompa onentoka itech weyi tiopan itech Korredor de Salomón. ²⁴ Ijkuakón in judiojtin okiyawalojkej iwan okitlajtlanijkéj:

—¿Asta keman kuale tikmatiskej de Tej? Tla melawak yen Tej tiCristo, melajka xitechilwi.

²⁵ Jesús okinnankilij:

—Yonamechilwij iwan mach annechneltokaj. In tlamantin katlej Nej nikinchiwa ika ipoder noPapan kiteititiaj nik Nej niCristo. ²⁶ Pero namejwan mach annechneltokaj, porke namejwan mach annochkawan. ²⁷ Nochkawan nechtenkakij, iwan Nej nikinmixmati iwan yejwan witzej nonawak. ²⁸ Nej nikinmaka nemilistle katlej mach keman tlamis. Iwan mach semi mikiskej, iwan mach akaj welis nechinkitilis. ²⁹ NoPapan katlej onechinmakak nochkawan, Yej kipia okachi weyi ipoder iwan mach akaj onkaj oksé ken Yej, iwan mach akaj welis kinkixtilis. ³⁰ NoPapan iwan Nej tisetitokej san se.

³¹ In judiojtin oksemi okonintilankej temej para kimojmoltaskej. ³² Pero Jesús okinmilwij:

—Amoixpan nikchijtiwitz miek tlamatle ika ipoder in noPapan. ¿Tlan tlamatle mach kuale onikchij como para ika xinechmojmotlakan ika tetl?

³³ In judiojtin okinankilijkej:

—Mach timitzmojmotlaskej por tlan kuale tikchiwa. Sino porke tikixpanwia in toTajtzin Dios. Tej san tikomokiera tlakatl, iwan timochiwa kej yeskia tiDios.

³⁴ Jesús okinmilwij:

—Itech namotlanawatil ijkuitol nik in Dios okijtoj: “Nej onikijtoj, namejwan andiosmej.” ³⁵ Tikmatij ke tlan kijta in tiotlajkuilole mach welis se kipatlas. Iwan Dios okintokayotij diosmej in tlakaj katlej okiresibirojkej itlajtol. ³⁶ Iwan tla Dios onechpejpenke iwan onechwaltitlanke ixko yin tlaltik-pak, ¿tlanik kiné, namejwan ankijtaj ke nikixpanawia in Dios por onikijtoj nik in Nej niiKone? ³⁷ Tla amo nikinchiwa milagrostin ken noPapan kinchiwa, amo xinechmeltokakan. ³⁸ Pero tla nikinchiwa, xikneltokakan kiné in milagrostin katlej nikinchiwa, maski amo ankineltokaj tlan namechilwia. Para xikneltokakan iwan xikmatikan nik melawak noPapan nowan kajki iwan Nej Iwan nikaj.

³⁹ Oksemi okinekiaj kikitzkianij, pero Jesús okincholilij.

⁴⁰ Jesús omokuepke oksemi ik ne lado de yen weyatl Jordán, kan otlakuateekiaya in Juan Tlakuateekij, iwan ompa omokaj. ⁴¹ Miekej tlakaj oyajkej inawak, iwan okijoayaj:

—Maski in Juan mach okichij itlaj milagro, nochi tlan okijtoj de yin Jesús ya nele melawak.

⁴² Iwan miekej otlaneltokakej inawak Jesús itech yon lugar.

11

Imikilis in Lázaro

¹ Oyeka se tlakatl katlej omokokoaya itoka Lázaro, katlej ochantia iwan iknawan María iwan Marta itech pueblo de Betania. ² Yon María, ikni in Lázaro, yen katlej okiteekilij ajwiakayotl in toSeñor itech ikxiwan iwan okinwajwachilij ika itzonkal. ³ Ijkón kiné, María iwan Marta otlatitlankej ma kilwitij in Jesús:

—Señor, moamigo Lázaro chikawak mokokoa.

⁴ Nijuak okikakke in Jesús okijtoj:

—Yon kokolistle mach kimiktis, sino ika moteititis iweyik-ixtilis in Dios. Iwan ika yon kokolistle noijki ika moteititis noweyikixtilis Nej katlej niiKone in Dios.

⁵ Jesús sa tekitl okintlasojtlaya in Marta, in María iwan Lázaro, ⁶ iwan maski okilwijkej nik in Lázaro chikawak mokokoa, Yej ok omokaj ome tonale kan oyeka. ⁷ Satepan okimilwij imomachtijkawan:

—Ma tiwian oksemi itech estado de Judea.

⁸ Imomachtijkawan okilwijkej:

—Tlamachtij, mach ya wejkika ompa in judiojtin okinekiaj mitzmiktianij ika tetl, ¿iwan oksemi tikneki tias ompa?

⁹ Jesús okinmilwij:

—¿Amo kipia in tonale majtlakte iwan ome ora? Tla se nemis nijuak tlanestok, mach se motepotlamis porke tlanestok. ¹⁰ Pero tla se nemis nijuak tlatleyua, welis se motepotlamis porke mach tlanestok.

¹¹ Satepan Jesús okinmilwij:

—In tokni Lázaro kochtok, iwan Nej nikijxitis.

¹² Imomachtijkawan okilwijkej:

—Señor, tla san kochtok, kijtosneki pajtis.

¹³ Pero Jesús ijkón okijoj porke in Lázaro yomikke, iwan imomachtijkawan okiyejyekojkej san kochi. ¹⁴ Ijkuakón Jesús okinyekilwij:

—In Lázaro yomikke. ¹⁵ Nipaki porke mach ompa onieka. Nipaki porke yon se kuale para amejwan para okachi xit-laneltokakan. Axan ma tiwian ma tikitati.

¹⁶ Ijkuakón in Tomás, katlej kitokayotiaj Kuatejtzin, okin-milwij in oksekimej momachtijkej:

—Tejwan noijki ma tiwian, para ma timikikan san sekan iwan Jesús.

Jesús Yej teyolitia iwan Yej kitemaka nemilistle

¹⁷ Nijuak in Jesús oajsito Betania, okimatiltijkej nik in Lázaro ya kipia nawi tonale de toktok. ¹⁸ Betania oyeka serka de Jerusalén, san kanaj eyi kilómetro de wejka. ¹⁹ Iwan miekej judiojtin oyajkej otetlajpalotoj ichan Marta iwan María, para kinyolojchikawaskej por omikke in Lázaro. ²⁰ Nijuak in Marta okimatke nik in Jesús ya ompa witz, okiske okinamiktiaj, pero in María omokaj kalijtik. ²¹ Marta okilwij in Jesús:

—Señor, tla nian tieni, nokni mach mikini. ²² Pero nej nikmati nik in Dios mitzmakas nochti tlan tiktajtlanilis.

²³ Jesús okinankilij:

—Mokni moyolkuis (moyolitis).

²⁴ Marta okilwij:

—Ya nikmati nik moyolkuis nijuak nochtin in mikkamej moyolkuiskej nijuak sa iyakatlanka tonale.

²⁵ Toneses in Jesús okilwij:

—Nej nikinyolitis in mikkamej iwan Nej nikinmakas nemilistle. Akin nechneltoka, maski mikis, moyolkuis iwan kipias nemilistle katlej mach keman tlamic. ²⁶ Iwan nochtin katlej ok yolitekej iwan nechneltokaj, mach keman mikiskej. ¿Tikneltoka tlan nimitzilwia?

²⁷ Marta okilwij:

—Nikneltoka, Señor. Nikneltoka nik tejwatzin tiCristo, titeKone de Dios. Yen tejwatzin katlej tejwan otikchiayaj ma wiki ixko yin tlaltikpak.

Jesús ochokak

²⁸ Satepan de ijkón okijtoj in Marta, oyáj okinotzato in María katlej ikni, iwan okilwij ichtaka:

—In Tlamachtij nian kajki iwan mitznotza.

²⁹ Nijuak ijkón okikakke in María, omoketewak iwan oyáj okitato in Jesús. ³⁰ Jesús ayamo okalakia itech pueblo, ok oyeka kan Marta okinamikke. ³¹ In judiojtin katlej oyekaj kalijtik katlej okiyolosewijtokaj in María, nijuak okitakej in María omoketewak iwan okistewak, yejwan noijki okikistewakej iwan oyajkej ikuitlapan. Yejwan okiyejyekojkej yawi chokatij kan toktok in Lázaro.

³² Nijuak in María oajsito kan oyeka in Jesús, omotlankuaketzke ikxitlan, iwan okilwij:

—Señor, tla nian tieni, nokni mach mikini.

³³ Jesús okitak in María sa tekitl choka iwan noijki okinmitak in judiojtin noijki chokaj katlej ovalayaj ikuitlapan. Ikuakón Jesús sa tekitl omoyolkokoj iwan oyoltolinke. ³⁴ Iwan okintlajtlanij:

—¿Kan nankitookakej?

Yejwan okilwijkej:

—Xiwiki xikitaki, Señor.

³⁵ Iwan Jesús ochokak. ³⁶ Ikuakón in judiojtin okijtojkej:

—Xikitakan sa tekitl okitlasoxtlaya.

³⁷ Iwan sekimej de yejwan okijtoayaj:

—Yin Jesús katlej okitlachialtij in tlakatl katlej mach otlachiaya, ¿amo owelik itlaj okichij para amo ma miki in Lázaro?

Jesús okiyolitij in Lázaro

³⁸ Jesús oksemi omoyolkokoj iwan omikuaniij kan toktok in Lázaro. Oyeka ijtk se mikkakuyoktle, okamatzaktoka ika se tetl patlaktik. ³⁹ Iwan Jesús okijtoj:

—Xikikuaniikan in tetl.

Marta ikni in mikkatl, okilwij in Jesús:

—Señor, yotzojyayak, porke yakipia nawi tonale de omikke.

⁴⁰ Jesús okinankilij:

—¿Amo onimitzilwij tla tikneltokas, tikitas imawisotlanex in Dios?

⁴¹ Ikuakón okikuaniijkej in tetl. Jesús oajkopantlachixke, iwan okijtoj:

—Papan, nimitztlasojkamachilia porke tinechkaki. ⁴² Nej nikmati nik nochipa tinechkaki, iwan ijkín nikijta para ke

in tlakaj katlej nian katej ma kineltokakan nik tejwatzin otinechhwaltitlanke.

⁴³ Níjkuak otlanke ijkón okijtoj, ikuakón okijtoj chikawak:
—¡Lázaro, xiwalkisa!

⁴⁴ Iwan Lázaro katlej omikka okiske kikimilitiwitz ika tzotzole itech ikxiwan iwan itech imawan, iwan ixkikimilitiwitz ika se tzotzole kej payoj. Iwan Jesús okinmilwij:

—Xiktotomakan iwan xikkawakan ma wia.

Okitemojej kenik kimiktiskej in Jesús

(Mt. 26:1-5; Mr. 14:1-2; Lc. 22:1-2)

⁴⁵ Ijkuakón otlaneltokakej inawak Jesús miekej judiojtin katlej otetlajpalotoj inawak María porke okitakej tlan Jesús okichij. ⁴⁶ Pero sekimej de yejwan oyajkej okinmitatoj in fariseos, okinmilwitoj tlan Jesús okichij. ⁴⁷ Ijkuakón in fariseos iwan in tlayekankej tiopixkej omololojkej iwan omotlapowijkej, okijtojkej:

—¿Tlan tikchiwaskej? Yin tlakatl kinchiwa miekej milagrostín. ⁴⁸ Tla tikkawiliskej ijkón ma kichiwa, nochtin tlaneltokaskej inawak, iwan tekiwajkej romanostin witzej iwan kixitiniskej in toweyi tiapan katlej tlatiochiwaloj, iwan kimoaaxkatiskej in topaís.

⁴⁹ Pero se de yejwan katlej itoka Caifás, katlej oyeka weyi tiopixke itech yon xiwitl, okinmilwij:

—Namejwan mach itlaj ankimati. ⁵⁰ Nion mach ankimomakaj kuenta nik okachi kuale para tejwan ma miki se tlakatl por nochtin in tlakaj, ke ma timikikan tinochtin tejwan tjudiojtin.

⁵¹ Pero tlan okijtoj in Caifás mach okiske de yej itlayejeekolis, sino como oyeka weyi tiopixke itech yon xiwitl, Dios okitlajtoltij in Caifás nik in Jesús mikis por yen judiojtin. ⁵² Iwan amo mikis san por yen judiojtin, sino noijki mikis para kinmololos nochtin ikonewan Dios katlej xintokej ixko nochí in tlaltikpak. ⁵³ Desde yon tonale in tekiwajkej judiojtin opéj kitemoaj kenik kimiktiskej in Jesús.

⁵⁴ Por yonik in Jesús mach ok omonextiaya inmixpan in judiojtin. Sino okiske de itech yon régión de Judea iwan oyáj itech se pueblo itoka Efraín, katlej kajki serka kan tlawaki. Iwan ompa omokaj iwan imomachtijkawan.

⁵⁵ Opoliwiwa sa kanaj keski tonale para ajsiki imilwiw in judiojtin katlej itoka pascua. Miekej tlakaj de miekej pueblojtin yowalajtokaj Jerusalén para mochipawaskej de intlajtlakol antes de pewas yon ilwítl de pascua. ⁵⁶ Ijkuakón okitemoayaj in Jesús, iwan níjkuak yoyekaj nochtin itech weyi tiapan omotlajtlaniayaj:

—¿Tlan ankiyejyekoaj? ¿Kox witz ilwítl in Jesús, o noso amo?

⁵⁷ In fariseos iwan in tlayekankej tiopixkej otlanawatijkej tla akaj kimatis kanin kajki in Jesús, ma kinmatilti, para kikitzkiskej.

12

*María okinokilij ajwiakayotl in Jesús ipan ikxiwan
(Mt. 26:6-13; Mr. 14:3-9)*

¹ Chikuasen tonale antes de yen ilwitr de pascua, Jesús oyáj itech pueblo de Betania, kan chanti in Lázaro katlej Jesús okiyolitij. ² Ompa okichiwilijkej se tlakuale in Jesús. Marta okinserbiroaya, iwan Lázaro noiiki ompa oewatoka inakastlan Jesús otakuajtokaj ipan mesa. ³ María okiwalkuik kej tlajko litro de ajwiakayotl de nardo, katlej sa tekitl patíoj, iwan okinokilij ipan ikxiwan in Jesús. Satepan okikxiwjatzke ika itzonkal, iwan nochi in kalijtik otlaajwiayak ika in ajwiakayotl. ⁴ Ijkuakón itelpoch in Simón itoka Judas Iscariote, katlej oyeka se de yen imomachtijkaw in Jesús, iwan katlej okitemaktij (okitemaktij) satepan, okijtoj:

⁵ —¿Tlanik amo omonamakak yin ajwiakayotl? Porke yin ajwiakayotl ipatij ken tlan kitlani se tlakatl katlej tlapalewia de se xiwitl, iwan se kinmakani in tomin katlej pobrestin.

⁶ Judas ijkón okijtoj mach por melawak okinmiknomatia in pobrestin, sino porke oyeka ichtekke. Judas oyeka tesorero de nochtin imomachtijkawan in Jesús, iwan okichtekia yon tomin katlej okitkitinemia. ⁷ Iwan Jesús okilwij:

—Xikkawa. Porke yin tlan kichiwa, yen para nekáj tonale nijuak nechtookaskej. ⁸ In pobrestin nochipa ankinpiaskej, pero Nej mach nochipa annechpiaskej.

In judiojtin okitemoayaj kenik kimiktiskej in Lázaro

⁹ Miekej judiojtin okimatkej nik in Jesús oyeka itech pueblo de Betania, iwan oyajkej ompa, amo san para kitaskej in Jesús sino noiiki para kitaskej in Lázaro. ¹⁰ In tlayekankej tiopixkej okijtojkej kimiktiskej in Lázaro noiiki. ¹¹ Porke por yen Lázaro miekej judiojtin okikajkej tlan achtoj okineltokayah iwan opéj tlaneltokaj inawak Jesús.

*Jesús okalakke itech weyikan de Jerusalén
(Mt. 21:1-11; Mr. 11:1-11; Lc. 19:28-40)*

¹² Owalmostlatik, nijuak okimatkej nik in Jesús yowalaya para Jerusalén, ijkuakón miekej tlakaj owalajkej ilwitr. ¹³ Okimatejtekej sekin soyatl iwan okiskej okinamikitoj in Jesús, iwan otzajtziaj chikawak:

—¡Hosana! ¡Ma Dios kitiochiwa katlej okiwaltitlanke para tlanawatis! ¡Ma Dios kitiochiwa in Rey de Israel!

¹⁴ Jesú okajsk se burro iwan ipan otlejkok, ijkón ken kijta in tiotlajkuilole:

¹⁵ Amo ximomawtikan, tlakaj de Sión.

Xikitakan namoRey ya walmuika.

Yetiwitz ipan se burro.

¹⁶ Itech yon tonale imomachtijkawan mach okimomakakej kuenta tlan kijtosneki yon tlamantle tlan otlamochij. Pero satepan nijuak in Jesú oyáj ilwikak, okelnamikej ke nochí yon yokatka ikuilitok itech tiotlajkuilole kan otlapoaya de yen Jesú, iwan ijkón otlapanok.

¹⁷ In tlakaj katlej oyekaj iwan Jesú iwan okitakej nijuak okitzajtzili in Lázaro de kan imikkakuyok iwan okiyolitij oksemi satepan de omikke, otetlapowiayaj de tlan okitakej otlapanok. ¹⁸ Por yonik, in tlakaj okiskej okinamikitoj in Jesú, porke okimatkej okichij se weyi milagro. ¹⁹ Pero in fariseos okimolwiayaj entre yejwan:

—Xikitakan, nochtin in tlakaj yawij inawak iwan tejwan mach itlaj tiwelij tikchiwaj.

Sekimej griegojin okitemojkej in Jesú

²⁰ Itech yon ilwtl de pascua noijki ompa oyekaj sekimej griegojin katlej noijki oyajkej okiweyikixtitoj in toTajzin Dios. ²¹ Yonmej griegojin omijkuanijkej inawak Felipe katlej oyeka de pueblo de Betsaida de estado de Galilea. Iwan okilwijkej:

—Señor, tiknekij tikitaskej in Jesú.

²² Toneses in Felipe oyáj okilwito in Andrés tlan okilwijkej. Iwan satepan san sekan oyajkej okilwitoj in Jesú. ²³ Ijkuakón Jesú okinmilwij:

—Yoajsiko in tonale nijuak in Nej katlej onimochij nitlakatl nechweyikixtiskej. ²⁴ Ipan melajka namechilwia, tla se semiya amo se kitookas, nochipa yetos san ijkón se semiya. Pero tla se kitookas kitemakas miek semiya. ²⁵ Akin amo kitemakas inemilis nonawak, kipolos nijuak mikis. Iwan akin kitemakas inemilis nonawak ixko yin tlaltikpak, mach kipolos, sino kipias nemilistle katlej mach keman tlamis. ²⁶ Tla akaj kineki nechtekipanos, moneki nowan ma wiki. Iwan kan Nej nietos, ompa yetos noijki notekipanoj. Tla akaj nechtekipanos, noPapan kiweyikixtis.

Jesú okitematiltij imikilis

²⁷ 'Axan sa tekitl nimoyolkokoa. ¿Iwan tlan nikijtos? Mach welis nikijtos: "Papan, xinechmakixti de itech yin tekoko-jkayotl katlej axan ya nipanotok." Mach welis ijkón nikijtos, porke por yonik oniwalaj.

²⁸ Satepan Jesú okilwij iPapan:

—Papan, xikweyikixti motoka.

Iwan ikuakón omokakke se tlajtole de ilwikak, okilwij in Jesús:

—Yonikweyikixtij iwan oksemi nikweyikixtis.

²⁹ In tlakaj katlej ompa oyekaj, nikuak okikakej in yon tlajtole, okijtojkej okikakej se tlatikuinalistle. Iwan oksekimej okijtoayaj:

—Se ángel okinotzke.

³⁰ Jesús okinmilwij:

—Yon tlajtole katlej omokakke mach omokakke para yen Nej ma nikkaki, sino omokakke para yen namejwan xikkakikan. ³¹ Axan yoajsiko tonale para Dios kinmixkomakas (kintzonmanas) katlej mach nechneltokaj, iwan mach ok tlanawatis in Amo Kuale Tlakatl ixko yin tlaltikpak. ³² Iwan nikuak nechmajmasoltiskej itech krus nian ixko yin tlaltikpak, nikinyoltilanas nochtin in tlakaj para ma wikikan nonawak.

³³ Ijkón okijtoj para ma kimomakakan kuenta kenik mikis.

³⁴ Iwan tlakaj okinankilijkej:

—In tiotlajkuilole techilwia nik in Cristo yolitos iktlanke (ik tlami). ¿Kenik in Tej tikijta ke katlej omochij tlakatl kipiloskej itech krus para ma miki? ¿Akin yon omochij tlakatl?

³⁵ Jesús okinmilwij:

—Sa kanaj keski tonale nietos amowan Nej katlej nikintlawilia in tlakaj ipan inyolo. Xinechneltokakan axan mientras anwelij para amo ximopolokan iktlanke (ik tlami). In tlakaj katlej mach kinekij ma nikintlawili, nemij ijlik tlaleyualotl iwan mach kimomakaj kuenta kox mopoloskej. ³⁶ Nej nikaj kej nitlanextle. Xikneltokakan notlajtol katlej namechmatiltia nik Nej namechnotza, iwan anyeskej annokonewan iwan Nej namechtlawilis ipan namoyolo.

Nikuak in Jesús otlanke ijkón okijtoj, oyáj de ompa iwan okinmonetlatilij.

In judiojin mach okineltokakej

³⁷ Maski Jesús okinchiwaya miekej wejweyin milagrostín inmixpan nochtin tlakaj, mach nochtin otlaneltokayah inawak. ³⁸ Ijkón otlamochij para ma mochiwa tlan okikuiloj in profeta Isaías:

Señor, mach miekej kineltokaj tlan tejwan tikinmatiltiaj de tejwatzin.

Mach akaj kimomaka kuenta kox welis tikmakixtis ika mopoder.

³⁹ Ijkón kiné, mach oweliaj okineltokayah, iwan in Isaías noijki okikuiloj:

40 Dios okintoktij amo ma tlachiakan iwan ma yoltlakuawakan,
 para amo ma yektlachiakan ika inmixtololowan,
 iwan amo ma kimomakakan kuenta ika inyolo,
 iwan amo ma moyolkuepakan,
 iwan ijkón amo nikinpajtis.

41 Isaías ijkón okijtoj porke okitak iweyikixtilis in Jesús, iwan otlajtoj de Yej.

42 Iwan miekej judiojtin otlaneltokakej inawak Jesús, asta intekiwajkawan noijki otlaneltokakej, pero mach akaj otlapoaya de yon, porke okinmiimakasaj in fariseos, porke mach okinekiaj ma kinkixtikan iktlanke (ik tlami) de itech intiopan. 43 Yejwan okinekiaj mokawaskej kuale inwan tlakaj maski amo ma mokawakan kuale iwan Dios.

Itlajtol in Jesús kintlajtlakoltis in tlakaj

44 Iwan Jesús okijtoj chikawak:

—Akin nechneltoka, amo san Nej nechneltoka, sino noijki kineltoka in noPapan katlej onechwaltitlanke. 45 Iwan akin nechita, kita noijki katlej onechwaltitlanke. 46 Nej oniwalaj ixko yin tlaltikpak kej se tlanextle. Iwan nikintlawilia ipan inyolo nochtin akinmej nechneltokaj, iwan mach keman yeskej ijistik tlatalyualotl. 47 Pero akin kikaki notlajtol iwan amo kineltoka, mach yen Nej niktlajtlakoltis. Porke Nej mach oniwalaj para nikintlajtlakoltis in tlaltikpaktlakaj, Nej oniwalaj para nikinmakixtis. 48 Akin amo nechneki iwan amo kineki kikakis notlajtol, onkaj akin kitlajtlakoltis. Kijtosneki yen tlajtole katlej Nej nikijta, yen yon kitlajtlakoltis itech nekáj sa iyakatlanka tonale. 49 Porke Nej mach nikijta san tlan Nej nikyejyekoa. NoPapan katlej onechwaltitlanke, Yej onechnawatij tlanon moneki nikijtos iwan tlanon moneki nitlamachtis. 50 Iwan nikmati ke tlan noPapan onechnawatij ma namechilwi, kitemaka nemilistle katlej mach keman tlamis. Ijkón kiné, tlan Nej nikijta, nikijta ijkón ken Yej onechnawatij.

13

Jesús okinmikxipajpakke imomachtijkawan

1 Sa se tonale opoliwia para ilwitl de pascua. Iwan Jesús yokimatisa nik yoajsiko in tonale para kikajtewas yin tlaltikpak iwan yas inawak iPapan. Yej nochipa okintlasojtlak imomachtijkawan katlej Iwan oyekaj ixko yin tlaltikpak. Iwan sa tekitl okintlasojtlak asta omotemakak ma kimiktikan por yejwan.

2 Nijuak in Jesús otlakuajtoka inwan imomachtijkawan, ikuakón in diablo okalakke ipan iyolo in Judas Iscariote, itelpoch in Simón, para ma kitemakti (ma kitemaktili) in

Jesús. ³ Jesús yokimatisa nik iPapan yokimaktilij nochí tlaman-tle imak, iwan nik in Yej ovalaj de Dios, iwan nik oksemi mokuepas inawak. ⁴ Jesús omoketzke de kan otlakuajtokaj, okikixtij itlaken iwan omotlajkoipij ika se tzotzole. ⁵ Satepan okitlalij atl ijtk se ajpatzintle, iwan opéj kinmikxipaka iwan satepan opéj kinmikxiwajwatza ika se tzotzole katlej ika omotlajkoipijka.

⁶ Níjkuak okitokaroto kiikxipakas in Simón Pedro, okilwij:
—Señor, ¿tejwatzin tinechikxipakas?

⁷ Jesús okinankilij:

—Axan mach tigmomaka kuenta tlanik ijkón nikchiwa, pero satepan tigmomakas kuenta.

⁸ Pedro okilwij:

—Nej mach semi tinechikxipakas.

Iwan Jesús okilwij:

—Tla amo nimitzikxipakas, mach nowan tipowis.

⁹ Simón Pedro okinankilij:

—Tla ijkón, Señor, amo san nokxiwan xikinpaka, sino noijki xikinpaka nomawan iwan notzontekon.

¹⁰ Ijkuakón Jesús okilwij:

—Akin yomaltij, moneki sa yen ikxiwan kinpakas porke ya kajki nochí chipawak. Iwan namejwan ya ankatej anchipawakej maski mach aminochtin.

¹¹ Jesús yokimatisa akin kitemaktis (kitemaktilis), iwan por yonik okijtoj: “Mach aminochtin anchipawakej.” ¹² Satepan de ijkuak otlanke okinmikxipajpakke, Jesús oksemi okonakij itlaken, iwan omotlalij oksemi itech mesa iwan okinmilwij:

—¿Ankimomakakej kuenta tlanik ijkón onikchij?

¹³ Namejwan annechnotzaj Tlamachtij iwan annechnotzaj Señor. Iwan yon kuale tlan ankijtaj porke melawak. ¹⁴ Pues tla Nej niSeñor iwan niTlamachtij onamechikxipakke, namejwan no ijkón moneki xikchiwakan se iwan oksé.

¹⁵ Nej namechmaka se ejemplo para namejwan no ijkón xikchiwakan ken Nej onikchij. ¹⁶ Ipan melajka namechilwia, se katlej san tekipanoj mach weli mochiwa okachi weyi ken iteko, nion se tlatitlanile mach weli mochiwa okachi weyi ken katlej tlatitlani. ¹⁷ Tla ankimomakaj kuenta iwan ankichiwaj yin tlamantle tlan namechilwia, tonses xipakikan.

¹⁸ Tlan nikijta amo nikijta para aminochtin. Nej nikmati akinmej onikinpejpenke. Iwan kipia de mochiwas tlan kijta in tiotlajkuilole: “Akin nowan tlakua, omokuepke nokcontra.” ¹⁹ Desde axan namechilwia maski ayamo tlapanoa, para ke níjkuak tlapanos, xikneltokakan nik yen Nej niCristo katlej namejwan ankichiayaj ma wiki. ²⁰ Ipan melajka

namechilwia, tla akaj de amejwan amechresibiroa kej notlatitlanil, kijtosneki Nej nechresibiroa. Akin Nej nechresibiroa, kijtosneki kiresibiroa noiжи akin onechwaltitanke.

Jesús okijtoj nik yen Judas kitemaktis (kitemaktilis)

(Mt. 26:20-25; Mr. 14:17-21; Lc. 22:21-23)

²¹ Satepan de ikuak ijkón okijtoj, Jesús sa tekitl omoyolkokoj, iwan okinyekilwij:

—Ipan melajka namechilwia, nik se de amejwan nechtemaktis (nechtemaktilis).

²² Ikuakón imomachtijkawan opéj motlajtlataj se iwan oksé, porke mach okimatiaj akin ijkón kichiwas. ²³ Se de yejwan katlej Jesús sa tekitl okitlasojaxtlaya, oyeka inakastlan otakuajtoka, ²⁴ in Simón Pedro okichiwilij señas para ma kitlajtlani in Jesús akin ijkón kichiwas katlej kitemaktis. ²⁵ Yej omijkuanij okachi asta ik ielpan in Jesús, iwan okitlajtlani:

—Señor, ¿akin ijkón kichiwas?

²⁶ Jesús okinankilij:

—Nikajakis se pedaso pan, iwan akin Nej nikmakas, yen yon.

Ikuakón okajakij se pedaso pan iwan okimakak in Judas Iscariote, itelpoch in Simón. ²⁷ Iwan niman nijuak Judas okikuaj in pan, in Satanás okalakke ipan iyolo. Iwan Jesús okilwij:

—Tlan tikyejyekojtok tikchiwas, xikchijtiwetzi san niman.

²⁸ Iwan nion se de yejwan katlej otakuajtokaj itech mesa mach okimomakakej kuenta por tlanik ijkón okilwij. ²⁹ Komo in Judas oyeka tesorero, sekimej okiyejyekojkej xamo in Jesús okilwij ma wia ma kikowati itlaj para yen ilwitl, o noso itlaj ma kinmaka in pobrestin.

³⁰ Nijuak in Judas otlanke okikuaj in pan, niman okiske. Iwan ikuakón oyeka ya yuak.

Se yankuik tlanawatile

³¹ Satepan de ikuak in Judas okiske, in Jesús okijtoj:

—Axan moteitis noweyikixtilis de Nej katlej onimochij nitlakatl, iwan moteitis iweyikixtilis in Dios itech tlan Nej nikchiwas. ³² Iwan tla Nej katlej onimochij nitlakatl nikteitis iweyikixtilis in Dios, in Dios noiжи kiteitis noweyikixtilis. Iwan kichiwas san niman. ³³ Nokonewan, mach ok wejkika amowan nietos. Namejwan annechtemoskej, iwan ijkón ken onikinmilwij in oksekimej judiojin, no ijkón axan namejwan namechilwia: Mach welis anyaskej kan Nej niawi. ³⁴ Nej namechmaka yin yankuik tlanawatile: Ximotlasoxtlakan se iwan oksé. Ijkón ken Nej namechtlasojtla, namejwan no ijkón

ximotlaso tlakan se iwan oksé.³⁵ Tla namejwan amotlaso jt-laskej se iwan oksé, nochtin in tlakaj kimomakaskej kuenta nik melawak namejwan annomomachtijkawan.

*Pedro okijtoj mach kixmati in Jesús
(Mt. 26:31-35; Mr. 14:27-31; Lc. 22:31-34)*

³⁶ Simón Pedro okitlajtlanij in Jesús:

—Señor, ¿kanin timuikas?

Jesús okinankilij:

—Kan Nej niawi, axan mach welis nowan tias, pero satepan welis nowan tias.

³⁷ Pedro okilwij:

—Señor, ¿tlanik amo welis nimitzwikas? Nej asta welis nimotemakas ma nechmiktikan por tejwatzin.

³⁸ Jesús okinankilij:

—¿Ipan melajka tikneki timotemakas maski ma mitzmik-tikan por Nej? Ipan melajka nimitzilwia, antes de tzajtzis in kaxtil, tej ikuakón yotikijtoj eyi buelta mach tinechixmati.

14

Jesús yen ojtle para se yas inawak toTajtzin Dios

¹ 'Amo ximotlanemilitikan nion amo ximoyolkokokan. Xikneltokakan Dios iwan xinechneltokakan Nej noijki.
²⁻³ Ompa ilwikak kan kajki noPapan katej miekej kalmej, iwan Nej niawi nitlayektlaliti para amejwan. Nijuak nochí ya kuale yetos, ikuakón niwalmokuepas oksemi. Niwitz namechnotzaki para xiekan iktlanke (iktlami) kan Nej nietos. Iwan tla amo ijkón yeri, tonses Nej namechyekilwiani.
⁴ Namejwan ankimatij kan Nej niawi, iwan ankixmatij in ojtle.

⁵ Tomás okilwij in Jesús:

—Señor, mach tikmatij kan tiawi, ¿kenik tikmatiskej katlij yen ojtle?

⁶ Jesús okinankilij:

—Yen Nej niojtle, yen Nej nimelawak iwan yen Nej nine-milistle. Tla akaj amo nechneltoka, mach welis ajsis inawak noPapan.⁷ Tla amejwan ankimatini aken Nej, noijki ankimatini aken noPapan. Iwan desde axan ya ankixmatij, porke ya ankitakej.

⁸ Tones in Felipe okilwij:

—Señor, xitechkawili ma tikitakan moPapan, iwan ika yon tiyolopachiwiskej.

⁹ Jesús okinankilij:

—Yakipia miek tonale namowan nikaj, ¿iwan ayamo tinechixmati Felipe? Akin yonechitak, kijtosneki noijki yokitak in noPapan. ¿Kenik kiné in tej tikipta ma nanmechititi

in noPapan? ¹⁰ ¿Amo tikneltoka nik in Nej nikaj iwan noPapan iwan noPapan kajki nowan? Tlan Nej namechilwia mach nikijta san tlan Nej nikyejyekoa. NoPapan katlej kajki nowan, yen kichiwa in tekitl por medio de Nej. ¹¹ Xinechneltokakan nik Nej nikaj iwan noPapan iwan noPapan kajki nowan. Iwan tla amo ankineltokaj tlan namechilwia, xikinneltokakan siera notlatekipanolwan tlan Nej nikinchawa. ¹² Ipan melajka namechilwia, akin nechneltoka, noijki kinchiwas in tlatekipanoltin katlej Nej nikinchawa, iwan kinchiwas asta okachi wejweyin porke Nej niawi inawak noPapan. ¹³ Iwan nochi tlan ankitlajtlaniskej ika notoka, Nej nikchiwas, para ijkón ma kiweyikixtikan noPapan por medio de Nej niiKone. ¹⁴ Tla itlaj ankitlajtlaniskej ika notoka, Nej nikchiwas.

Jesús okijtoj techmakas iEspíritu Santo

¹⁵ 'Tla amejwan annechtlaosjtlaj, xikchiwakan tlan namechnawatia. ¹⁶ Iwan Nej niktlajtlanilis noPapan ma amechwaltitlanili oksé Teyolojchikaj, para ma yeto nochipa amowan, ¹⁷ Yen Espíritu Santo katlej kiteititia tlan melawak. In tlaltikpaktlakaj katlej mach noaxkawan, mach welis kipiaskej yon Espíritu porke mach kitaj iwan nion mach kixmatij. Pero namejwan ankixmatij, porke amowan kajki iwan nochipa amowan yetos.

¹⁸ 'Mach namechkawas amiknomej. Nej niwalmokuepas oksemi iwan nietos amowan. ¹⁹ Mach ok wejkika in tlaltikpaktlakaj mach ok nechitaskej. Pero namejwan annechitaskej. Nej niyolitok nochipa, iwan por yonik namejwan noijki anyolitoskej nochipa. ²⁰ Itech nekáj tonale namejwan ankimatiskej nik in Nej nikaj itech noPapan, iwan namejwan ankatej notech, iwan Nej nikaj amotech. ²¹ Akin kipia notlanawatil, iwan kichiwa, yon tlakatl nechtlasojtla. Iwan akin nechtlasojtla, noPapan kitlasojtla, iwan Nej noijki niktlasojtla iwan nimoteititis itech.

²² Ijkuakón oksé Judas (amo Judas Iscariote) okitlajtlanij:

—Señor, ¿tlanik timoteititis san towan iwan amo inwan tlaltikpaktlakaj?

²³ Jesús okinankilij:

—Akin nechtlasojtla, kichiwa tlan nikijta. Iwan noPapan kitlasojtla, iwan noPapan iwan Nej tiwitzej para timochantiskej ipan iyolo. ²⁴ Akin amo nechtlasojtla, mach kichiwa kuuenta tlan nikijta. Iwan in tlajtole katlej namejwan ankikakij mach noaxka, sino iaxka in noPapan katlej onech-waltitlanke.

²⁵ 'Namechilwia nochi yin tlamantle mientras ok nikaj amowan. ²⁶ Pero in Teyolojchikaj, yen Espíritu Santo katlej

noPapan kiwaltitlanis ika notoka, Yej amechmachtis nochí tlamantle. Iwan amechelnamiktis nochí tlamantle katlej Nej yonamechilwij.

²⁷ 'Namechkajtewilia yolosewilistle. Iwan noyolosewilis katlej namechmakas mach ken kitemakaj in tlaltikpaktlakaj. Amo xitlanemilikan nion amo ximomawtikan. ²⁸ Ya ankikakej nik yonamechilwij nik niawi, iwan oksemi niwitz para nietos amowan. Tla annechtlaosojtlanij ipan melajka, toneses anpakinij porke niawi inawak noPapan. Porke noPapan okachi weyikistok ke Nej. ²⁹ Axan kiné, yonamechilwij antes de tlapanos, para ke nijuak tlapanos xitlaneltokakan nonawak.

³⁰ 'Mach ok wejkika namechtlapowis, porke ompa witz in diablo katlej kinnawatia in tlaltikpaktlakaj. Maski yej mach welis itlaj nechtoktis. ³¹ Pero Nej nikchiwas tlan nechnawatia noPapan, para ijkón ma kimatikan in tlaltikpaktlakaj nik melawak niktlasojtlanij noPapan. Ximoketzakan. Ma tiwian de nian.

15

Jesús yen katlej melawak uvaskuawitl

¹ 'Yen Nej katlej melawak niuvaskuawitl iwan noPapan yen kitekipanoa in uvaskuawitl. ² Tla se nomayo amo tlaki, kitzonteki. Pero tla kuale tlaki, kichipawas para ma tlaki okachi. ³ Namejwan ya ankatej anchipawakej por yen tlajtole katlej Nej yonamechilwij. ⁴ Xiekan notech, iwan Nej nietos amotech. Se imayo in uvaskuawitl mach welis tlakis san iselti. Moneki tlakitzkijtos itech itlaktzonyo. Ijkón noiiki namejwan. Mach welis itlaj ankichiwaskej tla amo anyeskej notech.

⁵ 'Nej nikaj kej niuvaskuawitl, iwan namejwan ankatej kej annomamayowan. Akin tlakitzkijtos notech iwan Nej nitlakitzkijtos itech, kitemakas miek tlakilotl. Porke tla amo anyeskej notech mach welis itlaj ankichiwaskej. ⁶ Akin amo yetos notech, kitekiskej iwan kitlamotlaskej kalan kej se imayo in uvaskuawitl katlej mach kuale, iwan wakis. Satepan kololoskej iwan kitlamotlaskej ijlik titl para ma tlatla.

⁷ 'Tla namejwan nochipa anyeskej notech, iwan notlajtol yetos amotech, xiktlajtlanikan nochí tlan ankinekiskej, iwan Dios amechmakas. ⁸ Moweyikixtia noPapan nijuak namejwan ankitemakaj miek tlakilotl, iwan ijkón mota noiiki nik namejwan annomomachtijkawan. ⁹ Nej namechtlasojtlanij namejwan ijkón ken noPapan nechtlasojtlanij. Xiekan ika notlajtlanis katlej Nej ika namechtlasojtlanij. ¹⁰ Tla ankichiwaskej tlan Nej namechnawatia, anyeskej itech notlajtlanis. Ijkón

ken Nej noijki nikchiwa tlan nechnawatia noPapan iwan nikaj itech itlasojtlalis.

¹¹ 'Nej namechilwia nochí yin tlajtole para xipakikan ken Nej nipaki, iwan namopakilis ma momiekili. ¹² Yen yin tlan namechnawatia xikchiwakan: Ximotlasojtlakan ken Nej namechtlasojtla. ¹³ Akin kitemakas inemilis por yen iamigoswan kijtosneki sa tekitl kintlasojtla. ¹⁴ Tla amejwan ankichiwaskej tlan Nej namechnawatia, kijtosneki amejwan annoamigoswan. ¹⁵ Mach ok namechnotzas kej annotekipanojkawan, porke se katlej san tekipanoj mach kímati tlan kichiwa iteko. Nej namechnotzas annoamigoswan, porke yonamechmatiltij nochí tlan noPapan onechilwij. ¹⁶ Mach yen namejwan annechpejpenkej, sino yen Nej onamechpejpenke. Iwan namechmakatok namotekiw para xiwian kan namechtitlani. Nej nikneki namejwan nochipa xiktlakilijtokan miek tlakilotl. Iwan ijkón nochí tlan ankitlajtlaniliskej noPapan ika notoka, Yej amechmakas. ¹⁷ Tlan Nej namechnawatia xikchiwakan yen yin: Ximotlasojtlakan se iwan oksé.

In tlaltikpaktlakaj amechkokoliskej

¹⁸ 'Tla in tlaltikpaktlakaj amechkokoliaj, xikmatikan nik in Nej yonechkokolijkej okachi achtoj ke namejwan. ¹⁹ Tla namejwan noijki anyenij ken katej in antlaltikpaktlakaj, in tlaltikpaktlakaj amechtlasojtlanij ken yejwan motlasojtlaj. Pero Nej onamechpejpenke namejwan de itech yonmej tlaltikpaktlakaj, iwan por yonik yejwan amechkokoliaj porke mach ok inwan anpowij. ²⁰ Xikelnamikikan tlan onamechilwij: "Se katlej san tekipanoj mach weli mochiwa okachi weyi ken iteko." Tla Nej nechtlatlalochtiaj, namewan noijki amechtlatlalochtiskej. Iwan tla Nej onechkakilijkej, namejwan noijki amechkakiliskej. ²¹ Namejwan amechtoktiskej nochí yon tlamantle porke annechneltokaj, iwan porke yejwan mach kixmatij akin onechwaltitlanke.

²² 'Tla Nej amo niwalani, iwan nion amo nikintlapowiani, toneses mach kipianij tlajtlakole, pero axan mach itlaj kipiaj tlan kimotenwiskej komo para kijtoskej nik mach kipiaj tlajtlakole. ²³ Akin Nej nechkokolia, noijki kikokolia in noPapan. ²⁴ Tla Nej amo nikchiwani entre yejwan itlaj tlamantle katlej mach semi akaj weli kichiwa, toneses mach kipianij tlajtlakole. Pero miek tlamantle yokitakej yonikchij, iwan maski ijkón, techkokoliaj Nej iwan noPapan. ²⁵ Ijkón tlapanoa para ma mochiwa in tlajtole katlej kajki ijkuitilitok itech tiotlajkuilole katlej yejwan itech mokitzkaj: "Nechkokoliaj iwan nion mach onkaj tlan ika."

²⁶ 'Nej namechwaltitlanilis in Teyolojchikaj katlej witz de noPapan. In Teyolojchikaj yen Espíritu katlej melawak, katlej witz de inawak noPapan. Nijuak Yej witz, amechmatiltis de Nej. ²⁷ Iwan namejwan noiiki ankitematiltiskej de Nej porke namejwan anyekaj nowan desde ikuak opéj nitlamachtia.

16

¹ 'Namechilwia yin tlajtole para amo xikpolokan namot-laneltokalis. ² Namejwan amechkixtiskej iktlanke (ik tlami) de itech amotiopan, iwan ajsis tonale tla akaj amechmiktis kiyeyyekos ke ika yon kitekipanoa in Dios. ³ Ijkón kichiwaskej porke mach kixmatij noPapan iwan nion Nej mach nechix-matij. ⁴ Namechilwia nochi yin tlan tlapanos para ke nikuak ajsis ora, xikelnamikikan tlan Nej yonamechilwij.

Itekiw in Espíritu Santo

'Achtoj mach onamechilwij tlan axan namechilwia, porke onieka amowan. ⁵ Pero axan Nej niawi inawak noPapan katlej onechwaltitlanke. Iwan nion se de amejwan mach nechtlajtlania kan niawi. ⁶ Yej pewa anmoyolkokoaj por yonamechilwij yin tlajtole. ⁷ Pero Nej namechilwia tlan melawak, ke okachi kuale para namejwan ma niwia. Porke tla amo nias, in Teyolojchikaj mach witz para yetos amowan. Pero tla nias, Nej nikkualtitlanis. ⁸ Nikuak Yej witz, kin-matiltis in tlaltikpaktlakaj nik nemij itech tlajtlakole iwan nik moneki moyolkuepaskej, iwan kinmatiltis nik welis yeskej yolchipawakej inawak Dios, iwan nik in Dios noiiki kin-mixkomakas nochtin in tlaltikpaktlakaj. ⁹ In Teyolojchikaj kinmatiltis in tlaltikpaktlakaj nik in yejwan tlajtlakolchij-tokej porke mach tlaneltokaj nonawak. ¹⁰ Yej kinmatiltis nik in Nej melawak nikpia nonemilis chipawak inawak noPapan Dios, porke Nej nimokuepas kan kajki noPapan iwan mach ok annechitaskej. ¹¹ Iwan Yej kinmatiltis in tlaltikpaktlakaj nik in Dios kinmixkomakas (kintzonmanas) nochtin katlej kichiwaj tlan amo kuale, porke in diablo, katlej tlanawatia ixko yin tlaltikpak, yokitlajtlakoltijkej.

¹² 'Nikpia ok sekin tlajtole katlej nikneki namechilwis, pero axan mach welis ankimomakaskej kuenta. ¹³ Iwan nikuak witz in Espíritu katlej melawak, Yej amechyekanas itech nochi tlan melawak. Porke mach kijtos itlaj san tlan Yej kiyeyyekos, sino nochi tlan kikakis yen yon kijtos. Iwan amechmatiltis tlan satepan tlapanos. ¹⁴ Yej kichiwas in tlakaj ma nechweyikixtikan porke amechmachtis miek tlamantle de Nej. ¹⁵ Nochi tlan iaxka noPapan noiiki Nej noaxka. Por yonik onikijtoj nik amechmachtis miek tlamantle de Nej.

Neyolkokole mokuepas pakilistle

¹⁶ 'Mach ok wejkika namejwan mach ok annechitaskej, iwan mach wejkawas oksemi annechitaskej, porke Nej niawi inawak noPapan.

¹⁷ Ijkuakón sekimej de imomachtijkawan omotlajtlanijkej:

—¿Tlan kijtosneki yon tlan techilwia: “Mach ok wejkika namejwan mach ok annechitaskej, iwan mach wejkawas oksemi annechitaskej”, iwan tlan kijtosneki: “Porke Nej niawi inawak noPapan”? ¹⁸ ¿Tlan kijtosneki: “Mach ok wejkika”? Mach tkmomakaj kuenta tlan kijta.

¹⁹ Jesús okimomakak kuenta nik okinekiaj kitlajtlanianij, iwan okinmilwij:

—Nej yonamechilwij mach ok wejkika namejwan mach ok annechitaskej, iwan mach wejkawas oksemi annechitaskej. ¿Yen yon tlan namejwan anmotlajtlaniaj? ²⁰ Ipan melajka namechilwia, namejwan anchokaskej iwan anmoyolkokoskej, iwan in tlaltikpaktlakaj pakiskej. Pero maski namejwan anmoyolkokoskej, namoneyolkokolis mokuepas pakilstle. ²¹ Nijuak se siwatl ya kitlakatilis ikone, kikokoa itlalnakayo, porke yoajsiko iora para kitlakatilis ikone. Pero satepan de ijkuak yotlakatke ikone, mach ok kelnamiki kox okikokoj itlalnakayo, sino ya kipia pakilstle porke otlakatke se konetl ixko yin tlaltikpak. ²² Ijkón noijki namejwan, axan anmoyolkokoaj. Pero oksemi annechitaskej, iwan anpakiskej, iwan mach akaj welis amechkixtilis namopakilis.

²³ 'Itech nekáj tonale mach ok itlaj annechtajtlaniskej. Ipan melajka namechilwia, noPapan amechmakas nochitlan ankitlajtlaniliskej ika notoka. ²⁴ Asta axan, namejwan mach itlaj ankitlajtlanij ika notoka. Xiktlajtlanikan iwan ankiresibiroskej, para namopakilis ma momiekili.

Jesús okitlanke in Amo Kuale Tlakatl katlej tlanawatia ixko yin tlaltikpak

²⁵ 'Nej namechilwijtok yin tlajtote ika ejemplos. Pero ajsis tonale mach ok namechtlapowis ika ejemplos, sino namechtlapowis ika tlajtote katlej okachi mach owij para ankimo-makaskej kuenta de noPapan. ²⁶ Itech nekáj tonale, namejwan ankitlajtlaniliskej noPapan itlaj tlamantle ika notoka. Nej mach nikijta nik moneki niktlatlawtis noPapan por amejwan, ²⁷ porke noPapan yipa amechtlasojtla. Yej amechtlasojtla porke namejwan annechtla sojtlaj, iwan porke ankinel-tokaj nik in Nej oniwalaj de Dios. ²⁸ Oniwalaj de inawak noPapan iwan onajsiko ixko yin tlaltikpak. Iwan axan nikajtewa yin tlaltikpak para nimokuepas oksemi inawak noPapan.

²⁹ Ijkuakón imomachtijkawan okilwijkej:

—Axan ya titlapojtok ika tlajtote katlej okachi mach owij para tkmomakaj kuenta iwan mach ok titechtlapoawia ika

ejemplos. ³⁰ Axan tikmomakaj kuenta nik nochi tlamantle tikmati, iwan mach ok moneki akaj ma mitztlajtlani tlan kijtosneki motlamachtil. Por yonik tikneltokaj nik melawak otivalaj de Dios.

³¹ Jesús okinnankilij:

—¿Axan kemaj ankineltokaj? ³² Ya ajsi ora, iwan mach ok wejkawas, níjkuak namejwan anxixiniskej iwan kada se kitckis iojwi, iwan annechkawaskej noselti. Pero mach nikaj noselti, porke noPapan kajki nowan. ³³ Nochi yin namechilwia para xikpiakan yolosewilistle nonawak. Namejwan antlajyowiskej ixko yin tlaltikpak, pero ximoyolojchikawan, porke Nej yonitlatlanke itech nochi tlan onkaj ixko yin tlaltikpak.

17

Jesús omotiotzajtzili por yen imomachtijkawan

¹ Satepan de okijtoj yon tlajtole, Jesús oajkopantlachixke ik ilwikak, iwan okijtoj:

—Papan, yoajsiko ora. Xinechweyikixti Nej nimoKone, para ijkón Nej noijki nimitzweyikixtis tejwatzin. ² Porke tejwatzin otinechtalij ma nitlanawati itech nochtin in tlaltikpaktlakaj, para ma nikinmaka nemilstle katlej mach keman tlamic nochtin katlej yotinechinmakak. ³ Iwan nochtin katlej kipiaj yon nemilstle katlej mach keman tlamic, yomitzixmatkej iwan kimati j nik melawak tejwatzin tiDios, iwan mach onkaj oksé. Iwan noijki yonechixmatkej Nej niJesucristo katlej tejwatzin otinechhwaltitlanke.

⁴ 'Nej yonimitzwewyikixtij ixko yin tlaltikpak. Iwan yoniktlamij noteiw katlej otinechnawatij ma nikchiwa. ⁵ Axan kiné, Papan, xinechweyikixti monawak ika weyikixtilistle katlej mowan onikpiaya desde ikuak in tlaltikpak ayamo oyeka.

⁶ 'In tlakaj katlej otikinpejpenke de itech yinmej tlaltikpaktlakaj para otinechinmakak, yonikinmatiltij akin tejwatzin. Oyekaj moaxkawan, iwan tejwatzin otinechinmakak, iwan yejwan okineltokakej motlajtol. ⁷ Axan ya kimati j nik nochi tlamantle katlej otinechmakak witz de tejwatzin. ⁸ Porke nochi tlan tejwatzin otinechilwij, Nej yonikinmilwij, iwan yejwan okineltokakej. Yokimomakakej kuenta nik melawak oniwalaj de tejwatzin, iwan kineltokaj nik tejwatzin otinechhwaltitlanke.

⁹ 'Nej nimitztlatlawtia por yejwan. Mach nimitztlatlawtia por yen tlaltikpaktlakaj katlej mach nechneltokaj, sino nimitztlatlawtia por yejwan katlej otinechinmakak, porke

moaxkawan. ¹⁰ Nochi tlan noaxka noijski moaxka, iwan tlan moaxka noijski noaxka. Iwan yejwan nechweyikixtiaj.

¹¹ 'Nej mach ok nietos ixko yin tlaltikpak, porke ya niawi monawak, pero yejwan ok mokawaskej ixko yin tlaltikpak. Papan, tejwatzin tichipawak, tejwatzin xikinmonekuitlawi ika mopoder de yen motokatzin, para ma setitokan san se, ijkón ken tejwan tisetitokej san se. ¹² Nikuak Nej inwan onieka ixko yin tlaltikpak, Nej onikinmonekuitlawiaya ika mopoder katlej tejwatzin otinechinmakak. Nej onikinmonekuitlawij para amo ma mopolokan, iwan nion se de yejwan mach omopoloj, sino omopoloj san yen katlej yoyeka para mopolos, para ma mochiwa tlan kijta in tiotlajkuilole.

¹³ 'Axan Nej niawi monawak. Iwan nikijta yin tlajtole mientras ok nikaj ixko yin tlaltikpak, para ma kipiakan miek pakilstle ipan inyolo ijkón ken Nej nikpia. ¹⁴ Nej yonikinmakak motlajtol nomomachtijkawan, iwan in tlaltikpaktlakaj katlej mach mitzixmatij kinkokoliaj, porke nomomachtijkawan mach ok powij inwan tlaltikpaktlakaj ijkón ken Nej noijski mach nipowi inwan tlaltikpaktlakaj. ¹⁵ Mach nimitzlatlawtia xikinkixti de ixko yin tlaltikpak, sino xikinpalewi para amo ma kinkajkayawa in Amo Kuale Tlakatl. ¹⁶ Ijkón ken Nej mach nipowi inwan tlaltikpaktlakaj, yejwan noijski mach powij inwan tlaltikpaktlakaj. ¹⁷ Xikintlali ma yekan itech tlan melawak para ma mitztekipanokan san yen tejwatzin. Motlajtol yen yon melawak. ¹⁸ Ijkón ken tejwatzin otinechwaltitlanke nian kan katej in tlaltikpaktlakaj, Nej noijski nikintitlani kan katej in tlaltikpaktlakaj. ¹⁹ Nej nimotemaktia (nimotemaktilia) por yejwan para nikchiwas tlan tejwatzin tikneki, para ijkón yejwan noijski ma motemaktikan ma kichiwakan tlan tejwatzin tikneki por yen motlajtol katlej melawak.

²⁰ 'Amo nimitzlatlawtia san para nomomachtijkawan, sino noijski para nekatej katlej tlaneltokaskej nonawak nikuak kinkakiliskej intlajtol de nomomachtijkawan. ²¹ Nimitzlatlawtia nochtin yejwan ma setitokan san se. Ijkón ken tejwatzin, Papan, iwan Nej tisetitokej san se. Nimitzlatlawtia yejwan ma setitokan towan san se. Iwan ijkón in tlaltikpaktlakaj ma kineltokakan nik tejwatzin otinechwaltitlanke. ²² Yejwan yonikinmakak weyikixtilistle katlej tejwatzin otinechmakak, para ma setitokan san se, ijkón ken tejwatzin iwan Nej tisetitokej san se. ²³ Nej nietos intech iwan tejwatzin tietos notech para ijkón melawak ma setitokan san se. Iwan ijkón in tlaltikpaktlakaj ma kimomakakan kuenta nik tejwatzin

otinechwaltitlanke, iwan nik melawak tikintlasojtla ijkón ken tejwatzin tinechtlasojtla.

²⁴ 'Papan, nikneki ke katlej tejwatzin otinechinmakak noi-jiki ma yekan nowan kan Nej nietos, para ma kitakan nomaw-isotlanex katlej otinechmakak porke otinechtlasojtlak desde ikuak in tlaltikpak ayamo omochiwaya. ²⁵ Papan, tejwatzin tikuale tlakatl, in tlaltikpaktlakaj mach mitzixmatij. Pero Nej nimitzixmati, iwan yinmej katlej otinechinmakak yokimatkej nik tejwatzin otinechwaltitlanke. ²⁶ Nej yonikin-matiltij akin tejwatzin iwan ok nikinmatiltijtos. Nej nikneki yejwan ma motlasojtlakan ijkón ken tejwatzin tinechtlasojtla porke Nej nietos ipan inyolo.

18

Jesús okikitzkijkej

(Mt. 26:47-56; Mr. 14:43-50; Lc. 22:47-53)

¹ Nijuak Jesús otlanke okijtoj yon tlajtole, oyáj iwan imo-machtijkawan ik ne lado de yen barrankajtzin katlej itoka Cédron. Ompa oyeka se lugar tlatokkuawyoj, iwan ompa okalakke in Jesús iwan imomachtijkawan. ² Iwan Judas, katlej ikuakón ya yawi kitemaktiti (kitemaktilitij) in Jesús, okixmatia yon lugar. Porke miekpa ompa omololoayaj in Jesús iwan imomachtijkawan. ³ Ijuakón Judas ompa oajsito kinwika miekej soldadojtin iwan miekej mayoltin de yen tlayekanjej tiopixkej iwan de yen fariseos. Oajsitoj ompa ika kandil iwan ika okotl motlawilijtivej, iwan nochí intejetpos. ⁴ Pero komo in Jesús yokimatia nochí tlan panos, okiske okinnamikito iwan okintlajtlanij:

—¿Akin nankitemoaj?

⁵ Iwan yejwan okinankilijkej:

—Tiktemoaj in Jesús de Nazaret.

Iwan Jesús okijtoj:

—Yen Nej.

Noijklíjompá inwan owalaya in Judas katlej ikuakón yokitemaktijtoka (yokitemaktilitoka) in Jesús. ⁶ Nijuak in Jesús okinmilwij: "Yen Nej", oajketiajkej otepewitoj ipan tlale.

⁷ Jesús oksemi okintlajtlanij:

—¿Akin nankitemoaj?

Iwan yejwan oksemi okinankilijkej:

—Tiktemoaj in Jesús de Nazaret.

⁸ Jesús oksemi okinmilwij:

—Yonamechilwij nik yen Nej. Tla yen Nej nannechtemoaj, tonses xikinkawilikan ma wian in yinmej katlej nowan katej.

⁹ Ijkón okijtoj para ma mochiwa tlan achtoj okijtoj: "Katlej otinechinmakak, nion se de yejwan mach onikpoloj."

¹⁰ Ijkuakón Simón Pedro okipixtoka iespada, okikixtij iwan okinakastzontekke itech iyeknakas itekipanoj in weyi tiopixke. Katlej okinakastzontekej itoka Malco. ¹¹ Jesús okilwij in Pedro:

—Xikkalaki de kan otikkixtij moespada. In tekokojkayotl katlej noPapan yokitlalij ma nipano, moneki ijkón nipanos maski ma yeto sa tekitl tekokoj.

*Jesús okiwikakej inawak in weyi tiopixke itoka Anás
(Mt. 26:57-58; Mr. 14:53-54; Lc. 22:54)*

¹² In soldadojtin iwan koronel, iwan inmayolwan in judiojtin, okikitzkijkej in Jesús iwan okijilpijkej. ¹³ Iwan okiwikakej achtoj ichan Anás, porke Anás oyeka temontaj de yen Caifás, iwan Caifás oyeka weyi tiopixke itech yon xiwitl. ¹⁴ Yon Caifás yen katlej okachi achtoj okimilwinka in judiojtin ke okachi kuale ma miki se tlakatl por nochtin in tlakaj.

*Pedro okijtoj mach kixmati in Jesús
(Mt. 26:69-70; Mr. 14:66-68; Lc. 22:55-57)*

¹⁵ Simón Pedro iwan oksé imomachtijkaikni san de wejka okonitiayaj in Jesús. Oksé imomachtijkaikni kuale omixmata iwan weyi tiopixke Anás, por yonik okalakke iwan Jesús kan patio. ¹⁶ Pero in Pedro omokaj kalan itech puerta. Por yonik in oksé imomachtijkaikni katlej iwan omixmata in weyi tiopixke, okiske iwan omotlapowij iwan se tlapalewijkasiwatl de yen weyi tiopixke, para ma kikawili ma kalaki in Pedro. ¹⁷ In tlapalewijkasiwatl okitlajtlanij in Pedro:

—¿Amo tej noijki tiimomachtijkaw de nekáj tlakatl?

Pedro okinankilij:

—Nej amo.

¹⁸ Komo wel chikawak osewatoka, in tlapalewijkej iwan mayoltin okitlalijkej se tlilt iwan omototonijtokaj mokejketokej. Pedro noijki ompa inwan omoketoka omototonijtoka.

*In weyi tiopixke Anás okitlatzintokij in Jesús
(Mt. 26:59-66; Mr. 14:55-64; Lc. 22:66-71)*

¹⁹ In weyi tiopixke Anás opéj kitlatzintokia in Jesús de yen imomachtijkawan iwan de yen itlamachtil. ²⁰ Jesús okinankilij:

—Nej nochipa onitetlapowiaya inmixpan nochtin in tlakaj. Nochipa onitlamachtiaya itech amotiopianwan iwan itech in weyi tiopan kan mololoaj nochtin in judiojtin. Mach itlaj onikijtoj san ichtaka. ²¹ ¿Tlanik yen Nej tinechtlatzintokia? Xikintlatzintoki yejwan katlej onechkakej onikintlapowij. Yejwan kimati tlan onikijtoj.

²² Nijuak Jesús ijkón okijtoj, ijkuakón se de yen mayoltin katlej ompa oyeka, okikamatlatzinij in Jesús, iwan okilwij:

—¿Ijkón nik tiknankilia in weyi tiopixke?

²³ Jesúś okinankilij:

—Tla onikijtoj itlaj mach kuale, xinechilwi. Iwan tla kuale tlan Nej nikijta, ¿tlanik tinechmaga?

²⁴ Satepan Anás okititlanke in Jesúś inawak in weyi tiopixke Caifás. Jesúś ok oijilpitoka nikuak okititlankej inawak yon Caifás.

Pedro oksemi okijtoj mach kixmati in Jesúś

(Mt. 26:71-75; Mr. 14:69-72; Lc. 22:58-62)

²⁵ Pedro ok omoketoka mototonijtok, iwan okitlajtlanijkej:

—¿Amo tej noijki tiimomachtijkaw de nekáj tlakatl?

Pedro mach okimokuitij, iwan okijtoj:

—Amo, nej mach niimomachtijkaw.

²⁶ Ijkuakón se de yen itekipanoj in weyi tiopixke, ipariente in tlakatl katlej Pedro okinakastzontekke, okitlajtlanij:

—¿Amo yen tej onimitzitak iwan Jesúś kan tlatokkuawayo?

²⁷ Pedro oksemi mach okimokuitij, iwan san niman ikuakón otzajtzik in kaxtil.

Jesúś okiwikakej inawak Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Jesúś okikixtijkej de ichan Caifás iwan okiwikakej kan palacio kan ochantia in gobernador itoka Pilato. Iwan como yotlanestiwalaya, in judiojtin mach okinekej okalakej kan palacio para amo moyolsokiotiskej porke okinekiaj yeskej yolchipawakej para welis kikuaskej in tlakuale de pascua. Porke in judiojtin tla kalakiskej ichan se katlej mach judío, yejwan kijtaj ke moyolsokiotiaj. ²⁹ Por yonik, in Pilato okiske kalan kan yejwan oyekaj, iwan okinmilwíj:

—¿Tlan ika nankitilwiaj yin tlakatl?

³⁰ Yejwan otlanankilijkej:

—Tla yin tlakatl amo kichiwani itlaj tlan amo kuale, mach timitzmactilianij.

³¹ Pilato okinmilwij:

—Xikmowikilikan, iwan xikixkomakakan (xiktzon-manakan) namejwan ijkón ken kijta namotlanawatil.

Pero in judiojtin okilwijkej:

—Pero itlanawatil in César mach techkawilia in tejwan akaj ma tikmiktiikan.

³² Iwan ijkón omochij de tlan achtoj okijtoj in Jesúś de kenik mikis. ³³ Ijkuakón Pilato oksemi okalakke itech ipalacio, okinotzke in Jesúś iwan okilwij:

—¿Yen tej tiRey de judiojtin?

³⁴ Jesúś okilwij:

—¿Kisa de tej tinechtatlania kox niRey, o noso porke akaj oksé omitzilwij nik Nej niRey?

³⁵ Pilato okinankilij:

—Nej mach nijudío. Mojudiojikniwan iwan tlayekankej tiopixkej yejwan omitztemaktikoj (omitztemaktilikoj) nonawak. ¿Tlan otikchij?

³⁶ Jesús otlanankilij:

—Nej mach nitlanawatia nian ixko yin tlaltikpak. Tla ijkón yени, notekipanojkawan nechpalewianij para amo ma nechtemaktikan inmak in judiojtin. Pero Nej mach nitlanawatia nian ixko yin tlaltikpak.

³⁷ Ijkuakón Pilato okitlajtlanij:

—¿Toneses kijtosneki in Tej tiRey?

Jesús okinankilij:

—Yen Nej niRey ijkón ken tej yotikijtoj. Nej onitlakatke para nietos niRey iwan oniwalaj ixko yin tlaltikpak para niktematiltis tlan melawak. Nochtin katlej kineltokaj tlan melawak, nechkakij.

³⁸ Pilato okilwij:

—¿Iwan tlanon yon melawak?

Pilato okitemaktij (okitemaktilij) in Jesús ma kimiktikan itech krus

(Mt. 27:15-31; Mr. 15:6-20; Lc. 23:13-25)

Nijuak in Pilato ijkón okitlajtlanij, san niman okiske oksemi omotlapowito inwan judiojtin, iwan okinmilwij:

—Mach itlaj tlajtlakole nikkajxilia. ³⁹ Pero namejwan ankipiaj kostumbre de ma namechkajkawili se preso itech il-witl de pascua. ¿Ankinekij ma nikkajkawa in Rey de judiojtin?

⁴⁰ Ijkuakón nochtin otzajtzaikj oksemi, okijtojkej:

—¡Amo, amo xikajkawa yon tlakatl! ¡Xikajkawa yen Barrabás!

Iwan yon Barrabás oyeka ichtekke.

19

¹ Ijkuakón Pilato okikixtij in Jesús iwan otlanawatij ma kiwitikan ika chikote katlej kipia tepestle iyak.

² In soldadojtin okichijkej se korona de witztle iwan okikuonakiltijkej itech itzonmek, iwan okonakiltijkej se kapa chichiltikatlilmiktik. ³ Iwan omikuaniijkej inawak iwan okijoayaj:

—¡Viva in Rey de judiojtin!

Iwan okixtlajtlatziniayaj.

⁴ Pilato okiske oksemi, iwan okimilwij in judiojtin:

—Xikitakan, nian namechwalwikilia, para xikmomakakan kuuenta nik mach itlaj tlajtlakole nikkajxilia.

⁵ Jesús okiske kan patio kikuonakijtiwitz se korona de witztle iwan konakijtiwitz se kapa chichiltikatlilmiktik. Iwan Pilato okinmilwij:

—Xikitakan, nian kajki in tlakatl.

⁶ Nijuak okitakej in tlayekankej tiopixkej iwan mayoltin, otzajtzikej chikawak:

—¡Xikmajmasolti itech krus! ¡Ma miki!

Pilato okinmilwij:

—Amejwan xikwikakan iwan xikmajmasoltikan itech krus, porke nej mach itlaj tlajtlakole nikajxilia.

⁷ In judiojtin okinankilijkej:

—Tejwan tikpij se tlanawatile, iwan totlanawatil kijta ma miki in yon tlakatl, porke motenewa nik yen iKone in Dios.

⁸ Nijuak in Pilato ijkón okikakke, okachi omomawtij.

⁹ Oksemi okalakke itech ipalacio iwan okitlajtlanij in Jesús:

—¿Tej de kan otivalaj?

Pero in Jesús mach okinankilij. ¹⁰ Toneses in Pilato okilwij:

—¿Amo tinechnankilis? ¿Amo tikmati nik nej welis nitlanawatis para ma mitzmajmasoltikan itech krus, o noso welis nitlanawatis ma mitzkajkawakan?

¹¹ Jesús okinankilij:

—Mach itlaj welini tinechtoktiani ika motlanawatil, tla Dios amo kimonekiltiani. Por yonik, akin momak onechtemaktij (onechtemaktilij) okachi kipia weyi tlajtlakole ke tej.

¹² Desde ijkuakón in Pilato opéj kitemoa ken kichiwas para kikajkawas in Jesús. Pero in judiojtin otzajtziaj chikawak okijtoayaj:

—¡Tla tikkajkawas in yon tlakatl, mach tiamigo de yen toweli tlanawatij César! ¡Akin kineki motenewas kej rey, kijtosneki kikokolia in César!

¹³ Nijuak ijkón okikakke in Pilato, otlanawatij ma kwalkixtikan in Jesús, iwan Pilato omotlalij kan tlaixkomakaj (tlatzonmanaj), kan ika tlajtole hebreo kitokayotiaj Gabata, kijtosneki Piso de Tetl. ¹⁴ Yon tonale yotlayektlalijtokaj para yen walmostlatis ya ilwitz de pascua, iwan ijkuakón oyeka kej tlajko tonale. Ijkuakón Pilato okinmilwij in judiojtin:

—¡Nian kajki namoRey!

¹⁵ Pero yejwan otzajtzikej:

—¡Ma miki! ¡Ma miki! ¡Xikmajmasoltikan itech krus! ¡Ma miki!

Pilato okinmilwij:

—¿Ankinekj ma nikmajmasolti itech krus namoRey?

In tlayekankej tiopixkej okinankilijkej:

—¡Tejwan mach tikpij oksé rey, sino san yen César!

¹⁶ Ijkuakón Pilato okinmaktilij in Jesús para ma kimajmasoltikan itech krus, iwan yejwan okiwikakej.

Jesús okimajmasoltijkej itech krus

(Mt. 27:32-44; Mr. 15:21-32; Lc. 23:26-43)

¹⁷ Jesús okiske kikechpanojojiw ikrus asta kan kitokayotiaj Mikkatzontekomatl, katlej ika tlajtole hebreo itoka Gólgota. ¹⁸ Ompa okimajmasoltijkej itech krus, iwan noiiki ompa okinmajmasoltijkej ok omen tlakaj ik inajnakastlan. ¹⁹ Pilato okijkuij se letrero, iwan okitlalij ik ikuapak ikrus in Jesús. Ijkín okijoaya in letrero: “Jesús de Nazaret, Rey de yen judiojtin.” ²⁰ Miekej judiojtin okilerojkej yon letrero, porke kan okimajmasoltijkej in Jesús itech krus oyeka serka de yen weyikan de Jerusalén, iwan letrero oijkluitlota ika tlajtole hebreo, ika tlajtole griego iwan ika tlajtole latín. ²¹ Por yonik in tlayekankekéj tiopixkej judiojtin okilwijkej in Pilato:

—Amo xikikuilo, “Rey de yen judiojtin”; sino xikikuilo “In tlakatl katlej motenewa Rey de yen judiojtin.”

²² Pero in Pilato okinnankilij:

—Tlan yonikikuiloj, ijkón ma mokawa.

²³ Nijuak in soldadojtin okimajmasoltijkej in Jesús itech krus, okontilankej itzotzol in Jesús iwan okitoktijkej nawi pedaso iwan okimoxejxelilijkej entre nawin soldadojtin. Noiiji okontilankej itlaken katlej mach oyeka tlajtzomale iwan omotlantoka san se tzotzole desde tlikpak asta tlakxitlan. ²⁴ In soldadojtin okimolwijkej entre yejwan:

—Mach ma tiktzayanakan, okachi kuale ma timotlanikan, aber akin kitlanis.

Ijkón otlamochij ken kijta in tiotlajkuilole: “Okimoxejxelilijkej notzotzol, iwan omotlaankej ika notlaken.” Ijkón okichijkej in soldadojtin.

²⁵ Ixxitlan ikrus in Jesús oyekaj imaman, iknitzin imaman, isiwa in Cleofas iwan María de pueblo de Magdala. ²⁶ Nijuak in Jesús okitak ompa moketok imaman, iwan imomachtijkaw katlej sa tekitl okitlasoijtlaya, ikuakón okilwij imaman:

—Nanan, noan kajki mokone.

²⁷ Satepan okilwij imomachtijkaw:

—Noan kajki momaman.

Desde ikuakón imomachtijkaw okimonekuitlawij kej yeskia imaman.

Jesús omikke

(Mt. 27:45-56; Mr. 15:33-41; Lc. 23:44-49)

²⁸ Satepan de yon, como in Jesús yokimatiá nik nochí itekiw yotlanke, okijtoj para ma mochiwa tlan kijta in tiotlajkuilole:

—¡Namiki!

²⁹ Ompa oyeka se xoktzin otentoka de iayo uvas xokok. Okisiajkej se esponja ika yon iayo uvas katlej xokok, okiyakailpijkej itech se kuawitl de hisopo, iwan okiyaktilijkej itech iten.

³⁰ Nijuak in Jesús okonik yon iayo uvas xokok, okijtoj:

—Nochi noteikiw yoniktlamij.

Ijkuakón omotzonpiloj, okitemaktij (okitemaktilij) ianima iwan omikke.

Jesús okkestzopitijkej ika se kuawitl weyak yakateposoj itoka lanza

³¹ Se tonale antes de yen ilwitl de pascua, in judiojtin okijtojkej mach ma mokawakan in mikkamej itech inkrus nijuak weyi tonale, porke oyeka weyi ilwitl itech yon tonale. Por yonik in tlayekankej judiojtin okilwijkej in Pilato ma tlanawati ma kinmetzpojpostekikan katlej okinmajmasoltijkej itech krus iwan ma kinkixtikan de ompa. ³² In soldadojtin oyajkej iwan okinmetzpojpostekej in omen tlakaj katlej okinmajmasoltijkej itech krus ik inajnakastlan in Jesús. ³³ Iwan nijuak in soldadojtin omikuaniijkej kan oyeka in Jesús, okitakej yomikke. Por yonik mach okimetzpojpostekej.

³⁴ Pero se soldado, okkestzopitij ika se kuawitl weyak yakateposoj, iwan san niman ijkuakón okiske estle iwan atl. ³⁵ Nej nochí kuale onikitak, iwan namechilwia tlan melawak, para namejwan noijki xikneltokakan. ³⁶ Yon tlamantle omochij para ma mochiwa tlan kijta in tiotlajkuilole: “Nion se iomio mach kipostekiliskej.” ³⁷ Iwan oksekan de yen tiotlajkuilole noijki kijta: “Kitaskej katlej okkestzopitijkej.”

Jesús okitookakej ijtk se mikkakuyoktle

(Mt. 27:57-61; Mr. 15:42-47; Lc. 23:50-56)

³⁸ Satepan de yon, José de pueblo de Arimatea, katlej oyeka imomachtijkaw in Jesús san ichtaka porke okinmiimakasia in judiojtin, okitlatlawtij in Pilato ma kikawili ma kitki itlalnakayo in Jesús. Pilato okikawilij ma kitki. Toneses in José oyáj iwan okitkik itlalnakayo in Jesús. ³⁹ Nicodemo noijki oyáj okiwikak in José, Nicodemo yen katlej achtoj oyajka okitato in Jesús de yuak. Yej okitkik kej senpoale iwan majtlakte kilo de ajwiakayotl, nelitok de mirra iwan áloes. ⁴⁰ José iwan Nicodemo okitkikej itlalnakayo in Jesús iwan okikimilojkej ika bendajtin katlej okinsajkej ika yon ajwiakayotl. Okichijkej ijkón ken inkostumbre in judiojtin kichiwaj nijuak kitookaj se mikkat. ⁴¹ Kan okimajmasoltijkej in Jesús itech krus, ik ompa serka oyeka se lugar tlatokkuawyoj, iwan itech yon lugar oyeka se mikkakuyoktle kan mach ya akaj okitookayah. ⁴² Ompa okikalakijkej itlalnakayo in Jesús para okitookakej, porke yon mikkakuyoktle oyeka serka iwan porke ya pewani in weyi tonale.

20

Jesús omoyolkui

(Mt. 28:1-10; Mr. 16:1-8; Lc. 24:1-12)

¹ In yakinika tonale de yen samana, in María de pueblo de Magdala oyáj kan okitookakej in Jesús san kualkan, ok otlatleyuatoka. Iwan okitajsik in mikkakuyoktle mach ok okamatzaktoka ika tetl. ² Ijkuakón omotlaloj oyáj kan oyeka in Simón Pedro iwan oksé momachtij, katlej Jesús okitlasojtlaya, iwan okinmilwij:

—Yokiwikakej itlalnakayo in toSeñor de itech mikkakuyoktle, iwan mach tikmatij kan okitlalijkej!

³ Pedro iwan oksé momachtij okiskej iwan oyajkej kan oyeka in mikkakuyoktle. ⁴ San ken omen omotlalojkej san sekan, pero in oksé momachtij omotlaloj okachi ke Pedro iwan oajsito achtos kan oyeka in mikkakuyoktle. ⁵ Oontlachixke ik tliltik, iwan okinmitak in bendajtin ompa oyekaj, pero mach omixewij okalakke. ⁶ Satepan oajsiko in Simón Pedro, katlej owalaya tlakuitlapán, iwan okalakke ijistik in mikkakuyoktle. Yej noijki okinmitak in bendajtin. ⁷ Iwan noijki okitak in panito katlej oyeka ipan itzontekon in Jesús, iwan mach oyeka iwan bendajtin, sino oyeka ik se lado otejkuixtoka. ⁸ Ijkuakón okalakke noijki in oksé momachtij katlej achtos oajsito itech mikkakuyoktle. Okitak tlan otlamochij, iwan okineltokak nik mach ompa oyeka in Jesús. ⁹ Porke ayamo kuale okimomakayaj kuenta tlan kijta in tiotlajkuilole nik kipia de moyolkuis (moyolitis) oksemi. ¹⁰ Satepan in yonmej omen momachtijkej omokuepkej para inchan.

*Jesús okimotitij in María de pueblo de Magdala
(Mr. 16:9-11)*

¹¹ María omokaj chokatok kalan inakastlan mikkakuyoktle. Nijuak ochokatoka omotooloj iwan oontlachixke ijistik in mikkakuyoktle. ¹² Iwan okinmitak omen angelestín otzotzoltitokaj ika intlaken istak. Oewatokaj kan oyeka itlalnakayo in Jesús, se ik ikxitlan iwan oksé ik itzontekonpan. ¹³ In angelestín okitlajtlanjikej in María:

—Siwatl, ¿tlanik tichoka?

Yej okinnankilij:

—Yokiwikakej noSeñor, iwan mach nikmati kan okikawatoj.

¹⁴ Nijuak ijkón okijtoj, omokuepke iwan okitak in Jesús ompa moketok, pero mach okixmaj kox yen Jesús. ¹⁵ Jesús okitlajtlanj:

—Siwatl, ¿tlanik tichoka? ¿Akin tiktemoa?

María okimolwij xamo yen tlamonekuitlawij de yon tlatokkuawayo, iwan okilwij:

—Tataj, tla tejwatzin otikwikak, xinechilwi kan otikkawato, iwan nej niknotzatij.

¹⁶ Jesús okilwij:

—¡María!

Yej omokuepke iwan okilwij ika tlajtote hebreo:

—¡Raboni! —kijtosneki Tlamachtij.

¹⁷ Jesús okilwij:

—Xinechkajkawa, porke mach ya nimotlejkawia (nittlejko) inawak noPapan. Pero xiwia xikinmilwiti nokniwan, ke nimotlejkawis inawak noPapan, katlej namejwan noijski amoPapan, katlej noDios iwan katlej namejwan noijski amoDios.

¹⁸ Ijkuakón in María de pueblo de Magdala oyáj okinmilwito in momachtijkej nik okitak in Señor, iwan noijski okinmilwij tlan okinawatij.

Jesús okinmotitij imomachtijkawan

(Mt. 28:16-20; Mr. 16:14-18; Lc. 24:36-49)

¹⁹ Nijuak otlatleyuak itech yon yakinika tonale de yen samana, in momachtijkej omololojkej iwan omokaltzajtzakej porke okinmiimakasiaj in judiojtin. Ijkuakón Jesúis owallmonextij ik tlatlajko de kan yejwan oyekaj iwan okintlajpaloj, okinmilwij:

—Ximoyolosewikan.

²⁰ Satepan de ijkón okijtoj, okinmititij imawan iwan ikestlan. Yejwan opakej porke oksemi okitakej in Señor.

²¹ Ijkuakón Jesúis okinmilwij oksemi:

—Ximoyolosewikan. Ijkón ken noPapan onechwaltitlanke, ijkón Nej noijski namechtitlani.

²² Iwan okinmijpitzke imomachtijkawan, iwan okinmilwij:

—Xikresibirokan in Espíritu Santo. ²³ Akin namejwan ankitlapojpolwiskej de itlajtlakol, mokawas chipawak. Iwan akin amo ankitlapojpolwiskej de itlajtlakol, mokawas tlajtlakolej.

Tomás mach okineltokaya nik in Jesúis omoyolkuij

²⁴ Pero in Tomás, se de yen majtlakte iwan omen momachtijkej, katlej okitokayotiayaj Kuatej, mach ompa okatka inwan nijuak in Jesúis okinmotitij. ²⁵ Satepan in oksekimej imomachtijkai kniwan okilwijkej:

—Yotikitakej in toSeñor.

Pero in Tomás okinnankilij:

—Tla amo nikinmitas imawan iwan tla amo nikkalakis nomajpil kan okimakujkuyunijkej ika klabostin, iwan noijski tla amo nikkalakis noma itech ikestlan, mach nikneltokas.

²⁶ Chikueyi tonale satepan, in momachtijkej oksemi omololojkej itech se kale, iwan ijkuakón in Tomás ompa oyeka inwan. Nochtin in puertajtin otzajtzaktokaj, pero

Jesús oksemi owalmonextij ik tlatlajko. Iwan okintlajpaloj okinmilwij:

—Ximoyolosewikan.

²⁷ Ijkuakón okilwij in Tomás:

—Xikinmita nomawan iwan xikkalaki momajpil itech nomakpal. Noijki xikkalaki moma ik nokestlan. Amo xieto mach titlaneltokak, sino xieto titlaneltokak.

²⁸ Ijkuakón Tomás okilwij:

—¡Tejwatzin tinoDios iwan tinoSeñor!

²⁹ Jesús okilwij in Tomás:

—Axan tikneltoka porke otinechitak. Ma pakikan katlej amo nechitaj iwan nechneltokaj.

Tlan para omikuiloj yin libro

³⁰ Jesús okinchij miekej oksekimej milagrostin inmixpan imomachtijkawan, katlej mach ijkuilitokej itech yin libro.

³¹ Pero nochí yin tlan ijkuilitok itech yin libro, omikuiloj para namejwan xikneltokakan nik in Jesús yen Cristo, iKone in toTajtzin Dios. Iwan tla namejwan antlaneltokaskej inawak ankipiaskej nemilistle katlej mach keman tlamis.

21

Jesús okinmotitij chikomen imomachtijkawan

¹ Satepan de yon, Jesús okinmotitij imomachtijkawan inakastlan mar itoka Tiberias. Iwan ijkín otlamochij:

² Imomachtijkawan Jesús oyekaj san sekan, oyeka in Simón Pedro, Tomás katlej kitokayotiaj Kuatej, Natanael katlej oyeka de Caná de Galilea, noijki ipilwan Zebedeo, iwan ok omen imomachtijkawan. ³ Simón Pedro okinmilwij:

—Niawi nimichmati.

Yejwan okinankilijkej:

—Ma timitzwikakan.

Ijkuakón kiné, otlejkokej itech se barko. Pero yon yuak mach itlaj michin okajsikej. ⁴ Nijuak yotlanestiwalaya, Jesús owalmonextij ik atlatentle, pero imomachtijkawan mach okimatiaj kox yen Jesús. ⁵ Jesús okintlajtlanij:

—Telpokamej, ¡jankinmajsikej michimej?

Yejwan okinankilijkej:

—¡Amo!

⁶ Jesús okinmilwij:

—Xiktlamotlakan in michmatlatl ik iyekma in barko, iwan ankinmajsiskej michimej.

Ijkón okichijkej kiné, iwan satepan, mach ok oweliaj okixtiyaj in michmatlatl porke okinkitzkijkej sa tekitl miekej michimej. ⁷ Ijkuakón in momachtij katlej Jesús okitlasojtlaya, okilwij in Pedro:

—¡Yen toSeñor!

San niman nikuak ijkón okikakke in Simón Pedro nik yen Señor, omotzotzoltijtiwetzke, porke oyeka xitlatztik, iwan omotlamotlak ijlik atl. ⁸ Oksekimej momachtijkej oajsitoj atlatentle itech barko, okitilantiayaj in michmatlatl tentok de michimej. Oyekaj san kanaj se sien metros de kan atlatentle. ⁹ Nikuak otemokej ipan tlale, okitakej se michin iwan se pan ipan tlixochtle. ¹⁰ Jesús okinmilwij:

—Xikkualinkuikan sekimej michimej katilej yakin ankinkitzkijkej.

¹¹ Simón Pedro otleykok itech barko iwan okitilanke in michmatlatl asta atlatentle tentok de wejweyin michimej. Okinpoj, iwan oyekaj se siento iwan omenpoale iwan majtlakte iwan eyi michimej. Maski okinkitzkijkej miekej michimej, mach otzayanke in michmatlatl. ¹² Jesús okinmilwij:

—Xiwikikan xitlakuakij.

Iwan nion se imomachtijkaw mach omixewij okitlajtlanij akin Yej, porke kuale okimatiq nik yen toSeñor. ¹³ Satepan Jesús omijkuanij, okitilanke in pan iwan okinmajmakak. Iwan noijki ijkón okichij ika michin.

¹⁴ Ika yon omochij ya eyi buelta okinmotitij in Jesús imomachtijkawan, satepan de omoyolkuik oksemi de ikuak omikka.

Jesús iwan Pedro

¹⁵ Satepan de otlanke otlakuajkej, in Jesús okitlajtlanij in Simón Pedro:

—Simón, ikone in Jonás, ¿tinechtlasojtla okachi ke momomachtikaikniwan?

Pedro okinankilij:

—Aján, Señor, tejwatzin kuale tikmati nik sa tekitl nimitzneki.

Jesús okilwij:

—Xikintlakualti nochkakonewan.

¹⁶ Jesús okitlajtlanij oksemi:

—Simón, ikone in Jonás, ¿tinechtlasojtla?

Pedro okinankilij:

—Aján, Señor, tejwatzin kuale tikmati nik nimitzneki.

Jesús okilwij:

—Xikinbia nochkawan.

¹⁷ Ipan eyi buelta oksemi okitlajtlanij:

—Simón, ikone in Jonás, ¿melawak tinechneki?

Nikuak in Jesús okitlajtlanij ya eyi buelta kox melawak kineki, ikuakón Pedro omoyolkokoj por ijkón okitlajtlanij. Iwan okinankilij:

—Señor, tejwatzin nochi tikmati. Tejwatzin kuale tikmati nik melawak nimitzneki.

Jesús okilwij:

—Xikintlamaka nochkawan.¹⁸ Ipan melajka nimitzilwia, nijuak otieka titelpochtle, otimotzotzoltiaya iwan otiaya san kan tej otiknekia. Pero nijuak titetajtis, timajmasos iwan oksé mitztzotzoltis, iwan mitzwikas kan amo tiknekis tias.

¹⁹ Jesúis ijkón okijtoj para okinmatiltij kenik mikis in Pedro satepan, iwan kenik kiweyikixtis in Dios ika imikilis. Satepan okilwij:

—Xiwiki nowan.

Imomachtijkaw in Jesúis katlej okitlasojojtlaya

²⁰ Nijuak in Pedro omokuepke, okitak in oksé imomachtijkaw katlej Jesúis okitlasojojtlaya, oyaya inkuitlapan, katlej oyeka itech in tiotlakantlakuale iwan omijkuanijka ik ielpan in Jesúis, iwan okitlajtlanijka: “Señor, ¿akin mitztemaktis (mitztemaktilis)?” ²¹ Nijuak in Pedro okitak, okitlajtlanij in Jesúis:

—Señor, ¿iwan yin tlakatl tlan mochiwas?

22 Jesúis okilwij:

—Tla Nej niknekis ma mokawa asta ijkuak niwalmokuepas, tej mach motekiw. Tej xiwiki nowan.

²³ Ijkuakón yon tlajtole oxoyawik (oxitinki) intech in momachtijkej tlaneltokakej, okimatkej nik nekáj momachtij mach mikis. Pero Jesúis mach okijtoj nik mach mikis. Sino Yej okijtoj: “Tla Nej niknekis ma mokawa asta ijkuak niwalmokuepas, tej mach motekiw.”

²⁴ Nekáj momachtij yen nej. Nej onikitak tlan otlapanok, iwan onikijkuijol itech yin libro. Iwan namejwan ankimatiy nik nochi tlan nikijta yon melawak.

²⁵ Jesúis okinchij oksekimej tlamantin okachi. Iwan tla nochimojikuiloani se por se de tlan Jesúis okichij, mach akinij ixko yin tlaltikpak in librojtin katlej mijkuiloanij. Ijkón ma yeto.

YEN YIN TLAN OKICHIJKEJ ITLATITLANILWAN TOTAJTZIN DIOS

Jesús okinmilwij itlatitlanilwan nik witz in Espíritu Santo

¹ Nokni Teófilo: Itech yakinika nolibro onikikuiloj nochitlan Jesús okichij iwan nochitlan otlamachtij desde ikuak okipewaltij itekiw, ² iwan asta ikuak oyáj ilwikak. Antes de yas ilwikak, ika iEspíritu Santo okinnawatijtewak in tlatitlaniltin katilej Jesús okinpejpenke para ma kichiwakan tlan okinmilwij. ³ Satepan de omikke, Jesús okinmotitij itlatitlanilwan de miek tlamtante para ma kimomakakan kuanta nik in Yej yolitok. Okinmotitij omenpoale tonaltin. Itech yonmej omenpoale tonaltin okintlapowij de kenik in Dios tlanawatia. ⁴ Nijuak in Jesús ok oyeka inwan itlatitlanilwan, okinnawatij mach ma wian de Jerusalén. Okinmilwij:

—Xikchiakan asta ma mochiwa tlan noPapan oamechilwij, ijkón ken Nej noijklí yonamechilwij. ⁵ Ipan melajka, Juan otakuateekij ika atl, pero sa kanaj keski tonale namejwan anmokuateekiskej ika Espíritu Santo.

Jesús omotlejkawij (otlejkok) ik ilwikak

⁶ Katlej omololojkej iwan Jesús, okitlajtlanijkej:

—Señor, ¿tikmakixtis itech yinmej tonaltin in topaís de Israel para sa yej iselti ma monawati?

⁷ Jesús okinnankilij:

—Namejwan mach amechtokaroa ankimatiskej itech tlan tonale o noso keman itlaj kichiwas in noPapan. Sanwel Yej kimiati iwan Yej kijta tlan kichiwas. ⁸ Iwan nijuak in Espíritu Santo witz ipan namoyolo, namejwan ankiresibioskej ipoder iwan ankisaskej antetlapowitiwej de Nej ik Jerusalén, ik nochitlan in región de Judea iwan de Samaria, iwan asta kan katej okachi wejka de ixko yin tlaltikpak.

⁹ Satepan de otlanke okintlapowij, Jesús omotlejkawijtiaj (otlejkotiaj) ik ilwikak, mientras imomachtijkawan okonitokaj, opoliwito ijistik mixtle iwan mach ok okitakej. ¹⁰ Iwan nijuak okonitokaj kenik omotlejkawijtiaj ik ilwikak, omen tlakaj otlakentitokaj de istak omonextijkej ik innakastlan, ¹¹ iwan okintlajtlanijkej:

—Tlakaj de Galilea, ¿tlanik ankonitokej in ilwikak? Yin Jesús katlej oyeka amowan iwan katlej ya ankitakej yoyáj ik ilwikak, witz oksemi ijkón ken ankitakej oyáj.

Okipejpenkej in Matías para ma yeto ipatka in Judas

¹² Owalmokuepkej in tlatitlaniltin para Jerusalén ovalajkej desde kan Olivostepetl, kej se kilómetro nik wejka. ¹³ Nijuak oajsitoj Jerusalén, okalakej kalijtik iwan otlejkojej ajkopen itech oksé piso kan yejwan okalotitokaj. Ompa oyeka in Pedro, Juan, Jacobo, Andrés, Felipe, Tomás, Bartolomé, Mateo, Jacobo itelpoch in Alfeo, Simón katlej onemia inwan cananistas, iwan Judas itelpoch in Jacobo. ¹⁴ Noijki ompa oyekaj sekimej siwamej. Ompa oyeka in María imaman in Jesús iwan ikniwan in Jesús. Nochtin yejwan omololoayaj nochipa para motiotzajtziliskej.

¹⁵ Itech yonmej tonaltin in tokniwan tlaneltokakej omololojkej kej se siento iwan senpoale, Pedro omoketzke tlatlajko iwan okinmilwij:

¹⁶ —Nokniwan, xinechkakikan. Ya wejkawitl in rey David okikuiloj tlan okilwij in Espíritu Santo, de tlan Judas panoani, katlej okinyekanke katlej okitzkijkej in Jesús. ¹⁷ Judas opowia towan iwan noijki towan otekipanoaya. ¹⁸ Pero omotlalkowij ika yen tomin katlej okimakakej de itlajtlakol. Satepan ompa ipan itlal owetzke ika itzontekon iwan oxijxitinke, iwan okuetlaxkolkopinke. ¹⁹ Katlej ochantiaj Jerusalén nijuak okimatkej, okitokayotijkej nekáj tlale Aceldama, kijtosneki ika intlajtol arameo Tlale de Estle. ²⁰ Itech libro de Salmos kijtojtok:

Ichán ma mokawa iselti kale,
iwan mach akaj ompa ma chanti.

Noijki itech oksé Salmo kijta:

Katlej de yej itekiw oksé ma kipatkayoti.

²¹ 'Nian katej sekimej tlakaj katlej onemiaj towan nochipa nijuak in toSeñor Jesús Iwan otinemiaj, ²² desde ijkuak in Juan okikuateeckij in Jesús iwan asta ijkuak omotlejkawij (otlejkok) ik ilwikak. Moneki kiné, ke se de yejwan towan ma mosetili, para ijkón noijki ma kitematilti nik in Jesús omoyolkuik.

²³ Ijkón kiné, okinpejpenkej omen tlakaj: se itoka José Justo katlej noijki kinotzaj Barsabás, iwan oksé itoka Matías. ²⁴ Satepan omotiotzajtzilijkej okijojkej:

—Señor, tejwatzin tikinmixmati nochtin tlakaj ipan inyolo, xitechititi katlij yej de yinmej omen tlakaj katlej tejwatzin yotikpejpenke ²⁵ para ma tekipano kej tlatitlanile ipatka in Judas, katlej okipoloj itekiw de tlatitlanile iwan oyáj kan kitokaroa yetos.

²⁶ Ijkuakón omotlaankej in yonmej omen, iwan otlatlanke in Matías, iwan desde ijkuakón omosetilij inwan oksekimej majtlaktin iwan se tlatitlaniltin para ijkón omochijkej ya majtlaktin iwan omen.

2*Dios okualtitlanke iEspírito Santo*

¹ Nijuak oajsiko ilwital de Pentecostés, nochtin oyekaj san sekan itech se kale. ² Iwan ikuakón owatlakokuyokak, kej se ejekatl chikawak, omokakke ovalaya de ilwikak. Iwan okiwixoj nochí in kale kan yejwan oyekaj. ³ Iwan ovalmonextijkej sekimej tlimej iwan omoxexelojkej ipan kada se de yejwan. ⁴ Iwan nochtin otenkej de Espírito Santo iwan opéj tlapoaj ika oksekimej tlajtoltin. Iwan okijtoayaj tlan Espírito Santo okintoktiaya ma kijtokan.

⁵ Itech yonmej tonaltin oyekaj Jerusalén miekej judiojtin katlej sa tekitl omotemaktiayaj inawak Dios. Yonmej judiojtin ovalajkej de nian nepa ixko yin tlaltikpak. ⁶ Nijuak okikakej owatlakokuyokak, san niman omololojkej miekej iwan mach ok okimatiaj tlan kijtoskej, porke kada se de yejwan tlatitlaniltin opéj kintlapowiaj in tlakaj ika de yejwan intlajtol. ⁷ Melajka sa otlajtlachixkej (omomajmawtijkej), iwan okimolwiayaj:

—¿Amo ovalajkej de Galilea nochtin yinmej katlej tlapojtokej? ⁸ Pero kada se de tejwan tikinkakij techtlapowiaj ika totlajtol, ¿kenik welij? Tejwan otivalajkej de miekan paismej de ixko yin tlaltikpak. ⁹ Sekimej ovalajkej de país de Partia, de Media, de Elam, de Mesopotamia, de Judea, de Capadocia, de Ponto iwan de Asia, ¹⁰ noijki nian katej sekimej de Frigia, de Panfilia, de Egipto iwan de regionmej de Africa kanik kajki in pueblo de Cirene. Noijki nian katej sekimej de Roma katlej nian chantij. Sekimej de yejwan yipa judiojtin desde otlakatkej, iwan oksekimej okalakej itech intiotlamachtil in judiojtin. ¹¹ Noijki ovalajkej sekimej de Creta iwan de Arabia. Tinochtin tikinkakij in yinmej tlatitlaniltin tlapoaj kada se de yejwan ika totlajtol. Techinkakitiaj miekej tlamantin wejweyin de tlan Dios kichiwa.

¹² Nochtin sa otlajtlachiayaj (omomajmawtiayaj) iwan mach ok okimatiaj tlan kijtoskej, iwan omotlajtlaniayaj:

—¿Tlan kijtosneki nochí yin tlan tlamochijtok?

¹³ Pero sekimej okinpinawiayaj, okijtoayaj:

—¡Yinmej iwintij!

Pedro omoketzke iwan otlapoaj

¹⁴ Ikuakón Pedro omoketzke inwan oksekimej majtlakin iwan se tlatitlaniltin, iwan chikawak okijtoj:

—Judiojtin iwan nochtin katlej nian chantij Jerusalén, xikkakikan iwan xikmatikan kuale nochí tlan namechilwis. ¹⁵ Yinmej mach iwintij ken namejwan ankijtaj, porke wel ok kualkan, yakin las nuebe. ¹⁶ Nian tlamochijtok tlan ya wejkawitl okijtoj in profeta Joel:

17 Dios kijta:

Ijkín tlapanos itech nekatej sa iyakatlanka tonaltin.
Niktitlanis noEspíritu intech nochtin tlaltikpaktlakaj.
Namopilwan kijtoskej tlan satepan tlapanos.

In telpokamej kitaskej itlaj kej yeskia teemiktoej,
iwan in tetajtzitzintin kikochteemikiskej tlan tlapanos.

18 Noijki nikinnokilis noEspíritu katlej notekipanojkawan,
nikinnokilis in tlakaj iwan siwamej itech nekatej tonaltin,
iwan kitenkixtiskej in tioltajtote tlan Dios kinmakas.

19 De itech ilwikak nikinnextilis wejweyin señalestin,
iwan ipan yin tlaltikpak nikinnextilis señalestin ika estle, ika
tlitl iwan ika mixpoktle.

20 In tonale mach ok tlawis,
iwan in metztle chichiliwias kej estle,
antes de ajsiki in weyi tonale de toSeñor.

21 Iwan nochtin akinmej kitlajtlaniliskej in toSeñor ma kin-
makixti, in Señor kinmakixti.

22 'Xikkakikan kiné tlakaj de Israel tlan namechilwis: Jesús de Nazaret, Dios okipejpenke. Namejwan kuale ankimatij porke Jesús okipixke miek poder para okinchij milagrostin iwan señalestin anmoixpan. 23 Namejwan ankikitzkijkej iwan ankitemaktijkej (onkitemaktilijkej) inmak in tlakaj tla-jtlakolejkej, iwan ankimiktijkej itech krus, ijkón ken Dios yokimatia iwan okinekke ijkón ma pano. 24 Pero Dios okiyolitij iwan okimakixtij de itech mikilistle. Porke in mikilistle mach owelik okitlanke in Jesús iwan Yej omoyolkuiq oksemi.

25 Achtoj in rey David otlajtoj de yen Jesús, okijtoj:

Nochipa onikitaya in Señor noyakapan.

Yej ik noyekma, mach akaj welis itlaj nechtoktis.

26 Por yonik niyolpaki, iwan noten tlakuika ika pakilistle. Maski nimelatok, nikmati nik nimoyolkuis (nimoyolitis).

27 Porke amo tikkawas noanima kan tliko,
nion amo tikkawas ma ijtlakawi notlalnakayo
de Nej nimochipawkaKone.

28 Otinechititij in kuale ojtle kan nias para nikpias nemilstle
nochipa,

iwan nikpias miek pakilistle nijuak nietos mowan.

29 'Nokniwan, nikneki namechilwis nik in rey David omikke iwan okitookakej, iwan asta axan tikmatij kanin toktok. 30 David oyeka profeta, iwan okimatia nik in Dios okilwij ipan melajka, nik kitlalis se Rey se de iwejkaixwi katlej satepan motlalis itech isiya para tlanawatis. 31 Ijkón kiné, kej yeskia okonitoka, David otlajtoj de kenik moyolkui in Cristo. Okijtoj nik in Dios mach kikawani kan tliko iwan itlalnakayo mach ijtlakawini. 32 Ijkón kiné, Dios yokiyolitij in

Jesús, iwan tejwan titlatitlaniltin tinochtin otikitakej. ³³ Yej omoyolkuij ika poder para omotlalij ik iyekma in toTajtzin Dios, yen toTajtzin Dios okimakak in Espíritu Santo katlej achtoj Jesús okijtoj techwaltitlanilis, iwan axan Yej yotech-nokilij iEspíritu katlej namejwan axan ankitaj iwan ankikakij. ³⁴ Porke mach yen David katlej otlejkok ilwikak, porke yej inewian okijtoj:

In Dios okilwij in noSeñor:

“Ximotlali ik noyekma,

³⁵ asta ikuak Nej nimitztlalis titlayekanke de yejwan katlej mitzkokoliaj.”

³⁶ 'Tlakaj de Israel, kuale xikmatikan iwan ipan melajka, nik in Jesús katlej ankimajmasoltijkej itech krus. Dios okitlalij para ma yeto yen toSeñor iwan yen Cristo.

³⁷ Nijuak okikakej yon tlajtole katlej ompa oololitokaj, sa tekitl omoyolkokojkej, iwan okitlajtlanijkej in Pedro iwan oksekimej tlatitlaniltin:

—Tokniwan, ¿tlan moneki tikchiwaskej?

³⁸ Pedro okinnankilij:

—Ximoyolkuepakan inawak Dios iwan ximokuateekikan kada se de amejwan ika itoka in toSeñor Jesucristo, para ijkón Dios amechtlapojpolwis de amotlajtlakol, iwan ijkón Yej amechtliokolis iEspíritu Santo. ³⁹ Dios okisentlalij amech-makas iEspíritu Santo namejwan iwan namopilwan, iwan noijki nekatej tlakaj katlej katej wejka. Kijtosneki nochtin in tlakaj katlej Dios kinnotzas ma yekan iaxkawan.

⁴⁰ Pedro okintlapowij ika okachi oksekin tlajtole iwan okinyekilwij:

—¡Amo inwan ximonelokan in tlakaj katlej mach kinekij kikakiskej in melajkayot!

⁴¹ Ijkón kiné, katlej okineltokakej tlan okijtoj in Pedro, omokuateekijkej. Iwan yon tonale omajxitijkej oksekimej tlaneltokakej kej eyi mil tlakaj. ⁴² Nochtin omotekipa-choayaj de tlan okinmachtiayaj in tlatitlaniltin, iwan okimoxejxeliliayaj nochti tlan okipiayaj, omotiotzajtziliayaj iwan omololoayaj para kisepankuaskej in pan para kelnamikiskej imikilis in Jesús.

Kenik omoyekwikayaj katlej achtoj okineltokakej in Cristo

⁴³ Miekej milagrostin iwan señaletin okinchiyawayaj in tlatitlaniltin. Iwan nochtin in tlakaj opéj momawtiaj. ⁴⁴ Nochtin in tlaneltokakej omoyekwikayaj iwan okipiayaj san se inyolo, iwan okimoxejxeliliayaj tlan okipiayaj. ⁴⁵ Okinnamakayaj intlalwan iwan nochti tlan okipiayaj iwan okinpalewiawayaj katlej mach itlaj okipiayaj. ⁴⁶ Nochipa omololoayaj kan weyi tiopan, iwan itech inkajkalijtik okisepankuawayaj in pan para

kelnamikiskej imikilis in Jesúś, iwan osepantlakuayaj ika pakistle, ⁴⁷ iwan okiweyikixtiayaj in toTajtzin Dios. Iwan nochtin in tlakaj okintlakitayaj in tlaneltokakej, iwan nochtonale omomiekiliayaj katlej toSeñor okinmakixtiayaj de int-lajtlakol.

3

Opajtik se koxo

¹ Se tonale, Pedro iwan Juan oyajkej kan weyi tiopan de Jerusalén kej las tres de tiotlakke para motiotzajtziliskej.

² Ompa kan weyi tiopan oyeka se koxo desde itlakatilis, nochipa okiwikayaj iwan okitlaliayaj ompa kaltempan kan kilwiaj Kuakultzin, iwan okinmijtlaniliaya tomin katlej ompa okalakiaj. ³ Nijuak in koxo okinmitak in Pedro iwan Juan ya kalaktiwej ijtik in weyi tiopan, okinmijtlanilij tomin.

⁴ Yejwan okitlatakej, iwan Pedro okilwij in koxo:

—Xitechtlata.

⁵ In koxo okinyektlatak, iwan okichixtoka ma kimakakan itlaj tomin. ⁶ In Pedro okilwij:

—Mach nikpia plata nion oro, pero tlan nikpixtok nimitz-makas. Ika itoka in Cristo Jesúś de Nazaret, ximoketza iwan xinejnemi.

⁷ Satepan de ijkón okilwij, in Pedro okitilanke ika iyekma iwan okiketzaltij, iwan nijuak okontilanke oyekmejmelawikej imetztalwayowan. ⁸ Ijkón yej omoketewak iwan opéj nejnemi kuale, iwan okalakke ijtik in weyi tiopan inwan tlatilaniltin, nejnentiw iwan ajkotzikuintiw iwan okiweyikixtiayaj in toTajtzin Dios.

⁹ Nijuak nochtin in tlakaj okitakej ya nemi iwan kiweyikixtia in toTajtzin Dios, ¹⁰ niman okixmatkej nik yen tlakatl katlej ompa omotlaliaya iwan omijtlaniaya ika tomin itech tiopankaltentle kan kitokayotiaj Kuakultzin. Sa tekitl omotetzawijkej iwan omomawtijkej por yen tlan omochij in koxo.

Pedro otlapoj kan Korredor de Salomón

¹¹ In tlakatl katlej opajtik mach ok semi okinkawaya in Pedro iwan Juan. Nochtin in tlakaj sa tekitl omotetzawijkej, iwan oyajkej omotlalojkej okinmitatoj kan kitokayotiaj Korredor de Salomón. ¹² In Pedro nijuak ijkón okitak, okinmilwij:

—¿Tlanik anmotetzawiaj namejwan tlakaj de Israel? ¿Tlanik antechtlajtlataj? ¿Kox ankiyejyekoaj tejwan otikpajtijkej in koxo ika topoder para ma nejnemi? O noso ¿kox ankiyejyekoaj porke tikpiaj tonemilis chipawak iwan por yonik in yin tlakatl owelik otikpajtijkej? ¹³ Yen Dios okipajtij in koxo,

yen Dios de Abraham, de Isaac, de Jacob, iwan de yen ya wejkawitl toweyitajwan. Dios okipajtij iwan ika okiweyik-ixtij in Jesús katlej iKone, katlej namejwan ankitemaktijkej (okinkitemaktijkej) imak Pilato, yej okinekia kikajkawani iwan namejwan mach ankinekej.¹⁴ Namejwan yej ankitlajt-lankej ma kikajkawakan se tlakatl katlej temiktij, iwan mach ankinekej ma kikajkawakan katlej oyáj yolchipawak iwan kuale tlakatl.¹⁵ Iwan ijkón namejwan ankimiktijkej katlej techmaka nemilistle, pero Dios okiyolitij oksemi satepan de omikke, iwan tejwan kuale tikmatij porke otikitakej.¹⁶ Yin tlakatl katlej amejwan ankitaj iwan ankixmatij, Dios okipajtij iktlanke (ik tlami) porke tikneltokaj ipoder in Jesús. Iwan por tikneltokaj in Jesús, axan Yej amoixpan okipajtij.

¹⁷ 'Nokniwan, nikmati ke nikuak amejwan iwan amoteki-wajkawan ankimiktijkej in Jesús, mach ankimatkej tlan an-kichijkej. ¹⁸ Ijkón, Dios okichij tlan achtoj okitematiltij ika nochtin inten in profetajtin, de tlan panoani iCristo. ¹⁹ Por yonik, namejwan ximoyolpejpenakan iwan ximoy-olkuepakan inawak Dios, para ma amechtlapojpolwi de amotlajtlakol, iwan ijkón in Señor kichiwas ma mosewi namoanima. ²⁰ Iwan noijki oksemi kiwaltitlanis in Cristo katlej Dios yokipejpenke desde achtoj, kijtosneki kiwaltitla-nis in Jesús. ²¹ Maski axan in Jesús kipia de yetos ilwikak asta ma tlami ma kiyektlali in Dios nochi tlamantle. Ya wejkawitl ijkón okijtoj ika inten in profetajtin. ²² Moisés okinmilwij in ya wejkawitl toweyitajwan: "In Señor toDios kichiwas ma kisa de amejwan se profeta ken nej. Xikneltokilikan yon profeta nochi tlan anmechilwis,²³ porke akin amo kineltok-ilis nekáj profeta, Dios kixpolos iwan mach ok powis inwan ipilwan."

²⁴ Iwan nochtin in profetajtin, desde Samuel para nian, otlapojkej noijki de yinmej tonaltin. ²⁵ Namejwan antepilwan de nekatej profetajtin, iwan namejwan anmaktiskej de tlan Dios okinmilwij kinmakas in ya wejkawitl toweyitajwan. Dios okilwij in Abraham: "Por yen mopilwan nikintiochiwas nochtin in tlakaj de ixko yin tlaltikpak." ²⁶ Nikuak in Dios okiyolitij iKone, oamechwaltitlanilij achtoj namejwan katlej anjudiojtin para ma amechtiochiwa, para xikkawakan de xitlajtlakokan.

4

Pedro iwan Juan okinketzkej inyakapan tekiwajkej

¹ Pedro iwan Juan okintlapowijtokaj in tlakaj, iwan ikuakón oajsikoj in tiopixkej, in komandante de yen weyi tiopan iwan saduceos. ² Nochtin okualaniaj porke Pedro

iwan Juan okinmachtiayaj in tlakaj, iwan okinmilwiayaj nik in mikkamej moyolkuiskej (moyolitiskej) porke Jesús omoyolkuik.³ Toneses okinkitzkijkej iwan okintzakej, iwan asta yen oksé tonale okijtojkej kintlatzintokiskej porke yotiotlakik.⁴ Miekej katlej okikakej itlajtol in Dios okineltokakej, iwan san yen okichtin okinpojkej oyekaj kej makuile mil tlakaj katlej otlaneltokakej.

⁵ Owalmostlatik omololojkej Jerusalén in tlanawatijkej judiojtin, in tlayekankej tetajtzitzintin iwan tlamachtijkej de itlanawatil in Moisés.⁶ Nojki ompa oyekaj in wejweyin tiopixkej, Anás, Caifás, Juan, iwan Alejandro. Iwan nochtin infamiliareswan in wejweyin tiopixkej.⁷ Pedro iwan Juan okinketzkej tlatlajko iwan okintlatlaniijkej:

—¿Ika tlan tlanawatijkayotl ankichijkej ma pajti in kokoxke, o noso akin oamechnawatij xikpajtikan in kokoxke?

⁸ Pedro tentok de Espíritu Santo okinnankilij:

—Namejwan antlanawatijkej iwan antlayekankej tetajtzitzintin de yin pueblo.⁹ Tla axan namejwan antechtlajtlaniaj kenik otikpalewijkej in kokoxke, iwan kenik opajtik,¹⁰ pues axan, tamechmatiltiaj amoixpan para ma kimati nochí in pueblo de Israel, nik in yin tlakatl katlej kajki amoixpan, opajtik ika itoka in Cristo Jesús de pueblo de Nazaret, katlej namejwan ankimiktijkej itech krus iwan satepan Dios okiyolitij.¹¹ Yin Jesús, Yej kej se tetl katlej kuale iwan namejwan ankatej kej ankalchijkej. Yon kuale tetl namejwan mach ankinikej, pero Yej omochij yen tetl katlej okachi kichikajtok in tepamitl.¹² Mach onkaj oksé tlakatl akin welis techmakixtis, porke Dios mach otechmakak oksé tlakatl para inawak ma timomakixtikan.

¹³ Nijuak in tlayekankej de itech junta okimomakakej kuenta nik in Pedro iwan Juan melawak ixchijchikawakej iwan mach ixtlamatkej, sa otlajtlachixkej (omomajmawtijkej). Iwan ikuakón nojki okimomakakej kuenta nik melawak onemiaj iwan Jesús.¹⁴ Iwan tlakatl katlej opajtik ompa oyeka inwan Pedro iwan Juan, iwan por yonik mach ok owelik ok itlaj okijtojkej.¹⁵ Ikuakón okinkixtijkej de kan junta se achitzin, iwan omonotzkej san yen tlayekankej de itech junta para motlapowiskej.¹⁶ Okijtojkej:

—¿Tlan welis tikintoktiskej in yinmej tlakaj? Nochtin in chanejkej de Jerusalén kimatij nik okichijkej se weyi milagro, iwan mach welis tikiitoskej nik mach melawak.¹⁷ Iwan para amo okachi ma xoyawi (xitini) yin tlajtole, ma tикинmajmawtikan, para ke de nian para tlayakapan mach ok ma tetlapowikan de Jesús.

¹⁸ Ijkuakón oksemi okinnotzkej ma kalakikan Pedro iwan Juan iwan okinnawatijkej ayakmo ma tetlapowikan iwan ayakmo ma tlamachtikan itlaj de Jesús. ¹⁹ Pedro iwan Juan otlanankilijek:

—Kuale xikyejyekokan namejwan kox Dios kimonekiltia yej amejwan se ma amechneltokili iwan amo se ma kinel-tokili in toTajzin Dios. ²⁰ Tejwan mach welis tikkawaskej de tikijtoskej de tlan yotikitakej iwan yotikkakej.

²¹ Ijkuakón okinmajmawtijkej in Pedro iwan Juan iwan okinkajkajkej ma wian. Mach okajsikej kenik welis itlaj kintoktiskej, porke nochtin in tlakaj okiweyikixtiayaj in Dios por yen tlakatl katlej opajtik. ²² Iwan in tlakatl katlej opajtik ika yin milagro, okipiaya okachi de omenpoale xiwitl.

In tlaneltokakej okitlajtlanilijkej in toTajzin Dios ma kinyolojchikawa

²³ Pedro iwan Juan, nijuak okinkajkajkej, oyajkej kan oyekaj in oksekimej intekitijkaikniwan, iwan okinmakakej kuenta de nochti tlan tlayekankej tiopixkej iwan tlayekankej tetajtzitzintin okinmilwijkej. ²⁴ Satepan de okinkakilijkej, nochtin omotiotzajtzilijkej okijtokej:

—ToWeyi tlanawatij Dios, tejwatzin otikchij in ilwikak, in tlaltikpak, in atl iwan nochti tlan onkaj. ²⁵ Tejwatzin ika Espíritu Santo iwan de itech iten motekipanoj David otikijtoj: ¿Tlanik mokualaniaj in paismej?

¿Tlanik in tlaltikpaktlakaj san tlan amo kajsij kiyeyekoaj?

²⁶ In tekiwajkamej de nochti in tlaltikpak omosetilijkej, para motlatlalwiskej para yaskej en kontra de yen Dios iwan de iCristo temakixtij.

²⁷ 'Tikmatij nik melawak in Herodes, iwan Poncio Pilato, iwan judiojtin iwan katlej mach judiojtin omololojkej nian Jerusalén iwan omokuepkej kontra mochipawkaKone Jesús katlej tejwatzin otikpejpenke. ²⁸ Okichijkej nochti tlan desde achtoj otikyejyekoj iwan otikmonekiltij ijkón ma mochiwa. ²⁹ Axan Señor, xikita tlan kinekij techtoktiskej, iwan xitech-yolojchikawa tejwan timotekipanojkawan para ma tiktem-tiltikan motlajtol ika ixchikawalistle. ³⁰ Iwan ika mopoder ma pajtikan in kokoxkej iwan ma mochiwakan milagrostin iwan señaleston ika itoka in mochipawkaKone Jesús.

³¹ Nijuak otlankej omotiotzajtzilijkej, kan oololitokaj ot-lalolinke, iwan nochtin otenkej de Espíritu Santo, iwan otetlapowiayaj de itlajtol in toTajzin Dios ika ixchikawalistle.

Nochi tlan okipiayaj oyeka para nochtin

³² Nochtin in tlaneltokakej okipiayaj san se intlalnamikilis. Mach akaj okijtoaya ke tlan kipixtok san para yej, sino para

nochtin. ³³ In tlatitlaniltin ika miek poder okitematiltiayaj kenik omoyolkuik in Señor Jesúś, iwan Dios nochtin okintiochiwaya miek. ³⁴ Nion se de yejwan mach itlaj okipoloaya, iwan akin okinpiaya itlalwan o noso ikalwan, okinnamakaya iwan tomin nochi okitemakaya. ³⁵ In tomin okinmaktiliayaj in tlatitlaniltin, para ma kinxejxelilikan in tlaneltokakej katlej okipoloaya. ³⁶ Ijkón okichij se tlakatl itoka José, katlej walajtok nelwatl de familia de Leví iwan katlej otlakatke itech tlale katlej pankistok itech atl itoka Chipre, katlej in tlatitlaniltin okitokayotijkej Bernabé, kijtosneki teyolojchikaj. ³⁷ Yon tlakatl okinamakak itlal iwan tomin okinmaktiliij in tlatitlaniltin.

5

In tlajtlakole de Ananías iwan Safira

¹ Oyeka se tlakatl itoka Ananías, yej iwan isiwa Safira omotlalnamakijkej. ² Yon tlakatl omotlatlalwij iwan isiwa de kimokawiskej sekin de yon tlaltomin iwan oksekin okinmakak in tlatitlaniltin. ³ Pedro okilwij:

—Ananías, ¿tlanik okimoaxkatij moyolo in Satanás, iwan omitztoktij xikkajkayawa in Espíritu Santo, para xikmokawi sekin tomin de tlan omitztlaxtlawilijkej de yen motlal? ⁴ ¿Amo oyeka moaxka in tlale? Iwan satepan de otiknamakak, ¿amo oyeka moaxka in tomin? ¿Tlanik otikkawilij moyolo ma tlakajkayawa? Mach otikinkajkayaj in tlakaj, sino otiknekia tikajkayawani in Dios.

⁵ Nijuak ijkón okikakke, Ananías owetzito ipan tlale iwan omikke. Iwan nochtin katlej okimatkej sa tekitl omomawtiijkej. ⁶ Ijkuakón ovalajkej sekimej telpokamej, okikimilojkej in tlalnakatl iwan okitookatoj.

⁷ Kej eyi ora satepan oejkok isiwa in Ananías, iwan mach okimatiá tlan otlapanok. ⁸ Pedro okitlajtlanij:

—Xinechilwi, ¿ankinamakakej in tlale ika yon ipatij ken nankijtaj?

Iwan yej otlanankilij:

—Melawak, ika yon ipatij.

⁹ Pedro okilwij:

—¿Tlanik namejwan anmotlatlalwijkej para ankiyejyekoskej iEspíritu in Señor? Nian witzej katlej okitookatoj mookich, iwan axan tej noijki mitzvikaskej mitztookatiwej.

¹⁰ San niman ijkuakón Safira owetzito ikxitlan Pedro iwan omikke. Nijuak omokuepatoj in telpokamej, okajsitejkokej in Safira yomikke, okikixtijkej iwan okitookatoj inakastlan iokich. ¹¹ Iwan nochtin in tiopantlaneltokakej iwan nochtin

katlej okimatkej tlan otlapanok, sa tekitl omomawtijkej in-awak Dios.

In tlatitlaniltin okinchijkej miekej milagrostin

¹² In tlatitlaniltin okinchewayaj miekej milagrostin iwan señalestin innawak in tlakaj. Iwan nochtin in tlaneltokakej omololoayaj kan kitokayotiaj Korredor de Salomón. ¹³ Mach akaj omixewiaya mosetilis inwan, pero nochtin in tlakaj okinyektlakitayaj in tlaneltokakej. ¹⁴ Iwan omomiekiliayaj miekej okichtin iwan siwamej katlej okineltokayaj in toSeñor. ¹⁵ Por yonik, asta okinkixtiayaj in kokoxkej ipan ojtle, ok-intlaliayaj ipan intlapech iwan inpan inpetl para nikuak panos in Pedro, siera ma kinmekawili ika iekawilo para ma pajtikan. ¹⁶ Noijki miekej oksekimej pueblojtin de ik ompa serka, owalayaj Jerusalén okualinwikayaj kokoxkej iwan katlej okipiayaj ejekamej mach kualtin, iwan nochtin opajtiaj.

Itlatitlanilwan Dios okintzakej

¹⁷ In weyi tiopixke iwan grupo de saduceos katlej ompa inwan oyekaj, sa tekitl omoxikojkej. ¹⁸ Okinkitzkijkej in tlatitlaniltin iwan okintzakej telpiloyan. ¹⁹ Pero se iángel in Señor okintlapoj de yuak iwan okinkixtij. Okijtoj:

²⁰ —Xiwian. Xikalakikan ijtk in weyi tiopan iwan xikin-matiltikan nochtin de noch yin yankuik nemilistle.

²¹ Yejwan okineltokakej tlan okinmilwij in ángel. Nikuak otlaneske, okalakej ijtk in weyi tiopan iwan opéj tlamachtiaj.

Iwan ikuakón in weyi tiopixke iwan katlej iwan oyekaj okichijkej junta iwan okinnotzkej in tlayekankej tetajtzitz-intin de Israel para ma mololokan. Iwan otlanawatijkej ma kualinwikakan in tlatitlaniltin de kan telpiloyan. ²² Pero nikuak in mayoltin oajsitoj telpiloyan, mach ok okinmajsita-sikej in tlatitlaniltin. Tones omokuepkej okitematiltitoj, ²³ okijtojkej:

—Otikajsitajsikej in puerta kuale tzaktok, iwan soldadojtin oyekaj iyakapan puerta kan otzaktokaj. Pero nikuak otikt-lapojkej in puerta, mach ok akaj otikajsitajsikej tlajtik.

²⁴ Nikuak ijkón okikakej, in weyi tiopixke, in komandannte de weyi tiopan iwan oksekimej tlayekankej tiopixkej, omotlanemililtijkej iwan okimolwiayaj tlanon welis tlapanos satepan de yon tlamantle.

²⁵ Ikuakón oejkok se tlakatl, iwan okinmilwij:

—Xikkakikan, katlej amejwan ankintzakej katej itech weyi tiopan kinmachtijtokej in tlakaj.

²⁶ In komandante de weyi tiopan iwan imayolwan, oyajkej oksemi okinnotzatoj, pero mach itlaj okintoktijkej, porke

okinmiimakasiaj in tlakaj de ma kinmojmotlakan ika tetl.
 27 Nijuak okualinwikakej in tlatitlaniltin, okinteixpantijkej
 itech junta iwan in weyi tiopixke okintlatzintokij okinmilwij:

28 —Tejwan kuale otamechnawatijkej mach ok
 xitlamachtikan ika itoka yon tlakatl Jesús. Iwan xikitakan
 tlan ya ankichijkej, ya ankixoyajkej (onkixitinijkej)
 namotlamachtilis itech nochi in weyikan de Jerusalén, iwan
 asta antechmamaltiaj nik tejwan otikmiktijkej yon tlakatl.

29 Pedro iwan oksekimej tlatitlaniltin otlanankilijkej:

—Tejwan tikpiaj de tikchiwaskej tlan Dios kija iwan amo
 tlan namejwan ankijtaj. 30 In Dios katlej ya wejkawitl towey-
 itajwan okineltokakej Yej okiyolitij in Jesús katlej namejwan
 ankimiktijkej nijuak ankimajmasoltijkej itech krus. 31 Dios
 okiweyijkatlalij in Jesús ik iyekma iwan okimonekiltij yen
 Jesús ma yeto toTlayekanke iwan toTemakixtij. Dios ijkón
 okichij para ke in tlakaj de Israel ma moyolpejpenakan (ma
 moyolkuepakan) de intlajtlakol iwan ijkón Dios kintlapojpol-
 wis. 32 Tejwan nochi otikitakej iwan tikmatij tlan axan titet-
 lapowiaj, iwan noijki kimati in Espíritu Santo. Dios techmaka
 in Espíritu Santo tinochtin katlej tikneltokaj.

33 Katlej oyekaj itech junta, nijuak okikakej in yon tlaj-
 tole, sa tekitl omokuejsojkej iwan okinekiaj kinmiktianij in
 tlatitlaniltin. 34 Pero ompa oyeka se tlakatl fariseo itoka
 Gamaliel, katlej oyeka tlamachtij itech tlanawatile de Moisés,
 iwan nochtin in tlakaj sa tekitl okitlakitayaj. Yin Gamaliel
 omoketzke iwan otlanawatij ma kinkixtikan kalan in tlati-
 laniltin se achitzin. 35 Iwan okijtoj:

—Tetajmej de Israel, xikpiakan kuidado de tlan an-
 inekij ankintoktiskej in yinmej tlakaj. 36 Xikelnamikikan
 namejwan, ke ya wejkikatzin omonextij se tlakatl itoka
 Teudas. Yon Teudas omoweyikixtij, iwan okinyekanaya
 kej nawi siento tlakaj. Pero yon Teudas okimiktijkej,
 iwan katlej okinyekanaya ochocholojkej iwan nochi ompa
 otlanke. 37 Satepan de Teudas omonextij Judas de es-
 tado de Galilea, meroj nijuak omochij censo, iwan noijki
 okinyekanke miekej, pero noijki okimiktijkej, iwan nochtin
 katlej okinyekanke opojpolikej. 38 Por yonik, namechilwia
 xikinkawakan in yinmej tlakaj, amo inwan ximokalakikan.
 Porke tla yin tlamachtile kisa de tlakaj, se tonale kipia de
 pojpolewis. 39 Pero tla kisa de Dios, mach welis ankitza-
 kuiliskej. Xikpiakan kuidado, amo san kichiwa yej ankinekij
 ankimomagaskej iwan Dios.

40 Yejwan kiné okinakasnamikej tlan okinmilwij in
 Gamaliel. Okinnotzkej in tlatitlaniltin, okinwitekej iwan
 okinmilwijkej mach ok ma kitenewakan itoka in Jesús, iwan

okinkajkajkej. ⁴¹ In tlatitlaniltin okiskej de itech yon junta ika pakistle, porke Dios okinkawilij ma tlajyowikan iwan ma kinpijjinatikan por okitenewayaj itoka in Jesú. ⁴² Iwan momostla itech weyi tiopan iwan kalpan, mach okawayaj de otlamachtiayaj iwan de okitematiltiayaj de Jesucristo.

6

Okinpejpenkej chikomen tlapalewijkej

¹ Itech nekatej tonaltin, como okachi omomiekiliayaj in momachtijkej tlaneltokakej, katlej otlajtoayah griego opéj kinmixnamikij katlej otlajtoayah hebreo, okijoayah ke momostla nikuak okinxejxeliliayaj tlan kikuaskej, in viudajtin grieagjtin mach okinmakayah ijkón ken katlej okinmakayah viudajtin hebreas. ² Ikuakón in majtlakte iwan omen tlatitlaniltin okinmololojkej nochtin in momachtijkej tlaneltokakej iwan okinmilwijkej:

—Mach kuale kaj, tla tikkawaskej de titetlapowiskej de itlajtol in Dios, iwan yej pewas titetlamakaskej. ³ Okachi kuale, xikinpejpenakan chikomen de tokniwan katlej kuale kintlakitaj, katlej kipiaj kuale intlalnamikilis iwan ma tentokan de Espíritu Santo, para yejwan ma kichiwakan yon tekitl. ⁴ Tejwan tikseguiroskej timotiotzajtzilijtoskej iwan tiktematiltijtoskej itlajtol in toTajtzin Dios.

⁵ Nochtin okinakasnamikej tlan okijokey in tlatitlaniltin, okipejpenkej in Esteban, tentok de tlaneltokalistle iwan de Espíritu Santo, noiiki okipejpenkej in Felipe, Prócoro, Nicanor, Timón, Pármenas iwan Nicolás de Antioquía katlej mach judío pero okalakke itech intiotlamachtil in judiojin. ⁶ Satepan nochtin in chikomen okualinwikakej innawak in tlatitlaniltin, omotiotzajtzilijkej iwan inpan okintlalijkej inmawan.

⁷ Itlajtol in toTajtzin Dios opéj xoyawi (xitini) okachi, iwan ompa Jerusalén in momachtijkej tlaneltokakej okachi omomiekiliayaj. Noiiki miekey tiopixkej judiojin otlaneltokakej itech yon tlaneltokalistle de Cristo.

Okikitzkijkej in Esteban

⁸ Dios okitemitij in Esteban de tlaneltokalistle iwan de Espíritu Santo, iwan okinchiwaya milagrosti iwan señahestin intech in tlakaj. ⁹ Pero omonextijkej sekimej de itech se tiopan de yen judiojin katlej kinmilwiaj Esclavos Libertados, iwan sekimej de Cirene, de Alejandría, de Cilicia iwan de Asia, iwan yejwan opéj motlatlajtolkuepaj iwan Esteban. ¹⁰ Pero mach oweliaj okitlaniaj, porke yej otlanankiliaya ika ixtlamachilistle katlej okimakaya in Espíritu Santo. ¹¹ Ikuakón okinmichtakatlatlalwijkej sekimej tlakaj para ma kijtokan ke

okikakej in Esteban otlajtoaya biero de Moisés iwan otlajtoaya biero de Dios.

¹² Iwan por yonik sa tekitl oyomonkej in tlakaj iwan tlayekankej tetajtzitzintin iwan tlamachtijkej de itlanawatil in Moisés. Sa tekitl okualankej iwan okikitzkijkej in Esteban iwan okiwikakej itech junta. ¹³ Okintemojkej sekimej tlajtoltlatlalijkej, iwan yonmej okijtojkej:

—Yin tlakatl tlapojtinemi biero de yin weyi tiopan tlatiochiwaloj iwan tlajtoa biero de itlanawatil in Moisés. ¹⁴ Otikkakej okijto ke Jesú de Nazaret, kixixinis in weyi tiopan iwan kinpatlas in kostumbres katlej Moisés otechinkajtewilij.

¹⁵ Iwan nochtin katlej ompa oewatokaj itech junta, nikuak okitlatakej in Esteban, okitakej ixko kej yeskia ixko se ángel.

7

Esteban omotlajtolpalewij

¹ In weyi tiopixke okitlajtlanij in Esteban:

—¿Kox melawak nochí tlan yejwan mitzistlakawiaj?

² Yej otlanankilij:

—Nokniwan iwan tetajmej de Israel, xinechkakikan: In toWeyijkatlalitok Dios, ya wejkawitl okimonextilij in toweyitaj Abraham, nikuak oyeka itech tlale de Mesopotamia, antes de onchantini kan pueblo de Harán,³ iwan Dios okilwij: “Xikisa de itech motlal iwan xikinkajtewa moperientejwan, iwan xiwia itech oksé tlale katlej Nej nimitzititis.”⁴ Ijkuakón Abraham okiske de itech tlale de Caldea iwan oyáj ochantito itech pueblo de Harán. Satepan de omikke ipapan, Dios okualwikak in Abraham itech yinmej tlalmej, kan namejwan axan anchantij.⁵ Pero mach itlaj okikajtewilij itech yin tlale, nimpot kan kitlalis se ikxi. Pero Dios okilwij nik kitlaltis, iwan satepan de ijkuak yej mikis in tlale mokawas para ipilwan, maski ijkuakón in Abraham mach ya okipiaya nion se ikone.⁶ Noijki, Dios okilwij ke ipilwan chantiskej itech oksé país kan amo intlal, yeskej kej tlanamaktin iwan kintekipanoltiskej sa tekitl, iwan kinnekatktiskej kej nawi siento xiwitl.⁷ Pero noijki Dios okilwij: “Nej nikinmixkomakas (kintzonmanas) in tlakaj de yon país akinmej kintekipanoltiskej iwan kinnekatktiskej mopilwan. Satepan kisaskej de ompa iwan nechweyikixtiskej itech yin tlale.”⁸ Dios omotlapowij iwan Abraham iwan omokajkej san se tlajtole de ke Abraham kichiwas in sirkunsisión. Nikuak ochikometik de otlakatke in Isaac, in tetaj Abraham okisirkunsidaroj. Noijki ijkón okichij in Isaac iwan ikone Jacob, iwan Jacob noijki ijkón okichij iwan ipilwan katlej oyajkej tetajmej de yen majtlakte iwan ome familias de Israel.

⁹ 'Yinmej majtlakin iwan omen iknimej yejwan oyajkej in ya wejkawitl toweyitajwan, yejwan wel omoxikojkej miek de inmikni José, iwan okinamakakej para ma kiwikakan itech país de Egipto. Pero Dios oyeka iwan José, ¹⁰ iwan okipalewij itech nochi tlan otlajyowij. Dios okimakak in José ixtlamachilistle iwan okipalewij para ke in Faraón rey de Egipto, ma kiyolejkita in José. Yin rey okitlalij in José ma yeto gobernador de Egipto iwan ma kita nochi tlan iaxka in rey.

¹¹ 'Satepan owalaj miek apistle iwan miek tlajyowilistle itech nochi in tlale de Egipto iwan itech tlale de Canaán, iwan ya wejkawitl toweyitajwan mach okipiayaj tlan kikuaskej. ¹² Pero nijuak in Jacob okimatke onkaj trigo itech país de Egipto, okintitlanke ompa ipilwan yejwan in ya wejkawitl toweyitajwan. Ikuakón yakinika ompa oyajkej. ¹³ Nijuak oyajkej ipan ojpa, José omoteixmachtij inawak ikniwan, iwan ijkón in Faraón okimatke de tlan rasa oyeka in José. ¹⁴ Satepan, José otlanawatij ma kualinwikan ipapan iwan ifamilia, para ma mochantitij Egipto. Por noctin oyekaj kej eyinpoale iwan kaxtole. ¹⁵ Ijkón, Jacob oyáj omochantito Egipto, ompa omikke iwan ompa omikkej noijklí ipilwan, yejwan in ya wejkawitl toweyitajwan. ¹⁶ Intlalnakayo okinwikakej para itech pueblo de Siquem, iwan okintookakej ijtik imikkakuyok in Abraham katlej yej okimokowij ika miek platajtomin. Achtoj, ompa Siquem ipilwan in Hamor okinamakiltijkej in Abraham in yon mikkakuyoktle.

¹⁷ 'Nijuak yoajsitiwalaya in tonale para mochiwas tlan Dios okilwij in Abraham, topueblo de Israel sa tekitl omomiekilij ompa Egipto. ¹⁸ Pero itech yonmej tonaltin, okalakke oksé rey ompa Egipto katlej mach itlaj okimatia de José. ¹⁹ Yon rey okinkajkaya tokniwan iwan okinnekatotkij in ya wejkawitl toweyitajwan, okinnawatij ma kintlamotlakan inselikkonewan katlej chochokotzitzintin para ma mikikan. ²⁰ Itech yonmej tonaltin otlakatke Moisés. Dios okiwelitak in yon konetl, iwan tetajmej okiskaltijkej inkalijtik san eyi metztle. ²¹ Nijuak okikawatoj kalan in konetl, ichpoch in rey Faraón okajsik iwan okiskaltij kej yeskia ikone. ²² Iwan ijkón Moisés okixtlamachtijkej ika nochi tlan okimatiaj in egipcios, yej oyeka sa tekitl ixtlamatke para tlajtos iwan para tekipanos.

²³ 'Nijuak okipixke omenpoale xiwitl, Moisés oyáj okintlajpaloto ikniwan de ipueblo Israel. ²⁴ Pero nijuak okitak se tlakatl egipcio okinekatotktijtoka se tlakatl israelita, Moisés okipalewij in israelita iwan okimiktij in egipcio. ²⁵ Moisés okimolwij ke ikniwan de ipueblo Israel kimomakanij kuenta, nik yen Dios katlej okititlanke in Moisés para ma kinmakixti,

pero yejwan mach okimomakakej kuenta. ²⁶ Omostlatik, Moisés okinmitak omen tlakaj de Israel omomagatokaj, iwan yej okinekia kinyolosewis, okinmilwij: “Namejwan anmiknimej, ¿tlanik ankimomagaj?” ²⁷ Ijkuakón katlej otemagatoka okitopej in Moisés, iwan okilwij: “¿Akin omitztlalij kej titekiwaj o noso kej tijues para ximokalaki towan? ²⁸ ¿Tikneki tinechmiktis noijki, ken yala otikmiktij in egipcio?” ²⁹ Nijuak ijkón okikakke, Moisés ocholoj iwan oyáj kan tlale de Madián. Ompa ochantik tepueblo iwan ompa okinpixke ome ipilwan.

³⁰ Opanok kanaj omenpoale xiwitl satepan, se tonale oyeka kan tlawaki ipan se tepetl itoka Sinaí, ompa okimonextilij se ángel ijtitk tlitl kan otlatlaya se kuatlanwitztle. ³¹ Moisés sa otlajtlachixke (omomajmawtij) de tlan okitak, iwan nijuak omijkuanij para kiyekitas okachi, ijkuakón okikakke itlajtol in Señor: ³² “Nej niDios de moweyitajwan. Nej niDios de Abraham, de Isaac iwan de Jacob.” Moisés opéj papatlaka (bibioka) de majkayotl iwan mach ok omixewiaya ok kitlatas. ³³ Ijkuakón in Señor okilwij: “Ximokakkixti porke kan titlaksatok tlatiochiwaloj. ³⁴ Yonikitak kenik tlajyowiaj nopolwan katlej katej Egipto. Yonikinkakilij inneyolkokolis iwan oniwältemok para nikinmakixtis. Axan kiné, xiwiki, nimitztitlanis Egipto.”

³⁵ Maski yejwan okikokolijkej in Moisés iwan okilwijkej: “¿Akin omitztlalij kej titekiwaj o noso kej tijues para ximokalaki towan?” Dios okitlalij in Moisés iwan okititlanke kej tekiwaj iwan kej temakixtij, iwan ángel okipalewij katlej okimonextilij itech kuatlanwitztle katlej otlatlatoka. ³⁶ Yen Moisés okinkixtij de Egipto in ya wejkawitl toweyitajwan, iwan okinchij milagrostin iwan señaletin itech nekáj tlale de Egipto, itech mar itoka Chichiltik iwan kan tlawaki, ijkón okichij kej omenpoale xiwitl. ³⁷ Yen yon Moisés katlej achtoj okinmilwij in tlakaj de Israel: “Dios amechwaltitlanilis se profeta ken nej onechwaltitlanke, iwan kisas de yen namejwan. Xikneltokilikan tlan amechilwis.” ³⁸ Yen yon Moisés katlej oyeka inwan tlakaj de Israel kan tlawaki, noijki katlej okitlapowij in ángel kan tepetl Sinaí, noijki katlej oyeka inwan ya wejkawitl toweyitajwan, iwan noijki katlej okimaktijkej in tlajtole katlej kitemaka nemilistle, para satepan tejwan ma techpanoltli.

³⁹ Pero in ya wejkawitl toweyitajwan mach okineltoijkej, sino omixkuepkej iwan okinekiaj mokuepanij para Egipto. ⁴⁰ Okilwijkej in Aarón: “Xitechinchiwili sekimej diosmej katlej ma techyekananakan, porke mach tikmatij tlan opanok in Moisés katlej otechkixtij de Egipto.” ⁴¹ Iwan

ikuakón okichijkej se dios kej se torojkonetl, okitlamiktilijkej iwan okitlamaniijkej. Iwan omopaktijkej por tlan yejan okimochiwilijkej ika inmawan. ⁴² Por yonik Dios okinkaj, iwan okinkawilij ma kinweyikixtikan in sitlaltin de ilwikak. Ijkón ken kajki ikuilitok itech inlibro in profetajtín:

Tlakaj de Israel, ¿itech yonmej omenpoale xiwitl kan tlawaki kox yen Nej nannechtlamiktilijkej iwan nannechtlamanili-
jkej?

⁴³ Pues amo, yej ankitkaj itiopantzín in dios Moloc iwan sitlale de yen dios Renfán.

Yonmej diosmej namejwan ankinchijkej iwan ankinweyikix-
tijkej.

Por yonik, Nej namechkixtis de itech amotlal,
iwan namechtitlanis asta okachi wejka de yen país de Babilo-
nia.

⁴⁴ In ya wejkawitl toweyitajwan okitkitinemaj kan tlawaki se mantajtiopantzín iwan ompa ijlik okitkaj in temej kan oikuilitoka itlanawatilwan in toTajtzin Dios. Yon mantajtiopantzín Moisés okichij ijkón ken Dios okinextilij iwan okinawatij ijkón ma kichiwa. ⁴⁵ Yon mantajtiopantzín katlej okichij Moisés, opanok inmak in ya wejkawitl toweyitajwan iwan okualkuikej nian nikuak okitlankej in guerra de itech pueblojtin katlej mach judiojtin. Nikuak Josué oyeka tlayekanke, Dios okinkixtij nekatej tlakaj de itech intlal, iwan ya wejkawitl toweyitajwan okonankej in tlale. In ya wejkawitl toweyitajwan okipixkej in mantajtiopantzín asta ikuak oyeka in rey David. ⁴⁶ Dios okitlaosjtak miek in David. Iwan David okinekke kichiwas se weyi tiopan para ke ipilwan in Jacob ompa ma kiweyikixtikan in Dios. ⁴⁷ Pero mach yen David okichij in weyi tiopan de toTajtzin Dios, sino yen Salomón okichij. ⁴⁸ Maski in Dios katlej Weyikistok (Weyititok) mach chanti itech tiopanmej katlej kinchiwaj in tlakaj. Ken okijtoj in profeta:

⁴⁹ Kijta in Señor,

In ilwikak yen kan niewatok iwan
in tlaltikpak yen kan tlaksatokej nokxiwan.

¿Tlan kale ankinekij annechchiwiliskej namejwan?

¿Kan nichantis iwan kan nimosewis?

⁵⁰ ¿Amo yen Nej katlej onikchij in ilwikak iwan tlaltikpak?

⁵¹ Esteban okinmilwiaya:

—Pero namejwan sa tekitl anyoltakuawakej. Mach ankinekij ankikakiskej itlajtol in Dios iwan nion mach ankinekij ankineltokiliskej. Nochipa ankixpanawiaj in Espíritu Santo, ijkón okichijkej in ya wejkawitl namoweyitajwan iwan namejwan no ijkón ankichiwaj. ⁵² Iwan namoweyitajwan noijski

okintlatlalochtijkej in profetajtin. Yejwan okinmiktijkej in profetajtin akinmej okijtoayaj nik se tonale witz in tlakatl katlej mach kipia nion se tlajtlakole, iwan axan yon tlakatl yowitza, iwan namejwan ankitemaktijkej (onkitemaktili-jkej) iwan ankimiktijkej.⁵³ Namejwan ankiresibirojkej in tlanawatiltin de Dios katlej oamechmakakej in angelestин, pero mach ankichiwaj.

Esteban okimiktijkej

⁵⁴ Nijuak okikakej tlan okijtoj in Esteban, sa tekitl okualankej asta omotlanteteyitzkej.⁵⁵ Pero in Esteban oten-toka de Espíritu Santo, oajkopantlachixke ik ilwikak iwan okitak imawisotlanex in Dios. Okitak in Jesús moketok ik iyekma in Dios.⁵⁶ Iwan okijtoj:

—Xikitakan, nikita in ilwikak tlapotok. Nikita in Jesús katlej omochij tlakatl moketok ik iyekma in Dios.

⁵⁷ Ijkuakón yejwan omonakastzajtzakej iwan okuawtzatzikej chikawak, iwan nochtin omotlalojkej iwan okikitzki-jkej in Esteban.⁵⁸ Okixtijkej in Esteban de itech weyikan de Jerusalén iwan okimojmotlakej ika tetl. Iwan katlej okimojmotlakej okinkajtejkej intlakenwan ma kintlato se telpochtle itoka Saulo.⁵⁹ Nijuak okimojmotlatokaj, Esteban omotiotzatzilij, okijtoj:

—Señor Jesús, xikresibiro noanima.

⁶⁰ Satepan omotlankuaketzke iwan okijtoj chikawak:

—Señor, amo xikinchiwili kuenta yin tlajtlakole tlan kichi-waj.

Nijuak otlanke ijkón okijtoj, omikke.

8

Saulo okinekia kinmiktiani nochtin in tlaneltokakej

¹ Saulo okijtoj kuale kajki ma kimiktikan in Esteban. Itech nekáj tonale opéj kintlatlalochtiaj in tlaneltokakej katlej oyekaj Jerusalén. Nochtin ochocholojkej ik región de Judea iwan ik región de Samaria, pero in tlatitlaniltin mach ocholojkej.² Sekimej tlaneltokakej katlej sa tekitl omotemaktiaya jinawak Dios okitookatoj in Esteban. Sa tekitl okichokilijkej.³ Pero in Saulo opéj kintlatlalochtia in tlaneltokakej. Okalakia kalpan, okinkixtiaya iwan okinkokuyotzaya okichtin iwan siwamej iwan okintzakuaya telpiloyan.

Felipe okitematiltij itlajtol in Dios itech región de Samaria

⁴ Iwan katlej ochocholojkej de Jerusalén, otetlapowiayaj de yen kuale tlajtole katlej temakixtia ik nian nepa san kanik oyayaj.⁵ Felipe, se de yejwan katlej ocholojkej, oyáj itech se weyikan itech estado de Samaria iwan ompa opéj tetlapowia

de Cristo. ⁶ Miekej tlakaj omololoaya iwan okikakiaj ika nochí inyolo tlan okinmilwiaya in Felipe. Okitayaj okinchíwaya señalestin. ⁷ Miekej tlakaj katlej okipiayaj ejekamej mach kualtin opajtikej, iwan ejekamej asta otzajtziaj níkuak okisayaj. Noijki opajtikej in koxomej iwan wilanmej (temetlamej). ⁸ Iwan por yonik, oyeka miek pakilistle itech yon weyikan.

⁹ Ompa itech yon weyikan oyeka se tlakatl itoka Simón. Yon Simón oyeka texoxke (brujo) iwan okinkajkayawa ika itexoxalis (ibrújería) in tlakaj de yon estado de Samaria. Okijoaya nik mach akaj oyeka oksé ken yej. ¹⁰ Nochtin in tlakaj, desde pilalaktin asta katlej ya tetajmej okineltokiliaya in Simón. Okijoaya:

—Yin Simón kipia poder de Dios.

¹¹ Iwan okineltokiliaya, porke ika itexoxalis ya wejkawitl kinkajkayajtiwitz. ¹² Iwan níkuak yejwan okikakej in kuale tlajtole katlej temakixtia katlej Felipe okinmatiltij, yejwan okineltokakej. Felipe okintlapowij kenik in Dios tlanawatia iwan okintlapowij de Jesucristo. Miekej okichtin iwan siwamej omokuateekijkej. ¹³ Noijki in Simón texoxke okineltokak iwan omokuateekij, iwan opéj kiwikatinemi in Felipe. Okinmitaya in wejweyin milagrostín iwan señalestin, iwan sa omotetzawiaya.

¹⁴ In tlatitlaniltin katlej oyekaj Jerusalén okimatkej nik in tlakaj de itech estado de Samaria okineltokakej itlajtol in Dios. Ijkuakón ompa okintitlankej in Pedro iwan Juan. ¹⁵ Níkuak ompa oajsitoj, omotiotzajtzilijkej por yen yankuikej tlaneltokakej de Samaria, para ma kiresibirokan noijki in Espíritu Santo. ¹⁶ Porke ayamo okipiayaj ipan inyolo in Espíritu Santo, porke san ok omokuateekijkej ika itoka in toSeñor Jesús. ¹⁷ Ijkuakón Pedro iwan Juan okintlalijkej inmawan inpan yonmej tokniwan, iwan ijkuakón okiresibirojkej in Espíritu Santo.

¹⁸ In Simón texoxke okinmitak in tlatitlaniltin okintlaliaya inmawan inpan tlaneltokakej iwan okiresibiroayaj in Espíritu Santo. Iwan ijkuakón yej okinmijijtolij tomin in tlatitlaniltin. ¹⁹ Okinmilwij:

—Xinechmakakan nej noijki yon poder, para níkuak nej nikintlalis nomawan ipan akaj tlakatl, ma kiresibiro noijki in Espíritu Santo.

²⁰ Pedro okinankilij:

—¡Motomin mowan ma pojpoliwi! Tej tikyejyekoa ke tlan Dios techmaka weli mokowa ika tomin. ²¹ Tej mach itlaj tikpia towan iwan nion mach mitztokaroa tikpias itlaj itech yin tekitl, porke moyolo mach kajki chipawak inawak Dios.

²² Ximoyolpejpena (ximoyolkuepa) de yin tlajtlakole tlan tikchiwa, iwan xiknotza in Dios, iwan xamo ijkón mitzlapo-jpolwis de tlan tikyejyekoa ipan moyolo. ²³ Porke nikita sa tekitl tichichikatentok iwan motlajtlakol mitztakatzojtok.

²⁴ Toneses in Simón okinmilwij:

—Xitiotzajtzikan por nej, para amitlaj ma nipano de tlan ya annechilwijkej.

²⁵ Satepan de otlapojkej iwan de okitematiltijkej itlajtol in Dios, in tlatitlaniltin omokuepkej para Jerusalén. Iwan itech miekej pueblojtin itech estado de Samaria kanik opanotiyaj, ompa okitematiltitajkej noiiki in kuale tlajtote katlej temakixtia.

Felipe iwan se tlakatl de Etiopía

²⁶ Satepan se iángel in Señor okilwij in Felipe:

—Ximoketza iwan xiwia ik tlani. Xiwia ipan ojtle katlej yawi de Jerusalén para Gaza.

Yon ojtle panotok kan tlawaki. ²⁷ Felipe omoketzke iwan oyáj. Iwan ipan ojtle okajsito se tlakatl de país de Etiopía. Yon tlakatl eunuco oyeka weyi tekiwaj tesorero de se reina itoka Candace, reina de Etiopía. Yon tlakatl owalaya de Jerusalén kan okiweyikixtito in Dios. ²⁸ Yoyaya para ichan ewatotiw ipan ikarreta, iwan okilerojtiaya itlajkuilol in profeta Isaías.

²⁹ In Espíritu Santo okilwij in Felipe:

—Xiwia xikajsiti nekáj karreta.

³⁰ Nijuak in Felipe okajsito, okikakke in tlakatl etiope kilerojtiw itlajkuilol in profeta Isaías, iwan okitlajtlanij:

—¿Kox tkmomaka kuenta tlan tiklerojtiw?

³¹ In etiope okinnankilij:

—¿Kenik nikmomakas kuenta? Mach onkaj akin nech-tomilis.

In etiope okitlatlawtij in Felipe ma tlejko iwan ma motlali inakastlan. ³² Tlan okilerojtiaya in etiope, ijkín kijta:

Okiwikakej kej se ichka kan tlamiktiaj.

Iwan kej se ichkatzin mach tzajtzi nijuak kiximaj, no ijkón Yej mach itlaj okijtoj nijuak okimiktijkej.

³³ Okimawispolokej, okitlajtlakoltijkej iwan okimiktijkej maski mach itlaj okichij.

¿Kenik welis se tlajtos de ipilwan?

Tla antes de kinpiani yej okikixtilijkej inemilis.

³⁴ In tekiwaj etiope okitlajtlanij in Felipe:

—Nimitzlatlawtia xinechilwi, ¿de akin tlapoa in profeta, tlapoa de yej o noso de akaj oksé?

³⁵ Toneses in Felipe, opéj kitlapowia de yen itlajkuilol Isaías kan etiope okilerojtiaya, iwan okitlapowij de yen kuale tlajtote katlej temakixtia de Jesús. ³⁶ Okachi tlayakapan, oajsitoj se lado kan oyeka atl, iwan tlakatl etiope okijtoj:

—Nian onkaj atl, ¿amo welis tinechkuateekis?

³⁷ Felipe okilwij:

—Tla ika nochí moyolo tikneltoka in Cristo, toneses welis.

In tlakatl etiope okilwij:

—Nikneltoka nik in Jesucristo yen iKone in toTajtzin Dios.

³⁸ In tlakatl etiope okilwij itekipanoj ma kiketzalti ikarreta, iwan san ken omen otemokej ijtitl atl, iwan Felipe okikuateekij in etiope. ³⁹ Nijuak okiskej de ijtitl atl, iEspíritu in toSeñor okiwikak in Felipe, iwan tekiwaj etiope mach ok okitak, iwan oyáj ipan iojwi ika pakistle. ⁴⁰ Pero in Felipe oneske asta itech weyikan de Azoto, iwan de ompa oyáj otetlapowijtiaj de yen kuale tlajtote katlej temakixtia itech pueblojtin kanik yej opanotiyaya asta oajsito itech weyikan de Cesarea.

9

Saulo omokuepke tlaneltokak

(Hch. 22:6-16; 26:12-18)

¹ In Saulo, ok okualantinemia iwan okintemojtinemia in momachtijkej tlaneltokakej de toSeñor, para kinmiktis. Por yonik, oyáj okitato in weyi tiopixke, ² iwan okitlajtlanilij se amatlanawatile para kiteitisits itech tiopanmej de yen judio-jtin katlej katej itech weyikan de Damasco, kan kijtojtiw ma kikawilikan ma kinkitzki san akin kajsis, okichtin iwan siwamej katlej nemij itech iojwi in Jesús, para kinwalinwikas kintzakuaki Jerusalén. ³ Iwan nijuak yoyaya ipan ojtle iwan yoajsitiaya itech weyikan de Damasco, ikuakón ovalaj ipan Saulo se tlawile de ilwikak teixmijmiktij. ⁴ Ikuakón Saulo owetzito ipan tlale, iwan okikakke se tlajtote, okilwij:

—Saulo, Saulo, ¿tlanik wel tinechtemojtinemi iwan tikneki tinechkojkokos?

⁵ Saulo otlanankilij:

—¿Akin tej, tejwatzin?

In tlajtote okinankilij:

—Nej niJesús, katlej tej tiktemojtinemi. ⁶ Axan, ximoketza iwan xiwia itech weyikan, ompa mitzilwiskej tlan tikchiwas.

⁷ In tlakaj katlej oyayaj iwan Saulo, omomawtijkej iwan omokajkej sa tlakaktej, porke okikakej ke akaj otlajtoaya pero mach akaj okitakej. ⁸ Satepan Saulo omoketzke de ipan tlale, pero nijuak okintlapoj ixtololowan, mach ok owelik otlachixke. Sa okimatilankej iwan okiwikakej para

itech weyikan de Damasco. ⁹ Ompa oyeka eyi tonale, mach ok otlachiaya, mach ok otlakuaya iwan nion mach ok itlaj okonia.

¹⁰ Ompa Damasco ochantia se tlakatl momachtij tlaneltokak itoka Ananías, katlej in toSeñor okimonextilij kej yeskia teemiktok. Okilwij:

—¡Ananías!

Yej otlanankilij:

—Nian nikaj, Señor.

¹¹ In Señor okilwij:

—Ximoketza iwan xiwia itech ojtle katlej itoka Melaktik, iwan xitlajtlani kan ichan Judas, iwan ompa xitlajtlani kox ompa kajki se tlakatl de Tarso itoka Saulo, yej ompa motiotzatzilijtok. ¹² Iwan maski amo tlachia, yej omitzitak kej yeskia okitemikke, kan tej Ananías tikalaki kalijtik iwan tikintlalia momawan ipan para ma tlachia oksemi.

¹³ Ijkuakón Ananías okijtoj:

—Señor, miekej yonechtlapowijkej de yon tlakatl Saulo, iwan de nochí tlan yokintoktij in yolchipawakej de Jerusalén.

¹⁴ Iwan axan yowalaj nian, kiwalkui se amatlanawatile de yen tlayekankej tiopixkej para kinkitzkis iwan kinwikas nochtin katlej kitenewaj motoka.

¹⁵ Pero in Señor okilwij:

—Xiwia, porke yonikpejpenke yon tlakatl Saulo, para ma kintlapowi de Nej in tlakaj katlej mach judiojtin, iwan noijki para ma kintlapowi in reytin iwan tlakaj de Israel. ¹⁶ Nej nikititis kenik tlajyowis por Nej.

¹⁷ Ananías oyáj ichan Judas kan oyeka in Saulo. Okalakke iwan okintlalij imawan ipan Saulo, iwan okilwij:

—Nokni Saulo, in Señor Jesús, katlej omitzmonextilij ipan ojtle kan otivalaya, onechwaltitlanke para xitlachia oksemi iwan para xitemi de Espíritu Santo.

¹⁸ San niman otepewik de itech ixtololowan in Saulo sekin kej tlatlapachte (kakapachtlí), iwan otlachixke oksemi. Satepan omoketzke iwan omokuateekij. ¹⁹ Satepan otlakuaj iwan okitzkij chikawalistle oksemi, iwan omokaj kanaj keski tonale inwan tlaneltokakej de Damasco.

Saulo otetlapowij itech weyikan de Damasco

²⁰ San niman Saulo opéj tetlapowia itech tiapanmej de yen judiojtin nik Jesús yen iKone in toTajtzin Dios. ²¹ Nochtin katlej okikakiaj sa otlajtlachiayaj (omomajmawtiayaj), iwan okijtoayaj:

—¿Amo yen yin tlakatl katlej okintemoaya ne Jerusalén akinmej kitenewaj itoka in Jesús? ¿Amo yen yin noijki katlej

owalaj nian para kinkitzkis in tlaneltokakej iwan kintemaktis (kintemaktilis) inmak in tlayekankej tiopixkej?

²² Pero in Saulo otlaajoaya ika ixchikawalistle. Okinkamatzakke in judiojtin katlej ochantiaj Damasco. Iwan ika itlajtol in Dios okinmititiaya nik in Jesús yen Cristo katlej Dios okipejpenke para techmakixtis.

Saulo okincholilij in judiojtin

²³ Opanok kanaj keski tonale, in judiojtin omotlatlalwi-jkej para kimiktiskej in Saulo, ²⁴ pero yej san niman okimatke. Tonayan iwan yuak okixpiyaj itech puerta de yon weyikan para kimiktiskej. ²⁵ Pero imomachtijkawan in Saulo, okikalakijkej ijtk se chikiwitl iwan okitemowijkej de yuak itech tepamitl katlej kiyawalojtok in weyikan. Iwan ijkón nik ocholoj.

Saulo oyáj Jerusalén

²⁶ Nijuak in Saulo oajsito Jerusalén, okinekia mosetilis inwan in momachtijkej tlaneltokakej. Pero nochtin okimakasiaj, porke mach okineltokayah nik in yej noijki yomokuepke momachtij tlaneltokak. ²⁷ Pero in Bernabé okiwikak in Saulo okinmixpantilito in tlatitlaniltin. Okinmakak kuenta kenik okitak iwan kenik okitlapowij in Señor ipan ojtle nijuak oyaya para itech weyikan de Damasco, iwan kenik otetlapowij de Jesús ika ixchikawalistle ompa Damasco. ²⁸ Ijkón, Saulo omokaj ompa Jerusalén iwan onemia inwan tlatitlaniltin. ²⁹ Otetlapowiaya de toSeñor ika ixchikawalistle. Otetlapowiaya iwan omotlajtoltkuekuepaya inwan judiojtin katlej otlapoayaj griego. Pero yejwan okitemoaya kenik kimiktiskej. ³⁰ Nijuak in tokniwan tlaneltokakej okimatkej, okiwikakej in Saulo para itech weyikan de Cesarea, iwan de ompa okititlankej para itech weyikan de Tarso.

³¹ Itech yonmej tonaltin in tiopantlaneltokakej de region-mej de Judea, de Galilea iwan de Samaria, oyolosewtinemiaj iwan okajsiaj chikawalistle itech intlaneltokalis iwan opéj nemij ken toSeñor kineki. In Espíritu Santo okinyolojchikawaya iwan omomiekiliayaj okachi.

Pedro okipajtij in Eneas

³² Nijuak in Pedro okintlapalojtinemia nochtin in yolchipawakej, noijki oyáj okintlapowito in yolchipawakej katlej ochantiaj Lida. ³³ Ompa okajsito se tlakatl wilan (temetlatzin) itoka Eneas, katlej yokiwikaya chikueyi xiwitl wetok ipan itlapech. ³⁴ Ikuakón Pedro okilwij:

—Eneas, Jesucristo mitzpajtia, ximewa iwan xikajkokui moperl.

Eneas san niman owalmejtewak. ³⁵ Iwan nochtin katlej ochantiaj itech weyikan de Lida iwan itech weyikan de Sarón okitakej kenik opajtik in Eneas iwan okineltokakej itlajtol in toSeñor Jesús.

Dorcus omoyolkui

³⁶ Itech nekatej tonaltin oyeka itech weyikan de Jope, se siwatl momachtij tlaneltokak itoka ika arameo Tabita, ika griego Dorcas kijtosneki masatl. Yej oyeka sa tekitl kuale tlakatl iwan okinpalewiaya katlej mach itlaj okipiayaj.

³⁷ Itech nekatej tonaltin, Dorcas omokokoj iwan omikke. Satepan de okipakej itlalnakayo, okimelajkej ajkopan ijtk se kuarto. ³⁸ In weyikan de Jope iwan weyikan de Lida mach wejka omotokaj, Pedro omajsia Lida iwan komo in momachtijkej tlaneltokakej okimatkej nik in yej ompa majsí, okintitlankej omen tlakaj ma kilwitij:

—San nimantzin xiwiki nian Jope.

³⁹ Pedro okinwikak. Nijuak oajsito ompa, okiwikakej ajkopan ijtk kuarto kan melatok in mikkatl, iwan nochtin in viudajtin okiyawalojkej in Pedro chokatokej, iwan okinmititijkej in kuemej iwan ichkapayojtin tlan Dorcas okinchiwilij nijuak ok oyolitoka. ⁴⁰ Pedro okinkixtij nochtin. Omotlankuaketzke iwan omotiotzajtzili. Satepan omokuepke para kanik kajki in mikkatl, iwan okilwij:

—¡Tabita, ximewa!

Ijkuakón Tabita okintlapoj ixtololowan. Nijuak okitak in Pedro, omotlalij. ⁴¹ Pedro okimakitzkij in Dorcas iwan okiketzaltij. Satepan okinnotzke in tokniwan yolchipawakej iwan viudajtin, iwan okinmixpantilij yolitok. ⁴² Yon tlan otapanok omomatke itech nochti in weyikan de Jope, iwan miekej okineltokakej in toSeñor. ⁴³ Pedro omokaj miek tonale ompa Jope. Omokaj ichan Simón katlej kitekipanoa kuetlaxtle.

10

Cornelio okinotzke in Pedro

¹ Itech weyikan de Cesarea oyeka se tlakatl itoka Cornelio. Yej oyeka kapitan de se siento soldadojtin, iwan yon grupo de soldadojtin okitokayotiyaj Italiano. ² Cornelio iwan nochti ifamilia sa tekitl omotemaktiayaj inawak Dios. Yej okitemakaya miek tomin para okinpalewiaya in judiojtin katlej mach itlaj okipiayaj, iwan nochipa omotiotzajtzili. ³ Se tonale, kej las tres de tiotlakke Cornelio okitak kej yeskia se teemiktle, okitak se ángel de Dios katlej okalakke ikalijtik kan yej oyeka iwan okilwij:

—¡Cornelio!

⁴ Cornelio okimelajkatlatak in ángel ika miek nemawtile iwan okinankilij:

—¿Tlanon tikneki, Señor?

In ángel okilwij:

—Dios ya mitzkaktiwitz níjkuak timotiotzajtzilia iwan nochí tlan tikchijtiwitz para tikinpalewia katlej mach itlaj kipiaj. ⁵ Xikintitlani sekimej tlakaj itech weyikan de Jope para ma kinotzatij in Simón, katlej noijki kinotzaj Pedro. ⁶ Kalotitok ichan oksé tlakatl katlej noijki itoka Simón, katlej kitekipanoa kuetlaxtle, iwan chanti itempan atl.

⁷ Níjkuak in ángel oyáj, Cornelio okinnotzke omen itekipanojkawan iwan se soldado katlej sa tekitl omotemaktiaya inawak Dios katlej okipalewiaya in Cornelio. ⁸ Okintlapowij de nochí tlan okitak, iwan satepan okintitlanke para Jope.

⁹ Owalmostlatik, kej tlajko tonale, níjkuak yejwan oyayaj ipan ojtle iwan yojsitiaya jope, ikuakón Pedro otlekkok omotiotzajtzilito ikpak kale kan okalotitoka. ¹⁰ Sa tekitl otiosjsjtoka iwan okinekia tlakuas, iwan mientras okichiwilijtokaj tlan kikuas, Dios okititij kej yeskia se teemiktle, ¹¹ okitak in ilwikak otlapowik iwan owaltemoaya ipan tlale kej se weyi manta oilpitiwalaya nawkan lado. ¹² Itech yon manta oyekaj miekej yokamej de nawi inmikxiwan, noijki katlej motilanaj ipan tlale iwan katlej patlanij. ¹³ Ikuakón Pedro okikakke se tlajtote, okilwij:

—Ximoketza Pedro, xitlamiki iwan xitlakua.

¹⁴ Pedro otlanankilij:

—¡Amo, Señor! Nej mach semi nikua itlaj yokatł katlej mach chipawak o noso mach kuale para mokuas, katlej itlanawatil in Moisés mach techkawilia ma tikkuakan.

¹⁵ In tlajtote oksemi okilwij:

—Amo xikijo mach chipawak tlan Dios yokichipaj.

¹⁶ Ijkón otlapanok eyi buelta, iwan satepan in manta oksemi otlekkok ilwikak. ¹⁷ Níjkuak in Pedro ok otlanemilijtoka tlan kijtosneki tlan okitak, ikuakón oajsikoj kaltempán itekipanojkawan in Cornelio, katlej tlajtlantiwitzej kan ichan in Simón. ¹⁸ Níjkuak oajsikoj otlajtlankej chikawak kox ompa kalotitok se tlakatl itoka Simón, katlej noijki kinotzaj Pedro.

¹⁹ Níjkuak in Pedro ok otlanemilijtoka tlan kijtosneki tlan okitak, in Espíritu Santo okilwij:

—Xikkaki, mitztemoaj eyin tlakaj. ²⁰ Ximoketza, xitemo iwan xikinwika iwan amo xikmolwi kox tias o noso amo porke Nej onikinwalintitlanke.

²¹ Pedro otemok iwan okinmilwij itekipanojkawan in Cornelio:

—Yen nej katlej namejwan ankitemoaj. ¿Tlan nankinekiaj?

²² Yejwan okinankilijkej:

—Otechwaltitlanke in kapitan Cornelio, yej sa tekitl kuale tlakatl iwan motemaktia inawak Dios, iwan nochtin in judio-jtin kuale tlajtoaj de yej. Se ángel de toTajtzin Dios okilwij ma mitzwaltekuitlan para xiwia ichan Cornelio, para ma kikaki tlan tejwatzin tikilwis.

²³ Ijkuakón Pedro okinmilwij ma kalakikan, iwan yon yuak ompa omokajkej. Owalmostlatik in Pedro okinwikak. Noijki oyajkej inwan oksekimej tokniwan tlaneltokakej de Jope.

²⁴ Owalwiptlatik oajsitoj Cesarea kan Cornelio okinchix-toka. Noijki ompa oyekaj ifamiliareswan iwan sekimej tlakaj katlej kuale inwan omoyekwikaya, katlej okinnotzke para ma kixmatikan in Pedro. ²⁵ Nijuak in Pedro oajsito kaltempan, Cornelio okiske okinamíkito, iwan omotlankuaketzke ikxitlan para kiweyikixtis. ²⁶ Tones in Pedro okiketzaltij, iwan okilwij:

—Ximoketza, nej noijki nitlakatl ken tej.

²⁷ Iwan okalakej motlapowijitiwej, okinmitajsik in Pedro miekej tlakaj ololitokej. ²⁸ Ijkuakón Pedro okinmilwij:

—Namejwan ankimatij ke itlanawatil in Moisés mach kitekawilia ma monelo se judío iwan se katlej mach judío. Pero Dios onechititij ke nion se tlakatl mach ma nikita kej mach kuale o noso mach chipawak inawak Dios. ²⁹ Por yonik, san niman nijuak annechekuitlankej, oniwalaj iwan mach itlaj onikijtoj. Nikneki nikmatis kiné, por tlanik annechnotzatoj.

³⁰ Cornelio okinankilij:

—Ya kipia nawi tonale, kej de yin ora de las tres de tiot-lakke, nej nian onieka nochan onimotiotzajtzilitoka, iwan ijkuakón onechmonextilij se tlakatl tlakenpetlantok. ³¹ Iwan onechilwij: “Cornelio, Dios yokikakke motiotzajtzilis iwan okelnamikke tlan tikchiwa para tикиpalewia katlej mach it-laj kipiaj. ³² Xiktekuitlani itech weyikan de Jope, ma kinotzatij in Simón katlej noijki kinotzaj Pedro, kalotitok ichan oksé Simón, katlej kitekipanoa kuetlaxtle iwan chanti itempan atl.” ³³ Por yonik san niman onimitztekuitlanke, iwan niktlasojkamati por otivalaj. Axan nian tikatej tinochtin ixpan Dios, iwan tiknekij tikkakiskej nochi tlan toSeñor omitzilwij xiwiki xitechilwiki.

Pedro otlapoj ichan Cornelio

³⁴ Ijkuakón Pedro opéj kintlapowia, okijtoj:

—Axan nikmomaka kuenta ipan melajka nik in Dios mach kintlasojtla san sekimej iwan oksekimej amo, ³⁵ sino itech nochi in tlaltikpak in Dios kinneki akinmej kitlakitaj iwan

kichiwaj tlan kuale. ³⁶ Dios otechmakak itlajtol tejwan ti-judiojtin, otechmatiltij in tlajtole de yolosewilistle itech yen toSeñor Jesucristo, yen Señor de tinochtin. ³⁷ Namejwan kuale ankimatij tlan otlapanok itech nochti in tlale de Judea. Opejke itech estado de Galilea, satepan de ikuak otetlapowij iwan otlakuateekij in Juan. ³⁸ Namejwan ankimatij nik in Dios okititlanke in Espíritu Santo itech Jesús de Nazaret para okipixke poder. Iwan ankimatij nik in Jesús okichiwaya tlan kuale. Okinpajtij nochtin akinmej okintlajyowitzia in diablo. Jesús okichij nochti yon porke Dios okipalewiaya. ³⁹ Tejwan kuale tikmatij porke otikitakej nochti tlan okichiwaya in Jesús, itech región de Judea iwan itech weyikan de Jerusalén. Satepan okimajmasoltijkej itech se krus iwan okimiktijkej. ⁴⁰ Pero Dios okiyolitij ipan eyi tonale, iwan okichij ma techmotiti. ⁴¹ Mach okinmotitij nochtin, sino san tejwan katlej Dios achtoj otechpejpenke para satepan ma tiktematiltikan tlan otikitakej. Nijuak omikke iwan oksemi omoyolkui, tejwan otitlakuajkej iwan otikonikej Iwan. ⁴² Iwan Yej otechtitlanke ma titetlapowikan iwan ma tikmatiltikan in tlakaj, nik yen Dios okitlalij in Jesús kej juev para techixkomakas (techtzonmanas) tinochtin katlej tiyolitokej iwan noijki katlej yomikkej. ⁴³ Ya wejkawitl nochtin in profetajtin otlajtojkej de Yej. Okijtojkej nik nochtin akinmej kineltokaskej in toSeñor Jesús ika itoka, Dios kintlapojpolwis de intlajtlakol.

Katlej mach judiojtin intech ovalaj in Espíritu Santo

⁴⁴ Pedro ok otlapojtoka iwan ikuakón in Espíritu Santo ovalaj intech nochti akinmej okikaktokaj itlajtol. ⁴⁵ Iwan in tlaneltokakej judiojtin katlej okiwalwikakej in Pedro, sa otlajtlachixkej (omomajmawtijkej) porke Dios okinnokilij iEspíritu Santo noijki katlej mach judiojtin. ⁴⁶ Porke okinkakiaj otlapoayaj iwan okiweyikixtiayaj in Dios ika oksekimej tlajtoltin. Yonmej tlajtoltin mach semi okinkakiaj.

⁴⁷ Ikuakón Pedro okijtoj:

—¿Amo welis mokuateekiskej noijki in yinmej tlakaj katlej yokiresibirojkej in Espíritu Santo noijki ken tejwan?

⁴⁸ Iwan otlanawatij ma mokuateekikan ika itoka in toSeñor Jesucristo. Satepan okitlatlawtijkej in Pedro ma mokawa ompa inwan kanaj keski tonale.

11

Pedro okitemakak kuenta de tlan otlamochij itech weyikan de Cesarea

¹ In tlatalaniltin iwan tokniwan tlaneltokakej katlej oyekaj Judea, okimatkej ke noijki katlej mach judiojtin okikakej

iwan okineltokakej itlajtol in toTajtzin Dios. ² Iwan nikuak in Pedro omokuepke para Jerusalén, sekimej tlaneltokakej judiojtin katlej yotlaneltokakej inawak Jesús okajwakej in Pedro. ³ Okilwijek:

—¿Tlanik otiwia otikinmitato katlej mach judiojtin iwan otitlakuatoj inwan?

⁴ Pedro opéj kinmaka kuenta de nochí tlan otlamochij iwan okinmilwíj:

⁵ —Nikuak nej onieka itech weyikan de Jope, iwan nikuak onimotiotzajtzilijtoka, onikitak kej yeskia onikteemikke, onikitak se manta patlawak ilpitok nawkan lado, iwan ovaltemoaya de ilwikak asta kan nej onieka. ⁶ Onikonyekitak para nikitas tlanon okipiaya ik tlajtik, iwan onikinmitak sekimej yolkamej de nawi inmikxiwan, sekimej yolkamej tekuanimej, sekimej katlej motilanaj ipan tlale iwan sekimej katlej patlanij. ⁷ Iwan onikakke se tlajtole onechilwij: “Ximoketza Pedro, xitlamikti iwan xitlakua.” ⁸ Pero nej onitlanankilij: “Amo, Señor. Nej mach semi nikua itlaj yolkatl katlej mach chipawak o noso mach kuale para mokuas, tlan itlanawatil in Moisés mach techkawilia ma tikkukan.” ⁹ Ijkuakón in tlajtole de ilwikak oksemi onechilwij: “Amo xikijto mach chipawak tlan Dios yokichipaj.” ¹⁰ Ijkón otlapanok eyi buelta, iwan san niman nochí oksemi otlejkok ik ilwikak. ¹¹ Niman ijkuakón, eyin tlakaj de Cesarea oajsitoj kan onikalotitoka onechtemojetiayaj porke se tlakatl de Cesarea okintitlanke ma nechtemotij. ¹² In Espíritu Santo onechnawatij ma niwia inwan iwan mach ma níkmolwi kox nias o noso amo. Noijki oyajkej nowan yinmej chikuasemej tokniwan. Nikuak otajsitoj Cesarea, tinochtin otikalakej ichan se tlakatl itoka Cornelio, ¹³ yej otechtlapowij kenik okitak se ángel omoketoka ikalijtik iwan okilwij: “Xikintitlani sekimej tlakaj itech weyikan de Jope para ma kinotzatij in Simón, katlej noijki kinotzaj Pedro, ¹⁴ iwan yej amechilwis kenik welis anmomakixtiskej de amotlajtlakol, tej iwan nochtin katlej katej mochan.” ¹⁵ Nikuak opéj nikintlapowia, in Espíritu Santo ovalaj intech yonmej tokniwan ijkón ken tejwan totech ovalaj. ¹⁶ Ijkuakón onikelnamikke de tlan okijtoj in toSeñor: “Ipan melajka, in Juan otlakuateekij ika atl, pero namejwan anmokuateekiskej ika Espíritu Santo.” ¹⁷ Iwan axan, tla Dios kinmaka yejwan noijki in Espíritu Santo, katlej tejwan noijki otechmakak nikuak otikneltokakej in toSeñor Jesucristo, ¿akin nej para ma nikilwi in Dios mach ijkón ma kichiwa?

¹⁸ Nikuak in tlaneltokakej de Jerusalén okikakej in yon tlajtole, mach ok itlaj okijtojkej iwan okiweyikixtijkej in toTajtzin

Dios, iwan okijtojkej:

—¡Axan tkmomakaj kuenta ke noijki katlej mach judiojtin, Dios kinkawilia ma moyolpejpenakan (ma moyolkuepakan) de intlajtlakol para ijkón welis kipiaskej nemilistle katlej mach keman tlamic!

In tlaneltokakej de weyikan de Antioquía

¹⁹ Nijuak okimiktijkej in Esteban, opéj noijki kintlatlalochtiaj in oksekimej tlaneltokakej. Sekimej ocholojkej oyajkej itech país de Fenicia, itech país de Chipre iwan itech weyikan de Antioquía. Itech yonmej lugartin okitematiltijkej in kuale tlajtole katlej temakixtia, pero okinmatiltijkej san yen judiojtin. ²⁰ Pero sekimej tlaneltokakej de Chipre iwan de Cirene oajsikoj itech weyikan de Antioquía, iwan yejwan noijki okintlapowijkej katlej mach judiojtin, okinmatiltiayaj in kuale tlajtole katlej temakixtia de toSeñor Jesú. ²¹ ToSeñor okinmakak poder para otetlapowijkej, iwan miekej okikajkej tlan achtoj okineltokayah, iwan okineltokakej in toSeñor Jesú.

²² Nijuak in tiopantlaneltokakej de Jerusalén okimatkej tlan tlapanotok ne Antioquía, ikuakón okititlankej in Bernabé ma wia ompa. ²³ Nijuak in Bernabé oajsito ompa Antioquía, okitajsik kenik in Dios okintiochiwaya, iwan sa tekitl opakke. Okinyolojchikaj nochtin, okinmilwij ika nochin ynyolo ma moyekketokan inawak toSeñor. ²⁴ Bernabé oyeka kuale tlakatl, tentok de Espíritu Santo iwan tentok de tlaneltokalistle. Iwan ijkón sa tekitl miekej omosetilijkej okachi inawak toSeñor.

²⁵ Satepan, Bernabé oyáj itech weyikan de Tarso okitemoto in Saulo. Nijuak okajsik, okiwikak para itech weyikan de Antioquía. ²⁶ Ompa omokajkej inwan tiopantlaneltokakej se xiwitl. Okinmachtijkej miekej tlakaj. Ompa Antioquía yakinika in momachtijkej tlaneltokakej opéj kintokayotiaj kristianostin.

²⁷ Itech nekatej tonaltin, sekimej profetajtin oyajkej de Jerusalén asta Antioquía. ²⁸ Se de yejwan itoka Agabo, omoketzke iwan okitematiltij ika Espíritu Santo nik yetos miek apostle itech nochin in tlaltikpak. Iwan ijkón otlapanok itech nekatej tonaltin nijuak in Claudio oyeka weyi tlanawatij de Roma. ²⁹ Ikuakón in momachtijkej tlaneltokakej de Antioquía, okimolwijkej kinpalewiskej ika san tlan yejwan weliskej kitemakaskej, para kintitlaniliskej inmikniwan tlaneltokakej katlej chantij itech estado de Judea. ³⁰ Iwan ijkón okichijkej. Tlan okololojkej Antioquía, okitkikej in Bernabé iwan Pablo, iwan yejwan okinmitkilijkej in tiopantlayekankej de estado de Judea.

12

Jacobo okimiktijkej iwan Pedro okitzakej

¹ Nojki itech nekatej tonaltin, in rey Herodes opéj kintlatlalochtia sekimej tiopantlaneltokakej. ² Okimiktij in Jacobo ikni in Juan ika espada, ³ como okitak okinpaktij in judiojtin, tones nojki otlanawatij ma kikitzkikan in Pedro. Yon otlapanok meroj itech ilwitr níjkuak mokua in pan katilej mach kipia levadura. ⁴ Níjkuak Herodes okitzkij in Pedro, okitzakke telpiloyan. Okintlalij nawi grupojtin de nanawin soldadojtin para ma kitlatokan. Herodes okimolwij kinmixpantilis in tlakaj san ma pano in ilwitr de pascua. ⁵ Ijkón in soldadojtin kuale okitlatokaj in Pedro itech telpiloyan. Pero in tiopantlaneltokakej mach ok omosewiayaj de omotiotzatziliayaj inawak Dios por yen Pedro.

Dios okikixtij in Pedro de ijtk telpiloyan

⁶ Yon yuak antes de tlanesis para Herodes kinmixpantilis in tlakaj, in Pedro okochtoka ilpitok ika ome kadenajtin iwan okitlatokaj omen soldadojtin ik inajnakastlan, iwan oksekimej soldadojtin oyekaj kaltempan ompa telpiloyan. ⁷ Ijkuakón owalmonextij se iángel in Señor iwan owaltlapetlanke ompa ijtk telpiloyan. In ángel okitilkoj in Pedro ik ikestlan, okijxitij iwan okilwij:

—¡Ximewa totoka!

San niman in kadenajtin owetzkej de itech imawan Pedro.

⁸ In ángel okilwij:

—Ximotzotzolti iwan ximokakti.

Níjkuak in Pedro omotzotzoltij iwan omokaktij, in ángel oksemi okilwij:

—Xikonaki mokoton iwan tiawij.

⁹ Pedro oyáj iwan ángel. Mach okimatiá kox melawak tlan okichijtoka in ángel. Okimolwiaya xamo san kiteemiktok.

¹⁰ Okipanawijkej se grupo de soldadojtin iwan okipanawijkej oksé grupo, iwan níjkuak oajsitoj kan sajwan de tepestle katilej kajki itempan ojtle, in sajwan omotlapoj iselti. In ángel iwan Pedro okiskej, iwan satepan de okipanawijkej se ojtle, in ángel okikajtej sa iselti in Pedro. ¹¹ Ijkuakón Pedro okimomakak kuenta, iwan okijtoj:

—Axan ipan melajka nikmomaka kuenta nik in Señor okualtitlanke iángel para nechmakixtis de imak Herodes, iwan de tlan okinekiaj nechtoktianij in judiojtin.

¹² Níjkuak okimomakak kuenta nik melawak okiske de ijtk telpiloyan, Pedro oyáj ichan María, imaman in Juan akin nojki kinotzaj Marcos, kan miekej oololitokaj omotiotzatziliytokaj. ¹³ Níjkuak in Pedro otlatalatzke kan puerta de itempan ojtle, se ichpochtle itoka Rode oyáj otlachiato

akin tlatatalatza. ¹⁴ Nijuak okitenkakke nik yen Pedro, sa tekitl opakke iwan mach okitlatlapolij, yej omotlaloj ik kalijtik okinmilwito nik in Pedro kajki kan puerta. ¹⁵ Ijkuakón okilwijkej in Rode:

—¡Tej tikuatlapoloa!

Pero yej okinmilwij nik melawak. Iwan yejwan okijtojkej:

—Mach yej, xamo san iángel.

¹⁶ Pedro ok otlatatalatoka kan sajwan. Iwan nijuak otlatlapojkej, okitakej iwan sa otlaajtlachixkej (omomajmawtijkej).

¹⁷ Pero yej okinchiwilij señas ika ima de ma mokamatza-kuakan, iwan okintlapowij de kenik in Señor okikixtij de kan otzaktoka. Iwan okinmilwij:

—Xiktlapowikan in Jacobo iwan tokniwan tlaneltokakej de tlan onipanok.

Satepan okiske de ompa iwan oyáj oksé lado.

¹⁸ Nijuak otlaneske, in soldadojtin sa tekitl opéj motlatlaloaj iwan mach ok okimatiaj tlan kichiwaskej porke mach okimatiaj tlan opanok in Pedro. ¹⁹ Herodes otlanawatij ma kitemokan kuale in Pedro pero mach okajsikej. Ijkuakón okintlatzintokij in soldadojtin iwan komo mach owelik okimakakej itlaj rason, otlanawatij ma kinmiktikan. Satepan, Herodes okiske de estado de Judea iwan oyáj ochantito itech weyikan de Cesarea.

Herodes omikke

²⁰ In rey Herodes okualantoka innawak in tlakaj de weyikan de Tiro iwan de Sidón katlej de oksé país, pero yonmej tlakaj omotlalijkej san se tlajtole iwan oyajkej okitatoj in Herodes asta Cesarea. Se tlakatl itoka Blasto, tekiwaj de yen rey Herodes, okimoamigojijkej iwan okitlatlawtijkej yen ma kitlapowi in Herodes para ma kintlapojpolwi iwan mach ok ma kualani, porke in tlakaj de Tiro iwan tlakaj de Sidón okonkuiaj tlan kikuaskej itech ipaís in rey. ²¹ Herodes okitlalij se tonale para inwan motlapowis in tlakaj de Tiro iwan de Sidón. Iwan nijuak oajsiko yon tonale, Herodes omotzotzoltij ika katlej okachi kuale itzotzol katlej konakiaj in reytin, omotlalij itech isiya de rey, iwan ijkuakón okintlapowij. ²² Ijkuakón in tlakaj opéj tzajtzij chikawak:

—¡Yin katlej techtlapowijtok, techtlapowijtok se dios mach se tlakatl!

²³ San niman ijkuakón, iángel in Señor okichij in Herodes ma mokokojtiwetzi, porke mach okiweiyikixtij in Dios, ochakaloak iwan omikke.

²⁴ Itlajtol in Dios omotematiltiaya iwan oxoyawia (oxitinia) okachi ik nian nepa.

²⁵ Nijuak in Bernabé iwan Saulo yokitlamijkej intekiw ne Jerusalén, omokuepkej para Antioquía. Okiwikakej in Juan katlej noijki kinotzaj Marcos.

13

Bernabé iwan Saulo okintitlankej ma tetlapowitij oksekan

¹ Kan oyekaj in tiopantlaneltokakej de Antioquía, oyekaj sekimej profetajtin iwan sekimej tlamachtijkej. Ompa oyeka: Bernabé, Simón katlej okitokayotiayaj Tliltik, Lucio de Cirene, Saulo iwan Manaén katlej iwan omoskaltij in Herodes tetrarca, katlej otlanawatiaya Galilea. ² Se tonale, nijuak omosawtokaj (oayunarojtokaj) iwan okichijtokaj kulto, in Espíritu Santo okijtoj:

—Xikinxelokan in Bernabé iwan Saulo para ma kichiwakan in tekitl katlej yonikinpejpenilij.

³ Satepan de omosawkej iwan okichijkej kulto, okintlalijkej inmawan inpan iwan okinmakajkej.

Bernabé iwan Saulo otlamachtijkej itech tlale katlej pankistok itech atl itoka Chipre

⁴ Satepan in Espíritu Santo okintitlanke in Bernabé iwan Saulo para itech pueblo de Seleucia, iwan de ompa oteljkojej itech se barko iwan oyajkej itech tlale katlej pankistok itech atl itoka Chipre. ⁵ Nijuak oajsitoj itech weyikan de Salamina katlej kajki itempan atl. Ompa opéj tetlapowiaj de itlajtol in toTajzin Dios itech intiopanwan in judiojtin. Bernabé iwan Saulo okiwikakej in Juan Marcos para ma kinpalewi. ⁶ Onenkej itech nochí in tlale katlej pankistok itech atl itoka Chipre iwan oajsitoj asta kan pueblo de Pafos, ompa okajsitoj se texoxke (brujo) judío itoka Barjesús, katlej otlakajkayawaaya okijoaya nik in yej profeta de Dios. ⁷ Yon texoxke omowikaya iwan gobernador Sergio Paulo, in gobernador oyeka tlalnamikilisej. Okintekuitlanke in Bernabé iwan Saulo, porke okinekia kikakis itlajtol in Dios. ⁸ Pero Barjesús katlej noijki itoka Elimas kijtosneki texoxke, omotlayakapankaketzke innawak in Bernabé iwan Saulo, porke mach okinekia in gobernador ma kineltoka itlajtol in Dios. ⁹ Ijkuakón in Saulo katlej noijki kinotzaj Pablo, tentok de Espíritu Santo, okitlatak in texoxke ¹⁰ iwan okilwij:

—¡Tekajkayaj! ¡Yolbiero! ¡Tekone de diablo! ¡Tikkokolia nochí tlan kuale! ¿Asta kemanian tikkawas de tikinkajkayajtinemis in tlakaj para amo ma kajsikan in melaktik ojtle de Dios? ¹¹ Axan tiktlaxtlawas inawak in Señor, tiixkokoxkatis (tiixpachitis) iwan mach welis titlachias kanaj keski tonale.

San niman ijkuakón Elimas ovalixtlatleyuilij (ovalixtlatlayowilij), iwan sa otlamatemoaya para akaj ma kimatilana

porke mach ok otlachiaya.¹² Nijuak in gobernador okitak tlan otlapanok, okineltokak. Sa omotlajtlachialtij (omomaj-mawtij) de yen itlamachtil in toSeñor.

Pablo iwan Bernabé oyajkej para Antioquía de Pisidia

¹³ Pablo iwan itekitjkaikniwan otlejkojej itech barko okiskej de pueblo de Pafos iwan oyajkej para kan pueblo de Perge, itech región de Panfilia. Pero ompa in Juan Marcos okinkajtej iwan omokuepke para Jerusalén.¹⁴ Satepan yejwan oyajkej de Perge asta Antioquía, katlej kajki itech región de Pisidia. Ompa nijuak weyi tonale, okalakej itech se tiopan de yen judiojtin iwan ompa omotlalitoj.¹⁵ Satepan de otlankej okilerojkej in libro de Moisés iwan tlan okikuilojkej in profetajtin, in tlayekankej de yon tiopan okilwijkej se tlakatl katlej ompa oyeka ma koninmilwiti in Pablo iwan Bernabé, ijkín:

—Nokniwan, tla ankinekij ankijtoskej itlaj para ma moyolojchikawan in tlakaj, xikijtokan.

¹⁶ Ijkuakón Pablo omoketzke iwan okinchiwili señas ika ima para mach ok ma tlapoakan. Okijtoj:

—Xikkakikan namejwan tlakaj de Israel, iwan namejwan katlej mach anjudiojtin katlej ankimakastokej in Dios.¹⁷ In Dios de topaís Israel okinpejpenke in ya wejkawitl toweyitajwan. Okinekke ma yekan sa tekitl miekej, iwan ijkón omochij nijuak ok oyekaj itech nekáj país de Egipto. Satepan, Dios ika weyi ipoder, okinkixtij de ompa.¹⁸ Dios okinxikoj de nochí tlan yejwan okichiwayaj kan tlawaki kej omenpoale xiwitl,¹⁹ iwan okinpojpoloj chikome regionmej itech país de Canaán, iwan yonmej tlalmej okinmakak in ya wejkawitl toweyitajwan.²⁰ Satepan, Dios okintlalilij juestin kej nawi siento iwan tlajko xiwitl asta itech nekatej tonaltin nijuak in Samuel oyeka profeta.²¹ In ya wejkawitl toweyitajwan okitlajtlankej se rey para ma kinnawati, iwan Dios okinmakak in Saúl kej rey, iwan Saúl okinnawatij omenpoale xiwitl. Saúl oyeka ikone in Cis iwan oyeka familia de Benjamín.²² Okachi satepan, Dios okipatlak in Saúl, iwan okitlalij in David kej rey, iwan Dios okijtoj: “Yonikitak in David ikone in Isaí, yej kuale tlakatl iwan sa tekitl nechyolpaktia, iwan yej kichiwas nochí tlan Nej niknekis.”

²³ ‘Jesús oyeka se de inelwayo in David iwan Dios okitllanke in Jesús para ma kinmakixti in tlakaj de Israel, ijkón ken Dios achtoj yokisentlalijka.²⁴ Antes de walani in Jesús, in Juan Tlakuateekij okintlapowij nochtin in tlakaj de Israel, okinmilwiaya ma moyolpejpenakan (ma moyolkuepakan) de intlajtlakol iwan ma mokuateekikan.²⁵ Kanaj keski tonale

antes de mikis in Juan, okijtoj: “Mach yen nej katlej namejwan ankiyejyekoaj. Mach yen nej niCristo katlej Dios okijtoj kiwaltitlanis. Pero satepan de nej witz in Cristo katlej nej mach notech powi nion para nikkaktotomas.”

²⁶ 'Nokniwan, namejwan katlej antepilwan de Abraham, iwan namejwan katlej mach anjudiojtin katlej ankimakastokej in Dios, yin tlajtole katlej temakixtia yin para tinochtin. ²⁷ Katlej chantij Jerusalén iwan tlayekankej de ompa, mach okimatiaj akin Jesú, nion mach okimomakayaj kuenta de intlajtol in profetajtin maski omoleroaya itech tiopanmej de yen judiojtin nochipa nijuak weyi tonale. Nijuak okimik-tijkej in Jesú, mach okimomakakej kuenta nik okichijkej tlan ya wejkawitl okijtokej in profetajtin. ²⁸ Maski mach okajxilijkej nion itlaj tlajtlakole para ika ma kimiktikan, yejwan okitlajtlanilijkej in Pilato ma tlanawati ma kimiktikan. ²⁹ Ijkón okichijkej nochí tlan okijoaya in tiotlajkuilole de tlan panoani in Jesú. Satepan okitemowijkej itlalnakayo de itech krus iwan okitookakej ijlik se mikkakuyoktle. ³⁰ Pero Dios okiyolitij oksemi satepan de omikke. ³¹ Satepan de omoyolkuik in Jesú, okinmotitij miek buelta, katlej Iwan onemiaj desde estado de Galilea iwan asta weyikan de Jerusalén. Axan, yejwan katlej kitematiltiaj de Jesú para nochtin ma kimatikan.

³² Iwan axan tejwan tamechmatiltiaj yin kuale tlajtole katlej temakixtia, katlej Dios desde okachi achtoj okinkakitij in ya wejkawitl toweyitajwan de tlan kichiwani satepan. ³³ Tejwan como titepilwan de ya wejkawitl toweyitajwan, Dios yokichij towan tlan achtoj okinmilwinka in ya wejkawitl toweyitajwan. Okichij nijuak Dios okiyolitij in Jesú. Ijkón omochij ken kajki ijkuitlakol ipan ome Salmo: “Tej tinoKone, axan Nej onimitztlalij kej tinoKone.” ³⁴ Dios yokijtojka nik kiyolitis oksemi de itech imikilis para mach ma ijtakawi itlalnakayo, Dios ijkín okijtoj iwan kajki ijkuitlakol: “Namejwan namechmakas nochí in tlatichiwalistle tlan onikilwij in David nikmakas.” ³⁵ Por yonik nojiki kijta itech oksé Salmo: “Amo tikkawas ma ijtakawi itlalnakayo de motekipanoj yolchipawak.” ³⁶ David omikke nijuak otlanke itekiw de iwan ipueblo ijkón ken Dios okinekia. Iwan okitookakej ijlik se mikkakuyoktle kan otoktokaj iweyitajwan, iwan itlalnakayo oijtlakawik. ³⁷ Pero itlalnakayo in Jesú mach oijtlakawik porke Dios okiyolitij. ³⁸ Xikmatikan kiné nokniwan, tejwan tamechmatiltiaj nik san yen Jesú welis amechtlapojpolwis de amotlajtlakol. ³⁹ Nochtin akinmej kineltokaj in Jesú, Dios kinresibiroa kej yolchipawakej, iwan mach ok kinchiwilia kuenta intlajtlakol, amo ken itlanawatil in

Moisés mach owelik otechtlapojpolwij. ⁴⁰ Xikpiakan kuidado kiné, para amo anpanoskej namejwan tlan okikuilojkej in profetajtin. Yejwan okikuilojkej ijkín:

⁴¹ Xikitakan, namejwan katlej mach ankimatij antlakakij, anmotlajtlachialtiskej (onmomajmawtiskej) iwan anpojpolewiskej,

porke nikchiwas itlaj weyi nijuak ok anyolitoskej, ke namejwan mach ankineltokaskej maski akaj ma anmechtlapowi de tlan nikchiwas.

⁴² Satepan de otlanke otlapoj in Pablo, yej iwan Bernabé okiskej de itech yon tiopan. In tlakaj okintlatlawtijkej para oksemi ma kintlapowikan de Jesús itech oksé weyi tonale.

⁴³ Nijuak nochtin opéj kisaj de itech yon tiopan, miekej judiojtin oyajkej iwan Pablo iwan Bernabé. Nojki oyajkej inwan sekimej katlej mach judiojtin katlej yokalakej itech intiotlamachtil in judiojtin. Pablo iwan Bernabé okinnajnawatijkej nochtin in tlakaj ma moyekketokan itech itlasojoatlalis in Dios.

⁴⁴ Owalchikometik, nijuak weyi tonale, kasi nochtin in tlakaj de weyikan de Antioquía omololojkej para kikakiskej itlajtol in Señor. ⁴⁵ Sekimej judiojtin nijuak okitakej nik miekej tlakaj omololojkej, sa tekitl omoxikojkej. Opéj kitlatjolnanamikij in Pablo iwan opéj kiwikaltiaj. ⁴⁶ Ijkuakón in Pablo iwan Bernabé otlaajojkej ika ixchikawalistle. Okinmilwijkej in judiojtin:

—Omonekia achtoj namejwan katlej anjudiojtin ma tamechmatiltikan itlajtol in toTajtzin Dios. Pero namejwan mach ankinekij ankineltokaskej. Tlan namejwan ankichiwaj mota nik mach amotech powi ankipiaskej in nemilistle katlej mach keman tlamis. Por yonik axan tejwan tikinmatiltitiwej katlej mach judiojtin. ⁴⁷ Ijkón tikchiwaskej porke in toSeñor ijkón otechnawatij, okijoj:

Onimitztlalij kej se tlanextle para xikintlawili in tlakaj katlej mach judiojtin, para xikinmitkili in kuale tlajtole katlej temakixtia itech nochi in tlaltikpak.

⁴⁸ Katlej mach judiojtin, nijuak ijkón okikakej, sa tekitl opakej iwan opéj kijtaj nik itlajtol in Señor sa tekitl kuale. Iwan okineltokakej nochtin katlej Dios okinpejpenke para kipiaskej nemilistle katlej mach keman tlamis.

⁴⁹ Ijkón omotematiltij itlajtol in Señor itech nochi nekáj región. ⁵⁰ Pero in judiojtin xixikuintin omotlatlalwijkej inwan sekimej siwamej katlej okachi wejweyikistokey iwan sa tekitl omotemaktiayaj itech itlanawatil in Moisés. Nojki okintlatlalwijkej sekimej tlakaj katlej okachi tlayekankej de itech yon weyikan. Okintlatlalwijkej para ma kintlatlalochtikan in Pablo iwan Bernabé. Okintlatlalochtijkej de

itech yon weyikan de Antioquía iwan de itech oksekimej pueblojtin katlej ik ompa serka oyekaj.⁵¹ Ijkón kiné, in tlatislaniltin omoikxitzejtzelojkej, kijtosneki nik mach intlajtlakol tla in yonmej tlakaj mach kiresibiroaj itlajtol in Dios. Iwan oyajkej para itech weyikan de Iconio.⁵² Pero in momachtijkej tlaneltokakej oyoltentokaj ika pakilistle iwan ika Espíritu Santo.

14

Pablo iwan Bernabé oajsitoj Iconio

¹ Ompa itech weyikan de Iconio Pablo iwan Bernabé okalakej san sekan itech se tiopan de yen judiojtin, iwan otetlapowijkej ika miek poder. Iwan ijkón miekej otaneltokakej tanto judiojtin iwan katlej mach judiojtin. ² Pero in judiojtin katlej mach okineltokakej, okintlatlalwijkej katlej mach judiojtin, iwan okichijkej de ma kiyeyjekokan mach kuale de yen tokniwan. ³ Por yonik, in Pablo iwan Bernabé ompa omokajkej miek tonale. Otetlapowijkej ika miek ixchikawalistle, porke omotenmachojtokaj inawak toSeñor. Iwan toSeñor okinmakaya poder para ma kinchiwakan señailestin iwan milagrostín. Ijkón, Dios okichiwaya ma ki-momakakan kuenta in tlakaj nik melawak tlan Pablo iwan Bernabé okijoayaj de itlasojtlalis in Dios. ⁴ In tlakaj de yen weyikan de Iconio omoxelojkej, sekimej oyajkej inwan judiojtin iwan sekimej oyajkej inwan tlatislaniltin. ⁵ Satepan in judiojtin iwan katlej mach judiojtin, okichijkej san se tlajtote inwan tekiwajkej, para kinwikaltiskej iwan kinmojmotsakej in tlatislaniltin. ⁶ Pero in Pablo iwan Bernabé, nijuak okimatkej, ocholojkej iwan oyajkej itech weyikantin de Listra iwan de Derbe katlej katej itech estado de Licaonia, iwan itech oksekimej pueblojtin de ik ompa. ⁷ Iwan ompa noijki okitematiltiayaj in kuale tlajtote katlej temakixtia.

Pablo okimojmotsakej itech weyikan de Listra

⁸ Itech weyikan de Listra ompa oyeka se tlakatl katlej mach owelia onejnemia. Mach onejnemia porke oyeka koxo desde itlakatilis. Yon tlakatl ompa oewatoka,⁹ okikaktoka tlan Pablo okijoaya. Pablo okiyektlatak iwan okimomakak kuenta nik in yon koxo okipiaya miek tlaneltokalistle para welis pajtis.¹⁰ Ijkuakón Pablo okilwj chikawak:

—¡Ximoyekketza!

In tlakatl owalmoketewak iwan ya owelik onejenenke.¹¹ Nijuak okitakej tlan okichij in Pablo, in tlakaj de yon estado de Licaonia opéj kuawtzajtzij ika de yejwan intlajtol, okijojkej:

—¡Owaltemokej yinmej diosmej kej tlakaj!

¹² Bernabé okitokayotijkej dios Júpiter, iwan Pablo okitokayotijkej dios Mercurio, porke yen otlapoaya. ¹³ In tiopixke de dios Júpiter, katlej okipiaya itiopan kalyakapan, okualinwikak torojtin iwan okinkechonakiltij sekin kej xochikoronajtin. In tiopixke iwan nochtin chanejkej okinekiaj kinmiktilianij yonmej torojtin para ika kinweyikixtiskej in Pablo iwan Bernabé kej indioswan. ¹⁴ Pero nikuak in Pablo iwan Bernabé okimomakakej kuenta tlan okinekiaj kichiwanij, omoelpantzotzoltzayankej iwan okalakej intza-lko in tlakaj, kuawtzajtzitiwej. ¹⁵ Okijtoayaj:

—¡Tlakaj! ¿Tlanik ijkón ankichiwaj? Tejwan noijki titlakaj ken namejwan. Tejwan otivalajkej otamechmatiltikoj in kuale tlajtole katlej temakixtia. Iwan otivalajkej para tamechilwiskej nik moneki de ankinkawaskej in yinmej tlamantin katlej axan ankichiwaj, katlej mach itlaj inpatij. Okachi kuale ximokuepakan inawak Dios katlej yolitok, katlej okichij in ilwikak, in tlaltikpak, in atl iwan nochti tlan onkaj intech. ¹⁶ Ya wejkawitl in Dios okinkawilij in tlakaj ma kichiwakan san tlan yejwan okinekiaj. ¹⁷ Yej nochipa okinmititiaya akin Yej por tlan kuale okinchiwiliaya. Yej tech-waltitlanilia in kiawatl iwan kuale tlakilotl, noijki techmaka tlan tikkua iwan techmaka pakilstle.

¹⁸ Pero maski ijkón okinmilwijkej, in tlatitlaniltin owij nik owelikej okinkawaltijkej in yonmej tlakaj, para amo ma kin-miktilikan in torojtin para ika ma kinweyikixtikan.

¹⁹ Ijkuakón oajsikoj sekimej judiojtin de weyikan de Antioquía iwan de Iconio, iwan okinkuatlapololtijkej in tlakaj itech yon weyikan de Listra. Yonmej judiojtin okintlatlalwijkej in tlakaj para ma kimojmotlakan in Pablo ika tetl. Satepan de okimojmotlakej ika tetl, yejwan okiyeyekojkej yokimiktijkej, iwan okikokuyotzkej okikixtijkej asta kalyakapan. ²⁰ Iwan nikuak in momachtijkej tlaneltokakej okiyawalotoj in Pablo, yej omoketzke iwan okalakke oksemi itech weyikan. Owalmostlatik in Pablo iwan Bernabé okiskej de ompa iwan oya-jkej para itech weyikan de Derbe.

²¹ Ompa itech weyikan de Derbe okitematiltijkej in kuale tlajtole katlej temakixtia iwan miekej omochijkej momachtijkej tlaneltokakej. Satepan oksemi omokuepkej itech weyikan de Listra, itech weyikan de Iconio iwan itech weyikan de Antioquía. ²² Itech yonmej weyikantin okinyolojchikajkej in momachtijkej tlaneltokakej, iwan okinnajnawatijkej ma moyekketokan itech intlaneltokalis, iwan okinmilwijkej ke para se aj siti inawak Dios kan Yej tlanawatia kipia de se tlajyowis. ²³ Iwan itech kada lugar kan omololoayaj in tiopantlaneltokakej okintlalijkej

sekimej tlaleykankej para yejwan ma kinyekanakan in tokniwan. Iwan nijuak omotiotzajtzilijkej iwan omosawkej (oayunarojkej), okintlalijkej ipan imatzin in toSeñor katlej yejwan yokineltokakej.

Pablo iwan Bernabé omokuepkej para weyikan de Antioquía de Siria

²⁴ Satepan Pablo iwan Bernabé opanokej ik región de Pisidia iwan oajsitoj itech región de Panfilia. ²⁵ Okitematiltijkej itlajtol in toTajtzin Dios itech weyikan de Perge. Satepan oyajkej asta itech weyikan de Atalia. ²⁶ Ompa Atalia otlejkokej itech barko iwan oyajkej para itech weyikan de Antioquía. Okachi achtoj Pablo iwan Bernabé yejwan okiskej de ompa Antioquía nijuak yakinika opéj inviaje. Itech nekáj tonale nijuak okiskej, in tlaneltokakej omotiotzajtzilijkej para Dios ma kinpalewi iwan ma kintiochiwa itech yon tekitl katlej Dios okinmakak. Iwan axan Pablo iwan Bernabé yomokuepatoj porke yokitlamijkej yon tekitl. ²⁷ Nijuak oajsitoj Antioquía, okinmololojkej nochtin in tlaneltokakej iwan okintlapowijkej de nochti tlan Dios okichij inwan. Nojki okintlapowijkej de kenik in toTajtzin Dios yokinresibiroj in tlakaj katlej mach judiojtin para yejwan nojki ma tlaneltokakan inawak Jesús. ²⁸ Pablo iwan Bernabé omokajkej ompa miek tonale inwan momachtijkej tlaneltokakej.

15

In tlaleykankej tlaneltokakej iwan itlatitlanilwan Dios omololojkej Jerusalén

¹ Itech nekatej tonaltin, sekimej tlakaj okiskej de estado de Judea iwan oyajkej asta itech weyikan de Antioquía. Iwan opéj kinmachtiaj in tokniwan tlaneltokakej okinmilwiayaj ke para welis momakixtiskej kipiaj de mosirkunsidaroškej ijkón ken Moisés otlanawatij. ² Pablo iwan Bernabé omotlatlajtolkuepkej chikawak inwan yonmej tlakaj. Por yonik in tlaneltokakej de Antioquía okinpejpenkej in Pablo, iwan Bernabé iwan oksekimej tokniwan para ma wian Jerusalén, ma kiyektlalitij yon tlamantle de sirkunsisión. Okintitlankej ma motlapowitij inwan tlatitlaniltin iwan nojki inwan tiopantlayekanjej de Jerusalén.

³ In tlaneltokakej de Antioquía okintitlankej kiné ma wian. Iwan nijuak oyajkej, opanokej ik región de Fenicia iwan ik estado de Samaria. Ompa kanik oyayaj okintlapowiajaj in tokniwan kenik katlej mach judiojtin okikajkej tlan achtoj okineltokayaj iwan axan ya kineltokaj in toTajtzin Dios. Iwan nochtin in tokniwan sa tekitl opakej nijuak ijkón okikakej.

⁴ Níkuak in Pablo iwan Bernabé oajsitoj Jerusalén, nochtin in tlaneltokakej, in tlatitlaniltin iwan in tiopantlayekankek okinresibirojkej ika pakilistle. Pablo iwan Bernabé okintlapowijkej nochti tlan Dios okichij innawak. ⁵ Pero omoketzkej sekimej de yen grupo de judiojtin intoka fariseos katlej yotlaneltokakej inawak Jesú, iwan okijtojkej:

—Kipaj de mosirkunsidarojkej in tlaneltokakej katlej mach judiojtin, iwan kipaj de kichiwaskej tlan kijta itlanawatil in Moisés.

⁶ Ijkuakón omololojkej in tlatitlaniltin iwan tiopantlayekankek para moyektlapowiskej de yon tlamatle de sirkunsisión. ⁷ Satepan de omotlapowijkej miek, Pedro omoketzke iwan okinmilwij:

—Nokniwan, namejwan ankimatij nik ya wejkawitl in Dios onechpejpenke de entre amejwan, para nikinmatiltis in kuale tlajtole katlej temakixtia katlej mach judiojtin, para ijkón yejwan noijki ma kikakikan iwan ma kineltokakan.

⁸ In Dios katlej techixmati tinochtin ipan toyolo, otechititij nik ipan melajka kinresibiroa katlej mach judiojtin porke okinmakak in Espíritu Santo ijkón ken tejwan noijki otechmakak. ⁹ Dios mach techresibiroa san tejwan iwan yejwan amo, sino tinochtin techresibiroa, porke yejwan noijki okinyolchipaj de intlajtlakol porke otlaneltokakej. ¹⁰ Iwan axan, ¿tlanik ankikuejsoaj in Dios? Porke namejwan ankinmakaj se tlamamale katlej mach judiojtin, katlej nion ya wejkawitl toweyitajwan iwan nion tejwan mach tiwelij tigmamaj. ¹¹ Sino tejwan tikneltokaj nik in toSeñor Jesú techmakixtia por yen iteiknotlamachilis, ijkón ken kinmakixtia ika iteiknotlamachilis katlej mach judiojtin.

¹² Iwan nochtin omokajkej sa tlakaktej. Iwan okinkakilijkej tlan Pablo iwan Bernabé okinmilwiayaj de nekatej milagrostin iwan señaletin tlan yejwan okichijkej innawak katlej mach judiojtin ika ipoder in toTajzin Dios. ¹³ Níkuak otlankej otlapojkej in Pablo iwan Bernabé, Jacobo okijtoj:

—Nokniwan, xinechkakikan. ¹⁴ Simón Pedro otechtlapowij de kenik níkuak yakinika in Dios opéj kinnotza katlej mach judiojtin, iwan okinpejpenke sekimej de yejwan katlej mach judiojtin para ma yekan iaxkawan iwan ma kiyektenewakan. ¹⁵ Tlan okijtoj in Simón Pedro ya ompa tlan okijuilojkej in profetajtin, ijkín okijuilojkej itech tiotlajkuilole:

¹⁶ Satepan de yin, niwalmokuepas oksemi iwan niktlalis kej rey se tlakatl katlej tlakatis de nelwatl de David.

Ijkón ken se tlakatl oksemi kichiwa ikal níkuak xitini, Nej no ijkón nikchiwas para ijkón in judiojtin ma kipiakan se rey.

17 Para ijkón nochtin oksekimej tlaltikpaktlakaj ma kitemokan in Señor, iwan nochtin katlej mach judiojtin kinekiskej nechtemoskej, porke yeskej noaxkawan.

18 Ijkón kijta in Señor, iwan ya wejkawitl ijkón yokitematiltijka yin tlamantle.

19' Por yonik, nej nikijta, nik in yonmej katlej mach judiojtin katlej yomokuepkéj inawak Dios, mach ok ma tikinnonotzakan. 20 San se kintlajkuililis para mach ma kikuakan itlaj tlamanale katlej kinmaniliaj in santojin, in tlakaj iwan siwamej amo ma momekatikan, iwan mach ok ma kikuakan nakatl de yolkamej katlej amo kinkixtiliaj inmeso, iwan nion mach ma kikuakan estle. 21 Ijkón tikinmilwiskej porke ijkón kijta in tlanawatile de Moisés, iwan desde ya wejkawitl katej tlakaj itech nochtin weyikantin katlej tetlapowiaj de yon tlanawatile. Tetlapowiaj itech tiopanmej de yen judiojtin nochi chikome nikuak weyi tonale.

Katlej mach judiojtin okintitlanilijkej se amatlajkuilole

22 In tlatitlaniltin iwan tiopantlayekankej, iwan nochtin in tiopantlaneltokakej, okijtokej kinpejpenaskej sekimej de yejwan para ma wian iwan Pablo iwan Bernabé itech weyikan de Antioquía. Okipejpenkej in Judas katlej noiiki kinotzaj Barsabás, iwan noiiki okipejpenkej in Silas. Yonmej oyekaj katlej okachi tlayekantokej de itech yonmej tokniwan. 23 Yejwan okitikej yin amatlajkuilole, katlej ijkín okijtoaya:

"Tejwan titlatitlaniltin iwan tokniwan tiopantlayekankej tamechikuililiaj yin amatlajkuilole. Tamechontlajpalooaj namejwan antlaneltokakej katlej mach anjudiojtin katlej anchantij itech weyikan de Antioquía, itech región de Siria iwan itech régión de Cilicia. 24 Otikmatkej nik sekimej tlakaj oyajkej de nian para ompa katlej mach tejwan otikintitlankej, oamechnonotzatoj iwan oamechkuatlapololtoj, porke amechilwiaj ximosirkunsidarokan iwan xikchiwakan nochi tlan kijta itlanawatil in Moisés. 25 Por yonik, tinochtin otiksepanyejejyekojkej otikinpejpenkej sekimej de tejwan tokniwan para ma wian ma amechitatij san sekan iwan Pablo iwan Bernabé totetlasojkaikniwan. 26 Pablo iwan Bernabé yomotemaktijkej (omotemaktilijkej) ika nochi inyolo maski ma kinmiktikan por yen toSeñor Jesucristo. 27 Por yonik axan, tamechintitlaniliaj in Judas iwan Silas, yejwan noiiki amechyekilwiskej nochi yin tlamantle. 28 In Espíritu Santo okitak kuale iwan tejwan noiiki, de mach ok tamechmakaskej itlaj oksé tlamamale xikchiwakan, sino san yen 29 amo xikkuakan itlaj tlamanale katlej kinmaniliaj in santojin. Amo xikkuakan estle iwan nakatl de yolkamej

katlej mach kinkixtiliaj inmeso. In tlakaj iwan siwamej amo ma momekatikan. Tla ankichiwaskej tlan yotamechilwijkej, toneses kuale kajki. Ma Dios amechtiochiwa."

³⁰ Satepan, Pablo, Bernabé, Judas iwan Silas omoyolopachojkej iwan oyajkej para Antioquía. Iwan ompa Antioquía okinmololojkej nochtin tokniwan tlaneltokakej iwan okinmactilijkej in amatlajkuilole. ³¹ Nijuak in tokniwan tlaneltokakej okilerojkej, sa tekitl opakej por yen tlan okijtoaya in amatlajkuilole. ³² Iwan komo in Judas iwan Silas noijki oyekaj profetajtin, yejwan okintlatlapololtijkej iwan okinyolojchikajkej in tokniwan tlaneltokakej. ³³ Judas iwan Silas opanokej ompa Antioquía kanaj keski tonale. Iwan nijuak okijtojkej mokuepaskej oksemi para Jerusalén innawak tokniwan katlej okualintlankej, okinyolopachojkej kiné iwan okinmilwijkej ma wian ika kuale. ³⁴ Pero in Silas okijtoj mokawas ompa Antioquía. ³⁵ Pablo iwan Bernabé noijki omokajkej ompa Antioquía. Yejwan iwan miekej oksekimej tlaneltokakej okiseguirojkej tlamachtiaj iwan kitematiltiaj itlajtol in toSeñor.

Pablo ipan ojpa okiske otetlapowito kej tlatitlanile de Dios

³⁶ Keski tonale satepan, Pablo okilwij in Bernabé:

—Ma tiwian ma tikintlajpalotij oksemi in tokniwan itech nochtin in weyikantin kan otiktematiltijkej itlajtol in toSeñor, para tikmatiskej kenamij katej.

³⁷ Bernabé okinekia kiwikani in Juan katlej noijki kinotzaj Marcos, ³⁸ pero in Pablo okiyejyekoj mach kualtis kiwikaskej porke achtoj in Juan Marcos okinkajtej ne itech tlale de Panfilia iwan mach ok okiseguiroj inwan itech yon tekitl. ³⁹ Iwan komo mach omotlajtolwelitakej iwan omokualanijkej, okachi kuale omoxeloskej. Bernabé okiwikak in Juan Marcos, oonewakej otlejkokej itech se barko para oyajkej asta Chipre. ⁴⁰ Ijkuakón Pablo okipejpenke in Silas para ma kiwika. In tlaneltokakej de Antioquía omotiotzajtzilijkej iwan okintlalijkej ipan itlasojtlalis in toSeñor. Satepan in Pablo iwan Silas oyajkej. ⁴¹ Opanokej ik tlale de Siria iwan ik tlale de Cilicia. Okinyolojchikajtiayaj nochtin in tiopantlaneltokakej ik nowian (nian nepa) kanik opanotiayaj.

16

Timoteo okinwikak in Pablo iwan Silas

¹ Pablo iwan Silas oajsitoj itech weyikan de Derbe iwan itech weyikan de Listra, kan okajsitoj se momachtij tlaneltokak itoka Timoteo, itelpoch de se siwatl tlaneltokak judía iwan ipapan oyeka griego. ² In tokniwan tlaneltokakej de Listra iwan de Iconio otlajtoayaj kuale de Timoteo. ³ Pablo

okinekke ma wia iwan Timoteo, pero achtoj okisirkunsidaroj porke in judiojtin katlej chantij itech nekatej weyikantin kan yaskej okimatiq ke ipapan in Timoteo oyeka griego. Pablo mach okinekke ma kijtowan in yonmej judiojtin nik in Timoteo mach kichiwa in tlamantle de sirkunsisión.⁴ Itech nochtin weyikantin kanik yejwan opanotiayaj, okinmatiltij-tiakkej in tlaneltokakej de yen tlanawatiltin katlej omonekia de kichiwaskej, katlej in tlatitlaniltin iwan tiopantlayekankej de Jerusalén okijtojkej ma mochiwa.⁵ In tiopantlaneltokakej okajsikej okachi chikawalistle itech intlaneltokalis, iwan nochti tonale omomiekiliayaj okachi in tlaneltokakej.

Pablo okitak kej yeskia teemiktok kinotzaj ma wia Macedonia

⁶ Iwan como in Espíritu Santo amo okinkawilij ma kitem-atiltikan itlajtol in Dios itech tlale de Asia, yejwan otlakotonkej ik región de Frigia iwan ik región de Galacia,⁷ iwan oajsitoj kan monamiktokej in tlalmej de Misia iwan de Bitinia. Satepan okimolwijkej kalakiskej itech yon tlale de Bitinia, pero in Espíritu Santo mach okinkawilij.⁸ Ijkón, san opanokej ik inakastlan in tlale de Misia, iwan oajsitoj itech weyikan de Troas katlej kajki itempan atl.⁹ Yon yuak, Pablo okitak kej yeskia teemiktok, okitak se tlakatl de tlale de Macedonia, omoketoka iyakapan iwan okitlatlawtiaya: “Xipano ik Macedonia iwan xitechpalewi.”¹⁰ Nijuak in Pablo okitak in yon kej yeskia teemiktle, niman otimotlayektlalilijkej iwan otiktemojkej se barko para tiaskej itech nekáj tlale de Macedonia, kuale otikmatiayaj nik in Dios otechnotoka para ompa ma tiktematiltij in kuale tlajtole katlej temakixtia.

Pablo iwan Silas oyajkej itech weyikan de Filipos

¹¹ Otikiskej kiné de itech weyikan de Troas itech se barko, iwan otiajkej melajka itech tlale katlej pankistok itech atl itoka Samotracia, iwan owalmostlatik otajsitoj itech weyikan de Neápolis.¹² Iwan de ompa otiajkej para itech weyikan de Filipos, yon weyikan okachi weyikistok de itech yonmej tlalmej de Macedonia, kan chantij romanostin, iwan ompa otimokajkej kanaj keski tonale.¹³ Se sábado, nijuak weyi tonale, otikiskej de itech yon weyikan, iwan otiajkej itempan se weyat, kan sekimej kimatij yawij ompa onmotiotzajtziliaj. Otimotlalijkej iwan otikintlapowijkej in siwamej katlej ompa oololitokaj.¹⁴ Se de yonmej siwamej itoka Lidia. Yon siwatl oyeka de Tiatira iwan oyeka tzotzolnamakak de katlej kuale tzotzole moradotik. Yej noijkla okiweyikixtiaya in toTajtzin Dios. Ompa oyeka iwan okikakke tlan otikijtoayaj, in Señor okiyoltlapoj para kuale ma kikaki tlan Pablo okijtoaya.¹⁵ Yej

iwan noch i f amilia omokuateekijkej. Iwan satepan Lidia otechtlatlawtij. Otechilwij:

—Tla melawak namejwan ankiyejyekoaj nik in nej niknel-toka in Señor, xiwalmuikakan ximokalotikan nokalijtik.

Iwan sa tekitl otechtlatlawtij ma timokawakan ichan, iwan ompa otimokajkej kiné.

¹⁶ Se buelta, n ikuak otiayaj para nek á lugar kan motiotzajtziliaj, otiknamikej se ichpochtle tekipanoj okipiaya se ejekatl mach kuale iwan otetlamatkawiaya iwan okitlania miek tomin para okinmakaya itekowan. ¹⁷ Yon ichpochtle opéj techseguiroa tejwan iwan Pablo, iwan okijtoaya chikawak:

—Yinmej tlakaj itekipanojkawan Dios katlej Weyikistok (Weyititok) iwan amechmatiltiaj in kuale ojtle para anmomakixtiskej.

¹⁸ Ijkón okichijtineneke miek tonale, asta kan Pablo okikuejsoj, omokuepke iwan okilwij in ejekatl katlej okipiaya in ichpochtle:

—Ika itoka in Señor Jesucristo, nimitznawatia xikisa de itech.

Iwan san niman ijkuakón okiske in ejekatl mach kuale.

¹⁹ Pero n ikuak itekowan yon ichpochtle okitakej nik mach okitlani tomin para yejwan, ijkuakón okinkitzkijkej in Pablo iwan Silas iwan okinwikakej inmak in tekiwajkej itech kancha de yon weyikan. ²⁰ Iwan okinteixpantitoj innawak in juestin, iwan okijtojkej:

—Yinmej judiojtin kinkuapajsolojtinemij (kinku-atlapololtjinemij) in tlakaj de toweyikan, ²¹ iwan tlamachtijtinemij de oksé tlamantle katlej tejwan mach tiknekij iwan nion mach welis tikchiwaskej, porke tejwan tiromanostin.

²² Ijkuakón in tlakaj okinyawalojkej in Pablo iwan Silas iwan okinmistlakawiayaj ika san tlan amo. In juestin otlanawatijkej ma kintzotzolkixtikan iwan ma kinwitekikan ika tlakotl. ²³ Iwan satepan de okinwitekej miek, okintzakej. Okinawatijkej in tetzakke kuale ma kintlato. ²⁴ N ikuak otlanke okinajnawatijkej in tetzakke, okinkalakij okintzakuato asta kan okachi tljistik de ijtik telpiloyan, iwan okinmikxikuawkalakij itech se tabla tilaktik itoka cepo.

²⁵ Pero kej tlajko yuak, Pablo iwan Silas omotiotzajtzil-ijtokaj iwan okitlakuikilitokaj in toTajzin Dios, iwan oksekimej katlej otzaktokaj okinkaktokaj, ²⁶ iwan san niman ijkuakón otلالولكه chikawak asta okiwiwixoj icimiento in telpiloyan, iwan san niman ijkuakón noijklí o waltlapokej nochtin puertajtin. Iwan nochtin in tlakaj katlej otzaktokaj

okojkotonkej inkadenawan katlej ika oijilpitokaj. ²⁷ In tetzakke oisak iwan okinmitak nochtin in puertajtin tlapotokej. Ijkuakón okikixtij iespada para momiktis, porke okimolwij yocholojkej katlej otzaktokaj. ²⁸ Pero in Pablo okitzajtzilij chikawak:

—¡Amo ximomikti! Nian tikatej tinochtin.

²⁹ Ijkuakón in tetzakke okitlajtlanke se tlanextle, iwan omotlaloj ik tlijtik papatlakatiw (bibiokatiw) ika nemawtile, omotlankuaketzke iwan omopachoj inmikxitlan Pablo iwan Silas. ³⁰ Satepan okinkixtij kalan iwan okintlajtlanij:

—Xinechilwikan namejwantzitzintin, ¿tlan moneki nikchiwas para nimomakixtis?

³¹ Yejwan okinankilikkej:

—Xikneltoka in Señor Jesúś, iwan ijkón welis timomakixtis iwan noiiki welis momakixtis nochí mofamilia.

³² Satepan Pablo iwan Silas okitlapowijkej de itlajtol in Señor in tetzakke iwan noiiki nochtin katlej iwan ochantiaj.

³³ San niman yon yuak, in tetzakke okinpakilij kan okinxojxolejkej, iwan san niman yej iwan nochí ifamilia omokuateekijkej. ³⁴ Satepan in tetzakke okinwikak in Pablo iwan Silas itech ikalijtik iwan okintlamakak. Yej iwan ifamilia opakej miek por okineltokakej in toTajtzin Dios.

³⁵ Nijuak otlaneske, in juestin okintitlankej sekimej mayoltin kan oyeka in tetzakke, para ma kinkajkawakan in Pablo iwan Silas. ³⁶ In tetzakke okilwij in Pablo:

—In juestin onechnawatijkej ma namechkajkawa, axan ya kualtis ankisaskej iwan xiwian ika kuale.

³⁷ Pero in Pablo okinmilwij in mayoltin:

—Tejwan tiromanostin, iwan otechwitekej teixpan iwan nion mach otechtlatzintokijkej achtoj kox otikchijkej itlaj tlan mach kuale, iwan san tektil otechtzakej. ¿Iwan axan kinekij techkajkawaskej san ichtaka? ¡Amo! Ma wikikan yejwan innewian ma techkixtikij.

³⁸ In mayoltin okinmatiltitoj in juestin. In yonmej juestin omomawtijkej nijuak okimatkej nik in Pablo iwan Silas yejwan romanostin. ³⁹ Oyajkej kiné in juestin, omotlapojpolwitoj iwan Pablo iwan Silas por tlan okintoktijkej, okinkixtijkej de telpiloyan iwan okintlatlawtijkej ma wian de itech yon weyikan. ⁴⁰ Nijuak in Pablo iwan Silas okiskej de telpiloyan, oyajkej ichan Lidia. Satepan de okinmitakej iwan de okinyoloychikajkej in tokniwan tlaneltokakej, okiskej de ompa.

17

Pablo iwan Silas oyajkej itech weyikan de Tesalónica

¹ Nijkuak oyajkej, in Pablo iwan Silas opanokej ik weyikan de Anfípolis iwan ik weyikan de Apolonia, iwan satepan oajsitoj itech weyikan de Tesalónica, kan judiojtin okipiayaj se intiopan. ² Pablo oyáj itech se tiapan, ijkón ken yej okimatisa okichiwaya, oyáj ipan eyi samana kada sábado nijkuak weyi tonale iwan okintlapowij de tlan kijta in tiotlajkuilole. ³ Okinyekilwiaya nik in Cristo okipiaya de tlajyowis, mikis iwan moyolkuis (moyolitis). Okinmilwij:

—In Jesús katlej nej namechmatiltia namejwan, yen Cristo.

⁴ Ijkuakón sekimej judiojtin omokuepkej tlaneltokakej iwan omosetilijkej iwan Pablo iwan Silas. Noijki omokuepkej tlaneltokakej sekimej griegojtin katlej sa tekitl omotemaktiayaj inawak Dios, iwan noijki omokuepkej tlaneltokakej miekej siwamej katlej okachi wejweyikistokej (wejweyititokej) de itech yon weyikan. Yejwan noijki omosetilijkej iwan Pablo iwan Silas. ⁵ Iwan judiojtin katlej mach tlaneltokakej, omoxikojkej miek, iwan okintlatlalwijkej sekimej tlakaj tlaztiwkej katlej mach kuale inyolo. Okintlatlalwijkej iwan asta okinkuakualanijkej in tlakaj de yon weyikan de Tesalónica. Oyajkej ichan Jasón, okintemotoj in Pablo iwan Silas, para kinkixtiskej iwan kintemaktiskej (kintemaktiliskej) inmak in tlakaj de yon weyikan. ⁶ Pero como mach okinmajsitoj, toneses okiwikakej in Jasón iwan oksekimej tokniwan tlaneltokakej, okinkokuyotzkej ipan tlale iwan oyajkej okintemaktitoj (okintemaktilitoj) innawak tekiwajkej de yon weyikan. Iwan nochtin tlakaj otzajtziaj chikawak:

—¡Yinmej tlakaj tekuapajsolojtinemij (tekuatlapololtijtine-mij) itech nochti in tlaltípkak, iwan axan nian noijki yowala-jke! ⁷ ¡Jasón okinkalotij ichan! Nochtin yejwan mach okitlakitaj itlanawatil in rey César. Yejwan kijtaj ke onkaj oksé rey, itoka Jesús.

⁸ Nijkuak ijkón okikakej, in tlakaj iwan tekiwajkej okachi omokuakualanaltijkej. ⁹ Pero in Jasón iwan oksekimej tokniwan tlaneltokakej okitlaxtlajkej para okinkajkajkej.

Pablo iwan Silas oyajkej itech weyikan de Berea

¹⁰ San niman yon yuak in tokniwan okinyolopachojkej in Pablo iwan Silas para ma wian itech weyikan de Berea. Nijkuak oajsitoj, oyajkej kan intiopan in judiojtin. ¹¹ Yonmej judiojtin de Berea okipiayaj okachi kuale intlalnamikilis iwan amo ken judiojtin de Tesalónica, ika miek pakilistle okiresibirojkej itlajtol in toTajzin Dios, iwan nochipa okileroayaj in tiotlajkuilole para kitaskej kox melawak tlan okinmilwiayaj. ¹² Ijkón, miekej judiojtin otlaneltokakej. Noijki otlaneltokakej

miekej siwamej griegajtin katlej okachi wejweyikistojej (wejweyititojej) de itech yon weyikan, iwan noijki otaneltokakej miekej tlakaj griegojtin. ¹³ Pero nikuak in judiojtin de Tesalónica okimatkej nik in Pablo okitematiltijtoka itlajtol in Dios noijki itech weyikan de Berea, oyajkej para ompa. Iwan ompa noijki okintlatlalwijkej iwan okinkuakualanijkej in tlakaj. ¹⁴ Pero in tokniwan tlaneltokakej san niman okittlankej in Pablo para ma wia asta itempan atl, pero in Silas iwan Timoteo omokajkej ompa Berea. ¹⁵ Katlej okiwikayaj in Pablo okikajkawatoj asta itech weyikan de Atenas. Satepan owalmokuepkej para Berea ika itlanawatil in Pablo para ma kilwikan in Silas iwan Timoteo de ma kajsitij san niman ompa Atenas.

Pablo omajsia itech weyikan de Atenas

¹⁶ Nikuak in Pablo okinchixtoka in Silas iwan Timoteo ompa Atenas, omoyolkokoj miek porke okinmitak miekej diosmej itech yon weyikan. ¹⁷ Por yonik, yej okintlapowiaya in judiojtin itech intiopan iwan noijki okintlapowiaya katlej mach judiojtin katlej omotemaktiayaj inawak Dios. Noijki noch tonale okintlapowiaya itech tiankistle katlej ik ompa omololoayaj. ¹⁸ Ompa oyekaj sekimej ixtlamatkej katlej kintokayotiaj epicúreos iwan oksekimej ixtlamatkej katlej kintokayotiaj estoicos, opéj iwan motlatlajtolkuepaj. Iwan sekimej okijoayaj:

—¿Tlan kineki techilwis yin tlakatl katlej wel tlapoa?

Iwan oksekimej okijoayaj:

—Nesi ke tetlapowijtinemi de oksekimej diosmej.

Ijkón okijoayaj porke Pablo okinmatiltiaya de Jesús iwan de kenik omoyolkui. ¹⁹ Ijkuakón in tlakaj okiwikakej in Pablo kan Areópago, kan kichiwaj junta katlej okachi ixtlamatkej, iwan okitlajtlanijkej:

—¿Welis tikmatiskej katlij yen yankuik tlamachtile tikkualkui? ²⁰ Porke tej titechilwia tlan mach tikmomakaj kuenta, iwan tiknekij tikmatiskej tlan kijtosneki noch yon.

²¹ Ijkón okijojkej porke nocthin tlakaj de Atenas iwan katlej amo de Atenas pero ompa chantij, mach itlaj oksé tlamantle okichiwayaj, sino sanwel okikakiaj iwan omotlapowiayaj de itlaj tlamantle yankuik.

²² Ijkuakón Pablo omoketzke tlatlajko kan Areópago, iwan okijojo:

—Tlakaj de Atenas, nikita nik namejwan wel ankintlakitaj namodioswan. ²³ Onitlajtlachixtineneke kan katej namodioswan, iwan ompa onikitak se artal katlej kipia ikuilitok: “Para yen Dios katlej mach tikixmatij”. Iwan axan,

in Dios katlej namejwan ankiweyikixtiaj iwan mach ankix-matij, axan de yen yon nej nikneki namechtlapowis.

²⁴ 'In Dios katlej okichij in tlaltikpak iwan nochti tlan onkaj itech, yen Señor iaxka in ilwikak iwan tlaltikpak. Mach chanti itech tiopanmej ken katlej kinchiwaj in tlakaj, ²⁵ nion mach moneki akaj tlakatl itlaj ma kichiwa por Yej, porke Yej mach itlaj kipoloa. Yej techmaka tonemilis tinochtin, techmaka toijyoyo para ma tiwelikan ma timijyotikan iwan techmaka nochti tlan tikpiaj.

²⁶ 'San itech se tlakatl katlej itoka Adán, Dios okinchij nochtin in tlakaj de ixko yin tlaltikpak para ma chantikan ik nowian (nian nepa), iwan noijki keski tonale kipiaj de yolitoskej iwan kan kipiaj de chantskej. ²⁷ Dios ijkón okichij para ke nochtin in tlakaj de yin tlaltikpak ma kitemokan, xamo welis tlamatemoskej iwan kajsiskej, maski ipan melajka, in Dios mach kajki wejka de kada se de tejwan. ²⁸ Porke ika ipoder in Dios tiyolitokej, timoliniaj iwan tikatej. Ijkón ken sekimej poetas de amejwan okijtojkej: "Tejwan titepilwan de Dios." ²⁹ Ijkón kiné, tla tejwan titepilwan de Dios, amo ma tkiyejyekokan nik in Dios tlachiwale de oro, de plata o noso de tetl ken kinchiwaj in tlakaj, iwan kiyeyekoaj ijkón nik kaj in Dios. ³⁰ Ya wejkawitl in Dios mach okinchiwili kuenta intlajtlakol in tlakaj, porke mach okimatiaj tlan okichiwayaj, pero axan kinnawatia nochtin in tlakaj de yin tlaltikpak, ma moyolpejpenakan (ma moyolkuepakan) de intlajtlakol. ³¹ Porke yokitlalij se tonale, nikuak nochtin in tlakaj de yin tlaltikpak kinyolkuitis ika itlakamelawalis de yen Cristo Jesús katlej Dios okipejpenke. Dios okinmititij nochtin in tlakaj nik melawak ijkón kichiwas nikuak okiyolitij in Jesús satepan de omikke.

³² Nikuak okikakej nik in mikkamej moyolkuiskej (moyolitiskej), sekimej okipinawijkej iwan oksekimej okijtojkej:

—Okachi kuale itech oksé tonale oksemi welis titechtlapowis.

³³ Ijkuakón in Pablo okiske de ompa. ³⁴ Pero sekimej tlakaj okineltokakej in toSeñor iwan oyajkej iwan Pablo. Se de yejwan itoka Dionisio, se tlakatl tlayekanke de kan Areópago, iwan noijki se siwatl itoka Dámaris, iwan noijki otaneltokakej oksekimej.

18

Pablo omokaj itech weyikan de Corinto se xiwitl iwan tlajko

¹ Satepan, Pablo okiske de Atenas iwan oyáj itech weyikan de Corinto. ² Ompa okajsite se judío itoka Aquila, de región de Ponto. Ijkuakón mach ya wejkika, in Aquila iwan isiwa

Priscila oajsikoj de Italia, okiskej de ompa porke in weyi tlanawatij Claudio, otlanawatij ke nochtin in judiojtin ma kinkixtikan de itech weyikan de Roma, ikapital in país de Italia. Ijkuakón Pablo oyáj okintlajpaloto itech inkalijitik.³ Aquila iwan Priscila yejwan intekiw oyeka okinchawayaj mantajkaltin, no ken Pablo, iwan por yonik in Pablo ompa omokaj para inwan tekipanos. ⁴ Iwan nochi sábado, nikuak weyi tonale, Pablo oyaya kan intiopan in judiojtin. Ompa okintlapowiaya in judiojtin iwan katlej mach judiojtin. Pablo okinekia ma kineltokakan in Cristo.

⁵ Nikuak in Silas iwan Timoteo oajsikoj de Macedonia, Pablo okikaj itekiw iwan okixkawij (omomelij) tetlapowia de itlajtol in toTajtzin Dios. Okinmilwij in judiojtin nik in Cristo katlej yejwan kichixtokej yowitzta. Okinmilwij nik in Jesús yen Cristo. Cristo kijtosneki itlapejpenal in Dios. ⁶ Pero in judiojtin okualankej inawak iwan opéj kiwikaltiaj. Pablo omotlakentzejzeloj kej se señas nik mach okiresibirojkej itlajtol in toTajtzin Dios, iwan okinmilwij:

—Amejwan namotlajtlakol tla anmopoloskej. Mach ok nej notlajtlakol. De axan para tlayakapan nej nikanmatiltis itlajtol in toTajtzin Dios in tlakaj katlej mach judiojtin.

⁷ Pablo okiske de kan intiopan in judiojtin iwan oyáj ichan se tlakatl itoka Ticio Justo, katlej otlaneltokaya inawak Dios iwan ochantia inakastlan yon tiopan. ⁸ Se tlakatl itoka Crispo tlayekanke de itech yon tiopan, okineltokak in Señor, yej iwan nochi ifamilia. Noijke miekej tlakaj de Corinto, nikuak okikakej itlajtol in toTajtzin Dios, okineltokakej iwan omokuateekijkej. ⁹ Se yuak in Pablo okitak in Señor kej yeskia oteemiktoka okilwij:

—Amo ximomawti, xiktematilti notlajtol iwan amo ximokamatzakua. ¹⁰ Porke Nej mowan nikaj iwan mach akaj itlaj welis mitztoktis, porke ok miekej tlakaj nikinpia itech yin weyikan katlej nechneltokaskej.

¹¹ Ijkón, Pablo omokaj itech weyikan de Corinto se xiwitl iwan tlajko, otlamachtiaya de itlajtol in toTajtzin Dios.

¹² Pero itech yonmej tonaltin nikuak in romano Galión oyeka gobernador itech estado de Acaya, omololojkej sekimej judiojtin katlej okualankej inawak in Pablo iwan okitzkijkej iwan okiwikakej kan tlaixkomakaj (tlatzonmanaj) ixpan gobernador Galión. ¹³ Okilwijkej in gobernador:

—Yin tlakatl kintlaneltokitia nochtin in tlakaj para ma kiweiyikixtikan in Dios ika oksé tlamantle iwan amo ken kijta totlanawatil.

¹⁴ Pablo ya tlajtoani, pero ijkuakón Galión okinmilwij in judiojtin:

—Tla amejwan anjudiojtin ankistlakawiaj yin tlakatl por otlachtekke o noso por otemiktij, o noso por okichij itlaj oksé tlamatle mach kuale, nian nikaj nej para namechkakilis. ¹⁵ Pero komo namejwan annechnotzaj san por yej tlan tlamachtia yin tlakatl iwan de tokayomej, iwan de amotlanawatilwan, ompa amejwan xikitakan, porke nej mach nikneki nimokalakis amowan kej nijues.

¹⁶ Iwan okinkixtij ika chikawak de kan tlaixkomakaj (tlatzonmanaj). ¹⁷ Ijkuakón nocthin okitzkijkej in Sóstenes, se tlayekanke de kan yon tiopan, iwan okiwidekej ompa teixpan kan tlaixkomakaj. Pero in gobernador Galión mach okinchij kuenta.

Pablo omokuepke oksemi para Antioquía

¹⁸ Pablo ok omokaj Corinto miek tonale. Oajsik tonale otlayolopachoj de innawak in tokniwan tlaneltokakej, iwan satepan Pablo iwan Priscila iwan Aquila otlejkokej san sekán itech se barko para oyajkej itech región de Siria. Pero kan pueblo de Cencrea, Pablo omoxinke tetextik (kuameloj), para ijkón okichij tlan achtoj okisentlalij inawak Dios. ¹⁹ Nijuak oajsitoj itech weyikan de Éfeso, Pablo okinkajtej in Priscila iwan Aquila iwan yej oyáj itech intiopan in judiojtin, ompa omotlapowij inwan judiojtin katlej ompa omololoayaj. ²⁰ Yejwan okilwiayaj ma mokawa kanaj keski tonale inwan, pero in Pablo mach okinekke. ²¹ Otlayolopachoj de innawak. Okinmilwij:

—Tla Dios kineki, namechtajpaloki oksemi.

Satepan Pablo otlejkok itech se barko iwan okiske de itech weyikan de Éfeso. ²² Pablo oajsito itech weyikan de Cesarea iwan de ompa oyáj para itech weyikan de Jerusalén. Oyáj okintlajpaloto in tiopantlaneltokakej. Satepan omokuepke para itech weyikan de Antioquía. ²³ Ompa Antioquía omokaj kanaj keski tonale. Satepan oksemi okiske iwan oyáj itech región de Galacia iwan itech región de Frigia. Kanik yej opanotiaj okinyolojchikajtiaj nocthin in momachtijkej tlaneltokakej.

Apolos okitematiltij itlajtol in toTajtzin Dios itech weyikan de Éfeso

²⁴ Itech nekatej tonaltin oajsiko itech weyikan de Éfeso se judío itoka Apolos, de pueblo de Alejandría. Kuale okimatia otlapoaya iwan kuale okixmatia in tioltajkuilole. ²⁵ Okiyekixmatia iojwi in Señor, iwan otetlapowiaya ika pakillistle. Tlan Apolos otetlapowiaya iwan tlan otlamachiaya de Jesús yon melawak, pero san yen tlakuateekilistle de Juan tlan okimatia. ²⁶ Apolos opéj kintlapowia nocthin itech intiopan in judiojtin ika ixchikawalistle. Pero nijuak in

Priscila iwan Aquila okikakej in Apolos, okinotzkej iwan okiyekmatiltijkej okachi de iojwi in toTajzin Dios.²⁷ Nijuak in Apolos okijtoj yas ik región de Acaya, in tokniwan tlaneltokakej de Éfeso okiyolojchikajkej kiné ma wia. Okintlajkuililijkej in momachtijkej tlaneltokakej de Acaya para ma kiresibirokan ika kuale. Nijuak oajsito ompa, okinpalewij miek katlej Dios ika itlasojoatlalis okichij ma tlaneltokakan.²⁸ Porke inmixpan nochtin in tlakaj okinkajkakitiaya nik in judiojtin mach ijki nik katej. Iwan in judiojtin mach ok itlaj okijtoayaj. Apolos okichiwaya kuale ma kimomakakan kuenta de itlajtol in toTajzin Dios porke omokitzkiaya itech tiotlajkuilole, okinmititiaya nik in Jesús yen Cristo katlej Dios okitlalij para tlanawatis.

19

Pablo oajsito itech weyikan de Éfeso

¹ Nijuak Apolos ok oyeka Corinto, Pablo oyáj otlakotontiaj ik tepeyoj iwan oajsito itech weyikan de Éfeso, ompa okinmajsito sekimej momachtijkej tlaneltokakej. ² Pablo Okintlajtlanij:

—¿Ankiresibirojkej in Espíritu Santo nijuak antlaneltokakej?
Yejwan okinankilijkej:

—Mach keman tikkakij kox onkaj Espíritu Santo.

³ Ijkuakón Pablo okintlajtlanij:

—Toneses, ¿tlan tlakuateekilistle ankineltokakej kiné?
Yejwan okijtojkej:

—Otimokuateekijkej ijkón ken otlakuateekiaya in Juan Tlakuateekij.

⁴ Pablo okinmilwij:

—Melawak, Juan okinkuateekiaya in tlakaj iwan yon kijtosneki nik in tlakaj yomoyolpejpenkej (yomoyolkuepkej) de intlajtlakol. Pero noijki okinmilwiaya kipiaj de kineltokaskej katlej walmuikas satepan de yen Juan, kijtosneki ma kineltokakan in Jesús.

⁵ Nijuak okikakej tlan Pablo okinmilwij, omokuateekijkej ika itoka in toSeñor Jesús. ⁶ Iwan nijuak in Pablo okintlalij imawan inpan yonmej tokniwan, in Espíritu Santo owalaj inpan, iwan otlapoayaj ika oksekimej tlajtoltin, iwan opéj kijtaj tlan Dios okinmilwiaya ma kijtowan. ⁷ Por nochtin oyekaj kanaj majtlakte iwan ome tlakaj.

⁸ Pablo oyaya itech intiopan in judiojtin kanaj eyi metztle, kan okitematiltiaya itlajtol in toTajzin Dios ika ixchikawalistle. Okintlapowiaya iwan okintlaneltokitiaya in tlakaj de kenik in Dios tlanawatia. ⁹ Pero sekimej sa tekitl oyoltlakuawakej iwan mach okinekej okineltokakej itlajtol

in Dios. Inmixpan nochtin in tlakaj otlajtoaya mach kuale de iojwi in Dios. Ijkuakón Pablo omoxeloj de yejwan, iwan okinwikak in momachtijkej tlaneltokakej kan se eskuela kan noijki otlamachtiaya se tlakatl itoka Tirano. Pablo ompa okinmachtiaya momostla.¹⁰ Ijkón okichij kej ome xiwitl. Por yonik nochtin katlej ochantiaj itech región de Asia okikakej itlajtol in toSeñor Jesú, nochtin in judiojtin iwan katlej mach judiojtin. ¹¹ Pablo okinchiwaya wejweyin milagrostin ika ipoder in toTajtzin Dios. ¹² Asta in panitojtin iwan baberojtin katlej Pablo okinmotlaliltiaya okinmitkiliayaj in kokoxkej iwan opajtiaj de inkokolis, iwan ejekamej mach kualtin okisayaj de intech.

¹³ Pero sekimej judiojtin katlej otexoxinemaj (otebrujaro-jinemaj) kalpan, okinekiaj kinkixtiskej in ejekamej mach kualtin ika itoka in Señor Jesú para ma kisakan de innawak in kokoxkej. Okinmilwiayaj in ejekamej:

—Tamechnawatiaj xikisakan ika itoka in Jesú, de katlej Pablo tetlapowia.

¹⁴ Ijkón okichiwayaj in chikome itelpokawan in Esceva, se tiopixke tlayekanke judío. ¹⁵ Pero se buelta in ejekatl mach kuale okinnankilij in yonmej telpokamej:

—Nikixmati in Jesú, iwan nikmati akin in Pablo, pero namejwan, ¿anmakinmej?

¹⁶ San niman ijkuakón, in tlakatl katlej okipiaya in ejekatl mach kuale inpan oajkotzikuinke iwan sa tekitl okinmagak (okinmakak). Sa tekitl okinkojkokoj nochtin iwan sa okicholilikjej de kan kalijtik. Okikistewakej sa xixxitlatziskej iwan sa ejesmatziskej. ¹⁷ Nochtin katlej ochantiaj Éfeso, in judiojtin iwan katlej mach judiojtin nikuak okimatkej, sa tekitl omomawtijkej iwan nochtin okiweyitnewayaj itoka in Señor Jesú.

¹⁸ Noijki miekej katlej otlaneltokakej owalayaj iwan okimokuitiayaj nochti tlan mach kuale okichiwayaj. ¹⁹ Iwan miekej katlej otexoxayaj (otlabrujaroayaj) okualinkuikej inlibrojwan de texoxalistle iwan okinchichinojkej teixpan. Iwan nikuak okixyejyekojkej para okitakej kech tomin okichichinojkej por in yonmej librojtin, okichijkej kuenta okiske kej omenpoale iwan majtlakte mil tomin de plata. ²⁰ Ijkón itlajtol in Dios oxoyawia (oxitinia) okachi ik nian nepa, iwan Dios okitekipanoltiaya itlajtol ika miek poder nikuak okikakiaj in tlakaj.

²¹ Satepan de nochti yon tlan otlapanok, in Pablo okisentlalij yas itech régión de Macedonia iwan itech régión de Acaya, iwan satepan ajsiti asta Jerusalén. Iwan noijki okijtoj, ke satepan de yas Jerusalén, noijki moneki yas itech weyikan de

Roma. ²² Timoteo iwan Erasto okipalewiayaj in Pablo. Iwan ikuakón Pablo okintitlanke in Timoteo iwan Erasto para ma wian itech región de Macedonia. Yej ok omokaj kanaj keski tonale okachi itech región de Asia.

Omokualanaltijkej in tlakaj de Éfeso

²³ Itech nekatej tonaltin miekej tlakaj opéj mokualanal-tiaj por yen iojwi in toTajtzin Dios katlej Pablo okinmatil-tiaya. ²⁴ Okipewaltij se tlakatl itoka Demetrio, katlej ok-inchiwaya kej tiopantzitzintin de plata de se santo itoka Diana. Itekipanojkawan katlej otekipanoayaj iwan Demetrio okitlaniaj miek tomin. ²⁵ Okinmololoj itekipanojkawan iwan noijki oksekimej tlakaj katlej noijki otekipanoayaj ken yej. Okinmilwíj:

—Tlakaj, namejwan kuale ankimatij nik tiktlanij miek tomin itech yin tekitl. ²⁶ Pero ken namejwan ya ankikakij iwan ya ankitaj, yin Pablo kijtojinemi nik in diosmej katlej in tlakaj kinchiwaj mach melawak diosmej, iwan miekej tlakaj yokintlaneltokitij. Amo san de nian Éfeso sino noijki itech nochí in región de Asia. ²⁷ Iwan para tejwan mach kuale kajki, porke welis tikpoloskej in totekiw. Noijki in tiopan de tosantojtzin Diana mach ok kitlakitaskej, iwan welis kitlawelitaskej in toweyi santojtzin Diana katlej axan kiweyikixtiaj in tlakaj de Asia iwan de nochí in tlaltikpak.

²⁸ Nijuak ijkón okikakej, sa tekitl okualankej iwan otza-jtizikej:

—¡Viva tosantojtzin Diana! ¡Tosantojtzin de Éfeso!

²⁹ Ijkón, in tlakaj de yon weyikan okualankej. Iwan okikitzkijkej in Gayo iwan Aristarco, omen tlakaj de región de Macedonia katlej oyayaj iwan Pablo, iwan okinwikakej ika chikawak kan ojuntajchiwayaj, kan yejwan omololoayaj para omotlapowiayaj de nochí tlamantle. ³⁰ Pablo okinekia kalakini ompa para kintlapowis in tlakaj, pero in momachti-jkej tlaneltokakej mach okikawilijkej. ³¹ Sekimej tekiwajkej de región de Asia, katlej inwan omowikaya in Pablo, noijki ok-intitlanilijkej sekimej tlakaj para ma kitlatlawtikan in Pablo amo ma kalaki ompa. ³² Ompa itech yon lugar, sekimej oki-jtoayaj se tlamantle iwan oksekimej okijoayaj oksé tlaman-tle, porke omokuatlapololtijtokaj, iwan miekej nion mach okimatiaj por tlanik ompa oyekaj. ³³ Pero sekimej judiojtin okilwijkej in Alejandro por tlanik ompa omololojkej in tlakaj, iwan okitopejkej para ma moketza tlayakapan. Iwan yon tlakatl okinchiwili señas ika ima para mach ok ma tzajtzikan. Para ijkón welis kintlapowis para mach ok ma kuanikan innawak in judiojtin. ³⁴ Pero nijuak in tlakaj okimomakakej

kuenta nik in Alejandro yej noijki judío, oksemi otzajtzikej okachi:

—¡Viva tosantojtzin Diana! ¡Tosantojtzin de Éfeso!

Iwan ijkón otzajtzitokaj kanaj ome ora.³⁵ In sekretario de yon weyikan nikuak owelik okichij mach ok ma tzajtzikan, okinmilwij:

—Tlakaj de Éfeso, aminochtin ankimatij nik in tejwan de nian Éfeso, tkmonekuitlawia in tiopan de tosantojtzin Diana, tosantojtzin de tetl katlej owetziko de ilwikak.³⁶ Aminochtin kuale ankimatij, iwan mach moneki xitzajtzikan, iwan mach itlaj xikchiwakan tla amo ankimatij tlan ankichiwaj.³⁷ Porke yinmej tlakaj katlej amejwan ankualinwikakej mach itlaj okichtekej itech totiopan iwan nion amo otlajtokej biero de tosantojtzin.³⁸ Tla Demetrio iwan katlej iwan tekipanoaj kinekij kitilwiskej akaj, toneses ma wian innawak juestin kan tlaixkomakaj (tlatzonmanaj) para ompa ma motilwikan.³⁹ Iwan tla namejwan ankipiaj kanaj itlaj oksé tlamantle para ankiyektlaliskej, ankipiaj de anmoyektlaliskej itech se junta.⁴⁰ Tlan axan otlapanok welis sekimej techtilwiskej de titekuejsojkej, iwan kijtoskej tiawij en kontra de yen go-bierno. Iwan mach welis tiktemakaskej itlaj rason por tlan axan ika timokuapajsoloaj (timokuatlapololtiaj).

⁴¹ Satepan de otlanke otlapoj in sekretario, okinyolopachoj nochtin.

20

Pablo oyáj itech región de Macedonia iwan itech región de Grecia

¹ Satepan de otlanke omokualanaltijkej, Pablo okinnotzke in momachtijkej tlaneltokakej iwan okinnajnawatij. Satepan inwan omoyolopachoj iwan oyáj itech región de Macedonia.

² Pablo okintlajpalotjiaj nochtin in tlaneltokakej itech nekatej pueblojin kanik yej opanotiaya. Okinyolojchikaj miek por yen tlan okintlapowij. Iwan satepan oajsito itech región de Grecia,³ iwan ompa omokaj eyi metztle. Nikuak yoyeka para tlejkos itech barko para yas itech país de Siria, Pablo okimatke nik in judiojtin omotlatlalwijkej para kimiktiskej iwan yokimatiq kanik in yani. Ijkuakón yej okiyeyekoj okachi kuale yas itech oksé ojtle. Por yonik in Pablo oyáj oksemi ik Macedonia.⁴ Oksekimej tokniwan oyajkej iwan Pablo asta Asia. Oyáj in Sópater de Berea, itelpoch in Pirro. Oyáj in Aristarco iwan Segundo de Tesalónica. Oyáj in Gayo de Derbe. Oyáj in Timoteo. Iwan noijki oyajkej in Tíquico iwan Trófimo de región de Asia.⁵ Yonmej tokniwan otlayekankej iwan otechchiatoj asta itech weyikan de Troas.⁶ Satepan

nijuak otlanke ilwitr nijuak mokua in pan katlej mach kipia levadura, tejwan otikiskej de Filipos itech barko, iwan ipan makuile tonale otikinmajsitoj ompa itech weyikan de Troas, iwan ompa otimokajkej chikome tonale.

Pablo okiyolitij se telpochtle ompa Troas

⁷ Yon domingo otimololojkej para tiksepanguaskej in pan katlej ika tikelnamikij imikilis in Jesús, iwan Pablo okintlapowij katlej ompa oyekaj. Iwan komo in Pablo ya yani ipan oksé tonale, okachi owejkaj okintlapowij asta tlajko yuak. ⁸ Otimololojkej itech se kuarto katlej oyeka tlakpak, kan oyekaj miekej tlanextin tlikuitojej. ⁹ Se telpochtle itoka Eutico oewatoka ipan bentana. Iwan komo in Pablo owejkaj otlapojtoka, in telpochtle okitlanke in kochilistle, iwan owetziko desde ipan eyi piso. Iwan nijuak okajkokuitoj, yomikke. ¹⁰ Pablo ottemotiwetzke, ipan omixiktekak in telpochtle iwan okimonapaloltij. Iwan okijtoj:

—Amo ximomawtikan, yej yolitok.

¹¹ Ijkuakón Pablo oksemi otlejkok ajkopen. Okipojpostekke in pan iwan nochtin otlakuajkej san sekan. Iwan okiseguiroj okintlapowij asta otlaneske. Iwan satepan oyáj. ¹² In telpochtle okiwikakej para ichan yolitok, iwan nochtin omoyerolochikajkej okachi.

Pablo okiske de Troas iwan oajsito itech weyikan de Mileto

¹³ Tejwan otitlayekankej itech barko asta itech weyikan de Asón para ompa tiknotikisaskej in Pablo, ijkón ken otimokajkej, porke yej okinekke nejnemis asta ompa. ¹⁴ Nijuak iwan otimonamikej ompa Asón, towan otlejkok itech barko iwan otiajkej asta itech weyikan de Mitilene. ¹⁵ Otikiskej de ompa Mitilene, iwan owalmostlatik otipanojkej inakastlan in tlale katlej pankistok itech atl itoka Quío, iwan asta ipan oksé tonale otajsitoj itech weyikan de Samos. Otinejnenkej oksé tonale okachi itech barko iwan otajsitoj asta itech weyikan de Mileto. ¹⁶ Ijkón otikchijkej, porke in Pablo mach okinekke panos ik Éfeso, para amo mokawas miek tonale itech región de Asia. Pablo okinekia san niman ajsiti Jerusalén in tla welis, para ompa yetos itech ilwitr de Pentecostés.

Pablo okintlapowij in tiopantlayekankej de weyikan de Éfeso

¹⁷ Nijuak in Pablo yoyeka itech weyikan de Mileto, okintekuitlanke in tiopantlayekankej de weyikan de Éfeso.

¹⁸ Nijuak oejkokej inawak in Pablo, okinmilwij:

—Namejwan kuale ankimatij kenik nichipawkanentiwitz desde yakinika tonale nijuak oniekoko nian itech región de Asia. ¹⁹ Ankimatij nik nochipa nijuak onieka amowan

oniktekipanoaya in toSeñor. Onichokak miek iwan onitra-bajojpanok miek por yen tlan onechtoktijkej in judiojin. ²⁰ Pero mach onimosotlaj de onamechmatiltij nochi tlan kuale, iwan yon se kuale para amejwan. Onamechmachtij kan anmololoaj iwan itech amokalijtik. ²¹ In judiojin iwan katlej mach judiojin onikinmilwij ma moyolpejpenakan (ma moyolkuepakan) de intlatlakol, iwan ma mokuepakan inawak Dios iwan ma kineltokakan in toSeñor Jesús. ²² Iwan axan niawi Jerusalén, in Espíritu Santo nechtoktia ma niwia, iwan mach nikmati tlan nipanos ompa. ²³ San tlan nej nikmati ke itech weyikantin kanik nipanotiwitz, in Espíritu Santo nechilwijtiwitz nik nechtzakuaskej iwan nipanos miek tekokojkayotl. ²⁴ Para nej, nonemilis mach nechtekipachoa. Tlan nechtekipachoa yen noteiw. Moneki nikchiwas nochi tlan in toSeñor Jesús onechnawatij ma nikchiwa. Kijtosneki ma niktematilti in kuale tlajtole katlej temakixtia katlej Dios otechmakak por yen itlasojoatlalis.

²⁵ 'Iwan axan kuale nikmati, ke nion se de amejwan, katlej onamechtlapowij de kenik in Dios tlanawatia, mach ok nechitas. ²⁶ Iwan axan nej nikneki namechilwis nik mach ok notlajtlakol tla akaj amo momakixtis. ²⁷ Porke nej ika nochi noyolo onamechmatiltij nochi tlan Dios kimonekiltia itech itlajtol, iwan mach ok itlaj poliwi namechilwis. ²⁸ Axan, ximot-lachilikan de kenik anyeskej iwan xikinmonekuitlawikan nochtin in tlaneltokakej ijkón kej se tlajpixke kinmonekuitlawia ichkawan. In Espíritu Santo oamechtlalij kej amobispojin (antlajpixkej) para xikinmonekuitlawikan in tlaneltokakej. Ijkón namejwan xikinpalewikan in tiopantlaneltokakej porke Dios okinkoj ika ieso. ²⁹ Nej nikmati ke nikuak mach ok nian nietos, witzej sekimej tlakaj katlej mach kuale inyolo iwan kej koyomej tekuanimej kinekiskej kinkuaskej in tlaneltokakej. ³⁰ Iwan monextiskej sekimej de amejwan katlej tlakajkayawaskej, tlamachtiskej ika tlan mach melawak para kinwikaskej in momachtijkej tlaneltokakej. ³¹ Ijkón kiné, ximotlachilijtukan, xikelnamikikan ke por eyi xiwitl, yuale tonale, mach onimosotlaj de onamech-najnawatij kada se de amejwan ika miek noixayo.

³² 'Axan, nokniwan, namechkawa inawak Dios iwan inawak itlajtol de tlasojoatlalistle katlej kipia poder para amechy-oloychikawas itech namotlaneltokalis, iwan amechmakas tlan ya amechkakitijkej san sekan inwan oksekimej katlej yomoyolchipajkej inawak Dios. ³³ Nej mach akaj onikix-elewilij itomin nion itzotzol. ³⁴ Namejwan kuale ankimatij nik in nej onitekipanoj ika yinmej nomawan para onikmote-molij tlan ika nimopanoltis, iwan tlan ika mopanoltiskej

katlej nowan onemiaj.³⁵ Nochipa onamechmachbij nik ijkón kipia de se tekipanos iwan de se kinpalewis katlej mach itlaj kipiaj. Ma tikelnamikikan tlan okijtoj in toSeñor Jesúz: “Moneki ma paki in tlakatl nikuak itlaj kitemaka iwan amo nikuak itlaj kimakaj.”

³⁶ Satepan de otlanke otlapoj, Pablo omotlankuaketze omotiotzajtzilij inwan nochtin in tiopantlaneltokakej de Éfeso. ³⁷ Nochtin ochokakej, okinanapalojkej (okinanawajtekej) iwan okixpipitzojkej in Pablo. ³⁸ Iwan omoyolkokojkej sa tekitl porke okinmilwij mach oksemi kitaskej. Satepan okimakawatoj asta itech barko.

21

Pablo oyáj itech weyikan de Jerusalén

¹ Nikuak otikinkajtejkej in tokniwan, ottitlekokej itech barko iwan melajka otiajkej asta itech tlale katlej pankistok itech atl itoka Cos, iwan owalmostlatik otiajkej itech oksé tlale katlej noijki pankistok itech atl itoka Rodas, iwan de ompa otajsitoj asta itech weyikan de Pátara. ² Ompa Pátara otikajsikej oksé barko katlej oyaya para región de Fenicia, itech ottitlekokej iwan otiajkej. ³ Nikuak otinejnentokaj otikitakej ik toopochma in tlale katlej pankistok itech atl itoka Chipre, pero otipanokej otiajkej melajka asta país de Siria. Iwan como in barko okikajtikiske tlamamale itech weyikan de Tiro, tones ompa otitemokej. ⁴ Ompa otikinmitajsikej in momachtijkej tlaneltokakej iwan otimokajkej inwan chikome tonale. Yejwan okilwijkej in Pablo amo ma wia Jerusalén ijkón ken okinmilwij in Espíritu Santo. ⁵ Ochikometik otikiskej de ompa. Nochtin in tokniwan iwan insiwawan iwan in pilwan, otechmakawatoj asta iatlatempán in weyikan, iwan ompa itempan atl otimotlankuaketzej iwan otimotiotzajtzilijkej. ⁶ Satepan otimonanapalojkej iwan otimomakajkej. Ottitlekokej itech barko iwan otiajkej, iwan yejwan omokuepkej para inchan.

⁷ Satepan otiajkej okachi itech barko desde Tiro asta itech weyikan de Tolemaida. Ompa Tolemaida otikintlajpalojkej in tokniwan iwan otimokajkej inwan se tonale. ⁸ Owalmostlatik otiajkej itech barko iwan otajsitoj itempan weyikan de Cesarea. Otiajkej ichan Felipe, katlej oyeka se de yen chikome tlapalewijkej de yen tlatitlaniltin. Felipe noijki oyeka tetlapowij de yen kuale tlajtole katlej temakixtia. Iwan ompa otimokajkej ichan. ⁹ Felipe okinpiaya nawi ichpokawan katlej mach ya omookichtiayaj, katlej oyekaj profetajtin. ¹⁰ Yotiekaj ompa kanaj keski tonale, iwan ikuakón oajsiko de

estado de Judea se profeta itoka Agabo. ¹¹ Nijuak otechitejkok, okontilanilij itlajkoipika in Pablo, omomaijilpij iwan omometzijilpij, iwan okijoj:

—In Espíritu Santo kija ke itech weyikan de Jerusalén, in judiojtin kijilpiskej ijkín iteko de yin tlajkoipikatl, iwan kitemaktiskej (kitemaktiliskej) inmak in tlakaj katlej mach judiojtin.

¹² Nijuak ijkón otikkakej, tejwan iwan tokniwan de Cesarea otiktlatlawtijkej in Pablo amo ma wia para Jerusalén. ¹³ Pero in Pablo otechnankili:

—¿Tlanik anchokaj iwan ankichiwaj ma nimoyolkoko para amo ma niwia? Nej nimotemaka, amo san para ma nechijilpijan, sino asta para ma nechmiktikan ompa Jerusalén por yen niktematiltia itoka in toSeñor Jesús.

¹⁴ Pablo mach okinekke otechkakilij iwan mach ok otiktlatlawtijkej okachi, otikijtojkej:

—Ma mochiwa san tlan Dios kimonekiltis.

¹⁵ Satepan, otimotlayektlalilijkej iwan otiajkej para Jerusalén. ¹⁶ Oyajkej towan sekimej momachtijkej tlaneltokakej de Cesarea, katlej otechwikakej ichan se tlakatl de Chipre itoka Mnasón, katlej desde ya wejkawitl yoyeka tlaneltokak. Ompa ichan otimokalotijkej.

Pablo okitlajpaloto in Jacobo

¹⁷ Nijuak otajsikej Jerusalén, in tokniwan tlaneltokakej otechresibirojkej ika miek pakilistle. ¹⁸ Owalmostlatik, Pablo oyáj towan para otiktlajpalotoj in Jacobo, iwan ompa oyekaj noijki nochtin in tiopantlayekankej. ¹⁹ Pablo okintlajpaloj. Okinmilwij nochti tlan Dios okichij innawak katlej mach judiojtin por medio de yen Pablo. ²⁰ Nijuak ijkón okikakej, okiweyikixtijkej in toTajtzin Dios. Okilwijkej in Pablo:

—Tokni Pablo, ya tikmati nik katej sa tekitl miekej judiojtin katlej yokineltokakej in toSeñor Jesucristo, iwan nochtin yejwan mochikawaj kinekij ma mochiwa tlan kijta itlanawatil in Moisés. ²¹ Yejwan okimatkej nik nochtin in judiojtin katlej katej wejka itech oksekimej paismej, nik in tej tikintlapowijtinemi mach ma kichiwakan tlan otlanawatij in Moisés, iwan noijki tикинмилвия mach ok moneki makinsirkunsidarokan in pilwan, iwan nion mach ok ma kichiwakan in kostumbres de yen ya wejkawitl toweyitajwan. ²² ¿Tlan tikchiwaskej? Porke nochtin kimatiskej nik otivalaj. ²³ Mejor ijkín xikchiwa: Nian towan katej nawi tlakaj katlej kichiwaskej inawak Dios tlan yejwan yokijtojkej. ²⁴ Xikinwika, iwan ximochipawa inwan, xikchiwa noijki in tlamantle ken kichiwaj in judiojtin. Iwan xikintlatlaxtlawili

para ma moximakan tetextik (kuameloj), iwan tej noijki ximoxima tetextik. Tla ijkón tikchiwas nochtin kimomakaskej kuenta nik mach melawak tlan okimatkej de tej, sino kimatiskej nik tikchiwa tlan otlanawatij in Moisés.²⁵ Iwan in tlaneltokakej katlej mach judiojtin, yotikintlajkuililijkej, otikinmilwijkej amo ma kikuakan nakatl katlej kinmaniliaj in santojtin, amo ma kikuakan estle iwan amo ma kikuakan nakatl de yolkamej katlej mach kinkixtiliaj inmeso, iwan in tlakaj iwan siwamej amo ma momekatikan.

Pablo okitzkijkej itech weyi tiopan

²⁶ Satepan Pablo okinwikak in nawin tlakaj iwan san sekan omochipajkej ijkón ken kichiwaj in judiojtin para yeskej kuale inawak Dios. Owalmostlatik in Pablo okalakke ijtik in weyi tiopan para okinmilwito in tiopixkej itech tlan tonale tlamic mochipawaskej, iwan keman kinmiktiskej in yolkamej para kixpantiliskej in Dios.

²⁷ Nijuak yejwan iwan Pablo yomochipajtokaj itech yonmej chikome tonaltin, sekimej judiojtin de Asia okitakej in Pablo itech weyi tiopan, iwan okinkuakualanijkej in tlakaj de yon weyikan. Iwan ikuakón okitzkijkej in Pablo.²⁸ Iwan otzajtzikej:

—¡Tlakaj de Israel, xitechpalewikan! Yin tlakatl nemí ik nowian (nian nepa) kinmilwijtinemi in tlakaj amo ma kichiwakan tlan kijta itlanawatil in Moisés, iwan kinmilwia amo ma kitlakitakan in weyi tiopan. Iwan axan, yokinkalakij nian ijtik in weyi tiopan sekimej griegojtin otlajtlakokoj nian kan tlatichiwaloj.

²⁹ Ijkón okijtojkej porke okiyejyekojkej nik in Pablo okiwak se tlakatl griego itoka Trófimo itech weyi tiopan, maski amo melawak. In Trófimo oyeka de weyikan de Éfeso, iwan achtoj in judiojtin okitakej in Pablo mowikatinemi iwan Trófimo itech weyikan de Jerusalén.

³⁰ Nochtin tlakaj de yon weyikan omokuejsojkej iwan nochtin omotlalojkej omotzonewatoj ipan Pablo. Okitzkijkej iwan okokuyotzkej ipan tlale asta kalan de yen weyi tiopan, iwan san niman okualintzakej in puertajtin.³¹ Iwan okinekiaj kimiktianij, pero in koronel de yen soldadojtin okimatke nik nochtin in tlakaj de Jerusalén sa tekitl kualanij.³² In koronel okinmololoj isoldadojwan iwan kapitanmej, iwan omotlalojkej oyajkej kan ololitokaj in tlakaj. Nijuak okitakej in koronel iwan isoldadojwan, ikuakón okajkej iwan mach ok okimagakej okachi.³³ Ikuakón in koronel okitzkij in Pablo iwan okinnawatij isoldadojwan ma kijilpikan ika ome kadenajtin. Satepan okintlajtlanij akin yon tlakatl iwan tlan okichij.³⁴ Pero sekimej otzajtziaj okijtoayaj se tlamantle iwan

oksekimej okijoayaj oksé tlamantle. In koronel mach owelia okikakia tlan okijoayaj porke sa nochtin otzajtziaj. Okachi kuale otlanawatij ma kiwikakan itech kuartel.³⁵ Nijuak oajsitoj kan eskalerajtin (escalones) de yen kuartel, in soldado-jtin okikechpanojkej in Pablo iwan okitlejkoltijkej ajkopen porke nochtin in tlakaj sa tekitl okulankej inawak.³⁶ Iwan nochtin oyayaj inkuitlapan tzajtiziwej okijoayaj:

—¡Xikmiktikan!

Pablo omopalewij inmixpan nochtin tlakaj

³⁷ Nijuak ya kikalakianij itech kuartel, in Pablo okitlajtlanij in koronel:

—¿Welis achitzin nimotlapowis mowan?

In koronel okinankilij:

—¿Tikmati titlapoa griego?³⁸ ¿Amo yen tej tiegipcio katlej ya wejkawitl otiaj en kontra de yen gobierno iwan otikinwika nawi mil temiktijkej kan tlawaki?

³⁹ Pablo okilwij:

—¡Amo, mach nej! Nej nijudío iwan onitlakatke itech se weyikan itoka Tarso, katlej sa tekitl weyi, iwan kajki itech región de Cilicia. Nej ompa nijuikit. Nimitzlatlawtia xinechkawili ma nikintlapowi in yinmej tlakaj.

⁴⁰ In koronel okawilij ma tlpoa. Pablo omoketzke kan eskalerajtin de yen kuartel, okiketzke ima okinchiwilij señas para ma mokamatzakuakan. Nijuak nochtin omokamatza-kej ijkuakón okintlapowij ika intlajtol in judiojtin, ika hebreo:

22

¹ —Nokniwan tatajmej, nananmej, xikkakikan tlan namechilwis para nimopalewis.

² Nijuak okikakej ke okintlapowiaya ika intlajtol hebreo, omokamatzakej okachi. Iwan Pablo okinmilwij:

³ —Nej nijudío. Onitlakatke itech weyikan de Tarso, región de Cilicia, pero onimoskaltij nian Jerusalén. Gamaliel onechmachtij miek iwan kuale onikmokawij tlan kijtaj in tlanawatiltin de ya wejkawitl toweyitajwan. Sa tekitl onikixkawiaya (onimomelij) de niktekipanos in toTajzin Dios ika nochí noyolo, ijkón ken aminochtin namejwan axan ankichiwi. ⁴ Achtoj nej onikintlatlalochtiaya katlej nemij itech yin ojtle de Jesús iwan sekimej asta onikinmikiaya. Tlakaj iwan siwamej onikinkitzkiaya iwan onikintzakuaya telpiloyan. ⁵ In weyi tiopixke iwan nochtin in tlayekankej tetajtzitzintin kuale kimatiq nik ijkón onikchiwaya. Yejan onechmakakej amatlanawatiltin para in tokniwan judiojtin de Damasco, para ika onechkawilijkej ma nikinwalwika in

kristianostin nian Jerusalén kej presojojin para ma kintlajyowitzikan.

Pablo okinmakak kuenta in judiojtin kenik omokuepke tlaneltokak

(Hch. 9:1-19; 26:12-18)

⁶ 'Nijuak oniaya ipan ojtle iwan yonajsiatiaya Damasco, iwan kej tlajko tonale, se tlanextle chikawak de ilwikak onechwaltlawilij ⁷ iwan oniwetzito ipan tlale. Iwan onikakke se tlajtole, onechilwij: "Saulo, Saulo, ¿tlanik wel tinechtemojtinemi iwan tikneki tinechkojkokos?" ⁸ Ijkuakón nej onitlanankilij: "¿Akin tej, tejwatzin?" In tlajtole onechnankilij: "Nej niJesús de Nazaret, katlej tej tiktemojtinemi." ⁹ Katlej nowan oyayaj okitakej in tlanextle, pero mach okikakej in tlajtole katlej onechtlapowiaya. ¹⁰ Nej oniktlajtlanij: "¿Tlan nikchiwas, Señor?" Iwan Señor onechilwij: "Ximoketza iwan xiwia itech weyikan de Damasco. Ompa mitzilwiskej tlan tikchiwas." ¹¹ Iwan komo in tlanextle chikawak onechixtlawilij, onechixmiktij, iwan mach ok owelik onitlachixke, in tlakaj katlej nowan oyayaj sa onechmatilankej iwan onechwikakej para Damasco.

¹² 'Ompa itech weyikan de Damasco oyeka se tlakatl itoka Ananías, sa tekitl omotemaktiaya itech itlanawatil in Moisés, iwan nochtin in judiojtin katlej chantij ompa Damasco otlaajtoayaj kuale de yej. ¹³ Ananías ovalaj onechitako iwan onechilwij: "Nokni Saulo, xitlachia oksemi." Iwan san ni man ijkuakón onitlachixke oksemi, iwan owelik onikitak in Ananías. ¹⁴ Ijkuakón yej onechilwij: "In Dios de ya wejkawitl toweyitajwan yomitzpejpenke desde achtoj para xikmati tlan Yej kimonekiltia, iwan para xikita in Jesús katlej kipia tlan kuale ipan iyolo iwan para tikkakilis itlajtol. ¹⁵ Dios omitzpejpenke para titetlapowis de Jesús iwan para tикинматилis nochtin in tlaltikpaktlakaj de tlan otikitak iwan de tlan otikakke. ¹⁶ Iwan axan, amo ximochia okachi. Ximoketza iwan ximokuateeki. Xikmotlatlawtili in Señor ma mitzchipawa de motlajtlakol."

Pablo okinmakak kuenta kenik in Señor okititlanke kan katej in tlakaj katlej mach judiojtin

¹⁷⁻¹⁸ 'Nijuak onimokuepke para Jerusalén, oniwiá ijtik in weyi tiopan onimotiotzajtzilito. Iwan nijuak onimotiotzajtzilitoka ijkuakón onikitak in Señor kej yeskia niteemiktok. In Señor onechilwij: "Xikisa totoka de Jerusalén, porke mach mitzneltokiliskej tlan tikinmilwis de Nej." ¹⁹ Iwan nej oniknankilij: "Señor, yejwan kuale kimatij ke oniaya itech nochtin intiopianwan in judiojtin para onikinwikaya telpiloyan katlej mitzneltokaj, iwan onikinwitekia. ²⁰ Iwan

nijuak okimiktijkej in Esteban katlej otetlapowiaya de tejwatzin, nej ompa onieka, oniktekawilij ma kimiktikan iwan asta onikintlatoka intlakenwan katlej otemiktijkej.”²¹ Iwan Señor onechilwij: “¡Xiwia! Nej nimitztitlanis wejka, tikintlapowiti katlej mach judiojtin.”

Pablo imak in koronel

²² Asta ompa okikakilijkej itlajtol, iwan ijkuakón otzajtzikej in judiojtin:

—¡Ma miki yon tlakatl! ¡Mach ok ma yeto!

²³ Iwan komo otzajtzitokaj iwan okintlamotlayaj ajkopan intlakenwan iwan okitlamotlayaj tlale ik ajkopan,²⁴ in koronel okachi kuale otlanawatij ma kikalakikan in Pablo kan kuartel. Iwan otlanawatij ma kiwitikan para ma kijto tlanik in tlakaj okualaniaj iwan otzajtziaj inawak.²⁵ Iwan nijuak yokijilpijkaj para kiwitikiskej, in Pablo okitlajtlanij in kapitan katlej ompa oyeka:

—¿Welis tikwitekis se tlakatl romano maski mach ya kitlaztintokiaj?

²⁶ Nijuak ijkón okikakke in kapitan, oyáj okimatiltito in koronel. Okilwij:

—Xikpia kuidado de tlan tikchiwas porke yin tlakatl romano.

²⁷ Ijkuakón in koronel okitato in Pablo iwan okitlajtlanij:

—¿Melawak nik in tej tiromano?

Iwan yej okinankilij:

—Aján, nej niromano.

²⁸ Ijkuakón in koronel okilwij in Pablo:

—Nej oniktlaxtlaj miek tomin para onimochij niromano.

Pablo okijtoj:

—Pues nej niromano desde onitlakatke.

²⁹ Ijkón, in tlakaj katlej kiwitelinij in Pablo san niman okikajkajkej. Iwan nijuak in koronel okikakke nik in Pablo yej romano, omomawtij porke yokijilpijka.

Pablo okiwikakej itech injunta in judiojtin

³⁰ In koronel okinekia kimatis kuale por tlanik in judiojtin okistlakawiayaj in Pablo. Owalmostlatik in koronel okinkixtilij in kadenajtin in Pablo. Noijki otlanawatij ma mololokan in tlayekankej tiopixkej iwan nochtin tlayekankej tetajtzitzintin judiojtin itech injunta. Satepan okikixtij in Pablo iwan okiwikak okiteixpantito itech yon junta.

23

¹ Pablo okintlatak nochtin in tlakaj de itech yon junta iwan okinmilwij:

—Nokniwan, nej nikaj asta axan ika kuale notlalnamikilis inawak Dios.

² Ijkuakón in weyi tiopixke Ananías, okinnawatij katlej ompa oyekaj inakastlan Pablo, ma kikamatlajtlatzinikan.

³ Pablo okilwij:

—¡Dios mitzkamatlajtlatzinis tej teixkajkayaj! Tla tej ompa tiewatok para tinechtlatzintokis ken kijta in tlanawatile, ¿tlanik kiné titlanawatia ma nechkamatlajtlatzinikan? ¿Kox ijkón kijta in tlanawatile xikchiwa?

⁴ Katlej ompa oyekaj okilwijkej:

—¿Ijkón timixewia tiknanankilia in weyi tiopixke de Dios?

⁵ Pablo okijtoj:

—Nokniwan, nej mach onikmatia kox yen weyi tiopixke. Tla nikmatini mach ijkón nik nitlajtoani, porke itech in tiotlajkuilole kijta: “Amo titlajtos biero de se tlayekanke de mopueblo.”

⁶ Ijkuakón Pablo okitak nik ompa oyekaj sekimej saduceos iwan sekimej fariseos, iwan okijtoj chikawak:

—Nokniwan, nej nifariseo, nej niwalajtok nelwatl de fariseos. Namejwan annechistlakawiaj porke nej nikchia nik se tonale moyolkuiskej (moyolitiskej) in mikkamej.

⁷ Nijkuak ijkón okijtoj in Pablo, in fariseos iwan saduceos sa yejwan opéj mokualaniaj. Oneske ome tlalnamikilistle porke mach san se tlan okiyeyekoayaj. ⁸ Porke in saduceos kijtaj nik in mikkamej mach moyolkuiskej, iwan kijtaj mach katej angelestín nion espíritus, pero in fariseos nochí yon tlamantle kineltokaj. ⁹ Nochtin otzajtziaj. Sekimej tlamachtijkej de itlanawatil in Moisés, katlej oyekaj fariseos, omoketzkej iwan okijtokej:

—Yin tlakatl mach itlaj biero okichij. Welis ipan melajka okitlapowij se espíritu o noso se ángel nijkuak oyaya ipan ojtle para Damasco.

¹⁰ Iwan como sa tekitl opéj mokualaniaj okachi, in koronel omomawtij amo san kichiwa kitzkiskej iwan kitlajtlamiskej in Pablo. Ijkuakón okinnotzkej sekimej soldadojtin para ma kixtikan de itech yon junta iwan ma kiwikakan oksemi para kan kuartel.

¹¹ Owalmostlayuaktik, in Señor okimonextilij in Pablo iwan okilwij:

—Ximoyolojchikawa, Pablo, porke ijkón ken otitlapoj de Nej nian Jerusalén, ijkón noijki titetlapowis de Nej itech weyikan de Roma.

Omotlatlalwijkej para kimiktiskej in Pablo

¹² Owalmostlatik, sekimej judiojtin omotlatlalwijkej para kimiktiskej in Pablo, iwan okisentlalijkej mach tlakuaskej

iwan nion mach itlaj koniskej asta ma yolopachiwikan ma kimiktikan in Pablo.¹³ Oyekaj okachi de omenpoaltiln tlakaj katlej ijkón okisentlalijkej intlajtol.¹⁴ Oyajkej kiné innawak in tlayekankeké tiopixkej iwan innawak in tlayekankeké tetajtzitzintin. Okinmilwitoj:

—Tejwan yotiksentlalijkej totlajtol mach itlaj tikkuaskeké iwan mach itlaj tikoniskej tla amo achtoj tiyolopachiwjj tikmiktiaj in Pablo.¹⁵ Axan namejwan iwan katlej de yen junta xiktlajtlanilikan in koronel ma amechwalwikili in Pablo, xikmotenwikan nik ankinekij ankitlatzintokiskej itech junta mostla para ankiyekmatiskeké tlan okichij. Tejwan ya timochixtoskeké para tkmiktiskeké antes de ajsiki nian.

¹⁶ Pablo okipiaya se ikni siwatl. Iwan nikuak itelpoch okimatke nik kinekij kimiktiskeké itio, ikuakón omotlaloj okilwito kan kuartel.¹⁷ Pablo okinotzke se kapitan, iwan okilwij:

—Xikwika yin telpochtle inawak in komandante porke kineki kimatiltis se tlajtole.

¹⁸ In kapitan okiwakak in telpochtle inawak in komandante. Okilwij:

—Pablo katlej tzaktok onechnotzke iwan onechilwij ma nikwalwika nian yin telpochtle. Kineki mitzilwis se tlajtole.

¹⁹ In komandante okimatinlanke in telpochtle okiwakak ik se lado iwan okitlajtlanij:

—¿Tlan tikneki tinechilwis?

²⁰ In telpochtle okilwij:

—In judiojtin omotlatlalwijkej para mitztlajtlanilikiwej xikwika oksemi in Pablo mostla itech junta, kimotewiskej kinekij kitlatzintokiskej okachi para kiyekmatiskeké tlan okichij.²¹ Pero amo xikinneltokili, porke kej omenpoaltiln de intekipanojkwani kimonepachwiskeké, iwan yokisentlalijkej intlajtol mach tlakuaskeké iwan nion mach itlaj koniskej tla amo achtoj yolopachiwjj kimiktiaj in Pablo. Axan ya mochixtokeké iwan sa kichiaj tlan tikijtos.

²² Ikuakón in komandante okiyolopachoj in telpochtle. Iwan okinawatij amakaj itlaj ma kilwi de tlan yokilwij.

Pablo okiwakakej inawak in gobernador Félix

²³ In koronel okinnotzke omen kapitanmej, iwan okinawatij ma kinyektlalikan ome siento soldadojtin katlej san nejnemiskej, eyinpoale iwan majtlakte katlej yaskeké ipan kabayo, iwan ome siento katlej yaskeké ika lanzajtin. Para nochtin ma wian itech weyikan de Cesarea a las nuebe de yuak.²⁴ Noijki otlanawatij ma kiyektlalikan se kabayo para ipan yas in Pablo, iwan otlanawatij ma kiwikakan ika kuale inawak in gobernador Félix iwan amitlaj ma pano.²⁵ Iwan okinmakak ma kitkikan se amatlajkuilole katlej ijkín kijta:

²⁶ “Nej ni Claudio Lisias. Nimitzontlajpaloa tejwatzin gobernador Félix itech yin amatl. ²⁷ In judiojtin okitzkijkej yin tlakatl Pablo iwan yakimiktianij, pero nijuak nej onikmatkenik in yej romano, oniaj inwan nosoldadojwan iwan onimokalakij onikpalewito. ²⁸ Iwan como oniknekia nikmatini por tlanik kitilwiaj, por yonik onikwikak itech injunta in judiojtin. ²⁹ Iwan onikmatke nik in judiojtin kitilwiaj in Pablo san por sekin tlamantle de intlanawatil de yejwan. Pero mach itlaj biero okichij como para ma kimiktikan, iwan nion mach moneki yetos telpiloyan. ³⁰ Iwan como onikmatke nik in judiojtin omotlatlalwijkej para kimiktiskej, okachi kuale nian nimitzontitlanilia monawak. Iwan noijki onikinmilwij akinmej kitilwiaj in Pablo ma wian ma moyektlalitij monawak de tlan ika kitilwiaj. Oksé tonale timotlajpaloskej.”

³¹ In soldadojtin okichijkej ijkón ken okinnawatijkej, iwan okiwikakej in Pablo de yuak asta itech weyikan de Antípatris. ³² Owalmostlatik, in soldadojtin katlej san onejenenkej okiskej de Antípatris iwan owalmokuepkej para Jerusalén itech inkuartel. In soldadojtin katlej oyayaj ipan kabayo, okiseguirojkej oyajkej okiwikakej in Pablo. ³³ Nijuak oajsitoj Cesarea, in amatlajkuilole okimaktijkej (okitemaktijkej) in Pablo. ³⁴ In gobernador nijuak otlanke okileroj yon amatlajkuilole, ikuakón okitlajtlanij in Pablo in yej de kan. Nijuak okimatke nik in Pablo yej de Cilicia, ³⁵ okilwij:

—Nimitzkakilis nijuak ma wikikan katlej mitztilwiaj.

Satepan okinnawatij isoldadojwan ma kitlatokan itech ipalacio in Herodes.

24

Pablo omopalewij ixpan gobernador Félix

¹ Makuile tonale satepan, in weyi tiopixke Ananías, oajsito ompa itech weyikan de Cesarea iwan sekimej tlayekankej tetajtzitzintin de Jerusalén iwan se lisensiado itoka Tértulo, katlej sa tekitl kuale otlapoaya. Nochtin yonmej oyajkej inawak in gobernador para kitilwiskej in Pablo. ² Nijuak okualwikakej in Pablo inyakapan, in lisensiado Tértulo opéj kistlakawia in Pablo. Okilwij in gobernador Félix:

—Timitztlasojkamachiliaj miek tejwatzin gobernador. Por yen tejwatzin axan tejwan tikatej ika kuale iwan tikpiaj pakilistle. Tiktlasojkamatij por yen moixtlamachilis por tlan kuale tlamochijtok itech yin topaís. ³ Por noch iwan tejwatzin tikchiwa ik nian nepa, tejwan tipakij iwan timitztlasojkamachiliaj por noch in yon, tejwatzin gobernador Félix. ⁴ Iwan para amo okachi nimitzwejkawas, nimitzlatlawtia

xitechonkakili se achitzin. ⁵ Kuale yotikixmatkej yin tlakatl wel tekokolismakak. Iwan itech nochí in tlaltikpak kinkuatlapololtijtinemi in judiojtín. Iwan yen tlayekanke de se grupo katlej kintokayotiaj nazarenos. ⁶ Iwan okinekia tlajitlakoani itech weyi tiopan, iwan por yonik tejwan otikitzkijkej. ⁷ Pero in komandante Lisias omokalakij iwan otechkixtilij in Pablo ika chikawak. ⁸ Tejwatzin monewian welis tikyolkuitis para xikyekmati nik melawak nochí tlan ika tiktilwiaj.

⁹ In judiojtín katlej ompa oyekaj ixpan gobernador okijtoayaj melawak nochí tlan okijoaya in Tértulo. ¹⁰ In gobernador ikuakón okichiwili señas in Pablo para ma tlajto. Pablo okijtoj:

—Ika pakilistle nimopalewis moixpan tejwatzin porke nikmati nik in tejwatzin titekiwaj de yin país desde ya wejkika. ¹¹ Yakin kipia majtlakte iwan ome tonale de oniekoko Jerusalén para nikweyikixtis in toTajtzin Dios itech weyi tiopan. Tejwatzin monewian welis tikonyekmatis tla amo melawak. ¹² Mach onechitakej nimokualanijtok iwan akaj, nion mach onikinkuejsoaya in tlakaj itech weyi tiopan, nion itech intiopan in judiojtín, iwan nion kanaj oksé lado de itech yon weyikan. ¹³ Yinmej tlakaj mach itlaj welis mitznextiliskej de tlan ika nechtilwiaj. ¹⁴ Pero nej nikmokuitia nik melawak niktekipanoa in toTajtzin Dios de ya wejkawitl toweyitajwan ijkón ken nechnextilia in Yankuik Ojtle de Cristo, iwan por yonik yejwan techtokayotiaj tinazarenos. Iwan nikneltoka nochí tlan kajki ikuilitok itech itlanawatil in Moisés iwan tlan okikuilojkej in profetajtin. ¹⁵ Nej nikchia inawak Dios tlan yejwan noiiki kichiaj, de ke nochtin mikkamej moyolkuiskej (moyolitiskej) oksemi. Moyolkuiskej katlej kualachijkej iwan katlej mach kualachijkej. ¹⁶ Por yonik nochipa nikneki nikchiwas tlan kuale, para notlalnamikilis amo ma nechislakawi de itlaj tlamantle mach kuale inawak Dios iwan nion innawak in tlakaj.

¹⁷ 'Satepan de kanaj keski xiwitl de oninenke itech oksekimej paismej, oniwalmokuepke oniwala para nopaís para nikxejxelos itech weyikan de Jerusalén kanaj kexkich tomin para katlej pobrestin, iwan noiiki para nikmiktis se yolkatl para nikixpantilis in toTajtzin Dios. ¹⁸ Nej onimochipajtoka itech weyi tiopan ijkón ken kichiwaj in judiojtín para nietos kuale inawak Dios. Iwan ikuakón sekimej judiojtín de región de Asia onechajsitejkojej itech weyi tiopan. Mach miekej ompa oyekaj nion mach omokuejsoayaj in tlakaj. ¹⁹ Moneki yejwan nekatej judiojtín ma wikikan ma moteixpantikij nian para ma nechtilwikan tla itlaj kipiaj nowan. ²⁰ O noso in yinmej katlej nian katej ma kijtakan kox onechajxilijkej itlaj

mach kuale nikuak onechpixtokaj itech junta. ²¹ O noso xamo nechtilwiaj por onitzajtzik chikawak ompa itech junta. Onikijtoj: "Namejwan axan nian annechistlakawiaj san por nikneltoka nik in mikkamej moyolkuiskej (moyolitiskej)."

²² Nikuak ijkón okikakke in gobernador Félix, okiyeyekoj okachi kuale kikawas yon tlamanle para oksé tonale. Porke yej okimatia achi de yen yonmej tlaneltokakej katlej nemij itech iowji in Cristo. Okinmilwij:

—Nikuak witz in koronel Lisias, nikmatis okachi kuale por tlanik ankistlakawiaj.

²³ In gobernador okinawatij in kapitan ok ma kitlato in Pablo ijtk telpiloyan, pero ma kikawilikan ma kitlajpalokan iamigoswan iwan ma kimakakan tla itlaj kineki.

²⁴ Opanok keski tonale satepan, ovalaj oksemi para Cesarea in gobernador Félix iwan isiwa Drusila, katlej oyeka judía. In gobernador otlanawatij ma kinotzakan in Pablo para ma kitlapowi de yen tlaneltokalistle de Cristo Jesús.

²⁵ Pablo okilwij in Félix kenik welis se tlakatl yetos chipawak inawak Dios. Okilwij nik in Dios kineki ma se kimoxikolti amo se tlajtlakos. Noijki okilwij nik in Dios se tonale techyolkuitis tinochtin. Iwan nikuak in gobernador okikakke nochí yon, sa tekitl omomawtij iwan okilwij in Pablo:

—San ika yej, xiwia. Nimitznotzas oksemi nikuak nimajxilis.

²⁶ In gobernador okichixtoka in Pablo ma kimaka itlaj tomin para kikajkawas. Por yonik okinotzaya miekpa para iwan omotlapowiaya. ²⁷ Ome xiwitl ijkón okichijtuka in gobernador Félix asta ikuak omopatlak. Okalakke oksé gobernador itoka Porcio Festo. Iwan komo in gobernador Félix okinekke mokawas kuale inwan judiojtin, por yonik okikajtej tzaktok in Pablo ijtk telpiloyan.

25

Pablo omopalewij ixpan in gobernador Festo

¹ Festo oajsito itech weyikan de Cesarea para otekikitzkij de gobernador. Eyi tonale satepan okiske de Cesarea iwan oyáj para Jerusalén. ² In tlayekankej tiopixkej iwan judiojtin katlej okachi tlayekantokej de Jerusalén, mientras ompa omajsia in gobernador Festo, omotlalojkej oyajkej okitilwitoj in Pablo.

³ Okitlatlawtijkej ma tlanawati ma kiwalwikakan in Pablo para Jerusalén. Pero yejwan yomotlatlwijkej kimonepach-wiskej ipan ojtle para kimiktiskej. ⁴ Pero in gobernador Festo okinnankilij nik in Pablo tzaktok Cesarea, iwan ipan kanaj keski tonale yej inewian yas ompa. ⁵ Okinmilwij:

—Ma wian sekimej tlakaj katlej okachi wejweyikistojej de amejwan. Ma wian nowan asta Cesarea. Tla Pablo okichij itlaj mach kuale, ompa welis ankistlakawiskej.

⁶ In gobernador Festo oyeka Jerusalén kanaj se chikueyi o noso majtlakte tonale, iwan satepan omokuepke para Cesarea. Owalmostlatik, omotlalij ipan isiya de gobernador kan tlaixkomakaj (tlatzonmanaj), iwan otlanawatij ma kiwalwikakan in Pablo. ⁷ Nijuak in Pablo okalakke kan tlaixkomakaj, in judiojtin katlej ovalajkej de Jerusalén okiyawalojkej iwan opéj kitilwiaj de miek tlamantle, pero mach yipa owelikej itlaj okinextilijkej de tlan okijoayaj. ⁸ Pablo omopalewij okijto:

—Nej mach onikchij itlaj mach kuale, nion itech intlanawatil in judiojtin, nion itech weyi tiopan, iwan nion inawak in weyi tlanawatij romano César.

⁹ Pero komo in Festo okinekke mokawas kuale iwan judiojtin, okitlajtlanij in Pablo:

—¿Tikneki tias Jerusalén para ompa nej nonewian nikitas nochi yin tlamantle de tlan ika mitzistlakawiaj?

¹⁰ Pablo okinankilij:

—Nikaj kan tlaixkomaka (tlatzonmanaj) in weyi tlanawatij César, kan kipaj de kitaskej por tlanik nechistlakawiaj. Tejwatzin monewian yotikmatke nik mach itlaj onikchij tlan mach kuale innawak in judiojtin. ¹¹ Tla itlaj onikchij mach kuale iwan moneki ma nechmiktikan, mach nimotzinkixtis. Pero tla amo onkaj itlaj tlan melawak de tlan ika nechistlakawiaj, mach akaj welis nechtemaktis (nechtemaktilis) inmak in judiojtin. Nikneki inewian in weyi tlanawatij César ma kita kox nikpia tlajtlakole o noso amo.

¹² Festo omotlapowij inwan oksekimej tlanajnawatijkej, iwan satepan okilwij in Pablo:

—Komo tikneki tipanos inawak in César, pues tias kiné inawak in César asta Roma.

Pablo oyáj inawak in rey Agripa

¹³ Kanaj keski tonale satepan, in rey Agripa iwan ikni siwatl Berenice oyajkej para itech weyikan de Cesarea okitlajpalotoj in gobernador Festo. ¹⁴ Iwan komo ompa omokajkej miek tonale, Festo okimakak kuenta in rey Agripa de yen Pablo, okilwij:

—Nian kajki se tlakatl katlej Félix okajtej tzaktok nijuak nej onikalakke nigobernador. ¹⁵ Nijuak onieka Jerusalén, in tlayekankej tiopixkej iwan in tlayekankej tetajtzitzintin judiojtin, onechixpantilitoj nonawak por tlanik kistlakawiaj yon tlakatl Pablo, iwan onechilwijkej ma niktlajtlakolti para ma miki. ¹⁶ Nej onikinnankilij nik se juev romano mach

kipia derecho para kitemaktis (kitemaktilis) akaj para ma kimiktikan san por yej kinekis. Achtoj moneki katlej kitilwiaj ma mopalewi ixpan jue s iwan inmixpan tlakaj katlej kitilwiaj. ¹⁷ Por yonik, nijuak in judiojtin ovalajkej nian, san niman nijuak owalmostlatik onimotlalij ipan nosiya de gobernador kan tlaixkomakaj (tlatzonmanaj) iwan onitlanawatij ma nechwalwiklikan in Pablo. ¹⁸ Nej onikmolwij xamo kitilwiaj de itlaj tlan mach kuale okichij, pero in judiojtin katlej ovalajkej okitilwikoj mach itlaj okijtojkej de tlan nej onikyejyekoaya. ¹⁹ Okitilwiayaj san por se tlamantle de intiotlamachtil iwan de se tlakatl itoka Jesús, katlej yomikke iwan Pablo kijta yolitok. ²⁰ Iwan como mach onikmatia tlan nikchiwas, okachi kuale oniktlajtlanij in Pablo kox kineki yas Jerusalén para ompa nonewian nikitas kox kipia itlaj tlajtlakole o noso amo. ²¹ Pero yej okijtoj ke inewian in weyi tlanawatij romano César ma kita kox kipia itlaj tlajtlakole o noso amo de tlan ika kitilwiaj. Por yonik onitlanawatij ok ma tzakto in Pablo asta ikuak ajsis tonale para niktitlanis inawak in César.

²² Ijkuakón in rey Agripa okilwij in gobernador Festo:

—Nej noijki nikneki nikkakis in yon tlakatl.

Festo okinankilij:

—Niman mostla welis tikkakis.

²³ Owalmostlatik, in rey Agripa iwan Berenice ovalajkej kan tlaixkomakaj (tlatzonmanaj), okalakej tlakentitiwej ika kuajkuale intlaken. Noijki ovalajkej in koroneltin iwan katlej okachi wejweyikistojej (wejweyititojej) de itech yon weyikan. Satepan Festo otlanawatij ma kualwikakan in Pablo. ²⁴ Iwan okijtoj in Festo:

—Tejwatzin, rey Agripa iwan namejwan katlej nian amololitojej towan. Nian kajki in tlakatl katlej nochtin in judiojtin de nian Cesarea iwan de Jerusalén kitilwiaj. Yejwan otzajtziaj chikawak onechilwiayaj ma miki. ²⁵ Nej nikita, mach itlaj okichij tlan mach kuale como para se ma kimiki. Iwan como yej inewian okitlajtlanke ke okachi kuale inewian in weyi tlanawatij César ma kita kox kipia itlaj tlajtlakole o noso amo, tonses nej onikyejyekoj okachi kuale niktitlanis asta Roma inawak César. ²⁶ Iwan como amo nikpia itlaj de tlan melawak de tlan ika kitilwiaj para welis niktlajkuililis in toweyi tlanawatij César, nian namechixpantilia namejwan, pero katlej okachi nikneki nikxpantilis, yen tejwatzin rey Agripa. Xiktlatzintoki tlan okichij para ma nikpia itlaj tlamantle tlan nikikuililis in toweyi tlanawatij César. ²⁷ Porke nikita mach kuale kajki tla niktitlanis se preso inawak in César iwan mach nikilwis tlan okichij.

26

Pablo omotlajtolpalewij ixpan rey Agripa

¹ Ijkuakón in rey Agripa okilwij in Pablo:

—Kualtis titlajtos para ximopalewi.

Pablo okiketzke ima iwan ijkín okijtoj:

² —Nikpia miek pakilstle porke axan welis nitlapoas moixpan tejwatzin rey Agripa, para nimopalewis de nochí tlan ika nechtilwiaj in judiojtin. ³ Porke tejwatzin kuale tikixmati nochí in kostumbres katlej kipiaj in judiojtin iwan tikmati nochí in tlamantle tlan ika timokualaniaj. Por yonik nimitzlatlawtia xinechonyekkakili notlajtol.

Pablo okinmakak kuuenta kenamij nik onemia nikuak mach oyeka tlaneltokak

⁴ Nochtin in judiojtin de weyikan de Tarso kan onitlakatke iwan de Jerusalén kuale kimatij kenamij nik onichipawkane-mia innawak desde nichokkoj. ⁵ Noijki kimatij iwan welis kijtoskej tla kinekij, ke desde nitelpochtle onieka nifariseo. In grupo de fariseos yejwan katlej okachi moyekketzaj itech totiotlamachtil iwan amo ken oksekimej grupojtin de judiojtin.

⁶ Iwan axan nian onechwalwikakej nechtilwiaj. Nechtilwiaj porke nej nikchia tlan Dios okinkakitij in ya wejkawitl towey-itajwan. ⁷ In tlakaj de yen majtlakte iwan ome familias de Israel, noijki kichiaj ma mochiwa tlan achtoj in Dios okinkakitij. Por yonik kiweyikixtiaj in Dios ika nochí inyolo iwan kitekipanoaj tonayan iwan yuak. Iwan por yonik, tejwatzin rey Agripa, axan in judiojtin nechtilwiaj porke nej noijki nikchia tlan yejwan noijki kichiaj. ⁸ Pero, ¿tlanik namejwan mach ankineltokaj nik in Dios welis kinyolitis in mikkamej?

Pablo okinmakak kuuenta kenamij nik okintlatlalochtiaya in tlaneltokakej

⁹ Nej noijki achtoj onikyejyekoaya oksé tlamantle. Onikyejyekoaya nikintoktis miek tlamantle tlan mach kuale katlej kineltokaj in Jesús de Nazaret. ¹⁰ Iwan ijkón onikchij itech weyikan de Jerusalén. Ika intlanawatil in tlayekankej tiopixkej, nej nonewian onikintzakke telpiloyan miekej yolchipawakej, iwan nikuak okinmikiayaj nej onikijtoaya kuale kajki. ¹¹ Miekpa sa tekitl onikinnekatktij para ma tlajtokan biero de Jesús. Iwan ijkón onikchijtinemria itech nochtin intiopanwan in judiojtin. Sa tekitl onechkualaniajaj ke asta onikintlatlalochtijtinemria itech weyikantin katlej katej itech oksekimej paismej.

*Pablo okijtoj oksemi kenamij nik omokuepke tlaneltokak
(Hch. 9:1-19; 22:6-16)*

¹² 'Iwan nijuak oniaj itech weykan de Damasco, onikitkik se amatl katlej okitkia se tlanawatile katlej onechmakakej in tlayekankej tiopixkej para ma nikinkitzki in tlaneltokakej. ¹³ Pero ipan ojtle, tejwatzin rey, kej tlajko tonale onikitak se tlanextle de ilwikak okachi chikawak ke itlawil in tonale, otlawij nopen iwan inpan katlej oyayaj nowan. ¹⁴ Tinochtin otiwetzitoj ipan tlale, iwan onikakke se tlajtole onechtlapowij ika tlajtole hebreo: "Saulo, Saulo, ¿tlanik wel tinechtemojtinemi iwan tikneki tinechkojkokos? Tej monewian timokojkokoa ijkón ken se toro mokojkokoa nijuak kitejteliksa in markisotes." ¹⁵ Ikuakón nej onikijtoj: "¿Akin tej, tejwatzin?" In Señor onechnankilij: "Nej niJesús, katlej tej tiktemojtinemi. ¹⁶ Ximoketza, porke onimitzmonextilij para titekipanos nonawak iwan para xiktematilti tlan axan yotikitak de Nej iwan tlan satepan tikitas. ¹⁷ Nimitzmakixtis de inmak in judiojtin iwan de inmak katlej mach judiojtin. Axan Nej nimitztitlani xiwia kan katej katlej mach judiojtin. ¹⁸ Nimitztitlani innawak para ma mixtlajtlapokan para mach ok ma nemikan kan tlatleyua, sino ma nemikan kan tlanestok. Para mach ok ma nemikan imak Satanás, sino ma nemikan inawak Dios. Moneki ma nechneltokakan para welis nikintlapojpolwis de intlajtlakol, iwan ijkón welis kipiaskej parte inwan nochtin in oksekimej katlej Dios yokinyolchipaj porke nechneltokaj."

Pablo okichij tlan Jesú斯 okilwij

¹⁹ Ijkón kiné, tejwatzin rey Agripa, onikchij tlan Jesú斯 onechilwjij nijuak onechmonextilij de ilwikak. ²⁰ Achtoj onikinmatiltij de itlajtol in Dios in judiojtin katlej katej Damasco, satepan katlej katej Jerusalén iwan katlej katej itech nochti in estado de Judea. Noijki onikinmatiltij katlej mach judiojtin. Nochtin onikinmatiltij itlajtol in Dios para ma moyolpejpenakan (ma moyolkuepakan) de intlajtlakol iwan ma mokuepakan inawak Dios. Onikinmilwij ma kichiwakan tlan kuale para ma mota nik melawak yomokuepkej tlaneltokakej. ²¹ Por yonik, sekimej judiojtin onechkitzkijkej itech weyi tiopan iwan okinekiaj nechmiktiani. ²² Pero asta axan nitetlapowia de Jesucristo porke Dios nechpalewia. Nochtin nikintlapowia de Dios, wejweyin iwan tzitzikinmej, mach itlaj oksé nikinmilwia, san yej tlan okijtojkej in profetajtin iwan tlan Moisés okijtoj de tlan tlamochiwas. ²³ Yejwan okijtojkej nik in Cristo okipiaya de mikis iwan satepan moyolkuis (moyolitis) oksemi de itech imikilis. Iwan yen katlej achtoj moyolkuis de nochtin. Yonmej profetajtin okijtojkej nik in Cristo kintlawilis in judiojtin iwan katlej mach judiojtin ika itlajtol, iwan kinmakixtis de intlajtlakol.

Pablo okichij ma moyolkuepa in rey Agripa

²⁴ Nijuak in Pablo okijtoj nochí yon tlajtote tlan ika omopalewij, in Festo owatlajtoj chikawak:

—¡Tej yotilokojtik Pablo! Sa tekitl otimoixtlamachtij asta yotikuatlapoloj.

²⁵ Pablo otlanankilij:

—Tejwatzin gobernador Festo, nej mach niloko. Nej ipan melajka tlan nikijta iwan kuale tlan nikyejyekoa. ²⁶ Nian kajki in rey Agripa, katlej kuale kimati nochí yin tlamanter, iwan por yonik nitlajtoa ika miek ixchikawalisste. Nej kuale nikmati nik in yej noijki kimati nochí yin tlan nej namechilwia porke mach itlaj otlapanok ichtaka. ²⁷ ¿Tikneltoka tejwatzin rey Agripa tlan okijtojkej in profeta-jtin? Nej kuale nikmati nik tikneltoka.

²⁸ In rey Agripa okinankilij:

—¿Tikneki san niman tinechkuepas nikristiano san ika keski tlajtote?

²⁹ Ijkuakón Pablo okijtoj:

—Tla san ika keski tlajtote o noso ika miek tlajtote, Dios ma kimonekilti ke amo san tejwatzin rey ximokuepa tikristiano, sino noijki nochtin katlej axan nian nechkaktokej noijki ma mokuepakan ken nej, maski amo ika yinmej kadenajtin.

³⁰ Satepan in rey Agripa iwan Berenice iwan gobernador Festo omoketzkej iwan noijki omoketzkej nochtin katlej ompa oewatokaj. ³¹ Oyajkej se lado para motlapowiskej de yen Pablo. Okimolwijkej:

—Yin tlakatl mach itlaj okichij como para ma se kimiki, nion para tzaktos telpiloyan.

³² Iwan rey Agripa okiwij in gobernador Festo:

—Yin tlakatl welini tikkajkawanij, tla yej amo kitlajtlanini ke inewian in weyi tlanawatij César ma kita kox kipia itlaj tlajtlakole o noso amo.

27

Pablo okititlankej asta itech weyikan de Roma

¹ Iwan okiyejyekojkej techtitlaniskej itech se barko para tiasekj asta país de Italia. Pablo iwan oksekimej katlej otzaktokaj okinmactilijkej se kapitan itoka Julio. Julio oyeka kapitan de se siento de soldadojtin iwan oyekaj iaxkawan in weyi tekiwaj Augusto César. ² Tinochtin ottitlejkokej itech se barko katlej witz de itech pueblo de Adramitio iwan katlej yokatka para kisani itech pueblotin de itech región de Asia. Otikiskej de itech weyikan de Cesarea. Noijki towan oyaya in Aristarco, katlej oyeka de weyikan de Tesalónica de región de Macedonia. ³ Owalmostlatik, otajsitoj itech weyikan de Sidón. In kapitan Julio opéj kuale kinotza in Pablo, iwan

okikawilij ma kintlajpaloti iamigoswan itech yon weyikan para ma kipalewikan ika itlaj.⁴ Otikiskej de Sidón, otiajkej ik ajko otikmotoktijtiajkej (itikmonetechtiatijkej) in tlale katlej pankistok itech atl itoka Chipre, porke in ejekatl chikawak otechixnamikiwalaya.⁵ Ottitlakotonkej itech atl otipanokej itempan región de Cilicia iwan de Panfilia, iwan otajsitoj itech weyikan de Mira, de itech región de Licia.

⁶ Ompa itech weyikan de Mira, in kapitan okajsik se barko katlej ovalaya de itech weyikan de Alejandría iwan katlej oyaya para país de Italia. In kapitan otechnawatij ma titlejkokan itech yon barko para tiaskej Italia.⁷ Otipanokej miek tonale itech atl iwan yolik otiajaj, iwan owij nik otajsitoj iyakapan in weyikan de Gnido katlej kajki itempan atl. Iwan komo ok otechixnamikiwalaya in ejekatl, por yonik otiajkej melajka ik ikxitlan in tlale katlej pankistok itech atl itoka Creta, iwan otajsitoj iyakapan in weyikan de Salmón.⁸ Sa tekitl owij nik otiajkej ik tlatentle. Otajsitoj se lugar itoka Buenos Puertos mach ok wejka de weyikan de Lasea.

⁹ Ya miek tonale otinejnentokaj itech atl, iwan oyeka sa tekitl temawtij para tiaskej okachi itech atl, porke opoliwia sa kanaj keski metztle para tlamic xiwitl iwan yopanok in tonale de ikuak se mosawa (ayunaroa). Por yonik in Pablo okinmilwij:

¹⁰ —Tlakaj, nikita nik mach ok welis tiaskej okachi itech atl porke ya temawtij, iwan welis polakis in barko iwan tikpoloskej itlamamal, iwan asta tejwan noijki welis timikiskej.

¹¹ Pero in kapitan okachi okikakilij iteko in barko iwan katlej tlanejnemij de yen barko, iwan mach okikakilij in Pablo.¹² Nekáj lugar katlej itoka Buenos Puertos mach oyeka kuale para ompa timokawaskej itech metzmej nikuak sewa. Por yonik nochtin okiyejyekojkej okachi kuale kisaskej de ompa iwan mochijchikawaskej de ajsitiwej itech weyikan de Fenice, katlej kajki itempan atl de yen tlale katlej pankistok itech atl itoka Creta. Yon Fenice onitok ik ikisayan in tonale, iwan okijojkej tikchiaskej ompa asta ikuak ayakmo ejekas okachi itech atl.

Oejekak chikawak itech atl

¹³ Satepan, nikuak opéj witz achitzin yamankaejekatl de ik tlani, ikuakón yejwan okiyejyekojkej welis oksemi tiaskej itech atl. Otikiskej de yon lugar iwan otiajkej itech atl nochitlatentle de yon tlale katlej pankistok itech atl itoka Creta.

¹⁴ Pero achitzin satepan se ejekatl chikawak itoka Euroclidón o noso Norte, ovalaj okimomagako in barko.¹⁵ Yon ejekatl

opéj kiwika in barko. Iwan como mach ok owelik otiknejnemitejkej in barko, otimokajkajkej ma techwika in ejekatl.¹⁶ Otipanokej ikuilapan se tzikitzin tlale katlej pankistok itech atl itoka Claua. Otipanokej ikuilapan yon tlale porke ompa mach ok otechwitekia in ejekatl. In barko okitilantiaya se barkojtzin iwan sa tekitl owij otiktlejkoltijkej ipan weyi barko.¹⁷ Satepan de otiktlejkoltijkej in barkojtzin, in tlakaj okonintilankej in arreatajtin para ika okitlajkotijtilinijkej in barko. Iwan como okimakaskej de amo tzoponiti ijtk in xale katlej kilwiaj Sirte, ikuakón okintemowijkej ilonajwan in barko katlej okitoktiaya in ejekatl ma nejnemi. Iwan okajkej in barko ma kiwika in ejekatl.¹⁸ Owalmostlatik, ok oejetatoka chikawak iwan mach kuale oyaya in barko. Por yonik yejwan opéj kitlatlamotlaj itlamamal in barko ijtk atl.¹⁹ Owiptlatik, okintlatlamotlakej noijki ipostejwan in barko, iarreatajwan iwan nochi san tlan owelik okitzkijkej de tlan motekitiltia itech barko.²⁰ Opanok miek tonale iwan mach otikitakej in tonale nion sitlaltin, iwan ika yon ejekatl katlej okimomagaya in barko, mach ok otikchiayaj timomakixtianij de ompa.

²¹ Komo yotipanokej miek tonale iwan mach otitlakuayaj, in Pablo omoketzke tlatlajko de nochtin iwan okijtoj:

—Tatajmej, okachi kuale annechneltokilianij iwan mach tikisanij de Creta. Mach ankipoloanij itlamamal in barko iwan mach itlaj tipanoanij.²² Pero axan amo ximoyolotlamitikan, tikpoloskej in barko pero mach akaj mikis.²³ Yin yuak onechmonextilij se iángel in Dios, katlej nej nikneltoka iwan niktekipanoa.²⁴ Onechilwij: “Amo ximomawti Pablo, porke tikpia por timoteixpantiti inawak in weyi tlanawatij César, iwan por yen tej Dios kinpalewis nochtin katlej katej mowan itech barko.”²⁵ Por yonik, namejwan tlakaj, ximoyolochikawan, porke nikneltoka iwan kuale nikmati nik in Dios ipan melajka kichiwas ijkón ken onechilwij iángel.²⁶ Pero in ejekatl kitlamotlati in tobarko itech se tlale katlej pankistok itech atl.

²⁷ Satepan de kaxtole tonale, ok otechwikatinemia in ejekatl itech mar katlej itoka Adria. Kej tlajko yuak, in tlakaj katlej tekipanoaj itech barko, okimomakakej kuenta nik yotikonajsitiayaj in tlale.²⁸ Okitamachijkej in atl kox ok wel wejkatlan. Okipliya senpoale iwan kaxtole iwan se metro. Ok achitzin tlayakapan okitamachijkej oksemi, okipliya senpoale iwan chikome metro.²⁹ Omomawtijkej de motepitzinitiwej (kimotoponilitiwej) ika itlaj weyi tetl. Por yonik okinkajkajkej nawi tepostin ik ikuilapan in barko para ika okitzikojkej tlatlampa. Iwan okinekiaj ma tlanestiwiwetzi

sa niman. ³⁰ Pero in tlakaj katlej tekipanoaj itech barko okinekiaj choloanij, iwan opéj kitemowiaj in barkojtzin ixko atl. Omochijkej yawij kinkajkawatiwej in tepostin ik iyakapan barko para ika ma motziko. ³¹ Iwan ikuakón in Pablo okilwij in kapitan iwan isoldadojwan:

—Tla nekatej tlakaj amo mokawaj itech yin weyi barko, namejwan mach welis ammomakixtiskej.

³² Tones in soldadojtin okintzontekej in arreatajtin katlej ika oilpitoka in barkojtzin iwan okajkej ma wetziti ijlik atl.

³³ Ok kualkan nikuak ayamo otlanesia, in Pablo okinmilwij nochtin:

—Yokaxtoltik namejwan mach itlaj ankikuaj iwan nion mach ankochij. ³⁴ Namechtlatlawtia xitlakuakan para ankixicoskej anmomakixtiskej, porke mach akaj mikis iwan nion mach akaj kipolos nion se itzonkal.

³⁵ Nikuak ijkón okijtoj, in Pablo okontilanke se pan iwan omotlasojkamatke inawak Dios inmixpan nochtin. Okipostekke in pan iwan opéj kikua. ³⁶ Ikuakón kiné nochtin omoyolojchikajkej iwan otlakuajkej noijki. ³⁷ Katlej otiajaj itech yon barko, por tinochtin otiekaj ome siento iwan eyinpoale iwan kaxtole iwan se. ³⁸ Satepan de otlakuajkej asta kan oixwikej, ikuakón okitlamotlakej nochti in trigo ijlik atl para mach ok ma etiya in barko.

In barko oapolakke

³⁹ Nikuak otlaneske, okitakej ya ajsitiwej kan ya onkaj tlale pero mach okimatiaj kanin katej. Okitakej imayo in atl chikokalaktok itech yon tlale iwan okitakej in atlentle xaloj. Okijtojkej kichiwaskej de kijuaniskej in barko okachi ik tlatentle. ⁴⁰ Okintzontekej in arreatajtin de yen tepostin katlej ika otzikotoka in barko ik tlatlampa, iwan ompa okinkajtejkej ijlik atl. Noijki okintotonkej in arreatajtin katlej ika oilpitoka in timón kej yeskia ibolante in barko. Satepan okitlejkoltijkej ilona in barko para ke in ejekatl ma kinejnemiti. Satepan in barko opéj mijkuania okachi ik tlatentle. ⁴¹ Pero nikuak yotonajsiaj okachi ik tlatentle, in barko oyakatzoponito ik tlatlampa ijlik xale iwan ompa omokaj. Iyakapan omokaj tzopontok iwan ik ikuitlapán opéj pojposteki porke in atl chikawak ipan omotlamotlaya.

⁴² In soldadojtin okinekiaj kinmiktianij in presojtin para amo ma cholakan nadarojtiaskej. ⁴³ Pero in kapitan mach okinekke ma miki in Pablo. Por yonik mach okitekawilij ma kinmiktikan in presojtin. Okinnawatij nochtin akinmej moesojkej nadaroaj yejwan achtoj ma mokajkawakan ijlik atl para ma kisatij ipan tlale. ⁴⁴ Iwan oksekimej katlej mach kimatiñ nadaroaj ma wian ipan tablajtin o noso ipan kuanmej

katlej opojpostekej de yen barko. Iwan ijkón tinochtin otikisatoj ipan tlale.

28

Pablo oajsito ipan tlale katlej pankistok itech atl itoka Malta

¹ Nijkuak yotimomakixtijkej tinochtin de ijlik atl iwan yotiekaj ipan tlale, in tlakaj katlej ompa chantij otechilwijkej nik in yon tlale katlej pankistok itech atl itoka Malta.

² In tlakaj katlej ompa chantij sa tekitl kuale otechresibirojkej. Iwan komo okiawtoka iwan osewatoka, okitlalijkej se weyi tlikuile iwan otechnotzkej ma timototonikan.

³ Pablo okikuito se manojo kuawitl wakke, iwan nijkuak okontenke ijlik in tlitl, ikuakón nimana se koatl okistewak porke okimachilij totonik in tlitl iwan omopiloj itech ima in Pablo.

⁴ Nijkuak in tlakaj katlej ompa chantij okitakej yon koatl omotzikoj ika itlanwan itech ima in Pablo, okimolwijkej:

—Yin tlakatl yipa temiktij, porke maski omomakixtij de ijlik atl, itlajtlakol mach ok kikawilia ma yolito.

⁵ Pero in Pablo omomatzejzeloj iwan koatl owetzke ijlik tlitl, iwan mach itlaj omochij in Pablo. ⁶ Nochtin okichiayaj tlan ora temis (posawis) ima o noso tlan ora wetziti ya mikkat. Pero komo wejkawitl okichixtokaj iwan okitakej mach itlaj omochiwaya, ikuakón okipatlakej intlayejyekol iwan opéj kijtaj nik in Pablo yej se dios.

⁷ Mach wejka de ompa oyekaj sekimej tlalmej iaxkawan se tlakatl itoka Publio, katlej tekiwaj de yon lugar. Sa tekitl kuale otechresibiroj iwan ompa otimokajkej otechtlamakatoka eyi tonale. ⁸ Ipapan in Publio sa owetoka ipan itlapec, ototonkawiloaya iwan oeswiloaya. Ikuakón Pablo oyáj okitlapaloto. Omotiotzajtzilij iwan okintlalij imawan ipan yon kokoxke, iwan ijkón opajtik. ⁹ Satepan nochtin okimatkej. Por yonik ovalajkej inawak in Pablo nochtin in kokoxkej de yon lugar, iwan nochtin opajtikej. ¹⁰ Nochtin omotlasojkamatkej tonawak iwan otechtlatliokolijkej. Satepan nijkuak ya ora tikisaskej itech barko para tiaskej, otechmakatoj noch i tlan tiknekiskej ipan ojtle.

Pablo oyáj itech weyikan de Roma

¹¹ Satepan de otipanokej eyi metztle itech yon tlale katlej pankistok itech atl, ottitlekokej itech se barko katlej ompa omochixtoka kej eyi metztle nijkuak sewa. In barko ovalaya de itech weyikan de Alejandría, iwan iyakapan barko okitkia intlajmacho in diosmej koatzitzintin katlej kintokayotiaj Cástor iwan Pólux. ¹² Otajsitoj itech weyikan de Siracusa katlej kajki itempan atl, iwan ompa otimokajkej eyi tonale.

13 Otikiskej de Siracusa itech barko iwan otiajkej san nochitlatentle asta otajsitoj itech weyikan de Regio. Owalmostlatik, ovalaj se ejekatl de ik tlani, iwan ipan ome tonale otajsitoj itech weyikan de Puteoli. ¹⁴ Ompa otikinmajsikej sekimej tokniwan tlaneltokakej, iwan otechtlatlawtijkej inwan matimokawakan se samana. Satepan otikiskej iwan otiajkej para Roma. ¹⁵ In tokniwan de Roma yokimatij de tejwan. Owalkiskej de Roma iwan ovalajkej otechnamikikoj ipan ojtle asta itech weyikan katlej itoka Foro o noso tiankistle de Apio iwan asta kan se lugar katlej kitokayotiaj Tres Tabernas o noso Eyi Tienda. Nijuak in Pablo okinmitak in yonmej tokniwan, omotlasojkamatke inawak Dios iwan omoyolojchikaj okachi. ¹⁶ Nijuak otajsitoj itech weyikan de Roma, in kapitan Julio okintemaktij (okintemaktilij) in presojtin imak oksé kapitan katlej kinmita in presojtin. Pero in Pablo okikawilijkej ma chanti se lado iwan okitlalijkej se soldado ma kitlato.

Pablo otetlapowij de Jesús itech weyikan de Roma

¹⁷ Eyi tonale satepan, Pablo okinnotzke katlej okachi tlayekantokej judiojtin de itech weyikan de Roma. Nijuak omololojkej okinmilwij:

—Nokniwan, nej mach itlaj onikchij tlan amo kuale innawak in judiojtin nion innawak in tlamantin katlej otechtitijkej in ya wejkawitl toweyitajwan. Pero maski ijkón, in judiojtin de Jerusalén onechtemaktijkej (onechtemaktiliijkej) inmak in tekiwajkej romanostin. ¹⁸ Iwan satepan de onechtlatzintokijkej okinekiaj nechkajkawanij, porke mach itlaj onechajxilijkej tlan amo kuale como para ika ma nechmiktikan. ¹⁹ Pero in judiojtin mach okinekej ma nechkajkawan. Por yonik oniktlajtlanke ke inewian in weyi tlanawatij César yej ma kita kox nikpia itlaj tlajtlakole o noso amo, maski nej mach oniwalaj onikintilwiko nojudiojknigan. ²⁰ Por yonik, nej onamechnotzke para namechitas iwan para namechtlapowis. Namejwan axan annechitaj nijilpitok ika kadenajtin porke nikneltoka in Cristo katlej nochtin in judiojtin kichixtokej ma wiki.

²¹ Yejwan okilwijkej in Pablo:

—Tejwan mach akaj techwaltitlanilia nion se amatlakuilole de yen judiojtin katlej katej itech estado de Judea. Nimpor yen tokniwan judiojtin katlej oajsikoj nian, mach akaj itlaj techilwia itlaj tlan amo kuale de tej. ²² Pero axan tejwan tiknekij tikkakiskej tlan tkiyejyekoa. Porke tikmatij ik nian nepa in tlakaj tlajtoaj biero de yin yankuik tlamachtile.

²³ Toneses okitlalijkej se tonale para oksemi motlapowiskej. Itech yon tonale miekej tlakaj omololojkej kan okalotitoka in

Pablo. Desde kualkan asta tiotlakke, in Pablo okintlapowij de kenik in Dios tlanawatia. Okichiwaya de ma kineltokakan in Jesús ika itlanawatil in Moisés iwan ika tlan okijuilojkej in profetajtin. ²⁴ Sekimej judiojtin okineltokakej tlan Pablo okinmilwij, pero oksekimej mach okineltokakej. ²⁵ Iwan como mach nochtin in judiojtin omotlaliayaj san se tlajtole, mejor opéj yawij de ompa. Pero antes de kisaskej nochtin, Pablo okinmilwij:

—In Espíritu Santo yompa tlan okilwij in profeta Isaías iwan satepan okinmilwij in ya wejkawitl toweyitajwan:

²⁶ Xiwia iwan xikinmilwi in yonmej tlakaj:

Namejwan maski antlakakiskej, pero mach ankimomakaskej kuuenta.

Maski kuale xitlachiakan pero mach itlaj ankitaskej.

²⁷ Porke yonmej tlakaj wel yoltlakuawakej,

iwan tzajtzaktok intlakakilis,

iwan omixtzajtzakej.

Para amo ma yektlachiakan ika inmixtololowan,

iwan amo ma tlakakikan ika intlakakilis,

iwan amo ma kimomakakan kuuenta ipan inyolo,

iwan amo ma moyolkuepakan,

iwan ijkón amo nikinmakixtis.

²⁸ Xikmatikan kiné namejwan anjudiojtin, de axan para tlayakapan Dios kinkawilis ma momakixtikan in tlakaj katlej mach judiojtin. Iwan yejwan ipan melajka kikakiliskej itlajtol.

²⁹ Nijuak in Pablo ijkón okijtoj, in judiojtin okiskej iwan oyajkej sa tekitl mokualanijtiwej entre yejwan.

³⁰ Pablo omokaj ome xiwitl itech weyikan de Roma itech se kale kan okitlanejtoka. Ompa okinresibiroaya nochtin katlej okontlajpaloyaj. ³¹ Okintlapowiaya in tlakaj de kenik in Dios tlanawatia. Otetlapowiaya mach ika nemawtile, iwan otlamachtiaya de toSeñor Jesucristo iwan mach ok akaj itlaj okilwiaya.

SAN PABLO ITLATITLANIL IN DIOS OKINTLAJKUILILIJ IN TLANELTOKAKEJ DE ROMA

Pablo okintlajkuililij in tiopantlaneltokakej de Roma

¹ Nej niPablo, niitekipanoj in Jesucristo. Dios onechnotzke para ma nieto niitlatitlanil. Onechpejpenke para ma niktematilti in kuale tlajtote katlej temakixtia.

² Desde ya wejkawitl, Dios okinkakitij in tlakaj de Israel yon kuale tlajtote katlej temakixtia ika inten in profetajtin katlej okijuilojkej in tiotlajkuilole. ³ Yon kuale tlajtote katlej temakixtia tlapo de yen toSeñor Jesucristo, iKone in toTajtzin Dios. Nijuak otlakatke, otlakatke kej se tlakatl katlej walajtok nelwatl de yen rey David. ⁴ Pero nijuak omoyolkuik satepan de omikke, omoteititij nik melawak Yej iKone in Dios katlej kipia weyi ipoder, iwan noiiki okipiaya in Espíritu Santo katlej chipawak porke Yej Dios. ⁵ Iwan por yen Jesucristo, Dios ika iteiknotlamachilis onechtlalij ma nieto niitlatitlanil, para ma nikanmatilti nochtin in tlaltikpaktlakaj de yen kuale tlajtote katlej temakixtia, para ma kineltokakan iwan ma kitlakitan toTajtzin Dios, iwan ijkón nochtin ma kiweyikixtikan toSeñor Jesucristo. ⁶ Iwan namejwan noiiki Dios oamechnotzke para xiekan iaxkawan in Jesucristo.

⁷ Namechijkuilia yin amatlajkuilole aminochtin namejwan katlej anchantij itech weyikan de Roma, katlej Dios sa tekitl amechtlasojtla, iwan oamechnotzke para xiekan anyolchipawakej inawak iwan xiekan de Yej iaxkawan. ToPapan Dios iwan toSeñor Jesucristo ma amechmakakan inteiknotlamachilis iwan inyolosewilis.

Pablo sa tekitl okinekke yas kintlajpaloti in tlaneltokakej katlej chantiж itech weyikan de Roma

⁸ Axan, por yen tlan Jesucristo okichij por tejwan, achtoj, nikneki nimotlasojkamatis inawak Dios por aminochtin namejwan, porke ik nowian (nian nepa) yokimatkej nik namejwan kuale antlaneltokaj inawak Dios. ⁹ Iwan Dios, katlej ika noch i noyolo niktekipanoa para niktematiltia in kuale tlajtote katlej temakixtia de iKone, Yej kuale kimati nik nej nochipa namechelnamiki nijuak nimo-tiotzajtzilia. ¹⁰ Iwan nochipa niklatlawtia in toTajtzin Dios, Yej ma kimonekilti xamo kualtis nias namechitati. ¹¹ Porke nikneki namechitas iwan nikneki namechpalewis para namejwan xikpiakan poder katlej kitemaka in Espíritu

Santo para okachi kuale xiktekipanokan in toTajtzin Dios, iwan para okachi kuale ximoyekketzakan itech namotlaneltokalis. ¹² Kijtosneki, ma timoyolojchikawakan se iwan oksé ika totlaneltokalis katlej tikpiaj.

¹³ Nokniwan, nikneki xikmatikan nik ya miekpa nikneki nias namechitati, pero asta axan mach niweli porke nechtzakuiliitiwitz miek tlamantle. Nikneki nias namechitati para namechmachtis xinejnemikan kuale ipan iojwi in Cristo, ijkón ken onikinmachtij oksekimej tlaneltokakej katlej mach judiojtin. ¹⁴ Nej nikpia de nikintlapowis nochtin, katlej tlapoaj ika tlajtote griego iwan katlej mach tlapoaj ika griego, katlej ixtlamatkej iwan katlej mach ixtlamatkej. ¹⁵ Iwan por yonik, nej sa nikchixtok keman welis namechmatiltis in kuale tlajtote katlej temakixtia namejwan noijki katlej anchantij itech weyikan de Roma.

In kuale tlajtote katlej temakixtia kipia poder

¹⁶ Nej amo nipinawa de niktematiltis in kuale tlajtote katlej temakixtia, porke kipia poder de Dios iwan weli kinmakixtia nochtin akinmej kineltokaj. Achtoj yen judiojtin okikakej itlajtol in Dios para ma momakixtikan, pero axan katlej mach judiojtin noijki ya kikakij itlajtol in Dios para ma momakixtikan noijki. ¹⁷ Porke yin kuale tlajtote katlej temakixtia techititia kenik in Dios techita tichipawakej de nochti totlajtlakol nikuak titlaneltokaj inawak. Dios ijkón techita san yen tla titlaneltokaj inawak. Ken kijta in tiotlajkuilole: “Akin kitlalis itlaneltokalis inawak Dios, in Dios kitas ya chipawak de nochti itlajtlakol iwan ijkón welis kipias nemilistle nochipa.”

Intlajtlakol in tlaltikpaktlakaj

¹⁸ ToTajtzin Dios katlej kajki ilwikak kiteititia ikualanilis inpan nochtin in tlakaj katlej mach kualtin iwan mach kitlakitaj in Dios. Iwan por yen tlajtlakole katlej kichiwaj, kitzakuiliaj tlan melawak de Dios para oksekimej amo ma kimatikan. ¹⁹ Porke nochtin in tlaltikpaktlakaj kimatij nik onkaj Dios, iwan por yen tlamantin katlej okinchij, ika yon Yej moteititia. ²⁰ Maski amo se weli kita in toTajtzin Dios, pero desde ikuak opéj in tlaltikpak, nochti tlan Yej okichij techititia nik in Yej onkaj iwan kipia weyi ipoder katlej mach keman tlamis. Iwan por yonik mach akaj welis kijtos nik mach kimat kox onkaj Dios. ²¹ Iwan maski yejwan okimatiaj nik onkaj Dios, mach okitlakitakej kej Dios iwan nion mach okitlasojkamachilijkej. Sino yej opéj kiyeyekoaj miek tlamantle katlej mach itlaj ipatij, iwan oyoltlakuawakej porke mach ok itlaj welij kimomakaj kuenta. ²² Yejwan momachiliaj

wel ixtlamatkej, pero omokuepkej okachi mach ajsitok intlanamikilis.²³ Porke ayakmo okiweyikixtijkej in Dios katlej kipia imawisotlanex iwan mach keman miki. Yejwan yej opéj kinweyikixtiaj in santojin katlej tlachiwaltin. Yonmej santojin motaj ken tlakaj katlej mikij, o noso motaj ken totomej, ken koamej o noso ken yolkamej katlej kipiaj nawi imikxiwan.

²⁴ Por yonik, kiné, Dios okinkaj ma kichiwakan tlan amo chipawak tlan kineki inmelewilis. Iwan ijkón se iwan oksé opéj kichiwaj ika intlnakayo miek tlamantle biero iwan tepinatij.²⁵ Porke okikajkej se lado katlej melawak tlan onkaj de Dios, iwan opéj okachi kineltokaj in tlakajkayawalistle. Iwan opéj kitlakitaj iwan kiweyikixtiaj tlan Dios okichij, iwan amo yen Dios katlej moneki se kiweyikixtis nochipa. Ijkón ma yeto.

²⁶ Por yonik, kiné, Dios okinkaj ma kichiwakan tlan amo kuale tlan kineki inmelewilis iwan tepinatij, iwan asta insiawan okikajkej de kochiskej inwan inmokichwan, iwan yej opéj kochtinemij inwan insiwaikniwan.²⁷ Ijkón noijki in tlakaj, okikajkej de kochiskej inwan insiawan iwan yej opéj totoniaj porke kinekij kochiskej inwan inmokichikniwan (intlakaikniwan). Entre tlakaj kichiwaj ika intlnakayo tlan mach kuale katlej tepinatij, iwan por yonik yejwan kiresibiroaj tlajyowilistle ipan intlnakayo ijkón ken moneki.

²⁸ Komo yejwan mach okinekej okichijkej kuenta in Dios, por yonik in Dios okinkaj. Okinkawilij kiné ma kiyeyekokan tlan mach kuale, iwan por yonik opéj kichiwaj tlan mach omonekia kichiwanij.²⁹ Omomachtijkej kichiwaj miek tlamantle mach kuale. Momekatiaj, mach kualtin, kinekij kipiaskej noch iwan kitaj, kitechiwilija tlan amo kuale. Tentokej de nexikolistle, temiktijkej, tenonotzkej, tekajkayajkej iwan kiyeyekoaj tlan mach kuale de oksekimej.³⁰ Noijki tepojpojkej, kikokoliaj in Dios, moweyinekij iwan mach tetlakitakej. Moweyimatij, kinextiaj itlaj tlamantle mach kuale iwan mach kintlakitaj intajwan.³¹ Mach kimatij tlakakij, mach kichiwaj tlan kijtaj, mach tetlasojtlakej, mach kimatij tetlapojpolwiaj, iwan mach teiknomatkej.³² Yejwan kuale kimatij nik in Dios kijta ke nochtin akinmej kichiwaj noch yon tlamantle kipia de mikiskej iktlanke (ik tlami). Pero maski ijkón, yejwan kiseguiroaj kichiwaj, iwan asta kiwelitaj noijki nikuak oksekimej no ijkón kichiwaj.

2

Dios kinmixkomakas (kintzonmanas) in tlaltikpaktlakaj ken moneki

¹ Ijkón kiné, tej mach welis titlapojpolwiros tla tikipta nik in yonmej tlakaj tlajtlakolejkej porke biero kichiwaj. Dios mach mitzitas akin tej katlej ijkón tikipta. Nijuak tej tikipta ke akaj oksé tlakatl kipia tlajtlakole, tej monevian timotlajtlakolmaka, porke tej noijki tikchiwa ken yej. ² Tikmatij nik san yen Dios welis kijtos ke katlej kichiwaj yon tlamantle biero kipiaj tlajtlakole. Iwan noijki tikmatij nik in Dios kichiwas ken moneki nijuak kintlajyowiltis. ³ Pero tla tej tikipta kej katlej kichiwaj yon tlamantle biero kipiaj tlajtlakole, iwan tej no ijkón tikchiwa, ¿kox tkiyejyekoa nik in Dios amo mitztlajyowiltis? ⁴ Tej mach tikneki tigmomakas kuenta nik in Dios mach san niman mitztlajyowiltia nijuak titlajtlakoa porke mitztlasojtla. Yej mitzzikoa ika itlasojtlalis katlej mach keman tlami iwan kineki mitzpalewis para ximoyolkuepa. ⁵ Pero tej, como wel tiyoltlakuawak iwan mach tikneki timoyolkuepas inawak Dios, tej monevian tigmotetemilia ikualanilis in Dios. Yon ikualanilis mopan witz itech nekáj tonale nijuak in Dios kiteitis ikualanilis, iwan kinmixkomakas (kintzonmanas) nochtin in tlakaj ken moneki. ⁶ Ijkuakón Dios kitlaxtlawis kada se tlakatl segün tlan okichij. ⁷ Dios kinmakas yankuik nemilistle katlej mach keman tlamic, akinmej amo mosotlawaskej de kichijtoskej tlan kuale iwan kitemojtoskej kenik welis kajsiskej inmawisotlanex itech ilwikak, iwan noijki kenik welis kipiaskej tetlakitalistle inawak Dios, iwan kenik welis kipiaskej yankuik nemilistle katlej mach keman tlamic. ⁸ Pero Dios kintlajyowiltis ika ikualanilis akinmej moweyinekij iwan mach kichiwaj itlamachtil in Dios katlej melawak, sino yej kichiwaj tlan amo kuale. ⁹ Kipiaskej tlajyowilistle iwan tekokojkayotl nochtin akinmej kichiwaj tlan amo kuale. Achtoj ijkón panoskej in judiojtin iwan noijki ijkón panoskej katlej mach judiojtin. ¹⁰ Pero nochtin akinmej kichiwaj tlan kuale, kipiaskej inmawisotlanex, kipiaskej tetlakitalistle iwan kipiaskej yolosewilistle. Achtoj kipiaskej in judiojtin iwan noijki kipiaskej katlej mach judiojtin.

¹¹ Porke Dios mach kintlasojtla san sekimej iwan oksekimej amo. ¹² Por yonik, nochtin in tlakaj katlej tlajtlakoaj iwan amo kixmatij in tlanawatile de Moisés, in Dios kintlajtlakoltis, maski amo ma kixmatikan yon tlanawatile. Iwan nochtin katlej tlajtlakoaj maski kixmatij in tlanawatile de Moisés, in Dios noijki kinmixkomakas (kintzonmanas) ijkón ken kijta yon tlanawatile. ¹³ Porke Dios mach kinmita in tlakaj nik ya chipawakej de nochti intlajtlakol san kimatij itlanawatil, sino tla melawak kichiwaj nochti tlan kijta itlanawatil. ¹⁴ Pero katlej mach judiojtin katlej mach kipiaj itlanawatil in Moisés, ipan inyolo kimatij tlan kuale iwan tlan amo kuale, kej yeskia

onkaj se tlanawatile ipan inyolo katlej kinnawatia tlanon moneki kichiwaskej. ¹⁵ Por yen tlan kichiwaj, kiteititiaj nik kipiaj yon tlanawatile ipan inyolo katlej kinmilwia tlan kuale iwan tlan amo kuale. Porke itech intlalnamikilis kimatij ni-jkuak kichiwaj itlaj tlan kuale o noso tlan amo kuale. ¹⁶ Ijkón tlapanos itech nekáj tonale nijuak in Dios kijtos akinmej tlajtlakolejkej, porke Yej kuale kimatí tlan kipiaj ipan inyolo de nochtin in tlakaj. In kuale tlajtote katlej temakixtia katlej nej niktematiltia, kijta nik in Dios kitlalis in Jesucristo para ma kinmixkomaka nochtin in tlakaj.

In judiojtin iwan itlanawatil in Moisés

¹⁷ Tla tej tijudío iwan timokitzka itech itlanawatil in Moisés, iwan timoweyineki porke tikija kuale tikaj inawak Dios. ¹⁸ Iwan kuale tikmati tlan Dios kineki xikchiwa, porke timomachtia itlanawatil in Moisés iwan tikmati katlij yen okachi kuale katlej moneki tikchiwas. ¹⁹ Timomachilia nik tiwelis tikinyekanas katlej mach kixmatij Dios katlej nemij kej yeskia mach tlachiaj. Noijki timomachilia nik tiwelis tikintlawilis katlej nemij ijlik tlatleyualotl. ²⁰ Tikyejyekoa nik tiwelis tikinmachtis katlej mach itlaj kimatij, iwan nik welis tikinmachtis noijki katlej katej kej konemej inawak Dios. Tikyejyekoa nik melajka tikmati iwan noijki tikmati tlan melawak porke tikixmati itlanawatil in Moisés. ²¹ Ijkón kiné, tla tej tikinmachtia oksekimej tlanon moneki kichiwaskej tlan kijta itlajtol in Dios, toneses ¿tlanik in tej amo tikchiwa tlan tikinmachtia? Tla tej titetlapowia amo se ma tlachteki, toneses, ¿tlanik in tej titlachteki? ²² Tla tej tikija amo se ma momekati, ¿tlanik in tej timomekatia? Tla tej tikinkokolia in santojtin, ¿tlanik kiné tikalaki tiopan iwan tikintlachtekia? ²³ Tej timoweyineki porke tikixmati itlanawatil in Moisés, pero tikixpanawia in Dios porke mach tikchiwa tlan kijta yon tlanawatile. ²⁴ Por yonik kijta in tiotlajkuilole: “Katlej mach judiojtin tlapoaj biero de Dios por yen namejwan anjudiojtin namotlajtlakol.”

²⁵ Melawak, se tlakatl katlej mosirkunsidaroa iwan kichiwa tlan kijta itlanawatil in Moisés, toneses yon sirkunsisióñ kipalewia. Pero tla amo kichiwa tlan kijta itlanawatil in Moisés, toneses yon kej yeskia mach yeri sirkunsidado. ²⁶ Pero akin amo kajki sirkunsidado iwan kichiwa tlan kijta yon tlanawatile, in toTajtzin Dios kita kej yeskia sirkunsidado. ²⁷ Akin amo kajki sirkunsidado itech itlalnakayo, pero kichiwa tlan kijta yon tlanawatile, kintlajtlakoltis nekatej katlej mach kichiwaj tlan kijta yon tlanawatile maski kimatij iwan maski katej sirkunsidadojtin. ²⁸ Se tlakatl mach melawak judío san por tlakati itech se

familia de judiojtin, iwan mach melawak kajki sirkunsidado san por monakayoteki itech itlalnakayo.²⁹ Katlej melawak judío yen katlej melawak kineki kitlakitas in Dios ika nochí iyolo. Iwan katlej melawak sirkunsisión yen níjkuak in Dios kisirkunsidaroa se tlakatl ipan iyolo, porke ika nochí iyolo pewa kitemoa in Dios iwan mach por yen tlanawatile kitoktia pewa ma kitemo. Toneses, tla se tlakatl ijkón yetos, in Dios kitas nik yolkuale, maski in tlakaj amo ijkón ma kitakan.

3

¹ Toneses, ¿tlanon kipalewia se tlakatl ma yeto judío? ¿O noso tlanon kipalewia tla se judío kajki sirkunsidado? ² Melawak, in judiojtin kinpalewia miek. Achtoj nikneki namechilwis nik in Dios okinmakak in judiojtin itlanawatil para ma kixmatikan iwan ma kichiwakan tlan kijta. ³ Iwan melawak nik sekimej de yejwan mach kichiwaj tlan kijta itlanawatil in Dios. Toneses, ¿kox in Dios ayakmo kichiwas tlan yokijto? ⁴ ¡Pues kichiwas! Porke Dios nochipa kijta tlan melawak, maski nochtin in tlakaj ma yekan tekajkayajkej. Ken kijta in tiotlajkuilole:

Tejwatzin Dios, tikmatij nik melawak nochí tlan tikipta, iwan mach akaj welis kijtos nik mach melawak níjkuak akaj kinekis mitzistlakawis de tlaj.

⁵ Pero tla tejwan níjkuak titlajtlakoaj tiktetitijaq nik in Dios Yej sa tekitl yolchipawak, ¿tlan welis tikijtoskej kiné? ¿Tikijtoskej nik in Dios mach ijki tlan kichiwa porke techtlajyowiltia? (Nitlapoa ken tlapoaj in tlakaj.) ⁶ ¡Pues amo! Porke tla Dios mach ijki tlan kichiwani, toneses, ¿kenik welis kinmixkomakas in tlaltikpaktlakaj?

⁷ Akaj tlakatl welis kiyeyekos ke níjkuak yej tlakajkayawa ika yon kipalewia in Dios para miekej ma kiweyikixtikan, iwan noijki kijtos ke ika itlakajkayawalis kiteititia nik san yen Dios weli kichiwa tlan kijta. Iwan noijki kimolwis, toneses, ¿tlanik in Dios ok kineki kitlajtlakoltis? ⁸ Noijki akaj tlakatl welis kiyeyekos iwan kijtos: “Ma tikchiwakan okachi tlan mach kuale para ma mota nik in Dios Yej sa tekitl kuale”. Miekej techpojpoaj iwan kijtaj nik in tejwan ijkón titlamachtitinemij. Pero Dios kintlajyowiltis ken moneki katlej ijkón kiyeyekoaj.

Tinochtin titlajtlakolejkej

⁹ ¿Tlan welis tikijtoskej kiné? ¿Tejwan katlej tijudiojtin okachi tikualemej ke katlej mach judiojtin? ¡Pues amo! Porke yotamechmatiltijkej nik in judiojtin iwan katlej mach judiojtin, tinochtin tikpijaj tlajtlakole. ¹⁰ In tiotlajkuilole kijta:

Mach onkaj nion se tlakatl katlej amo ma yeto tlajtlakolej,
mach onkaj nion se.

¹¹ Mach onkaj nion se katlej ma kimomaka kuenta tlanon
Dios kineki,

mach onkaj nion se katlej melawak kitemoa Dios.

¹² Nochtin okitzkijkej oksé ojtle mach kuale, iwan nochin tlan
kichiwaj mach itlaj ipatij.

Mach onkaj nion se tlakatl katlej ma kichiwa tlan kuale, mach
onkaj nion se.

¹³ Nijuak kitlapoaj inten, tlapoaj biero ken nijuak kitlapoaj
se mikkakuyoktle.

Ika innenepil tlakajkayajtinemij.

Ika intlajtol tekojkokoaj ken nijuak se koatl tekua iwan
tekokoa.

¹⁴ Itech inten tentokej de tlawikaltlistle iwan yolchichikatla-
jtoaj katlej ika tekojkokoaj.

¹⁵ Sa kinektokej temiktiskej.

¹⁶ San kanik yejwan yawij, tekojkokoaj iwan kikajtewaj ney-
olkokole.

¹⁷ Mach kixmatij in yolosewilistle para yeskej ika kuale.

¹⁸ Nion mach siera kelnamikij kox moneki kiimakasiskej in
toTajzin Dios.

¹⁹ Tikmatij nik nochin yon tlan kijta itlanawatil in Moisés,
kinmilwijtok yejwan katlej kitlaliaj inyolo itech yon
tlanawatile. Mach ok akaj welis kijtos nik mach tlajtlakolej
nijuak in Dios kixkomakas (kitzonmanas), nijuak nochin
in tlaltikpaktlakaj kitemakaskej kuenta inawak Dios. ²⁰ Por
yonik, mach akaj tlakatl welis yetos chipawak de nochin
itlajtlakol san por kichiwas tlan kijta in tlanawatile. Porke
Dios otechmakak yon tlanawatile para ma tikmatikan nik
titlajtlakolejkej.

Nijuak titlanetokaj inawak Dios Yej techchipawa de nochitotlajtlakol

²¹ Pero axan, ma tiktalikan se lado itlanawatil in
Moisés, axan Dios techititia kenik welis tieskej inawak
ya tichipawakej de nochitotlajtlakol, iwan mach por se
kichiwas tlan kijta itlanawatil in Moisés. Iwan yon tiwelij
tikmomakaj kuenta nijuak tikleroaj tlan kijta itlanawatil
in Moisés iwan tlan okikuilojkej in profetajtin. ²² Nijuak
titlanetokaj inawak Jesucristo ikuakón Dios ya techita
tichipawakej de nochitotlajtlakol. Dios ijkón kinmita
nochin akinmej kineltokaj, iwan amo san sekimej iwan
oksekimej amo. ²³ Porke nochin tlakaj otlajtlakojkej
iwan okimopolijkej de yaskej inawak Dios katlej kipia
imawisotlanex. ²⁴ Pero Dios ika iteiknotlamachilis kinmita ya

chipawakej de nochí intlajtlakol nochtin akinmej kineltokaj. Yon se tlatliokolile katlej Dios techmaka, iwan mach moneki itlaj tiktlaxtlawaskej porke in Cristo Jesús Yej yokitlaxtlaj para techmakixtis de totlajtlakol. ²⁵ Dios okichij in Cristo ma kinoki ieso níkuak omikke itech krus para ijkón welis kintlapojpolwis in tlakaj de intlajtlakol níkuak kineltokaskej. Dios okitemakak in Jesucristo ma kimiktikan por tejwan, iwan ijkón Dios techititia nik in Yej nochipa kichiwa tlan kuale. Porke ya wejkawitl itech nekatej tonaltin Yej mach okinchiwilij kuenta intlajtlakol in tlakaj porke sa tekitl okinxikoaya. ²⁶ Iwan axan itech yinmej tonaltin, nojki in Dios techititia nik in Yej kichiwa tlan kuale, porke níkuak titlaneltokaj inawak Jesús, in Yej techita ya tichipawakej de nochí totlajtlakol.

²⁷ Tones, mach akaj welis moweyinekis iwan kijtos yochipawik de nochí itlajtlakol inawak Dios san por kichiwa miek tlamantle kuale para ika momakixtis. Amo, mach ijkón, mach por se kichiwas yon tlamantle. Sino Dios techita tichipawakej de nochí totlajtlakol porke titlaneltokaj inawak Jesucristo. ²⁸ Tíkmomakaj kuenta kiné, nik in Dios techita ya tichipawakej de nochí totlajtlakol níkuak titlaneltokaj inawak Jesucristo, iwan amo por se kichiwas tlan kijta itlanawatil in Moisés.

²⁹ ¿In toTajzin Dios kox san yen judiojtin inDios? ¡Pues amo! Katlej mach judiojtin yejwan nojki no inDios. ³⁰ Porke onkaj san se Dios. Iwan Yej kinmitas kej ya chipawakej de nochí intlajtlakol, nochtin in tlakaj katlej tlaneltokaskej inawak Jesucristo, iwan mach kitas kox judío o noso amo judío, kox sirkunsidado o noso amo sirkunsidado. ³¹ Tones, tla Dios techmakixtia porke titlaneltokaj inawak Jesucristo, ¿kox welis tikijtoskej kiné nik mach ok moneki tiktlakitaskej itlanawatil in Moisés? Amo, mach ijkón. Sino tikteititiaj nik in yon tlanawatile sa tekitl moneki.

4

Dios okitak in Abraham ya chipawak de nochí itlajtlakol por otlaneltokak

¹ ¿Tlan welis tikijtoskej kiné de yen Abraham katlej ya wejkawitl toweyitaj? ¿Tlan okichij para owelik ochipawik de nochí itlajtlakol inawak Dios? ² Tla Dios kitani in Abraham kej chipawak de nochí itlajtlakol san por okichij itlaj tlamantle kuale, tones Abraham kipiani tlan ika moweyinekini, pero amo inawak Dios. ³ Porke in tiotlajkuilole kijta: “Abraham okineltokak tlan Dios okilwij, iwan por yonik in Dios okitak kej se tlakatl chipawak kej yeskia mach keman otlajtlakoj.”

⁴Nikuak se tlakatl tekipanoa, itlaxtlawil katlej kimakaj mach kijtosneki kitliokoliaj, sino kijtosneki yon itlaxtlawil yokimotlanilij. ⁵Pero tla se tlakatl mach kichiwa itlaj tlamantle kuale para welis ika momakixtis, pero kineltoka in toTajtzin Dios katlej kintlapojpolwia in tlajtlakolejkej, toneses in Dios kita kej chipawak de noch i tlajtlakol porke kineltoka. ⁶In rey David noijki okijtoj nik ma paki in tlakatl katlej kineltoka tlan Dios kilwia, porke in Dios kita ya chipawak de noch i tlajtlakol maski amo okichij itlaj tlan kuale. ⁷In David okijtoj:

Ma pakikan in tlakaj katlej Dios kintlapojpolwia de noch i tlajtlakol iwan mach ok kinmita kej yeskia ok tlajtlakolejkej.

⁸ Ma pakikan in tlakaj nikuak in Dios mach ok keman kelnamikis de intlajtlakol.

⁹ ¿Yon pakilstle welis kipiaskej san yen judiojtin katlej katej sirkunsidadojtin? ¡Amo! Yon pakilstle noijki welis kipiaskej katlej mach judiojtin katlej mach katej sirkunsidadojtin. Porke yonamechilwij tlan kijta in tiotlajkuilole: “Abraham okineltokak tlan Dios okilwij, iwan por yonik in Dios okitak kej se tlakatl chipawak kej yeskia mach keman otlajtlakoj.” ¹⁰ ¿Keman ijkón okitak in Dios in Abraham? ¿Nikuak yomosirkunsidaroj o noso ijkua ayamo omosirkunsidaroaya? Amo, Dios ijkón okitak in Abraham nikuak ayamo omosirkunsidaroaya. ¹¹ Iwan satepan Dios okilwij in Abraham ma mosirkunsidaro itech itlakayo para ma mota nik in Dios ya kita kej chipawak de noch i tlajtlakol porke okineltokak nik mochiwas tlan Dios okilwij. Iwan por yonik Abraham omochij kej tetaj de nochtin tlakaj katlej kineltokaj tlan Dios kinmilwia, maski amo ma yekan sirkunsidadojtin, porke Dios ya kinmita yejwan noijki ya chipawakej de noch i tlajtlakol. ¹² Abraham yej noijki kajki kej tetaj de nekatej katlej katej sirkunsidadojtin itech intlakayo. Kijtosneki amo san por katej sirkunsidadojtin itech intlakayo, sino porke noijki kipiaj intlaneltokalis ijkón ken Abraham okipixke nikuak ayamo omosirkunsidaroaya itech itlakayo.

Dios okimakak in Abraham tlan okilwij porke okineltokak

¹³ Dios okilwij in Abraham iwan iwejkaixwiwan nik kinmaxkatis noch i tlaltikpak, pero Dios ijkón okilwij in Abraham amo por okichij tlan kijta itlanawatil in Moisés, sino porke okineltokak tlan Dios okilwij iwan por yonik in Dios okitak kej yochipawik de itlajtlakol. ¹⁴ Pero yejwan mach okimoaxkatijkej in tlaltikpak por okichijkej tlan kijta itlanawatil in Moisés. Porke tla ijkón yeri, toneses san tekitl tikneltokaj tlan Dios kijta, iwan tlan Dios okilwij in Abraham yeskia mach itlaj ipatij. ¹⁵ Porke akinmej kipiaj yon tlanawatile de

Moisés iwan amo kichiwaj tlan kijta, in Dios kintlajyowiltia ika ikualanilis. Pero tla amo onkaj itlaj tlanawatile para se kichiwas, tones mach akaj welis kitlajtlakoltiskej porke mach onkaj itlaj tlanawatile.

¹⁶ Dios otechilwij tlanon tikresibiroskej tla titlaneltokaskej inawak iwan san techtliokolis. Dios okinekia ke nochtin iwejkaixwiwan in Abraham ma kiresibirokan tlan Yej yokinkakitij. Dios amo okinekia ma kiresibirokan san yejwan katlej okichiwayaj in tlanawatile de Moisés. Porke nochtin in tlakaj judiojtin o noso amo judiojtin, nochtin katlej kineltokaj nik melawak tlamochiwas tlan Dios kijta ijkón ken Abraham okineltokak, tones nochtin yonmej katej kej yeskia iwejkaixwiwan Abraham. ¹⁷ Ken kijta in tiotlajkuilole: “Onimitz-talij titetaj de miekej tlaltikpaktlakaj.” Abraham okineltokak tlan Dios okilwij. Iwan inawak Dios, Abraham kajki kej tetaj de nochtin katlej tlaneltokaj ken yej otlaneltokak. Abraham otlaneltokak inawak Dios katlej weli kinyolitia in mikkamej, iwan kichiwa ma yeto tlan ayamo onkaj.

¹⁸ Por yonik, nikuak in Dios okilwij in Abraham: “Sa tekitl miekej tikinpias mowejkaixwiwan”, ijkukón Abraham okineltokak, maski mach ok okichiaya kipiani ikone. Iwan ijkón Abraham omochij kej tetaj de miekej tlaltikpaktlakaj.

¹⁹ Abraham mach okipoloj itlaneltokalis, maski okipiaya kej se siento xiwitl. Yej iwan isiwa Sara okimomakayaj kuenta nik mach ok yenij wejkawitl, iwan yoyekaj sa tekitl ya tetajtzitzintin iwan mach ok okichiayaj kipiaskej inkone, porke in Sara mach semi owelia okipiaya ikone. ²⁰ Abraham mach okimolwij kox melawak o noso amo de tlan Dios okilwij kimakas, sino yej okachi omochikaj itech itlaneltokalis iwan okiweyikixtij in toTajtzin Dios. ²¹ Abraham kuale okimatia nik in Dios kipia poder para welis kichiwas tlan kijta. ²² Por yonik in Dios okitak in Abraham kej yochipawik de itlajtlakol porke okineltokak.

²³ Nikuak in tiotlajkuilole kijta nik in Dios okitak in Abraham kej yochipawik de itlajtlakol por okineltokak, mach tlapoa san de yen Abraham, ²⁴ sino noijki tlapoa de yen tejwan. Porke tejwan noijki in Dios techita kej tichipawakej de totlajtlakol nikuak tikneltokaj tlan techilwia in toTajtzin Dios katlej okiyolitij in toSeñor Jesús nikuak omikke. ²⁵ Dios okitemakak in toSeñor Jesús para ma miki por totlajtlakol. Iwan satepan omoyolkuik, para ijkón Dios ya weli techita kej tichipawakej de totlajtlakol nikuak titlaneltokaj inawak.

5

Tlan pewa tikitaj nikuak Dios techita ya tichipawakej de

totlajtlakol

¹ Toneses ijkón, in toTajtzin Dios ya techita tichipawakej de totlajtlakol porke tikneltokaj tlan Yej techilwia. Axan, mach ok tikatej kej tiikontraswan in Dios, sino in toSeñor Jesucristo Yej okichij ma timotlapojpolwikan iwan Dios. ² Iwan por yen Cristo iwan porke tikneltokaj tlan techilwia, axan tiwelij timikuaniaj inawak Dios ika iteknotlamachilis maski mach totech opowia timikuaniñ inawak, iwan axan ya timoyekketokej itech iteknotlamachilis. Iwan tipakij porke tikchiaj tikpiaskej parte itech imawisotlanex in Dios. ³ Iwan amo san yon, sino noijki tipakij nijuak titlajyowiaj, porke tikmatij nik in tlajyowilistle techpalewia para tikxikoaj nochi tlan tipanoaj. ⁴ Iwan nijuak tikxikoaj in tlajyowilistle, tikitzkaj chikawalistle ipan toyolo. Iwan nijuak yotikitckijkej chikawalistle ipan toyolo, toneses, okachi kuale tkmomakaj kuenta de tlan tikchiaj inawak Dios. ⁵ Iwan kuale tikmatij nik mach techpinatis tlan tikchiaj inawak Dios. Porke Dios yotechtemitij ipan toyolo ika itlasojtlalis iwan okichij ika iEspíritu Santo katlej otechmakak.

⁶ Nijuak tejwan mach otiweliaj otimomakixtiayaj tonewian, oajsik tonale katlej Dios okitlalij iwan Cristo omikiko por tejwan porke otiekaj titlajtlakolejkej. ⁷ Mach akaj welis motekawilis ma kimiktikan ipatka oksé tlakatl katlej kuale. Pero welis akaj tlakatl mixewis mikis ipatka de se katlej sa tekitl kuale tlakatl. ⁸ Pero Dios techtitia nik sa tekitl techtlasojtla, porke Cristo omikke por tejwan maski otiekaj ok titlajtlakolejkej. ⁹ Iwan axan, tla Dios ya techita tichipawakej de totlajtlakol por yen ieso in Cristo katlej okinokij nijuak omikke, toneses, axan okachi kuale tikmatij nik in Cristo techmakixtis de itech ikualanilis in Dios. ¹⁰ Iwan tla ikuak otiekaj tiikontraswan in Dios, iKone omikke por tejwan para okichij ayakmo ma tiekan tiikontraswan, toneses axan okachi welis timomakixtiskej porke axan tikpiaj inemilis in Cristo ipan toyolo, iwan porke mach ok tiikontraswan in Dios. ¹¹ Iwan amo san yon, sino noijki tipakij inawak Dios por tlan okichij in toSeñor Jesucristo por tejwan, iwan por yen toSeñor Jesucristo axan yotimotlapojpolwijkej iwan toTajtzin Dios.

Adán iwan Cristo

¹² Nijuak opéj in tlaltikpak Adán otlajtlakoj iwan ijkón nik opéj in tlajtlakole ixko yin tlaltikpak, iwan por yon tlajtlakole opéj in mikilistle. Iwan por yonik, axan nochtin mikij porke nochtin tlajtlakolchiwaj. ¹³ Nijuak ayamo oyeka itlanawatil in Moisés, oyeka in tlajtlakole ixko yin tlaltikpak, maski in Dios mach okintlajtlakoltij in tlakaj nijuak ayamo oyeka yon

tlanawatile. ¹⁴ Pero, nochtin in tlakaj katlej oyekaj nikuak oyeka in Adán iwan asta ikuak oyeka in Moisés, nochtin omikkej porke nochtin otlajtlakojej, maski mach otlajtlakojej ken otlajtlakoj in Adán. Iwan Adán omotaya ken katlej satepan ovalaj.

¹⁵ Pero itlatliokolil in toTajtzin Dios mach welis moparejaros iwan itlajtlakol in Adán. Porke por itlajtlakol in Adán, axan nochtin mikij. Pero in tlatliokolile katlej Dios techmaka itech Jesucristo por yen weyi iteiknotlamachilis katlej kipia towan, yon okachi techpalewia iwan yon se kuale para miekej tlakaj. ¹⁶ Itlajtlakol in Adán mach welis moparejaros iwan itlatliokolil in Dios katlej techmaka. San por se tlajtlakole, ovalaj in tlajyowilistle de Dios intech in tlakaj. Pero maski in tlaltikpaktlakaj okichijkej miek tlajtlakole, axan inawak Jesucristo in toTajtzin Dios techmaka se tlatliokolile katlej kichiwa ma techita in Dios ya tichipawakej de totlajtlakol. ¹⁷ San por itlajtlakol se tlakatl itoka Adán, okichij nochtin in tlakaj ma mikikan. Pero katlej yokiresibirojkej in weyi iteiknotlamachilis in Dios, axan kipiaskej yankuik nemilistle porke Dios ya kinmita nik ya chipawakej de intlajtlakol, por yen tlan okichij se tlakatl itoka Jesucristo.

¹⁸ Iwan ijkón, san por se tlakatl itoka Adán otlajtlakoj iwan otechwalkuilij tlajyowilistle de Dios, axan noijki san por se tlakatl itoka Jesucristo katlej okichij tlan melajka kuale, axan nochtin in tlakaj welis yeskej chipawakej de intlajtlakol para welis kipiaskej yankuik nemilistle. ¹⁹ Adán mach okichij tlan Dios okilwij iwan por yonik nochtin omokuepkej tlajtlakolejkej. Pero Jesucristo okichij tlan Dios okilwij iwan por yonik miekej tlakaj yeskej chipawakej de intlajtlakol.

²⁰ Dios otechmakak itlanawatil in Moisés para ma tikmatikan nik sa tekitl miek tlajtlakole tikpiaj. Iwan nikuak tikmatij nik miek tlajtlakole tikpiaj, tonses noijki tikmatij nik iteiknotlamachilis in Dios katlej techmaka, yon sa tekitl okachi weyi iwan amo ken totlajtlakol. ²¹ Iwan ijkón ken tlajtlakole okichij ma timikikan, axan noijki iteiknotlamachilis in Dios kichiwa ma tiekan tichipawakej de totlajtlakol iwan ma tikpiakan yankuik nemilistle katlej mach keman tlamis, por yen tlan toSeñor Jesucristo okichij por tejwan.

6

Yotimikkej itech tlajtlakole pero tiyolitokej inawak Cristo

¹ ¿Tlan welis tikitloskej kiné? ¿Kox moneki okachi ma titlajtlakokan para Dios okachi ma kipia weyi iteiknotlamachilis towan? ² ¡Pues amo! In tlajtlakole mach ok weli technawatia porke in tlajtlakole ya techita kej yotimikkej. Iwan tla tejwan

yotimikkej, toneses ¿kenik ok welis titlajtlakojtoskej okachi? ³ ¿Amo ankimatij nik tinochtin katlej timokuateekiaj timochiwaj sa se iwan Cristo Jesús, iwan noijki timochiwaj sa se itech imikilis? ⁴ Nijuak tejwan otimokuateekijkej, yon kej yeskia otimikkej iwan otechtlatkakej iwan Cristo. Iwan ijkón ken Cristo omoyolkuik satepan de omikke ika weyi ipoder in toPapan Dios, tejwan noijki otechyolitij para ma tikpiakan yankuik nemilistle inawak.

⁵ Porke tla tejwan timochiwaj sa se iwan Cristo nijuak omikke, toneses axan tejwan noijki Iwan timochiwaj sa se itech yankuik nemilistle ken Yej kipia porke Yej omoyolkuik. ⁶ Tikmatij nik in tonemilis katlej achtoj otikpiayaj okimajmasoltijkej itech krus iwan Cristo, iwan ijkón totlalnakayo katlej tlajtlakolej opojpoliwik. Para ijkón in tlajtlakole ayakmo ma technawati ma tikchiwakan tlan amo kuale. ⁷ Porke akin yomikke, kijtosneki ayakmo kajki ilpitok itech tlajtlakole. ⁸ Tla tejwan yotimikkej iwan Cristo, noijki tikneltokaj nik tiyolitoskej iwan Yej. ⁹ Porke tikmatij nik in Cristo omoyolkuik satepan de omikke iwan mach ok keman welis mikis porke in mikilistle mach welis itlaj kitoktis. ¹⁰ Cristo omikke para okitlanke in tlajtlakole para iktlanke (ik tlami). Pero satepan Yej omoyolkuik, iwan axan Yej yolitok para kichiwas tlan Dios kineki. ¹¹ Ijkón noijki namejwan, xikmatikan nik in tlajtlakole mach ok welis amechnawatis porke in tlajtlakole amechita kej ya anmikkej. Pero noijki xikmatikan nik namejwan ya ankipiaj nemilistle iwan Cristo Jesús in toSeñor para ankichiwaskej tlan Dios kineki.

¹² Por yonik, amo ximotekawilikan ma amechnawati in tlajtlakole ipan namotlalnakayo katlej mikis. Ayakmo ma amechtokti xikchiwakan tlan amo kuale katlej kineki kichiwas namotlalnakayo. ¹³ Amo xiktemaktikan (xiktemaktikan) namotlalnakayo ipan tlajtlakole para ankichiwaskej tlan amo kuale. Sino ximotemaktikan inawak Dios kej yeskia ya anmikkaj iwan axan ya an moyolkuikej oksemi. Xiktemaktikan namotlalnakayo inawak Dios para welis ankichiwaskej tlan kuale. ¹⁴ In tlajtlakole mach ok welis amechnawatis xikchiwakan tlan amo kuale, porke mach ok technawatia itlanawatil in Moisés, sino axan tejwan ya timokitzkaj itech iteiknotlamachilis in Dios.

Mach ok tikatej kej titlanamaktin para tiktekipanoskej in tlajtlakole

¹⁵ ¿Kenamij kiné? ¿Titlajtlakoskej okachi porke mach ok tikatej itech itlanawatil in Moisés sino ya tikatej itech iteiknotlamachilis in Dios? ¡Pues amo! ¹⁶ Namejwan kuale ankimatij tla anmotemaktiskej (onmotemaktiliskej) kej antlana-

makin inawak se amoteko para ankichiwaskej tlan amechnawatis, toneses namejwan anyeskej kej antlanamaktin de yon amoteko iwan ankichiwaskej noch iwan amechnawatis. Tla namejwan ankichiwaj tlan amechnawatia in tlajtlakole, toneses yen mochiwaj kej amoteko katlej amechwalkulia mikilistle. Pero tla namejwan ankichiwaj tlan Dios amechnawatia, toneses Yej mochiwa kej amoteko para ankichiwaskej tlan kuale.¹⁷ Maski namejwan achtoj anmotemaktijkaj (onmotemaktilijkaj) kej antlanamaktin para ankichiwayaj tlan oamechnawatiaya in tlajtlakole, axan tiktlasojkamachiliaj in toTajtzin Dios porke namejwan ankineltokakej ika noch amoyolo in tiotlamachtile katlej oamechmachtijkej.¹⁸ Dios oamechtotonke de itech tlajtlakole katlej oyeka amoteko, iwan axan namejwan anmochijkej kej antlanamaktin para nochipa welis ankichiwaskej tlan kuale.¹⁹ Namejwan namechtlapowia ijkín, ika yin ejemplo de se tlakatl katlej kajki kej tlanamakte, para okachi kuale xikmomakakan kuenta. Achtoj namejwan anyekaj kej antlanamaktin porke ankitemaktijkej (onkitemaktilijkej) namotlalnakayo para ankichiwayaj miek tlamanle mach kuale iwan biero. Iwan yon oamechtoktiaya okachi xitlajtlakokan, pero axan namejwan xiktemakakan namotlalnakayo para ma kichiwa tlan kuale iwan para xichipawkanemikan inawak Dios.

²⁰ Nikuak amejwan ok oamechnawatiaya in tlajtlakole kej antlanamaktin, namejwan mach anmotekipachaoayaj para ankichiwaskej tlan kuale.²¹ Iwan ¿tlan ankitlankej por ankichiijkej tlan achtoj ankichiwayaj iwan katlej axan ika anpinawaj? Porke noch iwan tlamanle kiwalkui mikilistle.²² Pero axan, mach ok ankatej kej antlanamaktin para ankitekipanoskej in tlajtlakole, sino namejwan axan ankatej kej antlanamaktin para ankitekipanoskej in toTajtzin Dios. Iwan yon kemaj amechpalewis para welis anchipawkanemiskej, iwan satepan ankiplaskej in yankuik nemilistle katlej mach keman tlamic.²³ Porke in tlajtlakole tetlaxtlawia ika mikilistle, pero Dios techmaka se tlatliokolile nikuak tikneltokaj in toSeñor Jesucristo, iwan yon tlatliokolile yen yankuik nemilistle katlej mach keman tlamic.

7

Ejemplo de se katlej tlanamiktile

¹ Nokniwan, namejwan katlej kuale ankixmatij in tlanawatile, kuale ankimatij nik in yon tlanawatile kipia poder itech se tlakatl nikuak ok onkaj.² Ma tiktlalikan se exemplo, se siwatl katlej kipia iokich iwan mientras ok onkaj iokich, in tlanawatile kijta nik kipia de yetos iwan

iokich. Pero tla miki iokich, toneses ya momakixtia de itech yon tlanawatile katlej kijta kipia yetos iwan iokich. ³ Por yonik, tla yon siwatl mosetilis iwan oksé tlakatl iwan ok onkaj iokich, kijtosneki kimomekatia. Pero tla miki iokich, toneses ya momakixtia de itech yon tlanawatile, iwan welis monamiktis iwan oksé tlakatl iwan ijkón mach kijtosneki kimomekatia.

⁴ Ijkón noijki namejwan, nokniwan, xikmomakakan kuenta nik ya anmikkej itech krus iwan Cristo. Axan namejwan ya anmakiskej de itech in tlanawatile katlej achtoj oamechnawatiaya. Iwan ijkón ken nikuak se siwatl miki iokich iwan monamiktia iwan oksé, namejwan axan noijki ya anmosetilijkej iwan oksé tlakatl katlej omoyolkuiq satepan de omikke. Para ijkón se welis kichiwas tlan kuale ken Dios kineki. ⁵ Achtoj in tlajtlakole otechnawatiaya iwan nikuak otikmatkej tlan kijta in tlanawatile, in totlalnakayo okachi okinekia ma titlajtlakokan iwan yon tlajtlakole san otechwalkuilij mikilistle. ⁶ Pero axan yotimakiskej de imak yon tlanawatile porke ya tikatej kej yeskia yotimikkej, iwan ayakmo technawatijtok. Iwan axan ya tiwelij tiktekipanoaj in toTajtzin Dios ika se yankuik nemilistle katlej techmaka in Espíritu Santo, iwan mach ok moneki tiktekipanoskej in toTajtzin Dios ken achtoj nikuak otikchiwayaj miek tlamantle katlej otechnawatiaya in tlanawatile ma tikchiwakan.

Tlajtlakole katlej kajki ipan toyolo

⁷ ¿Tlanon welis tikijtoskej kiné? ¿Tikijtoskej nik in tlanawatile de Moisés mach kuale? ¡Amo, mach ijkón ma tikyejyekokan! Tla amo por yen tlanawatile, nej mach nikmatini tlanon tlajtlakole. Nej mach nikmatini kox tlajtlakole tla nikix-elewis itlaj tlamantle, tla yon tlanawatile amo kijtoani: “Amo xikixelevi tlan iaxka oksé tlakatl.” ⁸ In tlanawatile onechmatiltij nik onikchijtoka miek tlajtlakole, porke onikix-elewaiya miek tlamantle. Porke tla amo yeni in yon tlanawatile, mach nikmatini kox nitlajtlakojtok. ⁹ Achtoj nikuak ayamo onikmatia tlanon kijta in tlanawatile, nej onikyejyekoaya kuale nikaj, pero nikuak onikmatke tlan kijta in tlanawatile, ikuakón onikmomakak kuenta nik nitlajtlakolej iwan nik nimikini iktlanke (ik tlami). ¹⁰ Iwan onikmatke nik in yon tlanawatile katlej omonekia nech-makani nemilistle, yej onechtajtlakoltij para ma nimiki. ¹¹ In tlajtlakole katlej notech oyeka okitekipanoltij in tlanawatile iwan ika onechkajkayaj iwan ika onechtajtlakoltij para ma nimiki.

¹² Tikitaj kiné, nik in yon tlanawatile chipawak, melawak, iwan kuale. ¹³ Toneses, ¿kox kijtosneki in yon tlanawatile katlej

kuale onechtoktij ma nimiki? ¡Pues amo! Sino itech yon tlanawatile katlej kuale, in tlajtlakole onechtoktij ma nimiki, iwan ijkón in tlajtlakole omoteititij nik ya nele tlajtlakole. Iwan ijkón noijki in tlanawatile okiteititij nik in tlajtlakole sa tekitl mach kuale.

¹⁴Tikmatij nik in tlanawatile melajka kuale porke walajtok de Espíritu Santo. Pero nej como ntlaltikpaktlakatl nikchiwa tlan amo kuale iwan nikaj ya momati (kej yeskia) onimona-makak para nikchiwas tlajtlakole. ¹⁵Mach nikmomaka kuenta tlan nikchiwa, porke mach nikchiwa tlan nikneki, sino nikchiwa tlan nej nikkokolia. ¹⁶Iwan tla nikchiwa tlan amo kuale tlan amo nikneki nikchiwas, toneses nikmomaka kuenta nik in tlanawatile sa tekitl kuale. ¹⁷Toneses, mach ok yen nej nikchiwa tlan amo kuale, sino yen tlajtlakole katlej kajki notech. ¹⁸Nikmati nik itech notlalnakayo mach onkaj itlaj kuale, porke maski sa tekitl nikneki nikchiwas tlan kuale, mach niweli nikchiwa. ¹⁹Mach nikchiwa tlan kuale tlan nikneki, sino ok nikchiwa tlan amo kuale katlej mach nikneki. ²⁰Iwan tla nikchiwa tlan nej amo nikneki nikchiwas, toneses mach ok nej nikchiwa, sino yen tlajtlakole katlej kajki notech.

²¹Nikmomaka kuenta kiné, maski nej nikneki nikchiwas tlan kuale, mach niweli por yen tlajtlakole katlej kajki notech.

²²Ipan noyolo nikwelita nikchiwas tlan kijta itlanawatil in Dios. ²³Iwan maski notlalnamikilis kineki kichiwas tlan kijta itlanawatil in Dios, itech notlalnakayo onkaj oksé tlanawatile

katlej noijki kineki nechnawatis. Kijtosneki in tlanawatile de yen tlajtlakole katlej kikokolia itlanawatil in Dios. Yen yon itlanawatil in tlajtlakole katlej kajki notech iwan nechpixtok kej yeskia niilpitok.

²⁴¡Nilástima! ¿Akin welis nechmakixtis de itech yin notlalnakayo katlej nechwika ijtk mikilistle? ²⁵Nikmati nik yen Jesucristo nechmakixtis. Por yonik niktlasojkamachilia in toTajtzin Dios.

Toneses, ika notlalnamikilis nikchiwa tlan kijta itlanawatil in toTajtzin Dios, pero notlalnakayo kineki kichiwas tlan kijta itlanawatil in tlajtlakole.

8

Nemilstle katlej techmaka in Espíritu Santo

¹Axan kiné, in toTajtzin Dios mach ok kintlajyowiltis katlej setitokej san se iwan Cristo Jesús, katlej kichiwaj ken kineki in Espíritu Santo iwan amo ken kineki intlalnakayo. ²Porke ipoder in Espíritu Santo katlej kitemaka yankuik nemilstle oamechmakixtij de itech ipoder in tlajtlakole iwan de itech ipoder in mikilistle. Iwan tejwan tikpiaj ipoder in Espíritu

Santo porke tisetitokej san se iwan Cristo Jesús.³ Itlanawatil in Moisés okipoloj ichikawalis porke totlalnakayo mach owelik okichij tlan kijta. Por yonik tlan amo owelik okichij in tlanawatile de Moisés, in Dios Yej owelik okichij, nikuak okualtitlanke iKone katlej omochij tlakatl iwan okipixke itlalnakayo noiiki ken tejwan totlalnakayo katlej ika titlajtlakoaj. Dios okitemakak iKone kej se tlamanale para ijkón ma kitlaxtlawa totlajtlakol ika itlalnakayo, iwan ijkón noiiki okipojpolilij ipoder in tlajtlakole.⁴ Dios ijkón okichij para tejwan ma tiwelikan ma tikchiwakan tlan kijta itlanawatil. Porke axan mach ok tikchiwaj ken kineki in totlalnakayo, sino tikchiwaj ken kineki in Espíritu Santo.

⁵ Katlej kichijinemij tlan kineki intlalnakayo, san yen yon kiyejyekojtokej kichiwaskej. Pero katlej kichiwaj tlan kineki in Espíritu Santo, tones yen yon kiyejyekoaj kichiwaskej.⁶ Akin kitemoa kichiwas tlan kineki itlalnakayo, moixpolos. Pero akin kitemoa kichiwas tlan kineki in Espíritu Santo, kipias nemistle iwan yolosewilistle.⁷ Porke akinmej kitemoaj kichiwaskej tlan kineki intlalnakayo, mokuepaj ikontraswan Dios. Mach kinekij kichiwaskej tlan kijta itlanawatil in Dios iwan nion mach welij kichiwaj tlan kijta.⁸ Iwan akinmej kitemoaj kichiwaskej tlan kineki intlalnakayo, mach welis kipaktiskej in Dios.

⁹ Pero namejwan mach ok amechyekana namotlalnakayo, sino namejwan ya amechyekana in Espíritu Santo, porke iEspíritu in toTajzin Dios ya kajki ipan namoyolo. Akin amo kipia iEspíritu in Cristo, kijtosneki mach iaxka in Cristo.¹⁰ Tla Cristo kajki ipan namoyolo, tones namoanima kipia nemistle porke Dios amechita ya anchipawakej de amotlajtlakol, maski mikis namotlalnakayo por yen tlajtlakole.¹¹ Iwan tla iEspíritu in toTajzin Dios katlej okiyolitij in Jesús nikuak omikke, kajki ipan namoyolo, tones in Espíritu katlej okiyolitij in Cristo nikuak omikke, noiiki kiyolitis namotlalnakayo katlej miki, ika yen Espíritu katlej kajki ipan namoyolo.

¹² Por yonik nokniwan, moneki tikchiwaskej ken kineki in Espíritu Santo, iwan amo ken kineki in totlalnakayo.¹³ Porke tla namejwan ankichiwaskej tlan kineki namotlalnakayo, anmoixpoloskej. Pero tla ika ipoder in Espíritu Santo ankipojpoloaj in tlajtlakole katlej ankichiwaj ika namotlalnakayo, tones ankipiaskej nemistle.

¹⁴ Nochtin katlej kimokawiliaj ma kinyekana iEspíritu in toTajzin Dios, yonmej teknewan de Dios.¹⁵ In Espíritu Santo katlej Dios oamechmakak mach amechtuktia xiekan kej antlanamaktin para oksemi sa ximomawtijtokan ken

níkuak anyekaj inawak se amoteko. Sino Dios oamech-makak in Espíritu Santo katlej kichiwa namejwan xiekan ya antekonewan de Dios. Iwan ika Espíritu Santo tejwan ya tiwelij tikilwiaj in toTajtzin Dios: “¡Abba!”, kijtosneki “¡Papan!”¹⁶ In Espíritu Santo techilwia ipan toyolo nik tejwan ya tiikonewan Dios.¹⁷ Iwan tla tejwan tiikonewan Dios, tonses Dios techaxkatis tlan yokijtoj techmakas. Dios techmakas san sekan iwan Cristo tlan Yej yokijtoj. Tla titlajyowiskej iwan Cristo, tonses satepan noijsi Iwan tieskej itech imaw-isotlanex.

¹⁸ Kuale nikmati nik in tlajyowilistle katlej axan tipanoaj, yon mach itlaj, tla tikparejaroskej iwan tomawisotlanex kuakualtzin katlej tikpiaskej satepan.¹⁹ Porke nochitlan Dios okichij itech ilwikak iwan ixko yin tlaltikpak, sa kichixtokej iwan kinekiskiaj ma ajsitiwetzi in tonale níkuak in Dios kinnextis ikonewan.²⁰ Nochitlan Dios okichij oijtlakawik, pero mach por yej inewian okinekke oijtlakawik, sino porke Dios ijkón okimonekiltij. Pero maski oijtlakawik, ok kichia²¹ momakixtis se tonale níkuak nochitlan onkaj ixko yin tlaltikpak mach ok keman ijtakawis. Iwan ijkukán momakixtis ijkón ken momakixtiskej ikonewan Dios katlej kipiaskej inmawisotlanex kuakualtzin.²² Tikmatij nik asta axan nochitlan Dios okichij tena iwan tlajyowia ken níkuak se siwatl kitlakatilia ikone.²³ Iwan mach tlajyowia san yen tlan Dios okichij, sino noijsi tejwan titlajyowiaj katlej ya tikpiaj in Espíritu Santo katlej Dios yotechmakak achi de tlan satepan techmakas. Tejwan noijsi sa tekitl titlajyowiaj, iwan tikchiaj ma ajsitiwetzi in tonale níkuak in Dios techresibiros kej tiikonewan. Kijtosneki níkuak Dios techmakas oksé totlankayo yankuik, katlej mach ok keman mokokos iwan nion mach ok keman mikis.²⁴ Dios otechmakixtij níkuak otit-laneltokakej inawak Cristo porke tikchiaj mochiwas tlan Dios okijtoj. Pero tla ya tikpianij nochitlan yotechkakitij, tonses mach ok monekiskia tikchianij okachi.²⁵ Pero tejwan tikchix-tokej tlan ayamo tikitaj, iwan por yonik moneki tikxikoskej nochitlan tipanoaj, iwan ma tikchiakan ika pakilistle tlan satepan tikpiaskej.

²⁶ Noijsi in Espíritu Santo techpalewia ika tlan tejwan mach tiwelij, porke tejwan mach tiwelij timotiotzajtziliaj ken moneki. Pero inewian in Espíritu Santo kitlatlawtia in toTajtzin Dios por tejwan, kej yeskia tena nik kitlatlawtia tlan tejwan mach tiwelij tiktenkixtiaj ika totlajtol.²⁷ Iwan Dios, katlej kixmati toyolo, kimati tlan kineki kijtos in Espíritu Santo, porke in Espíritu Santo kitlatlawtia por yen ikonewan Dios ijkón ken Dios kineki.

Tejwan titlatlanij por yen Cristo

²⁸ Iwan tejwan katlej tiktlaosjtaj in Dios tikmatij nik nochi tlan welis tipanoskej, kox kuale o noso amo kuale, nochi yon tlamatle yetos se kuale para tejwan. Tejwan katlej Dios otechnotzke para totech ma mochiwa tlan Yej yokiyejyekoj kichiwas desde achtoj. ²⁹ Dios yokimatis akinmej kinel-tokaskej in Cristo desde ikuak ayamo oyeka in tlaltikpak. Iwan Dios okimonekiltij ma tiekan ken iKone, iwan iKone ma yelo yen tetiachka iwan tejwan ma tiekan tiikniwan katlej satepan tewaj. ³⁰ Dios okimonekiltij ma tiekan ken iKone, iwan por yonik otechnotzke. Iwan tejwan katlej Dios otechnnotzke, in Dios ya techita tichipawakej de totlajtlakol. Iwan tejwan katlej Dios ya techita tichipawakej de totlajtlakol, noijki otechmakak tomawisotlanex kuakualtzin ken Yej kipia.

³¹ ¿Tlanon welis tikijtoskej kiné de nochi yin tlamatle? Tla Dios towan kajki, ¿akin welis itlaj techtoltis? ³² Dios mach oyáj tzotzokatl nikuak okitemakak iKone por tejwan, sino okitemakak ma miki por tinochtin tejwan. Tones, ¿tlanik amo ma techmaka san sekán iwan iKone nochi in tlamatle tlan techilwia? ³³ ¿Akin welis techistlakawis tejwan katlej Dios yotechpejpenke? Mach akaj, porke Dios Yej techita ya tichipawakej de totlajtlakol. ³⁴ ¿Akin welis techtlajtlakoltis? Mach akaj, porke Cristo Yej omikke por tejwan iwan omoy-olkuik oksemi, iwan noijki kajki ik iyekma in toTajtzin Dios kan motlatlawtijtok por tejwan. ³⁵ Tones, ¿akin welis techxelos de itech itlasojoatlalis in Cristo? Mach akaj. Nion tlajyowilistle, nion tekokojkayotl, nion nikuak techtlatlalochtiaj, nion apostle, nion nikuak amo tikpiaj totzotzol, nion nikuak se kaj itenko mikilistle, o noso nikuak kinekij techmiktiskej. ³⁶ Ken kijta in tiotlajkuilole:

Por yen tejwatzin, in tlakaj nochipa kinekij techmiktiskej.

Techitaj kej tiichkamej iwan kinekij techmiktiskej.

³⁷ Pero itech nochi in yin tlamatle, Cristo techmaka chikawalistle para ma titlatlanikan itech nochi tlan tipanoaj porke Yej techtlasojtla. ³⁸ Por yonik, kuale nikmati nik mach onkaj nion itlaj tlan welis techxelos de itech itlasojoatlalis in Dios. Nion mikilistle, nion nemilistle, nion angelestin, nion ejekamej mach kualtin katlej kipiaj tekiwajkayotl, nion ejekamej katlej kipiaj poder, nion tlan axan onkaj iwan nion tlan satepan yetos, ³⁹ nion tlan onkaj ajkopan iwan nion tlan onkaj tlatlampa, nion itlaj oksé tlamatle katlej Dios okichij. Mach itlaj welis techxelos de itech itlasojoatlalis in Dios porke tisetitokej san se iwan Cristo Jesús katlej toSeñor.

Dios okinpejpenke in judiojtin

¹ Melawak tlan nikijta porke nitlaneltoka inawak Cristo. Mach nitlakajkayawa. In Espíritu Santo nechmatiltia ipan notlalnamikilis nik melawak tlan nikijta. ² Sa tekitl ni-moyolkokoa iwan mach keman tlami noneyolkokol. ³ Iwan asta nej nonewian niknekiskia ma nimoxelo de inawak Cristo maski amo ma nimomakixti, tla ijkón weliskia nikinpalewiani ma momakixtikan nokniwan judiojtin, katlej san se estle tikpiaj. ⁴ In judiojtin yejwan tepilwan de yen ya wejkawitl toweyitaj Israel, iwan Dios okinresibiroj in judiojtin kej ikonewan. Dios oyeka inwan ika imawisotlanex, iwan okichij se akuerdo inwan. Noijki okinmakak in tlanawatile de Moisés, iwan okinmilwij kenik moneki kiweyikixtiskej, iwan noijki okinmilwij tlanon kinmakas satepan. ⁵ Yonmej judiojtin walajtokej nelwatl de yen ya wejkawitl toweyitajwan. Cristo noijki walajtok nelwatl de itech yonmej toweyitajwan nijuak ovalaj otlakatiko ixko yin tlaltikpak. Iwan Cristo yen Dios katlej tlanawatia itech nochitlamantle, iwan katlej moneki ma tikweyikixtikan nochipa. Ijkón ma yeto.

⁶ Pero amo kijtosneki ke mach omochij tlan Dios okijtoj, porke mach nochtin katlej walajtokej nelwatl de Israel melawak tekonewan de Dios. ⁷ Iwan noijki mach nochtin katlej walajtokej nelwatl de Abraham melawak tekonewan de Abraham. Porke Dios ijkín okilwij in Abraham: “San yen ipilwan in mokone Isaac, yejwan yeskej mowejkaixwiwan.” ⁸ Kijtosneki, mach nochtin katlej iwejkaixwiwan in Abraham melawak tekonewan de Dios, sino san yejwan katlej tlakatij ijkón ken Dios okilwij in Abraham. ⁹ Porke Dios ijkín okilwij in Abraham: “Nian se xiwitl, niwitz, iwan Sara kitlakatilis se ikone.”

¹⁰ Iwan amo san yen yon. Noijki in Rebeca katlej okinpixke omen ikonewan san se intaj okipixkej, yen ya wejkawitl toweyitaj Isaac. ¹¹ Antes de tlakatinij in yonmej omen ikonewan koatzitzintin, iwan nijuak ayamo okichiwayaj tlan kuale o noso tlan amo kuale, ikuakón Dios okipejpenke se de yejwan para kichiwas tlan Yej yokiyejyekoj desde ya wejkawitl. Tikmomakaj kuenta kiné nik yen Dios kimati akin kipejpenas, iwan akin kipejpena, kipejpena amo por okichij itlaj tlamantle kuale, sino porke Yej kipejpena san akin Yej kineki. ¹² Dios okilwij in Rebeca: “Katlej tetiachka kitekipanos in xokoyotl.” ¹³ In tiotlajkuilole noijki kijta: “Oniktlasojtlak in Jacob, pero mach oniktlasojtlak in Esaú.”

¹⁴ Toneses, ¿tlanon tikijtoskej? ¿Kox welis tikijtoskej nik in Dios mach ijni tlan kichiwa? Amo, mach ijkón ma tijkijyekokan. ¹⁵ Porke Dios okilwij in Moisés: “Niktlasojtlas akin Nej niknekis niktlasojtlas, iwan nikiknomatis akin Nej niknekis nikiknomatis.” ¹⁶ Toneses, mach por se kinekis o noso por se mochijchikawas para Dios ma kiknomati. Sino yen Dios kigmati akin kineki kiknomatis. ¹⁷ Itech in tiotlajkuilole ijkuitlakolitok kan Dios okilwij in Faraón in rey de Egipto: “Onimitztlalij xieto tirey para motech nikteititis nopoher, iwan para ma kimatikan itech nochi in tlaltikpak akin Nej.” ¹⁸ Toneses, Dios kitlasojtlas akin Yej kineki kitlasojtlas, iwan noijki kiyoltlakuawa akin Yej kineki kiyoltlakuawas.

¹⁹ Pero welis akaj tlakatl ijkín nechilwis: “Tla ijkón, toneses, ¿tlanik in Dios ok kintlajtlakoltia in tlakaj por tlan kichiwaj? Porke mach akaj welis kitzakuilis tlan Dios kineki kichiwas.” ²⁰ Yon tlakatl nej nikneki ijkín niknankilis: ¿Akin tej para xikixnamiki in Dios? ¿Kox welis in xoktzin kilwis in tlakatl katlej okichij: “¿tlanik ijkín nik otinechchij?” ²¹ Porke in xoktzinchij yej kichiwa tlan yej kineki kichiwas ika tlale (barro). Yej welis kichiwas ika tlale se xoktzin kuakualtzin iwan noijki welis kichiwas se xoktzin mach kuakualtzin.

²² ToTajtzin Dios noijki kichiwa ken Yej kineki, ijkón ken xoktzinchij noijki kichiwa ken yej kineki. Porke Yej okinekia kinmititis ikualanilis iwan ipoder, iwan por yonik in Yej sa tekitl kinxikojtok in tlakaj katlej mach kualtin katlej intech powi para kintlajyowiltis. ²³ Ijkón okichij para kiteititis nik sa tekitl kipia miek tlamantle kuale para kinmakas nochtin katlej Yej yotechpejpenke ika iteiknotlamachilis. Iwan desde ikuak ayamo oyeka in tlaltikpak, in Dios yotechyektlalij para ma tikpiakan nemilistle katlej mach keman tlamis itech imawisotlanex. ²⁴ Dios mach otechnotzke san yen tejwan katlej tijudiojtin para ma tiekan iaxkawan, sino noijki okinnotzke katlej mach judiojtin. ²⁵ Ijkón ken kijta itlajkuilol in profeta Oseas, kan kijta:

Katlej amo oyekaj nokonewan, nikinnotzas nokonewan.

Katlej amo onikintlasojtlaya, axan nikintlasojtlas.

²⁶ Iwan kan achtoj onikinmilwij: “Namejwan mach an-nokonewan”,
axan ompa kinmilwiskej tekonewan de Dios katlej melawak yolitok.

²⁷ Isaías noijki okijtoj de yen judiojtin: “Maski katlej walajtokej nelwatl de Israel sa tekitl miekej ken xale katlej onkaj itempan atl, san sekimej de yejwan momakixtiskej. ²⁸ Porke in toSeñor kichiwas ixko yin tlaltikpak san totokatijkak tlan kijta itech itlajtol.” ²⁹ Ijkón ken ya wejkawitl okijtoj in Isaías:

Tla in toSeñor katlej kinyekana in soldadojtin de ilwikak amo techinkawiliani sekimej de towejkaixwiwan, yetoskia yotechixpoloj ijkón ken okinmixpoloj in tlakaj de weyikan de Sodoma iwan de Gomorra.

In judiojtin mach kineltokaj in kuale tlajtole katlej temakix-tia

³⁰ ¿Tlan kijtosneki kiné nochí yin tlamantle? Kijtosneki ke katlej mach judiojtin katlej mach okitemoayaj kenik yeskej chipawakej de intlajtlakol, yejwan ochipawikej de intlajtlakol porke okineltokakej itlajtol in Dios. ³¹ Pero in judiojtin, katlej okinekiaj yeskej chipawakej de intlajtlakol iwan okichiwayaj tlan kijta itlanawatil in Moisés, mach owelikej omochipajkej de intlajtlakol. ³² ¿Tlanik mach owelikej? Yejwan mach owelikej porke mach okitlalijkej intlaneltokalis itech itlajtol in Cristo para ijkón Dios welini kinmitani ya chipawakej de intlajtlakol. Sino yejwan okinekiaj yeskej chipawakej de intlajtlakol san por okichiwayaj itlaj tlamantle kuale. Por yonik in yejwan motepotlamijkej ika se tetl katlej okachi weyikistok (weyititok), yon tetl yen Cristo. ³³ Ken kijta in tiotlajkuilole:

Xikitakan, Nej niktlalia itech weyikan de Sión se tlakatl kej se tetl katlej ika motepotlamiskej, se tetl katlej kintoktis ma wetzikan.

Iwan akin tlaneltokas inawak yon tetl mach semi mopinatis.

10

¹ Nokniwan, ika nochí noyolo niklatlawtia in toTajzin Dios ma kinmakixti in judiojtin. ² Nej nikmati nik in yejwan sa tekitl kitemoaj in Dios, pero mach ijkón ken Dios kineki ma kitemokan para kuale ma kixmatikan. ³ Porke in judiojtin mach kimomakaj kuenta kenik in Dios weli techita tichipawakej de totlajtlakol. Sino yejwan inselti kinekij mochipawaskej de intlajtlakol, iwan amo ken Dios kineki. Mach kinekij kineltokaskej tlan Dios yokijtoj de kenik kipia de yetos para welis techitas tichipawakej de totlajtlakol. ⁴ Porke itech Cristo omochiwako nochí tlan kijta itlanawatil in Moisés. Iwan ijkón nochtin akinmej tlaneltokaj inawak Cristo, in Dios kinmita ya chipawakej de intlajtlakol.

⁵ Moisés ya wejkawitl okijkuijloj kenik in Dios welis kinmitas in tlakaj ya chipawakej de intlajtlakol tla se kichiwas tlan kijta itlanawatil in Moisés. Ijkín kijta: “Akin kichiwas nochí tlan kijta itlanawatil in Moisés, kipias nemilistle katlej mach keman tlamis.” ⁶ Pero Dios techita ya tichipawakej de totlajtlakol porke titlaneltokaj inawak Cristo, porke in tiotlajkuilole ijkín kijta: “Amo xikmolwi ipan moyolo, ¿kenik

welis nitlejkos ilwikak?" Yon kijtosneki kineki kiwaltemowis in Cristo ixko yin tlaltikpak para ma kipalewi. ⁷ Nion amo xikmolwi: "¿Kenik welis nitemos itlampa tlale kan katej in mikkamej?" Yon kijtosneki kineki kikixtit in Cristo kan katej in mikkamej para ma moyolkui iwan ma kipalewi. ⁸ In tiotlajkuilole noiiki kijta: "Itlajtol in Dios kajki serka de tej, ijkón ken tikpia serka moten iwan moyolo." Yen yin kuale tlajtote katlej temakixtia katlej tejwan tiktematiltiaj iwan katlej moneki kineltokaskej. ⁹ Iwan tla ika moten tikijta nik in Jesús yen moSeñor, iwan ipan moyolo tikneltoka nik in Dios okiyolitij satepan de omikke, in Dios mitzmakixtis. ¹⁰ Porke nikuak se tlakatl tlaneltoka ika noch iyolo, tonses in Dios kita ya chipawak de itlajtlakol. Iwan tla ika iten kitematiltia nik tlaneltoka inawak Cristo, in Dios kimakixtis.

¹¹ In tiotlajkuilole kijta: "Nochtin akinmej tlaneltokaskej inawak Cristo mach keman mopinatiskej." ¹² In tiotlajkuilole kijta "nochtin", kijtosneki san akin, porke in Dios mach techita kox tijudiojtin o noso amo tijudiojtin. Porke tinochtin tikpiaj san se toSeñor. Iwan Yej kipia miek tlamantle kuale para ika kinpalewis nochtin akinmej kitlajtlaniliskej ma kinpalewi. ¹³ Porke in tiotlajkuilole kijta: "Nochtin akinmej kitlajtlaniliskej in toSeñor ma kintlapojpolwi, in toSeñor kintlapojpolwis iwan kinmakixtis." ¹⁴ Pero, ¿kenik kitlajtlaniliskej in Señor ma kintlapojpolwi tla ayamo kineltokaj? ¿Iwan kenik kineltokaskej tla amo keman kikakij de Yej? ¿Iwan kenik kikakiskej tla amakaj kintlapowia de Yej? ¹⁵ ¿Iwan kenik tetlapowiskej de Yej tla amakaj kintitlani ma tetlapowikan? Ken kijta in tiotlajkuilole: "Sa tekitl kuakualtzin nikuak ejkoj in tlakaj katlej kitematiltiaj in kuale tlajtote katlej temakixtia, de kenik welis tieskej kuale iwan Dios."

¹⁶ Pero mach nochtin kineltokaj katlej kikakij in kuale tlajtote katlej temakixtia. Ken kijta in Isaías: "Señor, ¿akin yokineltokak in tlamachtile katlej tiktematiltiaj?" ¹⁷ Por yonik, para se tlakatl tlaneltokas moneki kikakis itlajtol in Dios. Iwan welis kikakis itlajtol in Dios tla kitlapowiskej de itlajtol in Cristo.

¹⁸ Pero axan nej nitlajtlani: ¿Kox amo keman okikakej in judiojtin in kuale tlajtote katlej temakixtia? ¡Kenik amo ma kikakikan! Yejwan yokikakej. In tiotlajkuilole kijta:

Intlajtol yomokakke itech noch i in tlaltikpak.

In kuale tlajtote katlej temakixtia yokitematiltijkej ik nian nepa asta kan ontlantok in tlaltikpak.

¹⁹ Noijki nitlajtlani: ¿Amo okimomakakej kuenta in judiojtin nik in Dios kinkawani se lado tla amo kineltokanij in Cristo?

Melawak, in judiojtin yejwan okimomakakej kuenta. Por yonik in Moisés ya wejkawitl okijtoj:

Nikchiwas ma moxikokan in tlakaj de nopueblo por tlan nikchiwas inwan tlakaj katlej mach de nopueblo katlej mach onechixmatiaj.

Iwan katlej axan mach kimatiј akin Nej, satepan kimatiskej iwan por yonik in judiojtin kualaniskej.

²⁰ Satepan, Isaías okijtoj ika ixchikawalistle:

Katlej achtoj mach onechtemoayaj, axan yonechajsikej.

Iwan katlej mach otlajtlaniaj por Nej, axan yonikinmonextilij.

²¹ Iwan Isaías noijki okijtoj de yen judiojtin: “Nochipa nikinnotok in judiojtin katlej mach tetlakitakej iwan mach kimatiј tlakakij.”

11

Omokajkej sa kanaj keskimej judiojtin katlej tlaneltokaj inawak Dios

¹ Axan nej nitlajtlani: ¿Kox in Dios yokinkaj in judiojtin katlej kej ikonewan? ¡Pues amo! Porke nej noijki njudío. Niwalajtok nelwatl de yen ya wejkawitl toweyitaj Abraham iwan noijki niwalajtok de familia de Benjamín katlej oyáj iwejkaixwi in Abraham. ² Dios mach kinkawa in judiojtin katlej okinpejpenke desde ya wejkawitl nikuak ayamo oyeka in tlaltikpak. ¿Amo ankimatiј tlan kijta in tiotlajkuilole de yen Elías, nikuak omotiotzajtzilij iwan okinmistlakawij in judiojtin? Okijtoj: ³ “Señor, yokinmiktijkej motekipanojkwana katilej profetajtin, iwan yokinxitinijkej moartalwan. Sa yen nej onimokaj, iwan noijki kinekij nechmiktiskej.” ⁴ Pero Dios okinankilij: “Nikinpira ok chikome mil tlakaj katlej mach keman motlankuaketzaj inawak in dios Baal.” ⁵ Noijki ijkón axan. Katej kanaj keskimej judiojtin katlej kineltokaj in Dios itlajtol, katlej Dios yokinpejpenke ma yekan iaxkawan porke kipia sa tekitl weyi iteiknotlamachilis por yejwan. ⁶ Iwan tla Dios okinpejpenke sekimej judiojtin porke kipia weyi iteiknotlamachilis por yejwan, tonses kijtosneki mach okinpejpenke porke okichijkej itlaj kuale. Tla Dios kinpejpenani porke okichijkej itlaj kuale, tonses iteiknotlamachilis in Dios mach yeskia teiknotlamachistle sino yeskia kej se tlaxtlawile.

⁷ Ijkón kiné, in judiojtin mach okajsikej kenik yeskej chipawakej de intlajtlakol maski okitemoayaj sa tekitl. Pero katlej Dios okinpejpenke yejwan kemaj okajsikej kenik yeskej chipawakej de intlajtlakol. Pero oksekimej judiojtin oyoltlakuawakej. ⁸ Ijkón ken kijta in tiotlajkuilole: “Dios okintlalnamikilispoloj. Okintzakuilij inmixtololo para amo

ma tlachiakan, iwan okintzakuilij innakas para amo ma tlakakikan, iwan asta axan ijkón nik katej.” ⁹ In David noijki kijta:

Ma mopolokan ika inmilwitlakual iwan ma kintokti ma kiye-jyekokan nik katej kuale inawak Dios.

Ma mopolokan, iwan Dios ma kintlajyowilti.

¹⁰ Ma ixkokoxkatikan (ixpachitikan) iwan mach ok ma tlachiakan, iwan nochipa ma panotokan tlajyowilstle.

Kenik in Dios kinmakixtia katlej mach judiojtin

¹¹ Axan nej nitlajtlani: ¿In judiojtin owetzkej para ma mopolokan iktlanke (ik tlami)? ¡Amo! Sino in judiojtin como amo okitlakitakej in Dios, axan katlej amo judiojtin welij momakixtiaj. Para ijkón in judiojtin ma moxikokan iwan ma kinekikan ma momakixtikan ken katlej mach judiojtin. ¹² Tones, in judiojtin como amo okitlakitakej in Dios, axan nochtin in tlaltikpaktlakaj welis kipiaskej tlatiochiwalistle katlej Dios kitemaka. Tlan yejwan okimopolilijkej, tones katlej mach judiojtin yejwan okimokawijkej. Iwan tikmomakaj kuenta, nik yetos sa tekitl weyi tlatiochiwalistle para nochtin tlaltikpaktlakaj nikuak nochtin in judiojtin tlaneltokaskej inawak Cristo.

¹³ Axan, nej nikpia se tlajtole katlej nikneki namechilwis namejwan katlej mach anjudiojtin. Dios onechtlalij para ma namechmatilti yin tlajtole namejwan katlej mach anjudiojtin. Iwan yin tekitl katlej Dios onechmakak nikita nik sa tekitl kipia miek ipatij. ¹⁴ Nikneki ke sekimej judiojtin ken nej, ma moxikokan por tlan Dios kichiwa innawak katlej mach judiojtin. Para ijkón yejwan noijki ma kinekikan ma momakixtikan ken katlej mach judiojtin. ¹⁵ Tla ikuak in judiojtin okikajkej in Dios, ikuakón in Dios okinkawili in tlakaj katlej mach judiojtin ma motlapojpolwikan iwan Yej, tones tikmatij ke nikuak in judiojtin kineltokaskej in Cristo, yetos kej yeskia yomikkaj iwan oksemi yomoyolkuikej. ¹⁶ Tla akaj tlakatl kixpantilia in Dios in yakinika pan katlej okikxtij de itech tixtle, tones, kijtosneki noch in tixtle okixpantilij in Dios. O noso tla inelwayo se kuawitl iaxka in Dios, tones noch imamayo in kuawitl noijki iaxka. Kijtosneki tla in yakinika judiojtin oyekaj iaxkawan Dios, tones, katlej satepan tlakatij noijki iaxkawan.

¹⁷ Pero sekin de imamayo in olivoskuawitl, kijtosneki yen judiojtin, okinpopostekej iwan namejwan katlej mach anjudiojtin oamechpepechojkej kan okinpopostekej imamayo in olivoskuawitl. Axan namejwan ankipiaj in kuale nelwatl de yen olivoskuawitl. ¹⁸ Amo ximoweyinekikan. Amo xikyejyekokan nik namejwan okachi ankualtin ke nekatej

imamayowan katlej okinpopostekej. Xikmatikan nik mach amejwan katlej ankiskaltiaj in nelwatl, sino yen nelwatl amechiskaltia namejwan.

¹⁹ Namejwan welis ankijtoskej: “Tla okinpopostekej imamayo in olivoskuawitl para tejwan ompa otechpepechojkej, xamo por okachi tikualtin.” ²⁰ ¡Xikpiakan kuidado! Yejwan okinpopostekej porke mach okineltokakej in Cristo. Iwan namejwan ompa oamechpepechojkej porke oantlaneltokakej. Amo ximoweyinekikan, sino ximomawtijtovan inawak Dios. ²¹ Tla Dios amo okinmiknomatke iwan okipopostekke in meroj yen imamayo in olivoskuawitl, namejwan noijki no mach amechiknomatis iwan welis noijki amechpopostekis. ²² Xikmomakakan kuuenta kiné, nik in Dios kipia weyi itlasojtlalis iwan noijki tetlajyowiltij. Kintlajyowiltia katlej mach ok kineltokaj, pero kipia weyi itlasojtlalis para amejwan katlej ankineltokaj. Iwan Yej nochipa kipias weyi itlasojtlalis amowan tla namejwan antlaneltokatoskej inawak. Iwan tla amo, tonses namejwan noijki amechpopostekis. ²³ Tla in judiojtin kineltokaskej in Cristo, Dios oksemi kinpepechos itech olivoskuawitl. Porke Dios kipia poder para welis oksemi kinpepechos. ²⁴ Namejwan, katlej mach anjudiojtin, oamechpopostekej de itech se olivoskuawitl katlej oyeka ipan tepetl, iwan oamechpepechojkej itech se olivoskuawitl katlej okitookakej kan mach oamechtokaroaya anmoskaltianij. Tones, in Dios okachi mach owij oksemi kintlalis in judiojtin kan meroj inmolivoskuawyo kan achtoj oyekaj, porke yejwan yonmej katlej oyekaj imamayo in olivoskuawitl.

Satepan in judiojtin momakixtiskej

²⁵ Nokniwan, nikneki namechilwis se tlamantle katlej achtoj mach akaj okimatia. Nikneki xikmatikan para amo ximoweyinekikan, iwan amo xikyejyekokan nik namejwan okachi ankualtin iwan amo ken judiojtin. Sekimej judiojtin oyoltlakuawakej, pero yejwan ijkón yoltlakuawatoskej asta ikuak ma ajsikan noctin katlej mach judiojtin katlej kipia de momakixtiskej. ²⁶ Nijuak ijkón tlapanos, tonses noctin in judiojtin momakixtiskej. Ken kijta in tiotlajkuilole:
Se Temakixtij witz de Sión,
iwan kintlajtlakolkixtis noctin iwejkaixwiwan in Jacob ni-
jkuak kineltokaskej.

²⁷ Nej inwan nikchiwas se akuerdo,
iwan nikinmakixtis de intlajtlakol.

²⁸ Axan sekimej judiojtin katej kej ikontraswan in Dios porke mach kineltokaj in kuale tlajtole katlej temakixtia, iwan yon namejwan katlej mach anjudiojtin oamechpalewij

porke ijkón nik owelik oamechiknomatke in toTajtzin Dios para ximomakixtikan. Pero Dios okinpejpenke in judiojtin, iwan por yonik ok kintlasojtla ijkón ken okinmilwij in ya wejkawitl inweyitajwan nik kintlasojtlas iwan kintochiwas.²⁹ Porke tlan Dios kitemaka, mach ok kitekixtilia. Iwan Dios okinpejpenke in judiojtin para ma yekan iaxkawan iwan mach keman kinkawas.³⁰ Namejwan katlej mach anjudiojtin achtoj mach ankineltokayaj in Dios, pero axan Dios ya amechiknomati porke in judiojtin mach okineltokakej.³¹ Axan in judiojtin mach tlaneltokaj, iwan yon ijkón tlamocheviwa para ke se tonale in Dios noijski ma kinmiknomati ijkón ken namejwan oamechiknomatke.³² Porke Dios okinkaj nochtin tlaltikpaktlakaj ma tzaktokan ijtik tlajtlakole porke mach otlaneltokakej inawak, para ijkón satepan welis oksemi kinmiknomatis nochtin.

³³ ¡In toTajtzin Dios sa tekitl kipia miek tlamanle tlan kuale iwan mach keman tlamis! Kipia miek ixtlamachilistle iwan miek tlan Yej kimi! Mach akaj weli kimomaka kuenta tlan Yej kiyejyekoa kichiwas, iwan nion mach akaj weli kimomaka kuenta kenik kichiwa tlan Yej kijta.³⁴ In tiotlajkuilole kijta: “¿Akin kimi tlan Dios kiyejyekoa? O noso, ¿akin okilwij tlanon moneki kichiwas?³⁵ ¿Kox itlaj okitlanetijkej in Dios para satepan ma kikuropa?”³⁶ Porke nochí tlan onkaj walajtok de Dios, iwan nochí tlan onkaj, onkaj por Yej iwan para Yej. Ma tikweyikixtikan toTajtzin Dios nochipa. Ijkón ma yeto.

12

Kenik moneki se nemis inawak Dios

¹ Nokniwan, toTajtzin Dios kipia weyi iteiknotlamachilis towan. Iwan por yonik namechtlatlawtia ximotemaktikan (ximotemaktilikan) inawak Dios kej se tlamanale katlej yolitok iwan chipawak ijkón ken Yej kipaktia. Tla ijkón ankichiwaskej, tonses kijtosneki yen yon weyikixtilistle katlej toTajtzin Dios kipaktia.² Ayakmo xikchiwakan ken tlan kichiwaj in tlaltikpaktlakaj. Sino xikkawilikan in Dios ma amechyankuili itech namotlalnamikilis, para ijkón ankimatisekj tlanon Dios kineki xikchiwakan, iwan ankimatisekj tlan kuale, tlan Yej kipaktia iwan katlej okachi kuale de nochí.

³ Dios okipixke weyi iteiknotlamachilis nowan iwan onechmakak yin tekitl para ma namechilwi tlan moneki ankichiwaskej. Por yonik namechilwia, amo xikyejyekokan nik okachi ankualtin okachi de tlan moneki ankiyejyekoskej. Sino okachi kuale xikyejyekokan nochí tlamanle ken moneki ika kuale amotlalnamikilis. Para ijkón xikyejyekokan nik welis ankichiwaskej in tekitl katlej Dios oamechmakak

para xikchiwakan kada se de amejwan porke namejwan antlaneltokaj inawak. ⁴ Porke in totlalnakayo kipia miek partes, iwan kada se parte kichiwa tlatlamantle tekitl. ⁵ Ijkón tejwan noijki, maski tikatej timiekej titlaneltokakej, tinochtin timochiwaj sa se tlalnakatl itech Cristo. Tinochtin tikchiwaj tlatlamantle tekitl, iwan tinochtin timopalewiaj se iwan oksé ijkón ken Dios kineki.

⁶ Dios otechmakak ipoder para ma tikchiwakan tlatlamantle tekitl. Dios otechmakak ika iteiknotlamachilis ijkón ken Yej okinekke. Por yonik, tla Dios otechmakak poder para ma tikijtokan itlaj tlajtole tlan Yej techmaka, tonses ma tikijtokan kiné. Moneki ma tiktekipanoltikan totlaneltokalis katlej Dios otechmakak. ⁷ Tla Dios otechmakak poder para ma tikinpalewikan oksekimej, tonses moneki ma tikinpalewikan. Tla Dios otechmakak poder para ma titlamachtikan, tonses moneki ma titlamachtikan. ⁸ Tla Dios otechmakak poder para ma tikinyolojchikawakan oksekimej, tonses moneki ma tikinyolojchikawakan. Tla Dios otechmakak poder para ma tiktemakakan itlaj tlan tikpiaj, tonses ma tiktemakakan ika kuale toyolo. Tla Dios otechmakak poder para ma titlayekantokan itlaj tekitl, tonses ma titlayekantokan iwan kuale ma tikchiwakan totekiw. Tla Dios otechmakak poder para ma tikinpalewikan katlej mach itlaj kipiaj, tonses moneki ma tikinpalewikan ika pakilstle.

Kenik moneki yeskej in tlaneltokakej

⁹ Ximotlasojtlakan se iwan oksé ipan melajka. Xikchiwakan tlan kuale, iwan xikkawakan tlan amo kuale. ¹⁰ Ximotlasojtlakan se iwan oksé kej anmiknimej. Moneki okachi xikinchiwakan kuenta in oksekimej iwan ximotlakitakan se iwan oksé.

¹¹ Ximochijchikawakan ika nochí amoyolo para ankitekipanoskej in toSeñor iwan amo xitlatziwikan.

¹² Nochipa xipaktokan por yen tlan techchia ompa ilwikak. Xikmoxikoltikan nikuak antlajyowiaj. Amo keman xikkawakan de anmotiotzajtziliskej.

¹³ Xikinpalewikan ikonewan Dios nikuak itlaj kinpoloa. Xikinresibirokan ika kuale akinmej amechontlajpalooaj.

¹⁴ Xiktlajtlanilikan Dios ma kintiochiwa katlej kinekij amechtoktiskej tlan amo kuale. Amo xiktlajtlanilikan Dios ma kintlajyowilti, sino ma kintiochiwa.

¹⁵ Xipakikan inwan katlej pakij, iwan xichokakan inwan katlej chokaj.

¹⁶ Xikpiakan san se amotlalnamikilis. Amo ximoweyinekikan, sino kuale ximowikakan inwan katlej

sensiyojtzitzintin. Amo xikyejyekokan ke namejwan ankipiaj okachi ixtlamachilistle.

¹⁷ Amo xikinkuepaltikan katlej amechtoktiaj itlaj amo kuale. Nochtin ma amechitakan nik ankichiwaj tlan kuale. ¹⁸ Xikchiwakan asta kan anwelij de xiekan ika kuale in-wan nochtin. ¹⁹ Namejwan notetlasojkaikniwan, amo xikinkuepaltikan akinmej amechtoktiaj tlan amo kuale, sino xikkawilikan yen Dios ma kintlajyowilti. Porke in tiotlajkuilole kijta: “Nej nikinkuepaltis akinmej kichiwaj tlan amo kuale, yejwan nechtlaxtlawiliskej ken moneki.” Ijkón kijta in toSeñor. ²⁰ Okachi kuale xikchiwakan ken kijta in tiotlajkuilole: “Tla se tlakatl mitzkokolia iwan tiojsiwi, xiktlamaka, iwan tla amiki xikatlti. Porke tla ijkón tikchiwas, in yej sa tekitl pinawas.” ²¹ Amo xikkawilikan ma amectlani tlan amo kuale, sino amejwan xiktlanikan tlan amo kuale ika tlan kuale.

13

Ma se kintlakita katlej tlatlayekantojej

¹ Nochtin moneki ma kintlakitakan in tekiwajkej de gobierno. Porke yen Dios okinmakak in yon tekitl, iwan katlej axan tlanawatijtokej, yen Dios okintlalij. ² Por yonik, akin amo kintlakita in yonmej tekiwajkej, kijtosneki mach kitlakita tlan Dios okitlalij. Iwan akinmej ijkón kichiwaj in Dios kintlajyowiltis. ³ Porke in tekiwajkej mach katej para kin-majmawtiskej katlej kichiwaj tlan kuale, sino katlej kichiwaj tlan amo kuale. Tla amo tikneki ma mitzmajmawtikan in tekiwajkej, toneses xikchiwa tlan kuale iwan in tekiwajkej mitztlakitaskej. ⁴ Porke Dios okintlalij in tekiwajkej para mitzpalewiskej. Pero tla tikchiwa tlan amo kuale, ijkukón xikinmiimakasi in tekiwajkej porke yejwan tlanawatiskej ma mitztlajyowiltikan. In tekiwajkej katej kej itekipanojkawan in Dios para kintlajyowiltiskej ken moneki akinmej kichiwaj tlan amo kuale. ⁵ Por yonik moneki se kintlakitas in tekiwajkej, amo san para amo ma techtlajyowiltikan, sino porke ijkón moneki se kichiwas. ⁶ Iwan noiжиki por yonik namejwan ankitlaxtlawaj impuestos. Porke in tekiwajkej moneki kitlaniskej intlaxtlawil para welis tekipanoskej itech yon tekitl katlej Dios okinmakak.

⁷ Xiktlaxtlawakan nochí tlan moneki ankitlaxtlawaskej. Xiktlaxtlawakan impuestos iwan renta. Xiktlakitakan akin moneki ankitlakitaskej, iwan xikweyimatikan akin moneki ankiweyimatiskej. ⁸ Amakaj itlaj xikwikilijtowan, sino moneki ximotlasojtlakan se iwan oksé. Porke akin tetlasojtlak kijtosneki kichiwa nochí tlan kijta itlanawatil in Moisés. ⁹ Porke

itlanawatil in Moisés kijta: “Amo ximomekati, amo xitemikti, amo xitlachteki, amo xitetlajtoltlatlalili, amo xikixelevi tlan amo moaxka”. Yinmej iwan nochtin oksekimej tlanawatiltin mochiwa sa se, kijtosneki: “Xiktlasojtla in mokni ken tej timotlasojtla.”¹⁰ Akin tetlasojtla kijtosneki kitechiwilia tlan kuale. Iwan akin ijkón kichiwa kijtosneki kichiwa nochti tlan kijta itlanawatil in Moisés.

¹¹ Tones, moneki xikchiwakan nochti yin tlamantle tlan namechilwia, porke ya ankimatiij itech tlan tiempo tikatej. Moneki xiijsatokan, porke ya ajsi tonale para techmakixtis in Cristo, iwan amo ken nijuak yakin otitlaneltokakej.¹² Ya tlamiskej in tonaltin de tinemiskej ixko yin tlaltikpak, iwan ya pewaskej in tonaltin de tinemiskej iwan Dios. Por yonik ayakmo ma tikchiwakan tlan amo kuale ken kichiwaj in tlakaj katlej katej ijtit tlatleyualotl, sino ma tinemikan ijtit tlanextle para welis tiktlaniskej tlan amo kuale, ijkón ken nijuak se soldado nemi nijuak tlanestok para temagas.¹³ Moneki tinochtin ma tichipawkanemikan, ijkón ken moneki tinemiskej ijtit tlanextle tinochtin tejwan katlej titlaneltokakej. Amo ma tinemikan itech ilwimej mach kualtin, iwan amo ma titlawantinemikan. Amo ma timomekatikan, iwan amo ma tikchiwakan tlan amo kuale tlan kineki totlalnakayo. Amo ma timokualanijtinemikan inwan oksekimej. Iwan amo ma tikpiakan nexikolistle.¹⁴ Sino ma tiktlatjlanilikan toSeñor Jesucristo ma techpalewi ma tinemikan ken Yej, iwan amo ma tikchiwakan tlan amo kuale tlan kineki totlalnakayo.

14

Ma se kinpalewi in tokniwan katlej mach chijchikawakej itech intlaneltokalis

¹ Xikinyeknotzakan in tokniwan katlej mach ya kuale kimomakaj kuenta in tlamachtile katlej tikneltokaj. Pero amo inwan ximotlatlajtolcuepakan ika tlan yejwan mach kimomakaj kuenta. ² Por ejemplo, katej sekimej tlaneltokakej katlej kineltokaj welis kikuaskej de nochti tlamantle tlakuale, pero katej sekimej tlaneltokakej katlej mach ya kuale tlaneltokaj, katlej kiyejyekoaj moiitlakoskej inawak Dios tla kikuaskej nakatl. ³ In tlaneltokakej katlej kikuaj de nochti tlamantle tlakuale, amo ma kiyejyekokan nik okachi kualtin ke katlej mach kikuaj nakatl. Iwan tlaneltokakej katlej mach kikuaj nakatl amo ma kinpojpoakan katlej kikuaj nakatl, porke Dios parejo yoamechresibiroj kej anmikonewan. ⁴ ¿Akin tej para xikijto kox kuale o noso amo kuale tlan kichiwa itekipanoj de oksé tlakatl? San yen iteko welis kijtos kox kuale o noso amo kuale tlan kichiwa. Iwan

toTeko kipia poder para kipalewis ma kichiwa tlan kuale para ma moyekketza.

⁵ Katej sekimej tlaneltokakej katlej kiyejyekoaj nik onkaj se tonale katlej okachi weyi tonale ke oksekimej tonaltin. Pero katej oksekimej tlaneltokakej katlej kijtaj nik nochtin tonaltin san se parejo. Kada se moneki kuale ma kigmati ipan iyolo de tlan kiyejyekoa. ⁶ In tlaneltokakej katlej kitlakitaj se tonale okachi ke oksekimej tonaltin, kitlakitaj yon tonale porke kinekij kipaktiskej in toSeñor. In tlaneltokakej katlej kikuaj de noch i tlamantle tlakuale, kikuaj de noch porke kinekij kipaktiskej in toSeñor porke kitlasojkamachiliaj in toTajtzin Dios por noch i tlakuale, mach kikuaj porke kinekij kipaktiskej in toSeñor iwan yejwan noiiki kitlasojkamachiliaj in toTajtzin Dios por tlan kikuaj.

⁷ Porke mach akaj katlej kineltoka Dios weli monawatia iselti. Mach akaj tlakatl weli yolitok san por yej kineki yolitos para mopaktis, iwan nion mach akaj tlakatl miki san por yej kineki mikis. ⁸ Pero tla tiyolitokej ixko yin tlaltik-pak, tiyolitokej para tiktekipanoskej in toSeñor, iwan nikuak timikiskej, timikiskej para yen toSeñor. Tla tiyolitoskej o noso tla timikiskej, tejwan tiaxkawan toTajtzin Dios. ⁹ Por yonik in Cristo omikke iwan omoyolkuij oksemi para yetos yen toSeñor maski timikiskej o noso tiyolitoskej.

¹⁰ Tones, ¿tlanik tikpojpoa in mokni? O noso, ¿tlanik tikyejyekoa nik in tej okachi tikuale ke yej? Tinochtin tikpiaj de timoteixpantiskej inawak Cristo iwan Yej kijtos kox titlajtlakolejkej o noso amo. ¹¹ Porke in tiotlajkuilole kijta:

Nej niyolitok, kijta in toSeñor, iwan nochtin tlakaj motlankuaketzaskej noyakapan,

iwan nochtin kijtoskej teixpan nik melawak Nej niDios.

¹² Tones, kada se de tejwan tikpiaj de tiktemakaskej kuenta inawak Dios de tlan tikchiwaj.

Amo xiktokti in mokni ma wetzi ipan tlajtlakole

¹³ Por yonik, mach ma tikinmitakan in tokniwan kox kuale tlan kichiwaj o noso amo. Sino, xikpiakan kuidado de amo ankichiwaskej itlaj tlamantle tlan ika welis wetzis ipan tlajtlakole se amokni, iwan ijkón ankijtlakoliskej itlanetokalis. ¹⁴ Nej komo nitlaneltokak inawak toSeñor Jesús, kuale nikmati nik mach itlaj tlakuale welis techijtlakos inawak Dios. Pero tla akaj kiyejyekoa nik tlajtlakos tla kikuas itlaj tlakuale, tones para yej tlajtlakole in tla kikuas. ¹⁵ Iwan tla se mokni mitzita tikkua itlaj tlakuale katlej para yej tlajtlakole se kikuas, tones kijtosneki mach tiktlasojtla in mokni por yen tlan tikchiwa. Amo xikchiwa ma mopollo se

mokni katlej Cristo omikke por yej, san por yen tlakuale katlej tikkua. ¹⁶ Tla ijkón tikchiwas, oksekimej welis kijtoskej nik mach kuale tlan tikchiwa maski ma yeto kuale tlan tikchiwa. ¹⁷ Porke kan Dios tlanawatia mach importariwi tlan tikuaj o noso tlan tikonij. Pero tla tejwan tichipawkanemij, tla tikpiaj yolosewilistle, iwan tla tikpiaj pakilstle katlej techmaka in Espíritu Santo, yon melawak okachi importariwi. ¹⁸ Akin ijkón kitekipanoa in Cristo, kipaktia in Dios iwan welis kitlakitaskej nochtin tlakaj.

¹⁹ Por yonik, ma tikchiwakan tlan welis techmakas yolosewilistle, iwan ma timopalewikan se iwan oksé para okachi ma timochikawakan itech totlaneltokalis. ²⁰ Amo xikijtlakokan in tekitl de toTajtzin Dios por itlaj tlakuale tlan ankikuaj. Melawak nik nochi tlakuale welis se kikuas, pero mach kuale tla se kikuas itlaj tlakuale katlej ika welis wetzis ipan tlajtlakole se tokni. ²¹ Okachi kuale mach ma se kikua nakatl iwan nion mach ma se koni vino, iwan nion itlaj oksé tlamantle, katlej ika welis wetzis ipan tlajtlakole se tokni. ²² San tej xikmato tlan tikneltoka inawak Dios. Ma paki akin kineltoka nik kuale tlan kichiwa iwan mach kineltoka nik tlajtlakole. ²³ Pero akin kikua itlaj tlakuale iwan kimolwijtok ipan iyolo kox kuale o noso amo kuale tlan kikua, tones kichiwa tlajtlakole. Porke mach kikua ika itlaneltokalis de ke kichiwa tlan kuale. Iwan nochi tlamantle tla amo se kichiwas ika tlaneltokalistle, yon tlajtlakole.

15

Ma tikchiwakan tlan kinpaktis oksekimej

¹ Tejwan katlej tichikawakej itech totlaneltokalis moneki tikinpalewiskej katlej mach chikawakej itech intlaneltokalis, iwan amo ma tikchiwakan san tlan tejwan techpaktia. ² Kada se de tejwan moneki ma tikchiwakan tlan kuale katlej welis kipaktis in tokni iwan katlej welis kipalewis para okachi kuale ma tlaneltonka inawak Dios. ³ Porke nion Cristo mach okichij itlaj tlamantle san tlan Yej okipaktiaya. Porke in tiotlajkuilole kijta: “In tlakaj katlej mitzwijwikaltiaj noijki Nej nechwijwikaltiaj.” ⁴ Nochi tlan omikuiloj ya wejkawitl, omikuiloj para tejwan ika ma timomachtikan. Iwan nijuak timomachtiaj in tiotlajkuilole, in Dios techpalewia para ma tikxikokan nochi tlan tipanoaj. Iwan noijki techyolochikawa para ma tikchiakan nochi tlan yokijtoj techmakas. ⁵ ToTajtzin Dios katlej techyolochikawa iwan techpalewia para ma tikxikokan tlan tipanoaj, ma amechpalewi para xikpiakan san se namotnalnamikilis ijkón ken Cristo Jesús kineki ma tikpiakan. ⁶ Iwan ijkón, aminochtin ika san se

tlalnamikilistle xikweyikixtikan in toTajtzin Dios, iPapan in toSeñor Jesucristo.

In kuale tlajtole katlej temakixtia kinmatiltiaj katlej mach judiojtin

⁷ Por yonik, ximoyeknotzakan se iwan oksé, ijkón ken Cristo techyeknotok. Iwan ijkón welis tikweyikixtiskej in toTajtzin Dios. ⁸ Iwan namechilwia, nik in Cristo ovalaj para kinpalewis in judiojtin. Iwan ijkón Dios okiteitij nik melawak nochí tlan okinmilwij in ya wejkawitl toweyitajwan, iwan nik in Yej nochipa kichiwa tlan kijta. ⁹ Cristo noijski ovalaj para ke katlej mach judiojtin ma kiweyikixtikan toTajtzin Dios por yen iteiknotlamachilis katlej okipixke por yejwan katlej mach judiojtin, ken kijta in tiotlajkuilole:

Por yonik in tlakaj katlej mach judiojtin mitzweyikixtiskej, iwan nikintlakuikas tiotlakuikaltin para ika nimitzweyikixtis.

¹⁰ Iwan oksé lado itech in tiotlajkuilole noijski kijta:

Namejwan katlej mach anjudiojtin, xipakikan inwan judiojtin katlej iaxkawan in toTajtzin Dios.

¹¹ Iwan oksé lado noijski kijta:

Aminochtin namejwan katlej mach anjudiojtin moneki xikweyikixtikan toTajtzin Dios.

Ma kiweyikixtikan toTajtzin Dios nochtin tlaltikpaktlakaj.

¹² Iwan Isaías noijski kijta:

Satepan tlakatis se iwejkaihwani in Isaí,
iwan yej yetos tlayekanke katlej kinnawatis nochtin katlej
mach judiojtin.

Iwan yejwan mochiaskej inawak para ma kinmakixti.

¹³ In Dios katlej inawak timochiaj ma amechmaka pakilistle, iwan ma amechmaka yolosewilistle porke namejwan ankineltokaj. Iwan ma amechpalewi in Espíritu Santo ika ipoder para ma moweyili namotlaneltokalis para ijkón okachi welis anmochiaskej inawak.

¹⁴ Nokniwan, nej kuale nikmati nik namejwan ankinekij ankichiwaskej ika pakilistle tlan Dios kineki, iwan noijski namejwan kuale ankimatij tlanon moneki ankichiwaskej para ijkón welis ammonajnawatiskej se iwan oksé. ¹⁵ Iwan itech yin amatlajkuilole namechilwia sekín tlajtole ika chikawak para ika namechelnamiktia sekín tlamantle. Ijkín namechilwia itech yin amatlajkuilole porke Dios ika iteiknotlamachilis nechnawatia ijkón ma nikchiwa. ¹⁶ Nej niktekipanoa in toSeñor Jesucristo para nikinmatiltia katlej mach judiojtin itlajtol in Dios katlej temakixtia. Nikinmilwia kenik in Dios welis kinmakixtis de intlajtlakol ijkón ken nikuak se tiopixke kinmilwia. Iwan yon kej yeskia nikmaka

in Dios se tlamanale katlej Yej kiwelita, iwan katlej yokichipaj in Espíritu Santo.

¹⁷ Por yonik, nej como nitlaneltokak de Cristo Jesús, sa tekitl nipaki por yen tekitl katlej nikchiwa inawak Dios. ¹⁸ Mach namechilwis itlaj oksé tlamantle, sino san yen tlan Cristo okichij notech para owelik onikintlapowij katlej mach judiojtin para yejwan noijski ma kineltokakan in Dios. Yejwan okineltokakej Dios por yen tlan onikinmilwij, iwan por yen tlan onikchij innawak, ¹⁹ iwan noijski por yen señahestin iwan milagrostin katlej onikinchij ika ipoder in Espíritu Santo. Iwan ik nian nepa yoniktematiltij in kuale tlajtole katlej temakixtia de Cristo, desde Jerusalén iwan asta itech país de Ilírico. ²⁰ Nochipa onimochijchikawayá de niktematiltis in kuale tlajtole katlej temakixtia kan mach ya keman okikakiaj de Cristo. Ijkón onikchij para amo nitekipanos kan oksekimej ya tekipanojtokej. ²¹ Sino ken kijta in tiotlajkuilole: Nekatej tlakaj katlej mach ya keman kinmilwiaj de itlajtol in Dios, yejwan kikakiskej.

Iwan nekatej tlakaj katlej mach keman okikakiaj de Yej, yejwan kimomakaskej kuenta.

Pablo okiyejyekoj yas Roma

²² Por yonik maski miekpa nikneki nias namechitati, mach niweli. ²³ Pero axan yotlanke onitekipanoj itech yinmej regionmej, iwan como ya kipia miek xiwitl nikneki nias namechitati, ²⁴ axan nej nikyejyekoa welis namechitikisas nikuak nias España. Iwan nikuak yonikpixke pakilistle de yonamechitak kanaj keski tonale, satepan welis annehpalewiskej ika tlan monekis para nias ipan noojwi. ²⁵ Pero axan niawi para Jerusalén para nikinpalewis katlej iaxkawan Dios katlej ompa katej. ²⁶ Porke in tlaneltokakej de estado de Macedonia iwan de Acaya, okijtokej kololoskej itlaj tlan ika kinpalewiskej in tokniwan tlaneltokakej katlej mach itlaj kipiaj katlej katej Jerusalén. ²⁷ Yejwan, katlej mach judiojtin okijtokej kinpalewiskej in judiojtin katlej mach itlaj kipiaj. Porke yen judiojtin katlej oyajkej okinmatiltitoj de itlajtol in Dios para yejwan noijski ma momakixtikan. Axan yejwan noijski moneki kinpalewiskej in judiojtin katlej mach itlaj kipiaj. ²⁸ Tones, nikuak niktlamis yin tekitl iwan nikuak yotlanke yoniktemaktij (yoniktemaktilij) tlan omololoj, nias para España, iwan namechitikisas. ²⁹ Iwan nikmati ke nikuak nias namechitati, najsiti ika miek tlatiochiwalistle katlej Cristo kitemaka.

³⁰ Nokniwan, sa tekitl namechtlatlawtia inawak toSeñor Jesucristo iwan por yen tla sojtal listle katlej techmaka in Espíritu Santo, xinechpalewikan ximotiotzajtzilikan inawak

Dios por nej.³¹ Xiktlatlawtikan Dios ma nechmakixti de innawak in tlakaj katlej mach tlaneltokakej katlej katej itech estado de Judea. Iwan noijki xiktlatlawtikan para ke in tokniwan yolchipawakej katlej katej Jerusalén ma kiresibirokan ika pakilistle nikuak nikinmakati tlan omololoj.³² Iwan tla Dios kimonekiltis, ma nechkawili ma najsiti amonawak ika miek pakilistle iwan ijkón welis nimosewis amowan.³³ ToTajzin Dios katlej techmaka yolosewilistle ipan toyolo, ma yeto amowan. Ijkón ma yeto.

16

Pablo okonintlajpaloj iwan okoninnajnawatij

¹ Nikneki xikixmatikan in tokni siwatl katlej itoka Febe. Yej tekipanoa itech tiopan katlej kajki itech weyikan de Cencrea.

² Nikneki kuale xikresibirokan ika itlasojtlalis in toSeñor ijkón ken moneki tikinresibiroskej in tokniwan tlaneltokakej. Xikpalewikan ika nochi tlan kinekis, porke yej miekej yokinpalewij iwan asta nej noijki yonechpalewij.

³ Xikonintlajpalokan Priscila iwan Aquila katlej nowan tekipanoaj itech itekiw in Cristo Jesú. ⁴ Yejwan okimakixtijkej nonemilis maski yoyekaj itenko mikilistle por nej. Iwan axan mach san yen nej nikintlasojkamachilia, sino noijki kintlasojkamachiliaj nochtin in tiopantlaneltokakej katlej mach judiojtin. ⁵ Xikonintlajpalokan noijki in tiopantlaneltokakej katlej mololoaj ichan Priscila iwan Aquila. Xikontlajpalokan notetlasojkaikni Epeneto, katlej achtoj okineltokak in Cristo itech estado de Acaya. ⁶ Xikontlajpalokan in María, katlej chikawak tekipanoa por amejwan. ⁷ Xikonintlajpalokan noparenteswan Andrónico iwan Junias, katlej nowan otzaktokaj telpiloyan. Nochtin katlej itlatitlanilwan Dios sa tekitl kintlakitaj. Iwan noijki yejwan achtoj okineltokakej in Cristo, okachi achtoj ke nej.

⁸ Xikontlajpalokan in Amplias, katlej notetlasojkaikni inawak toSeñor. ⁹ Xikontlajpalokan in Urbano, katlej towan tekipanoa itech itekiw in Cristo Jesú. Iwan noijki xikontlajpalokan notetlasojkaikni Estaquis. ¹⁰ Xikontlajpalokan in Apeles, katlej techtitia nik melawak tlaneltoka inawak Cristo maski panoa miek tlajyowilistle. Xikonintlajpalokan noijki ifamilia in Aristóbulo. ¹¹ Xikontlajpalokan noparente Herodión, iwan noijki xikonintlajpalokan ifamilia in Narciso katlej tlaneltokaj inawak toSeñor. ¹² Xikonintlajpalokan in Trifena iwan Trifosa katlej tekipanoaj itech itekiw in toSeñor. Xikontlajpalokan in totetlasojkaikni Pérsida, katlej sa tekitl tekipanojtiwitz itech itekiw in toSeñor. ¹³ Xikontlajpalokan

in Rufo, katlej Dios okipejpenke para kichiwas se weyi tek-
itl. Iwan noijki xikontlajpalokan imaman in Rufo katlej
kajki kej yeskia nej nomaman noijki.¹⁴ Xikonintlajpalokan
in Asíncrito, Flegonte, Hermas, Patrobas, Hermes iwan
noijki xikonintlajpalokan in tokniwan katlej inwan katej.¹⁵
Xikonintlajpalokan noijki in Filólogo iwan Julia, noijki in
Nereo iwan ikni siwatl Olimpas, iwan noijki xikonintlaj-
palokan nochtin tokniwan tlaneltokakej katlej inwan katej.

¹⁶ Ximotlajpalokan ika tlasojtlalistle se iwan oksé ken Dios
kineki. Amechontlajpalaoj nochtin in tiopantlaneltokakej de
Cristo.

¹⁷ Nokniwan, namechtlatlawtia kuale xikinmitakan ak-
inmej kinekij kinxeloskej in tokniwan iwan kinekij kimmi-
jtlakoliskej intlaneltokalis, porke yejwan mach kineltokaj
in tlamachtile katlej namejwan ya ankimatij. Amo in-
wan ximonelokan ¹⁸ porke yejwan mach kitekipanoaj in
toSeñor Jesucristo, sino yejwan kichiwaj san tlan yejwan
kineki. Yejwan tlapoaj ika tlajtole kuakualtzin para ika
kinkajkayawaj ipan inyolo in tlakaj katlej mach ya kuale
kimomakaj kuenta de tlajtol in Dios. ¹⁹ Nochtin kimatij nik
namejwan ankichiwaj tlan Dios kineki, iwan por yonik nej sa
tekitl nipaki. Iwan nikneki namejwan xiekan anlistojtin para
ankichiwaskej tlan kuale iwan amo para ankichiwaskej tlan
amo kuale. ²⁰ Iwan toTajtzin Dios katlej techmaka yolosewil-
istle ipan toyolo, mach ok wejkawas para kipojpolilis ipoder
in Satanás para ayakmo ma amechkuejso. In toSeñor Jesu-
cristo ma kipia weyi iteiknotlamachilis amowan.

²¹ Amechontlajpaloa in Timoteo, katlej nowan tekipanoa.
Noijki amechontlajpalaoj nopalienteswan Lucio, Jasón iwan
Sosípater.

²² Nej, niTercio, katlej nikikuilojtok in yin amatlajkuilole,
noijki namechontlajpaloa ika itlasojojtlalis in toSeñor.

²³ Amechontlajpaloa in Gayo, katlej ichan nikalotitok, iwan
katlej kitetlanetijtok ikal para ompa ma mololokan nochtin
in tiopantlaneltokakej. Amechontlajpaloa in Erasto, katlej
tesorero de itech yin weyikan, iwan noijki amechontlajpaloa
in Cuarto.

²⁴ In toSeñor Jesucristo ma kipia weyi iteiknotlamachilis
amonawak. Ijkón ma yeto.

Ma tikweyikixtikan toTajtzin Dios

²⁵ Axan, ma tikweyikixtikan toTajtzin Dios katlej welis
kichiwas para ximoyekketzakan itech namotlaneltokalis.
Dios welis amechchikawas itech tlajtol katlej temakixtia de
yen Jesucristo katlej nej niktematiltia. Yon kuale tlajtole
katlej temakixtia yen katlej ya wejkawitl mach akaj okimatisa

porke Dios ayamo okinekia ma kimatikan. ²⁶ Pero axan yotechmatiltij por yen tlan okikuilojkej in profetajtin. Iwan Dios katlej yolitok nochipa, otlanawatij ma kinmatiltikan nochtin tlaltikpaktlakaj yon kuale tlajtole katlej temakixtia, para ma kineltokakan Dios iwan ma kichiwakan tlan Yej kineki.

²⁷ ¡ToTajtzin Dios, katlej san Yej kipia noch ixtlamachilis-
telle, ma tikweyikixtikan nochipa por tlan Jesucristo kichiwa
towan! Ijkón ma yeto.

SAN PABLO ITLATITLANIL IN DIOS YAKINIKA OKINTLAJKUILILIJ IN TLANELTOKAKEJ DE CORINTO

Pablo okonintlajkuililij in tlaneltokakej de Corinto

¹ Nej niPablo, Dios okimonekiltij onechtlalij ma nieto nitlatitlanile de Jesucristo. Nej iwan tokni Sóstenes ² tamechtlaajuililiaj namejwan antokniwan antiopantlaneltokakej de Dios, katlej anchantij itech weyikan de Corinto. Dios yoamechyolchipaj para xiekan iaxkawan iwan xisetitokan san se iwan Cristo Jesús. Dios oamechnotzke para xiekan iaxkawan inwan nochtin katlej ik nian nepa kiyektenewaj itoka in toSeñor Jesucristo, katlej yejwan inSeñor iwan tejwan noijki toSeñor. ³ ToPapan Dios iwan toSeñor Jesucristo ma amechmakakan inteiknotlamachilis iwan inyolosewilis.

Pablo motlasojkamati inawak toTajtzin Dios por yen tlaneltokakej

⁴ Nochipa nimotlasojkamati inawak Dios por amejwan, por yen iteiknotlamachilis in toTajtzin Dios katlej oamechmakak itech Cristo Jesús. ⁵ Iwan por ansetitokej san se iwan Cristo Jesús, Dios oamechrikojtilij ipan namoyolo de miek tlaman-
tle, de nochitlan ankijtaj iwan de nochitlan ankimatij. ⁶ Ijkón kiné, nochitlan ankijtaj iwan de nochitlan ankimatij. ⁷ Porke mach itlaj amechpoloa nion se poder katlej Dios kitemaka para welis ankitekipanoskej itech yin tonale iwan asta ikuak witz in toSeñor Jesucristo. ⁸ Yej amechyolojchikawas para ximoyekketokan itech namot-
laneltokalis asta itech nekáj sa iyakatlanka tonale, para amakaj ma amechistlakawi de itlaj nikuak walmokuepas in toSeñor Jesucristo. ⁹ Dios nochipa kichiwa tlan kijta, iwan Yej oamechnotzke para xisetitokan san se iwan Jesucristo, katlej Dios iKone, iwan katlej yen toSeñor.

Tokniwan katlej mach kipiaj san se intlayejyekol iwan mox-exeloa

¹⁰ Nokniwan, namechtlatlawtia ika itoka in toSeñor Jesucristo, xikpiakan san se namotlayejyekol iwan amo ximox-exelokan. Sino kuale ximoyekwikakan, ika san se amotlayejyekol iwan san se amoyolo. ¹¹ Nokniwan, namechilwia yin tlaman-
tle porke ifamilia in Cloé onechilwijkej nik an-
mokualaniaj. ¹² Iwan kada se de amejwan ankijtaj: “Nej

nipowi iwan Pablo”, oksekimej kijtaj: “Nej nipowi iwan Apolos”, oksekimej kijtaj: “Nej nipowi iwan Pedro”, iwan oksekimej kijta: “Nej nipowi iwan Cristo.”¹³ Melajka mach ompa tlan ankijtaj. Cristo mach tlatlajkoxelitok. ¿Kox yen Pablo okimajmasoltijkej itech krus por amejwan? ¿O noso namejwan anmokuateekijkej ika itoka in Pablo?¹⁴ Niktlasojkamachilia in toTajtzin Dios porke mach akaj de amejwan onikkuateekij sino san yen Crispo iwan Gayo.¹⁵ Iwan mach akaj welis kijtos omokuateekij ika notoka.¹⁶ Noijki onikkuateekij ifamilia in Estéfanas, pero mach nikel-namiki kox ok akaj oksé onikkuateekij.¹⁷ Porke Cristo mach onechtitlanke para ma nitlakuateeki, sino onechtitlanke para ma niktematilti itlajtol katlej temakixtia. Iwan amo onechtitlanke para ma nitetlapowi ika kuajkuale tlajtole. Sino nej nikneki namejwan ximoyolkuepakan por omikke in Cristo itech krus por amejwan, para ijkón imikilis in Cristo amo ma yelo san tekitl.

Cristo yen ipoder iwan iixtlamachilis in Dios

¹⁸ In kuale tlajtole techilwia kenik omikke in Cristo itech krus por tejwan para techmakixtis. Iwan nekatej tlakaj katlej yawij kan teixpolojkan, para yejwan kitaj kej yeskia se ton-tojoyotl. Pero para tejwan katlej tiawij kan tlatemakixtikan, yon kuale tlajtole kipia poder de Dios.¹⁹ Por yonik kijta in tiotlajkuilole:

Nikinmijtlakolis inmixtlamachilis katlej wel ixtlamatkej.
Iwan nikinkixtilis intlalnamikilis katlej wel kimatij.

²⁰ Axan kiné, mach itlaj ipatij inmixtlamachilis in tlaltik-paktlakaj. Mach itlaj ipatij intlamachtil in tlamachtijkej de itlanawatil in Moisés. Mach itlaj ipatij tlan kimatij in tlakaj katlej momachiliaj wel kimatij miek tlamantle ixko yin tlaltikpak. Porke Dios techitia ke inmixtlamachilis in tlaltikpaktlakaj yon kej yeskia se tontojoyotl.²¹ Dios katlej kipia weyi ixtlamachilistle, mach okinkawilij in tlaltikpaktlakaj ma kixmatikan ika inmixtlamachilis. Sino Dios okipatij kinmakixtis in tlakaj katlej kineltokaj por medio de yen itlajtol in Dios katlej se kitematiltia, maski sekimej kijtaj yon se tontojoyotl.

²² In judiojtin kinekij kitaskej milagrostin para tlanel-tokaskej, iwan katlej mach judiojtin kitemoaj ixtlamachilistle itech itlanawatil in Dios para welis kineltokaskej.²³ Pero tejwan titetlapowiaj de Cristo katlej omikke itech krus por tejwan. In judiojtin nikuak ijkón kikakij kinkualania, iwan katlej mach judiojtin kitaj kej se tontojoyotl.²⁴ Pero para katlej Dios okinnotzke, judiojtin o noso amo judiojtin, Cristo kipia poder iwan kipia ixtlamachilistle de Dios.²⁵ Maski in

tlaltikpaktlakaj kitaj imikilis in Cristo kej se tontojoyotl, yon okachi kipia iixtlamachilis iwan amo ken inmixtlamachilis in tlaltikpaktlakaj. Iwan maski in tlaltikpaktlakaj kitaj kej yeskia in Dios mach kipia chikawalistle, ichikawalis okachi chikawak ke inchikawalis in tlaltikpaktlakaj. ²⁶ Nokniwan, xikelnamikikan kenik anyekaj nijuak Dios oamechnotzke para xiekan iaxkawan. Mach miekej de amejwan anyekaj anmixtlamatkej ixko yin tlaltikpak. Mach miekej de amejwan ankipiayaj tekiwajkayotl, iwan nion mach anyekaj de familia katlej okachi wejweyikistojej (wejweyititojej). ²⁷ Maski in tlaltikpaktlakaj amechitaj kej yeskia mach ajositok namot-lalnamikilis, Dios oamechpejpenke namejwan para ankinpinatiskej katlej momachilia wel ixtlamatkej. Iwan maski in tlaltikpaktlakaj techitaj mach tikpiaj chikawalistle, Dios otechpejpenke para tikinpinatiskej katlej momachiliaj kipiaj miek chikawalistle. ²⁸ Dios okinpejpenke in tlakaj katlej ixko yin tlaltikpak mach wejweyikistojej (wejweyititojej) iwan katlej mach kinnekij, iwan noijki katlej in tlaltikpaktlakaj kinmitaj kej yeskia mach itlaj inpatij. Nochtin yonmej Dios okinpejpenke para kinpolilis inpatij nochi tlan in tlaltikpaktlakaj kiyejekoaj itlaj tlamantle sa tekitl importante para yejwan. ²⁹ Para ijkón amakaj welis moweyinekis ixpan Dios. ³⁰ Dios inewian okichij xiekan san se iwan Cristo Jesús. Iwan itech Cristo tikpiaj ixtlamachilistle, mach ok tikpiaj tlajtlakole inawak Dios, techyolchipawa de tlan amo kuale para ma tiktekapanokan, iwan techmakixtia de itech tlajtlakole. ³¹ Por yonik, ken kijta in tiotlajkuilole: “Tla akaj kineki moweyinekis, ma moweyineki por tlan toSeñor kichiwa.”

2

In kuale tlajtole de Jesucristo katlej okimajmasoltijkej itech krus

¹ Nokniwan, nijuak nej oniwia amonawak para onamechmatiltij itlajtol in Dios, nej mach onamechtlapowij ika weyi ixtlamachilistle iwan nion ika kuajkuale tlajtole. ² Porke nijuak nej oniwia, mach onikijtoj namechtlapowis de itlaj oksé tlamantle, sino oniksentalajj namechtlapowis san yen de Jesucristo, iwan de kenik okimajmasoltijkej itech krus. ³ Iwan nijuak onieka amowan iwan onamechtlapowiaya, nej onikmachiliaya mach onikpiaya chikawalistle. Onimo-mawtiaya iwan onipapatlakaya (onibibiokaya). ⁴ Iwan nijuak nej onamechtlapowij de itlajtol in Dios, nej mach onamechtlaneltokitij ika kuajkuale tlajtole ken katlej kisa de itech intlanamikilis in tlakaj. Sino nej onamechtlapowij

ika ipoder in Espíritu Santo. ⁵ Para ijkón namejwan xitlaneltokakan inawak Cristo ika ipoder in Dios iwan amo ika inmixtlamachilis in tlakaj.

Dios moteititia ika iEspíritu Santo

6 Pero titlapoaj ika miek ixtlamachilistle inwan katlej yochijchikawakej itech intlaneltokalis. Pero amo tikintlapowiaj ika ixtlamachilistle de yin tlaltikpak, nion ika inmixtlamachilis in tlatlanawatijkej de yin tlaltikpak. Porke yejwan iwan inmixtlamachilis se tonale poliwiskej. ⁷ Pero tejwan tikintlapowiaj ika ixtlamachilistle de Dios katlej achtoj mach ya akaj okimatis porke Dios mach ya okitekawiliaya akaj ma kimati. Yin ixtlamachilistle kijtosneki yen itlajtol in Dios katlej techmakixtia iwan katlej ya wejkawitl nikuak ayamo oyeka in tlaltikpak, Dios okimonekiltij otechmakak in yon weyi imawisotlanex. ⁸ Iwan nion se de yen tlatlanawatijkej de ixko yin tlaltikpak mach welij kimomakaj kuenta yin ixtlamachilistle de Dios. Porke tla kimomakanij kuenta, mach kimajmasoltianij itech krus in toSeñor katlej kipia imawisotlanex. ⁹ In tiotlajkuilole kijta:

Dios okichij para yejwan katlej kitlasojtlaj, sekin tlamantle katlej mach akaj okitaya, mach akaj okikakia, iwan nion mach akaj okiyeyekoaya.

10 Tejwan Dios otechinnextilij yinmej tlamantin ika iEspíritu Santo. Porke in Espíritu Santo kimati noch i tlamantle, asta yen tlamantin de Dios katlej mach tiwelij tigmomakaj kuenta.

11 Porke mach akaj weli kimati tlan kiyeyekoa ipan iyolo de se tlakatl, sino san yen yon tlakatl kimatok ipan iyolo. Ijkón noijki, mach akaj kimati tlan Dios kiyeyekoa, sino san yen iEspíritu in toTajtzin Dios kimati. ¹² Iwan tejwan mach otikresibirojkej se espíritu de nian tlaltikpak, sino tejwan otikresibirojkej in Espíritu katlej witz de Dios, para ma tikmomakan kuenta de yin tlamantle katlej Dios yotechmakak. ¹³ Iwan tejwan titetlapowiaj de yin tlamantle ika tlajtole katlej iEspíritu in toTajtzin Dios techmaka. Amo titetlapowiaj ika tlajtole katlej kisa itech totlanamikilis. Titetlapowiaj de itlamachtil in Espíritu Santo para titlamachtiskej noch tlan melawak tlan Yej techilwia.

14 Se tlakatl katlej amo kipia iEspíritu in toTajtzin Dios mach kimomaka kuenta tlan iEspíritu in toTajtzin Dios techmachtia, porke para yej kita kej yeskia se tontojoyotl. Iwan mach weli kimomaka kuenta porke para kimomakas kuenta moneki kipias iEspíritu in toTajtzin Dios. ¹⁵ Pero se tlakatl katlej kipia iEspíritu in toTajtzin Dios weli kimomaka kuenta noch tlamantle kox kuale o noso amo kuale, iwan se tlakatl katlej mach kipia iEspíritu in toTajtzin Dios mach welis kilwis

mach ijki tlan kichiwa nekáj tlakatl katlej kipia iEspíritu in toTajtzin Dios. ¹⁶ Porke in tiotlajkuilole kijta: “¿Akin kimati tlan Dios kiyejyekoa? ¿Akin welis kimachtis?” Pero tejwan katlej tikpiaj Espíritu Santo, tikpiaj itlayejyekolis in Cristo.

3

Tejwan titekipanojkej de toTajtzin Dios

¹ Nokniwan, níjkuak onieka amowan, mach onamechtlapowij ken níjkuak nikintlapowia in tokniwan katlej yochichikawakej itech intlaneltokalis. Sino nej onamechtlapowij ken nekatej katlej kichiwaj san tlan yejwan kinekij, kej yeskia ok ankonemej inawak Cristo. ² Onamechmachtij ika tlajtote katlej mach owij para se kimomakas kuenta, ijkón ken se konetl katlej ok kichichitiaj porke mach ya weli tlakua, porke namejwan mach ya anwelaj ankimomakayaj kuenta de yen tlamachtile katlej okachi owij, iwan asta axan mach ya weli ankimomakaj kuenta. ³ Porke ok ankichiwaj tlan kineki namotlalnakayo. Ankipiaj nexikolistle se iwan oksé, anmokualanijtinemij iwan amo ankipiaj san se tlalnamikilistle. Ankichiwaj san tlan kineki namotlalnakayo. Ankichiwaj ken tlakaj katlej mach kixmatij Dios. ⁴ Porke níjkuak se de amejwan kijta: “Nej nipowi iwan Pablo”, iwan oksé kijta: “Nej nipowi iwan Apolos”, ijkón namejwan ankiteititiaj nik ankichiwaj san tlan kineki namotlalnakayo ken tlakaj katlej mach kixmatij Dios.

⁵ ¿Tlan nopatij nej niPablo iwan tlan ipatij in Apolos? Mach itlaj. Tejwan san titekipanojkej de Dios, iwan por yen tejwan namejwan ankineltokakej in toSeñor Jesucristo. Kada se de tejwan san otikchijkej in tekitl katlej in toSeñor otechmakak ma tikchiwakan. ⁶ Itlajtol in Dios katlej onamechmatiltij yon kej yeskia se semiya katlej nej oniktookak iwan Apolos okajwilij. Pero yen Dios katlej okichij ma moskalti. ⁷ Ijkón kiné, akin okitookak in semiya iwan akin okajwilij, mach yejwan yonmej katlej okachi moneki itech yin tekitl, katlej okachi moneki yen Dios katlej kichiwa ma moskalti in tlatoktle. ⁸ In tlakatl katlej kitooka in semiya iwan tlakatl katlej kajwilia, Dios kinmita san se parejo. Maski Dios techtlaxtlawis kada se de tejwan según in tekitl tlan tikchiwaj. ⁹ Porke in Apolos iwan nej san sekan titekipanoaj inawak Dios. Iwan amejwan ankatej kej yeskia itlatok in Dios katlej tejwan tiktekipanoaj pero mach de tejwan totlatok.

O noso welis tikijtoskej noijki, amejwan ankatej kej yeskia ikal in Dios katlej tejwan tikchiwaj, pero mach tejwan tokal. ¹⁰ Dios ika iteiknotlamachilis onechtlalij nimoesoj kej yeskia nikalchij. Nej oniktlalij in cimiento katlej ipan moketos in

kale, iwan oksekimej kiskaltiaj in kale ipan yon cimiento. Pero kada se ma kipia kuidado kenik kiskaltia in kale. ¹¹ In cimiento katlej ya kajki yen Jesucristo, iwan mach akaj welis kichiwas oksé cimiento. ¹² Se kalchij welis kiskaltis in kale ipan yon cimiento ika oro, ika plata, ika temej kualtzitzintin, ika kuawitl, ika akatl o noso ika sakatl. ¹³ Pero in tekitl de kada se tlakatl motas itech nekáj tonale de tlaixkomakalistle (tlatzonmanalos). Porke itech yon tonale motas tla kuale o noso amo kuale in tekitl katlej otikchijkej. Itech yon tonale yetos se tlilt katlej kiyeyekos in tekitl de kada se tlakatl, in tekitl katlej mach kuale tlatlas iwan katlej kuale mach tlatlas. ¹⁴ Tla akaj amo tlatlas itekiw katlej okichij, Dios kimakas itlaxtlawil. ¹⁵ Pero tla akaj tlatlas itekiw katlej okichij, kipolos itlaxtlawil, pero Dios kimakixtis ken nijuak se tlakatl kimakixtiaj de ijtk ikal nijuak tlatlatok.

¹⁶ ¿Amo ankimatiq nik yen namejwan ankatej kej itiopan in Dios, iwan nik iEspíritu in toTajzin Dios chanti ipan namoyo-lo? ¹⁷ Tla akaj tlakatl kijtlakoa itiopan in Dios, Dios kitla-jiowiltis in yon tlakatl. Porke itiopan in Dios chipawatzin, iwan yon tiopan kijtosneki yen namejwan.

¹⁸ Amakaj ma mokajkayawa iselti iwan ma kijto wel ki-mati. Tla akaj kiyeyekoja kipia miek ixtlamachilistle ixko yin tlaltikpak, ma mochiwa kej yeskia mach itlaj kimati, para ijkón melawak kipias ixtlamachilistle de Dios. ¹⁹ Porke in ixtlamachilistle katlej kipiaj in tlakaj ixko yin tlaltikpak, para Dios yon kej yeskia se tontojyotl. Porke itech tiotlajkuilole kijta: “Katlej momachiliaj wel kimatiq, Dios kinmixtzajtzakua ika inmixtlamachilis.” ²⁰ In tiotlajkuilole noijki kijta: “Dios kimati kenamij kiyeyekoaj in tlakaj katlej momachiliaj wel ixtlamatkej, iwan kimati nik mach itlaj ipatij yon inmixtlamachilis.” ²¹ Por yonik, nijuak ankipiaskej se namotla-machtij, amo ika ximoweyinekikan. Dios oamechinmakak nochtin in tlamachtijkej iwan oamechmakak nochti tlamantle para amechpalewis. ²² Nej niPablo, in Apolos, in Pedro, in tlaltikpak, in nemilistle, in mikilistle, tlan axan onkaj iwan tlan satepan yetos, Dios okichij nochti ma yeto amoaxka para amechpalewiskej. ²³ Iwan namejwan ya ankatej anteaxkawan de Cristo, iwan Cristo iaxka in Dios.

4

Intekiw in tlatitlaniltin de Dios

¹ Namejwan moneki xitechitakan nik san titekipanojkej de Cristo, katlej otechmakak in tekitl para ma titlamachtikan de yen tlamartin de Dios, katlej achtoj mach akaj okimatis.

² Axan kiné, moneki kada se tekipanoj ma kiteititi nik kuale

tekipanoa. ³ Tlan namejwan o noso in tlatlanawatijkej de ixko yin tlaltikpak itlaj ankiyejyekoskej de nej, para nej yon mach itlaj ipatij. Iwan asta tlan nej welis nikyejyekos de nej mismo, noijki no mach itlaj ipatij. ⁴ Iwan maski notlannamikilis amo nechistlakawia de itlaj, amo kijtosneki ke amo nikpia itlaj tlajtlakole. Yen toSeñor kixmati noyolo iwan Yej kijtos tla itlaj amo ijki nik kajki. ⁵ Por yonik, amo san niman xikijtokan akin kichiwa tlan kuale o noso tlan amo kuale itech itekiw in toTajtzin Dios. Xikchiakan asta ma wiki in toSeñor. Nijuak Yej witz, kinextis nochि tlamantle tlan axan tlatitok ipan inyolo in tlakaj. Kinextis nochि tlan se tlakatl okijejyekoj iwan tlan okichij. Ijkuakón Dios kimakas kada se tlakatl in weyikixtilistle tlan kitokaroa.

⁶ Nokniwan, namechtlapowia de yin tlamantle se kuale para amejwan, in Apolos iwan nej tikatej kej se ejemplo para xikmatikan nik moneki anyeskej ijkón ken kijta in tiotlajkuilole. Iwan tla anyeskej ijkón ken kijta in tiotlajkuilole, mach anmoweyinekiskej, iwan nion mach san sekimej tlamachtijkej ankintlasojtlaskej iwan oksekimej amo. ⁷ ¿Tlanik tikyejyekoa nik in tej okachi tikuale ke oksekimej? ¿Amo yen Dios omitzmakak nochि tlan tikpia? Iwan tla yen Dios omitzmakak, tones, ¿tlanik timoweyineki kej yeskia tej otikmotlanilij nochि tlan tikpia?

⁸ Nesi kej namejwan ya ankipiaj nochि tlan ankinekij iwan anmomachiliaj mach ok itlaj amechpoloa inawak Dios. Namejwan ankiyejyekoaj yopéj antlanawatiaj, iwan tejwan ayamo. Niknekiskia kiné melawak in Dios yoamechtalij xitlanawatikan para ijkón tejwan noijki amowan titlanawatiskej. ⁹ Nej nikita kej yeskia in Dios otechtlalij in tejwan tiitlatitlanilwan asta sa tlakuitlapan. Kej yeskia ya tikatej para techmiktiskej. Nochi in tlaltikpak, in angelestín iwan tlakaj, sa techmawisoaj. ¹⁰ In tlakaj techitaj kej yeskia mach ajsitok totlannamikilis porke titlamachtiaj de Cristo, pero namejwan anmomachiliaj wel anmixtlamatkej inawak Cristo. Tejwan mach tikpiaj chikawalistle, pero namejwan ankipiaj chikawalistle. In tlaltikpaktlakaj mach technekij, pero namejwan amechnekij. ¹¹ Asta axan tejwan mach tikpiaj tlan tikkuskej iwan tlan tikoniskej, iwan techpoloa totzotzol. In tlakaj techkojkokoaj iwan mach tikpiaj tochan. ¹² Titekipanoaj chikawak ika tomawan para titlakuaskej. Nijuak in tlakaj techtenewiliaj biero, tejwan tiktajtlanilija in Dios ma kintiochiwa. Nijuak techtlatlalochtiaj para techtlajyowiltiskej, tejwan tikxikoaj. ¹³ In tlakaj techtlajtoltlatlaliliaj, pero tejwan tikintlapowiaj ika kuale. In tlakaj techitaj asta axan kej itlaj tlajsole mach kuale katlej moneki

kikixtiskej de ixko yin tlaltikpak para ma tlachipato.

¹⁴ Mach namechijkuililia yin tlamantle para ika namech-pipinatis, sino para ika namechnajnawatis porke namejwan ankatej kej yeskia annokonewan katlej nikintlasoxtla. ¹⁵ Porke maski namejwan xikinpiakan majtlakte mil tlamachtijkej katlej amechmachtiskej de Cristo, mach ankinpiaj miekej amopapanwan. Sino san yen nej nikaj kej namopapan inawak Cristo Jesús, porke yen nej achtoj onamechmatilti in kuale tlajtole katlej temakixtia, iwan ankineltokakej. ¹⁶ Ijkón kiné, namechtlatlawtia xikchiwakan ijkón ken nej nikchiwa.

¹⁷ Por yonik namechtitlanilia in Timoteo, katlej kajki kej yeskia notlasojkone iwan katlej kichiwa tlan toSeñor kinawatia. Yej amechelnamiktis kenik nitlaneltoka inawak Cristo iwan kenik nichipawkanemi, iwan yen yon tlan nikin-machtia in tiopantlaneltokakej ik nian nepa. ¹⁸ Sekimej de amejwan anmoweyinekij iwan ankiyejyekoaj mach keman nias namechitati. ¹⁹ Pero nej nikneki san niman nias namechitati tla in toSeñor kimonekiltis. Iwan ikuakón nikitas kox melawak kipiaj poder de Dios in yonmej katlej moweyinekij o noso san por tlapoaj. ²⁰ Porke in tlakaj katlej kikawiliaj in Dios ma kinnawati, mach san por tlapoaj, sino nemij ika ipoder in Dios. ²¹ ¿Tlanon ankinekij ma nikchiwa kiné? ¿Ankinekij ma namechajwati, o noso ankinekij ma namechtlapowiti ika tlasoxtlalistle iwan ika noyolyamanilis?

5

Se katlej kimomekatia ichawanana

¹ Yonikmatke nik se de amejwan nemi iwan ichawanana. Yon tlajtlakole sa tekitl mach kuale ke asta katlej mach kix-matij Dios mach ijkón kichiwaj. ² Iwan namejwan ok anmixewiaj anmoweyinekij por tlan ankichiwaj. Okachi kuale moneki ximoyolkokokan iwan xikixtikan de amonawak in tlakatl katlej ijkón kichiwa. ³ Maski nej amo ompa nikaj amowan, noespíritu ompa kajki amowan. Iwan nej nikijta nik in yon tlakatl tlajtlakolej katlej ijkón kichiwa, ijkón nikijta kej yeskia ompa nikaj amowan. ⁴ Ximololokan namejwan ika itoka in toSeñor Jesucristo, iwan nej nietos amowan ika noespíritu, iwan noijski yetos amowan ipoder in toSeñor Jesucristo. ⁵ Iwan ikuakón yon tlakatl xikmaktilikan in Satanás para ma kitlajyowilti itech itlalnakayo, para ma moyolkuepa. Iwan Dios kimakixtis iespíritu itech nekáj tonale nikuak witz in toSeñor Jesús.

⁶ Amo ximoweyinekikan por tlan ankichiwaj porke yon mach kuale. ¿Amo ankimatij nik in levadura weli kisamawa nochí in txitle maski kitlaliliaj san tzikitzin? ⁷ Xikixtikan

nochi tlan amo kuale para amo xikinmijtlakokan in ok-sekimej. Iwan ijkón anyeskej ken pan katlej kikuaj in judio-jtin itech ilwitz de pascua, katlej tlachiwale ika tixtle yankuik iwan mach kipia levadura. Namejwan melawak nik ankatej ken yon tixtle katlej mach kipia levadura, kijtosneki ya an-chipawakej. Porke Cristo omikke por totlajtlakolwan ijkón ken nijuak okimikiayaj se ichkatzin itech ilwitz de pascua.⁸ Ijkón kiné, ijkón ken judiojtin mach kikuaj in pan katlej kipia levadura itech ilwitz de pascua, tejwan noijki ma tikkawakan in tlajtlakole iwan nochi tlan amo kuale, iwan ma tinemikan ika melajkayotl iwan ika kuale toyelis inawak Dios.

⁹ Itech oksé noamatlajkuilol onamechilwij amo inwan ximonelokan katlej momekatiaj. ¹⁰ Pero ika yon tlan onamechilwij, amo kijtosneki ximoxelokan de inwan nochtin in tlaltikpaktlakaj katlej momekatijkej, katlej kinekij kipiaskej nochi tlan kitaj, katlej tlachtekij iwan katlej kinweyikixtiaj santojtin. Porke tla namejwan mach ankinekiskej ok inwan anyetoskej, tonses omonekia ankisanij de ixko yin tlaltikpak. ¹¹ Tlan nej nikneki nikijos, yen amo inwan ximonelokan katlej motenewaj tokniwan inawak Cristo iwan momekatiaj, kinekij kipiaskej nochi tlan kitaj, kinweyikixtiaj santojtin, tlajtolerojtin, tlawankej iwan ichtekej. Nion amo siera inwan xitlakuakan katlej ijkón kichiwaj. ¹²⁻¹³ Porke nej mach nechtokaroa nikijos kox tlajtlakolejkej o noso amo katlej mach kixmatij Dios. Yen Dios kijtos. Pero namejwan moneki ankijtoskej akinmej tlajtlakolejkej de yen tokniwan tlanel-tokakej. Por yonik, xikixtikan de amonawak in yon tlakatl katlej tlajtlakolej.

6

In tlaneltokakej mach moneki motilwiskej innawak tekiwajkej

¹ Nijuak se de amejwan kineki kitilwis se tokni tlaneltokak de itlaj tlamantle, amo ma wia innawak tekiwajkej katlej mach kineltokaj Dios. Sino ma wia innawak tokniwan katlej iaxkawan in Dios para yejwan ma kiyektlalikan yon tlamantle. ² ¿Amo ankimatiy nik namejwan katlej anteaxkawan de Dios ankinmixkomakaskej (ankintzonmanaskej) in tlaltik-paktlakaj? Iwan tla amejwan ankinmixkomakaskej in tlaltik-paktlakaj, ¿kenik amo anwelij ankiyektlalaj yin tlamantle tzikitzin? ³ ¿Amo ankimatiy nik asta yejwan in angelestин tejwan tikinmixkomakaskej? Tones, ¿tlanik amo ma weli ma tikinyektlalikan in tokniwan nijuak mokualaniaj ika itlaj tlamantle ixko yin tlaltikpak? ⁴ Ijkón kiné, tla amejwan ankipiaj itlaj tlamantle para ankiyektlaliskej, ¿tlanik anyawij

inawak se jueς katlej mach kineltoka Dios? ⁵ Namechilwia ijkón para xipinawakan. ¿Amo ompa kaj nion se tokni katlej ma kipia kuale tlayejyekole para ma welí ma kiyektlali yon tlamantle? ⁶ Mach kuale mota tla ankiwikaskej se amokni tlaneltokak inawak se jueς katlej mach kineltoka Dios.

⁷ Mota sa tekitl tepinatij tla namejwan anyawij innawak tekiwajkej para ankitilwiskej se amokni tlaneltokak. Okachi kuale xikxikokan namokni katlej amechtuktia tlan amo kuale. Okachi kuale xikxikokan nikuak amechtlachtekiaj. ⁸ Pero namejwan yej ankintoktiaj tlan amo kuale iwan ank-intlachtekiaj maski amokniwan tlaneltokakej.

⁹ Amo ximokajkayawan. ¿Amo ankimatij nik in tlakaj katlej kichiwaj tlan amo kuale, mach welis kalakiskej kan Dios tlanawatia? Noijki mach kalakiskej katlej momekatiaj maski tlanamiktiltin o noso amo tlanamiktiltin, katlej kin-weyikixtiaj in santojtin, tlakajtin katlej mosiwakuepaj iwan tlakajtin katlej kochij inwan yonmej katlej mosiwakuepaj, ¹⁰ katlej tlachtekij, katlej kinekij kipiaskej nochí tlan kitaj, katlej iwitkej, katlej tlawikaltijkej, iwan katlej kimoaxkatiaj itlaj tlamantle ika tlakajkayawalistle. Nochtín yonmej mach kalakiskej kan Dios tlanawatia. ¹¹ Sekimej de amejwan achtoj anyekaj ken yonmej tlajtlakolejkej. Pero axan Dios yoamechchipaj de amotlajtlakol iwan yoamechseladojkixtij para xichipawkanemikan inawak, iwan Dios amechita mach ok itlaj tlajtlakole ankipiaj. Dios ijkón okichij ika ipoder de yen itokatzin in toSeñor Jesucristo, iwan ika ipoder de yen iEspíritu in toTajtzin Dios.

Totlalnakayo moneki yetos chipawak inawak Dios

¹² Nochi san tlan nej niknekis welis nikchiwas. Pero mach nochí welis nechpalewis. Maski welis nikchiwas nochí san tlan nej niknekis, mach nikmokawilis itlaj tlajtlakole ma nechnawati. ¹³ Nochi tlakuale omochij para totlalax iwan totlalax omochij para kikuas in tlakuale, pero satepan Dios kipojpolos nochí yon ome tlamantle. Iwan totlalnakayo mach omochij para ika ma timomekatikan. Sino in totlalnakayo omochij para ma kichiwa tlan Dios kineki, iwan ika ipoder in Dios in totlalnakayo kipia nemilistle. ¹⁴ Iwan ijkón ken Dios okiyolitij in toSeñor Jesucristo, noijki in tejwan techyolitis ika ipoder.

¹⁵ ¿Amo ankimatij nik namotlalnakayo tlakitzkijtok itech itlalnakayo in Cristo? Tones, ¿kox kuale tla nimotemaktis (nimotemaktilis) inawak se siwatl katlej momekatia ika not-lalnakayo katlej tlakitzkijtok itech itlalnakayo in Cristo? Pues amo. ¹⁶ ¿Amo ankimatij namejwan nik se tlakatl nikuak motemaktia inawak se siwatl katlej momekatij, mochiwaj sa

se tlalnakatl? Porke in tiotlajkuilole kijta: “De omen mochiwa sa se tlalnakatl.” ¹⁷ Pero nikuak se tlakatl motemaktia inawak toSeñor, mochiwa sa se espíritu.

¹⁸ Por yonik, xikkawakan se lado de anmomekatiskej. Tla akaj kichiwa itlaj oksé tlamantle tlajtlakole, mach kijtlakoa itlalnakayo, pero akin momekatia kijtosneki inewian kitoktia ma tlajtlako itlalnakayo. ¹⁹ ¿Amo ankimatij namejwan nik namotlalnakayo mochijtok yen itiopan in Espíritu Santo? Dios oamechmakak iEspíritu Santo iwan chanti amotech. Por yonik kiné, namotlalnakayo mach amoaxka. ²⁰ Porke Dios sa tekitl patíoj nik oamechkoj. Por yonik moneki xikweyik-ixtikan in Dios ika namotlalnakayo iwan ika namoanima, porke namejwan anteaxkawan de Dios.

7

Kenik moneki yeskej katlej tlanamiktiltin

¹ Axan nej namechnankilis de yen tlan namejwan annecht-lajtlanjikej itech namoamatlajkuilol. Yetoskia kuale tla se tlakatl mach mosiwatis. ² Pero komo miekej san momekatiaj, tones kada se tlakatl ma mosiwati, iwan kada se siwatl ma mookichti. ³ In teokich moneki motemaktis (motemaktilis) inawak isiwa ken Dios kimonekiltia. Iwan tesiwa noiжиki moneki motemaktis inawak iokich ken Dios kimonekiltia. ⁴ Nijuak se siwatl kipia iokich, mach ok yen kinawatia itlalnakayo porke itlalnakayo ya iaxka iokich. Iwan noiжиki nijuak se tlakatl kipia isiwa, mach ok yen kinawatia itlalnakayo porke itlalnakayo ya iaxka isiwa. ⁵ Nijuak in teokich kineki yetos iwan isiwa, isiwa amo ma kijto amo, iwan noiжиki in tesiwa nijuak kineki yetos iwan iokich, iokich amo ma kijto amo. Pero tla san ken amomen anmotlaliskej san se tlajtote para amo anyeskej san sekan kanaj keski tonale iwan ankixkawiskej (onmechonmelis) anmotiotzajtziliskej, yon kuale kajki. Pero satepan moneki oksemi ximosetilikan para ijkón Satanás amo amehtotkis xitlajtlakokan por yen amo ankixikoskej anyeskej wejkawitl sejsen lado.

⁶ Yin tlan namechilwia mach kijtosneki namechnawatia ijkón xikchiwakan, pero welis ijkón ankichiwaskej tla ankinnekij. ⁷ Nej niknekiskia tla nochtin yenij ken nej iwan mach kipianij insiwa. Pero kada se de tejwan Dios otechchij titlatlamantin. Dios okinekke sekimej tlakaj ma kipiakan insiwa iwan sekimej siwamej ma kipiakan inmokich, iwan oksekimej Dios okinekke ma yekan insejselti.

⁸ Namejwan katlej mach ya ammonamiktiaj iwan namejwan katlej anviudajtin, nikneki namechilwis okachi kuale ximokawakan ken nej iwan amo ximonamiktikan. ⁹ Pero tla

amo ankixikoaj anyeskej amoselti, ximonamiktikan, porke okachi kuale ximonamiktikan para amo ximochichinojtine-mikan ika namoelewilis.

¹⁰ Pero nikpia se tlanawatile para namejwan katlej ant-lanamiktiltin. Yin tlanawatile mach de nej, sino de toSeñor. In tlanawatile kijta: in tesiba amo ma kikawa iokich. ¹¹ Pero tla se siwatl kikawa iokich, mach ok ma mookichti, o noso ma motlapojpolwi iwan iokich iwan oksemi iwan ma mosetili. Noiжи in tlakatl mach ma kikawa isiwa.

¹² Oksekimej nikneki ninkinmilwis se tlajtole katlej kisa de nej notlajtol iwan amo de toSeñor, tla se tokni kipia isiwa mach tlaneltokak iwan yon siwatl kineki iwan yetos, yon tokni mach ma kikawa yon siwatl. ¹³ Iwan tla se tokni siwatl kipia iokich mach tlaneltokak iwan yon iokich kineki iwan yetos, yon tokni siwatl mach ma kikawa yon iokich. ¹⁴ Porke in teokich katlej mach tlaneltokak, Dios kita kej ya chipawak de itlajtlakol porke omosetilij iwan isiwa tlaneltokak. Iwan tesiba katlej mach tlaneltokak, Dios kita kej ya chipawak de itlajtlakol porke omosetilij iwan iokich tlaneltokak. Tla amo ijkón yeni, namokonewan yeskia ken inkonewan katlej mach tlaneltokakej, pero axan Dios kinmita ya chipawakej de intlajtlakol. ¹⁵ Pero tla in teokich o noso in tesiba katlej mach tlaneltokak kineki tekawas, ma tekawa kiné. Tla ijkón kaj yon tlamanle, in tokni okichtle o noso siwatl katlej tlaneltokak amo ma kitlatlawti de amo ma wia katlej mach tlaneltokak. Porke in Dios kineki xiekan ika kuale. ¹⁶ Porke se siwatl katlej tlaneltokak, mach kimati kox welis kipalewis iokich para ma tlaneltoca iwan ma momakixti de itech itlajtlakol. Noiжи se tlakatl katlej tlaneltokak, mach kimati kox welis kipalewis isiwa para ma tlaneltoca iwan ma momakixti de itlajtlakol.

¹⁷ Kada se ma yeto ken toSeñor kineki ma yeto. Xiekan ken anyekaj nijuak opéj ankineltokaj in toTajtzin Dios. Ijkón ninkinmilwia in tiopantlaneltokakej ik nian nepa. ¹⁸ Tla akaj oyeka sirkunsidado nijuak Dios okinotzke, ijkón ma mokawa. Iwan tla akaj amo oyeka sirkunsidado nijuak Dios okinotzke, amo ma mosirkunsidaro. ¹⁹ Tla se yetos sirkunsidado o noso amo, mach yen yon katlej moneki, sino moneki ma se kichiwa tlan kijta itlanawatil in Dios. ²⁰ Kada se ma yeto ken oyeka nijuak opéj kineltoka in toTajtzin Dios. ²¹ Tla akaj oyeka kej tlanamakte nijuak opéj kineltoka in Dios, amo ma tlanemili. Pero tla kita nik welis momakixtis, ma momakixti para ayakmo ma yeto kej tlanamakte. ²² Porke akin oyeka kej tlanamakte nijuak opéj kineltoka in toSeñor, axan yon tlakatl yomakiske iwan mach ok kajki kej tlanamakte iwan ya kajki para kitekipanos in toSeñor. Ijkón noiжи, akin oyeka

mach tlanamakte niikuak opéj kineltoka in toSeñor, axan ya kajki kej tlanamakte katilej yokikoj in Cristo. ²³ Dios oamechkoj sa tekitl patíoj. Por yonik amo ximotekawilikan ma amechpiakan in tlakaj kej antlanamaktin. ²⁴ Ijkón kiné, nokniwan, kada se de amejwan ma yeto inawak Dios ijkón ken oyeka niikuak opéj kineltoka in toTajtzin Dios.

²⁵ In toSeñor mach nechmaka se tlanawatile para ma namechilwi namejwan katlej mach ya antlanamiktilltin. Pero nej namechilwis ken nej nikyejyekoa kuale para ijkón xikchiwakan, iwan welis annechneltokiliskej kej yeskia yen Dios amechilwia, porke Dios kipia weyi iteiknotlamachilis nonawak. ²⁶ Nej nikyejyekoa okachi kuale tla se tlakatl o noso se siwatl ma yeto ken axan kajki, porke tikatej itech tonaltin katlej sa tekitl owijtitok tlan tipanotokej. ²⁷ Tla tikpia mosiwa, amo xikkawa. Tla amo tikpia mosiwa, amo xiktemo. ²⁸ Tla timonamiktis, mach tlajtlakole. Iwan tla se ichpochtle monamiktia, noijki mach tlajtlakole. Pero katlej monamiktiaj okachi trabajojpanoskej itech innemilis, iwan nej niknekiskia mach ijkón ma panokan.

²⁹ Nokniwan, tlan nej nikneki namechilwis yen yin: Mach ok tiempo. Por yonik, katlej tlanamiktilltin ma yekan kej yeskia mach tlanamiktilltin para ma kitekipanokan in Dios.

³⁰ Katlej moyolkokoaj ma yekan kej yeskia kipiaj pakilstle, iwan katlej kipiaj pakilstle ma yekan kej yeskia moyolkokoaj. Iwan katlej tlakowaj, ma yekan kej yeskia mach inmaxka tlan kikowaj. ³¹ In tlakaj katlej kipiaj miek tlamantle ixko yin tlaltikpak, ma momachilikan kej yeskia mach itlaj kipiaj. Porke se tonale tlamis in tlaltikpak ika nochí tlan onkaj.

³² Nej niknekiskia amo ximotekipachokan por yen tlamantin de ixko yin tlaltikpak. Se katlej mach ya siwawaj (siwayej) motekipachoa para kitekipanos in toSeñor iwan para welis kipaktis. ³³ Pero se katlej ya siwawaj motekipachoa por yen tlamantin de ixko yin tlaltikpak iwan de kenik kipaktis isiwa. ³⁴ Tlatlamantle nik katej. Ijkón noijki, in siwatl katlej mach ya okichwaj iwan katlej mach keman omookichtij, parejo motekipachoa para kitekipanoskej in toSeñor iwan para moyolchipajtoskej itech intlalnakayo iwan ipan inmania. Pero in siwatl katlej okichwaj motekipachoa por yen tlamantin de ixko yin tlaltikpak iwan de kenik kipaktis iokich.

³⁵ Ijkón namechilwia se kuale para amejwan, mach por amo ximonamiktikan. Nikneki kuale xiekan iwan xiwelikan xiktekipanokan in toTajtzin Dios iwan amitlaj ma amechtzakuili.

³⁶ Tla se tetaj kipia se ichpoch, iwan kiyejyekoa ya ma monamikti porke ya chikawak, ma monamikti, mach tlajtlakole.

³⁷ Pero tla se tetaj kipia se ichpoch iwan kiyejyekoa amo ma monamikti, kichiwas kuale tla amo kinamiktis ichpoch, iwan kichiwas kuale tla kipixtos itech ikalijtik tla melawak yen yon yokisentlalij ipan iyolo in tetaj. ³⁸ Ijkón kiné, tla in tetaj kitemakas ichpoch ma monamikti, yon kuale. Pero tla amo kitemakas ma monamikti, yon okachi kuale.

³⁹ Se siwatl katlej tlanamiktile kinsetilijtok in tlanawatile iwan iokich mientras onkaj iokich. Pero tla iokich miki, in siwatl oksemi welis monamiktis san akin iwan yej kinekis. Pero ma monamikti iwan se katlej tlaneltokak. ⁴⁰ Pero nej nikijta tla yon viuda mach monamiktis okachi kipias pakilistle. Iwan nej nikyejyekoa nik in nej nikpia iEspíritu in toTatzin Dios katlej nechmaka yin tlajtole katlej namechilwia.

8

Tlakuale katlej kinmaniliaj in santojin

¹ Axan namechilwis de yen tlakuale katlej kinmaniliaj in santojin. Tejwan ya kuale tikmatij tlanon moneki tikchiwaskej itech yon tlamantle. Nijuak se tlakatl kiyejyekoa kuale kimomaka kuenta itlaj tlamantle, ika moweyineki. Pero se katlej kimati tetlasojtla, kinpalewia in tiopantlaneltokakej. ² Tla se tlakatl kiyejyekoa wel kimati miek, kijtosneki mach ya itlaj kimati ken moneki kimatis. ³ Pero tla se tlakatl melawak kitlasojtla in Dios, tonses in Dios kuale kixmati.

⁴ Iwan de yon tlakuale katlej kinmaniliaj in santojin, tejwan kuale tikmatij nik mach itlaj inpatij in yonmej santojin katlej sekimej kinmitaj kej indioswan. Porke tikmatij nik onkaj san se Dios. ⁵ Maski miekej tlakaj kijtaj nik katej miekej diosmej iwan miekej tekomej itech ilwikak iwan ixko yin tlaltikpak. ⁶ Pero tejwan tikmatij nik onkaj san se Dios, yen toPapan Dios katlej okijejyekoj ma yeto nochil tlan onkaj, iwan tejwan tikatej para tikchiwaskej tlan Yej kineki. Iwan onkaj san se Señor, yen toSeñor Jesucristo, katlej okichij nochil tlan onkaj iwan yen techmakatok tonemilis.

⁷ Pero mach nochtin kimati. Porke sekimej yomomatkej kineltokaj nik in santojin yolitokej, iwan kineltokaj nik in tlakuale katlej kinmaniliaj in santojin, kijtosneki kinmaniliaj katlej melawak diosmej. Por yonik nijuak kikuaj in tlakuale katlej kinmaniliaj in santojin, kimachiliaj ipan in-yolo yotlajtlakojkej, porke mach chijchikawakej itech intlaneltokalis. ⁸ In tlakuale mach techpalewia para ma tiekan okachi kuale inawak Dios. Tla amo tikkwaskej mach timochiwaskej okachi tikualemej, iwan tla tikkwaskej mach timochiwaskej okachi mach tikualemej. ⁹ Pero xikpiakan kuidado de amo ankichiwaskej de ma wetzikan ipan tlajtlakole katlej

mach chijchikawakej itech intlaneltokalis. ¹⁰ Porke tla tej, katlej tikmati mach mitzijtlakos in yon tlakuale, timotlalis titlakuas kan kikuaj in tlamanale katlej okinmanilijkej in santojtin, iwan tla mitzitas se tokni katlej mach chikawak itech itlaneltokalis, ikuakón yej noijki walmixewis kikuas yon tlakuale katlej okimanilijkej in santojtin. ¹¹ Iwan ijkón, in tej por okachi tikmati tlan tikchiwa, welis tikijtlakos in mokni katlej mach chikawak itech itlaneltokalis, katlej Cristo noijki omikke por yej. ¹² Iwan nikuak tikchiwa se mokni ma wetzi ipan tlajtlakole, tikijtlakolia iyolo. Porke tiktktia ma kichiwa se tlamantle tlan yej kimati ipan iyolo mach kuale, iwan tej noijki titlajtlakoa inawak Cristo. ¹³ Por yonik, tla nej nikchiwa se nokni ma wetzi ipan tlajtlakole por yen tlan nikua, okachi kuale mach ok keman nikuaas nakatl, para amo niktoktis ma wetzi ipan tlajtlakole se nokni.

9

Katlej welis kichiwas se tlatitlanile

¹ Nej welis nikchiwas san tlan nej niknekis. Nej niitlatitlanil in Dios. Nej onikitak in toSeñor Jesú. Namejwan antlaneltokakej por yen tekitl katlej onikchij entre namejwan para yen toSeñor. ² Tla sekimej kijtaj mach melawak nitlatitlanile, namejwan kuale ankimatij nik melawak. Nej onamechmatiltij itlajtol in Dios iwan namejwan ankineltokakej, iwan ika yon namejwan ankiteititiaj nik melawak nitlatitlanile.

³ Tla akaj amo kiwelita tlan nikchiwa, nikneki nikilwis ijkín.

⁴ Nej notech powi para nikresibiros tlan nechmakaskej para nikuaas iwan nikonis, ⁵ iwan noijki notech powi de nikpias se nosiwa tlaneltokak, ijkón ken oksekimej tlatitlaniltin kinpiaj insiwawan, iwan noijki ken ikniwan in toSeñor Jesú kipiaj insiwawan, iwan noijki ken Pedro kipia isiwa. ⁶ ¿Kox san yen nej iwan Bernabé kipiaj de timotlatlaniliskej para titlakuaskej iwan amitlaj ma techmakakan in tokniwan?

⁷ ¿Kox onkaj soldado katlej kipia de motlatlanilis oksekan para tlakuas? ¿Kox onkaj akaj tlakatl katlej kitooka uvas iwan amo ma kikua? ¿Kox onkaj akaj tlajpixke iwan amo ma koni leche nikuak kintlapatzkilia intentzonwan? ⁸ Iwan amo xikyejyekokan ke yin tlan namechilwia san nej ijkón nikyejyekoa, porke itlanawatil in Moisés noijki ijkón kijta.

⁹ Itech itlanawatil in Moisés kijta: "Xikkawili in toro ma kikua in sebada nikuak ipan tlajtlaksa para kooya." Iwan yon tlan kijta amo kijtosneki in Dios motekipachoa por yen toro. ¹⁰ Sino Dios motekipachoa por tejwan. Porke in tlanawatile omikuiloj para tejwan. Katlej tlaxawa iwan katlej pixka, parejo kichiaj kipiaskej in tlakilotl katlej kintokaroa. ¹¹ Ijkón

kiné, tla tejwan otiktookakej amotech sekin semiya de itlajtol in Dios, ¿amo welis noijki tikpiaskej de amejwan sekin tlan ika timopanoltiskej? ¹² Tla oksekimej tlamachtijkej intech powi kiresibiroaj de amejwan tlan ika mohanoltiaj, tejwan asta okachi totech powi.

Pero tejwan mach ijkón tikchiwaj maski totech powi, iwan tejwan tixxikojtiwitzej nochi tlan tipanotiwitzej para amo tiktzakuiliskej in kuale tlajtole katlej temakixtia de Cristo. ¹³ Namejwan kuale ankimatiq ke katlej kitekipanoaj in Dios itech itiopan, kikuaj in tlakuale katlej kitemakaj in tlakaj para Dios. Iwan noijki katlej kitekipanoaj in Dios itech artal, kikuaj tlan ompa kitlaliaj itech artal. ¹⁴ Ijkón noijki, in toSeñor otlanawatij ke katlej kitematiltiaj in kuale tlajtole katlej temakixtia, moneki de ompa kisas tlan ika mohanoltiskej por yen yon tekitl katlej kichiwaj. ¹⁵ Pero nej mach keman ijkón nikchiwa, maski notech powi para nikchiwas. Iwan nion mach namechijkuilia yin tlajtole para namejwan itlaj xinechmakakan. Okachi kuale ma nimiki antes de annechkixtiliskej yin noweyinekilis katlej nikpia.

¹⁶ Mach nimoweyineki por niktematiltia in kuale tlajtole katlej temakixtia, porke nej yipa onechnawatijkej ma niktematilti. ¡Pobre de nej tla amo niktematiltis in kuale tlajtole katlej temakixtia! ¹⁷ Por yonik, tla nikchiwas ika nopakilis, Dios nechmakas notlaxtlawil. Pero tla nikchiwas san afuersa iwan amo ika nopakilis, yipa kipia de nikchiwas porke Dios ijkón onechnawatij. ¹⁸ Toneses, ¿katlij yen notlaxtlawil? Notlaxtlawil yen pakistle katlej nikpia nijuak niktematiltia in kuale tlajtole katlej temakixtia iwan mach niktlani. Iwan maski notech powi para nikresibiros tlan ika nimopanoltis, mach keman ijkón nikchiwa.

¹⁹ Maski nej mach akaj onechkoj para ma niktekipano, nej nikaj kej nitekipanoj de nochtin in tlakaj para welis nikinpalewis okachi miekej ma yekan para Cristo. ²⁰ Nijuak nikaj inwan judiojtin nimochiwa noijki kej nijudío para welis nikintlaneltokitis de itlajtol in Dios. Kijtosneki para welis nikintlaneltokitis katlej kichiwaj tlan kijta itlanawatil in Moisés, nej noijki nikchiwa tlan kijta in yon tlanawatile nijuak inwan nikaj, maski nej mach nechnawatia yon tlanawatile de Moisés. ²¹ Nijuak nikaj inwan katlej mach kipiaj itlanawatil in Moisés, nimochiwa noijki ken yejwan para welis nikintlaneltokitis de itlajtol in Dios. Ika yon, amo kijtosneki ke mach niktlakita itlanawatil in Dios, porke nej melawak niktlakita itlanawatil in Cristo. ²² Nijuak nikaj inwan katlej mach chijchikawakej itech intlaneltokalis, nimochiwa noijki ken yejwan para welis noijki nikintlaneltokitis de itlajtol in Dios. Kijtosneki nimochiwa ijkón ken katej

nochtin. Nimochiwa ken yejwan para welis nikinpalewis ma momakixtikan sekimej inawak Cristo. ²³ Ijkón nikchiwa para miekej ma welikan ma kikakikan in kuale tlajtole katlej temakixtia, para welis nikajsis nej noijki in tlatiochiwalistle katlej kitemaka in yon tlajtole.

²⁴ Namejwan ankimatij ke nikuak motlanij in tlakaj nikuak motlaloaj, miekej kinekij tlatlaniskej, pero san se katlej tlatlani iwan kimakaj itlatliokolil. Namejwan noijki moneki ximotlalokan iwan xiktlanikan in tlatliokolile katlej Dios kineki amechmakas. ²⁵ Katlej momachtiaj para mawiltiskej itech se awile, kikawaj se lado nochti tlan welis kinmijtlakos, para welis kitlaniskej se korona tlachiwale de xiwitl katlej ni-man piliwi. Pero tejwan tiknekij tiktlaniskej se korona katlej mach keman ijtlakawis. ²⁶ Nej mach san tekitl nimotlaloa kej yeskia mach nikmati kan niawi. Mach nitemaga kej yeskia nikmomaga iwan ejekatl. ²⁷ Sino, nej niktlajyowiltia notlannakayo iwan niktoktia ma nechtlakita, porke nimomawtia tla nej yonikinmachtij oksekimej de itlajtol in Dios, iwan sejpa yej nej ma nikpolo iwan amo ma niktlani notlatliokolil.

10

Amo se ma kinweyikixti in santojtin

¹ Nokniwan, nikneki xikmatikan nik in ya wejkawitl towey-itajwan onejnenkej itlampa se mixtle, iwan nochtin opanokej ijlik mar katlej itoka Chichiltik. ² Ijkón nochtin yejwan omokuateekijkej ika yon mixtle iwan ika yon atl de yen mar, iwan nochtin omochijkej imomachtijkawan in Moisés katlej oyeka kej intlayekanke. ³ Iwan nochtin okikuajkej san se tlakuale katlej Dios okinmakak de ilwikak. ⁴ Iwan nochtin okonikej san se atl katlej Dios okinmakak katlej okiske de itech se tetl. Iwan yon tetl kijtosneki yen Cristo katlej ompa inwan oyaya. ⁵ Maski Dios okintiochiwaya miek, Dios mach okiwelitak tlan okichijkej miekej de yejwan, iwan por yonik omikkej kan tlawaki.

⁶ Nochi yon tlan otlamochij techititia amo ma tiknekikan ma tikchiwakan tlan amo kuale, ken yejwan okinekej okichijkej. ⁷ Por yonik, amo ma tikinweyikixtikan in santojtin ken sekimej de yejwan okichijkej, ken kijta in tiotlajkuilole: "In tlakaj omotlalijkej tlakuajkej iwan otlawankej, iwan satepan omoketzkej opéj mijtotiaj ixpan se santo tlachiwale." ⁸ Amo ma timomekatikan ken sekimej de yejwan omomekatijkej, iwan san se tonale omikkej senpoale iwan eyi mil tlakaj. ⁹ Amo ma tikchiwakan itlaj tlamantle mach kuale san para titikaskej kox melawak in Dios techtlajyowiltis ken sekimej de yejwan ijkón okichijkej, iwan okoawilokej iwan omikkej.

10 Nion amo ma tikixnamikikan in Dios ken sekimej de yejwan okixnamikej, iwan por yonik in Dios okititlanke iángel para ma kinmiki.

11 Nochi yin tlamantle opanokej in ya wejkawitl toweyitajwan, iwan omikuiloj itech tiotlajkuilole kej se ejemplo para amo no ijkón tikchiwaskej, tejwan katlej tikatej itech yinmej sa iyakatlanka tonaltin. 12 Ijkón kiné, akin kiyeyekoa kuale moyekketok itech itlaneltokalis, ma kipia kuidado de amo wetzis ipan tlajtlakole. 13 Nijuak in Amo Kuale Tlakatl amechyoltilana para xitlajtlakokan, kuale xikmatikan noijski nik ijkón panoaj nochtin. Pero namejwan xiktlalikan namoyolo inawak Dios, porke Yej mach amechtekawilis ma amechyoltilana in tlajtlakole asta kan mach ok ankixikoaj. Sino, Dios amechpalewis para ximakisakan iwan amo xitlajtlakolchiwakan, para ijkón welis ankixikoskej.

14 Por yonik, namejwan notetlasojkaikniwan, xikinkawakan se lado in santojin iwan amo xikinweiyik-ixtikan. 15 Nej namechtlapowia kej antlakaj katlej kuale ankimomakaj kuenta. Iwan namejwan xikyejyekokan kox kuale o noso amo kuale tlan nemechilwia. 16 Nijuak tejwan tiktajtlaniliaj in Dios ma kitiochiwa in kopa itech in tiotlakantlakuale de toSeñor, iwan nijuak tikonij in vino, tiknextiaj nik tikatej san sekan iwan Cristo porke okinokij ieso por tejwan itech krus. Iwan nijuak tikpojpostekij in pan iwan tikuaj, tiknextiaj nik tikatej san sekan iwan Cristo porke okitemakak itlalnakayo nijuak omikke por tejwan. 17 Maski yon pan welis mochiwas miek pedaso, motlantok san se pan. Iwan tejwan maski timiekej, timochiwaj san se tlalnakatl porke tinochtin tikuaj san se pan.

18 Xikinmitakan in judiojin. Yejwan kikuaj in tlakuale katlej kimanaj ipan artal, yon kej yeskia mosetiliaj iwan Dios por yen yon tlamanale katlej kikuaj. 19 Yon tlan namechilwia amo kijtosneki nik in santojin itlaj inpatij, nion yen tlakuale katlej kinmaniliaj. 20 Sino nej nikneki namechilwis nik in tlakaj katlej mach kixmatij Dios, nijuak kimanaj tlamanale ipan inmortal, mach yen Dios kimaniliaj, sino yen demoniojin. Iwan nej mach nikneki ximosetilikan inwan demoniojin. 21 Mach welis ankoniskej itech ikopa in toSeñor iwan noijski ankoniskej itech inkopa in demoniojin. Nion mach welis antlakuaskej itech imesa in toSeñor iwan noijski antlakuaskej itech inmesa in demoniojin. 22 Amo xikchiwakan itlaj tlan ika welis ankitoktiskej ma chawati in toTajzin Dios, porke Yej okachi kipia poder iwan mach ken tejwan.

Ma tikinpalewikan katlej mach ya chijchikawakej itech intlaneltokalis

²³ Melawak nik nochi san tlan tejwan tiknekiskej welis tikchiwaskej. Pero mach nochi welis techpalewis. Nochi san tlan tejwan tiknekiskej welis tikchiwaskej, pero mach nochi techpalewis ma timoskaltikan itech totlaneltokalis. ²⁴ Amo ma tiktemokan tlan kuale san para tejwan, sino noijki ma tiktemokan tlan kuale para oksekimej.

²⁵ Namejwan welis ankikuaskej nochi tlamantle nakatl katlej kinamakaj tiankisko iwan amo xitlajtlanikan kox okimanilikaj akaj santo o noso amo, para amo xikmatikan. ²⁶ Porke nochi tlan onkaj ixko yin tlaltikpak, iaxka in toSeñor.

²⁷ Tla akaj katlej mach kineltoka Dios iwan mitznotza xitlakuati ichan, iwan tej tikneki tias, tej xikua nochi tlan mitzmakas, iwan amo xitlajtlani kox yon tlakuale okimanilikaj akaj santo o noso amo, para amitlaj xikmati. ²⁸ Pero tla akaj mitzilwis: “Yin nakatl okinmanilikaj in santojtin”, tonses amo xikua para amo xikijtlakoli itlaneltokalis akin ijkón mitzilwia, iwan ijkón yej mach kiyeyekos nik mach kuale tlan tikchiwa. Porke nochi tlan onkaj ixko yin tlaltikpak, iaxka in toSeñor. ²⁹ Yin tlan nikijta, nikijta de yen itlayeheyekolis in oksé tlakatl, amo de yen namejwan amotlayeheyekolis.

Pero akaj welis kijtos: “¿Tlanik amo welis nikchiwas san tlan nej niknekis san por yen itlayeheyekolis de oksé tlakatl?

³⁰ Tla nej nimotlasojkamati inawak Dios por tlan nikua, tonses, ¿tlanik ok kijtoskej nik mach kuale tlan nikchiwa?”

³¹ Tla namejwan antlakuaj, o noso ankonij, o noso ankichiwaj itlaj oksé tlamantle, xikchiwakan nochi para in tlakaj ma kiweyikixtikan in toTajtzin Dios por tlan namejwan ankichiwaj. ³² Amitlaj xikchiwakan tlan ika ankitoktiskej ma wetzi ipan tlajtlakole se judío, o noso se katlej mach judío, o noso se katlej tlaneltoka inawak Dios. ³³ Nej nikneki nikchiwas nochi tlamantle tlan kuale para nochtin oksekimej. Mach nikneki nikchiwas tlan kuale san para yen nej, sino noijki para yen oksekimej, para ma momakixtikan.

11

¹ Namejwan xikchiwakan ken nej nikchiwa porke nej nikchiwa ken Cristo okichij.

Kenik moneki yeskej in siwamej itech tiopan

² Nokniwan, sa tekitl nipaki porke nochipa annechelnamikij iwan ankichijtokej tlan nej onamechmachtij. ³ Pero nej nikneki xikmomakakan kuenta nik in Cristo yen tzontekomatl de yen tlakajtin, iwan teokich yen tzontekomatl de yen isiwa, ijkón ken Dios yen tzontekomatl de yen Cristo. ⁴ Tla se tlakatl mokuatzakua nikuak motiotzajtzilia tiopan o noso nikuak kijta itlaj tlajtole katlej Dios okimakak, kijtosneki

mach kitlakita in Cristo. ⁵ Pero tla se siwatl mach mokuatzakua níjkuak motiotzajtzilia o noso ijkua kijta itlaj tlajtote katlej Dios okimakak, kijtosneki mach kitlakita iokich, yon kej yeskia omoxinke. ⁶ Tla se siwatl amo mokuatzakua, tones okachi kuale ma kimoximili nochi itzonkal. Pero tla pinawa kimoximilis nochi itzonkal o noso mokuatetexximas (mokuamelonximas), tones moneki mokuatzakuas. ⁷ In tlakatl mach moneki mokuatzakuas, porke in tlakatl yen motlachialtia ken Dios ik tlachixtok iwan kiteititia imawisotlanex in Dios. Pero in siwatl kiteititia imawisotlanex in tlakatl. ⁸ Porke níjkuak in Dios okichij in tlakatl, mach okikixtij de itech siwatl, sino yen siwatl okikixtij de itech in tlakatl. ⁹ Dios mach okichij in tlakatl para ma kipalewi in siwatl, sino in Dios okichij in siwatl para ma kipalewi in tlakatl. ¹⁰ Por yonik in siwatl moneki kipias ipan itzontekon se señas para ma kitakan in angelestín nik yen okichtle katlej tlanawatia. ¹¹ Pero tejwan katlej tipowij inawak toSeñor, in okichtle mach welis yetos tla amo iwan siwatl, nion in siwatl mach welis yetos tla amo iwan okichtle. ¹² Porke ijkón ken siwatl okikixtijkej de itech in tlakatl, ijkón noijklí axan in tlakatl tlakati de itech in siwatl. Pero yen Dios katlej okichij nochi tlamantle iwan ijkón okitlalij ma yeto.

¹³ Namejwan amonewian xikyejyekokan kox kuale tla se siwatl motiotzajtzilis inawak Dios iwan amo mokuatzakuas.

¹⁴ Namejwan ankimatij nik tepinatij tla se tlakatl yetos tzonkalweweyak. ¹⁵ Pero níjkuak se siwatl kipia itzonkal weweyak, sa tekitl kuakualtzin mota, porke Dios okimakak itzonkal weweyak para ika ma kuatzako. ¹⁶ Tla akaj amo kiwelita iwan kineki itlaj kijtos de tlan nikijta, ma kimati ke

tejwan kan titlamachtijtinemij, in siwamej mokuatzakuaj níjkuak motiotzajtziliaj o noso níjkuak kijtaj itlaj tlajtole katlej Dios kinmaka níjkuak mololoaj. Iwan nochtin oksekimej tiopantlaneltokakej no ijkón kichiwaj.

Kenik moneki se kikuas in tiotlakantlakuale de toSeñor

¹⁷ Pero axan tlan namechilwis, mach welis namechweiyikixtis por tlan ankichiwaj. Porke nesi kej níjkuak anmololoaj mach itlaj amechpalewia, sino yej okachi anmijtlakawij.

¹⁸ Porke onikmatke ke níjkuak anmololoaj tiopan, mach san se tlan ankiyejyekoaj, iwan kanaj nej nikneltoka. ¹⁹ Iwan yipa yeskej tlakaj katlej mach yeskej san se tlajtole inwan oksekimej para ijkón momatis akin melawak kineltoka in Dios.

²⁰ Porke tla amo san se tlan ankiyejyekoaj níjkuak anmololoaj tiopan, mach ok melawak anmololoaj para ankikuaskej in tiotlakantlakuale de toSeñor. ²¹ Porke níjkuak antlakuaj, kada se san niman pewa tlakua iwan amo ankinchiaj in oksekimej. Sekimej mokawaj tiosijtokej, iwan mientras oksekimej asta

moiwintiaj. ²² ¿Amo ankipiaj amochan kan welis antlakuaskej iwan antlaoniskej? Ijkón ken ankichiwaj, namejwan ankinpinatiaj in tlaneltokakej de Dios, iwan ankinpinatiaj katlej mach kipiaj tlan kikuaskej. ¿Tlanon welis namechilwis? ¿Namechweyikixtis por tlan ankichiwaj? ¡Amo! Mach welis namechweyikixtis.

Tiotlakantlakuale de toSeñor

(Mt. 26:26-29; Mr. 14:22-25; Lc. 22:14-20)

²³ Nej onamechmachtij de tlan toSeñor noijki onechmachtij. Nekáj yuak nijuak in toSeñor Jesús okitemaktijkej (okitemaktilijkej) inmak in soldadojtin, in toSeñor Jesús okitilanke in pan, ²⁴ iwan satepan de omotlasojkamatke inawak Dios, okipojpostekke iwan okijtoj: “Xikkuakan yin pan. Yin yen notlalnakayo katlej niktemaka para mikis por amejwan. Xikchiwakan yin tlamantle para ika xinechelnamikikan.” ²⁵ Ijkón noijki, satepan de otlakuajkej, okitilanke in kopa iwan okijtoj: “Yin vino yen noeso katlej toyawis iwan ika nikchiwas se yankuik akuerdo por amejwan. Nijuak ankoniskej, xikchiwakan para xikelnamikikan nik onimikke por amejwan.” ²⁶ Nochipa nijuak ankikuaskej in pan iwan ankoniskej in vino itech tiotlakantlakuale de toSeñor, kijtosneki ankitematiltijokey nik in toSeñor omikke por amejwan asta ikuak oksemi ma walmokuepa.

Kenik moneki se kikuas in tiotlakantlakuale de toSeñor

²⁷ Iwan tla se kikuas in yon pan iwan konis in yon vino de ikopa in toSeñor iwan amo kichiwas ken moneki, kichiwa tlatlakole ika itlalnakayo iwan ika ieso in toSeñor iwan kimawispoloa. ²⁸ Por yonik, moneki achtoj ma se motlajtlani kox kuale kajki inawak Dios antes de kikuas yon pan iwan konis in vino de yon kopa ken moneki. ²⁹ Porke tla se kikuas iwan konis in tiotlakantlakuale de toSeñor iwan amo kimomaka kuenta nik yon kijtosneki yen itlalnakayo in toSeñor katlej omikke por tejwan, Dios kitlajyowiltis, porke amo kikua yon pan iwan koni yon vino ken moneki. ³⁰ Por yonik, miekej de namejwan mach anchijchikawakej iwan anmokokoaj, iwan sekimej asta yomikkej. ³¹ Pero tla tejwan achtoj timotlajtlaniskej kox kuale tikatej inawak Dios o noso amo, Dios mach techtajyowiltis. ³² Pero nijuak tikpiaj tlajtlakole, in toSeñor techtajyowiltia, para amo ma tiwian tliko kan yaskej katlej mach kineltokaj in Dios.

³³ Ijkón kiné, nokniwan, nijuak anmololoskej para ankikuaskej in tiotlakantlakuale de toSeñor, ximochiakan se iwan oksé para ansepantlakuaskej. ³⁴ Tla akaj sa tekitl tiojsiwi, ma tlakuajtewa ichan, para amo xitlajtlakokan nijuak anmololoskej, iwan ijkón Dios amo

ma amechtlajyowilti. Oksekin tlamantle nikyektlalis nijuak nias namechitati.

12

Ipoder in Espíritu Santo katlej techmaka

¹ Nokniwan, nikneki namechilwis de yen poder katlej techmaka in Espíritu Santo. Porke nikneki namejwan xikmatikan de yon tlamantle.

² Namejwan kuale ankimatij ke nijuak ayamo ankinel-tokayaj in Cristo, oamechkajkayawa in Amo Kuale Tlakatl para xikinweyikixtikan in santojin katlej mach tlapoaj. ³ Por yonik, nikneki kuale xikmatikan ke katlej tlapoaj ika ipoder in Espíritu Santo mach welis kijtoskej itlaj biero de Jesús. Iwan mach akaj welis kijtos: “Jesús yen toSeñor” tla amo tlapoia ika ipoder in Espíritu Santo.

⁴ Onkaj miek tlatlamantle poder katlej Dios techmaka para ma tiktekipanokan. Pero san se Espíritu Santo katlej techmajmaka. ⁵ Onkaj miek tlatlamantle tekitl katlej ika tiktekipanoaj in toTajtzin Dios, pero onkaj san se toSeñor katlej tiktekipanoaj. ⁶ Iwan onkaj tlatlamantle de kenik se welis kichiwas in tekitl, pero onkaj san se Dios katlej kintekipanoltia itekipanojkawan ika ipoder itech nochitlan kichiwaj. ⁷ In Espíritu Santo moteititia itech kada se tlaneltokak para kinpalewis nochtin in tiopantlaneltokakej.

⁸ Sekimej tlaneltokakej in Espíritu Santo kinmaka poder para ma welikan ma tlapoakan ika ixtlamachistle, iwan oksekimej in Espíritu Santo kinmaka poder para ma kitem-tiltikan sekin tlajtole de toTajtzin Dios katlej okachi owijtitok. ⁹ Oksekimej tlaneltokakej in Espíritu Santo kinmaka poder para chikawak ma tlaneltokakan inawak Dios, iwan oksekimej in Espíritu Santo kinmaka poder para ma welikan ma kinpajtikan in kokoxkej. ¹⁰ Sekimej tlaneltokakej in Espíritu Santo kinmaka poder para ma kinchiwakan milagrostin, iwan oksekimej para ma welikan ma kijtowan itlaj tlajtole katlej Dios kinmaka. Sekimej tlaneltokakej in Espíritu Santo kinmaka poder para ma kimomakakan kuenta kox se tlaoa ika ipoder in Espíritu Santo o noso ika inpoder in ejekamej mach kualtin. Oksekimej tlaneltokakej in Espíritu Santo kinmaka poder para ma welikan ma kitomakan tlan se kijta ika yon tlajtole katlej mach ika se tlaoa.

¹¹ Pero onkaj san se Espíritu Santo katlej kichiwa nochitlan tlamantle iwan kinmajmaka kada se tlaneltokak ipoder ken Yej kineki kinmakas.

Nochtin in tlaneltokakej mochiwaj san se tlalnakatl

¹² Cristo kajki kej itlalnakayo se tlakatl iwan maski kipia miek partes itlalnakayo, san se tlalnakatl mochijtok. Tejwan no ijkón tikatej. Maski tikatej timiekej katlej tikeneltokaj in Cristo, tinochtin timochijtokej san se tlalnakatl. ¹³ Porke tinochtin tejwan, kox tijudiojtin o noso amo tijudiojtin, kox tikatej kej titlanamaktin inawak se toteko o noso amo, tinochtin otimokuateekijkej san ika se Espíritu, para ma timochijtowan san se tlalnakatl, iwan tinochtin otikresibirojkej san se Espíritu.

¹⁴ Itlalnakayo se tlakatl mach kipia san se parte, sino kipia miek partes. ¹⁵ Iwan tla ikxi se tlakatl weliskia kijtoani: “Nej mach niima iwan por yonik mach nipowi itech itlalnakayo”, maski ijkón kijtoani, yej yipa powi itech itlalnakayo in tlakatl. ¹⁶ O noso tla inakas kijtoani: “Nej mach niixtololo iwan por yonik mach nipowi itech itlalnakayo”, maski ijkón kijtoani, yej yipa powi itech itlalnakayo in tlakatl. ¹⁷ Tla itlalnakayo se tlakatl kipiani san noch ixtololo, tonses, ¿kenik tlakakini? O noso tla kipiani san noch inakas, tonses, ¿kenik tlajnekuini? ¹⁸ Pero Dios okitlalij kada se parte itech totlalnakayo kan Yej okinekke. ¹⁹ Tla se tlakatl kipiani san noch ikxiwan, tonses, mach motani kej yeskia kipia itlalnakayo. ²⁰ Pero maski axan katej miekej partes itech totlalnakayo, nochtin yonmej partes motlantok san se tlalnakatl.

²¹ Ixtololo se tlakatl mach welis kilwis ima: “Mach nimitzneki”, nion itzontekon mach welis kilwis ikxiwan: “Mach namechneki.” ²² Sino se kinneki nochtin partes katlej tikpiaj itech totlalnakayo, iwan partes katlej motaj mach chijchikawakej ken oksekimej, yejwan yonmej katlej okachi monekij. ²³ Iwan partes de itech totlalnakayo katlej tikinmitaj mach okachi itlaj inpatij, yejwan okachi tikinyektlakentiaj. Iwan partes de itech totlalnakayo katlej mach moneki tikinnextiskej, yonmej tikintlakentiaj okachi ika kuidado. ²⁴ Iwan partes de itech totlalnakayo katlej weli tikinnextiaj, mach moneki tikintlakentiskej okachi kuale. Pero Dios ijkón nik okichij in totlalnakayo para okachi kuale ma tikinweyimatikan in partes katlej tejwan tikinmitaj kej mach okachi itlaj inpatij. ²⁵ Dios ijkón okichij para amo ma moxexelokan in partes de totlalnakayo, sino kada se parte de totlalnakayo moneki ma motekipacho para ma kinpalewi in oksekimej. ²⁶ Tla se parte de totlalnakayo tlajyowia, nochtin in oksekimej partes noijki tlajyowiaj. Iwan nijuak se parte de totlalnakayo kiresibiroa tetlakitalistle, nochtin oksekimej partes noijki pakij.

²⁷ Ijkón kiné, namejwan ankatej kej itlalnakayo in Cristo, iwan kada se de amejwan anpowij se parte de itech itlal-

nakayo. ²⁸ Dios okintlalij tlatlamantin tlaneltokakej itech tiopan para ma kitekipanokan. Achtoj okintlalij in tlatitlaniltin. Nompa, okintlalij katlej kijtaj itlaj tlajtole katlej Dios kinmilwia. Nompa, okintlalij katlej tlamachtijkej. Noijki okintlalij katlej kinchiwaj milagrostin. Noijki okintlalij katlej kinpajtiaj kokoxkej, noijki katlej tlapalewiaj, iwan katlej tlayekankej, iwan katlej kipiaj poder para tlapoaj ika oksé tlajtole katlej mach ika tlapoaj. ²⁹ Xikmomakakan kuenta, kiné, mach nochtin welij kichiwaj in tekitl de tlatitlaniltin. Dios mach nochtin kinmaka itlaj tlajtole para ma kijtokan. Mach nochtin welij tlamachtiaj. Mach nochtin welij kinchiwaj milagrostin. ³⁰ Mach nochtin kipiaj poder para welis kinpajtiskej kokoxkej. Mach nochtin kipiaj poder para welis tlapoaskej ika oksé tlajtole katlej mach ika tlapoaj. Nion mach nochtin welij kitomaj tlan kijtosneki yon tlajtole. ³¹ Pero namejwan okachi xiknekikan ma Dios amechmaka ipoder katlej okachi kuale kinpalewis in tlaneltokakej. Iwan axan namechnextilis se ojtle katlej okachi kuale de nochtin, katlej amechpalewis okachi.

13

In tlasoctlalistle yen okachi kuale

¹ Tla nej nikpiani poder para nitlajtoani de nochtin tlajtoltin katlej ika tlapoaj nochtin in tlaltikpaktlakaj, iwan noijki ika intlajtol in angelestин, iwan tla amo nitetlasoctl, tonses nieni san kej se tambora katlej san tijtkuini o noso kej se platillo katlej san chajchalani. ² Tla nikpiani poder para nikijtos itlaj tlajtole katlej Dios nechmaka ma nikijto, iwan tla nikmomakani kuenta de nochti tlamantle de Dios katlej mach akaj kimati, iwan tla nikmatini nochti ixtlamachilistle de Dios, iwan tla nikpiani miek tlaneltokalistle iwan asta welini nikinmijkuani in tepemej, iwan tla amo nitetlasoctl, tonses mach itlaj nopatij. ³ Tla niktemakani nochti tlan nikpia para ika nikintlamakani in pobrestin, iwan tla niktemakani asta notlalnakayo para ma kichichinokan, iwan tla amo nitetlasoctl, tonses nochti yon tlamantle mach itlaj nechpalewiani.

⁴ Akin tetlasoctl, kimati kinxikoa in oksekimej katlej kichiwilaj tlan amo kuale, iwan kimati kinchiwilia tlan kuale. Akin tetlasoctl, amo kimati moxikoa intech oksekimej, iwan amo kiyejyekoa ke mach onkaj oksé ken yej, iwan nion amo moweyineki. ⁵ Akin tetlasoctl, mach kitechiwilia itlaj tlan amo kuale iwan amo tzotzokatl. Amo niman kualani iwan nion mach sa kelnamiktok nijuak itlaj kitoktiaj tlan amo

kuale. ⁶ Akin tetlasojtla, mach kipaktia nijuak akaj kitetoktia itlaj mach kuale, sino yej kipaktia nijuak akaj kichiwaj itlaj tlan melawak. ⁷ Akin tetlasojtla, kimati kixikoa nochin tlajyowilistle tlan panoa, kineltoka nochin tlan kuale tlan oksekimej kichiwaj, kichia ma mochiwa tlan kuale intech oksekimej, iwan kixikoa nochin tlan panoa.

⁸ In tlasojtlalistle mach keman tlamic. Ajsis tonale nijuak mach ok akaj kijtos itlaj tlajtole katlej Dios kitemaka, mach ok akaj tlapoas ika oksé tlajtole katlej mach ika se tlapoa, iwan nion mach ok yetos ixtlamachilistle katlej Dios kitemaka. ⁹ Axan mach miek tlan tikmatij, iwan nijuak Dios kitemaka itlaj tlajtole para ma se kinmilwi in oksekimej, kitemaka san se tzikitzin. ¹⁰ Pero nijuak witz katlej sa tekitl kuale ken Dios okitlalij ma yeto, ikuakón mach ok yetos katlej axan mach miek tlan tikmatij.

¹¹ Nijuak nej onieka nichokotzin, onitlapoaya, onikye-yekoaya iwan onikmomakaya kuenta ken se chokotzin. Pero axan como ya niweyi tlakatl, yonikkaj yon tlamantle ken katlej kichiwa se chokotzin. ¹² Tejwan axan no ijkón tikatej, kej yeskia tikitaj in Dios itech se teskatl kan tlatleyua. Pero satepan nijuak Yej witz, timoixtlataskej Iwan. Axan mach miek tlan tikmatij, pero nijuak Yej witz ikuakón nikmatis nochin tlamantle inawak Dios, ijkón ken Dios axan kuale kimati de nej. ¹³ Ijkón kiné, onkaj eyi tlamantle katlej moneki tikchiwaskej. Moneki tikneltokaskej in toSeñor, moneki tikchiaskej ma pano nochin tlan Dios kijta panos, iwan moneki ma titetlasojtlakan. Pero katlej okachi moneki tikchiwaskej de yinmej eyin tlamantin, moneki yen ma titetlasojtlakan.

14

Nijuak se tlapoa ika oksé tlajtole katlej mach keman ika se tlapoa

¹ Xikchiwakan ika nochin amoyolo de xitetlasojtlakan, iwan xiktlajtlanilikan in Espíritu Santo ma amechmaka ipoder para ika ankitekipanoskej in toTajtzin Dios. Pero okachi xiktlajtlanilikan ma amechmaka ipoder para ankijtoskej itlaj tlajtole katlej Dios kitemaka para ankinmilwiskej in oksekimej. ² Porke akin tlapoa ika oksé tlajtole katlej mach ika se tlapoa, mach kintlapowia in tlakaj, sino kitlapowia in Dios, porke mach akaj kimomaka kuenta tlan yej kijta. Porke kijta tlan Espíritu Santo kiichtakamatiltia ma kijto. ³ Pero akin kijta itlaj tlajtole katlej Dios kimaka ma kijto, yon kinmilwia in tlakaj para kinpalewis ma moskaltikan itech intlaneltokalis, para kinyolojchikawas iwan para kinyoloseewis. ⁴ Akin tlapoa ika oksé tlajtole katlej mach keman ika se tlapoa, inewian

mopalewia para moskaltis okachi itech itlaneltokalis. Pero akin kijta itlaj tlajtole katlej Dios kimaka ma kijto, kinpalewia nochtin in tiopantlaneltokakej para okachi ma moskaltikan itech intlaneltokalis.

⁵ Nej nikwelitani tla aminochtin namejwan ankipianij poder para ika antlapoanij ika oksé tlajtole katlej mach keman ika se tlapoa, pero nej okachi nikwelitani tla namejwan ankipianij poder para ika xikijtokan itlaj tlajtole katlej Dios kitemaka. Porke yin okachi moneki ke se tlapoas ika oksé tlajtole katlej mach ika se tlapoa. Porke tla amo se kitomas yon tlajtole tlan se kijta, mach kinpalewis in tiopantlaneltokakej para okachi ma moskaltikan itech intlaneltokalis. ⁶ Por yonik, nokniwan, tla nej nias namechitati iwan namechtlapowis ika oksé tlajtole katlej mach keman ankikakij, tonses, ¿tlan amechpalewis? Pero tla nej namechtlapowis ika namotlajtol itlaj tlan Dios onechnextilij, o noso tla namechmatiltis okachi de tlan melawak, o noso tla namechilwis itlaj tlajtole tlan Dios nechmaka ma namechilwi, o noso tla namechmachtis se tiotlamachtile de toTajtzin Dios, yon kemaj welis amechpalewis.

⁷ Ma tiktlalikan se ejemplo de yen akatlapitzale iwan arpa katlej mach kipiaj nemilistle. Tla amo se kinpapatilis niikuak se kintzotzonas, mach mokakis tlanon se kitzotzona. ⁸ Iwan itech se guerra, tla se soldado amo ijki nik kipitzas in tlapitzale ken moneki, mach akaj kimatis kox kipiaj de mololoskej para kimomagaskej. ⁹ Ijkón noijki namejwan. Tla ankijtoskej itlaj tlajtole iwan amakaj kimomakas kuenta tlan ankijtaj, tonses, mach akaj kimatis de tlanon antlapoaj. Iwan nochti san kitkis in ejekatl. ¹⁰ Tejwan tikmatij nik katej miekej tlajtoltin katlej ika tlapoaj in tlakaj de ixko yin tlaltikpak, iwan kada se de yonmej tlajtoltin, para katlej ika tlapoaj, kimati tlanon kijtosneki. ¹¹ Pero tla nej amo weli nikmomaka kuenta tlan oksekimej tlapoaj, ikuakón nej nechitaskej kej yeskia mach de inpueblo, iwan yejwan noijki nikinmitas kej yeskia mach de nopueblo. ¹² Por yonik kiné, como namejwan sa tekitl ankinekij in Espíritu Santo ma amechmaka ipoder para welis ika ankitekipanoskej in Dios, tonses xiktlajtlaniliikan okachi ma amechmaka ipoder katlej okachi kinpalewis ma moskaltikan itech intlaneltokalis in tiopantlaneltokakej.

¹³ Ijkón kiné, akin weli tlapoa ika oksé tlajtole katlej mach keman ika se tlapoa, moneki noijki ma kitlajtlanili in Dios de ma weli ma kitoma tlan kijta. ¹⁴ Porke tla nej nimotiotzajtzilis inawak Dios ika se tlajtole katlej mach nikmomaka kuenta, yon san noanima motiotzajtzilia pero notlalnamikilis mach kimomaka kuenta tlan kijta noanima. ¹⁵ ¿Tlan nikchiwas

kiné? Okachi kuale nimotiotzajtzilis inawak Dios ika noanima iwan noijsi ika notlalnamikilis. Iwan okachi kuale niktlakuikilis in Dios ika noanima iwan noijsi ika notlalnamikilis. ¹⁶ Porke tla tej tikweyikixtia in Dios san ika moanima porke titlapoa ika oksé tlajtole katlej mach keman ika se tlapoa, oksekimej mach welis motlasojaxkamatiskej inawak Dios porke mach kimatij tlan tikijs. ¹⁷ Iwan maski sa tekitl kuale ximotlasojaxkamati inawak Dios, in oksekimej mach kinpalewis para ma moskaltikan okachi itech intlaneltokalis. ¹⁸ Nimotlasojaxkamati inawak Dios porke Yej onechmakak poder para ma niweli ma nitlapoa ika oksekimej tlajtoltin katlej mach keman ika se tlapoa, iwan nion se de amejwan mach akaj ijkón tlapoa ken nej. ¹⁹ Pero nijuak tololitokej tiopan, okachi kuale moneki nikijtos san kanaj makuile tlajtole katlej kuale kimomakaskej kuenta in oksekimej para ma kinpalewi, iwan amo nikijtos kanaj majtlakte mil tlajtole katlej mach akaj welis kimomakas kuenta.

²⁰ Nokniwan, amo xitlayejekekakan kej ankonemej. Xiekan kej ankonemej itech tlan amo kuale, pero xiekan kej anwejweyin tlakaj ika kuale amotlayejekekolis. ²¹ Itech itlanawatil in Dios ijkón kijta: “Nikintitlanis tlakaj de oksekimej pueblotjin katlej tlapoaj ika oksé tlajtole para ma kintlapowikan yinmej tlakaj katlej mach nechneltokaj, iwan nion ijkón mach nechkakiliskej, kijta in Señor.” ²² Ijkón kiné, nijuak Dios akaj kimaka poder para ma tlapoa ika oksé tlajtole katlej mach keman ika se tlapoa, yon kinmaka kej se señas para katlej mach ya kineltokaj Dios, iwan amo para katlej ya tlaneltokaj. Pero nijuak Dios akaj kimaka poder para ma kijto itlaj tlajtole katlej Dios kimaka, yon kinmaka kej se señas katlej ya tlaneltokakej, iwan amo para katlej mach ya kineltokaj Dios. ²³ Iwan tla nijuak mololoskej in tlaneltokakej itech tiopan, tla nochtin pewas tlapoaskej ika se tlajtole katlej mach akaj kimomaka kuenta, iwan kalakiskej sekimej katlej mach kixmatij itlajtol in Dios o noso mach ya kineltokaj Dios, yejwan welis kijtoskej nik ya ankuatlapolopojkej. ²⁴ Pero tla aminochtin pewas ankijtoskej itlaj tlajtole katlej Dios amechmaka xikijtokan, iwan kalakis akaj katlej mach ya kineltoka Dios o noso akaj katlej mach kixmati itlajtol in Dios, ijkukán yej kimomakas kuenta nik tlajtlakolej iwan pewas moyolpejpenas (moyolkuepas), por yen tlan kikakis de amejwan. ²⁵ Nochi tlan amo kuale katlej kipixtos ipan iyolo, kikixtis. Iwan motlankuaketzas kiweyikixtis in toTajtzin Dios, iwan kijtos nik melawak in Dios kajki amowan.

Xikchiwakan noch ika kuale iwan ken moneki

²⁶ Ijkón kiné, nokniwan, ijkín xikchiwakan níjkuak anmololoskej. Níjkuak anmololoskej sekimej ma tlakuikakan, sekimej ma tlamachtikan, sekimej ma kijtokan itlaj tlan Dios kinnextilia, sekimej ma tlapoakan ika oské tlajtole katlej mach ika se tlapoá, iwan sekimej ma kitomakan yon tlajtole. Pero nochí yon ma yeto para ma kinpalewi in tlaneltokakej para okachi ma moskaltikan itech intlaneltokalis. ²⁷ Níjkuak akaj tlapoas ika oksé tlajtole katlej mach keman ika se tlapoá, ma tlapoakan san omen o noso eyin, iwan ma kintokarojtiw sesejsenmej. Iwan moneki akaj ma kitoma tlan se kijta. ²⁸ Pero tla níjkuak anmololoskej tiopan, tla amo onkaj akin welis kitomas in yon tlajtole, okachi kuale amakaj ma tlapoá ika oksé tlajtole katlej mach ika se tlapoá, okachi kuale kada se iselti ma motlapowi iwan Dios kan amakaj ma kikaki. ²⁹ Ijkón noijki, ma tlapoakan san omen o noso eyin katlej kinekjij kijtoskej itlaj tlajtole katlej Dios kinmaka. Iwan oksekimej ma kikakikan tlan kijtaj, iwan ma kiyejyekokan kox yen Espíritu Santo kinmakatok in yon tlajtole o noso amo. ³⁰ Pero tla se tokni katlej ompa ewatok iwan Dios kilwia itlaj tlajtole katlej moneki ma kijto, ijkuaokón katlej achtoj otlapojtoka ma kawili ma tlapoá yon tokni. ³¹ Ijkón, nochtin katlej Dios kinmaka itlaj tlajtole para ma kijtokan, ma tlapoakan sesejsenmej para nochtin ma welikan ma kimomakakan kuenta iwan ma moyolojchikawan. ³² Katlej kijtaj itlaj tlajtole katlej Dios kinmaka ma kijtokan, kipiaj de kimatiskej mochiaskej asta ijkuaak kintokaros tlapoaskej. ³³ Porke Dios mach kineki san semi nochtin ma tlapoakan porke mach akaj kimatis akin moneki se kikakilis.

Noijki welis ankichiwaskej yin tlamantle ken kichiwaj nochtin in oksekimej tiopantlaneltokakej katlej iaxkawan in Dios. ³⁴ In siwamej mach kintokaroa tlapoaskej níjkuak anmololoaj tiopan. In siwamej moneki ma kinkawilikan in tlakaj ma kinyekanakan ijkón ken kijta itlanawatil in Dios. ³⁵ Tla in siwamej kinekjij kimatiskej itlaj tlamantle, moneki ma kintlajtlanikan inmokichwan itech inchan. Porke mach kuale mota se siwatl ma tlapoá níjkuak anmololoaj tiopan.

³⁶ Moneki xikmatikan ke itlajtol in Dios mach achtoj amejwan opéj ankimatij iwan mach san yen namejwan ankimatij. ³⁷ Tla akaj momachilia nik in Dios kimaka poder para ma weli kijto itlaj tlajtole katlej Dios kimaka, o noso momachilia nik kipia in Espíritu Santo, ma kimomaka kuenta nik in yin tlan namechijkuililia yon itlanawatil in Dios. ³⁸ Iwan tla amo kimomaka kuenta nik yin itlanawatil in Dios, tonses yon akin ijkón momachilia noijki amakaj ma kichiwa kuenta.

³⁹ Ijkón kiné, nokniwan, xiktajtlanikan in Dios ma amech-

maka ipoder para xikijtowan itlaj tlajtole katlej Yej amechmakas, iwan amo xikintzatzakuilikan katlej tlapoaj ika oksé tlajtole katlej mach keman ika se tlapoa. ⁴⁰ Pero xikchiwakan nochi ika kuale iwan ken moneki.

15

Cristo omoyolkuik satepan de omikke

¹ Axan, nokniwan, nikneki namechelnamiktis in kuale tlajtole katlej temakixtia katlej nej onamechmatiltij. Yin yen kuale tlajtole katlej amejwan ankiresibirojkej, iwan axan itech anmoyekketokej ika namotlaneltokalis. ² Iwan namejwan weli itech anmomakixtiaj, tla melawak kuale ankineltokatokej in yon tlajtole katlej onamechmatiltij. Pero tla amo ankimomakaj kuenta iwan nion amo ankineltokaj ken kijta in yon kuale tlajtole, tonses san tekitl ankineltokakej.

³ Nej onamechmatiltij katlej okachi omonekia ankimatinij katlej Dios onechmatiltij. Nej onamechmatiltij nik in Cristo omikke por yen totlajtlakol, ijkón ken kijta in tiotlajkuilole. ⁴ Okitookakej ijtk se mikkakuyoktle, iwan ipan eyi tonale omoyolkuik, ijkón ken kijta in tiotlajkuilole. ⁵ Nijuak omoyolkuik, okimonextilij in Cefas, iwan satepan noiiki okimmonextilij nochtin in oksekimej majtlaktin iwan omen tlatitlaniltin. ⁶ Satepan okimmonextilij okachi de makuile siento tokniwan san sekan. Miekej de yejwan ok katej, pero sekimej yomikkej. ⁷ Satepan okimmonextilij in Jacobo, iwan satepan okimmonextilij nochtin in tlatitlaniltin.

⁸ Iwan satepan de nochtin nej noiiki onechmonextilij, kej yeskia se katlej otlakatke katlej ayamo oajsia tonale para tlakatis. ⁹ Nej okachi nitzikitzin ke oksekimej tlatitlaniltin, iwan nion mach notech powi ma nechnotzakan kej nitlatitlanile, porke nej onikintlajyowiltiaya in tlaneltokakej de Dios. ¹⁰ Pero Dios okipixke weyi iteiknotlamachilis nowan iwan onechmakak in yin tekitl, iwan axan nej nitlatitlanile. Iwan mach san tekitl okipixke weyi iteiknotlamachilis nowan, porke nej nitekipanoa okachi ke oksekimej tlatitlaniltin. Maski mach yen nej nikchiwa yin tekitl, sino yen Dios katlej kipia weyi iteiknotlamachilis nowan, Yej tekipanoa notech para kichiwa yin tekitl. ¹¹ Tla oksekimej okachi otekipanojkej, o noso nej okachi onitekipanoj, mach yen yon katlej okachi omonekia. Katlej okachi omonekia yen katlej tejwan otamechmatiltijkej iwan namejwan ankineltokakej.

Tejwan timoyolkuiskej oksemi satepan de timikiskej

¹² Iwan tla tejwan otamechmatiltijkej nik in Cristo omoyolkuik (omoyolitij) satepan de omikke, tonses, ¿kenik sekimej

de amejwan ankijtaj nik in mikkamej mach keman moyolkuiskej? ¹³ Porke tla in mikkamej amo welis moyolkuiskej satepan, tones kijtosneki mach omoyolkui in Cristo. ¹⁴ Iwan tla Cristo amo omoyolkui satepan de omikke, tones san nenkaj (san tekitl) tamechmatiltiaj nik in Cristo omoyolkui, iwan namejwan san nenkaj ankineltokaj. ¹⁵ Iwan tla ijkón yeni, tejwan katlej titlatitlaniltin tienij san titekajkayajkej, porke tejwan tiktematiltiaj nik in Dios okiyolitij in Cristo. Tla melawak mach welis moyolkuiskej in mikkamej, tones noijki mach melawak nik in Dios okiyolitij in Cristo. ¹⁶ Porke tla in mikkamej mach welis moyolkuiskej (moyolitiskej), tones kijtosneki nion Cristo mach omoyolkui. ¹⁷ Iwan tla Cristo mach omoyolkui, tones mach itlaj ipatij tlan namejwan ankineltokaj. Tones kijtosneki namejwan ok ankatej antlajtlakolejkej. ¹⁸ Iwan tla ijkón yeni, tones noijki katlej yomikkej iwan otaneltokakej inawak Cristo noijki omopolojkej. ¹⁹ Tla tejwan tikneltokaj in Cristo techpalewis san yej nikuak ok tiyolitokej iwan amo techpalewis satepan de timikiskej, tones tejwan okachi mach itlaj topatij de noctin oksekimej tlakaj katlej mach kineltokaj in Cristo.

²⁰ Pero Cristo melawak omoyolkui (omoyolitij) satepan de omikke. Iwan yen achtoj omoyolkui, iwan techmaka se ejemplo nik noctin in oksekimej katlej mikij, satepan noijki moyolkuiskej. ²¹ In tlakaj opéj mikij ixko yin tlaltikpak por yen tlan okichij se tlakatl, pero noijki por yen tlan okichij in oksé tlakatl, in mikkamej moyolkuiskej. ²² Iwan komo tinochtin tiwalajtokej de Adán, por yonik tinochtin timikiskej. Ijkón noijki, tinochtin katlej tiyankuikatlakatij itech Cristo, tinochtin timoyolkuiskej oksemi. ²³ Pero achtoj se iwan satepan oksé ijkón ken Dios yokitlalij. Achtoj Cristo omoyolkui, iwan techtitia kej se ejemplo nik noctin katlej iaxkawan in Cristo moyolkuiskej (moyolitiskej) satepan nikuak Yej walmokuepas oksemi ixko yin tlaltikpak. ²⁴ Ijkuakón ajsiki itlamian noctin tonaltin nikuak in Cristo kinpojpolos noctin katlej tlanawatiaj, noctin katlej kipiaj tekiwajkayotl iwan noctin katlej kipiaj poder. Iwan Cristo kimaktilis in toPapan Dios nochí in tlanawatijkayotl katlej achtoj okimakak. ²⁵ Porke Cristo kipia de tlanawatis asta ijkuak Dios kitlalis ma yeto tlayekanke de yejwan katlej kikokoliaj. ²⁶ Iwan katlej kipojpolos salúltimo, yen mikilistle iwan mach ok akaj mikis. ²⁷ Porke Dios okitlalij in Cristo para ma kinawati nochí tlamantle. Pero amo kijtosneki nik in Cristo kinawatis in Dios, porke yen Dios katlej okitlalij in Cristo para ma tlanawati. ²⁸ Iwan nikuak in Cristo

kintlanis nochtin katlej kikokoliaj iwan ya pewas kinnawatis, ikuakón Yej katlej teKone de Dios, inewian motemaktis (motemaktilos) inawak iPapan katlej okichij ma tlatlani. Iwan ikuakón Dios kipias nochí tlanawatijkayotl itech nochí tlan onkaj.

²⁹ Nojki, tla in mikkamej mach moyolkuiskej (moyolitiskej), ¿tlanik kiné sekimej mokuateekiaj inpatka de yejwan katlej yomikkej? Tla amo ankineltokaj nik in mikkamej moyolkuiskej, toneses, ¿tlanik kiné ijkón ankichiwaj?

³⁰ Iwan tla in mikkamej mach moyolkuiskej (moyolitiskej), toneses, ¿san nenkaj (san tekitl) timotemaktiaj nochipa itech totekiw maski ma techmiktikan? ³¹ Nochipa nikaj itenko mikilistle porke katej miekej katlej kinekij nechmiktiskej. Yin melawak tlan namechilwia, nokniwan, ijkón ken nojki melawak nipaki amotech porke tinochtin tikatej san se itech toSeñor Jesucristo. ³² Itech weyikan de Éfeso miekej tlakaj oyajkej kontra nej kej yolkamej tekuanimej. Pero tla amo moyolkuiskej in mikkamej, toneses, san nenkaj (san tekitl) ijkón nipanoa. Iwan okachi kuale ma tikchiwakan ken sekimej kijtaj: “Ma titlakuakan iwan ma titlaonikan, porke mostla wiptla timikiskej.”

³³ Amo ximotekawilikan ma amechkajkayawakan ken katlej kijta yon tlajtole. Tla inwan annemiskej katlej kichiwaj tlan amo kuale, amechijtlakoskej itech tlan kuale katlej ankinekij ankichiwaskej. ³⁴ Ayakmo xiekan kej yeskia amiwititokej, ximoskalikan (xitlalnamikikan) iwan xiekan ika kuale amotlalnamikilis, iwan ayakmo xitlajtlakokan. Porke sekimej de amejwan mach kixmatij Dios. Nej ijkín namechilwia para ijkón namejwan xipinawakan.

Ijkín nik moyolkuiskej in mikkamej

³⁵ Pero welis akaj de amejwan tlajtlanis: “¿Kenik moyolkuiskej in mikkamej? ¿Kenamij yetos intlalnakayo nikuak moyolkuiskej?” ³⁶ Melajka mota kej yeskia mach ajositok itlalnamikilis akin ijkón tlajtlanis. Porke nikuak motooka se semiya, yon semiya achtoj kipia de palanis iewayo para ijkón welis kisas iwan moskaltis. ³⁷ Iwan nikuak itlaj tiktookaj, mach yen tlatoktle in tiktookaj para ma kisa, sino tiktookaj yen semiya. In semiya welis yetos de trigo o noso de itlaj oksé semiya. ³⁸ Iwan Dios kichiwa yon semiya ma kisa iwan ma kipia ikuawyo ken Yej kimonekiltia. Iwan nochí tlatlamantle semiya Dios kimaka tlatlamantle ikuawyo katlej moneki kipias. ³⁹ Mach nochtin kipiaj san se intlalnakayo katlej katej ixko yin tlaltikpak. In tlakaj kipiaj oksé tlamantle intlalnakayo, in yolkamej kipiaj oksé tlamantle intlalnakayo, in totomej kipiaj oksé tlamantle intlalnakayo, iwan michimej

kipiaj oksé tlamantle intlalnakayo. ⁴⁰ Ijkón noijki, katlej katej ilwikak kipiaj oksé tlamantle intlalnakayo iwan katlej katej ixko yin tlaltikpak kipiaj oksé tlamantle intlalnakayo. Intlalnakayo katlej katej ilwikak oksé inkualtzinyo kipiaj iwan intlalnakayo katlej katej ixko yin tlaltikpak oksé inkualtzinyo kipiaj. ⁴¹ In tonale iwan metztle tlatlamantle nik tlawiaj, iwan noijki in sitlaltin oksé tlamantle nik tlawiaj. Iwan nochtin sitlaltin noijki tlatlamantle nik tlawiaj. ⁴² Ijkón noijki yetos nijuak in mikkamej moyolkuiskej (moyolitiskej). In tlakaj kitookaj se mikkatl iwan itlalnakayo palani, pero Dios kiyolitis ika se itlalnakayo katlej mach keman palanis. ⁴³ Nijuak in tlakaj kitookaj se mikkatl, itlalnakayo mota bierotik, pero nijuak in Dios kiyolitis, kipias kuakualtzin imawisotlanex. Itlalnakayo in mikkatl katlej kitookaj in tlakaj mach chikawak, pero nijuak in Dios kiyolitis kipias miek chikawalistle. ⁴⁴ Nijuak miki se tlakatl, kitookaj itlalnakayo katlej okipiaya ixko yin tlaltikpak, pero nijuak moyolkuis (moyolitis) kipias se itlalnakayo de ilwikak. Onkaj tlalnakatl de ixko yin tlaltikpak, iwan noijki onkaj tlalnakatl de ilwikak.

⁴⁵ In tiotlajkuilole kijta: “Adán yen achtoj tlakatl katlej oyeka ixko yin tlaltikpak, iwan Dios okimakak nemilstle nijuak okichij.” Pero in tlakatl Adán katlej satepan ovalaj, kijtosneki yen Cristo, Yej kipia poder para kitemakas nemilstle katlej mach keman tlamis. ⁴⁶ Axan mach ya tikpiaj totlalnakayo de ilwikak. Porke achtoj moneki tikpiaskej totlalnakayo de nian tlaltikpak iwan satepan tikpiaskej totlalnakayo de ilwikak. ⁴⁷ Adán, katlej achtoj tlakatl, okipixke itlalnakayo katlej Dios okichij ika tlale de yin tlaltikpak. Pero in Adán katlej satepan ovalaj, kijtosneki yen Cristo, ovalaj de ilwikak. ⁴⁸ In achtoj tlakatl Adán okipiaya itlalnakayo de tlale, iwan nochtin in tlaltikpaktlakaj noijki kipiaj intlalnakayo de tlale. Pero katlej iaxkawan in Cristo katlej ovalaj de ilwikak, yejwan kipiaskej intlalnakayo de ilwikak ken Yej kipia. ⁴⁹ Axan tikpiaj totlalnakayo ken okipixke in Adán, pero satepan tikpiaskej totlalnakayo de ilwikak ken itlalnakayo in Cristo.

⁵⁰ Nikneki namechilwis nokniwan, nik in totlalnakayo katlej axan tikpiaj ika toeso iwan ika tonakayo, mach welis kalakis kan Dios tlanawatia. Totlalnakayo katlej palani mach welis kalakis ilwikak kan mach itlaj palani. ⁵¹ Pero nikneki namechilwis se tlamantle katlej mach akaj kimati. Mach tinochtin timikiskej, pero Dios techpatilis totlalnakayo ika oksé yankuik. ⁵² Yon tlapanos san totokatijkak ken nijuak tikintzakuaj iwan tikintlapoaj toixtololowan, nijuak mokakis sa se buelta kipitzaskej in trompeta. Nijuak

ijkón mokakis, in mikkamej moyolkuiskej (moyolitiskej) iwan mach ok keman mikiskej, iwan tejwan katlej ok tiyolitoskej, Dios techpatilis totlalnakayo ika oksé yankuik.⁵³ Porke in totlalnakayo katlej axan mach wejkawa, mopatlas ika oksé katlej wejkawas iktlanke (ik tlami). Iwan totlalnakayo katlej weli miki, mopatlas ika oksé katlej mach keman mikis.⁵⁴ Iwan nijuak in totlalnakayo katlej axan mach wejkawa, mopatlas ika oksé katlej yetos iktlanke (ik tlami), iwan katlej axan weli miki mopatlas ika oksé katlej mach keman mikis, ikuakón mochiwas tlan kijta in tiotlajkuilole: “In mikilistle mach ok yetos porke yotlatlanke in nemilistle.⁵⁵ ¡Ay mikilistle! ¿Kanin kaj mopoder para titechkojkokos? ¡Ay mikilistle! ¿Kanin kaj mopoder para titechtlanis?”⁵⁶ In tlakaj mikij por yen tlajtlakolchiwaj, iwan in tlajtlakole kipia poder para techmiktia porke itlanawatil in Dios kijta ke katlej kichiwaj tlajtlakole kipiaj de mikiskej.⁵⁷ Pero ma tiktlasojcamachilikan in toTajtzin Dios porke Yej techmaka ipoder para tiktlaniskej in mikilistle por yen tlan toSeñor Jesucristo kichiwa por tejwan.

⁵⁸ Por yonik, notelasojkaikniwan, xitlaneltokatokan in awak toSeñor ika nochí amoyolo iwan amo ximoxelokan de itech iojwi. Nochipa xikchiwakan in tekitl katlej toSeñor amechmaka xikchiwakan. Porke namejwan ya ankimatij ke nochí in tekitl katlej ankichiwaj inawak toSeñor, mach san tekitl.

16

In tlaneltokakej okololojkej sekin tomin

¹ Axan nikneki namechilwis de yen tomin katlej moneki ankololoskej para ika ankinpalewiskej oksekimej tokniwan yolchipawakej. Moneki xikchiwakan ijkón ken yonikinmilwij in tiopantlaneltokakej katlej katej itech estado de Galacia.² Nochi domingo moneki kada se de amejwan xiklatitiwian sekin tomin de tlan ankitlanij. Sa xikololojtokan para amo yakin ankololoskej nijuak niajsiti.³ Iwan nijuak nej niajsiti, nikintitlanis para Jerusalén in tokniwan katlej namejwan ankinpejpenaskej. Nikinmakas se amatlajkuilole kan tlajtojtias nik tejwan tikintitlanij, iwan yejwan kitkiskej namotomin katlej ankitetliokoliskej para kinmaktiliskej in tokniwan de ompa Jerusalén.⁴ Iwan tla monekis nej nias noijklí, ikuakón yejwan welis nowan yaskej.

Pablo okiyejyekoj yas Macedonia

⁵ Nijuak nias namechitati, napanotikisas ik estado de Macedonia, iwan satepan niajsiti ompa Corinto.⁶ Iwan welis amowan nimokawas kanaj keski tonale. O noso welis nimokawas ompa asta ikuak ma pano in sesek, iwan satepan

namejwan welis annechpaleewiskej ika tlan niknekis itech noojwi para kan moneki nias. ⁷ Mach nikneki san namechitikisas, sino nikneki nimokawas amowan kanaj keski tonale, tla toSeñor kimonekiltis. ⁸ Pero nimokawas nian itech weyikan de Éfeso asta ma pano ilwítl de Pentecostés. ⁹ Porke nian nikpia se weyi tekitl katlej Dios kineki ma nikchiwa iwan miekej tlaneltokaskej inawak Dios, maski katej miekej katlej mach kiwelitaj tlan nikchiwa.

¹⁰ Tla ompa ajsiti in Timoteo, namejwan xikchiwakan de ma yeto ika pakilistle, porke yej kitekipanoa in toSeñor ijkón ken nej noijki niktekipanoa. ¹¹ Por yonik, amakaj de amejwan ma kita kej yeskia amitlaj ipatij. Sino moneki xikpalewikan ika tlan moneki iwan xikwaltitanikan itech iwjwi ika kuale para ma wiki nian nowan, porke nikchixtok ma ejkoki inwan oksekimej tokniwan.

¹² In tokni Apolos, oniktlatlawtij miek ma wia inwan oksekimej tokniwan ma amechitatij, pero axan yej mach okinekke oyáj. Pero yas nijuak yej welis.

Pablo okonintlajpaloj iwan okoninnajnawatij

¹³ Xiijsatokan iwan ximoyekketokan itech namotlaneltokalis. Xikpiakan ixchikawalistle iwan amo ximomawtikan. Ximochikawakan ika Dios ichikawalis para amo keman ankikawaskej itlajtol. ¹⁴ Nochi tlan ankichiwaskej, xikchiwakan ika tlasojtlalistle.

¹⁵ Nokniwan, namejwan ya ankimatij nik in Estéfanás iwan ifamilia yejwan achtoj otlaneltokakej inawak Cristo itech estado de Acaya. Iwan yejwan kixkawiaj (momeliaj) kinpalewiaj in tokniwan katlej moneki se kinpalewis. ¹⁶ Nikneki xikintlakitakan katlej kichiwaj ken yonmej tokniwan iwan nochtin katlej tlapalewiaj iwan tekipanoaj inawak Dios. ¹⁷ Sa tekitl nipaki porke ovalajkej in Estéfanás, Fortunato, iwan Acaico. Yejwan okichijkej tlan namejwan mach anwelikej ankichijkej nowan porke mach nian nowan ankatej. ¹⁸ Yejwan onechyolojchikajkej ijkón ken namejwan noijki oamechyolojchikajkej. In tokniwan ken yonmej moneki se kintlakitas.

¹⁹ In tiopantlaneltokakej de país de Asia amechontlajpaloj. Aquila iwan Priscila, iwan tokniwan katlej mololoaj ichan, noijki amechontlajpaloj miek ika itoka in toSeñor. ²⁰ Nochtin tokniwan katlej nian katej noijki amechontlajpaloj. Ximotlajpalokan ika tlasojtlalistle se iwan oksé ken Dios kineki.

²¹ Nej niPablo namechontlajkuilia ika noma katlej ika namechontlajpaloa.

²² Tla akaj amo kitlasoxtla in toSeñor Jesucristo, ma yeto anatema, kijtosneki ma Dios kikixti de inawak para iktlanke (ik tlami). ¡Maranata! Kijtosneki ¡In Señor ya walmuika!

23 In toSeñor Jesucristo ma kipia weyi iteiknotlamachilis amonawak. 24 Aminochtin namejwan namechtla sojtla porke tinochtin tipowij titeaxkawan de Cristo Jesús. Ijkón ma yeto.

SAN PABLO ITLATITLANIL IN DIOS IPAN OJPA OKINTLAJKUILILIJ IN TLANELTOKAKEJ DE CORINTO

Pablo okonintlajkuililij in tlaneltokakej de Corinto

¹ Nej niPablo, Dios okimonekiltij onechtlalij nitlatitlanile de Jesucristo. Nej iwan tokni Timoteo tamechontlajkuililiaj namejwan tokniwan antiopantlaneltokakej katlej anchantij itech weyikan de Corinto, iwan nochtin in tiopantlaneltokakej de Dios katlej katej itech estado de Acaya. ²In toPapan Dios iwan toSeñor Jesucristo ma amechmakakan inteiknotlamachilis iwan ma amechmakakan yolosewilistle.

Kenik otlajyowij in Pablo

³ Ma tikweyikixtikan toTajtzin Dios katlej iDios iwan iPan in toSeñor Jesucristo, porke yen toPapan katlej nochipa techiknomati iwan yen toDios katlej nochipa techyolosewia. ⁴ Yej nochipa techyolosewia nikuak titlajyowiaj, para ijkón tejwan noijki ma tikinyolosewikan akinmej noijki tlajyowiaj. Tejwan tikinyolosewiaj ijkón ken Dios techyolosewia. ⁵ Tla tejwan titlajyowiaj miek ijkón ken Cristo noijki otlajyowij, tones noijki tikresibiroskej miek yolosewilistle itech Cristo. ⁶ Por yonik, tla tejwan titlajyowiaj, titlajyowiaj para namejwan xikpiakan yolosewilistle iwan para ximomakixtikan. Iwan tla Dios techyolosewia, techyolosewia para namejwan xikpiakan yolosewilistle iwan ximomakixtikan, iwan ijkón noijki welis ankixikoskej in tlajyowilistle katlej tejwan tipan-otiwitzej. ⁷Tejwan kuale tikmatij nik in Dios amechyolosewis ijkón ken tejwan techyolosewijtok porke namejwan noijki antlajyowiaj ken tejwan titlajyowiaj.

⁸ Nokniwan, tiknekij xikmatikan kenik sa tekitl otitlajyowijkej itech estado de Asia. Sa tekitl otipanokej tlajyowilistle asta mach ok otikxikoayaj, tejwan otikijtojkej mach ok timakisanij sino timikinij. ⁹ Otikmachilijkej kej yeskia ya timikiskej. Nik ijkón otimochijkej para ma tikmatikan amo san tejwan ma tigmopialikan konfiansa, sino moneki ma tiktلالikan tokonfiansa inawak Dios katlej weli kinyolitia in mikkamej. ¹⁰ Iwan Dios otechmakixtij de itech nekáj weyi temajmawtij mikilistle. Iwan tikchiaj nik in Yej nochipa techmakixtijtias. ¹¹ Namejwan noijki moneki xitechpalewikan ximotiotzajtzilikan inawak Dios por tejwan. Iwan tla miekej

motiotzajtziliskej inawak Dios por tejwan, noijki miekej kit-lasojkamachiliskej in toTajtzin Dios, por yen tlatiochiwalistle katlej techmaka.

Por tlanik Pablo amo oyáj Corinto

¹² Onkaj se tlamatle tlan techpaktia, yen tlan totlal-namikilis techilwia nik kuale timowikaj ika kuale toyolo iwan ipan melajka ixko yin tlaltikpak, iwan noijki melawak kuale timowikaj amowan. Ijkón timowikaj amo porke tot-lalnamikilis ijkón techyekana, sino porke ijkón techyekana in Dios ika iteiknotlamachilis. ¹³ Itech toamatlajkuilol-wan amitlaj oksé tamechijkuiliaj, sino san yen tlan name-jwan anwelij ankileroaj iwan ankimomakaj kuenta de tlan tamechilwiaj. Iwan tejwan tikchiaj namejwan kuale xik-momakan kuenta tlan tamechilwiaj. ¹⁴ Axan namejwan mach ya kuale ankimomakaj kuenta nochi tlan tamechijkuiliaj. Pero tiknekij kuale xikmomakan kuenta para nekáj tonale nijuak in toSeñor Jesús walmuikas, amejwan welis anmopaktiskej towan ijkón ken tejwan noijki timopak-tiskej amowan.

¹⁵⁻¹⁶ Nej kuale nikmati nik amejwan kuale annechresibiroskej. Por yonik oniknekia namechitikisani nijuak niani itech estado de Macedonia, iwan nijuak niwalmokuepani oksemi namechitajsini, iwan ijkón welini ojpa namechpaktiani. Iwan nijuak niwalmokuepani, welini annechpalewianij ika tlan nechpoloani para nias Judea. ¹⁷ Nijuak onamechtajkuililij onikijtoj nias namechitati. Sekimej de amejwan ankiyejyekojej nik mach ipan melajka tlan onamechilwij, porke mach onamechitato ken onikijtoj. ¿Namejwan ankiyejyekoaj ke nijuak nikija itlaj nikchiwas, nikchiwaken oksekimej tlakaj katlej satepan motlajtolpatlaj?

¹⁸ Dios nochipa kichiwa tlan kijta, iwan tejwan noijki tikchiwaj tlan tikijtaj, mach keman tikijtaj tikchiwaskej se tlamatle iwan satepan mach ok tikchiwaj. ¹⁹ Porke Jesucristo, iKone in toTajtzin Dios, katlej Silvano, Timoteo iwan nej otamechmatiltijkej, Yej mach keman itlaj kijta kichiwas iwan satepan kijta mach ok kichiwas. Cristo nochipa kichiwa nochi tlan kijta. ²⁰ Porke itech Cristo nochи mochiwa tlan Dios otechkakitij. Por yonik nijuak tikweyikixtaj in toTajtzin Dios, itech Cristo Jesús tikijtaj: “Ijkón ma yeto.” ²¹ Iwan Dios noijki yokiyeketzke in toyolo iwan namoyolo itech Cristo iwan Yej otechmakak in tekitl katlej tikpiaj para ma tiktekipanokan. ²² Yej yotechtlalilij iseyo nik ya tiíaxkawan, iwan yokitlalij iEspíritu Santo ipan toyolo katlej techititia nik melawak tikresibiroskej nochi tlan yotechkakitij techmakas.

²³ Ijkón kiné, nikneki niktestigojtlalis in toTajtzin Dios katlej kuale kixmati noyolo. Mach oniwia onamechitato ompa Corinto, porke mach oniknekke namechkojkokos ika tlan namechilwis. ²⁴ Tejwan mach tiknekij titlanawatiskej itech namotlaneltokalis, porke namotlaneltokalis melajka ya moyekketok inawak Cristo. Sino tejwan tiknekij tamechpalewiskej para namejwan xikpiakan pakilstle.

2

¹ Por yonik nej onikmolwij mach nias namechitati para amo namechkojkokos oksemi. ² Porke tla nej nikchiwas ximoyolkokokan namejwan, tonses ¿akinmej nechmakaskej pakilstle? Sino san yen namejwan katlej namechkojokoani. ³ Por yonik nej namechijkuililia yin amatlajkuilole. Mach oniknekke oniaj para amo nimoyolkokos sino nej nikneki namejwan xinechmakakan pakilstle. Kuale nikmati nik tla nej nipakis, namejwan noiiki anpakiskej aminochtin. ⁴ Nijuak onamechijkuililitoka yin amatlajkuilole, sa tekitl onitlanemilijtoka iwan onimoyolkokojtoka asta onichokak. Pero mach onamechtajkuililij para ximoyolkokokan sino para xikmatikan nik sa tekitl namechtlasojtla.

Xiklapojpolwikan tla akaj itlaj okichij tlan amo kuale

⁵ Axan, nekáj tlakatl katlej okichij tlan amo kuale, amo san yen nej onechkojkoj sino namejwan noiiki achi oamechkojkoj. Mach nikija nik sa tekitl oamechkojkoj para amo nimotlajtolpanoltis miek inawak yon tlakatl. ⁶ In tlajyowilliste katlej yej yokiresibiroj nijuak miekej de amejwan ankitlajyowiltijkej, ya kuale kajki san ika yen yon. ⁷ Iwan axan kiné, namejwan okachi kuale xiklapojpolwikan iwan xikyolosewikan, para amo sa tekitl ma moyolotlamiti iwan satepan kinekis kikawas in Cristo. ⁸ Por yonik kiné namechtlatlawtia oksemi xikititikan nik ok ankitlasojtlaj. ⁹ Por yonik noiiki, nej achtoj yonamechtajkuililijka para namechitas kox melawak antetlakitakej itech nochí tlamantle. ¹⁰ Axan kiné, katlej namejwan ankitlapojpolwiskej, nej noiiki niklapojpolwies. Tla nej yoniklapojpolwij de itlaj, yonikchij ixpan Cristo, iwan yon se kuale para amejwan. ¹¹ Ma tiklapojpolwikan para amo techtlanis in Satanás, porke kuale tikmatij tlanon yej kineki techtoktis.

Pablo omotekipachoj nijuak oyeka itech weyikan de Troas

¹² Nijuak onajsito itech weyikan de Troas para niktematiltis in kuale tlajtole de Cristo katlej temakixtia, onikitak nik oyekaj miekej tlakaj katlej okinekiaj kikakiskej itlajtol in Señor. ¹³ Pero mach onimomachiliaya kuale ipan noyolo porke amo onikajsik ompa in tokni Tito. Por yonik inwan

onimoyolopachoj in tokniwan iwan oniaj para ik estado de Macedonia.

Itech Cristo titlatlanij

¹⁴ Pero tiktla sojkamachiliaj in toTajtzin Dios porke Yej nochipa kichiwa ma titlatlanikan porke tinemij iwan Cristo Jesús. Iwan Yej kichiwa tejwan ma tiktematiltikan itlajtol iwan ma xoyawi (xitini) ik nian nepa kej itlaj tlamantle ajwiak. ¹⁵ Porke tejwan tikatej kej itlaj tlamantle kuakualtzin ajwiak para Dios, porke tiktematiltiaj in tlamachtile de Cristo iwan kinmaksi nochtin katlej momakixtiaj iwan katlej mopolooaj. ¹⁶ Para nekatej katlej mopolooaj, para yejwan in tlamachtile de Cristo kajki kej itlaj tlamantle katlej kinnekuij iwan kinmiktia. Pero nekatej katlej momakixtiaj para yejwan in tlamachtile de Cristo kajki kej itlaj tlamantle ajwiak katlej kinmaka nemilistle. ¿Akin kiné kipia ixtlamachilistle para kichiwas yin tekitl? ¡Mach akaj! ¹⁷ Tejwan mach tiktematiltiaj itlajtol in Dios para titlantiskej itlaj tomin ken miekej kichiwaj. Sino tejwan tiktematiltiaj itlajtol in Dios ijkón ken Yej technawatia, iwan por yonik titlamachtiaj ika nochí toyolo ixpan Dios porke tisetitokej san se iwan Cristo.

3

Tlajtole de yen katlej yankuik akuerdo

¹ Nijuak ijkín titlapoaj, ¿ankiyejyekoaj namejwan nik titlapoaj kuale para xitechresibirokan? ¿Ankiyejyekoaj moneki tikpiaskej itlaj amatlajkuilole katlej ma tlajto kuale de tejwan para ijkón xitechresibirokan, o noso kox ankiyejyekoaj moneki tamechtlajtlaniliskej itlaj amatlajkuilole katlej ma tlajto kuale de tejwan ken sekimej kichiwaj? ² Pero in amatlajkuilole katlej tejwan tiknekij yen namejwan, porke namejwan ankatej kej se amatlajkuilole katlej ikuilitok ipan toyolo. Iwan nochtin welis kixmatiskej iwan kileroskej. ³ Ijkón namejwan annestoskej kej se amatlajkuilole katlej Cristo okikuiloj iwan tejwan titltlanij. Namejwan ankatej kej se amatlajkuilole katlej mach ikuilitok ika tinta, sino ika iEspíritu in toTajtzin Dios katlej yolitok. Iwan yin amatlajkuilole amo omikuiloj itech itlaj tetl sino omikuiloj ipan namoyolo.

⁴ Tejwan tikpiaj konfiansa inawak Dios de tlan tikijtaj por tlan Cristo kichiwa towan. ⁵ Tejwan mach tikijtaj nik itlaj tlamantle tiwelij tikchiwaj toselti, sino nochí tlan tiwelij tikchiwaj witz de Dios. ⁶ Porke Yej techmachtia tejwan ma tiwelikan kuale ma tiktekipanokan ma tiktematiltikan itlajtol ika se yankuik akuerdo. Yon yankuik akuerdo amo yen tlan itlanawatil Moisés techilwia ma tikchiwakan, sino in yankuik akuerdo yen katlej kisa de itech Espíritu Santo, porke katlej

ijkuitlitoj itech itlanawatil Moisés yon kiwalkui mikilistle, pero in Espíritu Santo kitemaka nemilistle.

⁷ Itlanawatil Moisés omikuiloj itech temej iwan nikuak ovalaj in tlanawatile, ovalaj ika se weyi mawisotlanextle, iwan nikuak in Moisés okinresibiroj in temej, ixko sa tekitl opetlanke asta in judiojtin mach oweliaj okixtlataj. Pero maski in tlanawatile ijkón ovalaj, ipetlanilis opojpolitiaj. Tla yon tlanawatile katlej tetlajyowiltia ika mikilistle oneske ika se weyi mawisotlanextle, ⁸ axan kipia okachi weyi imawisotlanex in yankuik akuerdo para se welis kitekipanos in toTajtzin Dios porke ya techmaka iEspíritu Santo. ⁹ Kijtosneki tla in tlanawatile katlej tetlajyowiltia ika mikilistle okipiaya weyi imawisotlanex, axan okachi weyi imawisotlanex kipia tiktematiltiskej itlajtol in Dios katlej techtoktia ma tiekan tichipawakej inawak Dios. ¹⁰ Porke in tlanawatile katlej achtoj okipiaya weyi imawisotlanex, axan mach ok kipia imawisotlanex, porke yin yankuik akuerdo kipia okachi sa tekitl weyi imawisotlanex. ¹¹ Tla okipiaya weyi imawisotlanex in tlanawatile katlej san kanaj keski tonale owejkaj, axan in yankuik akuerdo kipia okachi weyi imawisotlanex porke yetos iktlanke (ik tlami).

¹² Tejwan tiktematiltiaj itlajtol in Dios ika ixchikawalistle iwan tiktlalaj toyolo itech yin yankuik akuerdo. ¹³ Tejwan mach tikchiwaj ken Moisés, porke yej omoitzakuaya ika se tzotzole para in tlakaj de Israel amo ma kitakan kenik pojpolitiw in petlanalistle katlej mach owejkaj opetlantoka. ¹⁴ Pero yejwan okuatlakuawakej iwan mach okimomakayaj kuenta in ya wejkawitl akuerdo. Iwan asta axan, nikuak momachiaj in ya wejkawitl akuerdo, mach yipa ya kimomakaj kuenta, kej yeskia tzaktok inmixtlamachilis ika se tzotzole iwan mach welij ixtlapowij. Pero welis ixtlajtlapowiskej tla yejwan kineltokaskej in Cristo. ¹⁵ Iwan asta axan mach itlaj welij kimomakaj kuenta nikuak momachiaj tlan okikuiloj in Moisés, kej yeskia se tzotzole kinmixtzakuilijtok inmixtlamachilis. ¹⁶ Pero nikuak se tlakatl kineltoka in Señor, in tzotzole katlej kixtzakuilia machiwa. ¹⁷ Porke in toSeñor Jesucristo Yej Espíritu, iwan nikuak iEspíritu in Señor kajki ipan iyolo se tlakatl, momakixtia de itech tlajtlakole iwan ya weli mijkuania inawak Dios. ¹⁸ Pero tejwan mach ok tikatej kej yeskia tiixtzaktokej ika se tzotzole, tejwan axan tikatej kej se teskatl katlej kinextia imawisotlanex in toSeñor. Iwan ijkón tejwan timochijtiwej okachi ken Yej, porke nochipa tikpiaj okachi de imawisotlanex. Nochi yin kichiwa yen iEspíritu in Señor.

4

¹ Dios otechiknomaj iwan otechmakak yin tekitl iwan por yonik tejwan mach timosotlawaj. ² Tejwan tiktlaliaj se lado tlan se kichiwa ichtaka tlan amo kuale iwan tepinatij, mach titlakajkayajtinemij iwan mach tikpatlaj itlajtol in Dios. Sino tejwan tikitaj tlan melawak ixpan Dios iwan tiknekij ke nochtin in tlakaj ma techkakikan ika kuale intlalnamikilis. ³ Pero tla sekimej mach kimomakaj kuenta in kuale tlajtote katlej temakixtia katlej tejwan tiktematiltiaj, mach welij kimomakaj kuenta porke yejwan mopolojtokej itech tlajtakole. ⁴ In Satanás katlej kajki kej dios de yin tiempo ixko yin tlaltikpak, yokintlamachilispolo para mach ma tlanel-tokakan iwan mach ma kitakan itlanex in kuale tlajtote katlej temakixtia. Yon kuale tlajtote katlej temakixtia petlani ken imawisotlanex in Cristo. Iwan itech Cristo moteititia in Dios. ⁵ Nijuak titetlapowiaj, mach titetlapowiaj itlaj de tejwan, sino titetlapowiaj de Jesucristo katlej yen toSeñor. Iwan tejwan san titlapalewijkej de amejwan porke Jesús techtlasojtla. ⁶ Dios Yej otlanawatij ma petlani in tlanextle ijlik tlatleyualotl, iwan okichij ma petlani itlanex ipan toyolo, para ma tikixmatikan imawisotlanex in Dios katlej petlani itech ixko in Jesucristo.

Kenik moneki se nemis ika totlaneltokalis

⁷ Tejwan tikatej kej se xoktzin katlej totech tentok miek tlamantle patíoj, para ma mota nik yon tlamantle witz de Dios iwan mach de tejwan. ⁸ Iwan maski tipanoaj san tlan amo, tiwelij timakisaj. Iwan maski mach ok tikmatij tlanon tikchiwaskej, mach timoyolotlamitaj. ⁹ Iwan maski techtlajyowiltiaj, Dios mach techkawa toselti. Iwan maski techkojkokoaj, mach techtlajtlamiaj. ¹⁰ Iwan san kanik tiawij, tejwan timotemaktiaj (timotemaktiliaj) para timikiskej ken Jesús omikke, para ijkón noijki totech ma mota inemilis in Jesús. ¹¹ Iwan mientras ok tiyolitokej, tejwan nochipa timotemaktiaj maski ma techmiktikan por tiktekipanoaj in Jesús. Pero yon mochiwa para ma mota inemilis in Jesús itech totlalnakayo katlej weli miki. ¹² Ijkón kiné, tejwan por tiktematiltiaj itlajtol in Señor, in mikilistle yolik techtlajtlamijtiw, para ijkón namejwan welis ankajsiskej in yankuik nemilstle katlej mach keman tlamis.

¹³ In tiotlajkuilole kijta: “Onikneltokak, por yonik onitlajtoj.” Tejwan noijki tikpijaj yon tlaneltokalistle iwan por yonik titetlapowiaj. ¹⁴ Porke kuale tikmatij nik in Dios katlej okiyolitij in toSeñor Jesús, tejwan noijki techyolitis ijkón ken Yej okiyolitij. Dios techwikas inawak, tejwan iwan namejwan noijki. ¹⁵ Nochi tlan titlajyowiaj, se kuale para amejwan para

tamechpalewiskej. Para ijkón ma momiekilikan okachi ak-inmej ma tlaneltokakan ika iteiknotlamachilis in Dios, iwan ijkón okachi miek tlasojkamachilistle kimakaskej in Dios, iwan kiweyikixtiskej iweyilis in Dios.

¹⁶ Por yonik mach timosotlawaj de titetlapowiaj, porke maski totlalnakayo tlajtlantiw, toanima nochipa yankuixtiw. ¹⁷ Porke in tlajyowilistle katlej tipanoaj ixko yin tlaltikpak, yon san achitzin iwan san panoa. Iwan por yon tlan tipanoaj, Dios techmakas weyi tomawisotlanex. Iwan yon mawisotlanextle sa tekitl okachi kuale iwan amo ken tlan axan tipanoaj. ¹⁸ Por yonik mach tikchiwaj kuenta tlan axan tikitaj, sino yen tlan amo tikitaj. Porke katlej axan mota mach wejkawas, pero katlej mach mota yetos iktlanke (ik tlami).

5

¹ Tikmatij, tla totlalnakayo pojpoliwis katlej kajki kej se kale katlej mach wejkawa, Dios techmakas oksé totlalnakayo ompa ilwikak katlej yetos iktlanke (ik tlami), iwan totlalnakayo mach yetos kej se kale katlej kichiwaj in tlakaj katlej mach wejkawa. ² Axan sa tekitl titenaj porke titlajyowiaj, porke sa tekitl tiknekij tikpatlaskej totlalnakayo katlej axan tikpiaj kej yeskia tokal ixko yin tlaltikpak, para tiaskej itech oksé totlalnakayo katlej yetos kej tokal ompa ilwikak. ³ Yen yon tiknekij, para ijkón, amo tieskej san ika toanima katlej mach kipia itlalnakayo, sino tikpiaskej se yankuik totlalnakayo para amo timotaskej kej tixitlatzikej. ⁴ Iwan mientras tikatej itech yin totlalnakayo kej yeskia kale, titenaj iwan titlajyowiaj. Yon amo kijtosneki ke tiknekij tikpojpoloskej in totlalnakayo, sino tiknekij Dios ma techpatili totlalnakayo katlej axan tikpiaj iwan ma techmaka se totlalnakayo de ilwikak, para ijkón totlalnakayo katlej miki ma pojpolitiw itech katlej yankuik tonemilis. ⁵ Dios techyektlalilijtok yin tlamantle iwan yotechmakak iEspíritu Santo para kuale ma tikmatikan nik ijkón tlapanos tlan techilwia.

⁶ Ijkón kiné, nochipa tiktaliaj toyolo inawak Dios, iwan mientras ok tikatej itech yin totlalnakayo, ayamo tikatej ilwikak iwan toSeñor. ⁷ Tejwan tikchiaj nik mochiwas tlan Dios kijta porke tikneltokaj maski mach ya tikitaj. ⁸ Pero sa tekitl tipakij por tlan tipanoskej, tiknekiskiaj yotikajkej yin totlalnakayo, para tiaskej tichantitiwej iwan toSeñor. ⁹ Por yonik tejwan nochipa tiktemoaj kenik welis tikpaktiskej in toSeñor, maski tieskej itech yin totlalnakayo o noso tieskej ompa ilwikak ika oksé totlalnakayo. ¹⁰ Porke tinochtin tikpiaj de timoteixpantitiwej ixpan Cristo, iwan kada se tlakatl kire-sibiros tlan kitokaroa segúñ tlan okichij, kox kuale o noso

amo kuale, nikuak onemia ika itlalnakayo katlej okipixke ixko yin tlaltikpak.

Tlajtole de yolosewilistle

¹¹ Por yonik, tikmatij nik nochtin moneki ma kimakasikan toTajtzin Dios. Iwan por yonik noijsi tiktikpanoaj in toSeñor para oksekimej noijsi ma kineltokakan. Dios kigmati nik tikchiwaj tlan kuale iwan nikchia ke namejwan noijsi ankimatij itech namotlalnamikilis. ¹² Amo tiknekij titlapoaskej kuale de tejwan, sino tiknekij namejwan xiwe likan ximoweyikixtikan de tejwan, para xiwelikan xikinnankilikan katlej moweyinekij de tlan yejwan tetlapowiaj, pero amo tetlapowiaj ika kuale inyolo. ¹³ Iwan tla sekimej kijtaj tilokojojin por tlan tikchiwaj, tilokojojin kiné porke tiktekpanoaj in Dios. Iwan tla tikpiaj kuale totlalnamikilis, yon para amejwan welis tamechpalewiskej. ¹⁴ Itlasojtlalis in Cristo technawatia ijkón ma tikyejyekokan, iwan tikmatij nik in Cristo omikke por tinochtin, iwan por yonik tinochtin otimikkej itech Cristo imikilis. ¹⁵ Cristo omikke por nochtin in tlakaj, para ke katlej kipiaj nemilistle inawak Cristo amo san yejwan ma monawatikan, sino ma kichiwakan tlan Cristo kineki, katlej omikke iwan omoyolkuij por yejwan. ¹⁶ Por yonik tejwan mach ok tикиmitaj in oksekimej kej kualtin tlakaj o noso mach kualtin según ken tejwan tикиmitaj ixko yin tlaltikpak. Iwan nikuak ayamo otitlaneltokayaj, noijsi ijkón otikitayaj in Cristo, otikitayaj kej yeskia akaj oksé tlakatl, pero axan mach ok ijkón tikitaj. ¹⁷ Ijkón kiné, akin powi inawak Cristo, yankuik tlakatl mochiwa. Inemilis mach ok kajki ken achtoj, sino ya pewe ika oksé yankuik inemilis.

¹⁸ Iwan nochí yin witz de Dios. Dios omoyolosewij tonawak por tlan Cristo okichij. Iwan Dios noijsi otechmakak in tekitl para ma tикиmatiltikan in tlakaj kenik welis kajsiskej yolosewilistle inawak Dios. ¹⁹ Kijtosneki, Dios oyeka iwan Cristo okichijtoka ma kajsikan yolosewilistle in tlaltikpak tlakaj inawak Dios, iwan mach okinchiwilij kuenta intlatlakol. Iwan yin yen tekitl katlej Dios otechmakak para ma tикиmatiltikan in tlakaj kenik welis kajsiskej yolosewilistle inawak Dios. ²⁰ Ijkón kiné, tejwan tikatej kej titlatlaniltin de Cristo. Kej yeskia Yej inewian amechnotza ika tlan tejwan tamechmatiltiaj. Tamechtlatlawtiaj kiné, ijkón ken technawatia Cristo: xikresibirokan in yolosewilistle de Dios. ²¹ Cristo mach okichij nion se tlajtlakole. Pero por tejwan, Dios okitoktij in Cristo kej yeskia yen okichij nochí in tlajtlakole de ixko yin tlaltikpak. Ijkón omochij para Dios ma techresibiro kej tichipawakej nikuak tipowij inawak Cristo.

6

¹ Ijkón kiné, tejwan iwan namejwan san sekan titekipanoaj inawak Dios. Iwan tamechtlatlawtiaj amo san xikawiltikan iteiknotlamachilis in Dios. ² Porke itech in tiotlajkuilole in Dios kijta:

Onimitzkakke itech se tonale nijuak omonekia, iwan itech se tonale nijuak omonekia nimitzmakixtis onimitzpalewij.

Xikkakikan kiné, axan Dios kineki amechresibiros. Yoajsiko in tonale para Dios amechmakixtis.

³ Mach akaj tiknekij tiktzakuiliskej itech iojwi in toTatzin Dios por itlaj tlan amo kuale tikchiwaj, para mach akaj ma kijto mach kuale in totekiw tlan tikchiwaj. ⁴ Sino itech nochí tlan tikchiwaj tiktetititiaj nik melawak titekipanojkej de Dios. Por yonik tikxikoaj miek tlamantle, titlajyowiaj, techpoloa tlan tiknekij iwan tipanoaj miek tlamantle. ⁵ Techwitekij, techtzakuaj, miekej techtemoaj para techkitzkiskej. Titekipanoaj chikawak, mach tiyekkochij iwan nion mach tiyektlakuaj. ⁶ Noijki tejwan tiktetititiaj nik tikpiaj tonemilis chipawak, tikmatij tlan Dios kineki, tikmatij tkmoxikoltiaj tlan tipanoaj. Noijki tikchiwaj tlan kuale para oksekimej. Tikpiaj in Espíritu Santo ipan toyolo, iwan tikmatij titetlasojojtaj ika kuale toyolo. ⁷ Tiktematiltiaj tlan melawak iwan tiktetititiaj ipoder in Dios itech nochí tlan tikchiwaj. Tiktetkipanoltiaj in tochipawkanemilis kej yeskia tikinkitzkijtokej tepestin para ika titemagaj iwan para ika timopalewiaj. ⁸ Kemanti techtlakamatij iwan kemanti mach techtlakamatij. Kemanti kuale tlapoaj de tejwan iwan kemanti tlapoaj biero de tejwan. Kemanti techitaj kej titekajkayajkej maski tejwan tikitaj tlan melawak. ⁹ Kemanti techitaj kej yeskia mach techixmatij maski kuale techixmatij. Kemanti asta ya techmiktisnekij, pero ok tiyolitokej. Kemanti techtlajyowiltiaj, pero mach techmiktiaj. ¹⁰ Maski timoyolkokoaj, mach semi tikpoloaj topakilis. Maski tipobrestin, miekej tикиnrikojtiliaj inawak Dios. Iwan maski amitlaj tikpiaj, tejwan tikpiaj nochí tlan okachi ipatij.

¹¹ Nokniwan de Corinto, yotamechtlapowijkej ipan melajka ika nochí tlan tikpiaj ipan toyolo. ¹² Tejwan tamechilwiaj nochí tlan tikpiaj ipan toyolo, pero namejwan mach antechilwiaj nochí tlan ankipiaj ipan namoyolo. ¹³ Axan kiné, namechtlapowia kej yetoskia annopilwan. Xinechtlasojtlakan ijkón ken nej namechtlasojtla.

Tejwan tikatej kej ikal in Dios katlej yolitok

¹⁴ Amo iwan ximosetilikan katlej mach tlaneltokak inawak Cristo. ¿Kox welis mosetilis se katlej yolchipawak iwan se

katlej mach yolchipawak? O noso, ¿kox welis yetos tlatleyualotl kan onkaj tlanextle? ¹⁵ O noso, ¿kox welis kipiaskej san se inyolo in Cristo iwan Satanás? O noso, ¿kox welis san se tlalnamikilistle kipiaskej se katlej kineltoka in Cristo iwan se katlej mach kineltoka in Cristo? ¹⁶ O noso, ¿kox welis san sekan yeskej itiopan in Dios iwan katlej mach melawak diosmej? Namejwan kiné, ankatej kej itiopan in Dios katlej yolitok. Ijkón ken Dios inewian okijtoj:

Nichantis iwan ninemis inwan.

Nej nietos niinDios,

iwan yejwan yeskej noaxkawan.

¹⁷ Por yonik in toSeñor noijski kijta:

Xikisakan iwan xikinkawakan katlej mach tlaneltokaj.

Xikkawakan se lado tlan amo chipawak,

iwan Nej namechresibiros.

¹⁸ Nej nietos namoPapan,

iwan namejwan anyeskej annopilwan.

Ijkín kijta in toSeñor katlej kipia nochí poder.

7

¹ Ijkón kiné, notetlasojkaikniwan, ika yin tlajtole katlej yotechkakitijkej, amo ma tikchiwakan itlaj tlan welis techitlakos itech totlalnakayo iwan itech toanima. Kuale ma timoyolchipawakan iwan kuale ma tiktakitan in toTajzin Dios.

Kenik omoyolkuepkej in tlakaj de Corinto

² Xitechresibirokan ipan namoyolo. Tejwan mach akaj itlaj otiktoktijkej tlan amo kuale, mach akaj otikyekankej itech se ojtle katlej mach kuale, iwan nion amakaj otikayajkej. ³ Mach namechilwia yin para namechtajtlakoltis. Nej achtoj yonamechilwij nik namejwan namechpia ipan noyolo. Tla tiyolitoskej o noso timikiskej, nochipa tamechpiaskej ipan toyolo. ⁴ Melajka niktlalia noyolo amonawak iwan nimoweyikixtia por amejwan. Maski sa tekitl titlajyowiaj, nej sa tekitl nipaki iwan nimoyolojchikawa por yen namone-milis.

⁵ Desde ikuak otejkokoj nian Macedonia, mach weli timosewiaj, sino ik nian nepa tipanoaj san tlan amo, porke in tlakaj katlej mach tlaneltokakej otechtemoayaj para techtoktiskej tlan amo kuale iwan ipan toyolo otikpiayaj nemaj-mawtile. ⁶ Pero Dios, katlej kinyolojchikawa katlej moyolotlamitiaj itech tlajyowilistle, otechyolojchikaj nikuak oajsiko in Tito. ⁷ Iwan amo otipakej san por otiktakej in Tito, sino noijski otipakej porke otechilwij kenik namejwan ankiyolochikajkej nikuak oajsito amonawak. Yej otechilwij nik sa tekitl ankinekij antechitaskej namejwan, iwan otechilwij nik

anmoyolkokoaj iwan anmotekipachoaj por nej. Por yonik, ika nochí yon, nej sa tekitl onipakke okachi.

⁸ Maski in tlajkuilolamatl katlej achtoj onamechijkUILILij ika anmoyolkokojKEj, axan mach nechtlanemilILTia. Nikmati nik oamechyolkokoj in amatlajkuilole, pero san kanaj keski tonale. ⁹ Axan nipaki. Pero mach nipaki por anmoyolkokojKEj, sino porke namoneyolkokol oamechpalewij para xi-moyolkuepakan. Namejwan anmoyolkokojKEj ken Dios okimonekiltij, kijtosneki in totlajkuilolamaw mach oanmechtoktij itlaj tlan amo kuale. ¹⁰ Katlej moyolkokoaj ken Dios kimonekiltia, moyolkokoaj de intlajtlakol, iwan por yonik Dios kinmakixtia, iwan mach moneki se moyolkokos por yon. Porke in tlakaj katlej mach kineltokaj Dios, moyolkokoaj pero mach kinekj moyolkuepasKEj, iwan por yonik yejwan mopolosKEj iktlanKE (ik tlami) ijtk mikilistle. ¹¹ Namejwan oanmoyolkokojKEj ken Dios okimonekiltij, iwan axan xikitakan tlanon ankitlanKE por yon. Onamechyektlajtlachialtij iwan axan ya annemij ika melajkayotl iwan ya welis ankitosKEj tlanon oankichijKEj. In tlajtlakole katlej onamechmatiltij itech nekáj notlajkuilolamaw, oamechkualanij iwan oamechmajmawtij. San niman ankinekiaj annechitanij, iwan ankinekiaj ankitlajyowiltianij katlej otlajtlakoj. Por yonik kiné, namejwan ankiteitijKEj nik mach ankipiaj tlajtlakole itech yon tlan otlamochij. ¹² Ijkón kiné, maski onamechijkUILILij nekáj amatlajkuilole, nej mach onikchij por nekáj tlakatl katlej okichij tlan amo kuale, iwan nion por yen nekáj katlej ijkón opanok, sino onikchij ixpan Dios para ximatikan nik sa tekitl timotlanemilILTiaj por amejwan. ¹³ Por yonik, nikuak otikmatKEj nik namejwan antechtlasojtlaj, ika yon otimoyolojchikajKEj.

Pero noijki sa tekitl otipakej porke otikitakej in Tito sa tekitl paki, porke aminochtin namejwan ankipalewijkej para yej ma moyolojchikawa. ¹⁴ Nikuak Tito ayamo oyaya amonawak, onikilwij nik sa tekitl onipakia por amejwan. Axan yej yoejkok nonawak iwan mach nipinawa de tlan onikilwij. Sino nochí tlan otamechilwijKEj oyeka melawak, iwan Tito noijki okimomakak kuenta nik melawak nochí tlan nej onikilwij. ¹⁵ Iwan Tito okachi amechtlasojtlaj nikuak yej kelnamiki de kenik ankitlakitakej itech nochí tlan oamechilwij. Iwan noijki de kenik ankiresibirojKEj namejwan ika nemajmawtile porke ankinekiaj ankichiwasKEj tlan kuale. ¹⁶ Por yonik sa tekitl nipaki porke kuale nikmati nik welis niktlalis nochí noyolo amonawak.

In tlaneltokakej otlapalewijkej ika pakilstle

¹ Axan nokniwan, tiknekij tamechmatiltiskej de kenik omoteitij i teiknotlamachilis in Dios itech in tiopantlaneltokakej de estado de Macedonia. ² Maski in tokniwan opanokej miek tlajyowilistle para Dios ika okinyejejekoj, yejwan kipiaj pakilstle. Iwan maski sa tekitl pobrestin, yejwan ika kuale inyolo okitemakakej tlan okipiayaj kej yeskia rikojtin. ³ Yejwan innewian ika pakilstle okitemakakej mach san yen tlan owelikej okitemakakej, sino asta okachi de tlan owelikej. Iwan yon nej kuale nikmati. ⁴ Yejwan otechtlatlawtijkej ma tikinkawilikan ma kinpalewikan tokniwan de Jerusalén katlej iaxkawan Dios para ma kinpalewikan ika tlan kinpoloa. ⁵ Yejwan okichijkej okachi de tlan tejwan otikchiayaj. Achtoj omotemaktijkej (omotemaktilijkej) okachi inawak toSeñor, iwan satepan omotemaktijkej tonawak, ijkón ken Dios okimonekiltij. ⁶ Por yonik, nikuak otikitakej tlan okitemakatokaj in tokniwan de Macedonia, ikuakón otiklatlawtijkej in Tito ma wia ma amechitati. Porke in tokni Tito yen akin opéj amechpalewia desde ikuak yakinika opéj ankololoaj namotomin para ankitetliokoliskej, iwan otiknekiaj ma amechyolojchikawa para ankitlamiskej in tekitl de ankololoskej yon tomin. ⁷ Namejwan antlapanawiaj itech nochi: antlapanawiaj de ankipiaj weyi namotlaneltokalis, ankimatij antlamachtiaj, ankipiaj ixtlamachilistle, ankimatij antlapalewiaj iwan ankimatij antechtlasojtlaj. Iwan axan, namejwan noijki moneki antlapanawiskej de xiktemakakan yon tomin para ankitetliokoliskej.

⁸ Mach namechnawatia nik ijkón moneki ankichiwaskej. Sino nej nikneki namejwan xikmatikan kenik in oksekimej kimatij tlapalewiaj, para ijkón noijki namejwan xikmatikan kox melawak antetlasojojtaj. ⁹ Porke namejwan ya ankixmatij iteiknotlamachilis in toSeñor Jesucristo por tlan okichij por amejwan. Maski Yej okipiaya nochi rikojoytl, omochij pobre por yen amejwan, iwan itech ipobrejyo, namejwan anmorikojtilijkej inawak Dios.

¹⁰ Nej nikneki namechilwis okachi kuale xiktlamikan in tekitl de ankololoaj in tomin para ankitetliokoliskej katlej ankipewaltijkej ya se xiwitl. Yon se kuale para amejwan. Namejwan achtoj ankiyejejekojkej ankitemakaskej yon tomin, iwan yen namejwan achtoj opéj ankitemakaj. ¹¹ Axan kiné, xikchijtokan yon tekitl asta xiktlamikan. Ijkón xikchijtokan ika nochi amoyolo katlej ankipixkej desde achtoj. Xiktemakakan kiné, según tlan ankipiaj. ¹² Porke tla se

kitemaka itlaj ika noch i yolo, miek o noso amo miek, Dios kitlasojkamati. Yej mach techtlajtlanilia tlan amo tikpiaj.

¹³ Nej mach nikneki sejpa itlaj ma amechpolo por ankinpalewiaj oksekimej, ¹⁴ sino moneki aminochtin xikpiakan tlan ika anpanoskej. Axan namejwan ankipiaj tlan ika welis ankinpalewiskej itech tlan kinpoloa in oksekimej. Ajsis tonale nikuak namejwan itlaj amechpolos, yejwan ikuakón noijki welis amechpalewiskej. Iwan ijkón, se mopalewijtias para amakaj itlaj ma kipolo. ¹⁵ Ken kijta in tiotlajkuilole: "Akin okololoj miek mach okisobraroj. Iwan akin okololoj san tzikitzin (achitzin) mach okipoloj."

Tito iwan itekipanojkaikniwan

¹⁶ Niktlasojkamachilia in toTajtzin Dios, porke Yej okichij de ma motekipacho in Tito por amejwan para ma amechpalewi, ijkón ken nej noijki onimotekipachoj. ¹⁷ Yej okijtoj kuale kajki nikuak onikilwij ma wia ma amechitati oksemi. Yej motekipachoj por amejwan, iwan nikmati nik yipa yani, porke yej sa tekitl kineki amechitas oksemi.

¹⁸ Tiktitanij iwan tokni Tito se tokni katlej kuale kixmatij iwan kuale kitlakitaj nochtin in tiopantlaneltokakej de ik nian nepa, por yen kuale kitoma in tlajtole katlej temakixtia. ¹⁹ Iwan mach san yen yon, sino noijki in tiopantlaneltokakej okipejpenkej yin tokni para ma wia towan Jerusalén, kan katej oksekimej tokniwan para tikanmitkiliskej yin tomin katlej mololojtok. Ijkin tikchiwaj para tiktetitiskej iweyikixtilis in toSeñor, iwan para tiktetitiskej nik melawak tiknekij timopalewiskej se iwan oksé. ²⁰ Iwan tla tiaskej san sekan, mach akaj welis techpojpoas de kenik tiktetipanoltiaj in tomin katlej miek yomololoj. ²¹ Tiknekij tikchiwaskej itlaj tlamantle ika kuale toyolo, amo san ixpan Dios, sino noijki inmixpan tlakaj.

²² Noijki inwan tiktitanij oksé tokni, katlej de miek tlamantle yotechtitij nik ika noch i yolo kineki tlapalewis. Iwan axan yej okachi kineki tlapalewis, porke yej sa tekitl kitlalia iyolo amonawak porke amechixmati. ²³ Tla akaj itlaj amechtlajtlania de Tito, xikilwikan nik in yej tekipanoa nowan para tamechpalewiskej. Iwan tla amechtlajtlaniaj por yen oksekimej omen tokniwan, xikinmitwikan nik yejwan tiopantlaneltokakej kintitlanij, iwan por yen tlan kichiwaj moteititia iweyikixtilis in Cristo. ²⁴ Por yonik, nikuak yejwan ajsitiwej amonawak, xikinmititikan nik melawak ankintlasojtlaj, iwan para ijkón nochtin in tiopantlaneltokakej ma kimatikan. Iwan xikinmititikan por tlanik timoweyinekij por amejwan.

9

Okololojkej tomin para kintliokoliskej oksekimej tokniwan

¹ Iwan de yen yin tomin katlej mololos para ika ankinpalewiskej katlej iaxkawan Dios, mach ok moneki namechtalajkuililis para xikinpalewikan. ² Ya nikmati nik namejwan ankinekij ankinpalewiskej. Nej kuale nikintlapowijitiwitz de amejwan katlej katej itech estado de Macedonia, nik desde ya se xiwitl namejwan katlej ankatej itech estado de Acaya, nik ya ankatej ika kuale amoyolo para ankinpalewiskej. Iwan nijuak okimatkej tlan namejwan ankinekij ankichiwaskej, miekej tokniwan de Macedonia omoyolojchikajkej para noijski tlapalewiskej. ³ Pero nikintitlani yinmej tokniwan para ma kimatikan nik melawak tlan yonikijtoj de amejwan. Kijtosneki sa xikpixtokan namotomin para ankitemakaskej, ijkón ken nej yonikinmilwij in tokniwan de Macedonia nik ya ankipixtokej yon tomin. ⁴ Amo san kichiwa witzej nowan sekimej de yejwan tokniwan iwan anmechajsikiwej ayamo ankololoaj namotomin. Porke tla amo, tejwan timopinatiskej, pero namejwan okachi anmopinatiskej porke yonikinmilwij nik ya ankipixtokej yon tomin. ⁵ Por yonik onikyejyekoj kuale nikintlatlawtis in tokniwan achtoj ma wian ma amechitatij, iwan ma amechpalewikan xikololokan namotomin katlej ya ankipojkej ankitemakaskej. Iwan nijuak nej najsiti, namotomin ya ankipixtoskej, iwan ika yon motas nik namejwan ankitemakaj ika amopakilis iwan amo por akaj amechnawatia ijkón xikchiwakan.

⁶ Xikelnamiktokan yin tlajtole: Akin tooka san tzikitzin (achitzin), noijski san tzikitzin tlan kipixka. Iwan akin tooka miek, noijski miek tlan kipixka. Ijkón kiné, akin kitemaka san tzikitzin noijski san tzikitzin tlan kiresibiroa. ⁷ Kada se ma kitemaka tlan kimachilia ipan iyolo kitemakas. Amo ma kiyolkoko iwan nion amo afuersa. Porke Dios kitlasoxtla akin kitemaka ika pakilstle. ⁸ Dios welis amechmakas namejwan nochi tlamantle de tlatiochiwalistle para nochipa ankipiaskej nochi tlan moneki, iwan noijski ankipiaskej miek tlan ika welis antlapalewiskej itech nochi kuale tekitl. ⁹ In tiotlajkuilole ijkón kijta:

Se katlej kuale tlakatl kinmaka miek tlamantle katlej pobrestin,

iwan yon kuale tlamantle katlej kichijtok mach keman tlamis. ¹⁰ Porke in Dios katlej kimaka semiya in tlatoookak, iwan kiskaltia para ijkón in tlatoookak ma kipixka iwan ma kikua, Yej noijski amechmakas miek semiya iwan kuale tlakilotl para ijkón noijski welis ankitemakaskej miek tlamantle para ika ankinpalewiskej oksekimej. ¹¹ Dios amechmakas amejwan

nochi tlamantle rikojoyotl para nochipa welis ankitemakaskej miek tlamantle ika pakistotle. Iwan nijuak tикинмакаскей in tokniwan in tomin katlej namejwan ankintitlaniliskej para ika ankinpalewiskej, yejwan kitlasojkamachiliskej in toTajtzin Dios. ¹² Porke yin tomin katlej amejwan ankintitlaniliaj in tokniwan, mach se kinmaka san yen tlan kinpoloa, sino noijki tikchiwaj yejwan ma kitlasojkamachilikan miek in toTajtzin Dios. ¹³ Yejwan kiweyikixtiskej in toTajtzin Dios por yen tlan ankinmakaj katlej ika ankinpalewiskej, porke yejwan kitaskej nik melawak ankitlakitaj in kuale tlajtole katlej temakixtia de Cristo katlej namejwan ankijtaj ankinel-tokaj. Yejwan noijki kiweyikixtiskej in toTajtzin Dios por tlan ankinmakaj ika pakistotle, para yejwan iwan para nochtin oksekimej. ¹⁴ Iwan yejwan motiotzajtziliskej inawak Dios para ma amechpalewi, iwan amechelnamiktoskej ika tlaso-jtlalistle por yen iteiknotlamachilis in Dios katlej kiteititia amonawak. ¹⁵ Ma tiktlasojkamachilikan in toTajtzin Dios porke otechmakak se weyi tlatetliokolile, iwan asta mach tikajsij in tlajtole para tikijtoskej kenamij in yon.

10

Pablo otlanawatij kej tlatitlanile

¹ Nej, niPablo, namechtlatlawtia ika noyolyamanilis iwan ika notlaso-jtlalis ijkón ken Cristo okichiwaya, xinechkak-ilikan tlan namechilwis. Sekimej kijtaj ke nijuak nikaj amowan nimotlalia wel niyolyamanke, pero nijuak mach ompa nikaj amowan namechtlapowia wel ika chikawak itech notlajkuilolamaw. ² Namechtlatlawtia kiné, amo xinech-toktikan sekimej ma nikintlapowi ika chikawak nijuak na-jisiti amonawak. Porke sekimej kijtaj ke tejwan titekipanoaj para ika timoweyinekiskej ken oksekimej tlakaj kichiwaj, iwan amo ken Dios tlanawatia. Moneki nikintlapowis ika chikawak katlej ijkón kijtaj. ³ Maski tejwan titlaltikpak-tlakaj, mach titemagaj ken sekimej tlakaj kichiwaj ixko yin tlaltikpak. ⁴ Porke mach moneki tикинпиаскей tepostin para ika titemagaskej ken kintekipanoltiaj in tlaltikpaktlakaj, sino tejwan tiktakipanoltiaj ipoder in Dios, katlej weli kipo-jpoloa ipoder in Amo Kuale Tlakatl. ⁵ Tikpojpoloaj nochti-layejyekolistle katlej mach kuale iwan moweyineki iwan mach kitekawilia ma se kixmati in Dios. Nochi in tlalnamik-listle de tlakaj tiktakiaj ma kitlakita in Cristo. ⁶ Iwan nijuak namejwan ya kuale ya ankimomakakej kuenta kenik moneki ankitlakitaskej in Cristo, ikuakón kemaj tikintlajyowiltiskej nekatej katlej mach kitlakitaj in Cristo.

⁷ Namejwan ankitaj akaj san yen ik tlixko. Tla akaj melawak kimachilia ipan iyolo nik de Cristo, kuale ma kimatikni in tejwan noijki de Cristo. ⁸ Maski okachi ma nimoweyineki ika totlanawatil, mach onkaj tlan ika nippinawas, porke in Señor otechmakak yin tlanawatile para tamechiskaltiskej itech namotlaneltokalis, iwan amo para tamechijtlakoskej. ⁹ Amo nikneki ma mota kej nikneki namechmajmawtis ika noamatlajkuilol. ¹⁰ Sekimej kijtaj ke noamatlajkuilolwan tlapoaj ika chikawak, pero nikuak nikaj amowan mach nitlapoa ika chikawak iwan mach amechpaktiaj nik nitlapoa. ¹¹ Pero akinmej ijkón kijtaj, ma kimatikan ke ijkón ken titlapoaj itech totlajkuilolamawan, ijkón noijki tikchiwaskej nikuak tieskej amonawak.

¹² Mach timixewiaj timoparejaroskej iwan nion mach tiknekij tietoskej ken oksekimej katlej momachiliaj sa tektitl wejweyikistokey (wejweyititokey). Yejwan motamachiwaj iwan moparejaroaj san entre yejwan, iwan ijkón yejwan innewan kiteititiaj nik mach itlaj weli kimomakaj kuenta. ¹³ Tejwan mach timoweyinekij itech tlan amo techtokaroa. Tejwan tiknekij tikchiwaskej in tektitl tlan Dios techmaka ma tikchiwakan. Iwan namoweyikan de Corinto kajki itech se lugar kan Dios kineki ma tiktekipanokan. ¹⁴ Tejwan mach otiajkej okachi ik ne de kan omonekia tianij, iwan por yonik otajsitoj amonawak. Iwan yen tejwan katlej achtoj otajsitoj ompa Corinto para otamechmatiltijkej in kuale tlajtole katlej temakixtia. ¹⁵ Mach timoweyinekij ika se tektitl katlej oksekimej yokichijkej. Sino tikchiah okachi ma moskalti namotlaneltokalis inawak Dios iwan ijkón noijki in totekiw moskaltis okachi entre namejwan, pero nochipa titekipanoskej kan techtokaroa. ¹⁶ Iwan satepan welis tiktematiltiskej in kuale tlajtole katlej temakixtia okachi wejka de kan amejwan ankatej. Pero mach keman timoweyinekiskej ika se tektitl katlej oksekimej yokichijkej.

¹⁷ Tla akaj kineki moweyinekis, ma moweyineki por tlan toSeñor kichiwa. ¹⁸ Porke mach itlaj ipatij nikuak se tlakatl kiyeyekoa iwan tlajtoa kuale de yej mismo, sino okachi ipatij nikuak in Dios tlajtoa kuale de se tlakatl.

11

Pablo otlapoj de yen nekatej tlatitlaniltin tekajkayajkej

¹ Nikneki xinechkakikan achitzin maski ma mokaki notlajtol kej yeskia nikuatlapolojtok. Nikneki xinechxikokan.

² Nej namechchiwa kuenta porke Dios ijkón kineki. Onamechtemakak kej yeskia onamechnamiktij inawak se amookich, kej yeskia oniktemaktij (oniktemaktij)

se ichpochtle chipawak inawak Cristo para ma yeto kej iokich. ³ Pero ijkón ken koatl okimatke kenik okichij okikajkayaj in Eva, nej nimomawtia tla namejwan noijki amechkajkayawaskej iwan amechijtlakoliskej namotlamachilis, iwan mach ok ankitlasojtlaskej in Cristo ika nochí amoyolo. ⁴ Nimomawtia porke namejwan sa tekitl kuale ankinresibiroaj katlej kipatlaj in tlamachtile de Jesús wel oksé tlamantle de tlan tejwan yotamechmachtijkej. Iwan ankiresibiroaj se espíritu wel oksé tlamantle de yen Espíritu Santo katlej achtoj ya ankiresibirojkej, iwan noijki ankiresibiroaj se tlamachtile katlej kijta noijki temakixtia katlej wel oksé tlamantle de tlan tejwan otamechmachtijkej. ⁵ Pero nej nikmati ke nekatej katlej momachiliaj wejweyin tlatitlaniltin mach kimatij okachi ke nej. ⁶ Iwan maski in tlakaj mach nikinpaktia ika notlajtol, nej kuale nikmati de tlan nitlamachtia, ijkón ken miek buelta yotamechititijkej itech nochí tlan tikchiwaj.

⁷ Nijuak onamechmatiltij in kuale tlajtole katlej temakixtia, nej mach onamechkobraroj. Onimochij nipobre para namejwan ximorikojtilikan itech itlajtol in Dios. Iwan axan, ¿kijtosneki onitlajtlakoj por amo onamechkobraroj? ⁸ Nej onikresibiroj de oksekimej tiopantlaneltokakej tlan ika onechpalewijkej, kej yeskia onikinkixtilij tlan okipiayaj para oniktekipanoltij nijuak onitekipanoj amonawak, para ijkón amo xinechtlaxtlawikan amejwan. ⁹ Iwan nijuak onieka amowan iwan onechpoloaya tomin, nion se de amejwan mach itlaj oniktlajtlanilij para amo namechtekimakas, porke in tokniwan katlej ovalajkej de Macedonia yejwan onechmakakej tlan onechpoloaya. Onikpixke kuidado de amo onamechtekimakak namejwan, iwan mach keman namechtekimakas. ¹⁰ Nej nikmati nik nikijta tlan melawak ijkón ken Cristo kijta tlan melawak. Nej kuale nikmati nik itech nochí in región de Acaya mach akaj nechtzakuilis de ma nimoweyineki por amo namechkobraroa nijuak niktekipanoa in Dios. ¹¹ ¿Por tlanik ijkín nik namechtlapowia? ¿Por amo namechneki? Dios kuale kimati nik sa tekitl namechneki.

¹² Nochipa nikchijtos ijkón ken tlan axan nikchiwa, para amo nikinkawilis nekatej katlej motenewaj tlatitlaniltin, ma moweyinekikan iwan ma kijtojtinemikan ke yejwan kitekipanoaj in Dios ijkón ken tejwan tiktekipanoaj. ¹³ Yejwan motenewaj tlatitlaniltin pero mach melawak, sino san tlakajkayawaj. Yejwan teixkajkayawaj kej yeskia melawak tlatitlaniltin de Cristo. ¹⁴ Pero amo ximotlajtlachialtikan (ximomajmawtikan) de tlan namechilwia, porke in Satanás noijki

teixkajkayaj iwan monextia kej yeskia se ángel de Dios katlej petlani. ¹⁵ Iwan por yonik nej mach nimotlajtlachialtia (nimomajmawtia) tla itekipanojkawan in Satanás noijki tlaixkajkayawaj kej yeskia tekipanojkej de Dios yolchipawakej. Pero Dios kintlajyowiltis ijkón ken moneki tlajyowiskej por tlan kichiwaj.

Pablo otlajyowij kej tlatitlanile

¹⁶ Oksemi kiné, namechilwia: amakaj ma kiyejyeko ke nikuatlapolojtok. Pero tla ankiyejyekoaj ke nej nikuatlapolojtok, xinechkawilikan kiné ma namechtlapowi kej yeskia nikuatlapolojtok para welis noijki achitzin nimoweyinekis. ¹⁷ Yin tlan nemechilwia amo namechilwia porke in toSeñor ijkón kineki ma nikijo, sino namechilwia kej yeskia nikuatlapolojtok porke nikmati ipan noyolo nik welis nimoweyinekis. ¹⁸ Iwan tla miekej moweyinekij por tlan kichiwaj ixko yin tlaltikpak, nej noijki nimoweyinekis por tlan nikchiwa. ¹⁹ Namejwan anmomachiliaj sa tekitl amixtlamatkej, iwan por yonik kuale ankinresibiroaj katlej kuatlapolojtokej. ²⁰ Porke namejwan kuale ankinresibiroaj akinmej amechmoaxkatiaj ika miekej tlanawatiltin, amechtlakijkixtiliaj de tlan ankipiaj, amechmajpachoaj, moweyinekij amonawak, iwan amechkamatlajlatziniaj. ²¹ Asta nipinawa nikijtos ke wel niyolyamanke porke amo onamechtoktij ken yejwan amechtuktiaj. Pero mach nimixewis nikchiwas ken yejwan kichiwaj.

Tla oksekimej mixewiaj tlapoaj kuale de yejwan mismo, nej noijki nimixewis no ijkón nikchiwas, maski nikijta kej yeskia nikuatlapolojtok. ²² ¿Moweyinekij porke yejwan hebreos? Nej noijki nihebreo. ¿Moweyinekij porke yejwan israelitas katlej Dios okinpejpenke kej ipueblo? Nej noijki niisraelita. ¿Moweyinekij porke yejwan walajtokej nelwatl de Abraham? Nej noijki niwalajtok nelwatl de Abraham. ²³ ¿Moweyinekij porke yejwan kitekipanoaj in Cristo? Nej noijki niktekipanoa in Cristo okachi ke yejwan. Ijkín nik nitlapoa, mokaki kej nikuatlapolojtok. Nej yonitekipanoj okachi ke yejwan. Nej yonechwitekej okachi miekpa ke yejwan asta mach ok nikelnamiki keski buelta. Nej sa tekitl miek buelta yonechtzakej iwan miek buelta yonieka itenko (itempan) mikilistle. ²⁴ Makuile buelta onechwitekej in judiojin, kada se buelta onechwitekej ika kuarta senpoale iwan kaxtole iwan nawi ik nokuitlapan. ²⁵ Eyi buelta onechwitekej ika kuawitl. Se buelta onechmojomtlakej ika tetl. Eyi buelta onimochij, oapolakej in barkojtin nijuak inmijtik oniaya. Se buelta onimochij, onimokaj ijlik atl, se tonale iwan se yuale.

²⁶ Yoninejnenke miek iwan wejka, iwan miek buelta onimakiske de ijlik weyatl iwan de inmak ichtekoj. Miek buelta onimakiske de inmak nojudiojikniwan iwan miek buelta onimakiske de inmak katlej mach judiojtin. Onimakiske de itech weyikan, de ipan tepetl iwan de ijlik atl. Iwan noijki onimakiske de inmak nekatej katlej motenewaj tokniwan tlaneltokakej pero mach melawak tlaneltokakej. ²⁷ Sa tekitl yonimotekipanoltij miek iwan yonimosotlaj. Miek buelta mach niyekkochi. Miek buelta nipanoa tiojsiwilistle iwan amiktle. Miek buelta mach nikpia tiempo para nitlakuas. Nipanoa sekulistle iwan mach nikpia notzotzol tlan nikonakis.

²⁸ Pero mach ok namechilwis okachi oksekin tlamantle. Nej noijki nochipa nimotekipachoa de kenik katej nochtin in tokniwan tiopantlaneltokakej. ²⁹ Tla akaj tokni amo chikawak itech itlaneltokalis, nej noijki nimomachilia mach nichikawak ken yej. Iwan tla akaj tokni kitoktia oksé tokni ma wetzi ipan tlajtlakole, sa tekitl nechyolkokoa. ³⁰ Tla moneki nimoweyinekis de itlaj, nimoweyinekis itech yin tlamantle katlej kiteititia nik mach nichikawak. ³¹ ToTajtzin Dios katlej iPapan in toSeñor Jesucristo, katlej moneki iktlanke (ik tlami) tikweyikixtisnej, kimatí nik melawak tlan nikijta. ³² Nijuak onieka Damasco, in gobernador katlej okipalewiaya in rey Aretas, okintlalij soldadojtin ik nian nepa kan puertajtin de yen weyikan para nechkitzkianij nijuak nikisani de ompa. ³³ Pero onechtemowijkej ijlik se chikiwitl de kan ventana katlej kajki itech tepamitl katlej kiyawalojtok in weyikan. Iwan ijkón onicholoj de imak nekáj gobernador.

12

Tlan Dios okititij in Pablo

¹ Melawak, mach itlaj niktlanis tla niknekis nimoweyinekis. Pero nimoweyinekis de yej nijuak in toSeñor onechmoititij iwan de yen tlan onechnextilij. ² Ya kipia majtlakte iwan nawi xiwitl onechwikakej asta ipan eyi ilwikak kan kajki in Dios, iwan ikuakón yonieka ya nitlaneltokak inawak Cristo. Pero mach nikmati kox onechwikakej ika notlalnakayo o noso amo, san yen Dios kimatí. ³ Pero nej kuale nikmati nik onechwikakej ilwikak kan kajki in Dios. Mach nikmati kox onechwikakej ika notlalnakayo o noso amo, san yen Dios kimatí. ⁴ Nej kuale nikmati nik onechwikakej ilwikak kan sa tekitl tlakualkan, iwan onikakke sekin tlajtole katlej mach weli mijta ika totlajtol iwan nion Dios mach kitekawilia akaj ma kijto. ⁵ Welini nimoweyinekini porke Dios onechwikak ilwikak, pero mach nimoweyineki de nej mismo, sino

nimoweyineki itech nekatej tlamantin katlej kiteititiaj nik mach nichikawak.⁶ Iwan tla nej niknekini nimoweyinekini, yon mach yeskia se tontojyotl porke nej nikijta tlan melawak. Pero mach nimoweyineki para amakaj ma kiyeyye ko sa tekitl niweyikistok (niweyititok) okachi de tlan kitaj iwan de tlan kikakij de nej.

⁷ In tlamantin katlej Dios yonechinmititij, sa tekitl kualtzitzintin, iwan para nej amo ma nimoweyineki de tlan Dios yonechititij, Cristo onechmakak se tlajyowilistle kej itlaj witztle, katlej Satanás itekipanoj okikalakij ijtik notlalnakayo para ma nechkoko, iwan para ijkón amo ma nimoweyineki. ⁸ Iwan eyi buelta yoniktlajtlanilij in toSeñor ma nechkixtili yon tlajyowilistle. ⁹ Pero in toSeñor onechilwíj: “Tikpia noteiknotlamachilis, yen yon nochí tlan moneki tikpias. Porke noder moteititia okachi kuale níkuak se tlakatl mach chikawak.” Ijkón kiné, ika pakilstle ma nimoweyineki por amo nichikawak, para notech ma yeto ipoder in Cristo. ¹⁰ Por yonik nipaki maski mach nichikawak, maski nechwikaltiaj, maski miek tlamantle mach nikpia, maski nechtlatlalochtiaj, iwan maski nipanoa miek tlamantle por yen Cristo. Níkuak nimomachilia mach nichikawak, ijkukón Cristo nechmaka ichikawalis.

Pablo omotekipachoj por yen tiopantlaneltokakej de Corinto

¹¹ Mokaki kej nikuatlapolojtok por nitlapoa kuale de nej, pero yen namejwan annechtoktijkej ijkón ma nitlapoa. Okachi kuale yetoskia yen namejwan kuale antlapoanij de nej, iwan maski nej mach itlaj nopalij, nej mach okachi nitzikitzin ke nekatej katlej amejwan ankinresibiroaj kej yetoskia wejweyin tlatitlaniltin. ¹² Níkuak onieka amowan, nej onamechititij nik melawak nej nitlatitlanile. Porke onikinchij wejweyin tlamantin ika ipoder in Cristo, onikinchij señalestín iwan milagrostín, iwan onikxikoj sekin tlajyowilistle níkuak onieka amowan. ¹³ ¿Tlan namechtoktia para ximomachiliakan mach anparejojtin ken oksekimej tiopantlaneltokakej? ¿Kox por amo onamechkawilij xinechmakakan tlan onechpoloaya? Xinechtlapojpolwikan por ijkón onamechtoktij.

¹⁴ Axan yonimoyektlalij para nias ya ipan eyi buelta namechitati iwan mach namechtekimakas ika itlaj. Nej mach nikneki itlaj tlan amejwan ankipiaj, sino san yen namejwan namechneki para Cristo. Porke in konemej mach yejwan kipiaj de kitemoskej tomin para intajwan, sino yen tetajmej kipiaj de kitemoskej in tomin para inkonewan. ¹⁵ Iwan nej ika pakilstle niktemakas nochí tlan nikpia, iwan mach san yon, sino noijki nimotlajtlamis por yen namoanima. Maski

nijkuak nej okachi namechtlasojtlal, namejwan okachi mach annechtlasojtlaj.

¹⁶ Pero sekimej de amejwan maski kimatij nik mach onamechtekimakak ika itlaj, kijtaj ke kuale onikmatke kenik onamechkajkayaj. ¹⁷ Pero, ¿kenamij namejwan ankiyejyekoaj nik onamechkajkayaj? ¿Akinyejejyekoaj nik onamechkajkayaj por medio de yen tokniwan katlej onikintitlanke amonawak? ¹⁸ Oniktlatlawtij in Tito ma amechitati, iwan noiiki oniktitlanke oksé tokni para ma wia iwan Tito. ¿Kox oamechkajkayaj in Tito ika itlaj? ¿Amo tikpijaj san se toyolo para tikchiwaj itlaj tlamantle? ¿Amo san sekan tiawij san itech se ojtle?

¹⁹ Namejwan welis ankiyejekoskej ke timotlajtolpalewiaj amonawak. Pero amo, mach ijkón. Sino titlapoaj ixpan Dios ken Cristo kineki. Iwan nochti tlan tikchiwaj, notetlasojkaikniwan, tikchiwaj para amejwan ximoskaltikan itech namotlanelekalis. ²⁰ Nej nimomawtia tla nijkuak namechitajsis, mach anyeskej ken nej nikneki, iwan namejwan mach annechitaskej ken amejwan ankinekij. Nimomawtia namechitas anmotlatlajtolkuepaj, anmoxixikoaj, anmokualaniaj, anmoxexeloaj, anmotlajtoltatlaliliaj, amoichtakatlapowiaj, annoweyinekij iwan aminochtin ankihiwaj san tlan ankinekij. ²¹ Nimomawtia noiiki, tla amoixpan nechpinatis in Dios por amejwan, iwan welis noiiki amoixpan nichokas porke miekej de amejwan katlej ya tlajtlakojiwitzej desde ya wejkawitl asta axan ayamo moyolkuepaj, iwan ok kichijtokej miek tlamantle tlan amo chipawak, iwan ok momekatiaj iwan ok kixkawiaj (momeliaj) mopaktiaj ika tlan amo kuale.

13

Pablo okonintlajpaloj iwan okoninnajnawatij

¹ Axan, ika yin ya eyi buelta niawi namechitati. In tiotlajkuilole kijta tla akaj kistlakawiaj de itlaj tlan amo kuale okichij kipia de moyektlalis inmixpan omen o noso eyin tlakaj katlej okitakej tlan otlamochij. ² Katlej otlajtlakojkej desde achtoj, iwan nochtin oksekimej katlej noiiki tlajtlakojtokej, axan komo nikaj wejka oksemi namechmatiltia ken nijkuak onamechmatiltij nijkuak oniwia ipan ojpa onamechitato: tla nias oksemi namechitati mach namechiknomatis iwan namechtlajyowiltis. ³ Namejwan ankinekij ankitaskej kox melawak ijkón nikchiwas, tonses nej namechititis nik in Cristo tlapoa por medio de nej. Amo xikyejyekokan ke Cristo mach chikawak komo para welis amechyekketzas, sino Yej welis amechyekketzas ika ipoder. ⁴ Cristo omikke itech krus kej yetoskia mach chikawak, pero Yej yolitok ika ipoder in

Dios. Tejwan noijki mach tichijchikawakej ken Cristo nikuak omikke itech krus. Pero komo tisetitokej san se iwan Yej, toneses noijki tiyolitoskej iwan Cristo ika ipoder in Dios para kuale tamechyekketzaskej nikuak tieskej amowan.

⁵ Namejwan amonewian ximotakan, para ankimatiskej kox anmoyekketokej itech namotlaneltokalis, ximotakan kox melawak anpowij inawak Cristo. ⁶ Amo ankimomakaj kuenta nik in Jesucristo kajki amowan? Pero tla amo ankimati, kijtosneki mach melawak antlaneltokakej. ⁶ Nikchia namejwan xikmomakakan kuenta nik in tejwan melawak titlatitlaniltin de Cristo. ⁷ Iwan tejwan timotiotzajtziliaj para namejwan amitlaj xikchiwakan tlan amo kuale, mach para tikteitiskej nik in tejwan titlatitlaniltin, sino para namejwan xikchiwakan tlan kuale. Maski namejwan xikijtokan nik mach melawak titlatitlaniltin. ⁸ Porke mach itlaj welis tikchiwaskej para tieskej en contra de tlan melawak, sino nochi tlan tikchiwaj, tikchiwaj por yen tlan melawak. ⁹ Por yonik, tejwan tipakij nikuak namejwan anchikawakej iwan tejwan mach tichikawakej. Tejwan timotiotzajtziliaj para amejwan amitlaj ma amechpolo para chikawak xitlaneltokakan. ¹⁰ Namechijkuililia yin amatlajkuilole antes de nias namechitati, para nikuak nej nias, amo namechtlapowis ika chikawak para namechititis nik yen toSeñor onechmakak yin tlanawatile. Iwan yin tlanawatile katlej in Señor onechmakak moneki niktekipanoltis para ma amechiskalti itech namotlaneltokalis iwan amo para ma amechijtlako.

¹¹ Axan kiné, nokniwan, namechonyolopachoa. Xipaktokan, ximoyekketzakan iwan ximopalewikan se iwan oksé para ximoskaltikan okachi itech namotlaneltokalis. Xikpiakan san se namotlalnamikilis iwan xiekan ika yolosewilistle. Iwan Dios katlej kitemaka yolosewilistle iwan tlasojtlalistle amowan yetos. ¹² Ximotlajpalokan se iwan oksé ika tlasojtlalistle ken Dios kineki. ¹³ Nochtin katlej iaxkawan Dios amechontlajpalaoj.

¹⁴ Iteiknotlamachilis in toSeñor Jesucristo iwan itlasojtlalis in Dios ma amowan yeto, iwan ma amechyekana in Espíritu Santo. Ijkón ma yeto.

SAN PABLO ITLATITLANIL IN DIOS OKINTLAJKUILILIJ IN TLANELTOKAKEJ DE ESTADO DE GALACIA

Pablo okintlajkuililij in tokniwan tlaneltokakej de estado de Galacia

¹ Nej niPablo, nitlatitlanile. Mach onechtlalij iwan nion mach onechtitlanke akaj tlakatl para ma nitetlapowi de itlatjol in Dios, sino inewian Jesucristo iwan toPapan Dios katlej okiyolitj in Jesús satepan de omikke, yejwan onechtlalijkej para ma nieto nitlatitlanile. ² Nej, iwan nochtin tokniwan tlaneltokakej katlej nian nowan katej, tamechtlajkuililiaj namejwan antiopantlaneltokakej katlej anchantij itech estado de Galacia. ³ ToPapan Dios iwan toSeñor Jesucristo ma amechmakakan inteiknotlamachilis iwan ma amechmakakan yolosewilistle. ⁴ In toSeñor Jesucristo omotemakttij (omotemaktilij) ma kimiktikan por yen totlajtlakol, para techmakixtis de itech tlan amo kuale de tlan onkaj ixko yin tlaltikpak, pues ijkón okimonekiltij in toPapan Dios ma kichiwa in toSeñor. ⁵ Por yonik, ma tikweyikixtikan toTajtzin Dios nochipa. Ijkón ma yeto.

Mach onkaj oksé tlajtole katlej welis techmakixtis

⁶ Mach nikmati kenik namejwan totoka ya ankikajkej in toTajtzin Dios, katlej oamechnotzke ikaiteiknotlamachilis in Cristo. Iwan axan ya ankineltokaj oksé tlajtole katlej ankiyejekoaj welis amechmakixtis. ⁷ Pero mach onkaj oksé tlajtole katlej welis amechmakixtis. Sino katej sekimej tlakaj katlej amechkuatlapololtiaj, iwan kinekij kipatlaskej in kuale tlajtole katlej temakixtia, katlej Cristo otechmakak. ⁸ Pero tla akaj tlakatl amechmachtia ika oksé tlajtole katlej kijta noiiki temakixtia, katlej tejwan mach ijkón otamechmachtijkej, ma Dios kitlajyowilti ika ikualanilis. San akin, maski se de tejwan o noso se ángel de ilwikak. ⁹ Ijkón ken achtoj yonikijtoj, iwan axan oksemei nikijta: Tla akaj tlakatl amechmachtia ika oksé tlajtole katlej kijta noiiki temakixtia, pero amo ken tejwan otamechmachtijkej, ma Dios kitlajyowilti ika ikualanilis iktlanke (ik tlami).

¹⁰ Ika yin tlan namechilwia, mach niktemoa kenik welis nikinpaktis in tlakaj. Amo. Sino nikneki nikpaktis in toTajtzin Dios. Tla nej niktemoani kenik welis nikinpaktis in tlakaj, ya wejkawitl yeskia mach ok niitekipanoj in Cristo.

Pablo okijtoj kenik omochij tlatitlanile

¹¹ Pero nikneki xikmatikan, nokniwan, nik in kuale tlajtole katlej temakixtia katlej nej onamechmachtij, mach walajtok se tlamachtile de tlakaj. ¹² Mach onikakke de akaj tlakatl iwan nion mach onechititij akaj tlakatl, sino inewian Jesucristo onechkakitij iwan onechititij.

¹³ Namejwan ya ankimatij kenamij onieka achtoj nikuak onikneltokaya intiotlamachtil in judiojtin. Ankimatij nik sa tekitl onikintlatlalochtiaya in tokniwan tlaneltokakej, iwan oniknekie nixinmixpolos. ¹⁴ Itech intiotlamachtil in judiojtin, nej okachi oniwelik asta onikinpanawiliaya in nokniwan judiojtin katlej inwan newa, porke nej sa tekitl onimotemak-tiaya para nikchiwas in kostumbres katlej onechmachtijkej in ya wejkawitl noweyitajwan. ¹⁵ Pero Dios onechpejpenke desde antes de nitlakatini, iwan onechnotzke ika iteiknot-lamachilis. Dios okitlalij se tonale katlej Yej okitak kuale, ¹⁶ iwan itech yon tonale Dios onechnextilij iKone para ma nixinmatilti itlajtol katlej mach judiojtin. Nikuak ijkón otlamochij, nej mach oniaj oniktlajtlaniito akaj tlakatl ma nechilwi tlan moneki nikchiwas. ¹⁷ Iwan nion mach oniaj Jerusalén para onikinmitato in tlatitlaniltin katlej Dios okin-notzke achtoj ke nej. Sino san niman oniaj itech región de Arabia, iwan satepan oksemi onimokuepke para Damasco.

¹⁸ Pero satepan, nikuak yopanok eyi xiwitl, ikuakón kemaj oniaj para Jerusalén. Ikuakón onikixmatke in Pedro, iwan ompa iwan onimokaj kaxtole tonale. ¹⁹ Noijklí onikitak in Jacobo katlej ikni in toSeñor Jesús, pero mach onikinmitak in oksekimej tlatitlaniltin. ²⁰ Iwan Dios kimati nik melawak nochí yin tlan namechijkuililia.

²¹ Satepan oniaj itech región de Siria iwan itech región de Cilicia. ²² Pero ayamo onechixmatij in tiopantlaneltokakej de Cristo katlej katej itech región de Judea. ²³ San okikakiaj okijtoayaj: “Nekáj tlakatl katlej antes otechtlatlalochtiaya iwan okinekia techixpolos, axan ya kintlapowijtinemi in tlakaj ma tlaneltokakan inawak Cristo.” ²⁴ Iwan okiweyikix-tiayaj in toTajtzin Dios por tlan Yej okichij notech.

2

Oksekimej itlatitlanilwan in toTajtzin Dios okiresibirojkej in Pablo

¹ Satepan de opanok majtlakte iwan nawi xiwitl, oksemi oniaj para Jerusalén. Ikuakón oniaj iwan Bernabé, iwan noijklí onikwikak in Tito. ² Oniaj ompa porke Dios onechititij ma niwia ompa Jerusalén. In tokniwan katlej okachi tlayekantokej onikinnotzke se lado kan san tejwan

otimotlapowijkej. Iwan onikinmakak kuenta de kenik nikintlapobia katlej mach judiojtin de yen kuale tlajtole katlej temakixtia. Ijkón onikchij porke mach oniknekia ma yeto san nenkaj (en vano) in tekitl katlej yonikchij o noso katlej nikchijtok.³ In tokniwan katlej okachi tlayekantocej okitakej kuale kajki de tlan onikinmatiltiaya katlej mach judiojtin. Tito oyeka nowan. Iwan maski yej amo judío, mach okinawatiijkej ma mosirkunsidaro.⁴ Sekimej tlakaj katlej motenewaj tokniwan pero mach melawak, oichtakakalakej towan iwan okinekiaj ma mosirkunsidaro in Tito. Yonmej tlakaj okalakej san para techijistlakoskej para kitaskej kox tikchiwaj tlan kijta intlanawatil in judiojtin. Tejwan tilmatiж nik mach ok moneki tикиnchiwaskej yonmej tlanawatiltin katlej yejwan kinchiwaj. Pero yejwan omochikawayaj okinekiaj ma tikchiwakan tlan kijta intlanawatil.⁵ Pero tejwan mach otikinchiliжkej kuenta nion achitzin, para ijkón namejwan amo xikyejyekokan nik in Dios amechmakixtis tla anmosirkunsidaroskej o noso tla ankichiwaskej tlan kijta intlanawatil in judiojtin.

⁶ In tokniwan katlej okachi tlayekantocej mach onechilwiжеj itlaj oksé tlamachtile yankuik para ma nikinmachti in tlakaj. Pero nej mach notekiw tla yejwan okachi tlayekantocej o noso amo, porke Dios techita tinochtin san se parejo.⁷ Sino yejwan okimomakakej kuenta nik yen Dios onechtlalij para ma nikinmatilti katlej mach judiojtin in kuale tlajtole katlej temakixtia, ijkón ken Pedro noijki okitlalijkej para ma kinmatilti in judiojtin in yon tlajtole.⁸ Iwan ijkón ken Dios okitlalij in Pedro para ma tekipano kej tlatitlanile innawak in judiojtin, ijkón nej noijki in Dios onechtlalij para ma nitekipano kej nitlatitlanile innawak katlej mach judiojtin.

⁹ Por yonik Jacobo, Pedro iwan Juan, katlej okachi tlayekantocej de yen tokniwan, okimomakakej kuenta nik in Dios nechpalewia ika iteiknotlamachilis. Iwan nej iwan Bernabé otechmakitzkijkej ika inyekma kej se señas nik tikpiaj san se totlalnamikilis, para titekipanoskej innawak katlej mach judiojtin, iwan yejwan tekipanoskej innawak katlej judiojtin.¹⁰ Pero otechlatlawtijkej ma tикиnmelnamikikan de ma tикиnpalewikan in pobrestin, iwan yon tlamanle nej ya nikchijtiwitz ika pakilistle.

Pablo okajwak in Pedro itech weyikan de Antioquía

¹¹ Pero nikuak in Pedro ovalaj itech weyikan de Antioquía, onikilwij ixtotika nik kichijtok tlan amo kuale.¹² Pedro otakuajtoka inwan tokniwan katlej mach judiojtin, pero nikuak oejkokej sekimej tokniwan judiojtin de Jerusalén, katlej okualintitlanke in Jacobo, ikuakón in Pedro mach

ok okiseguiroj otlakuaj inwan katlej mach judiojtin. Porke omomawtij de itlaj ma kilwikan in yonmej judiojtin katlej kinekij ma mosirkunsidarokan nochtin katlej mach judiojtin.¹³ Oksekimej tokniwan judiojtin de Antioquía no ijkón okichijkej ken Pedro okichij ika iteixkajkayawalis. Iwan asta yen Bernabé no ijkón okichij porke okinmitilij tlan yejwan kichiwaj.¹⁴ Pero nijuak nej onikitak nik mach okichiwayaj ken kijta in melawak kuale tlajtole katlej temakixtia, ikuakón onikilwij in Pedro inmixpan nochtin: “Tla tej tijudío, pero amo tinemi kej tijudío, sino tinemi kej yeskia amo tijudío, toneses, ¿tlanik tikneki tikintoktis katlej mach judiojtin ma mokuepakan ken judiojtin?”

In judiojtin iwan katlej mach judiojtin parejo momakixtiaj ika tlaneltokalistle

¹⁵ Tejwan otitlakatkej tijudiojtin, mach otitlakatkej titlajtlakolejkej ken katlej mach judiojtin.¹⁶ Pero kuale tikmatij nik mach akaj welis chipawis de itlajtlakol san por se kichiwas tlan kijta itlanawatil in Moisés. Sino porke se kineltoka in toSeñor Jesucristo. Por yonik, tejwan noiiki otikneltokakej in toSeñor Jesucristo, para tichipawiskej de totlajtlakol ika totlaneltokalis iwan amo por tikchiwaj tlan kijta itlanawatil in Moisés. Porke mach akaj welis chipawis de itlajtlakol san por se kichiwas tlan kijta itlanawatil in Moisés.

¹⁷ Iwan axan, tla tejwan tiknekij tichipawiskej de totlajtlakol porke tikneltokaj in Cristo, iwan tla por yon kijtosneki titlajtlakoa, toneses ¿kox kijtosneki in Cristo techtoktia ma titlajtlakokan? ¡Amo! Ma Dios techpalewi de amo ijkón tikyejyekoskej.¹⁸ Porke tla tejwan yotikajkej itlanawatil in Moisés iwan satepan oksemi pewas tikchiwaskej yon tlanawatile, kijtosneki timokuepaj titlajtlakolejkej.¹⁹ Nej onikmomakak kuenta ke itlanawatil in Moisés mach kipia poder para nechchipawas de notlajtlakol porke mach keman oniwelik onikchij tlan onechnawatij, por yonik onikaj yon tlanawatile kej yeskia yonimikke. Iwan axan ya welis niyolitos para Dios.²⁰ Nijuak Cristo omikke itech krus, nej noiiki Iwan onimikke. Iwan axan mach ok yen nej ninemi, sino yen Cristo nemí ipan noyolo. In nemilistle katlej axan nikpia itech notlalnakayo, nikpia porke niktlalijtok notlaneltokalis inawak iKone in toTajtzin Dios, katlej sa tekitl nechtlasoxtla iwan omotemaktij (omotemaktilij) omikke por nej.²¹ Nej mach nikneki niktlalis se lado iteiknotlamachilis in Dios. Porke tla welini timochipawanij de totlajtlakol san por se kichiwani tlan kijta itlanawatil in Moisés, toneses kijtosneki san tekitl omikke in Cristo.

3

Itlanawatil Moisés o noso tlaneltokalistle inawak Cristo

¹ ¡Ay, nokniwan de Galacia! ¿Kanin kaj namotlalnamikilis? ¿Akin oamechkajkayaj para ayakmo xikneltokakan tlan melawak? Tejwan kuale otamechmachtijkej iwan namejwan kuale ankimomakakej kuenta de kenik omikke in Cristo itech krus por amejwan. ² San se tlamantle nikneki nikmatis de amejwan: ¿Ankiresibirojkej namejwan in Espíritu Santo por ankichijkej tlan kijta itlanawatil in Moisés, o noso por ankineltokakej in tlamachtile de Cristo katlej ankikakej? ³ ¿Kox kej amo ajsitok namotlalnamikilis? Namejwan opéj ankipiaj nemilistle ika Espíritu Santo nikuak antlaneltokakej inawak Cristo. Iwan axan, ¿ankinekij ankichiwaskej tlan kijta itlanawatil in Moisés para welis anyeskej ken Dios kineki? ⁴ ¿Tones san tekitl nochí in tlajyowilistle katlej anpanokej? Nikchia amo ma yeto san tekitl. ⁵ ¿Dios amechmaka iEspíritu Santo iwan kinchiwa milagrostín entre namejwan, porke ankichiwiwaj tlan kijta itlanawatil in Moisés? ¿O noso por ankikakej itlajtol in Dios iwan okineltokakej?

⁶ Abraham okineltokak in Dios, iwan por yonik in Dios okitak kej se tlakatl katlej chipawak kej yeskia mach keman otlajtlakoj. ⁷ Por yonik, kuale xikmatikan ke katlej melawak tlaneltokaj inawak Dios, yejwan yonmej katlej katej kej tekonewan de Abraham. ⁸ In tiotlajkuilole desde ya wejkawitl kijtojtok nik in Dios kinmakixtis katlej mach judiojtin nikuak kineltokaskej para yeskej chipawakej de intlajtlakol. Dios okikakitij in Abraham in yon kuale tlajtole katlej temakixtia, nikuau okilwij: “Nikintiochiwas nochtin in tlakaj de ixko yin tlaltikpak akinmej nechneltokaskej ken tej otinech-neltokak.” ⁹ Ijkón kiné, nochtin akinmej tlaneltokaj inawak Jesucristo, Dios kintiochiwa ijkón ken okitiochij in Abraham porke okineltokak tlan Dios okilwij.

¹⁰ Nochtin katlej kinekij kichiwaskej tlan kijta itlanawatil in Moisés para momakixtiskej, Dios kintlajtlakoltis, porke ijkón kijta in tiotlajkuilole: “Nochtin katlej amo kichiwaskej nochí tlan kijta itlanawatil in Moisés, Dios kintlajtlakoltis.” ¹¹ Iwan melawak nik mach akaj welis yetos chipawak de itlajtlakol san por se kichiwas tlan kijta itlanawatil in Moisés. Porke in tiotlajkuilole kijta: “Akin kitlalis itlaneltokalis inawak Dios, in Dios kitas ya chipawak de nochí itlajtlakol iwan ijkón welis kipias nemilistle nochipa.” ¹² Iwan itlanawatil in Moisés mach techilwia nik in Dios techitas tichipawakej de totlajtlakol tla tiktlaliskej totlaneltokalis inawak Dios. Porke in tiotlajkuilole ijkín kijta: “Akin kichiwas nochí tlan kijta in tlanawatile de Moisés, welis yolitos.”

¹³ Pero Cristo okitlaxtlaj para otechmakixtij de itech tlajyowlistle de itech itlanawatil in Moisés. Ijkón, yon tlanawatile mach ok weli techtlayoywiltia. Tejwan titlajyowiani por totlajtlakolwan pero Cristo yen otlajyowij por tejwan. In tiotlajkuilole kijta: “Nochtin tlakaj katlej kinpiloaj itech se kuawitl, Dios kinkawa se lado de inawak.” ¹⁴ In Cristo Jesús ijkón okichij para Dios welis kintiochiwas in tlakaj katlej mach judiojtin ijkón ken okitiochij in Abraham. Iwan axan tinochtin tejwan katlej tikneltokaj in Cristo welis tikresibiroskej in Espíritu Santo ijkón ken Dios okijtoj techmakas.

Itlanawatil in Moisés iwan tlan Dios okilwij in Abraham

¹⁵ Nokniwan, namechilwis se ejemplo de tlan kichiwaj in tlakaj para okachi xikmomakakan kuenta. Nijuak se tlakatl kichiwa se akuerdo iwan akaj oksé tlakatl, o noso kichiwa se amatl para kintlaxelilia ikonewan, iwan kifirmaroa, tonses yon tlan yokifirmaroj kipia de ijkón mochiwas, iwan mach ok akaj welis motzinkixtis. ¹⁶ Ijkón kiné, ya wejkawitl in Dios noijki okichij se akuerdo iwan Abraham iwan se ixwi. Iwan Dios okisentlalij nik kichiwas tlan okijtoj itech yon akuerdo. Mach okilwij: “tej iwan moxwiwan”, kej yeskia tlapoa de miejek, sino Dios okilwij: “tej iwan moxwi”. Tlapoa san de se, kijtosneki tlapoa de yen Cristo. ¹⁷ Tlan nej nikneki nikijtos yen yin: Dios okichij se akuerdo iwan Abraham iwan Dios okisentlalij nik kitiochiwas. Por yonik itlanawatil in Moisés katlej oneske satepan ipan nawi siento iwan senpoale iwan majtlakte xiwitl, mach welis kipatlas in acuerdo katlej Dios yokichij iwan Abraham iwan nion mach welis kijtos mach ok mochiwas. ¹⁸ Tla Dios techmakixtiani kej yeskia techmaka se herencia por tikchiwaj tlan kijta itlanawatil in Moisés, tonses mach techmakixtiani por yon tlan okilwij in Abraham. Pero Dios okimakak in Abraham tlan okilwij, porke ijkón okijtoj itech iakuerdo katlej okilwij in Abraham.

¹⁹ Tones, ¿tlan para tikpiaj in tlanawatile de Moisés? Dios okitemakak in yon tlanawatile de Moisés para ma tikmomakakan kuenta de totlajtlakol. Pero yon tlanawatile omotekipanoltij asta ikuak owalaj ixwi in Abraham, kijtosneki yen Cristo katlej Dios okilwij in Abraham kiwaltitlanis. Dios okinnawatij in angelestín ma kimaktikan in Moisés in yon tlanawatile, iwan satepan Moisés okinmakak in tlakaj. ²⁰ Pero nikuak Dios okilwij in Abraham kimakas tlan okilwij, yen Dios inewian okilwij, iwan amo okinotzke akaj oksé para ma kitlapowi in Abraham. Yen Dios okichij iselti.

¿Tlanik in Dios otechmakak itlanawatil in Moisés?

²¹ ¿Kijtosneki itlanawatil in Moisés kajki kontra de tlan Dios okilwij in Abraham? Amo. Porke tla melawak in yon tlanawatile welini techmakani yankuik nemilistle, tonses welini tienij tichipawakej de totlajtlakol por tikchiwanij tlan kijta in yon tlanawatile. ²² Pero in tiotlajkuilole kijta nik nochtin in tlakaj omokajkej tzaktokej ijtik tlajtlakole. Para ijkón nochtin akinmej tlaneltokaskej inawak Jesucristo, Dios kinmakas tlan Yej yokijtoj kinmakas in tlaneltokakej.

²³ Antes de walani in Cristo para titlaneltokanij inawak, itlanawatil in Moisés otechpixtoka kej tipresojtin. Ijkón oyeka asta ikuak Dios otechnextilij in Cristo para ma titlaneltokakan inawak. ²⁴ Ijkón kiné, itlanawatil in Moisés oyeka kej se konepixke. Achtoj otechmonekuitlawiaya iwan satepan otechwikak inawak Cristo para ma titlaneltokakan inawak, iwan para ijkón welis techitas ya tichipawakej de totlajtlakol. ²⁵ Iwan axan, como ya titlaneltokaj inawak Cristo, itlanawatil in Moisés mach ok moneki ok ma techmonekuitlawi kej tikonemej.

²⁶ Iwan axan tejwan tinochtin titekonewan de Dios tla titlaneltokaj inawak Cristo Jesús. ²⁷ Iwan tinochtin katlej timokuaterekiaj para tieskej tiiaxkawan in Cristo, Yej techyankuiktlakentia ika inemilis ken katlej Yej kipia. ²⁸ Axan Dios mach ok techita kox tijudiojtin o noso amo tijudiojtin, kox titlanamakin o noso amo titlanamakin, kox tlakaj o noso siwamej. Porke tinochtin timochiwaj sa se inawak Cristo. ²⁹ Iwan tla tejwan titeaxkawan de Cristo, kijtosneki noijki titeixwiwan de Abraham, iwan noijki tikresibiroskaj in herencia katlej Dios okilwij in Abraham.

4

¹ Tlan nej nikneki namechilwis yen yin: Tla se tepapan miki iwan kitlakajtewilia se ichokotzin, mientras ichokotzin ayamo moskaltia, kajki no ken se tlakatl katlej tlanamaktle, maski ma yeto yej iaxka de tlan okikajtewilij ipapan. ² Yon chokotzin kipia de kintlakitas katlej kiskaltiaj iwan noijki kipia de kintlakitas in tlakaj katlej kipialiaj tlan iaxka, asta ikuak ma kipia xiwitl katlej ipapan okijtoj ma kipia para welis kiresibiros nochi tlan iaxka. ³ Tejwan noijki ijkón otiekaj. Nijuak ayamo ovalaya in Cristo, tejwan otiekaj kej tikonemej, otikchiwayaj tlan sekimej tlaltikpaktlakaj otechilwiayaj ma tikchiwakan para welis tinemiskej ken yejwan nemij ixko yin tlaltikpak. ⁴ Pero nijuak oasik tonale katlej Dios okitlalij, okiwaltitlanke iKone katlej otlakatke itech se siwatl. Otlakatke kej se judío iwan okichij nochi tlan kijta itlanawatil in Moisés. ⁵ Iwan Yej okitlaxtlaj

para otechmakixtij de itech itlanawatil in Moisés para mach ok ma technawatijto, iwan para ijkón Dios welis techresibiros kej tiikonewan.

⁶ Tejwan kuale tikmatij nik ya tiikonewan Dios, porke Dios otechwaltitlanilij iEspíritu de iKone ipan toyolo. Iwan iEspíritu techtoktia ma tikilwikan toTajtzin Dios: “¡Abba!” Kijtosneki: “¡Papan!” ⁷ Ijkón kiné, mach ok tikatej kej titlanamakin, sino axan tejwan ya tiikonewan Dios. Iwan tla tejwan ya tiikonewan, toneses Dios noijki techmakas tlan iaxka.

Pablo omotlanemililtij por yen tlaneltokakej

⁸ Achtoj, nikuak namejwan ayamo ankixmatiaj in Dios, anyekaj kej antlanamakin porke ankintekipanoaya in diosmej katlej mach melawak diosmej. ⁹ Pero axan namejwan ya ankixmatij in Dios, o noso okachi kuale ma tikijtokan yen Dios ya amechixmati. Iwan axan, ¿tlanik namejwan oksemi ankinekij anmokuepaskej para ankichiwaskej oksemi tlan kijta itlanawatil in Moisés, katlej pobre iwan mach kipia poder, iwan amechkuepa oksemi xiekan kej antlanamakin? ¹⁰ Namejwan oksemi yopéj anmilwichiwaj nikuak weyi tonale, nikuak yankuik metztle, nikuak yankuik xiwitl o noso itech itlaj oksé tonale. ¹¹ Nimomawtia tla nikmatis nik in tekitl katlej onikchij entre namejwan san nenkaj (en vano) onikchij.

¹² Nokniwan, namechtlatlawtia ximokuepakan ken nej, porke nej noijki onimokuepke ken namejwan. Nikneki xikkawakan itlanawatil in Moisés ijkón ken nej yonikchij. Namejwan mach annechtoktijkej itlaj mach kuale. ¹³ Namejwan ankimatij ke nikuak nej oniaj ompa amowan, oniaj porke onimokokoaya, iwan por yonik onamechtlapowij de yen kuale tlajtole katlej temakixtia. ¹⁴ Pero maski onitlajyowijtoka ika yon kokolistle, namejwan annechresibirojkej iwan mach annechijixkej. Namejwan annechresibirojkej kej yeskia ankiresibirojkej se ángel de Dios, o noso kej yeskia ankiresibirojkej yen Cristo Jesús. ¹⁵ ¿Kan oyáj yon pakilstle katlej ankipixkej por onamechmatiltij itlajtol in Dios? Nimixewia nikijta, ke itech nekatej tonaltin, tla welini, namejwan asta ika pakilstle ankinmokixtilianij namoixtololowan para annechinmakanij. ¹⁶ Iwan axan, ¿yonimokuepke kej namokontra san por namechilwia tlan melawak?

¹⁷ Nekatej tlamachtijkej tekajkayajkej mochiwaj sa tekitl amechtlasojtlaj, pero amo para amechpalewiskej ika tlan kuale. Sino yejwan kinekij amechxeloskej de yen kuale tlamachtile, para ijkón namejwan welis ankintlasojtlaskej okachi por yen intlamachtil. ¹⁸ Nej

mach nechkualania tla sekimej kinekij amechpalewiskej, pero moneki ma amechpalewikan ika kuale inyolo iwan nochipa ijkón ma kichiwakan, maski nietos amowan o noso amo.¹⁹ Nokonetzitzinwan, yon tlan ankichiwaj sa tekitl nechkokoa oksemi. Ken se siwatl tlajyowia iwan kikokoa nikuak kitlakatilia ikone. Axan nej no ijkón nipanotok. Nitlajyowijtos iwan nechkokojtos asta ikuak namejwan melawak xiktlalikan nochi namotlaneltokalis inawak Cristo, para ijkón nikitas nik in Cristo melawak yolitok amotech, iwan ijkón mach ok nitlajyowijtos por amejwan.²⁰ Niknekiskia axan san niman amowan nieni, para amo namechtlapowiani ken axan namechtlapowijtok itech yin amatl, porke axan mach nikmati tlanon okachi welis namechilwis.

Ejemplo de Agar iwan Sara

²¹ Namejwan katlej ankinekij ankichiwaskej tlan kijta itlanawatil in Moisés, xinechilwikan: ¿ankimatij tlan kijtosneki in yon tlanawatile de Moisés?²² In tiotlajkuilole kijta nik Abraham okinpixke ome ikonewan: se ikone okipixke iwan se siwatl katlej oyeka tlanamakte inawak Abraham itoka Agar, iwan oksé ikone okipixke iwan isiwa Sara katlej mach oyeka tlanamakte.²³ In siwatl katlej tlanamakte ikone otlakatke ijkón ken tlakatij nochtin konemej. Pero ikone in siwatl katlej mach tlanamakte, otlakatke para ma mochiwa tlan Dios okilwij in Abraham itech iakuero. ²⁴ Nochi yon tlamantle kitemaka se ejemplo. Yonmej omen siwamej tech-nextiliaj ome ejemplos de ome akuerdos katlej Dios okichij inwan tlakaj. In siwatl katlej itoka Agar kijtosneki yen akuerdo katlej Dios okichij inwan tlakaj de Israel ipan tepetl Sinaí, nikuak okinmakak in tlanawatile de Moisés. Nochtin katlej kitlaliaj intlaneltokalis itech itlanawatil in Moisés, katej kej tlanamaktin katlej kipiaj de kichiwaskej nochi tlan kijta yon tlanawatile, ijkón ken Agar iwan ikone oyekaj tlanamaktin inawak Abraham.²⁵ Ijkón kiné, Agar kijtosneki yen tepetl Sinaí katlej kajki itech país de Arabia. Iwan noiiki kijtosneki yen weyikan de Jerusalén katlej kajki ixko yin tlaltikpak kan katej in judiojin. In weyikan de Jerusalén kajki kej yeskia temaman iwan nochtin in judiojin kej yeskia ikonewan, iwan nochtin katej kej tlanamaktin katlej kipiaj de kichiwaskej tlan kijta itlanawatil in Moisés.²⁶ Pero onkaj oksé weyikan de Jerusalén katlej kajki ilwikak. Yon Jerusalén katlej kajki ilwikak yon ken isiwa in Abraham katlej mach tlanamakte, iwan tejwan tikatej kej tiikonewan porke mach titlanamaktin.²⁷ In tiotlajkuilole kijta:

Xipaki siwatl katlej mach weli tikinpiia mokonewan.

Xitzajtzi ika pakilstle, tej katlej mach tikixmati kenik tekokoj nikuak se siwatl kitlakatilia ikone.

Porke tej tикинpias okachi mokonewan ke nekáj siwatl katlej kipia iokich.

²⁸ Nokniwan, ijkón ken Abraham okipixke in Isaac porke Dios okilwij kimakas yon ikone, tejwan noijki Dios tech-

pia kej tiikonewan porke Dios ijkón okilwij in Abraham.

²⁹ Itech nekáj tonale, ikone in Agar katlej otlatatke ijkón ken tlakatij nochtin in konemej, okitojtoktiaya ikone in Sara katlej otlatatke ika ipoder in Espíritu Santo. Axan tejwan noijki katlej titlakatij itech Espíritu Santo noijki techtojtoktiaj katlej kinekij ma tikchiwakan tlan kijta itlanawatil in Moisés.

³⁰ Pero ¿tlan kijta in tiotlajkuilole? In tiotlajkuilole kijta: “Xikixti ma wia de mochan in siwatl katlej tlanamakte iwan ikone, porke ikone mach welis kiresibiros in herencia katlej tikkajtewas. Sino yon herencia kiresibiros in mokone Isaac katlej okitlakatilij mosiwa Sara katlej mach tlanamakte.”

³¹ Ijkón kiné, nokniwan, tejwan mach tikatej kej titekonewan de yon siwatl Agar katlej tlanamakte, sino tejwan tikatej kej titekonewan de yen siwatl Sara katlej mach tlanamakte.

5

Cristo yotechmakiktig de itech itlanawatil in Moisés

¹ Cristo otechmakiktig de itech itlanawatil in Moisés para ayakmo ma techilpijo. Por yonik namejwan ayakmo xikchiwakan tlan kijta yon tlanawatile de Moisés. Ayakmo xi-motekawilikan ma amechnawati kej yeskia antlanamaktin.

² Xinechkakilikan. Nej, niPablo, nikneki namechilwis yin tlajtole, tla namejwan anmosirkunsidaroškej iwan ankiyejyekoskej ijkón Dios welis amechmakiktig, tonses kijtosneki san tekitl ankineltokaj in Cristo. ³ Oksemi nikija: Nochtin akinmej kinekij mosirkunsidaroškej, tonses kipiaj de kichiwaskej noijki nochti tlan kijta itlanawatil in Moisés. ⁴ Iwan namejwan katlej ankiyejyekoaj moneki ankichiwaskej tlan kijta itlanawatil in Moisés para anyeskej anchipawakej de amotlajtlakol, tonses kijtosneki ankikawaj in Cristo iwan ankikawaj iteiknotlamachilis in Dios. ⁵ Pero tejwan por medio de yen Espíritu Santo iwan por titlaneltokaj inawak Cristo, tikchiah nik in Dios techitas ya tichipawakej de totlajtlakol. ⁶ Tla tejwan tiktlalajj totlaneltokalis inawak Cristo Jesús, tonses mach kipia itlaj kitas kox se kajki sirkunsidado o noso amo. Sino moneki ma se kipia tlaneltokalistle inawak Cristo, iwan yon tlaneltokalistle ma techtokti ma timotlasojtlakan.

⁷ Namejwan ya kuale antlaneltokayaj inawak Cristo. ¿Akin kiné, oamechkajkayaj para ayakmo xikneltokakan in tlamachtile katlej melawak? ⁸ Mach yen Dios ijkón amechtuktia, sino Yej amechnotza para xitlaneltokakan inawak Cristo. ⁹ Pero kemanti san se tlakatl weli kinmijtlakoa oksekimej tlakaj. Ijkón ken levadura katlej kitlaliliaj in tixtle para kichiwaj pan, maski kitlaliliaj san tzikitzin levadura, weli kisamawa nochí in tixtle. ¹⁰ Nej nikchia inawak Dios nik in Yej amechpalewis para amo ankawaskej de antlaneltokaskej inawak Cristo. Pero in tlakatl akin kineki amechkuatlapololtis itech namotlaneltokalis, Dios kitlajyowiltis, san akin.

¹¹ Tla nej namechilwani ximosirkunsidarokan, toneses in judiojtin mach nechtatlalochtianij, porke mach akaj kualanini. Pero nej nechtatlalochtiaj porke nitlamachtia nik san yen Cristo weli techchipawa de totlajtlakol porke Yej omikke itech krus por tejwan iwan yon tlamantle kinkualania. ¹² Yonmej katlej kinekij ximosirkunsidarokan, nej niknekiskia yejwan san semi ma kimotekilikan intlakayo iwan ayakmo ma amechkuatlapololtikan ika intlamachtil.

¹³ Nokniwan, namejwan Dios oamechnotzke para ayakmo xiilpitokan itech itlanawatil in Moisés. Dios yoamechtonke pero amo para ankichiwaskej tlan amo kuale, sino para anmopaleewiskej se iwan oksé ika tlasojtlalistle. ¹⁴ Tla ijkón ankichiwaskej, kijtosneki ankichiwaj nochí tlan kijta itlanawatil in Dios katlej mochiwa sa se tlanawatile, katlej kijta: “Xiktlasojtla in mokni ken tej timotlasojtla.” ¹⁵ Pero tla namejwan anmokualaniaj iwan anmonanankiliaj se iwan oksé, xikpiakan kuidado porke welis anmotlajtlamiskej san entre amejwan.

Katlej kineki kichiwas in totlalnakayo iwan katlej kineki kichiwas in Espíritu Santo

¹⁶ Nikneki namechilwis kiné: Xikkawilikan in Espíritu Santo ma amechyekana itech namonemilis. Para ijkón amo xikchiwakan tlan amo kuale katlej namotlalnakayo kineki kichiwas. ¹⁷ Porke tlan kineki in totlalnakayo kikokolia tlan kineki in Espíritu Santo. Iwan tlan kineki in Espíritu Santo kikokolia tlan kineki in totlalnakayo. Mach mowikaj se iwan oksé. Por yonik namejwan mach anwelij ankichiwaj tlan namejwan ankinekij. ¹⁸ Pero tla yen Espíritu Santo namechyekana, toneses itlanawatil in Moisés mach ok welis anmechnawatis.

¹⁹ Niman mota tlan amo kuale tlan kichiwaj in tlakaj ika intlalnakayo. Momekatiaj katlej tlanamiktiltin iwan katlej mach tlanamiktiltin, kichiwaj ika intlalnakayo katlej biero iwan mach chipawak, mopaktiaj ika nochí tlamantle mach

kuale (vicios). ²⁰ Kinweyikixtiaj santojtin, texoxkej (tlabrujowiaj), tekokolijkej, temagakej (temakakej), chawamej, ni man kualanij, itlaj kichiwaj san para yejwan, kinxeloaj in tokniwan iwan kinmachtiaj tlan amo melawak. ²¹ Moxikoanimej, temiktijkej, iwitkej, biero mopaktiaj itech ilwimej asta kuawtzajtzij iwan kichiwaj oksekin tlaman-
tle okachi. Nikneki namechilwis ijkón ken achtoj yon-
amechilwij, ke akinmej kichiwaj yon tlaman-
tle mach welis kalakiskej kan Dios tlawanatia.

²² Pero nikuak in Espíritu Santo kinyekana in tlakaj, yen yin tlan kichiwaj: tetlaosjtlaj, kipiaj pakilistle, kipiaj yolosewilistle, kimatij kimoxikoltiaj itlaj tlaman-
tle, kuale tlakajtin, kimatij kitechiwiliaj tlan kuale, kichiwaj tlan kijtaj, ²³ yolyamanej, iwan kimatij kimoxikoltiaj para amo tlajtlakoskej. Mach onkaj nion se tlawanatile katlej welis kint-
lajtlakoltis akinmej kichiwaj yon tlaman-
tle. ²⁴ Iwan katlej iaxkawan in Cristo, mach ok kikawiliaj intlalnakayo ok ma tlajtlakolchiwa. Yon kej yeskia yomikke intlalnakayo itech krus ika noch iwan okinyoltilanaya iwan tlan okixeleyiayaj. ²⁵ Axan in Espíritu Santo yotechmakak yankuik nemilstle, por yonik ma tikkawilikan in Espíritu Santo ma techyekana itech noch iwan tikchiwaskej.

²⁶ Amo ma timoweyinekikan. Amo ma timokualanijtine-
mikan, iwan nion amo ma timoxijxikojtinemikan.

6

Ma timopalewikan se iwan okse

¹ Nokniwan, tla ankitaj se tokni kichijtok tlan amo kuale, namejwan katlej kuale amoyekketokej itech Espíritu Santo, xikpalewikan. Pero xikchiwakan ika kuale amoyolo, iwan xikpiakan kuidado amo ma amechyoltilana in Amo Kuale Tlakatl para xitlajtlakokan noijki. ² Xikpalewikan namokniwan nikuak tlajyowiaj. Tla namejwan ijkón anki-
chiwaskej, tones kijtosneki anki-
chiwaj tlan Cristo technawatia.

³ Tla akaj momachilia weyikistok (weyititok), iwan amo melawak, kijtosneki san yej mokajkayawa. ⁴ Kada se ma mota kenik kajki. Akin motas kuale kajki, tones ma paki de tlan kichiwa iwan amo ma kinmita kox kuale o noso amo kuale tlan kichiwaj in oksekimej. ⁵ Kada se kipia de kimatis kenamij nik kajki, porke kada se kipia de kitemakas kuenta inawak Dios de tlan se kichiwa.

⁶ Katlej techmachtia de itlajtol in Dios, moneki tikpalewiskej ika tlan tikpiaj.

⁷ Amo ximokajkayawakan. Dios mach welis ankika-
jkayawaskej. Tlan namejwan ankitookaskej, yen yon noijki

ankipixkaskej. ⁸ Tla se tlakatl kichiwa tlan amo kuale tlan kineki itlalnakayo, yon tlakatl iselti mopoloa. Pero tla se tlakatl kichiwa tlan Espíritu Santo kineki, in Espíritu Santo kimakas yankuik nemilistle katlej mach keman tlamis. ⁹ Amo ma timosotlawakan de tikchiwaskej tlan kuale, porke tla amo timosotlawaskej de tikchiwaskej tlan kuale, ajsis tonale in Dios techtlaxtlawis. ¹⁰ Por yonik, nijuak tiweliskej, moneki tinochtin ma tiktechiwilikan tlan kuale, iwan okachi moneki tikinchiwiliskej yejwan tokniwan katlej tlaneltokaj inawak Cristo.

Pablo okoninnajnawatij iwan okonintlapaloj

¹¹ Xikinmitakan yinmej letrajtin wejweyin katlej ika noma namechijkuililia. ¹² Nekatej tlakaj katlej kinekij ximosirkunsidarokan yejwan ijkón amechnawatiaj xikchiwakan porke kinekij kuale mokawaskej inwan judiojin, para amo ma kintlatlalochtikan tla yejwan mixewiskej kijtoskej nik san yen Cristo techtlapojpolwia de totlajtlakol porke Yej omikke por tejwan. ¹³ Pero nion yejwan katlej mosirkunsidaroaj mach kichiwaj nochí tlan kijta itlanawatil in Moisés. Pero yejwan kinekij ximosirkunsidarokan para yejwan welis moweyinekiskej por ankichiwaj tlan yejwan amechmachtiaj. ¹⁴ Pero nej mach nikneki nimoweyinekis itech itlaj oksé tlamanter, sino nej nikneki nimoweyinekis san itech imikilis in toSeñor Jesucristo katlej omikke itech krus por nej. Ijkón axan nej mach ok weli nechyoltiana tlan onkaj ixko yin tlaltikpak porke para nej nikita kej yomikke. Iwan tlan amo kuale katlej onkaj ixko yin tlaltikpak noijki nechita kej yonimikke. ¹⁵ Ijkón kiné, tla tikatej iwan Cristo Jesús, mach itlaj ipatij tla tikatej tisirkunsidadojin o noso amo. Pero katlej okachi ipatij, kijtosneki tla timochiwaj tiyankuikej titlakajtin. ¹⁶ Aminochtin namejwan katlej ankichiwaj yin tlamachtile, ma Dios amechmaka iyolosewilis iwan ma kipia iteiknotlamachilis amonawak, iwan noijki innawak nochtin katlej melawak iaxkawan Dios.

¹⁷ De nian para tlayakapan, amo ok akaj ma nechkuejso de kox melawak niitekipanoj in toSeñor Jesús o noso amo, porke nestok itech notlalnakayo kan omokaj markado de kan onechmagakej in tlakaj, iwan ika yon mota nik melawak niitekipanoj in toSeñor Jesús.

¹⁸ Nokniwan, iteiknotlamachilis in toSeñor Jesucristo ma yeto ipan namoyolo. Ijkón ma yeto.

SAN PABLO ITLATITLANIL IN DIOS OKINTLAJKUILILIJ IN TLANELTOKAKEJ DE ÉFESO

Pablo okintlajkuililij in tiopantlaneltokakej katlej katej itech weyikan de Éfeso

¹ Nej niPablo, nitlatitlanile de Jesucristo porke Dios ijkón okimonekiltij. Nej namechtlaJKUILILIA namejwan katlej ankatej itech weyikan de Éfeso, namejwan katlej aniaxkawan in Dios iwan antlaneltokaj inawak Cristo Jesús. ² ToPapan Dios iwan toSeñor Jesucristo ma amechmakakan inteiknotlamachilis iwan inyolosewilis.

Dios techtiochiwa por medio de Cristo Jesús

³ Ma tikweyikixtikan toTajtzin Dios, iPapan in toSeñor Jesucristo, porke otechmakak miek tlamantle de tlatiochiwalistle de ilwikak ipan toanima porke tipowij inawak Cristo. ⁴ Ya wejkawitl, antes de yeni in tlaltikpak, Dios otechpejpenke para ma tiekan tiaxkawan. Yej okichij ma tiekan tichipawakej iwan amo ma tikpiakan nion itlaj tlajtlakole inawak. ⁵ Ika itlasojtlalis, desde antes de yeni in tlaltikpak, Dios okinekke techpias kej tiikonewan nikuak okualtitlanke in Jesucristo ma mikiki por tejwan, porke Dios ijkón okimonekiltij kichiwas. ⁶ Para ijkón nochtin ma kiweyikixtikan por yen weyi iteiknotlamachilis katlej okipixke por tejwan nikuak okualtitlanke iKone katlej sa tekitl kitlasojtla. ⁷ Cristo okitlaxtlaj ika ieso in totlajtlakol, iwan axan Dios yotechtlapojojpolwij ika weyi iteiknotlamachilis. ⁸ Noijki okipixke weyi iteiknotlamachilis towan nikuak otechmakak noch ixtlamachilistle iwan noch tlanamikilistle. ⁹ Iwan Yej okimonekiltij otechmatiltij tlan achtoj mach akaj okimatia. Otechmatiltij tlanon kichiwas por medio de Cristo. ¹⁰ Dios okijtoj nikuak ajsis tonale, kinmololos nochtin in tlakaj iwan noch tlamantle inawak Cristo. Iwan Cristo kinnawatis nochtin katlej katej itech ilwikak iwan katlej katej ixko yin tlaltikpak.

¹¹ Por yonik, como tisetitokej iwan Cristo, in Dios techmaka toherencia. Desde ikuak in tlaltikpak ayamo oyeka, Dios otechpejpenke para ma tiekan tiaxkawan. Yej kichiwa ke noch tlan tlapanos ma mochiwa ijkón ken Yej kimonekiltia. ¹² Ijkón okichij, para ijkón tejwan katlej achtoj otikchiayaj in Cristo, ma tikweyikixtikan por yen wejweyin tlamantin katlej kichiwa por tejwan. ¹³ Noijki namejwan, nikuak ankikakej

in tlajtole katlej melawak, kijtosneki yen itlajtol in Dios katlej techmakixtia, iwan ankineltokakej in Cristo, ikuakón Dios oamechseyaroj ika iEspíritu Santo iwan anmochijkej kej iaxkawan. Yon Espíritu Santo in Dios okiwaltitlanke para ma yeto towan ijkón ken Yej otechkakitij kichiwas.¹⁴ Dios ika iEspíritu Santo kisentlalia towan nik techaxkatis tlan Dios yokijtoj techmakas nijuak tlamic timakisaskej de itech nochi tlan amo kuale. Iwan ijkón welis tikweyikixtiskej iweylis in toTajtzin Dios.

Pablo okitlajtlanilij in Dios ma kinmaka ixtlamachilistle in tlaneltokakej

¹⁵ Por yonik, nijuak nej onikmatke nik sa tekitl kuale antlaneltokaj inawak in toSeñor Jesúz, iwan de kenik ankintlasojoatlaj nochtin katlej iaxkawan in Dios,¹⁶ desde ikuakón nej mach nikkawa de niktlasojkamachilia in toTajtzin Dios nijuak nimotiotzajtzilia por amejwan.¹⁷ Niktlajtlanilia in Dios de toSeñor Jesucristo, in toweyi Papan, ika iEspíritu Santo ma amechmaka ixtlamachilistle para xikmomakakan kuenta tlan Yej kineki amechnextilis iwan para okachi kuale xikixmatikan.¹⁸ Niktlajtlanilia in Dios ma amechtlapoli namotlalnamikilis, para xikmatikan tlanon tikchiaj inawak Dios katlej otechnotzke para ma tiekan tiavaxkawan. Iwan ijkón xikmomakakan kuenta nik sa tekitl weyi iwan kuakualtzin in herencia katlej Dios kinmakas katlej Yej iaxkawan.¹⁹ Iwan noijki xikmomakakan kuenta nik sa tekitl weyi ipoder katlej mach keman tlami. Yon ipoder tekipanoa totech para techpalewia tejwan katlej titlaneltokaj inawak. Iwan yon ipoder yen katlej okiteititij in Dios ika miek poder²⁰ nijuak okiyolitij in Cristo oksemi de itech imikilis iwan okitlalij ma ewato ik iyekma ompa ilwikak.²¹ Iwan Dios okimakak in Cristo weyi tekiwajkayotl para ma kinnawati nochtin katlej tekiwajkej, nochtin katlej tlatlayekantokej, nochtin katlej kipiaj poder iwan nochtin katlej wejweyikistojej (wejweyititojej). Cristo kipia yin weyi tekiwajkayotl amo san axan itech yin tiempo, sino noijki itech nekáj tiempo katlej satepan yetos.²² Dios yokimaktlij in Cristo nochti tlamanle para ma kinnawati, iwan noijki okitlalij in Cristo ma yeto yen tlayekanke de tinochtin tejwan katlej titlaneltokaj inawak iwan katlej tikatej kej itiopan.²³ Iwan itlalnakayo in Cristo yen tejwan katlej tikatej kej itiopan, iwan tikresibiroaj nochti tlan de Yej iaxka. Tejwan tikajxitiaj in Cristo porke tikatej kej itlalnakayo, iwan Cristo yen kajxitia nochti tlamanle tlan onkaj itech ilwikak iwan ixko yin tlaltikpak.

2*Dios techmakixtia porke techtlasojtla*

¹ Cristo oamechmakak nemilistle nijuak namejwan anyekaj kej anmikkamej, porke ankichiwayaj tlajtlakole iwan ankichiwayaj oksekin tlamantle mach kuale. ² Namejwan ankichiwayaj ken oksekimej tlaltikpaktlakaj kichiwaj. Ankichiwayaj tlan okinekia in Amo Kuale Tlakatl katlej kinnawatia in ejekamej mach kualtin ixko ejekatl, iwan katlej kinyekana katlej mach kinekij kikakiskej in Dios. ³ Tejwan tinochtin nojki otiekaj ken yejwan. Otikchiwayaj biero tlan okelewiaya in totlalnakayo. Iwan nojki otikchiwayaj miek tlamantle mach kuale tlan okinekia in totlalnakayo iwan totlalnamikilis. Iwan por yonik, otechnamikia para techtlajyowiltiani in Dios ika ikualanilis ijkón ken oksekimej kintlajyowiltia katlej mach kineltokaj. ⁴ Pero Dios kipia sa tekitl weyi iteiknotlamachilis, iwan sa tekitl otechtlasojtlak. ⁵ Iwan nijuak otiekaj kej yeskia timikkamej por yen totlajtlakol, Dios otechmakak nemilistle iwan Cristo. Dios otechmakixtij porke kipia weyi iteiknotlamachilis por tejwan. ⁶ Dios otechyolitij kej yeskia otechkixtij de kan otitoktokaj, ijkón ken okikixtij in Cristo. Iwan nojki kej yeskia okichij ma timotlalikan iwan Cristo itech ilwikak. ⁷ Dios ijkón okichij para kiteitis nochipa nik kipia sa tekitl weyi iteiknotlamachilis por tejwan, iwan para kiteitis nojki nik kipia weyi itlasojtlalis katlej techmaka inawak Cristo. ⁸ Dios ika iteiknotlamachilis otechmakixtij de totlajtlakol nijuak tejwan otikneltokakej in Cristo. Yon mach de tejwan okiske para otitlaneltokakej, sino yen Dios otechmakak totlaneltokalis para ma titlaneltokakan inawak. ⁹ Dios otechmakixtij mach por otikchijkej itlaj tlan kuale para otikmotlanilijkej, para ijkón amakaj ma moweyineki. ¹⁰ Tejwan titlachiwaltin de Dios. Dios otechchij para ma tiekan de Cristo Jesús para ma tikchiwakan tlan kuale. Dios ijkón okiyejyekoj okichij por tejwan.

Itech Cristo tikpiaj yolosewilistle

¹¹ Ijkón kiné, namejwan katlej mach anjudiojtin, xikel-namikikan kenamij anyekaj. Namejwan katlej mach an-monakayotekij, amechtokaxtiaj mach ansirkunsidadojtin. Pero in judiojtin monakayotekij, iwan por yonik motokaxtiaj sirkunsidadojtin. ¹² Achtoj namejwan mach ankixmatiaj in Cristo. Namejwan mach anpowiaj inwan tlakaj de Israel. Iwan nojki mach oamechtokaroaya ankipiaskej tlan Dios okijtoj kinmakas in judiojtin de yen akuerdo katlej inwan okichij. Namejwan mach ankichiayaj nion itlaj tlan

kuale para amejwan, porke mach ankiapiayaj in Dios ipan namoyolo. ¹³ Pero axan namejwan ya ansetitokej san se iwan Cristo Jesús. Namejwan katlej achtoj anyekaj wejka de Cristo, axan ya ankatej inawak, porke Yej okinokij ieso iwan omikke por amejwan. ¹⁴ Cristo otechwalkuiliy yolosewilistle iwan tinochtin otechsetilij san se, katlej judiojtin iwan katlej amo judiojtin. Achtoj in judiojtin iwan katlej amo judiojtin omokokoliayaj iwan oyekaj kej yeskia okintlajkox-eelojtoka se tepamitl. Pero Cristo omikke para okixitinij in yon tepamitl katlej okinxeelojtoka. ¹⁵ Cristo omikke itech krus para ayakmo ma mokokolikan, iwan okipojpoloj ipoder itlanawatil in Moisés iwan nochi tlan otechnawatiaya ma tikchiwakan yon tlanawatile. Iwan axan in judiojtin iwan katlej amo judiojtin nochtin mochiwaj sa se tlakatl porke Cristo okichij ma tisetitokan sa se inawak. Ijkón nik okichij ma yeto yolosewilistle. ¹⁶ Cristo omikke itech krus para ma motlapojpolwikan iwan Dios nochtin katlej judiojtin iwan katlej amo judiojtin, iwan okichij ma yekan inawak kej yeskia sa se tlalnakatl. Ijkón nik okipojpoloj in kualanilistle katlej okipiayaj se iwan oksé.

¹⁷ Cristo ovalaj iwan okitematiltij in kuale tlajtole de yolosewilistle. Oamechmatiltij aminochtin namejwan katlej mach anjudiojtin katlej anyekaj wejka de Dios iwan noijki okinmatiltij in judiojtin katlej oyekaj okachi serka de inawak Dios. ¹⁸ Iwan por yen tlan okichij in Cristo por tejwan, in judiojtin iwan katlej amo judiojtin, nochtin welij mijkuaniaj inawak toPapan Dios ika san se Espíritu. ¹⁹ Por yonik, namejwan katlej mach anjudiojtin, mach ok ankatej ken tlakaj katlej chantij tepueblo, sino axan namejwan noijki ya anpowij kej anchanejkej kan chantij nochtin katlej Dios iaxkawan. Namejwan noijki ya anpowij itech ifamilia in Dios. ²⁰ Namejwan ankatej kej se kale, iwan ankatej ipan se cimiento katlej okichijkej in tlatitlaniltin iwan profetajtin, iwan Jesucristo yen tetl katlej okachi kichikajtok in kale. ²¹ Iwan itech Yej, nochi in tepamitl moskaltijtiw iwan moyektentiw para motlamis se tiopan chipawak para yen toSeñor. ²² Iwan ijkón, namejwan inwan judiojtin anmosetiliaj para anmochiwaskej kej se kale para Dios chantis amotech por medio de iEspíritu Santo.

3

Dios okitlalij in Pablo para ma kintlapowi de itlajtol katlej amo judiojtin

¹ Por yonik, nej niPablo, nitzaktok telpiloyan porke namechtlapowia de itlajtol in Cristo namejwan katlej

amo anjudiojtin. ² Namejwan ya kuale ankimatiж nik in Dios onechmakak yin tekitl. Dios ika iteiknotlamachilis, onechmakak yin tekitl para namechpalewis. ³ Dios onechititiж se tlamantle katlej miekej mach kimatij, ijkón ken achtoj nej yonamechijkuililij kanaj keski tlajtole. ⁴ Nikuak namejwan ankileroskej tlan onamechijkuililij, namejwan ankimomakaskej kuenta nik in nej kuale nikmati tlanon kijtosneki in yon tlamantle de Cristo katlej miekej mach kimatij. ⁵ Desde ya wejkawitl, in Dios mach akaj tlakatl okititiaya in yon tlamantle, pero axan Dios yokinmititiж in tlatitlaniltin iwan profetajtin yolchipawakej ika iEspíritu Santo. ⁶ Yon tlamantle katlej achtoj mach otikmatiaj, kijtosneki in judiojtin iwan katlej amo judiojtin nochtin kipiaskej herencia katlej Dios kinmakas. Iwan noiжи san sekán setitoskej itech itlalnakayo. Iwan kipiaskej parte katlej Dios okinkakitij kinmakas in judiojtin, porke katlej amo judiojtin noiЖki kineltokaj in kuale tlajtole katlej temakixtia iwan kitlaliaj intlaneltokalis inawak Cristo Jesús.

⁷ Dios ika iteiknotlamachilis, onechtlalij ma nieto nitekipanoj. Iwan ika ipoder onechmakak yin notekiw para ma niktematilti in kuale tlajtole katlej temakixtia. ⁸ Maski nej okachi nitzikitzin de nochtin katlej iaxkawan in Dios, Yej okipixke weyi iteiknotlamachilis nowan para ma nikinmatilti katlej amo judiojtin, in kuale tlajtole katlej temakixtia katlej techilwia nik sa tekitl miek rikojojotl onkaj itech Cristo asta mach ok tlaixyejyekole. ⁹ Iwan Dios, katlej okichij nochti tlan onkaj, noiЖki onechtlalij para ma nikteititi tlan ya wejkawitl mach akaj okimatis, nik in Yej kinmakixtis katlej amo judiojtin por medio de Cristo. ¹⁰ Ijkón omochij, para ken axan, nochtin katlej kipiaj tekiwajkayotl iwan nochtin katlej tlatlayekantojej itech ilwikak, ma kixmatikan por medio de yen tiopantlaneltokakej, nik in Dios kipia miek ixtlamachilistle. Iwan yon ixtlamachilistle tekipanoa de miek tlamantle. ¹¹ Dios ijkón okijtoj ma mochiwa desde ikuak opéj in tlaltikpak. Yej ijkón okichij por medio de toSeñor Jesucristo. ¹² Iwan por yen totlaneltokalis katlej tikpiaj inawak Cristo axan tikpiaj konfiansa para timijkuaniskej inawak Dios. ¹³ Por yonik, namechmolwilia, amo ximoyolotlamitikan por yen axan nitlajyowia por amejwan. Sino yin tlajyowilistle katlej nipanotok yon se kuale para amejwan.

Itlasoijtlalis in Cristo

¹⁴ Por yonik kiné, nimotlankuaketza inawak toTajtzin Dios, iPapan in toSeñor Jesucristo. ¹⁵ Yen inPapan de nochtin katlej katej ilwikak iwan ixko yin tlaltikpak katlej kineltokaj porke Yej okinchij iwan okintokayotij. ¹⁶ Niktlatlawtia in

toPapan Dios, ke itech irikojyo katlej sa tekitl miek kipia, ma amechmaka poder ika iEspíritu para ximochikawakan ipan namoanima.¹⁷ Iwan niklatlatlawtia in Dios ma chanti in Cristo ipan namoyolo porke namejwan ankineltokaj. Iwan noijki niklatlatlawtia para namejwan ximochikawakan itech itlasottlalis ijkón ken se kuawitl mochikajtok itech inelwayo o noso kej se kale mochikajtok ipan icimiento.¹⁸ Iwan ijkón namejwan xikmomakakan kuenta san sekan inwan nochtin oksekimej katlej iaxkawan Dios, ke itlasottlalis in Cristo sa tekitl patlawak, weyak, wejkatlan iwan wejkapan.¹⁹ Niklatlatlawtia in toTajtzin Dios para namejwan xikixmatikan itlasottlalis in Cristo, katlej sa tekitl weyi iwan asta mach akaj weli kimomaka kuenta. Iwan ijkón namejwan welis antentoskej de Dios ipan namoyolo.

²⁰ Iwan axan, toTajtzin Dios katlej tekipanoa totech ika ipoder, Yej welis kichiwas ika yon ipoder okachi miek de tlan tejwan welis tiktajtlaniliskej iwan asta okachi de tlan welis tikyejyekoskej.²¹ Tejwan katlej tikneltokaj Dios tikatej kej itiopan porke timochiwaj san se iwan Cristo Jesús. Ma tikweyikixtikan toTajtzin Dios nochipa. Ijkón ma yeto.

4

IIEspíritu in toTajtzin Dios techsetilia

¹ Nej, kiné, katlej nitzaktok telpiloyan porke niktekipanoa in toSeñor, namechtlatlatlawtia xichipawkanemikan ijkón ken Dios kineki, porke Dios oamechnotzke para xiekan iaxkawan.² Xiekan anpasensiajtin iwan xiekan ankualtin tlakaj. Xikmatikan xikinxikokan oksekimej ika tlasottlalistle.³ Xikchiwakan de xisetitokan san se ika itlapalewilis in Espíritu Santo. Iwan ijkón ankipiaskej yolosewilistle se iwan oksé.⁴ Porke tinochtin tejwan katlej tikneltokaj in Dios tikatej kej san se tlakatl ika san se totlalnakayo inawak Dios. Onkaj san se Espíritu katlej techsetilia. Onkaj san se tlan tikchiaj katlej Dios otechkakitij nijuak otechnotzke.⁵ Onkaj san se toSeñor. Onkaj san se tlamachtile katlej itech tiktalaij totlaneltokalis. Onkaj san se tlakuateekilistle para nochtin.⁶ Onkaj san se Dios katlej yen toPapan de tinochtin katlej tikneltokaj in Cristo. Yen tlanawatia ika ipoder inpan nochtin, yen tekipanoa itech nochti tlan okichij, iwan yen kajki ipan toyolo de tinochtin.

⁷ Cristo otechmakak kada se de tejwan ipoder kej se tlatliokolile para ma tiwelikan ma tiktekipanokan, ijkón ken Yej okixyejyekoj otechmakak.⁸ Por yonik in tiotlajkuilole kijta:

Nijkuak Yej otlejkok ilwikak, okinwikak ikontraswan kej pre-sojtin, iwan okinmakatewak ipoder kej se tlatliokolile in tlakaj katlej iaixkawan para ma welikan ma kitekipanokan.

⁹ ¿Iwan tlanon kijtosneki “otlejkok”? Kijtosneki achtoj otemok asta kan okachi tlatlampa de ixko yin tlaltikpak. ¹⁰ Iwan katlej otemok no yen noijki katlej otlejkok asta kan okachi ajkopan de itech ilwikak, para yen yetos ika iEspíritu itech nochi in ilwikak iwan itech nochi in tlaltikpak. ¹¹ Iwan okinmakak ipoder in tlakaj kej se tlatliokolile para ma welikan ma kitekipanokan. Sekimej Yej inewian okintlalij ma yekan tlatitlaniltin, sekimej okintlalij ma yekan profetajtin, sekimej okintlalij ma yekan tetlapowijkej de it-lajtol katlej temakixtia, sekimej okintlalij ma yekan pastortin iwan noijki sekimej okintlalij ma yekan tlamachtijkej. ¹² Ijkón Yej okinyektlalij ma yekan moesojkej itech kada tekti nochtin katlej iaixkawan in Dios para kuale ma welikan ma kitekipanokan, iwan para ma kiskaltikan itlalnakayo in Cristo. ¹³ Iwan moneki ma timopalewikan tinochtin asta ikuak tejwan katlej titlaneltokakej ma tisetitokan san se itech tlan tikneltokaj iwan itech tlan tikmatij de yen iKone in Dios. Iwan ijkón mach ok tieskej kej tikonemej, sino tieskej kej titlakaj katlej ya tichijchikawakej, timoskaltiskej iwan timotlamitiwej noijki ken Cristo. ¹⁴ Iwan ijkón mach ok tikchiwaskej ken konemej katlej niman kipatlaj intlayejyekol, para amo ma techwika itlaj oksé tlamachtile ken nijkuak in tlajsole kitki in ejekatl. Porke katej sekimej tlakaj katlej kite-moaj kenik kintlaneltokitiskej in tlakaj ika intlamachtil katlej mach melawak, para kinwikaskej ipan inmojwi mach kuale. ¹⁵ Sino ma tikijtokan tlan melawak ika tlaosojtlalistle. Iwan ijkón ma timoskaltikan itech nochi tlamantle para tieskej ken Cristo, porke Yej kajki kej itzontekon de yen itlalnakayo. ¹⁶ Iwan ijkón ken itlalnakayo se tlakatl weli tekipanoa nochi in partes katlej kipia porke nochi setitok, ijkón noijki in Cristo okintlalij nochtin tlaneltokakej kan moneki yeskej, para ijkón nochtin welis mopalewiskej se iwan oksé, para nochi itlalnakayo in Cristo kuale ma tekipano iwan ma moskalti, iwan ma mochikawa ika tlaosojtlalistle.

Cristo otechmakak yankuik nemilistle

¹⁷ Nikneki namechilwis ika itlanawatil in toSeñor in yin tlamantle: ayakmo xinemikan ken oksekimej katlej mach kixmatij Dios. Porke tlan yejwan kiyejyekoaj yon mach itlaj ipatij. ¹⁸ Nemij tlatleyualpan. Mach itlaj kimomakaj kuenta porke ixtzajtzaktokej iwan mach kipiaj yankuik nemilistle katlej Dios kitemaka. Porke yejwan mach kinekij kikakiskej

in Dios. ¹⁹ Mach ok kimatij pinawaj, yokitzkijkej miek tlamantle biero, iwan ika pakilstle kichiwaj nochi tlamantle bierotik. ²⁰ Pero namejwan mach oamechmachtijkej de Cristo para xikchiwakan yon tlamantle biero, ²¹ porke nej nikmati nik namejwan ankikakej iwan oamechmachtijkej de tlan melawak katlej onkaj itech Jesús. ²² Namejwan ya anki-matij nik mach ok moneki annemiskej ken achtoj nikuak ayamo ankixmatiaj in Dios. Moneki ankikawaskej yon nemilistle katlej oamechijtlakoaya porke oamechkajkayawa yka nochi tlamantle katlej oamechyoltilanaya. ²³ Namejwan moneki anmoyankuiliskej ipan namoyolo iwan ipan namot-lalnamikilis. ²⁴ Iwan ijkón ken se tlakatl nikuak motzotzoltia ika itzotzol yankuik, namejwan noiiki ximotzotzoltikan ika yankuik nemilistle para xinemikan ken Dios kineki. Xiyolchipawkanemikan iwan ximelajkanemikan porke Dios otechchij para ma tiekan ken Yej.

²⁵ Por yonik, ayakmo xitlakajkayawan, sino kada se de amejwan xikijtowan tlan melawak inwan namokniwan. Porke tinochtin tipowij san itech se tlalnacaktl.

²⁶ Tla ankualaniskej, amo xitlajtlakokan. Iwan nikuak ankualaniskej amo xikualantowan nochi in se tonale sino niman ximotlapojpolwikan. ²⁷ Amo xikkawilikan in diablo ma amechkajkayawa para xitlajtlakokan.

²⁸ Akin tlachteki, ayakmo ijkón ma kichiwa iwan ma pewa ma tekipano. Okachi kuale ma tekipano ika imawan para ma kichiwa itlaj kuale tekitl, para ijkón welis kipias tlanon kinmakas in tokniwan katlej mach itlaj kipiaj.

²⁹ Amo xikijtowan itlaj tlajtole biero, sino xikijtowan itlaj kuale tlajtole katlej ika kinyolochikawas iwan kinpalewis katlej kikakiskej para okachi kuale ma tlaneltokakan inawak Dios. ³⁰ Amo xikchiwakan de ma moyolkoko iEspíritu Santo in toTajtzin Dios, porke ika iEspíritu namejwan anmokajkej anseyadojtin (onmachiotitokej) para anyeskej kej iaxkawan in Dios asta nekáj tonale nikuak Yej amechwikas para il-wikak.

³¹ Ayakmo xiyołchichikatentowan, amo sa xikualantine-mikan, amo san niman xikualantiwetzikan, amo xikuawtzatzikan nikuak itlaj ankijtoskej, amo xitewikaltikan, iwan nion amo xitetotkikan tlan amo kuale. ³² Sino moneki xiékan ankualtin tlakaj se iwan oksé iwan xikinchiwakan kuenta, iwan ximotlapojpolwikan se iwan oksé ijkón ken Dios oamechtlapojpolwij inawak Cristo.

¹ Namejwan xikchiwakan ken Dios kichiwa, porke namejwan antepilwan de Dios, iwan amechtlasojtla. ² Ximotlasojtlakan ken Cristo techtlasojtla asta omotemaktij (omotemaktilij) para ma kimiktikan por tejwan. Yej omotemaktij kej se ichkatzin katlej okimiktijkej iwan okimanilijkej in Dios kej se tlamanale katlej kuakualtzin ajwiak.

³ Namejwan ya anteaxkawan de Dios, por yonik amo xikchiwakan nion itlaj tlan amo kuale. Amo ximomekatikan, amo xikchiwakan itlaj tlamantle biero iwan nion amo xik-welitakan ankipiaskej miek tlamantle okachi de tlan ya ankipiaj. ⁴ Amo xikijtokan itlaj tlajtole tepinatij, nion itlaj tlajtole tontojoyotl, iwan nion itlaj tlajtole kamanale. Porke yon tlamantle mach ok technamiki para tikijtoskej, okachi kuale ma tiktlasojkamachilikan in toTajtzin Dios por tlan kichiwa por tejwan. ⁵ Namejwan ya ankimatij ke tla akaj momekatis, o noso kichiwas itlaj tlamantle biero o noso kiwelita kipias miek tlamantle okachi de tlan ya kipia, yon kej yeskia kin-weyikixtia in santojtin, mach welis kalakis kan tlanawatia in Cristo iwan toTajtzin Dios. ⁶ Amakaj ma amechkajkayawa ika itlaj tlajtole katlej mach melawak, katlej amechilwiaj mach itlaj anpanoskej tla ankinchiwaskej in yonmej tlajtlakoltin. Porke Dios kintlajyowiltis ika ikualanilis in yonmej katlej mach kineltokaj iwan kinchiwaj in yonmej tlajtlakoltin. ⁷ Por yonik, amo inwan ximonelokan.

⁸ Achtoj namejwan anyekaj ijtk tlatleyualotl, pero axan, ya ankatej ijtk tlanextle porke ya ansetitokej iwan toSeñor. Por yonik, xinemikan ijkón ken moneki nemiskej katlej katej ijtk tlanextle. ⁹ Porke akinmej katej ijtk tlanextle, yonmej yolkualemej, kichiwaj tlan kuale iwan kijtaj tlan melawak. ¹⁰ Nochipa xiktemokan tlanon kipaktia in toSeñor para yen yon xikchiwakan. ¹¹ Amo xikchiwakan itlaj tlamantle katlej mach tepalewij ken katlej kichiwaj in tlakaj katlej katej ijtk tlatleyualotl. Okachi kuale xikinmilwikan nik mach kuale yon tlan kichiwaj. ¹² Porke asta tepinatij se kijtos tlan yejwan kichiwaj ichtaka. ¹³ Iwan nochi tlamantle tlan mochiwa kan onkaj tlanextle, nochi weli mota. ¹⁴ Por yonik in Dios kijta itech in tiotlajkuilole:

Xijsa tej katlej tikochi.

Ximewa tej katlej tikaj kej timikkatl por yen tlajtlakole katlej tikchiwa,

iwan Cristo mitztlawilis ipan monemilis.

¹⁵ Por yonik, xikpiakan kuidado de kenamij nik anyeskej itech namonemilis. Amo xiekan kej yeskia mach ajsitok namotlalnamikilis sino xikpiakan kuale namotlalnamikilis.

¹⁶ Amo xikpolojtokan tiempo, sino nochipa xikchiwakan tlan kuale ken Dios kineki, porke ya tikatej ya itech itlamian tonaltin iwan tlakaj kichiwaj miek tlamantle mach kuale. ¹⁷ Amo xiekan kej yeskia mach ajsitok namotlalnamikilis, sino xikmomakakan kuenta tlanon kineki in toSeñor xikchiwakan. ¹⁸ Amo xitlawantinemikan, porke yon welis amechixpolos. Okachi kuale ximotemitikan de Espíritu Santo iwan xikkawilikan Yej ma amechyekana. ¹⁹ Ximoyolojchikawakan se iwan oksé ika salmos, ika himnos iwan ika tlakuikale de weyikixtilistle para Dios. Xiktlakuikilikan toTajtzin Dios iwan xikweyikixtikan ika nochi namoyolo. ²⁰ Nochipa ximotlasojkamatikan inawak toPapan Dios ika itoka in toSeñor Jesucristo por nochi tlan kichiwa por tejwan.

Kenamij moneki nik tieskej itech tochan

²¹ Ximopalewikan se iwan oksé, para ijkón ankiteititiskej nik ankitlakitaj in Dios.

²² Namejwan ansiwamej moneki ximotekawilikan ma amechyekanakan namookichwan ijkón ken ankikawiliaj ma amechyekana toSeñor. ²³ Porke in tlakatl moneki yen kiyekanas isiwa, ijkón ken Cristo yen techyekana tejwan katlej titlaneltokakej iwan katlej tikatej kej itiopan. Cristo techmakixtia iwan techyekana porke Yej kajki kej totzon-tekon iwan tejwan tikatej kej itlalnakayo. ²⁴ Iwan ijkón ken tikkawiliaj in Cristo ma techyekana tejwan katlej tikatej kej itiopan, ijkón noijki moneki in siwamej ma kikawilikan immokich ma kinyekana itech nochi tlamantle.

²⁵ Tlakajtin, xikintlasojtlakan namosiwawan, ijkón ken Cristo otechtlasojtlak tejwan katlej tikatej kej itiopan iwan omotemakak por tejwan tinochtin. ²⁶ Ijkón okichij para techchipawas iwan para ma tiekan de Yej iaxkawan. Yej otechchipaj de totlajtlakol, iwan kuale otechpajpakke niikuak otikijtojkej nik tiktaliaj nochi in totlaneltokalis itech itlajtol. ²⁷ Iwan para tejwan, katlej tikatej kej itiopan, ma timoketzakan ixpan kej se novia kuakualtzin chijchitok, katlej mach sokíoj, mach xojxolochtik iwan nion mach kipia itlaj oksé tlamantle mach kuale. Ijkón Yej kineki ma tiekan tejwan katlej tikatej kej itiopan, kineki ma tiekan tichipawakej iwan amo ma tikpiakan nion itlaj tlajtlakole katlej ika welis techislakawiskej. ²⁸ Ijkón ken tlakatl kitlasojtla itlalnakayo, ijkón noijki moneki ma kitlasojtla isiwa. Akin kitlasojtla isiwa motlasojtla yej inewian. ²⁹ Porke mach akaj tlakatl kikokolia itlalnakayo, sino kitlamaka iwan kimalwia. Cristo no ijkón towan kichiwa porke tejwan tikatej kej itiopan. ³⁰ Tejwan tipowij itech itlalnakayo, iwan inakayo iwan iomowan yon yen tejwan. ³¹ Porke in tiotlajkuilole ijkín kijta: “Por yonik se

tlakatl kikajtewa ipapan iwan imaman para mosetilia iwan isiwa, iwan de omen mochiwa sa se tlakatl.”³² Sa tekitl owij para se kimomakas kuenta in yin tlamantle katlej miekej mach welij kimomakaj kuenta, pero Dios techititia nik in tejwan katlej titlaneltokaj inawak Cristo timochiwaj san se iwan Yej.³³ Ijkón kiné, kada se tlakatl moneki ma kitlasojtla isiwa ijkón ken yej motlasojtla, iwan kada se siwatl moneki ma kitlakita iokich.

6

¹ Konemej, namejwan katlej antlaneltokaj inawak toSeñor, moneki xikintlakitakan namotajwan, porke yon sa tekitl kuale. ² In tiotlajkuilole kija: “Xiktlakita mopapan iwan momaman.” Iwan de yen majtlaktin tlanawatiltin, yen yin achtoj tlanawatile kan noijki techilwia nik in Dios techtiochivas tla tikneltokaskej itlajtol. ³ Ijkín kija: “Ijkón xikchiwa para kuale tietos iwan ijkón tikpias nemilistle wejkawitl ixko yin tlaltikpak.”

⁴ Namejwan antetajmej, amo xikinkualanikan namopilwan, sino moneki kuale xikinyekanakan iwan kuale xikinmachtikan itech itlajtol in toSeñor.

⁵ Namejwan katlej ankatej kej antlanamaktin, xikintlakitakan namotekowan ixko yin tlaltikpak. Xikintlakitakan iwan xikinmiimakasikan, iwan noijki xikintekipanokan ika nochí amoyolo kej yeskia yen Cristo ankitekipanoaj.

⁶ Nochipa xitekipanokan kuale iwan amo san nikuak amechlatok namoteko, para ma amechita nik kuale antekipanoaj. Sino moneki xitekipanokan ijkón ken moneki tekipanoskej itekipanojkawan in Cristo. Xikchiwakan ika nochí amoyolo ken Dios kineki. ⁷ Xitekipanokan ika pakilistle kej yeskia antekipanoaj para yen toSeñor iwan amo para akaj oksé tlakatl. ⁸ Namejwan kuale ya ankimatij ke kada se tlakatl, kox tlanamakte o noso amo tlanamakte, in toSeñor kitlaxtlawis tla kichiwas tlan kuale.

⁹ Iwan namejwan katlej antekomej, moneki noijki ijkón xikchiwakan inwan namotekipanojkawan katlej ankinpiaj kej tlanamaktin, iwan amo xikinmajmawtikan. Xikel-namikikan nik namejwan iwan yejwan ankipiaj san se amoTeko ompa ilwikak, porke Yej techita tinochtin san se parejo.

Dios techmaka tlan ika timopalewiskej

¹⁰ Iwan axan, nokniwan, ximochikawakan inawak toSeñor ika ipoder, porke yon ipoder mach akaj welis kitlanis.

¹¹ Xiktekipanoltikan nochí tlan Dios amechmaka para ika ximopalewikan, iwan ijkón ankitlaniskej in diablo nikuak kinekis amechmayawis ika itlakajkayawalis. ¹² Porke tejwan

mach timomagaj inwan tlakaj katlej kipiaj inmeso iwan innakayo ken tejwan. Tejwan timomagaj (tikmomakaj) inwan ejekamej mach kualtin katlej kipiaj tekiwajkayotl, katlej kipiaj chikawalistle, katlej tlatlayekantocej, iwan katlej kipiaj poder ixko yin tlaltikpak ijtitk tlatleyualotl. Yonmej ejekamej mach kualtin kinyoltilanaj in tlakaj para ma kichi-wakan tlan amo kuale, iwan nemij ixko ejekatl.¹³ Por yonik, moneki xiktekipanoltikan nochi tlan Dios techmaka para ika timopalewiskej, para ijkón welis ankixikoskej ni-jkuak in yonmej ejekamej mach kualtin kinekiskej amowan mokitzkiskej. Iwan nijuak nochi ya ankixikojkej, name-jwan anmoyekketoskej.¹⁴ Moneki ximoyekketokan kiné, iwan ximotlajkoilpikan ika tlan melawak ken se soldado motlajkoilpia nijuak yawi temagati (temakatij). Iwan xi-chipawkanemikan kej yeskia ankonakiaj se tepestle namoelpa para ika anmotzakuiliskej ken katlej konakia se soldado.¹⁵ Ximoyejyektlalikan para ankitematiltiskej in kuale tlajtole katlej temakixtia katlej kitemaka yolosewilistle, ijkón ken se soldado moyejyektlalia ika ikakuan para yas temagati (temakatij).¹⁶ Iwan katlej okachi moneki, yen xikpiakan namotlaneltokalis para ika ximopalewikan kej yeskia se tepestle patlawak, ken katlej kipiaj in soldadojtin, para ika ximotzakuilikan nijuak in diablo amechmojmotas ika iflechajwan tlukuitokej.¹⁷ Xikpiakan namonemakixtilis kej se kasko para ika ximotzakuilikan itech namotzontek, ijkón ken se soldado motzakuilia itech itzontek ika se kasko. Iwan noijki xikpiakan tlajtol in Dios kej se espada katlej techmaka in Espíritu Santo.¹⁸ Nochipa ximotiotzajtzilijtokan. Xiktlatlawtikan iwan xiktlatlaniikan in toTajtzin Dios nochi iEspíritu Santo. Xiijsatokan iwan amo xikkawakan de ximo-tiotzajtzilikan por nochtin katlej iaxkawan in Dios.¹⁹ Noijki ximotiotzajtzilikan por nej, para Dios ma nechmaka tlajtole nijuak nitlapoas, para ma nitlapoa ika ixchikawalistle ni-jkuak niktematiltis in kuale tlajtole katlej temakixtia katlej achtoj mach akaj okimatia.²⁰ Dios onechtlalij kej nitlat-lanile para ma niktematilti in yon kuale tlajtole. Iwan por yonik axan nijilpitok ika kadena nian telpiloyan. Ximo-tiotzajtzilikan por nej para ma nitetlapowi ika ixchikawalistle ijkón ken moneki.

Pablo okonintlajpaloj in tokniwan

²¹ Tíquico, in totetlasojkaikni, yej amechmatiltis nochi tlan nipanotiwitz iwan tlan axan nikchiwa. In tokni Tíquico yej kitekipanoa in toTajtzin Dios iwan nochipa kichiwa ken mon-eki.²² Por yonik niktitlani amonawak, para yej ma amechilwi kenamij tikatej iwan ijkón ma amechyolojchikawa.

23 ToPapan Dios iwan toSeñor Jesucristo ma kinmakakan in tokniwan yolosewilistle iwan tlasojtlalistle ika tlaneltokalis-
tle. 24 Iwan ma Dios kintiochiwa nochtin katlej kitlasojtlaj
in toSeñor Jesucristo ika tlasojtlalistle katlej mach keman
mopatla. Ijkón ma yeto.

SAN PABLO ITLATITLANIL IN DIOS OKINTLAJKUILILIJ IN TLANELTOKAKEJ DE FILIPOS

Nikuak in Pablo otzaktoka telpiloyan okonintlajkuililij in tlaneltokakej de Filipos

¹ Nej niPablo iwan tokni Timoteo katlej nowan kajki, tiktekipanoaj in toTeko Jesucristo. Tamechontlajkuililiaj aminochtin namejwan, iwan aminochtin katlej antlayekankej, iwan aminochtin katlej antlapalewijkej itech tiopan, katlej anchantij itech weyikan de Filipos, katlej Dios amechpia kej iaxkawan porke ansetitokej san se iwan Cristo Jesús. ² ToPapan Dios iwan toSeñor Jesucristo ma amechmakakan inteiknotlamachilis iwan inyolosewilis.

Pablo omotiotzajtzilij por yen tlaneltokakej

³ Nochipa nikuak namechelnamiki, nimotlasojkamati inawak toTajzin Dios. ⁴ Iwan sa tekitl nipaki nikuak nimotiotzajtzilia inawak Dios por aminochtin namejwan. ⁵ Porke desde ikuak ankineltokakej in kuale tlajtole katlej temakixtia iwan asta axan, namejwan antekipanojtiwitzej nowan para ke oksekimej tlakaj ma kikakikan in yon kuale tlajtole. ⁶ Kuale nikmati nik in Dios, katlej opéj kichiwa kuale tekitl ipan namoyolo nikuak ankineltokakej, kiseguiros ijkón kichijtos asta nekáj tonale nikuak Jesucristo witz. ⁷ Ijkón nikyejyekoa de amejwan iwan nikita kuale ijkón nikyejyekos porke sa tekitl namechtlasojtla. Porke namejwan iwan nej Dios techsepanmaka iteiknotlamachilis. Maski nikuak nitza-ktok, o noso nikuak nikaj inmixpan tekiwajkej, namejwan annechpalewiaj para nikinmatiltia in tlakaj nik melawak tlan kijta itlajtol in Dios. ⁸ Dios kuale kimati nik in nej ipan melajka namechtlasojtla, namechtlasojtla ika noch in tlasojtlalistle katlej Jesucristo nechmaka. ⁹ Niktlajtlanilia in toTajzin Dios xikpiakan okachi miek tlasojtlalistle, iwan xikpiakan okachi miek ixtlamachilistle iwan tlalnamikilistle. ¹⁰ Para ijkón nochipa xikmatikan katlij yen kuale katlej moneki ankichiwaskej, para xikpiakan namonemilis chipawak iwan ijkón amakaj welis amechtlajtlakoltis de itlaj itech nekáj tonale nikuak in Cristo witz. ¹¹ Jesucristo amechpalewis para xikchiwakan miek tlamatle tlan kuale. Ijkón nochtin kiweyikixtiskej iwan tlapoaskej kuale de toTajzin Dios.

Para nej mach nikpia nemilistle tla Cristo amo kajki nowan

¹² Nokniwan, nikneki xikmatikan ke noch iyn tlajyowilis-tle katlej nipanoa, kinpalewia miekej oksekimej katlej kikakij iwan kineltokaj in kuale tlajtole katlej temakixtia. ¹³ Nochtin in soldadojtin katlej katej itech ipalacio in rey, iwan nochtin oksekimej kimatij nik nitzaktok porke nikneltoka in Cristo. ¹⁴ Iwan miekej tlaneltokakej okachi moyolojchikawaj tlanel-tokaj inawak Cristo porke nechitaj nitzaktok. Iwan por yonik mach ok momawtiaj para kitematiltiskej itlajtol in Dios.

¹⁵ Melawak, sekimej tetlapowiaj de Cristo porke notech moxikoaj, iwan kinekij yejwan okachi ma kinchiwilikan kuenta iwan nej amo. Pero oksekimej tetlapowiaj de itlajtol in Dios ika kuale inyolo. ¹⁶ Sekimej tetlapowiaj de Cristo porke melawak kitlasojtlaj in toSeñor, kimatij nik in Dios okinekke nian ma nechtzakuakan para welis nikinmilwis de itlajtol in Dios katlej nian katej. ¹⁷ Pero oksekimej tetlapowiaj de Cristo para moweyinekiskej. Amo tetlapowia ika kuale inyolo. Kinekij okachi ma nitlajyowi nian ijtk telpiloyan kan nitzaktok. ¹⁸ Pero mach itlaj kijtosneki tla tetlapowiaj de Cristo ika kuale inyolo o noso amo. Porke tla tetlapowiaj de Cristo, yen yon tlan okachi nechpaktia.

Yen yon tlan okachi nechpaktijtos. ¹⁹ Porke kuale nikmati nik nimakisas de tlan nipanoa iwan nechkajkawaskej, porke namejwan anmotiotzajtziliaj por nej iwan porke iEspíritu in Jesucristo nechpalewis. ²⁰ Tlan nej nikneki iwan tlan nej nikchia ika noch iynoyolo yen amo nikchiwas itlaj tlan ika welis nipinawas. Yen yon tlan nej nikchia. Pero nikneki nitetlapowis de Cristo ika ixchikawalistle ijkón ken nochipa nikchiwa para notech ma kitakan iweyilis in Cristo, iwan mach nitlanemilia tla nechmiktiskej o noso amo. ²¹ Porke tla nej niyolitos, niyolitos para Cristo. Iwan tla nimikis, sa tekitl miek niktlanis, porke nietos iktlanke (ik tlami) iwan Cristo. ²² Pero tla ok niyolitos itech yin notlalnakayo, nitekipanos para Dios para okachi miekej ma kineltokakan. Tones mach nikmati kox nikneki niyolitos o noso kox nikneki nimikis. ²³ Mach nikmati katlij yen nikneki. Kanaj niknekiskia okachi kuale ma nimiki para nieti iwan Cristo, porke yen yon tlan okachi kuale para nej. ²⁴ Pero para amejwan okachi kuale tla nej ok niyolitos. ²⁵ Nej nikmati nik yen yon okachi kuale para amejwan. Nikmati nik ok nietos amowan para namech-palewis para okachi ximoskaltikan iwan okachi xikpiakan pakilistle itech namotlaneltokalis. ²⁶ Por yonik, nijuak ok-semi amowan nietos, namejwan okachi ankiweyikixtiskej in Cristo Jesús, porke oksemi amowan nietos.

²⁷ Namejwan xiekan ijkón ken moneki yeskej katlej yokineltokakej in kuale tlajtole katlej temakixtia. Iwan

tla nias namechitati o noso amo, nej nikneki nikmatis nik namejwan kuale am moyekketokej iwan ankipiaj san se amoyolo. Iwan nikneki nikmatis nik ansepantekipanoaj para oksekimej ma kineltokakan in kuale tlajtole katlej temakixtia.²⁸ Iwan nion amo ximotekawilikan ma amechmajmawtikan katlej amechkokoliaj. Porke ijkón mota nik melawak yejwan yawij kan tlaixpolojkan, pero namejwan Dios yoamechmakixtij iwan yoamechmakak yankuik nemistle, katlej Dios ijkón okimonekiltij.²⁹ Dios okimonekiltij namejwan xitlaneltokakan inawak Cristo, iwan noijki okimonekiltij xitlajyowikan por Yej.³⁰ Namejwan iwan nej parejo titlajyowiaj por Cristo. Namejwan achtoj ya ankimomakakej kuenta kenik onitlajyowij por Yej. Iwan asta axan nitlajyowijtok ijkón ken ya ankimatkej.

2

Jesús omoiknomatke iwan Dios okiweyijkatlalij

¹ Ya ankimatij nik in Cristo amechyolojchikawa, iwan itlasoijtalis amechyolalia. Iwan noijki ankimatij nik in Espíritu Santo kajki amowan iwan noijki ankimatij nik namejwan anmotlasoijtlaj iwan anteiknomatij. ² Tones, xikchiwakan de ma nikpia miek pakilistle. Xikpiakan san se namotlannamikilis iwan ximotlasoijtlakan se iwan oksé. Xikpiakan san se amoyolo iwan xiekan san se tlajtole (de akuerdo). ³ Amo xiktemokan para ankipiaskej tlan ankinekij san para amejwan, iwan nion amo xikchiwakan itlaj tlan ika amechweyikixtiskej in tlakaj por tlan ankichiwij para ika amoweyinekiskej. Sino namejwan xikinmitakan oksekimej nik okachi wejweyikistojej (wejweyititojej) ke amejwan. ⁴ Amo xikchiwakan tlan kuale san para amejwan, sino noijki xikchiwakan tlan kuale para oksekimej.

⁵ Namejwan xikpiakan namotlaye jyekolis ijkón ken Jesucristo okipixke nikuak owitza ixko yin tlaltikpak. ⁶ Maski in Cristo Yej Dios, mach okinekke omoteititij kej Dios ika ipoder para ma kitakan in tlakaj nik yen Dios. ⁷ Sino okikaj se lado iweyikixtilis iwan omochij tlakatl ken tejwan. Omochij kej se tlakatl tepalewij, iwan otlakatke itech se siwatl ijkón ken tejwan otitlakatkej. ⁸ Iwan nikuak oyeka kej se tlakatl, omoiknomatke iwan okineltokilij tlan iPapan okilwij iwan asta omotemaktij (omotemaktilij) para ma kimiktikan, iwan okimiktijkej itech se krus. ⁹ Por yonik toTajtzin Dios okiweyijkatlalij iwan okimakak se itoka katlej okachi importante ke oksekimej intoka. Kijtosneki Jesús yen okachi weyikistok (weyititok) de nochtin. ¹⁰ Para ijkón nochtin katlej katej

ilwikak iwan katlej katej ixko yin tlaltikpak, iwan noijki katlej katej itlampa tlale, ma motlankuaketzakan iyakapan Jesús nikuak kikakiskej itoka. ¹¹ Iwan ijkón nochtin kijtoskej nik in Jesucristo yen toweyi Tlanawatij, iwan ijkón ma kiweyikixtikan toPapan Dios.

In tlaneltokakej katej kej tlanextin ixko yin tlaltikpak

¹² Ijkón kiné, notetlasojkaikniwan, namejwan nochipa ankineltokayaj itlajtol in Dios nikuak nej onieka amowan, pero axan okachi moneki xikneltokakan porke axan nikaj wejka de amejwan. Xikchiwakan nochí tlan Dios kineki para ma mota nik melawak in Dios yoamechmakixtij. Iwan xiktlakitakan in Dios ika nemawtile para amo ankichiwaskej tlan amo kuale katlej Yej mach kiwelita. ¹³ Dios tekipanoa ipan namoyolo para xiknekikan xikchiwakan tlan kuale tlan Yej kineki. Noijki amechmaka chikawalistle para kuale xikchiwakan tlan Yej kipaktia.

¹⁴ Nochi tlan ankichiwaj xikchiwakan ika kuale. Amo ximoixtokakan por itlaj tlamantle tlan ankichiwaj. ¹⁵ Para ijkón amakaj ma amechtlajtlakolti de itlaj, porke namejwan anyolchipawakej ijkón ken moneki ma yekan ikonewan in Dios. Moneki xiekan anchipawakej para ijkón amakaj welis amechtlajtlakoltis maski ankatej inwan tlakaj katlej mach kualtin iwan yolbierotikej. Iwan ijkón namejwan anyeskej kej antlanextin inmixpan tlakaj de yin tlaltikpak. ¹⁶ Xikintlapowikan in tlakaj de itlajtol in Dios katlej kitemaka yankuik nemilistle, iwan nikuak in Cristo walmokuepas, nipakis amonawak. Nipakis porke mach san tekitl onamechmachtij de itlajtol in Dios, iwan nion mach san tekitl onitekipanoj. ¹⁷ Maski ma nechmiktikan por yen Cristo, porke namejwan ankineltokakej nikuak nej onamechtlapowij, nej sa tekitl nipakis. Yon kej yeskia nimotemaktia (nimotemaktilia) inawak Dios ipan artal kej se yolkatl katlej kimktij iwan toyawi ieso ipan se tlamantle katlej namejwan ankimakaj in Dios, kijtosneki yen namotlanelkalis katlej ankipiaj inawak. Iwan por yonik, nej nikneki namejwan noijki nowan xipakikan. ¹⁸ Por yonik, kiné, xipakikan iwan nowan xikpiakan pakilstle tla nechmiktiskej por yen Cristo.

Timoteo iwan Epafroditó

¹⁹ Tla toSeñor Jesús kimonekiltis, nikchia san niman niktitlanis in Timoteo ma amechitati. Iwan ijkón nej sa tekitl nipakis nikuak yej mokuepati porke nechmatiltis kenamij ankatej. ²⁰ Porke mach onkaj oksé, san yen Timoteo katlej kiyeyjyekoa ijkón ken nej nikyejyekoa. Iwan ika nochí iyolo motekipachoa por amejwan. ²¹ Porke nochtin kintekipachoa

itlaj tlan kuale san para yejwan, iwan mach kintekipachoa itlaj tlan kuale para Jesucristo. ²² Pero namejwan ya ankixmatij in Timoteo iwan ya ankimatij nik chipawkanemi. Yej nechpalewia para titetlapowiaj de yen kuale tlajtole katlej temakixtia, yej nechpalewia ijkón ken se tekone kipalewia ipapan. ²³ Ijkón kiné, nikneki san niman namechtitlanilis in Timoteo nikuak nej nikmatis tlanon kichiwaskej nowan nian kan nitzaktok. ²⁴ Iwan nikmati ipan noyolo nik in Dios noiiki nechkawilis ma niwia ma namechitati san niman.

²⁵ Pero axan nikmolwia moneki namechtitlanilis in Epafrodito. Yej se nokni noiiki tlaneltokak, yej iwan nej san sekan tiktekipanoaj in Cristo, iwan san ken tomen tipanoaj tlajyowilistle ken panoaj in soldadojtin. Namejwan annechwaltitlanilijkej para ma nechpalewi itech tlan omonekia nechpalewis. ²⁶ Pero axan yej kineki mokuepas amechitati aminochtin, iwan sa tekitl tlanemilia porke namejwan ankimatkej nik in yej omokokoaya. ²⁷ Iwan melawak nik in yej omokokoaya asta ya mikini. Pero Dios okiknomatke, iwan amo san yen okiknomatke sino nej noiiki onechiknomatke, para amo ma nikpia okachi neyolkokole de tlan ya nikpia. ²⁸ Por yonik, axan sa tekitl nikneki namechtitlanilis para namejwan xipakikan nikuak ankitaskej oksemi, iwan para nej ayakmo ma nimoyolkoko okachi. ²⁹ Xikresibirokan ika miek pakilistle porke yej noiiki tokni inawak in toSeñor. Iwan nochipa xikintlakitanon noctin katlej kichiwaj ken Epafrodito. ³⁰ Porke yej ya meroj mikini porke kitekipanoa in Cristo. Sa tekitl omokokoaya iwan ya ora mikini porke onechpalewij ika tlan namejwan mach anwelikej annechpalewijkej.

3

Moneki ma tikixmatikan in Cristo ipan melajka

¹ Iwan axan nokniwan, xipakikan inawak toSeñor. Mach nechtekimaka para oksemi namechilwis tlan yonamechikuiilij, porke yon amechpalewis. ² Ximotlachilikan de yen tlakaj mach kualtin katlej kichiwaj kej itzkuinmej. Porke yejwan tlamachtiaj iwan kijtaj moneki anmosirkunsidaroskej para Dios welis amechmakixtis. ³ Pero yen tejwan katlej melawak tikatej tisirkunsidadojtin porke tiktekipanoaj in Dios ijkón ken Espíritu Santo techititia ma tikchiwakan. Iwan sa tekitl tipakij inawak Cristo Jesús, iwan amo tikchiaj timomakixtiskej ika tlan tejwan welis tikchiwaskej. ⁴ Iwan tla kualtini ijkón se momakixtiani, tonses yen nej okachi nitlayekantoskia para nimomakixtis. Tla akaj kiyejyekoa ijkón welis momakixtis, tonses nej okachi kuale nikmatini

nik melawak nimomakixtis. ⁵ Porke nej onechsirkunsidarojkej nikuak onikpiaya chikome tonale de onitlakatke. Nej niwalajtok de familia de Israel, iwan niwalajtok nelwatl de Benjamín. Nej onitlakatke nihebreo porke notajwan noi jki hebreos. Nej onieka nifariseo katlej okachi chikawak kitlakitaj intlanawatil in judiojtin. ⁶ Sa tekitl oniktlakitaya intlamachtil in fariseos ika nochí noyolo iwan por yonik asta onikintlajyowiltiaya in tlaneltokakej. Iwan amakaj owelia onechistlakawiaya de itlaj, porke onikchiwaya nochí tlan kijta intlanawatil in judiojtin. ⁷ Pero nochí yon tlamanle katlej para nej achtoj onikitaya okipiaya miek ipatij, satepan onikmomakak kuenta nik mach itlaj ipatij nikuak oniknel tokak in Cristo. ⁸ Nej nikita mach itlaj ipatij nochí yon tlamanle. Katlej okachi moneki kijtosneki yen nikixmatis in Jesucristo kej noSeñor. Por yen Cristo onikaj nochí yon tlamanle iwan nikita kej itlaj tlajsole katlej mach ok itlaj ipatij, para welis nikpias nochí tlan welis nechmakas in Cristo. ⁹ Nikneki in Dios ma nechita nik nisetitok san se iwan Cristo. Nej nikaj nichipawak de notlajtlakol porke onikneltokak in Cristo. Pero tla nikchiwaskia tlan kijta itlanawatil in Moisés, in Dios mach nechitaskia kej nichipawak de notlajtlakol. ¹⁰ Nochipa nikneki okachi nikixmatis in Cristo ipan noyolo. Nikneki nikmachilis ipoder katlej ika omoyolkui. Yej otlajyowij por nej iwan nej noi jki nikneki nitlajyowis por Yej. Nikneki nochipa nimotemaktis (nimotemaktilis) inawak maski ma nimiki por Yej, ¹¹ porke nikneki nimoyolkuis (nimoyolitis) nikuak moyolkuiskej nochtin mikkamej.

Ma timochijchikawan para tieskej ken Dios kineki

¹² Amo kijtosneki ke ya nikpia nochí yon tlan nikijta. ¡Amo! Nion mach ya nikaj ken Dios kineki. Pero nimochikajtok para welis nikmoaxkatis in yon nemistle, ijkón ken Cristo onechmoaxkatij. ¹³ Nokniwan, mach ya nikpia nochí yon. Pero nikchiwa de nikelkajtiw nochí tlan yopanok iwan nimochijchikawa para nikajsis nochí tlan onkaj tlayakapan, ¹⁴ para najsiti kan Dios kineki ma najsiti. Iwan Dios nechmakas in tlatliokolile ompa ilwikak katlej Yej yokijtoj techmakas tinochtin tejwan katlej yotechnotzke por medio de Cristo Jesús.

¹⁵ Aminochtin namejwan katlej ya anchijchikawakej itech namotlaneltokalis moneki xikyejyekokan noi jki ken nej nikyejyekoa. Iwan tla namejwan ayamo ijkón ankiyejyekoaj, Dios amechitis para xikyejyekokan ken Yej kineki. ¹⁶ Pero moneki nochipa ma tiekan ipan iojwi in toTajtzin Dios katlej ya ipan tiwitzej, para amo tikkawaskej de tikneltokaskej tlan yotikneltokakej.

¹⁷ Nokniwan, namejwan xikchiwakan ijkón ken nej nikchiwa. Iwan xikinmitakan katlej nemij ijkón ken tejwan tinemij para namejwan no ijkón xinemikan. ¹⁸ Nej ya miekpa yonamechilwíj, iwan axan oksemi namechilwia asta nichoka, nik katej miekej tlakaj katlej nemij kej ikontraswan in Cristo porke amo kineltokaj itlajtol in Dios katlej kijta nik in Cristo omikke itech krus por tejwan. ¹⁹ Yonmej tlakaj ajsis tonale in Dios kinmixpolos. Porke yejwan mach kiweyikixtiaj in Dios, sino kiyeyjekoaj ipan inyolo kenik kipaktiskej intlalnakayo. Moweyinekij ika tlan mach kuale kichiwaj katlej moneki ika pinawaskej. Yejwan kintekipachoa san yen tlamantin katlej onkaj ixko yin tlaltikpak. ²⁰ Pero tejwan amo, tejwan tikpiaj tochan ompa ilwikak kan ya ompa tipowij. Iwan axan sa tikchixtoej ma wíki de ompa ilwikak in toSeñor Jesucristo in toTemakixtij. ²¹ Yej techpatilis in totlalnakayo katlej mach chikawak iwan miki, iwan techmakas se totlalnakayo yankuik ken Yej itlalnakayo katlej kipia imawisotlanex. Iwan welis techpatilis totlalnakayo ika ipoder katlej ika kinnawatijtok nochtin tlamantin.

4

Nochipa xipakikan inawak toSeñor

¹ Por yonik, notetlasojkaikniwan, sa tekitl namechtla sojtlá iwan ika nochí noyolo nikneki namechitas. Nipaki por ame-jwan, porke namejwan ankatej kej yeskia se korona katlej Dios nechmaka. Ximoyekketokan kiné ipan iojwi in toSeñor.

² Nikintlatlawtia in siwamej Evodia iwan Síntique ma yekan san se tlajtole (de akuerdo) nikuak kitekipanoaj in toSeñor.

³ Iwan noijki nimitzlatlawtia tej nokni, katlej sa tekitl kuale nowan titekipanoa, xikinpalewi in yonmej siwamej. Porke yejwan sa tekitl onechpalewijkej, otekipanojkej nowan para otiktematiltijkej in kuale tlajtole katlej temakixtia ijkón ken Clemente iwan oksekimej onechpalewijkej. Yejwan intoka ya kajki ijkuitilitok itech libro kan ijkuitilitok intoka nochtin akinmej kipiaj yankuik nemilistle katlej mach keman tlamis.

⁴ Xipakikan nochipa porke namejwan ya anpowij inawak toSeñor. Oksemi namechilwia: ¡Xipakikan! ⁵ Nochtin ma kitakan nik namejwan ankualtin tlakaj. Ya ajsi tonale para witz in toSeñor.

⁶ Amo xitlanemilikan ika itlaj tlamantle, sino nochipa ximotiotzajtzilikan inawak Dios por nochí tlan ankinekij. Xiktlajtlanilikan iwan noijki ximotlasojkamatikan inawak. ⁷ Iwan ijkón ankipiaskej yolosewilistle katlej witz de Dios, katlej sa tekitl weyi iwan asta mach akaj tlakatl weli kimomaka kuenta. Iwan yon yolosewilistle kimonekuitlawis

namoyolo iwan namotlalnamikilis porke ansetitokej san se iwan Cristo Jesús.

Xitlayejyekokan itech tlan kuale

⁸ Iwan axan nokniwan, xikyejyekokan nochि tlan melawak, nochि tlan moneki se kitlakitas, nochि tlan melajkayotl, nochि tlan chipawak, nochि tlan kitemaka pakilstle, iwan nochि tlan se weli kiyektenewa. Xikyejyekokan nochि tlan kuale iwan nochि tlan moneki se tlapoas kuale de itlaj tlamantle.

⁹ Xikchiwakan nochि tlan onamechmachtij, nochि tlan onamechnajnawatij, nochि tlan annechkakilijkej, iwan nochि tlan ankitakej onikchij. Iwan Dios katlej kitemaka yolosewilistle amowan yetos.

Intlatliokolil in Filipenses katlej okimakakej in Pablo

¹⁰ Nej sa tekitl nipaki inawak toSeñor, porke namejwan oksemi annechelnamikej iwan annechwaltitlanilijkej tlan ika welis nimopanoltis. Yon mach kijtosneki ke namejwan annechelkajkej para annechpalewiskej, sino porke namejwan mach ankajsaј kenik welis annechpalewiskej. ¹¹ Ijkín namechilwia amo porke nechpoloa tlan ika nimopanoltis, porke nej yonimomatke nikaj ika pakilstle ika tlan nikpia. ¹² Nikixmati kenamij nikuak se amo kipia iwan nikuak se kipia. Nej yonimomatke nikaj ika pakilstle ika tlan nikpia, nikuak niixwitok iwan nikuak nitiojsiwi, nikuak nechsobraroa iwan nikuak mach itlaj nikpia. ¹³ Nochi weli nikxikoa tlan nipanoa porke Cristo nechpalewia. ¹⁴ Pero namejwan kuale ankichijkej iwan annechpalewijkej itech notlajyowilis katlej nipanotok.

¹⁵ Namejwan katlej anchantij itech weyikan de Filipos, ankelnamikij nikuak nej opéj nitetlapowia de yen kuale tlajtole katlej temakixtia ompa itech estado de Macedonia. Iwan nikuak onikiske de Macedonia, san yen namejwan annechpalewijkej tlan ika nimopanoltis. ¹⁶ Iwan nikuak ok onieka itech weyikan de Tesalónica, kanaj keski buelta namejwan annechtitlanilijkej tlan ika nimopanoltis. ¹⁷ Mach kijtosneki niktemoa ma nechmakakan tlan ika nimopanoltis, sino nej nikneki namejwan xikpiakan okachi miek rikojyotl ompa ilwikak. ¹⁸ Axan nikpia nochि tlan moneki iwan asta nechsobraroa miek. Tlan namejwan annechwaltitlanilijkej por medio de Epafroditó mach ok itlaj nechpoloa, iwan yon tlan namejwan annechwaltitlanilijkej yon kej yeskia ankichichinojkej kopale ajwiak para Dios, porke Dios kiwelita tlan namejwan ankichiwaj. ¹⁹ ToTajtzin Dios kipia weyi rikojyotl, iwan Yej amechmakas nochि tlan amechpoloa por

yen tlan Cristo Jesús okichij por tejwan. ²⁰ Ma tikweyikixtikan toPapan Dios nochipa. Ijkón ma yeto.

Pablo okonintlajpaloj

²¹ Ompa xikonintlajpalokan nochtin katlej iaxkawan in Cristo Jesús. Tokniwan katlej nian katej nowan noijki amechontlajpalooaj. ²² Nochtin katlej iaxkawan in Dios katlej katej itech yin weyikan, amechontlajpalooaj. Pero okachi amechontlajpalooaj yejwan katlej tekipanoaj itech ipalacio in rey César.

²³ ToSeñor Jesucristo ma kipia weyi iteiknotlamachilis amonawak. Ijkón ma yeto.

SAN PABLO ITLATITLANIL IN DIOS OKINTLAJKUILILIJ IN TLANELTOKAKEJ DE COLOSAS

Pablo okintlajkuililij in tiopantlaneltokakej katlej katej itech weyikan de Colosas

¹ Nej niPablo, nitlatitlanile de Jesucristo porke Dios ijkón okimonekiltij. Nej iwan tokni Timoteo, ² namechijkuililia yin amatlajkuilole namejwan antokniwan katlej anchantij itech weyikan de Colosas, namejwan katlej ankatej anchipawakej inawak Dios iwan amo ankawaj de antlaneltokaj inawak Cristo. ToPapan Dios ma kipia weyi iteiknotlamachilis amonawak iwan ma amechmaka yolosewilistle.

Pablo omotiotzajtzili por yen tlaneltokakej

³ Nochipa timotlasojkamatij inawak Dios, iPapan toSeñor Jesucristo, nikuak timotiotzajtziliaj por amejwan. ⁴ Porke yotikmatkej nik kuale antlaneltokatokej inawak Cristo Jesús, iwan nik kuale ankintlasoxtlaj nochtin katlej iaxkawan Dios. ⁵ Porke namejwan ankichixtokej nekáj tonale nikuak Dios amechmakas ompa ilwikak tlan Yej kipixtok para amejwan. Namejwan ya ankimatij tlan axan ankichiaj porke ya ankikakej in melawak kuale tlajtole katlej temakixtia. ⁶ Yon kuale tlajtole katlej temakixtia katlej amejwan ankikakej, motematiltijtok itech nochti in tlaltikpak, iwan kinyolpatlatok miekej tlakaj ijkón ken namejwan oamechyolpatlak desde ikuak ankikakej iwan ankimomakakej kuenta katlej melawak iteiknotlamachilis in Dios. ⁷ Yen yon tlan oamechmachtij in totetlasojkaikni Epafras, katlej kitekipanoa in Dios ken nej, katlej tikmatij nik kuale kitekipanoa in Cristo iwan katlej tekipanojtok por amejwan. ⁸ Yej otechilwij nik in Espíritu Santo oamechmakak miek itlasoxtlalis para ximotlasoxtlakan se iwan oksé.

⁹ Por yonik tejwan desde nekáj tonale nikuak otikmatkej nik kuale antlaneltokatokej iwan anmotlasoxtlaj, tejwan mach tikkawaj de timotiotzajtziliaj por amejwan. Tiktlatlaniliaj in Dios ma amechpalewi para xikmatikan nochti tlan Yej kineki iwan ma amechmaka ixtlamachilistle iwan tlalnamikilistle katlej kitemaka in Espíritu Santo. ¹⁰ Ijkón namejwan welis ankipaktiskej in Señor ika namonemilis ijkón ken moneki yeskej nochtin katlej iaxkawan Señor. Iwan welis ankichiwaskej nochti tlamantle tlan kuale, iwan kada tonale okachi kuale ankiyekixmatiskej in Dios. ¹¹ Dios kipia

weyi ipoder iwan yon poder kipia weyikixtilistle, iwan tikt-lajtlaniliaj ma amechmaka chikawalistle ika yon ipoder para ijkón welis ankixikoskej nochi tlajyowilistle tlan anpanoskej iwan asta ankipiaskej pakilistle.¹² Iwan xiktlasojkamachiliikan in toPapan Dios, porke okichij ma tiwelikan ma tikresi-birokan tlan techtokaroa inwan nochtin katlej iaxkawan in Dios, katlej katej ijtk tlanextle kan Yej tlanawatia.¹³ Dios otechmakixtij de itech ipoder in tlatleyualotl kan tlanawatia in Amo Kuale Tlakatl, iwan otechtlalij kan tlanawatia iKone Jesús katlej toTajtzin Dios kitlasojtla.¹⁴ Iwan yen Jesús katlej otechkoj ika ieso para otechmakixtij de itech ipoder in Amo Kuale Tlakatl, iwan otechtlapojpolwij de nochti totlajtlakol.

Yotimotlapojpolwijkej iwan Dios ika Cristo imikilis

¹⁵ Mach akaj tlakatl weli kita in Dios iwan nion mach akaj kixmati, pero Yej omoteititij por medio de Cristo, iKone in toTajtzin Dios, katlej yoyeka desde ikuak Dios ayamo okichiwaya nochti tlan onkaj.¹⁶ Cristo Yej okichij nochti tlan onkaj itech ilwikak iwan ixko yin tlaltikpak, katlej weli tikitaj iwan katlej mach weli tikitaj. Noijki okintlalij in reytin, gobernadortin, iwan katlej kipiaj tekiwajkayotl iwan poder itech ilwikak. Nochi okichij in Cristo iwan nochti iaxka para ma kichiwakan tlan Yej kineki.¹⁷ Cristo yoyeka desde ikuak ayamo oyeka nochti tlamantle, iwan ika ipoder nochti tlamantle kiseguiroa kuale yawi asta axan.¹⁸ Tejwan tigmatij ke totzontekon yen kiyekana in totlalnakayo. Cristo noijki ka-jki kej totzontekon katlej techyekana tejwan titlaneltokakej iwan tikatej kej itlalnakayo. Iwan yen tlayekanke de tiopan, kijtosneki nochtin katlej kineltokaj. Itech Cristo opéj nochti in tlamantle, yen achtoj omoyolkuiq satepan de omikke, para yen okachi weyikistos (weyititos) de nochti tlamantle.¹⁹ Porke in toPapan Dios okimonekiltij ke iKone Jesucristo ma yeto ken Yej, iwan ma kipia nochti ipoder ken Yej kipia.²⁰ Dios okimonekiltij noijki ke nochtin katlej katej ixko yin tlaltikpak iwan katlej katej itech ilwikak, ma motlapojpolwikan iwan Dios para ayakmo ma yekan kej ikontraswan. Dios otechtlapojpolwij nikuak Cristo omikke iwan onokiwik ieso itech krus.

²¹ Namejwan achtoj mach ankixmatiaj in Dios, anyekaj ankontrastin de Dios porke ankichiwayaj tlan amo kuale.²² Pero axan Dios yoamechtlapojpolwij por medio de imikilis in Cristo nikuak otlajyowij itech itlalnakayo. Ijkón okichij para welis amechteixpantis inawak Dios ya anyolchipawakej. Mach ok ankipiaskej nion itlaj tlajtlakole iwan nion mach ok akaj welis amechistlakawis de itlaj inawak Dios.²³ Moneki kiné, ma titlaneltokakan ika nochti toyolo

iwan ma timoyekketokan itech totlaneltokalis. Amo semi tikkawaskej in kuale tlajtole katlej temakixtia katlej tikkaktokej iwan katlej techilwia nochi tlan kuale tlan techchia ompa ilwikak. Yin kuale tlajtole katlej temakixtia motem-tiltijtok itech nochi in tlaltikpak, iwan nej niPablo noijski niktematiltia in yin kuale tlajtole.

Dios okitlalij in Pablo para ma kinpalewi in tlaneltokakej

²⁴ Axan sa tekitl nipaki por yen tlajyowilistle katlej nipanotok por amejwan. Nipanotok tlajyowilistle itech notl-nakayo para nitlapalewis ma moajxiti de tlan polowi tlajyowis in Cristo itech itlalnakayo, itlalnakayo kijtosneki yejwan tlaneltokakej. ²⁵ Dios onechtlalij ma nieto niitekipanoj para namechpalewis namejwan, iwan para namechmatiltis nochi itlajtol in Dios, ²⁶ kijtosneki, yen tlan achtoj in tlakaj mach okimatiaj porke in Dios ayamo okinnextiliaya desde ikuak opéj in tlaltikpak. Pero axan Dios yokinnextilij nochtin katlej iaxkawan. ²⁷ Dios okinekke ma kimatikan katlej iaxkawan katlej achtoj mach akaj okimatis, de yen sa tekitl kuale tlamantle iwan kuakualtzin katlej kinchiwilis katlej amo judio-jtin. Iwan yen yin katlej kineki nochtin ma kimatikan: ke nikuak kipiaskej in Cristo ipan inyolo, kuale ma kimatikan nik kipiaskej parte itech imawisotlanex kan yetos in Cristo.

²⁸ Por yonik, san kan tiawij, tejwan titetlapowiaj de Cristo. Tikinnajnawatiaj iwan tикиnmachtaj ika nochti ixtlamachilistle katlej Dios techmaka, para ijkón welis tikinteixpantiskej nochtin in tlakaj inawak Dios ya chijchikawakej itech intlaneltokalis iwan ya setitokej san se iwan Cristo Jesús. ²⁹ Por yonik nej noijski nitekipanoa chikawak ika nochti chikawalistle katlej Cristo nechmaka ika ipoder.

2

¹ Nikneki xikmatikan nik in nej sa tekitl nimotekipachoa nimotiotzajtzilia inawak Dios por amejwan, iwan por nochtin in tlaneltokakej katlej katej itech weyikan Laodicea, iwan noijski por nochtin oksekimej tlaneltokakej katlej mach nechixmatij. ² Nimotekipachoa nimotiotzajtzilia inawak Dios porke nikneki ximoyolojchikawakan, iwan ximosetilikan ika tlasojtlalistle, para ijkón okachi xikweyilikian namotlalnamikilis, iwan xikmatikan tlan ya wejkawitl in Dios mach okinnextiliaya in tlakaj, kijtosneki yen Cristo. ³ Porke itech Cristo kajki nochti in rikojyotl de yen tlalnamikilistle iwan ixtlamachilistle. ⁴ Ijkón namechilwia namejwan para amakaj ma amechkajkayawa ika itlaj tlajtole kuakualtzin. ⁵ Maski nej mach nikaj ompa amoyakapan, nej ompa nikaj amowan ika noespíritu, iwan nipaki porke

nikmati nik kuale anmowikaj iwan anmoyekketokej itech namotlaneltokalis inawak Cristo.

⁶ Por yonik, como namejwan ya ankineltokakej in toSeñor Jesucristo, axan xinemikan iwan Yej, ijkón ken Yej kineki.

⁷ Ximonelwayotikan itech Yej ken se kuawitl monelwayotia ijlik tlale. Iwan ximokitzkijtowan itech Yej ken se tepamitl tlakitzkijtok ipan cimiento. Iwan ximochikawan okachi itech namotlaneltokalis ijkón ken oamechmachtijkej. Iwan nochipa xikmakatokan tlasojkamachilistle in toTajzin Dios.

Yankuik nemilistle katlej onkaj itech Cristo

⁸ Namejwan xikpiakan kuidado para amakaj ma amechkajkayawa ika tlamachtile iwan tlayejyekolistle katlej mach itlaj inpatij iwan mach melawak. Porke yon tlamachtile kikixtiaj de itech intlayejyekolis iwan de itech inkostumbre in tlaltikpaktlakaj katlej tlanawatiaj ixko yin tlaltikpak, iwan mach de itech itlamachtil in Cristo.

⁹ Porke Cristo kipia nochí tlan Dios kipia, maski okipixke itlalnakayo ken tejwan nikuak owitza ixko yin tlaltikpak.

¹⁰ Iwan namejwan mach itlaj amechpoloa tla ankatej inawak Cristo, iwan tla se setitos iwan Yej, noijki se tentos de Dios. Iwan Cristo kipia poder itech nochtin tekiwajkamej iwan itech nochtin katlej kipia poder. ¹¹ Iwan namejwan por ansetitokej san se iwan Cristo, kijtosneki namejwan ankiresibirojkej in sirkunsión. Pero amo yen sirkunsión ken katlej kichiwaj in judiojin itech itlalnakayo, sino yin sirkunsión yen katlej Cristo okichij ipan toyolo. Katlej katej sirkundadojtin ipan inyolo mach ok kichiwaj tlan amo kuale tlan kineki kichiwas itlalnakayo. ¹² Nikuak amejwan anmokuateekijkej, kijtosneki oamechtookakej iwan Cristo, iwan noijki anmoyolkuikej iwan Yej. Porke namejwan ankineltokakej in Dios katlej kipia poder katlej okiyolitij in Cristo. ¹³ Achtoj namejwan Dios amechitaya kej yeskia anmikkamej por yen namotlajtlakol iwan por yen tlan amo kuale katlej nochipa ankineriaj ankichiwaskej ika namotlalnakayo. Pero axan Dios yoamechyolitij iwan Cristo iwan yoamechtlapojpolwij de nochí namotlajtlakol. ¹⁴ Tejwan otiktewikiliayaj se kuenta, iwan mach otiweliah otiktlaxtlawayaj. Pero Dios yokipojpoloj yon kuenta. Kej yeskia okiklabostookak itech krus ijkón ken Cristo okiklabostookakej itech krus. Axan, yon kuenta mach ok keman techtzakuilis porke mach ok tikpiaj. ¹⁵ Dios otlatlanke de itech ipoder in Amo Kuale Tlakatl iwan de itech inpoder in ejekamej mach kualtin. Iwan okinpinatij inmixpan nochtin porke mach otlatlankej, porke Cristo okintlanke nikuak omikke itech krus.

Xiktemokan tlamantle de ilwikak

¹⁶ Por yonik, amo xikchiwakan kuenta tla akaj amechilwis mach kuale tlan ankikuaj o noso tlan ankonij. Iwan noi jki amo xikchiwakan kuenta tla akaj amechixnamikis por amo ankichiwaj ilwitl de yen judiojtin, ken nijuak onkaj selik metztle, o noso nijuak mosewiaj in judiojtin itech sábado. ¹⁷ Nochi yon tlamantle okipiaya ipatij nijuak ayamo ovalaya in Cristo, pero axan mach ok itlaj ipatij. Achtój otiekaj kej yeskia otiekaj itech se ekawitl, pero axan ya tikatej itech Cristo de kan ovalajtoka in yon ekawitl. ¹⁸ Amo xi motekawilikan ma amechkixtilikan namotlatliokolil nekatej katlej mochiwaj wel pasensiatzitzintin, kinweyikixtiaj angelestín, nochipa kijtaj kitaj itlaj tlamantle kej yeskia ki teemikij iwan kinekij nochtin ijkón ma kichiwakan. Amo xikinneltokilikan iwan nion amo xikinkawilikan yejwan ma amechilwikan tlanon moneki ankichiwaskej. Yejwan moweyinekij itech se tlamantle katlej mach keman kitaj, iwan kichiwaj san tlan yejwan kiyejyekojipan intlamikilis. ¹⁹ Pero yejwan mach mokitzkijtokej iwan Cristo, katlej yen kajki kej itzontekon itlalnakayo. Pero tejwan tikatej ken itlalnakayo iwan timokitzkijtokej iwan Yej, ijkón ken totlalnakayo nochi mokikitzkijtok. Iwan yen Cristo katlej techmaka chikawalistle para timoskaltiaj ijkón ken Dios kineki.

²⁰ Namejwan kuale xikmatikan nik ya anmikkej nijuak Cristo omikke, iwan ya anmakiskej de itech intlamachtil iwan de itech inkostumbre in tlaltikpaktlakaj. ¿Tlanik kiné ok ankichiwaj ken nekatej tlakaj katlej mach kixmatij Dios? ¿Tlanik ankichiwaj tlan kija intlanawatil, ²¹ katlej kijta: “amo xikitzki yin tlamantle, amo xikua yon tlamantle, amo xikmatoka nekáj tlamantle”? ²² Nochi yon tlanawatile iwan tlamachtile kisa san de itech intlayejyekolis in tlakaj, porke in tlakuale omochij para se kikuas, iwan nijuak se kikua ompa tlami. ²³ Yonmej tlanawatiltin motaj kej yeskia melawak kualtin, porke akinmej kichiwaj yonmej tlanawatiltin, sa tektl motemaktiaj itech iwan kitlajyowiltiaj intlanakayo para mochikawaskej itech intlaneltokalis. Pero nochi yon mach itlaj kinpalewia para ayakmo ma kinyoltilana tlan kineki intlanakayo.

3

¹ Ijkón kiné, tla namejwan Dios yoamechyolitij iwan Cristo, xiktemokan ika nochí amoyolo tlan onkaj itech ilwikak kan Cristo ewatok ik iyekma in toTajtzin Dios. ² Xiktlalikan namoyolo itech tlan onkaj ilwikak, amo xiktlalikan namoyolo itech tlan onkaj ixko yin tlaltikpak. ³ Para yen tlaltikpak namejwan ya ankatej kej yeskia anmikkamej, iwan axan in yankuik namonemilis kajki tlatitok inawak Cristo kan kajki

in toTajtzin Dios. ⁴ Itech nekáj tonale nikuak monextis in Cristo katlej otechyolitij ika inemilis, ikuakón noiiki namejwan amonextiskej iwan Yej itech imawisotlanex.

Katlej achtoj tonemilis iwan katlej yankuik tonemilis

⁵ Por yonik kiné, xikelkawan nochi tlamantle tlan amo kuale tlan onkaj itech namonemilis. Amakaj ma momekati, amakaj ma kichijtineyi tlan amo chipawak, amo xikchiwakan biero tlan kineki namotlalnakayo, amo xikkawilikan in elewilistle ma amechyoltilana, amo xiknekikan ankipi-askej okachi de tlan ya ankipiaj. Nochtin katlej kichiwaj yon tlamantle, kikuepaj yen yon indios porke yen yon tlan okachi kichiwaj. ⁶ In tlakaj katlej kichiwaj in yonmej tlamantin bierotikej, mach kineltokaj itlajtol in Dios, iwan por yonik in Dios kintlajyowiltis chikawak ika ikualanilis. ⁷ Achtoj namejwan noiiki ankinchiwayaj nochi yon tlamantle nikuak anyekaj ken nekatej tlakaj katlej ijkón kichiwaj. ⁸ Pero axan namejwan mach ok ijkón xikchiwakan. Amo xikualanikan, amo xitekokolikan, amo xitetotktikan tlan amo kuale, amo xitlawikaltikan, iwan nion amo xikijtokan itlaj tlajtole biero. ⁹ Ayakmo xikmolwikan entre amejwan itlaj tlan amo melawak. Porke ya ankipajkej namonemilis katlej achtoj ankipiayaj katlej oamechtoktiaya xikchiwakan tlan amo kuale. ¹⁰ Pero axan Dios yoamechyankuili j ika se nemilistle yankuik, katlej ika anmochijtiaskej okachi ken Yej. Ika yin yankuik nemilistle namejwan okachi welis kuale ankixmatiskej in Dios katlej otechchij. ¹¹ Dios mach ok techita kox tijudiojtin o noso amo tijudiojtin, kox tisirkunsidadojtin o noso amo tisirkunsidadojtin. Nojki in Dios mach kita kox se witz de oksekan, o noso kox se amaixmaj, kox se tlanamakte o noso amo. Sino moneki ma se kineltoka in Cristo, porke Cristo yen kinyekana nochtin katlej kipiaj yankuik nemilistle iwan kajki itech nochtin katlej kineltokaj.

¹² Dios amechtlasojtla iwan oamechpejpenke para xiekan ikonewan. Por yonik, ika yon yankuik amonemilis namejwan xiteiknomatikan. Xiktechiwilikan tlan kuale iwan amo ximoweyinekikan. Amo niman xikualanikan iwan xikxikokan tlan anpanoaj. ¹³ Tla akaj itlaj oamechtoktij, xikxikokan iwan xiktlapojpolwikan, ijkón ken namejwan oamechtlapojpolwijk in Cristo, namejwan no ijkón xikchiwakan. ¹⁴ Iwan katlej okachi moneki, yen xikmatikan ximotlasojtlakan se iwan oksé, porke in tlasojtlalistle yen kichiwa melajka kuale xisetitokan aminochtin. ¹⁵ Iwan xikkawilikan in yolosewilistle katlej Cristo amechmaka ma amechyekana ipan namoyolo, porke por yonik in Dios oamechnotzke para

ximochiwakan sa se tlalnakatl. Iwan xikmatikan ximotlaso-jkamatikan.

¹⁶ Xikkawilikan itlamachtil in Cristo ma tento ipan namoyolo. Ximomachtikan iwan ximonajnawatikan se iwan oksé ika tlalnamikilistle katlej Dios kitemaka. Xitlakuikakan ika tlasojkamachilistle ipan namoyolo. Xikintlakuikakan salmos, tlakuikaltin de weyikixtilistle iwan tlakuikaltin katlej amechmaka in Espíritu Santo para ankiweyikixtiskej in to-Tajtzin Dios. ¹⁷ Iwan nochí tlan ankichiwaskej o noso tlan ankijtoskej, xikchiwakan ijkón ken kipaktia in toSeñor Jesú. Iwan xiktlasojkamachilikan in toPapan Dios por medio de yen toSeñor Jesú.

Kenik moneki yeskej in tlaneltokakej

¹⁸ Siwamej, namejwan katlej antlanamiktiltin, moneki ximotekawilikan ma amechyekanakan namookichwan ijkón ken moneki ankichiwaskej porke namejwan ankineltokaj in toSeñor. ¹⁹ Okichtin, namejwan katlej antlanamiktiltin, moneki xikintlasojtlakan namosiawan iwan amo xikinnejnekilikán (xikinmaltratarokan). ²⁰ Namejwan antepilwan, xikintlakitakan namopapanwan itech nochí tlan yejwan amech-nawatiaj, porke ijkón kipaktia in toSeñor. ²¹ Tetajmej, amo xikinkualankanotzakan namopilwan, para amo ma moyolotlamitikan iwan amo ma kikawan de kichiwaskej tlan kuale. ²² Tekipanojkej, xikchiwakan nochí tlan amech-nawatiskej namotekowan nian ixko yin tlaltikpak. Kuale xitekipanokan amo san yej nijuak ankatej ixpan namoteko para ma amechita nik kuale antekipanoaj. Sino moneki xitekipanokan ika kuale amoyolo para ijkón ankiteititiskej nik melawak ankitlakitaj in toTajtzin Dios. ²³ Iwan nochí tlan ankichiwaskej, xikchiwakan ika nochí amoyolo, kej yeskia ankichiwaj para yen toSeñor iwan amo para akaj oksé tlakatl. ²⁴ Porke namejwan kuale ankimatij nik in toSeñor ajsis tonale Yej amechtlaxtlawis, porke amechmakas in herencia tlan amechtokaroa ompa ilwikak. Porke namejwan ankitekipanoaj in Cristo katlej toTeko. ²⁵ Pero akin kichiwa tlan amo kuale kiresibirots tlaxtlawil de yen tlan amo kuale katlej okichij, porke Dios techita tinochtín san se parejo iwan mach kintlasojtla san sekimej iwan oksekimej amo.

4

¹ Namejwan katlej antekomej, xikinchiwilikan tlan kuale namotekipanojkawan. Ijkón ken tikchiwa iwan se, no ijkón xikchiwa iwan oksé. Porke namejwan noiiki kuale ankimatij nik ankipiaj se amoTeko ompa ilwikak.

² Amo semi xikkawakan de anmotiotzajtzilijtoskej inawak Dios, iwan kuale xijsatokan para ankimatiskej tlanon nankitlajtlaniliskej, iwan xiktlasojka machilikan por nochitlan kichiwa por amejwan. ³ Noijki ximotiotzajtzilikan por tejwan. Para Dios ma techititi kanin moneki titetlapowiskej de itlajtol. Tiknekij tikintlapowiskej in tlakaj de itlajtol in Cristo katlej ya wejkawitl mach ya akaj okikakia. Iwan por yonik axan nej onech�zakej porke niktematiltia itlajtol in Cristo. ⁴ Ximotiotzajtzilikan inawak Dios para ma nechpalewi kuale ma nitetlapowi de itlajtol in Cristo ken moneki iwan kuale ma kimomakakan kuenta nochtin katlej kikakiskej.

⁵ Xikmatikan kenik annemiskej inwan katlej mach kixmatij Dios, amo xikpolojojkan tiempo, sino xikintlapowikan de itlajtol in Dios. ⁶ Moneki in tlakaj ma amechwelitilikan namotlajtol nijuak antlapoaskej iwan amo ma kinkuejso. Iwan ijkón namejwan anyeskej ken istatl katlej kiwelaltia in tlakuale. Tla namejwan ijkón antlapoaskej, tones namejwan ankimatiskej kenik moneki ankinnankiliskej nochtin.

Pablo okonintlajpaloj

⁷ Tíquico, katlej totetlasojkaikni inawak Dios, yej amechilwis nochitlan napanotok iwan kenamij nikaj. Yej nochipa kuale kichiwa tlan Dios kineki iwan nowan kitekipanoa in toTajzin Dios. ⁸ Yej niktitlani amonawak para ma amechilwi kenamij tikatej iwan para ma amechyolojchikawa. ⁹ Noijki kiwika in totetlasojkaikni Onésimo katlej noijki nochipa kichiwa tlan Dios kineki iwan katlej chanti ompa Colosas. Yejwan amechilwiskej nochitlan nian tlapanotok.

¹⁰ Amechontlajpaloa in Aristarco, katlej nian iwan nitzaktok. Noijki amechontlajpaloa in Marcos, iprimo in Bernabé. Namejwan yonamechilwij kenik moneki ankiresibiroskej in Marcos tla yej yas amechitati, moneki xikresibirokan ika kuale. ¹¹ Noijki amechontlajpaloa in Jesùs, katlej noijki itoka Justo. San yejwan yinmej judiojtin tlaneltokakej katlej tekipanoaj nowan itech itekiw in Dios, iwan yejwan sa tekitl nechyolojchikawaj. ¹² Noijki amechontlajpaloa in Epafras katlej itekipanoj in Cristo iwan katlej noijki de ompa Colosas. Yej nochipa motlatlawtijtok inawak Dios por amejwan para ximoyekketokan iwan ximochikawan itech namotlaneltokalis, para ijkón kuale xikmatikan tlan Dios kineki xikchikawan. ¹³ Nej kuale nikmati nik Epafras sa tekitl motekipachoa por amejwan, iwan noijki por nekatej tokniwan tlaneltokakej katlej katej itech weyikan de Laodicea iwan itech

weyikan de Hierápolis. ¹⁴ Lucas, in totetlasojkaikni tepajtij, amechontlajpaloa, iwan noijki amechontlajpaloa in Demas.

¹⁵ Xikonintlajpalokan in tokniwan katlej katej itech weyikan de Laodicea. Xikontlajpalokan noijki in tokni siwatl Ninfas, iwan noijki xikonintlajpalokan in tokniwan katlej mololoaj ompa ichan. ¹⁶ Namejwan nijuak antlamiskej ankileroskej yin amatlajkuilole, xikintitlanilikan in tokniwan katlej katej itech weyikan de Laodicea para yejwan noijki ma kilerokan. Namejwan noijki xiklerokan in amatlajkuilole katlej onikintitlanilij in tokniwan de Laodicea, katlej yejwan amechwaltitlaniliskej. ¹⁷ Xikilwikan in Arquipo amo ma kelkawa de ma kichiwa in tekitl katlej in toSeñor okimakak.

¹⁸ Nej niPablo, namechijkuililia yin tlajpalolistle ika noma. Xikelnamikikan nik nitzaktok. Ma Dios kipia weyi iteiknotlamachilis amonawak. Ijkón ma yeto.

SAN PABLO ITLATITLANIL IN DIOS YAKINIKA OKINTLAJKUILILIJ IN TLANELTOKAKEJ DE TESALÓNICA

Pablo iwan ikompañeroswan okintlajkuililijkej in tokniwan tlaneltokakej de Tesalónica

¹ Nej niPablo. Nikaj iwan Silvano iwan Timoteo, nikikui loa yin amatlajkuilole para amejwan antiopantlaneltokakej de Tesalónica, katlej ankineltokaj in toPapan Dios iwan toSeñor Jesucristo. Teiknotlamachilistle iwan yolosewilistle de toPapan Dios iwan de toSeñor Jesucristo, ma yekan amonawak.

In tlaneltokakej de Tesalónica oyekaj se ejemplo para oksekimej

² Nochipa timotlasojkamatij inawak Dios por amino chtin namejwan, iwan nochipa tamechelnamikij itech totiotzatzilis. ³ Tamechelnamikij inawak toPapan Dios porke tikmatij ke ika namotlaneltokalis ankichiwaj miek tekitl, iwan ika miek tla sojtlalistle ankitekipanoaj, iwan anmoyekketokej ika nochí amoyolo ankichiwaj ma wiki in toSeñor Jesucristo. ⁴ Nokniwan, Dios amechtlasojtla namejwan, iwan tikmatij nik in Yej oamechpejpenke. ⁵ Porke nikuak tejwan otamechtlapowijkej de yen kuale tlajtole katlej temakixtia, amo otamechtlapowijkej san ika tlajtole, sino noijki ika ipoder in Espíritu Santo. Iwan noijki kuale ankimatij nik in yin tlamachtile melawak. Namejwan kuale ankimatij kenik otimowikayaj amowan. Tejwan ijkón otikchiwayaj porke yon se kuale para amejwan.

⁶ Namejwan ankichijkej tlan ankitakej de tejwan toejemplo iwan tlan ankitakej de yen iejemplo in toSeñor. Iwan maski ankipixkej miek tlajyowilistle, namejwan ankiresibirojkej itlajtol in Dios ika miek pakilistle katlej oamechmakak in Espíritu Santo. ⁷ Ijkón nik namejwan anmochijkej anmejemplojtin para nochtin in tlaneltokakej de estado de Macedonia iwan de estado de Acaya. ⁸ Iwan yen namejwan anpejkej ankixoyawaj itlajtol in toSeñor amo san itech estado de Macedonia iwan itech estado de Acaya, sino noijki ik nowian (nian nepa) kimati j de yen namotlaneltokalis katlej ankipiaj inawak Dios. Asta mach ok moneki ok itlaj tikinmilwiskej de amejwan. ⁹ Sino, nochtin innewian techmatiltiaj de tlan okikakej otlapanok nikuak otiwiaj otamechitatoj iwan de kenik namejwan anmoyolkuepkej inawak Dios, iwan ayakmo ankinneltokaj namosantojwan, iwan opéj

ankitekipanoaj katlej melawak Dios katlej yolitok.¹⁰ Noijki kijtaj kenik namejwan ankichaiaj ma wiki de ilwikak iKone in toTajzin Dios, katlej okiyolitij satepan de omikke. Yen Jesús, iKone in toTajzin Dios, katlej techmakixtia de itech ikualanilis in Dios katlej kualkuis tlajyowilistle ixko yin tlaltikpak.

2

Itekiw in Pablo itech weyikan de Tesalónica

¹ Namejwan kuale ankimatij, nokniwan, nik mach san otikpolotoj tiempo nikuak otiwiaj otamechtalajpalotoj. ² Namejwan ya ankimatij nik achtoj otechwikaltijkej iwan otechtlajyowiltijkej itech weyikan de Filipos. Maski yejwan ijkón otechtoktijkej, Dios otechyolojchikawaya para otamechmatiltijkej itlajtol katlej temakixtia, maski otipanokej miek tlajyowilistle. ³ Nikuak tejwan otamechmatiltijkej itlajtol in Dios amo otamechtlapowijkej ika itlaj tlan amo melawak, nion amo otamechtlapowijkej ika toyolo mach kuale, nion amo otamechtlapowijkej para tamechkajkayawaskej. ⁴ Sino, otamechtlapowijkej ijkón ken Dios otechyolitak iwan otechtlalij ma tiktematiltikan in kuale tlajtole katlej temakixtia. Tejwan titlamachtiaj amo para tikinpaktiskej in tlakaj, sino para tikpaktiskej in Dios katlej kixmati in toyolo. ⁵ Namejwan ankimatij nik mach semi otamechtlapowijkej ika tlajtole kuakualtzin para ika otamechkajkayajkej, nion amo otamechtlapowijkej ika itlaj tlajtole katlej ika welis tiktlaniskej tomin. Dios kuale kimati de noch yon tlamantle. ⁶ Tejwan mach otiknekej namejwan o noso oksekimej xitechweyikixtikan, maski tejwan komo titlatitlaniltin de Cristo welini tamechtlajtlanilianij sekin tlamantle. ⁷ Sino tejwan otikchijkej amonawak tlan kuale para tamechtlasojtlaskej ijkón ken se siwatl kintlasojtla iwan kimnonekuitlawia ipilwan. ⁸ Tejwan sa tekitl tamechtlasojtlaj iwan asta otiknekiaj tamechmakanij, amo san yen kuale tlajtole katlej temakixtia, sino asta tiktemakanij in tonemilis por yen tlasojtlalistle katlej tikpiaj por amejwan. ⁹ Nokniwan, namejwan ankelnamikij kenik otitekipanojkej ika miek tlajyowilistle. Otitekipanojkej yuale tonale porke amo otiknekej tiktekimakaskej akaj de amejwan, mientras otamechtlapowiayaj de yen Dios itlajtol katlej temakixtia.

¹⁰ Namejwan katlej antlaneltokakej kuale ankitakej iwan Dios noijki, nik kuale otichipawkanenkej iwan otinenkej ipan melajka amonawak, iwan mach akaj welis techtlajtlakoltis de itlaj. ¹¹ Noijki ankimatij kenik otamechyolojchikajkej iwan

kenik otamechyolosewijkej kada se de amejwan, ijkón ken se tetaj kichiwa iwan ipilwan.¹² Tejwan otamechilwijkej xikchiwakan tlan kuale ijkón ken moneki kichiwaskej ikonewan in Dios, katlej Yej oamechnotzke para xikpiakan nemilistle itech imawisotlanex kan Yej tlanawatia.

¹³ Por yonik tejwan noiiki nochipa timotlasojkamatij inawak Dios porke nikuak namejwan ankikakej itlajtol katlej tejwan otamechmatiltijkej, ankiresibirojkej kej itlajtol in Dios iwan amo kej itlajtol akaj tlakatl. Iwan melawak yen yon itlajtol in Dios. Iwan yon itlajtol tekipanoa ipan namoyolo namejwan katlej antlaneltokaj.¹⁴ Nokniwan, nikuak namejwan oamechtlatlalochtijkej namopaisanoswan, anpanokej no ijkón ken opanokej in tiopantlaneltokakej de Cristo Jesús, katlej katej itech estado de Judea, porke yejwan noiiki okintlatlalochtijkej in paisanoswan in judiojtin.¹⁵ Yonmej judiojtin okimiktijkej in toSeñor Jesús, iwan noiiki okinmiktijkej in profetajtin. In yonmej judiojtin miekan lado otechkixtijkej. Dios mach kiwelita tlan yejwan kichiwaj iwan yejwan noiiki kinkokoliaj nochtin in tlakaj.¹⁶ Porke yejwan mach techkawiliaj ma tikintlapowikan katlej mach judiojtin para yejwan noiiki ma momakixtikan. Ijkón yejwan kimotetemiliaj okachi miek tlajtlakole. Pero axan, ikualanilis in Dios yowalaj inpan.

Pablo oksemi okinekke yas kintlajpaloti in tlaneltokakej de Tesalónica

¹⁷ Nokniwan, kanaj keski tonale satepan de otikiskej de amonawak, maski amo otamechitayaj, tejwan otamechelnamikiaj iwan sa tekitl otiknekiaj tiaskej tamechitatiwej.¹⁸ Nochipa otiknekiaj tianij, nej niPablo miekpa oniknekia niani, pero Satanás mach otechkawili. ¹⁹ Iwan, ¿tlanik tiknekij tamechitatiwej? Ma tamechilwikan kiné por tlanik. Nikuak witz in toSeñor Jesucristo, tejwan tikchiaj ompa tamechitaskej iyakapan. Tejwan tikpiaskej miek pakilistle por amejwan. Iwan por yen namejwan Dios techmakas weyikixtiliste katlej yetos kej se korona para tejwan.²⁰ Melawak tipakij iwan timoweyinekij por yen namejwan.

3

¹ Por yonik, nikuak mach ok otikxikojkej timochiaskej okachi, tejwan otikijtojkej timokawaskej toselti nian itech weyikan de Atenas,² iwan otikitlankej in tokni Timoteo ma amechitati, porke yej kitekipanoa in toTajtzin Dios iwan tekipanoa towan tlamachtia de yen kuale tlajtote katlej temakixtia de Cristo. Otikitlankej para ma amechyekketza iwan ma amechyolojchikawa itech namotlaneltokalis,³ para amakaj ma motzinkixti itech tlajyowilistle. Porke namejwan

kuale ankinmatij nik tikpiaj de tipanoskej itech noch i yon tlajyowilistle.⁴ Nijuak ok otiekaj amowan, otamechilwijkej nik tikpiaskej miek tlajyowilistle. Iwan ijkón otlamochij ken namejwan ya ankinmatij.⁵ Por yonik in nej, como mach ok onixxikoj okachi, onitlatitlanke para nikmatis kenik ankatej namejwan itech namotlaneltokalis. Porke nej onimomawtij tla nikmatis nik in diablo yoamechmayaj ijlik tlajtlakole, iwan totekiw san nenkaj (en vano) otikchijkej.

⁶ Pero axan in Timoteo yomokuepato de Tesalónica kan namejwan ankatej, iwan techwalkuilia kuale tlajtole (rason) de yen namotlaneltokalis iwan de yen namotlasoctlalis katlej namejwan ankipiaj. Techilwia nik namejwan nochipa antechelnamikij ika pakilstle, iwan nik sa tekitl ankinekij antechitaskej, ijkón ken tejwan noiiki tiknekij tamechitaskej.⁷ Por yonik, nokniwan, maski techtlajyowiltiaj iwan techpanoltiaj tekokojkayotl, tejwan otimoyolosewijkej miek nijuak otikmatkej nik namejwan kuale anmoyekketokej itech namotlaneltokalis.⁸ Axan tiyolitokej ika miek pakilstle porke tigmatij nik namejwan kuale anmoyekketokej inawak toSeñor.⁹ ¿Kenik welis tikmakaskej sa tekitl miek tlasojkamachilistle in toTajtzin Dios por yen namejwan iwan por yen miek pakilstle katlej tikpiaj inawak Dios por amejwan?¹⁰ Yuale tonale tiktlatlawtijtokej in toTajtzin Dios ma techkawili ma tamechitakan oksemi, iwan welis tikajxitiskej tlan ok amechpoloa itech namotlaneltokalis.

¹¹ Tiknekij yen toPapan Dios iwan toSeñor Jesucristo ma techpalewi para ma weli ma tiwan ma tamechitati. ¹² Iwan toSeñor ma amechiskalti okachi itech tlaneltokalistle iwan itech tlasoctlalistle, para ma yeto tlasoctlalistle entre amejwan iwan noiiki inwan oksekimej, ijkón ken tejwan tamechtlasoctlaj.¹³ Iwan toSeñor ma amechmaka chikawalistle ipan namoyolo, para xiekan anyolchipawakej iwan amo xikpiakan nion itlaj tlajtlakole inawak toPapan Dios, nijuak witz in toSeñor Jesús iwan nochtin katlej iaxkawan yolchipawakej.

4

Kenik moneki se nemis para ma kipakti in toTajtzin Dios

¹ Axan, nokniwan, tamechtlatlawtiaj miek iwan tamechtlajtliliaj ika itoka in toSeñor Jesús, nik ijkón ken tejwan otamechititijkej kenik moneki annemiskej para ankipakiskej in toTajtzin Dios, ijkón xikchijtakan okachi.

² Namejwan ya ankinmatij in tlanawatiltin katlej otamechmachtijkej katlej otechmakak in toSeñor Jesús.³ Dios kineki ximochipawakan inawak iwan amakaj ma momekati.⁴ Sino kada se ma kimati kenik kipias isiwa ika chipawkanemilistle

iwan ika tetlakitalistle. ⁵ Namejwan okichtin amo xikkawilikán namotlalnakayo xikinmixelewikan in siwamej. Noi jki namejwan siwamej amo xikkawilikán namotlalnakayo xikinmixelewikan in okichtin. Porke ijkón kichijtinemij katlej mach kixmatij Dios. ⁶ Amakaj ma kixelewili isiwa de se ikni tlaneltokak para kitlankuamotlas, porke in toSeñor kikastigaros chikawak akin ijkón kichiwas, ijkón ken tejwan yotamechilwijkej. ⁷ Porke Dios mach otechnotzke para ma tikchiwakan tlan amo kuale, sino Dios otechnotzke para ma timoyolchipawakan inawak. ⁸ Ijkón kiné, tla akaj amo moneki kineltokas in yin tlanawatile, kijtosneki mach kineltoka in Dios. Porke yin tlanawatile mach witz de akaj tlakatl, sino witz de Dios, katlej techmaka iEspíritu Santo.

⁹ Axan, mach ok moneki tamechtajkuililiskej okachi de kenik moneki ankintlasojojtlaskej in tokniwan, porke Dios yoamechmachtij kenik moneki anmotlasojojtlaskej entre amejwan. ¹⁰ Iwan melawak nik ankintlasojojtlaj nochtin in tokniwan katlej katej itech nochti in estado de Macedonia. Pero sa tekitl tamechtlatlawtiaj, nokniwan, namotlasojojtlalis okachi ma moskalti. ¹¹ Xikchiwakan de xiekan ika yolosewilistle, iwan xikchiwakan katlej de amejwan amotekiw iwan amo ximokalakikan kan amo amotekiw. Amo xiekan antlatziwkej, sino xitekipanokan ika namomawan ijkón ken tejwan yotamechnawatijkej. ¹² Ijkón xikchiwakan para ma amechnalitakan katlej mach kixmatij Dios, iwan ijkón mach ok monekis akaj ma amechpalewi ika itlaj.

Oksemi witz in toSeñor Jesucristo

¹³ Nokniwan, tiknekij xikmatikan tlan panoskej katlej kochij, kijtosneki yejwan tokniwan tlaneltokakej katlej yomikkej. Para amo ximoyolkokokan ken oksekimej katlej mach kichiaj in Cristo. ¹⁴ Porke kuale tikneltokaj nik in Jesús omikke iwan omoyolkuij, iwan noi jki kuale tikneltokaj nik nekatej katlej otlaneltokakej inawak Jesús iwan yomikkej, Dios kinwikas iwan Jesús itech nekáj tonale nikuak oksemi witz in Jesús.

¹⁵ Por yonik, yin tlan otechilwij in toSeñor tejwan noi jki tamechilwiaj, nik in tejwan katlej ok tiyolitokej iwan timokawaskej asta ikuak witz in toSeñor, mach tejwan achtoj techwikas ke nekatej katlej yomikkej. ¹⁶ Porke in toSeñor waltemos de ilwikak iwan waltlajtos chikawak kej se tekiwaj. Tlajtos kej se tlayekanke de angelestín, iwan tikkakiskej se tlapitzalistle ika tlapitzale de Dios. Ikuakón katlej otlaneltokakej inawak Cristo iwan yomikkej, yejwan achtoj moyolkuiskej (moyolitiskej). ¹⁷ Satepan katlej ok timokawaskej tiyolitokej ixko yin tlaltikpak, ikuakón techwikaskej san

sekan inwan yejwan ijistik mixtle para tiknamikiskej ajkopan ijistik ejekatl in toSeñor. Iwan ijkón tieskej iktlanke (ik tlami) iwan toSeñor. ¹⁸ Por yonik, ximoyolojchikawakan se iwan oksé ika yin tlajtole.

5

¹ Nokniwan, mach moneki tamechijkUILISKEJ itech tlan tonale o noso itech tlan ora nijuak ijkón tlapanos. ² Porke namejwan kuale ya ankimatij nik itech nekáj tonale nijuak witz in toSeñor, witz nijuak mach akaj kichia, ijkón ken se ichtekke witz de yuak. ³ Nijuak in tlakaj kijtoskej: “Ya tikatej ika kuale iwan ya tikpiaj yolosewilistle”, san niman ijkuaKÓN inpan walajtiwetzis tlaxixitinilistle. Yetos ijkón ken se siwatl walijtikualotiwetzi para kitlakatilis ikone. Iwan mach akaj welis cholos. ⁴ Pero namejwan, nokniwan, mach ankatej ijistik tlatleyualotl. Por yonik, itech nekáj tonale nijuak witz in toSeñor, mach welis amechkochwis (amechsorprenderos) ken kichiwa se ichtekke. ⁵ Porke nochtin namejwan ankipiaj in Dios ipan namoyolo kej se tlanextle, iwan annemij kan tlanestok porke ankixmatij in Dios. Tejwan katlej titlanel-tokakej mach tikatej ken nekatej katlej kipiaj tlatleyualotl ipan inyolo, iwan nemij kej yeskia kan tlatleyua. ⁶ Por yonik, amo ma tikochikan ken oksekimej, sino ma tijsatokan ika kuale totlalnamikilis. ⁷ Katlej kochij, kochij de yuak, iwan katlej tlawanaj, tlawanaj de yuak. ⁸ Pero tejwan katlej tine-mij kan tlanestok, moneki tieskej nochipa ika kuale totlal-namikilis. Ma timotzakuilikan ika totlaneltokalis iwan ika totlasoxtlalis ijkón ken se soldado motzakuilia ielpa ika se tepestle tankachtitk itoka escudo. Iwan ma tikchiakan in tonale nijuak techmakixtis in Dios, iwan yon tonale katlej tikchiaj, tikpixtoskej kej se casco de tepestle ken katlej kimot-lalilia se soldado. ⁹ Porke Dios mach otechtalij para topaN kiwaltitlanis ikualanilis, sino para techmakixtis inawak in toSeñor Jesucristo. ¹⁰ Jesucristo omikke por tejwan para nochipa ma tikpiakan nemilistle inawak. Tejwan titlanel-tokakej katlej tiyolitoskej iwan nekatej tlaneltokakej katlej yomikkej, tinochtin tieskej san sekan inawak Cristo nijuak Yej walmuikas. ¹¹ Por yonik, ximoyolojchikawakan iwan ximochikawakan se iwan oksé itech namotlaneltokalis, ijkón ken ya ankichijtokej.

Pablo okinnajnawatij in tokniwan tlaneltokakej

¹² Nokniwan, tamechtlatlawtiaj xikintlakitakan katlej tekipanoaj amonawak, katlej amechyekanaj iwan amechnajnawatiaj kenik moneki anyeskej ken Dios kineki. ¹³ Moneki kuale xikintlakitakan iwan kuale

xikintlasoxtlakan, por yen tekitl katlej kichiwaj. Xiekan ika yolosewilistle se iwan oksé.

¹⁴ Noijki tamechtlatlawtiaj, nokniwan, xikinnajnawatikan ika chikawak katlej mach kinekij tekipanoskej, xikinyolochikawan katlej mosotlawaj, xikinpalewikan katlej mach chijchikawakej itech intlaneltokalis, iwan nochtin xikinpialikan pasensia.

¹⁵ Tla akaj amechtuktia itlaj amo kuale, xikpiakan kuidado de amo xikkuepilikan ika tlan amo kuale, sino nochipa xikchiwakan tlan kuale entre namejwan iwan noijki inwan oksekimej.

¹⁶ Nochipa xiekan ika pakilstle. ¹⁷ Nochipa ximotiotzatzilikan. ¹⁸ Ximotlasojkamatikan inawak Dios itech nochitlamantle tlan anpanoaj, porke yen yon tlan Dios kineki xikchiwakan namejwan katlej ankatej inawak Cristo Jesús.

¹⁹ Amo xiktzakuilikan tlan kineki kichiwas in Espíritu Santo, porke tla ijkón ankichiwaskej, tonses yon kej yeskia ankisewiaj se tlilt. ²⁰ Amo xiktlalikan se lado tlan kijtaj in profetajtin. ²¹ Moneki nochti xikprobarokan, iwan xikmokawikan san yen tlan kuale. ²² Xikkawakan se lado nochti tlamantle katlej mach kuale.

²³ Inewian Dios katlej techmaka yolosewilistle, kuale ma amechyolchipawa. Iwan ma amechpia anchipawakej itech namoespíritu, itech namoanima iwan itech namotlalnakayo, para amo ankipiaskej itlaj tlan amo kuale nikuak walmuikas in toSeñor Jesucristo. ²⁴ ToTajtzin Dios katlej oamechnotzke para xitlaneltokakan inawak Cristo, Yej kichiwas nochti tlan techilwia porke Yej nochipa kichiwa tlan kijta.

Pablo okoninyolopachoj iwan okonintiochij nochtin tokniwan

²⁵ Nokniwan, ximotiotzatzilikan por tejwan.

²⁶ Xikonintlajpalakan nochtin tokniwan ika tlasoxtlalistle ken Dios kineki.

²⁷ Namechnawatia ika itlanawatil toSeñor, xikinlerwilikan yin amatlajkuilole nochtin tokniwan.

²⁸ In toSeñor Jesucristo ma kipia weyi iteiknotlamachilis amonawak. Ijkón ma yeto.

SAN PABLO ITLATITLANIL IN DIOS IPAN OJPA OKINTLAJKUILILIJ IN TLANELTOKAKEJ DE TESALÓNICA

Pablo iwan ikompañeroswan okintlajkuililijkej in tlaneltokakej de Tesalónica

¹ Nej niPablo, iwan Silvano iwan Timoteo, tamechijkuililaj yin amatlajkuilole para namejwan antiopantlaneltokakej katlej ankatej itech weyikan de Tesalónica, katlej ankatej inawak toPapan Dios iwan toSeñor Jesucristo. ² ToPapan Dios iwan toSeñor Jesucristo ma amechmakakan inteiknotlamachilis iwan inyolosewilis.

*Dios kinmixkomakas (kintzonmanas) in tlajtlakolejkej ni-
jkuak witz in Cristo*

³ Nokniwan, moneki nochipa tiktlasojkamachiliskej in toTajtzin Dios por amejwan. Ijkón moneki tikchiwaskej, porke namotlaneltokalis okachi moskaltijtiw, iwan tlasojtlalistle katlej kada se de amejwan ankipiaj por yen oksekimej okachi weyixtiw. ⁴ Por yonik, asta tejwan tonewian timoweyinekij por amejwan ik nian nepa itech itiopanwan in toTajtzin Dios. Tikinmilwiaj de kenik namejwan ankixikoaj nochitlan anpanoaj, iwan mach ankipoloaj namotlaneltokalis maski amechtlatlalochtiaj iwan amechtlajyowiltiaj. ⁵ Yin techtitia nik in Dios nochipa kichiwa tlan kuale, porke itech yon tlajyowilistle in Dios kitlatok nik amotech powis para ankakakiskej kan Yej tlanawatia.

⁶ Iwan tikmatij nik in Dios kichiwas ijkón ken moneki para kinkuepaltis ika tlajyowilistle akinmej amechtlajyowiltiaj. ⁷ Iwan Dios noijki kichiwas amechmakas nesewile namejwan katlej antlajyowiaj. Iwan tejwan noijki techmakas nesewile itech nekáj tonale nikuak walmonextis in toSeñor Jesús, nikuak waltemos ijtkit tlilt de ilwikak inwan iangelwan poderosojtin. ⁸ Witz para kintlajyowiltis katlej mach kixmatij Dios iwan katlej mach kitlakitaj in kuale tlajtole katlej temakixtia de toSeñor Jesucristo. ⁹ Yonmej kipiaskej tlajyowilistle katlej mach keman tlamis, iwan yeskej wejka de toSeñor, wejka de imawisotlanex iwan wejka de ipoder. ¹⁰ Ijkón tlapanos nikuak in toSeñor walmuikas itech nekáj tonale para kiweyikixtiskej katlej iaxkawan, iwan kitaskej ika pakilistle katlej okineltokakej. Namejwan ikuakón noijki anyeskej iwan toSeñor porke ankineltokakej itlajtol in Dios katlej tejwan otamechilwijkej.

¹¹ Por yonik, tejwan nochipa timotiotzajtziliaj por amejwan. Dios oamechnotzke para xikneltokakan itlajtol. Por yonik in tejwan tiktlatlawtiaj ma amotech powi xiekan kej iaxkawan. Iwan tiktlatlaniliaj ke ika Yej ipoder xiwelikan xikchiwakan nochil tlan kuale katlej ankinekij ankichiwaskej, iwan xiktlamikan namotekiw katlej ankichijtokej ika namotlaneltokalis. ¹² Ijkón kiné, itokatzin in toSeñor Jesucristo kiweyikixtiskej por tlan amejwan ankichiwaj, iwan Yej noijski amechweyikixtis ika iteiknotlamachilis in toTajtzin Dios iwan toSeñor Jesucristo.

2

Monextis in weyi tlajtlakoltlakatl

¹ Axan, nokniwan, tiknekij tamechilwiskej de yen nikuak witz in toSeñor Jesucristo iwan techololos inawak. Tamechtlatlawtiaj ² amo niman xikpatlakan namotlayejeyskol. Amakaj ma amechtlamachilispatala ika itlaj tlajtole katlej amechilwis nik in weyi tonale de toSeñor yoajsiko. Amo ximomawtikan iwan amo xikinneltokilikan, tla akaj amechilwis nik tejwan otikintlapowijkej de se espíritu, o noso de itlaj tlajtole o noso de itlaj amatlajkuilole katlej kijtaj nik tejwan otikijuilojkej. ³ Amakaj ma amechkajkayawa. Porke antes de ajsis yon tonale, miekej katlej okineltokakej itlajtol in Dios ikuakón mach ok kineltokaskej, iwan noijski monextis in tlajtlakoltlakatl, katlej Dios kipalijtok ilugar kan tliko. ⁴ Yen yin tlajtlakoltlakatl katlej kikokolis nochil tlamantle katlej kinweyikixtiaj in tlakaj o noso katlej kintokaxtiaj diosmej. Iwan asta motlalis itech itiopan in Dios, kej yeskia melawak yen Dios, iwan asta motenewas nik yen Dios.

⁵ ¿Amo ankelnamikij nikuak ok onieka amowan onamechilwiaya nochi yin tlamantle? ⁶ Iwan axan namejwan ya ankimati tlanon kitzakuilia in tlajtlakoltlakatl, para amo ma wili san niman antes de ajsis in tonale para witz. ⁷ Iwan yopéj in tlajtlakole katlej in tlajtlakoltlakatl kichiwas, pero axan mach ya welis monextis, porke axan kajki se katlej mach kikawilia ma monexti. Pero satepan Dios kachiwas katlej axan mach kikawilia ma monexti. ⁸ Iwan ikuakón kemaj walmonextis in tlajtlakoltlakatl, iwan toSeñor Jesús kimiktis ika ijyoyo katlej kisas de itech iten, iwan kipojpolilis ipoder in tlajtlakoltlakatl ika ipetlanilis nikuak witz. ⁹ Iwan yon tlajtlakoltlakatl witz porke Satanás kichiwas ma wili ika miek ipoder, para kinchiwas miekej señailestin iwan milagrostin katlej ika kinkajkayawas in tlakaj. ¹⁰ Iwan ika miek tlamantle katlej mach kuale ika kinkajkayawas katlej

yawij kan teixpolojkan, porke mach kinekij kiresibiroskiej itlajtol in Dios katlej melawak para momakixtiskej.¹¹ Iwan por yonik, Dios kinkawilia ma mokajkayawakan ika yon tlakajkayawalistle para ma kineltokakan tlan amo melawak,¹² iwan para ijkón kintlajtlakolmakaskej nochtin katlej mach kinekij kineltokaskej tlan melawak, sino yej okachi kiwelitaj kichiwaskej tlan amo kuale.

Dios otechpejpenke para techmakixtis

¹³ Pero moneki nochipa timotlasojkamatiskej inawak to-Tajtzin Dios por yen namejwan, porke in toSeñor amechtlasojtla. Iwan desde antes de pewas in tlaltikpak, Dios oamechpejpenke para amechmakixtis por medio de iEspíritu Santo katlej amechyolchipawa, iwan porke ankineltokakej itlajtol in Señor katlej kipia nochí tlan melawak.¹⁴ Dios oamechnotzke nikuak tejwan otamechtlapowijkej de yen kuale tlajtole katlej temakixtia, para xikpiakan parte itech imawisotlanex in toSeñor Jesucristo.

¹⁵ Ijkón kiné, nokniwan, ximoyekketokan itech namot-laneltokalis, iwan amo xikelkawan in tlamachtile katlej tejwan otamechmachtijkej ika totlajtol iwan ika toamatlakuilol katlej otamechijkuiilijkej.¹⁶ ToSeñor Jesucristo iwan toPapan Dios, katlej techtlasojtla iwan techmaka yolosewilistle iktlanke (ik tlami), iwan techtoktia ma tikchiakan ika pakilistle para tieskej inawak, porke sa tektil weyi iteiknot-lamachilis katlej kipia por tejwan,¹⁷ ma amechyolojchikawa ipan namoyolo, iwan ma amechmaka chikawalistle para ankijtoskej iwan ankichiwaskej nochí tlan kuale.

3

Ximotiotzajtzilikan por tejwan

¹ Axan, nokniwan, ximotiotzajtzilikan por tejwan, para ke itlajtol in toSeñor totoka ma ajsiti ik nian nepa iwan ma kiresibirokan ika weyikixtilistle, ijkón ken namejwan ankiresibirojkej.² Noijki ximotiotzajtzilikan para ma techkawakan in tlakaj katlej mach kualtin iwan katlej kichijtinemij biero, porke katej miekej katlej mach tlaneltokaj inawak Cristo.³ Pero in toSeñor nochipa kichiwa tlan kitja. Iwan Yej amechmakas chikawalistle iwan amechpalewis de imak in Amo Kuale Tlakatl.⁴ Iwan tejwan tikneltokaj inawak toSeñor nik namejwan ankichiwaj iwan nochipa ankichijtoskej tlan tejwan yotamechnawatijkej.⁵ ToSeñor ma amechyekana ipan namoyolo para xikmachilikan okachi itlasojtlalis in Dios, iwan para ankixikoskej nochí tlamantle ken okixikoj in Cristo.

Moneki ma titekipanokan

⁶ Nokniwan, tamechnawatiaj ika itoka in toSeñor Jesucristo, xikinkawakan se lado in tokniwan katlej mach kinekij tekipanoskej iwan amo kichiwaj ken tejwan yotamechmachtijkej. ⁷ Namejwan ya ankimatij kenik moneki anyeskej ijkón ken nikuak tejwan otiekaj amowan. Porke nikuak tejwan otiekaj amowan, otitekipanojkej. ⁸ Otiktlaxtlajkej nochí tlakuale tlan otikkuajkej. Iwan chikawak otitekipanojkej yuale tonale, iwan ijkón nion se de amejwan mach otiktekimakakej. ⁹ Mach kijtosneki mach otikpiayaj derecho de tamechtlajtlanilianiij de xitechpalewikan, sino tejwan otitekipanojkej para tamechmakaskej se ejemplo para namejwan noijki ijkón xikchiwakan. ¹⁰ Porke nikuak tejwan otiekaj amowan otamechilwijkej, tla akaj amo kinekij tekipanos, mach ma tlakua. ¹¹ Porke yotikmatkej nik sekimej de amejwan san tlatzijkanemij, kalpojtinemij iwan mokalakijtinemij kan amo intekiw. ¹² Por yonik, in yonmej katlej ijkón kichiwaj, tiknekij tикиnmilwiskej iwan tikinnawatiskej ika itlanawatil in toSeñor Jesucristo, ma tekipanokan para kimotlaniliskej tlan kikuaskej, iwan ayakmo ma kalpojtinemikan sino ma yekan ika kuale.

¹³ Nokniwan, amo ximosotlawakan de ankichiwaskej tlan kuale. ¹⁴ Tla akaj amo kichiwa tlan tikijtaj itech yin amatlajkuilole, xikitakan akin yon, iwan ayakmo iwan ximonelokan, para ijkón ma pinawa. ¹⁵ Pero amo xikitakan kej yeskia se amokontra, sino xiknajnawatikan kej yeskia amokni.

Pablo okonintiochij iwan okinyolopachoj

¹⁶ Axan, yen toSeñor katlej kitemaka yolosewilistle, ma amechmaka yolosewilistle nochipa itech nochí tlan welis anpanoskej. In Señor ma yeto amowan aminochtin.

¹⁷ Nej niPablo namechtlajpaloa iwan namechijkUILILIA yin tlajtole ika noma. Nochtin noamatlajkuilolwan ijkón nikinmijkuihoa para xikmatikan nik melawak nej nikintitlani.

¹⁸ Iteiknotlamachilis in toSeñor Jesucristo ma yeto amotech aminochtin. Ijkón ma yeto.

SAN PABLO ITLATITLANIL IN DIOS YAKINNIKA OKITLAJKUILILIJ IN TIMOTEO

Pablo okitlajkuililij in Timoteo

¹ Nej niPablo, nitlatitlanile de Jesucristo. Dios toTemakixtij iwan toSeñor Jesucristo katlej tikchiah oksemi walmuikas, Yej onechtalij ma nieto niitlatitlanil. ² Nimitzijklilia yin amatl, Timoteo, tej tikaj kej yeskia melawak tinokone porke otikneltokak in Jesucristo por medio de nej. ToPapan Dios iwan Cristo Jesús in toSeñor ma mitzmakakan intlatiochiwalis, inteiknotlamachilis iwan inyolosewilis.

Ma se kipia kuidado de yen tiotlamachtile mach kuale

³ Oksemi nimitzlatlawtia ijkón ken onimitzlatlawtij niikuak oniaj para estado de Macedonia. Ximokawa itech weyikan de Éfeso iwan xikinnawati in nekatej sekimej tlakaj mach ok ma tlamachtikan de tlan amo melawak.

⁴ Xikinmilwi ayakmo ma kinkakikan kuentojtin katlej mach melawak, iwan nion de tlan achtoj otlapanok de yen ya wejkawitl toweyitajwan. Nochi yon tlamantle mach itlaj ipatij iwan san ika se mokualania, iwan mach techpalewia para ma tiktekapanokan toTajtzin Dios ika totlaneltokalis.

⁵ Ijkón xikinnawati para ma motlasojtlakan se iwan oksé ika se tlasojtlalistle katlej kisa de itech se iyolo chipawak, ika se kuale tlayejyekolistle iwan ika se tlaneltokalistle melawak. ⁶ Sekimej yokikajkej nochi yin tlamantle kuale, iwan yomopolijkej ika tlajtoltin katlej mach tepalewijkej. ⁷ Yejwan kinekij yeskej tlamachtijkej itech itlanawatil in Moisés, pero nion yejwan mach kimomakaj kuenta tlan kijtaj iwan nion tlan yejwan tlamachtiaj, maski yejwan kichiwaj kej yeskia melawak kimomakaj kuenta.

⁸ Kuale tikmatij nik itlanawatil in Moisés yon sa tekitl kuale, tla se kichiwas ijkón ken Dios kimonekiltia. ⁹ Noijki tikmatij ke nion se tlanawatile mach omijkuiloj para akinmej kichiwaj tlan kuale. Sino in tlanawatile omijkuiloj para nekatej katlej mach tlaneltokakej iwan mach tetlakitakej inawak Dios, para katlej kichiwaj tlan amo kuale iwan tla-jtlakolejkej, para katlej mach kitlakitaj toTajtzin Dios nion itlanawatil, para katlej kinmiktiaj inpapan o noso inmaman, para noctin in temiktijkej, ¹⁰ para katlej momekatiaj maski tlanamiktiltin o noso amo tlanamiktiltin, para katlej mosiwakuepaj o noso mookichkuepaj, para katlej tlakaichtekej,

para katlej tekajkayajkej, para katlej tetlajtoltlatlalilijkej, iwan para nochtin katlej kixpanawiaj in kuale tiotlamachtile, 11 kijtosneki yen kuale tlajtole katlej temakixtia de toTajtzin Dios weyikistok (weyititok) katlej onechnawatij ma niktem-atilti itlajtol.

Pablo omotlasojkamatke inawak Dios

12 Niktlasojkamachilia in toSeñor Jesucristo, katlej onechmakak chikawalistle iwan onechitak kej se katlej kichiwa tlan Yej kineki iwan onechtlalij para ma niktekipano. 13 Maski achtoj nej onitlapoaya biero de Cristo, onikintlatlalochtiaya katlej okineltokayah iwan onikinwikaltiaya. Pero Dios onechiknomatke, porke nej ayamo onikneltokaya iwan mach onikmatia tlan onikchiwaya. 14 Sa tekitl weyi iteiknotlamachilis in Señor katlej okipixke por nej, para ma nikneltoka iwan ma nitento ika itlasojtlalis in Cristo Jesús.

15 Yin tlajtole ya nele melawak iwan nochtin moneki kinel-tokaskej, nik in Cristo Jesús ovalaj ixko yin tlaltikpak para kinmakixtis in tlajtlakolejkej, iwan nej, okachi nitlajtlakolej de nochtin. 16 Pero Dios onechiknomatke, para notech kiteitis nik sa tekitl kipia weyi iyolo para techxikoa in toSeñor Jesucristo maski ma tiekan sa tekitl titlajtlakolejkej. Ijkón, nej nikaj kej se ejemplo para katlej satepan kineltokaskej in toSeñor Jesucristo para kipiaskej in nemilistle katlej mach keman tlamic. 17 Por yonik nochipa ma tikpialikan tetlakitalistle iwan weyikixtiliste in toRey katlej nochipa yolitok, katlej mach semi mikis, katlej mach akaj weli kita, katlej san Yej se Dios onkaj iwan katlej nochimati. Ijkón ma yeto.

18 Nokone Timoteo, nikneki xikchiwa yin tlan nimitzil-wia, para xiktlani tlan amo kuale ika motlaneltokalis iwan ika kuale motlayejyekolis ijkón ken se soldado temaga (temaka). In profetajtin okijtojkej nik ijkón tikchiwas. 19 Kuale ximoyekketo itech motlaneltokalis iwan ika kuale motlayejyekolis. Sekimej mach okichijkej kuenta tlan okin-milwiaya intlanamikilis nik mach kuale tlan kichiwaj, iwan por yonik omopolojkej, iwan mach ok kineltokaj in toTajtzin Dios. 20 Noijklí ijkón okichijkej Himeneo iwan Alejandro, katlej nej onikinkixtij de innawak in tlaneltokakej iwan onikinkaj ma wian iwan Satanás, para ma kimatikan amo ma tlajtokan biero de toTajtzin Dios.

2

Kenik moneki timotiotzajtziliskej inawak Dios

1 Axan Timoteo, nikneki nimitzilwis, ximotiotzajtzilikan inawak Dios por nochtin in tlakaj. Xiktlajtlanilikan in Dios

ma kintiochiwa iwan ma kinmaka tlan intech moneki, iwan xiktlasojkamachilikan por nochtin tlakaj. ² Moneki ximotiotzajtzilikan por nochtin in wejweyin tekiwajkej iwan por nochtin katlej tlaltanawatijkej para kuale ma se yeto. Para kuale ma tiekan iwan ma tikpiakan yolosewilistle. Ijkón, welis timowikaskej kuale iwan welis techtlakitaskej, para mach ok itlaj ma techtzakuili para tiktemoskej in Dios. ³ Yin kuale iwan kiwelita in toTajtzin Dios toTemakixtij. ⁴ Porke Yej kineki nochtin in tlakaj ma momakixtikan iwan ma kixmatikan katlej ya nele melawak. ⁵ Onkaj san se Dios, iwan onkaj san se tlakatl katlej motlapowia iwan Dios por tejwan. Yon tlakatl yen Jesucristo. ⁶ Jesucristo omotemaktij (omotemaktij) ma kimiktikan para okitlaxtlaj tlan omonekia para techmakixtis tinochtin de totlajtatlakol. Dios okichij ma kimatikan in tlaltikpaktlakaj nikuak omonekia. ⁷ Por yonik Dios onechtlalij ma nitlamacht de itlajtol iwan onechtlalij nitlatitlanile. Onechtlalij ma nikinmachti katlej mach judiojtin de kenik omikke in Cristo, para ma kineltokakan. Melawak tlan nikijta, mach nitlakajkayawa.

⁸ Por yonik, nikneki, ke kan mololoskej in tlaneltokakej iwan nikuak motiotzajtziliskej iwan kajkokuiskej inma, ma kichiwakan ika inyolo chipawak, amo ma kichiwakan nikuak mokualaniaj nion nikuak monanankiliaj. ⁹ In siwamej ma motzotzoltikan ken Dios tlanawatia, amo ma moweyinekikan ika intzotzol, iwan ma motzotzoltikan ken moneki. Amo ma kiyektlalikan intzonkal para ika moweyinekiskej, nion amo ma mochijchiwakan ika oro, ika perlas o noso ika itlaj tzotzole patíoj. ¹⁰ Sino moneki in siwamej ma kichiwakan tlan kuale ijkón ken moneki kichiwaskej katlej kineltokaj in toTajtzin Dios. ¹¹ In siwamej nikuak kikaktoskej in tiotlamachtile, moneki ma san tlakaktokan, iwan ma kimatikan nik mach kintokaroa tlayekantoskej ken tlakaj. ¹² Nej mach nikinkawilia in siwamej ma kinmachtikan o noso ma kinnawatikan in tlakaj, sino moneki ma san tlakaktokan. ¹³ Porke Dios achtoj okichij in Adán iwan satepan okichij in Eva. ¹⁴ Iwan noijki in Amo Kuale Tlakatl mach okikajkayaj in Adán, sino okikajkayaj in Eva, iwan Eva owetzke ipan tlajtlakole. ¹⁵ Pero in siwamej momakixtiskej tla kuale monamiktiskej iwan kuale kinmonekuitlawiskej in pilwan. Noijki tla nochipa tlaneltokatoskej inawak Dios, tla tetlasojtlatoskej, tla kipiaskej inyolo chipawak, iwan tla yeskej ken Dios kineki.

Kenik moneki yetos se tlayekanke

¹ Nimitzilwis se tlajtole katlej melawak: tla akaj kineki yetos tlayekanke itech tiopan, kijtosneki kineki kichiwas se tekitl sa tekitl kuale. ² Por yonik akin kipia yon tekitl de tlayekanke, kipia de nemis ika kuale inemilis para amakaj ma kistlakawi de itlaj. Ma kipia san se isiwa, ma yeto kuale iyelis, iwan kuale ma mowika inwan tlakaj para ma kitlakitakan. Ma kipia ma kinkaloti in tokniwan itech ichan iwan kuale ma tlamachti. ³ Amo ma yeto tlawanke nion tenonotzke, nion amo ma kiwelita in tomin. Sino moneki ma yeto kuale tlakatl, iwan amo ma kiwelita temagas (temakas). Amo ma yeto tominpitzotl. ⁴ Ma kipia kenik tlanawatis itech ikalijtik, ma kinpia ipilwan tetlakitakej iwan tetlakamatkej. ⁵ Porke tla se mach kipia kenik tlanawatis itech ikalijtik, ¿kenik welis kiné kinyekanas in tlaneltokakej? ⁶ Katlej yetos tlayekanke moneki amo ma yeto yankuik tlaneltokak, para amo ma moweyineki, porke tla moweyinekis, Dios kitlajtlakoltis ijkón ken okitlajtlakoltij in diablo katlej noijki omoweyinekke. ⁷ Noijki se tlayekanke moneki ma yeto se katlej kitlakitaj in tlakaj katlej mach tlaneltokakej, para amo ma tlajtowan biero de yej iwan para amo ma wetzi imak in diablo.

Kenik moneki yetoskej in tlapalewijkej de tiopan

⁸ Noijki, katlej tlapalewijkej de tiopan moneki ma yekan katlej kintlakitaj. Ma kijtowan tlan melawak, amo ma tlawanakan, nion amo ma kiwelitakan tomin. ⁹ Moneki kuale ma mokitzkijtowan itech itlajtol in Cristo katlej inawak tikpiaj totlaneltokalis. Amo ma kipia itlaj tlamantle katlej ma kintlajtlakolti itech intlalnamikilis. ¹⁰ Moneki achtoj ma kinyejyekokan, para kinmitaskej kox ya welis tekipanoskej kej tlapalewijkej de tiopan. Tla kuale tekipanoaj, welis se kintlalis kej tlapalewijkej de tiopan. ¹¹ Insiawan de yonmej tlapalewijkej de tiopan noijki moneki ma yekan katlej kintlakitaj, amo ma yekan tlajtolerajtin, ma yekan kuale inyelis, iwan ma yekan de konfiansa itech nochit tlamantle. ¹² Se katlej tlapalewijk de tiopan moneki ma kipia san se isiwa, ma kipia kenik kinnawatis ipilwan iwan ma kipia kenik tlanawatis itech ikalijtik. ¹³ Porke in tlapalewijkej de tiopan katlej kuale tekipanoaj, kimotlaniliaj tetlakitalistle, iwan noijki okachi moyekketzaj inawak Cristo Jesús para tetlapowiskej ika ixchikawalistle.

Por tlanik in Pablo okitlajkuililij in Timoteo

¹⁴ Nikchia san niman nias nimitzitati. Pero nimitzikuililia yin amatl ¹⁵ porke tla niwejkawas, tikmatis kenik moneki se nemis itech ichan toTajtzin Dios. Yon ichan Dios kijtosneki yejwan katlej tlaneltokaj inawak Dios katlej yolitok. Yonmej

katlej tlaneltokaj inawak Dios, katej kej tlaketzaltin katlej kipalewijtokej se kale, porke tlapalewiaj itech itlajtol in Dios para kitematiltiskej ixko yin tlaltikpak. ¹⁶ Itlajtol in Cristo katlej yotikneltokakej iwan katlej achtoj mach otikmatiaj yon sa tekitl weyi. Pero axan ya tikmatij ke:

Cristo owitza kej se tlakatl;

iEspíritu in Dios otechnextilij nik mach itlaj tlajtlakole okip-ixke.

In angelestин okitakej oksemi omoyolkui.

In tlakaj okitematiltijkej ik nian nepa itech tlaltikpak kenamij nik omoyolkui.

In tlakaj okineltokakej ik nian nepa itech tlaltikpak.

Iwan toTajtzin Dios oksemi okiresibiroj itech ilwikak ika imawisotlanex.

4

Sekimej mach ok kineltokaskej in Jesucristo

¹ In Espíritu Santo techilwia nik kuale ma tikmatikan, niikuak ya iyakatlanka in tonaltin, sekimej mach ok kineltokaskej toSeñor Jesucristo nion mach ok kineltokaskej itlamachtil. Sino okachi kinkakiliskej katlej kipiaskej intlayejyekol tekajkayaj, iwan kinkakiliskej katlej tlamachtiaj ika tlamachtile de demoniojtin. ² Kinkakiliskej katlej ome inmixko iwan tekajkayajkej, katlej mach ok pinawaj niikuak kichiwaj tlan amo kuale. ³ Kijtoskej mach kuale ma se monamiki nion mach kuale ma se kikua itlaj tlakuale, maski Dios okichij noch iwan mokua para ijkón in tlaneltokakej iwan katlej kixmatij tlan melawak ma kikuakan ika tlasojkamachilstle. ⁴ Porke noch iwan Dios okichij yon kuale, iwan mach moneki tiktaliskej se lado. Sino moneki ma tikkukan ika tlasojkamachilstle. ⁵ Porke ika itlajtol in toTajtzin Dios iwan ika totiotzatzilis mokawa chipawak.

Se katlej kuale tekipanoj de Jesucristo

⁶ Xikinyekilwi yin tlamantle in tokniwan tlaneltokakej, iwan ijkón tietos kuale titekipanoj de Jesucristo. Ijkón moyolo mochikajtias ika itlajtol in Cristo katlej tikneltoka iwan noijki moyolo mochikajtias ika kuale tlamachtile katlej ya tikneltokatiwitz. ⁷ Pero amo xikinneltoka in kuentojtin katlej mach itlaj inpatij iwan mach tepalewijkej inawak Dios. Sino ximomachti kenik timotemaktis (timotemaktilis) okachi inawak Dios. ⁸ Porke niikuak akaj kichiwa ejersisio para yetos chikawak itlalnakayo, yon ejersisio kipalewia achitzin, pero niikuak akaj momachtia kenik motemaktis okachi inawak Dios, yon okachi kipalewis itech noch iwan tlamantle. Porke techpalewia itech yin nemilistle iwan noijki itech nekáj nemilistle

katlej satepan yetos. ⁹ Nochi yin tlajtole melawak, iwan moneki nochtin ma kineltokakan. ¹⁰ Por yonik titlajyowiaj titekipanoaj chikawak, porke yotiktlalijkej toyolo inawak Dios katlej yolitok, katlej Temakixtij de nochtin tlakaj, pero okachi para nekatej katlej kineltokaj.

¹¹ Yen yin tlamantle moneki tikinmachtis iwan tikin-nawatis. ¹² Amakaj ma mitzita kej yeskia mach itlaj tikmati por wel ok titelpochtle. Sino moneki xieto se ejemplo de kenik titlapoa, de kenik tinemi, de kenik titetlasojtla, de kenik titlaneltoka iwan de kenik tichipawkanemi itech itlajtol in Dios. ¹³ Mientras nej ompa niawi, tej xikixkawi (ximomeli) xikinlerilijto in tokniwan itlajtol in toTajtzin Dios, xikinyolojchikajto iwan xikinmachtijto. ¹⁴ Amo xikkawa de xiktekipanolti ipoder in Dios katlej omitzmakak nijuak in tokniwan tlayekankej okintlalijkej inmawan mopan, iwan omitzilwijkej tlan okinmilwij in Espíritu Santo.

¹⁵ Ika nochi moyolo xikixkawi (ximomeli) yin tlamantle katlej nimitzilwijtok, para nochtin ma kitakan nik tajkotlekotiwiw itech itlajtol in Dios. ¹⁶ Ximotlachili tej monewian itech monemilis iwan de tlan titlamachtia. Kuale ximoyekketo itech nochi tlan kuale. Tla ijkón tikchiwas, tej timomakixtis iwan noijki tikinmakixtis katlej mitzkakiskej.

5

Kenik se mowikas inwan tokniwan tlaneltokakej

¹ Amo xikajwa ika chikawak se katlej ya tetajzin. Sino xiknajnawati kej yeskia mopapan. Noijki in telpokamej xikinnajnawati kej yeskia mokniwan. ² In tenantzitzintin xikinnajnawati no ijkón ken tiknajnawatia momaman. In ichpokamej xikinnajnawati kej yeskia mokniwan ika nochi moyolchipawalis.

³ Xikinpalewi in viudajtin katlej melawak moneki se kin-palewis katlej mach itlaj kipiaj. ⁴ Pero tla akaj viuda kinpia ipilwan o noso ixwiwan, moneki yejwan ma kinpalewikan. Ijkón welis kinkuepiliskej intajwan in tlasojtlalistle katlej okipixkej por yejwan. Yon sa tekitl kuale iwan kipaktia in toTajtzin Dios. ⁵ Se viuda katlej melawak yomokaj iselti, kittalia nochi iyolo inawak Dios iwan kichia ma kipalewi, iwan kixkawia (momelia) motiotzajtzilia iwan kimotlatlawtilia yuale tonale. ⁶ Pero se viuda katlej san mopaktijtinemi, in Dios kita yon siwatl kej yeskia yomikke maski yolitok. ⁷ Moneki ijkón xikinnawati para ma kineltokakan yin tlajtole. Para amakaj ma kinmistlakawi de itlaj. ⁸ Porke tla akaj amo motekipachoa para kinpalewis ifamiliareswan, iwan nion amo kinpalewia katlej katej itech ichan, yon kijtosneki

kikawa se lado tlan kineltoka, iwan kajki asta okachi mach kuale ke se katlej mach tlaneltokak.

⁹ Xikintokayoiikuilo in viudajtin katlej moneki se kinpalewis. Moneki kipiaskej okachi de eyinpoale xiwitl iwan tla okipixkej san se inmokich. ¹⁰ Ma yekan siwamej katlej kuale kinmixmatij por tlan kuale kichiwaj. Kijtosneki, tla kuale okinyekankej inpilwan, tla kimatij tekalotiaj itech inkalijtik, tla kuale kinpalewijtiwitzej in tokniwan tlaneltokakej ika kuale inyolo, tla kuale kinpalewijtiwitzej katlej tlajyowiaj, o noso tla kichiwitzej itlaj oksekin tlamantle kuale.

¹¹ Pero in viudajtin katlej mach ya kipiaj achón xiwitl, amo xikintokayoiikuilo para se kinpalewis. Porke mach kixikoskej iwan kikawaskej se lado tlan okisentlalijkej inawak Cristo, porke kinekiskej monamiktiskej oksemi. ¹² Iwan mokawaj tlajtlakoleijkej porke amo kichiwaj tlan yokisentlalijkej kichiwaskej inawak Dios. ¹³ Iwan tla nemij techan, mokuepaj tlaztiwkej, iwan noijki mokuepaj tlajtolerajtin, mokalakijtinemij itech nochi tlamantle iwan kijtojinemij tlan amo moneki kijtoskej. ¹⁴ Por yonik, nikneki ke in viudajtin katlej mach ya kipiaj miek xiwitl ma monamiktikan, ma kinpiakan inpilwan iwan ma kimonekuitlawikan inkalijtik, para amo ma kikawilikan ma techistlakawi in tokontra. ¹⁵ Porke sekimej viudajtin yomoxelojkej de itech iojwi in Cristo iwan yokonankej iojwi in Satanás.

¹⁶ Tla se tokni tlaneltokak, okichtle o noso siwatl, tla kipia se viuda itech ifamilia, moneki kinpalewis para amo ma kintekimaka in tokniwan tlaneltokakej. Ijkón, in tokniwan tlaneltokakej welis kinpalewiskej in viudajtin katlej melawak moneki se kinpalewis katlej mach itlaj kipiaj.

¹⁷ In tlayekankej de tiopan katlej kuale kinyekanaj in tlaneltokakej, moneki ma kinyektlaxtlawikan iwan moneki ma kinyektlakitakan, pero okachi para nekatej katlej kixkawiaj (momeliaj) kitematiltiaj iwan tlamachliaj de itlajtol in Dios. ¹⁸ Porke in tiotlajkuilole kijta: "Xikkawili in toro ma kikua in seada nijuak ipan tlajtlaksa para kooya." Noijki kijta: "Se tlakatl katlej tekipanoa moneki kitlaxtlawiskej."

¹⁹ Amo xikchiwa kuenta nijuak kistlakawiaj se tlayekanke de tiopan, tla amo katej kanaj omen o noso eyin testigojin katlej no ijkón ma kijtokan de tlan kistlakawiaj. ²⁰ Pero katlej mach kimatij tlakakij iwan ok kichirokej tlajtlakole, moneki xikinmajwa inmixpan nochtin para ijkón oksekimej tokniwan tlaneltokakej ma momawtikan. ²¹ Nimitznawatia ixpan Dios iwan ixpan toSeñor Jesucristo iwan inmixpan iangelwan tlapejpenaltin, xikchiwa yin tlamantle katlej nimitzilwia maski iwan se katlej iwan timotlasoxtla. Tej amo

xikita akin yej. ²² Amo xiktlalijtiwetzi san akin kej tlayekanke tla amo kuale tikixmati, para amo titewan xikpia tlajtlakole. Xikchiwa tlan kuale iwan amo ximoyolsokioti ika tlajtlakole.

²³ Iwan como ya miekpa tijitkualotiwitz, amo san atl xikoni, sino noijki xikoni achitzin vino.

²⁴ Intlajtlakol de sekimej tlakaj san niman mota antes de se kinmistlakawis nik kipiaj tlajtlakole. Pero in oksekimej tlakaj mach mota intlajtlakol, sino motas asta satepan. ²⁵ Ijkón noijki, nikuak se kichiwa tlan kuale, noijki san niman mota. Iwan maski amo san niman ma mota tlan se kichiwa tlan kuale, satepan kipia de motas.

6

¹ In tlaneltokakej katlej tekipanoaj kej tlanamaktin moneki ma kinyektlakitakan intekowan, para amakaj ma tlajto biero de Dios iwan de itiotlamachtil. ² Tla se tlaneltokak tekipanoa kej tlanamakte iwan kipia iteko noijki tlaneltokak, mach por yonik moneki kitlakitas san tzikitzin. Sino moneki ma kiyeyyeke ika itekiwi kipalewia se katlej noijki tlaneltokak ken yej, iwan asta moneki kipalewis okachi kuale porke totetlasojkaikni. Moneki xikinmachti iwan xikinnajnawati yin tlamantle.

Moneki se nemis ken Dios kimonekiltia

³ Tla akaj tlamachtia ika se tlamachtile katlej mach melawak iwan amo kajki ken kijta in kuale tlajtole de toSeñor Jesucristo, iwan nion amo kajki ken techmachtia in tiotlamachtile, ⁴ yon akin ijkón tlamachtia kijtosneki moweyineki iwan mach itlaj kigmati. Kiwelita tlananankilijtinemis iwan kiwelita mokualanijtinemis iwan akaj. Ijkón nik pewa moxikoaj in tlakaj, pewa mokualaniaj, mowikaltiaj, iwan mach ok kinekij akaj kineltokiliskej. ⁵ Yonmej tlakaj mach ok welij kiyeyyekeaj itlaj ika kuale intlalnamikilis, por yen tlajtlakole, iwan mach kixmatij tlan melawak. Para yejwan in tiotlamachtile kijtosneki tomin para ika se motomintis. Ximotlachili de inwan yonmej tlakaj katlej ijkón intekiw. ⁶ Pero ya nele melawak nik se welis morikojtilis ika tiotlamachtile, tla se pakis ika tlan ya tikpiaj katlej Dios techmaka. ⁷ Porke mach itlaj otikualkuikej ixko yin tlaltikpak, nion mach itlaj welis tikirkiskej. ⁸ Pero tla tikpiaj tlan tikkuskej iwan tlan tikonakiskej, san ika yon ma tipakikan. ⁹ Pero katlej kinekij morikojtiliskej tlajtlakoaj porke kinyoltilana in tlajtlakole. Porke kichiwaj san tlan amo para kajsiskej tomin, iwan mach kimomakaj kuenta nik in yon tlamantle kinmijtlakoa. Porke kinmijtlakolia inyolo iwan kinmixpoloa. ¹⁰ Porke nikuak se kitlalia iyolo itech tomin, ijkuakón pewa se kichiwa nochí

tlamantle katlej mach kuale. Sekimej kikawaj in Dios porke kinekij kipiaskej okachi de tlan ya kipiaj iwan tlajyowiaj miek itech innemilis.

Ximokitzki kuale itech tlan tikneltoka

¹¹ Pero tej, katlej tiktekipanoa in toTajtzin Dios, ximotlachili de nochí yin tlamantle. Xikchijto tlan kuale ken Dios kineki, ximotemaktijo inawak Dios iwan xitlaneltokato inawak, xitetlasojtlato, xikxiko tlan tipanos iwan xieto tiyolyamanke. ¹² Xitekipano chikawak ika motlaneltokalis. Xikmoaxkati in nemilistle katlej mach keman tlamis, porke por yonik omitznotzke in toTajtzin Dios, iwan otikijtoj de kenik tikneltoka in toSeñor Jesucristo inmixpan miekej tlakaj. ¹³ Axan, ixpan toTajtzin Dios, katlej kimaka nemilistle nochí tlan yolitok, iwan ixpan toSeñor Jesucristo, katlej noijki kuale otlapoj de Dios ixpan Poncio Pilato, ¹⁴ nikneki xikchiwa nochí tlan Dios mitznawatia, para amakaj ma mitzistlakawi de itlaj. Ijkón xikchijto asta iikuak witz in toSeñor Jesucristo, ¹⁵ nikuak ajsiki tonale katlej Dios yokitlalij, Yej ijkón kimonekiltis kichiwas in toTajtzin Dios katlej yolchipawak iwan kipia weyi ipoder, katlej yen Tlanawatij de nochtin tlatlanawatijkej iwan yen inTeko de nochtin tekomej. ¹⁶ Mach onkaj oksé ken Yej katlej mach semi mikis, katlej kajki ijtk tlanextle kan mach akaj weli ajsi. Mach semi akaj kita iwan nion mach welis se kitas. Nochipa ma yeto iaxka in tetlakitalistle iwan poder. Ijkón ma yeto.

¹⁷ Nekatej katlej kipiaj tomin ixko yin tlaltikpak, xikinawati amo ma moweyinekikan, nion amo ma kitlalikan inyolo itech rikojoyotl. Porke yon san panoa. Okachi kuale ma kitlalikan inyolo inawak Dios katlej yolitok, katlej nochipa techmaka miek tlamantle para ika ma tipanotokan iwan ika ma tipaktokan. ¹⁸ Xikinnawati ma kichiwakan tlan kuale ika intomin para ijkón ma yekan rikojtin inawak Dios, iwan ma kimatikan ma kitemakakan iwan ma tlapalewikan ika itlaj tlan Dios kinmaka. ¹⁹ Ijkón, se tonale, kajsiskej ompa ilwikak katlej melawak okimotlanilijkej, iwan noijki welis kajsiskej katlej melawak nemilistle katlej mach keman tlamis.

Pablo okonnawatij in Timoteo

²⁰ Timoteo, xikchiwa tlan Dios omitznawatij. Amo xitlapojtinemi de itlaj tlajtole katlej mach itlaj ipatij. Nion amo xikkaki katlej mach kuale tlamachtile katlej sekimej tlamachtiaj, pero mach tlamachtiaj ken kijta itlamachtil in toTajtzin Dios. Yejwan kijtaj kimatij nochí, pero mach melawak. ²¹ Porke sekimej yokineltokakej yon tlamachtile mach kuale iwan yomoxelojkej de itech iojwi in Cristo. Ma Dios mitzitochiwa. Ijkón ma yeto.

SAN PABLO ITLATITLANIL IN DIOS IPAN OJPA OKITLAJKUILILIJ IN TIMOTEO

Pablo okitlajkuililij in Timoteo

¹ Nej niPablo, nitlatitlanile de Jesucristo porke Dios ijkón okimonekiltij, para ma niktematilti in yankuik nemilistle katlej Dios okijtoj kinmakas nochtin akinmej melawak kineltokaskej in Cristo Jesús. ² Nimitzíjkuililia yin amatl, notla-sojkone Timoteo. ToPapan Dios iwan toSeñor Jesucristo ma mitzmakakan tlatiochiwalistle, tlasojoatlalistle iwan yolosewilistle.

Amo se ma pinawa de tetlapowis de Cristo

³ Nijuak nimitzelnamiki itech notiotzajtzilis, yuale tonale, niktlasojkamachilia in toTajtzin Dios por tej, in Dios katlej niktekipanoa ika kuale notlalnamikilis ijkón ken okichijkej in ya wejkawitl noweyitajwan. ⁴ Nikelnamiki kenik otichokak nijuak otimomakajkej, iwan nikneki nimitzitas oksemi para sa tekitl nipakis. ⁵ Nikelnamiki nik titlaneltoka ika kuale moyolo ijkón ken otlaneltokaya moweyinan Loida iwan momaman Eunice. Nej kuale nikmati nik ok ijkón titlaneltokatok ken achtoj otitlaneltokak.

⁶ Por yonik nikneki xiktekipanolti ipoder in Dios katlej omitzmakak nijuak nej mopan onikintlalij nomawan, iwan onimotiotzajtzilij inawak Dios para ma mitztekipanolti. ⁷ Porke Dios otechmakak iEspíritu Santo amo para ma tikin-miimakasikan in tlakaj, sino para ma tikpiakan ipoder, ma tikpiakan tlasojoatlalistle iwan ma tkiyejyekokan tlan kuale.

⁸ Por yonik, amo xipinawa de titetlapowis de toSeñor Jesucristo katlej nitzaktok por Yej, nion amo xipinawa de nej por nitzaktok por Yej. Okachi kuale xitlajyowi por yen kuale tlajtole katlej temakixtia. Dios mitzmakas chikawalistle para xikxiko. ⁹ Dios otechmakixtij, otechchipaj iwan otechpe-jpenke para ma titekipanokan inawak. Mach por otikchijkej itlaj tlan kuale, sino porke Dios ijkón okinekke iwan otechmakak iteiknotlamachilis inawak Cristo Jesús, desde antes de yeni in tlaltikpak. ¹⁰ Pero axan Dios yotechtitij itlasojoatlalis nijuak ovalaj in toTemakixtij Jesucristo, katlej okitlanke in mikilistle, iwan okinextij in nemilistle katlej mach keman tlamic por medio de yen tlajtol katlej techmakixtia.

¹¹ Dios onechtlalij ma niktematilti yin kuale tlajtole katlej temakixtia, onechtlalij kej nitlatitlanile iwan onechtlalij ma

nikinmachi katlej mach judiojtin. ¹² Iwan por yonik nitlajyowia. Pero mach nipinawa, porke nej kuale nikmati akin inawak nitlaneltoka iwan akin inawak niktlalia notlaneltokalis. Noijki kuale nikmati nik in Yej kipia poder para kimonekuitlawis tlan yoniktlalij imak, asta itech nekáj tonale nikuak oksemi witz in Cristo.

¹³ Xikinmititi kuale nochti ken nej onimitz machtij. Xikinmititi ika motlaneltokalis iwan ika motlasojtlalis katlej omitzmakak in Cristo Jesús. ¹⁴ Xikmalwi in kuale tlajtole katlej Dios omitzmakak, xikmalwi ika itlapalewilis in Espíritu Santo katlej kajki ipan toyolo.

¹⁵ Tej ya tikmati nik nochtin in tlaneltokakej de itech país de Asia onechkajtejkej noselti. Noijki onechkajtejkej in Figelo iwan Hermógenes. ¹⁶ In Señor ma kiknomati ifamilia in Onesíforo, porke yej miekpa onechyolojchikaj, iwan mach opinaj (opinawak) nikuak onechitak nitzaktok telpiloyan iwan nijilpitok ika kadena. ¹⁷ Sino, nikuak yej oejkok nian itech weyikan de Roma, onechtemoj asta kan onechajsik iwan mach omoyolotlamij. ¹⁸ In Señor ma kiknomati itech nekáj tonale nikuak walmokuepas. Tej noijki kuale tikmati nik sa tekitl otechpalewij itech weyikan de Éfeso.

2

Ma se yeto kej se kuale soldado de Jesucristo

¹ Tej, nokone, ximochikawa ika iteiknotlamachilis in Cristo Jesús, katlej Yej techmaka. ² Tlan otinechkakilij onikijtoj immixpan miekej tlaneltokakej, yon xikinmachi in tokniwan katlej melawak motemaktiaj inawak Dios, katlej welis kinmachtiskej oksekimej.

³ Tej, kiné, moneki xikxiko in tlaiyowilistle kej se kuale soldado de Jesucristo katlej yawi itech guerra. ⁴ Se soldado katlej kajki itech guerra mach kichijtinemi tlan kichijtinemij oksekimej katlej mach soldadojtin. Porke se soldado kipia de kichiwas ijkón ken kineki itlayekanke katlej okitlalij ma yeto soldado. ⁵ Noijki, tla se katlej mawiltia, tla amo mawiltis ijkón ken kijta in reglamento, mach welis kitlanis ipremio. ⁶ Se katlej tekipanoa chikawak itech itlatok, kinamiki yej achtoj kikuas tlan okitookak. ⁷ Kuale xikyejyeko tlan nimitzilwia, iwan toSeñor Jesucristo mitzpalewis para nochti xikmomaka kuuenta.

⁸ Xikelnamiki nochipa in toSeñor Jesucristo, katlej omoyolkuik satepan de omikke iwan katlej walajtok nelwatl de yen rey David. Yen yin kuale tlajtole katlej temakixtia katlej nej nitlamachtia. ⁹ Iwan por niktematiltia yin tlamachtile axan nitlajyowia de miek tlamantle, asta nechtzakuaj telpiloyan

kej yeskia mach nikuale. Pero itlajtol in toTajtzin Dios mach welij kitzakuaj. ¹⁰ Por yonik, nikxikoa noch i tlajyowilistle por yejwan katlej Dios yokinpejpenke. Porke nikneki yejwan noijki ma welikan ma momakixtikan inawak Cristo Jesús, para welis yetoskej nochipa itech imawisotlanex.

¹¹ Axan, nikneki nimitzilwis yin tlajtole katlej melawak: Tla Iwan yotimikkej, noijki Iwan tiyolitoskej.

¹² Tla tikxikoskej titlajyowiskej, noijki tiweliskej titlanawatiskej iwan Cristo.

Tla tikijtoskej mach tikixmatij in Cristo, Yej noijki kijtos mach techixmati.

¹³ Tla amo tikchiwaskej tlan yotikilwijkej in Cristo tikchiwanij, Yej ya nele kichiwas tlan yokijtoj, porke Yej mach welis kipatlas itlajtol de tlan yokijtoj kichiwas.

Xieto kuale titekipanoj

¹⁴ Xikinmelnamikti in tlaneltokakej yin tlamantle, iwan xikinmilwi ixpan toTajtzin Dios amo ma motlatlajtolkuepakan itech itlaj tlamantle katlej mach itlaj ipatij. Porke noch yon tlajtole san se ika moijtlakoa iwan ika se kinkuatlapololtia akinmej kikakij. ¹⁵ Xikchiwa asta kan tiweli para ma kiwelita in toTajtzin Dios tlan tikchiwa. Xieto kej se tekipanoj katlej mach kipia de tlan ika pinawas, porke kuale titekipanoa itlajtol katlej melawak. ¹⁶ Amo xikinkakili in tlakaj katlej tlapoaj de tlan amo melawak iwan mach itlaj ipatij. Porke noch yon tlamantle in tlakaj san ika motzinkixtiaj okachi de inawak Dios, iwan okachi mijtlakoaj itech tlan amo kuale. ¹⁷ Intlamachtil kinmijtlakojtias in tlaneltokakej kej itlaj kokolistle. Ijkón omochijkej in Himeneo iwan Fileto, ¹⁸ katlej okikajkej tlan melawak iwan kijtaj yopanok in tonale nijuak in mikkamej moyolkuinij. Iwan kinkuatlapololtiaj sekimej itech intlaneltokalis. ¹⁹ Pero itlajtol in Dios katlej melawak kajki kej se cimiento katlej mach keman poliwis. Iwan itech yin cimiento kipia yin tlajtole: "In Señor kinmixmati katlej iaxkawan." Iwan noijki kijta: "Nochthin katlej motenewaj tlaneltokakej de Cristo amo ma kichiwakan tlan Dios mach kiwelita."

²⁰ Itech se weyi kale, katej trastestin kuakualtzitzintin de oro iwan de plata katlej patiojkej. Pero noijki katej trastestin san de kuawitl iwan de tlale (barro) katlej mach patiojkej. Katlej patiojkej kintekipanoltiaj nijuak ilwichiwaj, iwan katlej mach patiojkej kintekipanoltiaj nochipa. ²¹ Tla se tlakatl moyolchipawas para ayakmo kichiwas tlan amo kuale, yon tlakatl yetos kej se traste katlej kuakualtzin iwan patíoj. Yetos kej se traste chipawak iwan kuale para Dios kitekipanoltis itech itlaj tlamantle katlej okachi kuale.

²² Ximotlachili de noch i tlamantle katlej mach kuale katlej kinekij kichiwaskej in telpokamej, iwan ika noch moyolo ximochikawa para tikchiwas tlan kuale, xikpia moyolo para titlaneltokas, para titetlasojtlas iwan para tikpias yolosewilistle. Ijkón xikchiwa inwan nochtin in tokniwan yolchipawakej katlej motiotzajtziliaj inawak toSeñor Jesucristo. ²³ Amo ximokalaki inwan tlakaj katlej kijtaj itlaj tlajtole tontojyotl katlej mach itlaj ipatij. Porke san kinextiaj tlajtole iwan san ika se mokualania. ²⁴ Porke se tekipanoj de toSeñor mach kinamiki mokualanijtinemis. Sino, moneki kuale mowikas inwan nochtin. Ma kimatí kenik tlamachtis iwan ma kimatí ma kixiko noch i tlamantle tlan panos. ²⁵ Se tekipanoj de toSeñor moneki kimatis kenik kinmachttis katlej mach ijki tlan kiyeyekoaj, para ijkón, xamo Dios kinkawilis ma moyolkuepakan iwan welis kimatiskej tlan melawak. ²⁶ Iwan ijkón welis momakixtiskej de imak in diablo katlej kintoktia ma kichiwakan san tlan yej kineki.

3

Kenik yeskej in tlakaj itech iyakatlanka tonaltin

¹ Noijki moneki tikmatis ke itech iyakatlanka tonaltin in tlakaj panoskej miek tlajyowilistle. ² In tlakaj yeskej tzotzokamej, kiwelitaskej tomin, texijxikoskej, moweyinekiskej, tlawikaltiskej, mach kintlakitaskej intajwan, mach kimatiskej motlasojkamatiskej, mach kitlakitaskej in Dios, ³ mach kimatiskej tetlasojtlaskej nion teiknomatiskej, yeskej tlajtolerojtin, mach kimoxikoltiskej de tlan kinekiskej kichiwaskej, kipiaskej mach kuale inyelis, kikokoliskej nochitlan kuale, ⁴ yeskej traisionerojtin, mach momawtiskej de tlan kichiwaskej, momachiliskej wel kipiaj intlamachilistle, kinekiskej san puro mopaktiskej iwan mach kinekiskej kiweyikixtiskej in toTajzin Dios. ⁵ Sekimej mochiwaskej yaskej tiopan kej tlaneltokakej, pero mach kineltokaskej ipan inyolo tlan kikakiskej.

Amo ximokalaki inwan yonmej tlakaj katlej ijkón inyelis. ⁶ Porke sekimej de yonmej tlakaj nemij tekalijtik para tlamachitiskej tlan amo melawak. Ika intlamachtilis kinkajkayawaj in siwamej katlej mach itlaj kimatij, in siwamej kineltokaj porke mach kimatij kiyeyekoaj itlaj tlan kuale porke tentokej de miek tlajtlakole iwan de noch i tlamantle mach kuale katlej kinyoltilana para kichiwaskej ika intlanakayo. ⁷ Yonmej siwamej kiwelitaj kikakiskej itlaj yankuik tlamachtile, pero mach welij kimomakaj kuenta de tlan

melandak. ⁸ Yonmej tlakaj katlej ijkón tlamachtiaj ika tlamachtile mach kuale, kichiwaj no ijkón ken texoxkej (brujojtij) Janes iwan Jambres katlej okinekiaj kixpanawianij in Moisés de tlan okichiwaya ixpan rey. Yonmej tlakaj noijski kixpanawiaj tlan melawak. Kipiaj intlalnamikilis mach kuale iwan mach ok welij kineltokaj itlajtol in toTajtzin Dios. ⁹ Pero mach wejkawaskej, porke nochtin kimomakaskej kuenta nik in yonmej tlakaj san tlakajkayawaj, ijkón ken opanokej nekatej omen texoxkej (brujojtij) katlej okinekiaj kixpanawianij in Moisés, porke noijski san otlakajkayawayaj ika intexoxalis (inbrujojkayo).

Ximoyekketo itech tlan yomitzmachtijkej

¹⁰ Pero tej kuale tikmati tlan nej nitlamachtia iwan kenik ninemi. Tikmati tlan nikneki nikchiwas, tikixmati notlaneltokalis, tikmati nik kuale nikmati nimochia ika itlaj, tikixmati notlasojojtlalis, tikmati kenik niktekipanoa in toTajtzin Dios maski san tlanon ma nipano, ¹¹ tikmati nochti tlan nipan-otiwitz por niktematiltia itlajtol in toTajtzin Dios, ijkón ken tlan onipanok itech weykantin de Antioquía, Iconio iwan Listra, onechtlatlalochtijkej iwan onitlajyowij sa tekitl. Pero in toSeñor Jesucristo nochipa nechmakixtia. ¹² Porke ya nele melawak, nochtin akinmej kinekiskej nemiskej kuale inawak Cristo Jesús, tlajyowiskej sa tekitl porke kintlatlalochtiskej. ¹³ Pero in tlakaj katlej mach kualtin iwan katlej tekajkayajkej, kada tonale yeskej okachi mach kualtin iwan okachi tekajkayawaskej, iwan ok tlakajkayajtoskej, porke yejwan noijski yokinkajkayaj in Satanás.

¹⁴ Pero tej ximoyekketo itech tlan yomitzmachtijkej iwan itech tlan yotikmokawij itech motzontekon. Ya tikmati nik melawak tlan omitzmachtijkej, porke noijski tikmati akinmej omitzmachtijkej. ¹⁵ Xikelnamiki nik desde tichokkoj tikixmati in tiotlajkuilole, katlej omitzititij kenik welis titlaneltokas inawak Cristo Jesús para mitzmakixtis. ¹⁶ Dios okichij ma kijkuijukan itlajtol nochti tlan axan kajki ijkuitol itech tiotlajkuilole. Iwan nochti itlajtol kuale para techmachtis tlan melawak, para ma tikmomakakan kuenta de tlan mach kuale tikchiwaj, para techmelawas, iwan para techpalewis kenik Dios kineki ma tiekan. ¹⁷ Para ijkón, nochtin in tlaneltokakej de Dios ma yekan melawak moesojkej para kichiwaskej nochti tlamantle tlan kuale.

4

Xiktematilti itlajtol in Dios

¹ Ixpan Dios iwan ixpan toSeñor Jesucristo, katlej kinmixkomakas (kintzonmanas) katlej yolitokej iwan katlej

yomikkej, nijuak witz iwan tlanawatis kej Rey, nej nimitznawatia ² xiktematilti itlajtol toTajtzin Dios. Xikchiwa nijuak kinekiskej mitzkakiliskej, iwan noijki nijuak mach kinekiskej mitzkakiliskej. Xikinyekilwi ika itlajtol in Dios nijuak mach kuale nik katej, xikinmajwa nijuak moneki, xikinmaka se tlajtole ika kuale. Amo keman xikualani innawak, sino xikinmacht ika itlajtol in toTajtzin Dios. ³ Porke ajsis tonale nijuak in tlakaj mach ok kinekiskej kikakiskej katlej kuale tiotlamachtile. Sino, yej kikakiskej san tlan yejwan kinpaktis. Iwan kintemoskej tlakaj para ma kinmachtikan san tlan yejwan kinekiskej kikakiskej. ⁴ Mach kikakiskej tlan melawak, sino yej kinkakiskej tlajtoltin katlej mach melawak katlej san de tlakaj intlayejeyskol. ⁵ Pero tej nochipa xikpia kuale motlalnamikilis, xixiko nochi in tlajyowilistle, xiktematilti itlajtol in toTajtzin Dios, xikchiwa nochi in tekitl katlej Dios omitzmakak.

⁶ Mach ok wejkawitl ya nimikis. Ya nechtemaktiskej (nechtemaktiliskej) kej se tlamanale inawak Dios iwan ya nias kan Yej kajki. ⁷ Pero nej, onieka kej se kuale soldado katlej yotlatlanke itech guerra, yoniktlamij in tekitl katlej omonekia nikchiwani, iwan mach semi onikaj tlan onikneltokak. ⁸ Axan nikchia nechmakaskej ompa ilwikak se korona porke onikpixke nonemilis chipawak. In toSeñor, katlej kijtos akin tlajtlakolej iwan akin amo, Yej nechmakas in korona itech nekáj weyi tonale nijuak oksemi witz. Iwan amo san yen nej nechmakas, sino noijki kinmakas noctin katlej sa kichixtokej ma wiki.

Pablo okilwij in Timoteo ma kitati

⁹ Xikchiwa de xiwiki san niman xinechitaki. ¹⁰ Porke Demas yonechkajtej iwan yoyáj para Tesalónica, porke okachi kiwelita in tlamatle katlej onkaj ixko yin tlaltikpak. Crescente yoyáj itech estado de Galacia, iwan Tito oyáj itech estado de Dalmacia. ¹¹ Sa yen Lucas nowan kajki. Xiktemo in Marcos iwan xikkualwika, porke welis nechpalewis para niktekipanos in toTajtzin Dios. ¹² In Tíquico oniktitlanke itech weyikan de Éfeso. ¹³ Nijuak tiwitz, xinechwalkuili nokoton katlej onikualkajtej ompa itech weyikan de Troas ichan Carpo. Noijki xinechinwalkuili nolibrojwan, pero okachi nikneki xinechinwalkuili noamawan katlej okachi nikinneki.

¹⁴ Alejandro, katlej teposwitekke (teposyektlalij) onechtoktij miek tlamatle mach kuale. In Señor kitlajyowiltis por yen tlan onechtoktij. ¹⁵ Tej ximotlachili de yej, porke sa tekitl techkokolia porke mach kiwelita tlan titlamachtiaj.

¹⁶ Nijkuak yakinika onimotlajtolpalewij inyakapan tekiwajkej, mach akaj onechpalewij. Nochtin onechkajtejkej noselti. In toTajtzin Dios amo ma kintlajyowilti por yon. ¹⁷ Pero Dios onechpalewij iwan onechmakak chikawalistle para oniwelik oniktematiltij in kuale tlajtole katlej temakixtia para ma kikakikan in tlakaj katlej mach judiojtin. Ijkón Dios onechmakixtij iwan mach onechmiktijkej. ¹⁸ In Señor nechmakixtis de itech nochi tlan amo kuale iwan nechwikas ompa ilwikak kan Yej tlanawatia. Dios ma kipia weyikixtilistle nochipa. Ijkón ma yeto.

Pablo okonintlajpaloj iwan okonintiochij in tokniwan tlaneltokakej

¹⁹ Ompa xikonintlajpaloo in Prisca iwan Aquila, iwan ifamilia in Onesíforo. ²⁰ Erasto omokaj itech weyikan de Corinto, iwan Trófimo onikualkajtej kokoxke itech weyikan de Mileto. ²¹ Xikchiwa de xiwiki antes de pewas sewas. Mitzontlajpalooaj in Eubulo, Pudente, Lino, Claudia iwan nochtin in tokniwan tlaneltokakej.

²² Ma yeto ipan moyolo in toSeñor Jesucristo, iwan Dios ma amechtiochiwa aminochtin ika iteiknotlamachilis. Ijkón ma yeto.

SAN PABLO ITLATITLANIL IN DIOS OKITLAJKUILILIJ IN TITO

Pablo okitlajkuililij in Tito

¹ Nej niPablo, nitekipanoj de Dios iwan nitlatitlanile de Jesucristo. Jesucristo onechtlalij ma niktematilti itlajtol para ijkón ma tlaneltokakan nekatej katlej Dios yokinpe-jpenke, iwan para ma kimatikan tlan melawak de yen totiotlamachtil, ² iwan para kichiaskej in yankuik nemilistle katlej mach keman tlamic. Dios, katlej mach tlakajkayawa, yotechkakitij nik techmakas in yon nemilistle desde antes de yeni in tlaltikpak. ³ Iwan axan yoajsiko yon tonale iwan yotechnextilij in yon yankuik nemilistle por medio de itlajtol, katlej Dios toTemakixtij onechnawatij ma niktematilti. ⁴ Tito, nimitzikuililia yin amatl, porke tej tikaj kej tinokone porke tikpiaj san se tlaneltokalistle inawak Dios. ToPapan Dios iwan toTemakixtij Jesucristo ma mitzmakakan intlatiochi-walis, inteiknotlamachilis iwan inyolosewilis.

Kenik moneki se yetos tlayekanke de tiopan

⁵ Nijuak onimitzkajtej itech tlale katlej pankistok itech atl itoka Creta, onimitzkajtej para xikyektlali sekín tlaman-tle katlej opoliwia para moyektlalis. Onimitzilwij xikintlali tlayekankej de tiopan itech kada pueblo, ijkón ken nej onim-itznawatij. ⁶ Se tlayekanke de tiopan moneki chipawkane-mis para amakaj welis kistlakawis de itlaj. Ma kipia san se isiwa. Ma kinpia ipilwan tlaneltokakej katlej mach akaj welis kinmistlakawis de itlaj mach kuale, iwan ma yekan tetlakitakej. ⁷ Se tlayekanke de tiopan katlej kitekipanoa in toTajtzin Dios, moneki ma chipawkanemi para amakaj welis kistlakawis de itlaj. Amo ma moweyineki, amo ma kualani san ika itlaj tzikitzin, amo ma yeto tlawanke, amo ma yeto tenonotzke, nion amo ma yeto tominpitzotl. ⁸ Sino, moneki ma kipia pakilistle de kinkalotis in tokniwan itech ichan, ma kiwelita kichiwas tlan kuale, ma kipia kuale itzontekon, ma kímati ma kichiwa tlan kuale, ma yeto yolchipawak iwan ma kímati ma kimoxikolti para amo kichiwas tlan amo kuale. ⁹ Se tlayekanke de tiopan moneki mokitzkijtos itech katlej melawak tlamachtile katlej yokimachtijkej. Para ijkón welis kinyolojchikawas in tokniwan ika yon tlamachtile iwan welis kinnankilis katlej kijtaj mach iksi tlan se tlamachtia.

¹⁰ Porke katej miekej katlej mach tetlakitakej, tlapoaj ika tontojyotl iwan tlakajkayawaj. Ijkón ken kichiwaj miekej

judiojtin.¹¹ Yonmej moneki se kinkamatzakuas, porke kinkuatlapololtiaj in tlakaj ika noch i insiwawan iwan in pilwan, kinmachtiaj tlan amo kuale iwan ijkón welij kitlanij miek tomin, iwan nion mach kimatij pinawaj de tlan kichiwaj.

¹² Se profeta de ompa Creta okijtoj: "In tlakaj de Creta sa tekitl tekajkayajkej, katej kej yeskia yolkamej mach kualtin, san puro tlakuaj iwan tlaztiwkej."¹³ Melawak tlan okijtoj. Por yonik, xikinmajwa chikawak, para kuale ma tlaneltokakan inawak Dios ken moneki¹⁴ iwan ayakmo ma kinneltokilikan inkuentojwan in judiojtin porke yejwan tlamachtiaj san tlan yejwan kiyejyekoaj, iwan nion mach ma kinneltokilikan intlanawatil de nekatej tlakaj katlej mach ok katej itech tlan melawak.

¹⁵ Para katlej kipiaj inyolo chipawak, para yejwan noch tlamanle kajki chipawak. Pero para katlej mach tlaneltokaj iwan mach kipiaj inyolo chipawak, para yejwan mach itlaj onkaj chipawak. Porke asta intlanamikilis iwan inyolo kinmilwia mach itlaj onkaj chipawak.¹⁶ Yejwan kijtaj kixmatij in Dios, pero por yen tlan kichiwaj mota nik mach melawak. Porke kichiwaj tlan Dios mach kiwelita iwan mach kineltokilijaij itlajtol, iwan nion mach welij kichiwaj nion itlaj tlamanle kuale.

2

Tlamachtile katlej kuale

¹ Pero tlan tej tikijtos ma yeto ijkón ken kijta in kuale tiotlamachtile.² Xikinmilwi in tetajtzitzintin tla itlaj kijtoskej o noso tla itlaj kichiwaskej ma yeto ipan melajka, kuale ma mowikakan para ma kintlakitakan iwan ma kipiakan kuale intlayeheyekol. Ma kipiakan kuale intlaneltokalis, ma tetlasojtlakan iwan ma kixikokan noch tlan panoskej.³ In tenantzitzintin noijki ma yekan tetlakitakej, amo ma yekan tlajtolerajtin, nion amo ma tlawantinemikan. Sino ma kiteitikan tlan kuale,⁴ para ma kinmititikan ichpokamej kenik kintlasojtlaskej inmokichwan iwan kenik kintlasojtlaskej in pilwan.⁵ Noijki ma kinmititikan ma kipiakan kuale intlayeheyekol, ma yekan yolchipawakej, ma kixkawikan (ma kinmomeli) intekiw itech inchan, ma yekan kualtin tlakaj, ma kintlakitakan inmokichwan, para ijkón amakaj ma kijto itlaj mach kuale de itlajtol in Dios.

⁶ Noijki xikinyolchikawa in telpokamej de ma kipiakan kuale intlayeheyekol,⁷ iwan noijki tej monewian xikinmititi kuale ejemplo de noch tlamanle kuale. Nijuak tkinmachtis, xikinmacht itech tlan melawak itlamachtil in Dios iwan xikinmacht ika noch moyolo.⁸ Kuale xikintlapowi

para amakaj ma tlajto mach kuale de tlan tej tikijtos. Ijkón, nekatej katlej mach tикипактија pinawaskej porke mach itlaj welis kijtoskej de tejwan katlej titlaneltokakej.

⁹ Xikinnajnawati in tekipanojkej tlanamaktin ma kintlakitakan intekowan. Ma kichiwakan ika kuale inyolo tlan kinnawatiaj iwan amo ma tlananankilikan. ¹⁰ Amo ma tlachtekikan, sino ma kichiwakan tlan kuale para inteko ma kipia konfiansa innawak. Ijkón, nochtin kinekiskej kineltokaskej in toTajzin Dios toTemakixtij por yen nochi tlan kuale kichiwaj itekipanojkawan.

¹¹ Dios yokinextiko iteiknotlamachilis itech nochtin in tlaltikpaktlakaj, iwan ika yon iteiknotlamachilis welis kinmakixtis nochtin. ¹² Iwan iteiknotlamachilis techmachtia ma tikkawakan nochi tlan amo kuale iwan nochi tlan se kiyoltiana de tlan onkaj ixko yin tlaltikpak. Noijki techmachtia de kuale ma timowikakan, ma tikchiwakan tlan kuale iwan ma timotemaktikan inawak Dios, mientras tine mij ixko yin tlaltikpak. ¹³ Noijki techmachtia ma tikchixtovan ika pakilstle nekáj weyi tonale katlej tikchiaj. Itech nekáj weyi tonale witz imawisotlanex in toweyi Dios toTemakixtij Jesucristo. ¹⁴ Jesucristo omotemaktij (omotemaktilij) ma kimiktikan por tejwan, para techmakixtis de nochi totlajtlakol, iwan para techyolchipawas de nochi tlajtlajkole iwan ijkón welis tipowiskej iaxkawan, iwan para welis tiknekiskej tikchiwaskej nochi tlan kuale.

¹⁵ Yen yin tlan moneki xitlamachti, xikinnajnawati iwan xikinmajwa porke tej tikpia tlanawatile para ijkón tikchiwas. Amakaj ma mitzixpanawi.

3

Ijkín moneki nik yeskej in tlaneltokakej

¹ Xikinmelnamikti nochtin in tlaneltokakej ma tetlakitakan inawak gobierno iwan innawak tekiwajkej, ma kintlakakilikan, iwan ma kinekikan ma kichiwakan itlaj tlamantle kuale. ² Amo ma tlajtokan mach kuale de akaj, nion amo ma kiwelitakan momagaskej (momakaskej), sino ma yekan yolyamankej iwan ma kitechiwilikan tlan kuale.

³ Porke tejwan achtoj noijki mach otikpiayaj tlalnamiklistle iwan mach otiekaj titetlakitakej inawak Dios. Otimopolojtinemiaj iwan otechyoltilanaya nochi tlamantle katlej okinekia iwan okiwellitaya in totlalnakayo. Otinemiaj itech nochi tlamantle mach kuale iwan itech nexikolistle. Otechkokoliayaj iwan otitekokoliayaj. ⁴ Pero nikuak in Dios toTemakixtij okinnextilij nochtin in tlaltikpaktlakaj itlasojojtialis iwan iteiknotlamachilis,⁵ ikuakón otechmakixtij. Amo por otikchijkej itlaj tlan kuale, sino porke Dios

otechiknomatke iwan otechpakke de totlajtlakolwan iwan otechmakak se yankuik nemilistle ika iEspíritu Santo. ⁶ Dios otechnokilij miek iEspíritu Santo por yen tlan okichij in toTemakixtij Jesucristo. ⁷ Ika yon iteiknotlamachilis in toTajtzin Dios, axan ya tikatej kuale inawak iwan mach ok tikpiaj itlaj tlajtlakole. Iwan ijkón ya welis tikpiaskej in yankuik nemilistle katlej mach keman tlamis katlej tikchixtokej tikpiaskej se tonale.

⁸ Nochi yin melawak, iwan nikneki sa tekitl xikintlapowi de yin tlamantle, para ijkón katlej kineltokaj in toTajtzin Dios ma kixkawikan (ma momelikaj) de ma kichiwakan tlan kuale. Yin tlamantle sa tekitl kuale iwan kinpalewis nochtin in tlakaj. ⁹ Pero amo xitlananankilijtinemi ika itlaj tlamantle katlej mach itlaj ipatij. Amo xitlananankilijtinemi itech tlan achtoj otlapanok de yen ya wejkawitl toweyitajwan, nion amo titewan ximokualanijtinemi iwan amo xitlananankilijtinemi itech itlanawatil in Moisés. Nochi yon mach itlaj ipatij iwan nion mach tepalewij.

¹⁰ Tla akaj kinxelosneki in tlaneltokakej, xiknajnawati semi o noso ojpa para mach ok ijkón ma kichiwa, iwan tla amo mitzkakilia, mach ok amowan ma yeto. ¹¹ Porke ika yon, ya tikmatis nik in yon tlakatl kitlalia se lado tlan kuale iwan inewian kichiwa tlajtlakole. Porke kuale kinati nik mach kuale tlan kichiwa.

Tlan Pablo okinawatij ma kichiwa in Tito

¹² Nijuak nimitztitlanilis Artemas o noso Tíquico, ximoyolojchikawa de xiwiki xinechitaki itech pueblo de Nicópolis, porke yonikijtoj ompa nietos nijuak sewas. ¹³ Xikpalewi in lisensiado Zenas ika nochitlan tiwelis, iwan noijski xikpalewi in Apolos, para kipiaskej nochitlan kinekiskej para welis kiseguiroskej inmojwi, para amitlaj ma kinpolo. ¹⁴ Iwan tokniwan noijski ma momachtikan ma kichiwakan tlan kuale iwan ma tlapalewikan ika itlaj tlan moneki, para ijkón innemilis ma serbiro.

Pablo okonintlajpaloj iwan okonintiochij in tokniwan

¹⁵ Nochtin katlej nian katej nowan mitzontlajpaloj. Ompa xinechonintlajpalili in totetlaso jkaikniwan tlaneltokakej. Ma Dios amechtiochiwa aminochtin. Ijkón ma yeto.

SAN PABLO ITLATITLANIL IN DIOS OKITLAJKUILILIJ IN FILEMÓN

Pablo okitlajkuililij in Filemón

¹ Nej niPablo, nitzaktok telpiloyan, nitzaktok porke niktekipanoa in Cristo Jesús. Nikaj iwan tokni Timoteo iwan san sekan timitztlajkuililiaj tejwatzin titotetlasojkaikni Filemón, tejwatzin noijki titekipanoj ken tejwan. ² Noijki tiktlajkuililiaj in tokni siwatl Apia, iwan tokni Arquipo katlej kajki kej soldado de Dios ken tejwan noijki tikatej. Iwan noijki tikintlajkuililiaj nochtin in tokniwan tiopantlaneltokakej katlej mololoaj mochan. ³ ToPapan Dios iwan toSeñor Jesucristo ma amechtiochiwa iwan ma amechmaka yolosewilistle.

Pablo okijtoj kuale tlaneltoka in Filemón iwan kuale tetlaso-jtla

⁴ Nochipa niktlajsojkamachilia noTeko Dios nikuak nimitzelnamiki itech notiotzajtzilis tejwatzin Filemón, ⁵ porke nechilwiaj nik tikpia tlasojtlalistle iwan tlaneltokalistle inawak toSeñor Jesús, iwan innawak nochtin katlej iaxkawan Dios. ⁶ Niktlajtlanilia toTajtzin Dios ke nochtin katlej otikintlaneltokitij ika motlaneltokalis, ma kuale kimomakakan kuenta nochti in tlatiochiwalistle katlej Cristo Jesús otechmakak. ⁷ Tejwatzin nokni, motlasojtlalis nechmaka miek pakilistle iwan yolosewilistle porke ika otikinyolchikaj in tokniwan katlej iaxkawan Dios.

Pablo okitlajtlanke se favor para yen Onésimo

⁸ Por yonik, maski inawak Cristo nikpia derecho como nitlatitlanile para nimitznawatis tlan moneki tikchiwas, ⁹ okachi kuale nikneki nimitztlajtlanilis ika tlasojtlalistle. Nej, niPablo, ya nitetajtzin iwan axan nitzaktok telpiloyan por yen Jesucristo. ¹⁰ Nimitztlatlawtia por yen Onésimo, katlej omochij kej nokone porke oniktlapowij de itlajtol in Dios nian kan nitzaktok iwan yej okineltokak.

¹¹ Achtoj, itech nekatej tonaltin, Onésimo oyeka se tlana-maktele katlej mach itlaj owelia okichiwaya iwan mach owelia omitzpalewiaya, pero axan yej kuale nechpalewia iwan tejwatzin noijki kuale mitzpalewis. ¹² Nimitztlanilia oksemi in Onésimo, katlej sa tekitl niktlasojtla. Kuale xikresibiro kej yeskia yen nej tinechresibiroa. ¹³ Nej niknekiskia nian ma mokawa nowan para ma nechpalewijo ma mitzpatkayoti, mientras nian nitzaktok telpiloyan por yen kuale tlajtote katlej temakixtia. ¹⁴ Pero mach itlaj nikneki nikchiwas

tla tejwatzin mach mitzpaaktia. Tlan nej nimitzlatlawtia xikchiwa, xikchiwa ika mopakilis, mach nikneki xikchiwa tla tejwatzin amo tikneki.¹⁵ Xamo omitzcholilijka in Onésimo kanaj keski tonale para satepan mowan yetos iktlanke (ik tlami),¹⁶ pero axan mach ok tikpias kej se tlanamakte, sino kej itlaj katlej okachi kuale iwan amo kej tlanamakte, kijtosneki kej se motetlasojkaikni. Nej sa tekitl niktlasojtla, pero tejwatzin moneki okachi xiktlasojtla, amo san kej yeskia tiktласojtla akaj oksé tlakatl sino moneki tiktласojtla kej se tokni inawak toSeñor.

¹⁷ Ijkón kiné, tla melawak tkiyejyekoa nik tisepantekipano-jkej inawak Dios, xikresibiro in Onésimo kej yeskia yen nej tinechresibiroa.¹⁸ Tla itlaj omitztoktij mach kuale, o noso tla itlaj mitzwikilia, nej nimitztlaxtlawilis.¹⁹ Nej, niPablo, nikikuiloa yin amatl ika noma, para ijkón noijki xikmati nik yen nej nimitztlaxtlawilis tla itlaj mitzwikilia in tokni Onésimo, maski welis nimitzelnamiktis nik in tejwatzin noi-jki tinechwikilia asta yen moanima.²⁰ Ijkón kiné, nokni, nimitzlatlawtia xinechchiwili yin tlan nimitzilwia porke tej titlaneltokak inawak toSeñor. Xinechmaka pakilistle ipan noyolo porke tejwatzin tinokni inawak Cristo.

²¹ Nimitztlajkuililia porke nikmati nik tikchiwas tlan nimitztlajtlanilia, iwan kuale nikmati nik tikchiwas asta okachi de tlan nimitztlajtlanilia.²² Noijki xikyejtlali se lugar kan ni-etros ompa mochan, porke nikchia nik in Dios amechnankilis ika namotiotzajtzilis para nikisas de ijtik yin telpiloyan, iwan nechkawilis ma niwia ma namechitati.

Oksekimej tokniwan noijki okontlajpalojkej in Filemón

²³ Noijki mitzontlajpaloa in tokni Epafras, katlej nowan tzaktok porke yej noijki kitematiltia itlajtol in Cristo Jesús.²⁴ Noijki mitzontlajpaloj in Marcos, Aristarco, Demas iwan Lucas, katlej nowan tekipanoaj inawak Dios.

²⁵ In toSeñor Jesucristo ma amechtiochiwa miek ipan namoyolo. Ijkón ma yeto.

YIN AMATLAJKUIOLE OMIJKUILOJ PARA YEN TLANELTOKAKEJ HEBREOS

Dios technotza por medio de iKone Jesucristo

¹ Ya wejkawitl in toTajtzin Dios okintlapowij miek buelta in ya wejkawitl toweyitajwan por medio de yen profeta-jtin. Iwan tlatlamantle nik okintlapowij. Okemantia okintlapowiaya por medio de se temiktle, iwan okemantia okinmititiaya itlaj tlamantle kej yeskia okiteemikiaj, iwan noijki okintlapowiaya ika oksekin tlamantle. ² Pero axan itech yinmej ya iyakatlanka tonaltin, Dios techtlapowia por medio de iKone, katlej okimaktilij nochi tlamantle tlan onkaj iwan por yen iKone okichij in ilwikak iwan tlaltikpak. ³ Yon iKone yen imawisotlanex in Dios, iwan iKone techtititia kenamij in Dios. Yon iKone kinawatia nochi tlamantle tlan onkaj itech ilwikak iwan ipan tlaltikpak para ma mochiwa ijkón ken Yej kijta ika itlajtol, porke itlajtol kipia poder. Yej omikke iwan otechpajpkakke de totlajtlakol, iwan satepan omotlalij ik iyekma in toTajtzin Dios ompa ilwikak kan tlanawatia.

iKone in toTajtzin Dios okachi weyikistok (weyititok) iwan amo ken angelestin

⁴ IKone in toTajtzin Dios okachi weyikistok (weyititok) iwan amo ken angelestin, iwan okiresibiroj se weyi tekiwajkayotl katlej toTajtzin Dios okimakak. ⁵ Porke toTajtzin Dios mach semi okilwij akaj ángel:

Tej tinoKone.

Axan Nej nimoPapan.

Nion mach okilwij akaj ángel:

Nej nietos iPapan,

iwan yej yetos noKone.

⁶ Iwan noijki, nikuak in toTajtzin Dios okualtitlanke iKone yankuiotl ixko yin tlaltikpak, okijtoj:

Nochtin iangelwan Dios ma kiweyikixtikan.

⁷ Pero de yen angelestin, kijta:

Kintoktia in angelestin ma yekan ken ejekatl,

iwan itekipanojkawan kintoktia ma yekan ken itliyo in titl.

⁸ Pero de yen iKone, kijta:

Tejwatzin Dios, titlanawatis iktlanke (ik tlami).

Tejwatzin titlanawatia sa tekitl kuale iwan ipan melajka,
porke nochtin tikinchiwilia ijkón ken moneki.

⁹ Mitzpaktia nochi tlan kuale iwan mach mitzpaktia tlan amo kuale.

Por yonik in Dios, katlej moDios, omitzmakak okachi miek pakilistle iwan amo ken mokompañeroswan.

¹⁰ Iwan noijki kijta:

Tejwatzin Señor, nikuak mach ya itlaj oyeka, otikchij in tlaltikpak,

iwan ika moma otikchij in ilwikak.

¹¹ Nochi tlan otikchij se tonale tlamis, pero tejwatzin, tietos iktlanke (ik tlami).

Nochi tlamantle tlan onkaj tlajtlamis ken nikuak tlajtlami se tzotzole.

¹² Tikkuekuelpachos kej se tzotzole,

iwan tikpatlas ken nikuak se motzotzolpatla.

Pero tejwatzin mach keman timopatla,

iwan monemilis mach keman tlamis.

¹³ Dios mach keman okilwij nion se ángel:

Ximotlali ik noyekma, asta iikuak Nej nimitztlalis titlayekanke de yejwan katlej mitzkokoliaj.

¹⁴ Nochtin angelestín yejwan san espíritus katlej kitekipanoaj in toTajzin Dios, iwan Dios kintitlani para ma kinpalewikan katlej Yej yokinpejpenke para kinmakixtis de intlajtlakol.

2

Ma tikchiwakan kuenta tlan Dios okichij para otechmakixtij

¹ Por yonik moneki okachi ma tiktlalikan kuidado de yen tlajtole katlej yotikkakej, para amo timopoloskej de itech iojwi in toTajzin Dios. ² Tikmatij nik in tlanawatiltin katlej Dios okintemakak ya wejkawitl por medio de yen angelestín omochij ijkón ken okijtoaya in tlanawatile, iwan akinmej amo okineltokakej in yonmej tlanawatiltin iwan otlajtlakojkej, yejwan otlajyowijkej ken omonekia. ³ Toneses, ¿kenik welis timomakixtiskej de itech ikualanilis in Dios tla amo tikchiwaskej kuenta tlan Dios yokichij por tejwan para otechmakixtij? Porke achtoj yen toSeñor Jesucristo okinmilwij in tlakaj nik techmakixtis de totlajtlakol, iwan satepan in tlakaj katlej ijkón okikakej noijki otechmatiltijkej nik techmakixtis. ⁴ Dios noijki otechmatiltij nik in yon melawak, otechmatiltij ika tlamawisoltin, ika señalestin, ika miekej milagrostin, iwan ika poder katlej kitemaka in Espíritu Santo ijkón ken Dios kimonekiltia kitemaka.

Cristo omochij tlakatl para techmakixtis

⁵ Dios mach okintlalij in angelestín para ma tlanawatikan itech nekáj tlaltikpak katlej satepan yetos. ⁶ Sino, se lado itech tiotlajkuilole akaj ijkín okijtoj:

¿Tlan ipatij in tlakatl, tejwatzin Dios, como para xikchiwa kuuenta?

O noso, ¿tlan ipatij in tlakatl, como para ximotekipachoj por yej?

⁷ San kanaj keski tonale tejwatzin otikchij in tlakatl okachi tzikitzin ke yen angelestин.

Pero otikchij ma weyikisto (weyitito) iwan ma kitlakitakan, iwan otiktlalij ma tlanawati itech nochi tlamantle tlan otikchij.

⁸ Nochi tlamantle tlan otikchij otikmakak yen tlakatl ma kinawati.

Toneses, tla Dios okimakak in tlakatl nochi tlamantle ma kinawati, kijtosneki mach onkaj nion itlaj tlamantle katlej amo ma kinawati. Pero mach ya tikitaj ya kinawatia nochi tlamantle porke ayamo ajsi in tonale para ijkón tlapanos.

⁹ Pero tikitaj ke Jesús, katlej Dios okitlalij okachi tzikitzin ke yen angelestин san kanaj keski tonale, axan Yej okachi weyikistok (weyititok) iwan okachi kitlakitaj porke otlajyowij iwan omikke. Dios ika weyi iteiknotlamachilis ijkón okichij ma pano in toSeñor Jesús por tinochtin tejwan titlaltikpaktlakaj.

¹⁰ Ijkón omonekia kichiwas in Dios, porke nochi tlamantle tlan onkaj okichij para Yej. Iwan por Yej onkaj nochi tlan okichij. Yej okinekke kinwalwikas miekej ipilwan para ma yekan itech imawisotlanex. Iwan por yonik Dios okikawilij in Jesús ma tlajyowi, para ijkón omochij se kuale tlayekanke katlej welis techmakixtis de totlajtlakol. ¹¹ Tejwan katlej Jesús yotechchipaj, Yej iwan tejwan tikpiaj san se toPapan. Iwan por yonik in Jesús mach pinawa de technotza tiikniwan.

¹² Jesús kilwia iPapan, ijkín:

Nikintlapowis nokniwan de tejwatzin, iwan nimitzweyikixtis ika tlakuikale kan mololoaj in tlaneltokakej.

¹³ Noijki kijta:

Niktlalis notlaneltokalis inawak Dios.

Iwan noijki kijta:

Nian nikaj inwan ikonewan Dios katlej onechinmakak.

¹⁴ Toneses, tejwan katlej titekonewan de Dios, tinochtin tikpiaj totlalnakayo iwan toomio. Iwan Jesús noijki okipixke itlalnakayo iwan iomio ijkón ken tejwan tikpiaj, para ijkón owelik okitlanke ika imikilis katlej okipiaya poder para temiktis, kijtosneki yen diablo. ¹⁵ Jesús ovalaj ken se tlakatl para ke nochtin in tlakaj katlej nochipa omomawtiayaj mikiskej ayakmo ma momawtikan. Yon kej yeskia okintonke de kan oilpitokaj. ¹⁶ Kuale tikmatij nik in Jesús mach ovalaj okinpalewiko in angelestин, sino ovalaj okinpalewiko iwejkaixwiwan in Abraham. ¹⁷ Iwan por yonik in Jesús

okipiaya de yetos ijkón ken tejwan, tiikniwan. Para ijkón owelik omochij weyi tiopixke katlej teiknomatke iwan kichiwa nochí tlan Dios kineki. Jesús omochij tlakatl para ijkón owelik omotemaktij (omotemaktilij) ijkón ken níjkuak okimiktiliayaj se yolkatl in toTajtzin Dios para okintlapojpolwiaya in tlakaj, Jesús no ijkón omotemakak para owelik otechtlajt-lakolkixtij tejwan katlej tikatej kej ipueblo. ¹⁸ Jesús noijsi otlajyowij iwan in Amo Kuale Tlakatl okinekia kitoktiani ma tlajtlako, por yonik in Jesús axan kuale kimati kenamij tikmachiliaj níjkuak titlajyowiaj iwan níjkuak in Amo Kuale Tlakatl techyoltilana para ma titlajtlakokan, iwan axan noijsi in Jesús welis techpalewis porke Yej kipia poder.

3

Jesús okachi weyikistok (weyititok) iwan amo ken Moisés

¹ Por yonik, nokniwan, namejwan katlej anchipawakej, Dios oamechnotzke para xiekan iaxkawan, por yonik namotlayejyekolis ma yelo inawak Cristo Jesús. Dios okiwaltitlanke in Jesús ixko yin tlaltikpak para ma yelo yen toweyi tiopixke para ma techpalewi tejwan katlej titlaneltokaj inawak. ² Jesús okichij nochí in tekitl de weyi tiopixke katlej Dios okimakak ma kichiwa, ijkón ken Moisés noijsi okichij nochí in tekitl katlej Dios okimakak ma kichiwa innawak in tlakaj de Israel, katlej katej kej ifamilia in toTajtzin Dios. ³ Pero moneki okachi tikweyikixtiskej in Jesús iwan amo yen Moisés. Porke akin kichiwa se kale, okachi kiweyikixtiaj in kalchij iwan amo yen kale. ⁴ Kada se kale kichiwa akaj tlakatl, pero Dios yen kichiwa nochí tlan onkaj. ⁵ Moisés okitlakitatej kej se kuale tekipanoj porke okichij nochí in tekitl katlej Dios okimakak ma kichiwa innawak in tlakaj de Israel katlej katej kej ifamilia in toTajtzin Dios, iwan okijtoj tlanon Dios kichiwas satepan. ⁶ Pero Cristo mach san tekipanoj, sino Yej iKone in Dios iwan okichij nochí tlan Dios okilwij ma kichiwa itech ikonewan Dios. Iwan ikonewan Dios yen tejwan tla melawak titlaneltokatoskej iktlanke (ik tlami), iwan tla melawak tikmatij tikchiaj ika pakilistle tlan Dios techmakas satepan.

Ikonewan Dios mosewiskej inawak

⁷ Por yonik, ken kijta in Espíritu Santo itech tiotlajkuilole: Tla namejwan axan annechkakiliskej notlajtol,
⁸ mach anyoltakuawaskej ken nekatej katlej onechixnamikej
 ne kan tlawaki,
 iwan okajkej se lado tlan onikinmilwij iwan por yonik
 onechkualanijkej.
⁹ Ompa kan tlawaki in ya wejkawitl namoweyitajwan onech-
 nonotzkej para kitaskej tlanon nikchiwas,

maski ipan omenpoale xiwitl Nej onikinmititij miek tlaman-tle ika nopoder.

¹⁰ Por yonik onikualanke innawak in yonmej tlakaj, iwan onikijtoj: "Yonmej tlakaj nochipa moyolpolojtinemij, iwan mach kinekij kixmatiskej noojwi."

¹¹ Por yonik onikualanke iwan oniksentrallaj onikijtoj, nik mach kalakiskej kan Nej yonitlayektlalij para mosewiskej.

¹² Por yonik, nokniwan, xikpiakan kuidado de amo ankipi-askej namoyolo mach kuale para amo ankikawaskej de ankineltokaskej in toTajtzin Dios, iwan amo anmoxeloskej de inawak Dios katlej yolitok. ¹³ Sino, ximoyolojchikawan nochipa se iwan oksé, mientras ok anwelij, para amo ma amechkajkayawa in tlajtlakole iwan amo ma amechtokti xiyoltlakuawakan. ¹⁴ Porke tla titlaneltokatoskej inawak Dios asta ikuak timikiskej ijkón ken achtoj otitlaneltokakej, tonses in Dios techmakas tlan techtokaroa san sekan iwan Cristo.

¹⁵ Por yonik xikelnamikikan in tiotlajkuilole katlej kijta: Tla axan namejwan annechkakiliaj notlajtol, mach anyoltlakuawaskej ken nekatej katlej onechixnamikej. ¹⁶ ¿Akinmej yonmej katlej okikakej itlajtol in Dios iwan satepan okixnamikej? Pues nochtin katlej Moisés okinkixtij de itech país de Egipto. ¹⁷ ¿Iwan akinmej innawak okualanke in toTajtzin Dios omenpoale xiwitl? Pues innawak nochtin katlej otlajtlakojkej katlej omikkej ne kan tlawaki. ¹⁸ ¿Iwan akinmej okinmilwij in toTajtzin Dios nik mach kalakiskej kan Yej yotlayektlalij para mosewiskej? Pues yejwan katlej mach okitlakitakej. ¹⁹ Tones tkmomakaj kuenta nik in yejwan mach okalakej porke mach okineltokakej tlan Dios okinmilwiaya.

4

¹ Por yonik, mientras tikmatij nik tikalakiskej kan Dios yotlayektlalij para timosewiskej, moneki tikpiaskej kuidado, para amo san kichiwa akaj de amejwan amo welis kalakis.

² Tejwan otechmatiltijkej in kuale tlajtote katlej temakix-tia ijkón ken yejwan noiiki okinmatiltijkej. Pero maski yejwan okikakej yon tlajtote, mach itlaj okinpalewij, porke mach okineltokakej. ³ Pero tejwan, katlej titlaneltokaj, welis tikalakiskej kan Dios yotlayektlalij para timosewiskej. Ijkón ken toTajtzin Dios okijtoj:

Por yonik onikualanke iwan oniksentrallaj onikijtoj, nik mach kalakiskej kan Nej yonitlayektlalij para mosewiskej.

Pero tikmatij ke desde ikuak in Dios okichij in tlaltikpak, desde ikuakón Yej yotlayektlalij iwan axan sa kichixtok ma kalakikan ikonewan kan Yej yotlayektlalij para ma mosewikan. ⁴ Se lado itech in tiotlajkuilole kijta de yen tlan Dios okichij ipan chikome tonale, kijta:

Dios omosewij ipan chikome tonale de nochí tlan okichij.

⁵ Iwan nojki in tiotlajkuilole katlej yonamechilwíj kijta:

Mach kalakiskej kan Nej yonitlayektlalij para mosewiskej.

⁶ Pero melawak nik ok poliwíj kalakiskej oksekimej kan Dios yotlayektlalij para mosewiskej, pero katlej achtoj okikakej in kuale tlajtole katlej temakixtia mach okalakej porke mach okineltokakej. ⁷ Por yonik, Dios okitlalij oksé tonale, kijtosneki yen axan. Dios otlapoj de yin tonale miek xiwitl satepan, Dios okijtoj itech iten in rey David tlan achtoj ya onamechilwíj:

Tla namejwan axan annechkakiliskej notlajtol,
mach anyoltlakuawaskej.

⁸ Tla Josué kinyekanani in tlakaj de Israel kan mosewianij inawak Dios, tones in Dios mach ok techkakitiani de oksé tonale para timosewiskej kan Yej yotlayektlalij.

⁹ Tones tikmatij nik ok poliwi ajsiki oksé tonale nikuak kalakiskej nochtin ikonewan Dios kan Yej yotlayektlalij para mosewiskej. ¹⁰ Tones, nikuak tikalakiskej kan Dios yotlayektlalij para timosewiskej, ikuakón kiné timosewiskej de nochí totekiw ijkón ken toTajtzin Dios nojki omosewij nikuak otlanke okichij in ilwikak iwan tlaltikpak. ¹¹ Moneki, kiné, ma timochijchikawan para tikalakiskej kan Dios yotlayektlalij para timosewiskej, porke tla amo tiktlakitaskej in toTajtzin Dios ijkón ken nekatej tlakaj katlej ya wejkawitl mach okitlakitatej, tones mach tikalakiskej.

¹² Porke itlajtol in Dios yolitok iwan kipia poder para tekipanos ipan toyolo. Okachi tlateki ke se machete katlej kipia ojkan itlatekia, kalaki okachi tlajtik iwan asta kitlapana toanima iwan toespíritu iwan nochí tlan tikpiaj ipan toyolo. Kimati tlanon tikyejyekoaj ipan totlalnamikilis kox kuale o noso amo kuale, iwan kimati tlanon kineki toyolo. ¹³ Nochi tlamantle tlan Dios okichij mach welis motlaatis para amo ma kita in Dios. Dios weli kita nochí tlan tikchiwaj iwan tlan tikyejyekoaj. Iwan tikpiaj de tiktemakaskej kuenta inawak Dios de nochí tlan tikchiwaj.

Jesús yen toweyi tiopixke

¹⁴ Jesús, iKone in toTajtzin Dios, yen toweyi tiopixke katlej okalakke ilwikak kan kajki in toTajtzin Dios. Por yonik, moneki amo tikkawaskej de titlaneltokatoskej inawak toSeñor Jesucristo. ¹⁵ Tikpiaj se toweyi tiopixke katlej techiknomati

porke kimati nik mach tichijchikawakej. Porke nochí tlaman-tle de tlajtlakole noijki okiyoltilanke in Jesús ijkón ken tejwan noijki techyoltilana, pero Yej mach keman otlajtlakoj. ¹⁶ Por yonik, moneki ma timijkuanikan inawak Dios katlej kinawa-tia nochí tlamatle iwan katlej kipia weyi iteiknotlamachilis. Amo ma timomawtikan de tiktajtlaniliskej ma techpalewi, de ma techiknomati iwan de ma kipia iteiknotlamachilis towan. Nijuak tejwan okachi tiknekiskej ma techpalewi ikuakón Yej techpalewis.

5

¹ Kada se weyi tiopixke judío noijki oyeka se tlakatl ken tejwan, iwan okintlajtoliaya in tlakaj inawak Dios iwan yej noijki okinmilwiaya in tlakaj tlan Dios okijoaya. Yon weyi tiopixke okimakaya in toTajtzin Dios inmofrenda in tlakaj ipan artal katlej ika okiweyikixtiayaj, in tiopixke noijki okin-miktiaya yolkamej katlej ika inmeso ika okintlapojpolwiaya nochtin in tlakaj de intlajtlakol. ² Iwan komo in yon weyi tiopixke noijki oyeka mach chikawak no ken tejwan, por yonik in yej noijki okimatia kenik kinpalewis katlej mach itlaj okimatiaj iwan katlej omopolojtokaj. ³ In weyi tiopixke okitlamiktiliya ika yolkamej in toTajtzin Dios para ma kint-lapojojpolwi in tlakaj de intlajtlakol, pero komo yej noijki oyeka mach chikawak no ken tejwan, tones noijki okitlamiktiliya ika yolkamej in toTajtzin Dios para ma kitlapojpolwi noijki.

⁴ Iwan mach akaj mochiwa weyi tiopixke san por yej kineki, sino moneki yen Dios kitlalis, ijkón ken Dios okitlalij in Aarón ma yeto weyi tiopixke. ⁵ Ijkón noijki in Cristo. Mach yen inewian omotlalij para ma yeto weyi tiopixke, sino yen Dios okitlalij. Ijkón ken Dios okilwij:

Tej tinoKone.

Axan Nej nimoPapan.

⁶ Oksé lado itech tiotlajkuilole ijkuitlitok noijki kan okilwij:
Tej nimitztlalia tiTiopixke iktlanke (ik tlami),

ijkón ken oniktlalijka in Melquisedec ma yeto tiopixke.

⁷ Nijuak in Cristo oyeka ixko yin tlaltikpak, omotiotzajtzili-
aya inawak Dios iwan okitlatlawtiaya ma kipalewi. San yen
Dios okipiaya poder para kimakixtis de itech mikilistle. Jesús
omotiotzajtziliaya ika chokilistle iwan omotlatlawtiaya otza-
jtzia chikawak, iwan Dios okinankiliaya porke Jesús nochipa
okitlakitaya in toTajtzin Dios. ⁸ Iwan maski in Cristo Yej iKone
in Dios, okimatke okitlakitak in Dios por yen tlajyowilistle
katlej Yej okipanok. ⁹ Iwan ijkón, Jesús okichij nochí tlan
omonekia kichiwani. Iwan por yonik noijki, axan Yej weli
kinmakixtia iktlanke (ik tlami) nochtin akinmej kineltokaj.

10 Dios okitlalij in Jesús ma yeto weyi tiopixke ijkón ken okitlalijka noijki in Melquisedec ma yeto weyi tiopixke.

Temawtij tla se kikawas de se tlaneltokas inawak Cristo

11 De yon Melquisedec onkaj miek tlamantle katlej moneki namechilwis. Pero sa tekitl owijtitok para namechtomilis porke namejwan mach ankinekij ankikakiskej, iwan por yonik mach ankimomakaj kuenta tlan namechilwia. 12 Porke namejwan ya ankipiaj miek xiwitl de antlaneltokakej, iwan omonekia ya anyenij antlamachtijkej. Pero ok ankinekij ok akaj ma amechmacht de yen tlamantin katlej mach owij para se kimomakas kuenta de itlajtol in Dios. Namejwan ankatej kej ankonemej katlej ok kinekij chichiskej, iwan ayamo an-welij ankikuaj itlaj tlakuale. 13 Porke nocthin tlaneltokakej katlej san kinekij kikakiskej itlajtol in Dios katlej mach owij para se kimomakas kuenta, katej kej konemej katlej ok chichij iwan mach ya kimomakaj kuenta tlan kuale iwan tlan amo kuale. 14 Pero katlej ya wejweyin tlakaj kikuaj nochi tlamantle tlakuale porke ya welij kitekipanoltiaj intlayejye-kolis iwan welij kimomakaj kuenta tlan kuale iwan tlan amo kuale.

6

1 Por yonik, mach ok ma timomachtikan de tlan yakinika otechmachtijkej de Cristo. Ma timoskaltikan itech totlaneltokalis para tieskej ken Jesucristo. Mach ok moneki oksemi ma techmachtikan ken nijuak yakinika otitlaneltokakej. Ken nijuak otechmachtijkej kenik timoyolkuepaskej para mach ok ma tikinchiwakan tlamantin katlej tewikaj itech mikilistle, iwan noijki otechmachtijkej kenik tikneltokaskej in Dios. 2 Noijki otechmachtijkej kenik timokuateekiskej iwan tlan kijtosneki nijuak kintlaliaj inmawan inpan tokniwan. Noijki otechmachtijkej kenik moyolkuiskej (moyolitiskej) in mikkamej, iwan kenik in Dios kinmixkomakas (kintzonmanas) in tlakaj iwan kijtos akinmej tlajyowiskej nochipa. 3 Tla Dios kimonekiltis, timomachtiskej oksekin tlamantle katlej okachi techpalewis ma timoskaltikan itech totlaneltokalis.

4 Porke in tlakaj katlej Dios yokintlawilij ipan inyolo ika itlajtol, iwan yokiresibirojkej ipoder in Dios para kitekipanoskej, iwan yokipixkej in Espíritu Santo ipan inyolo, 5 iwan yokimatkej nik sa tekitl kuale itlajtol in Dios, iwan yokimatkej nik tikpiaskej poder itech nekáj tlaltikpak katlej satepan yetos, 6 tla yonmej tlakaj maski okixmatkej nochi yon tlamantle, kikawaj in toTajtzin Dios, tonses mach ok welis se kinyolochikawas para ma moyolkuepakan. Porke yon kej yeskia oksemi kimajmasoltiaj itech krus iKone in toTajtzin Dios iwan

kipijpinatiaj inmixpan tlakaj. ⁷ Yonmej tlakaj katej ken tlale katlej sa tekitl kiawilo. Tla yon tlale kitlakilia kuale tlakilotl para yen tlakaj katlej kitekipanoaj, toneses in Dios kitiochiwas in yon tlale. ⁸ Pero tla kitlakilia witztle iwan bierojxiwitl, toneses in yon tlale mach itlaj ipatij. Dios kitlajyowiltis iwan satepan kichichinos.

Dios techmakas nochí tlan tikchiaj

⁹ Notetlasojkaikniwan, maski ijkón nikijta de nekatej tlakaj, kuale nikmati nik amejwan ankichiwaskej tlan kuale ijkón ken kichiwaj in tlakaj katlej Dios yokinmakixtij de inflajtlakol. ¹⁰ Dios kimati kinchiwilia nochtin tlan kuale. Mach kelkawas de tlan namejwan ya ankichiijkej iwan tlan ankichirokej para ankinpalewiaj in tokniwan katlej iaxkawan Dios. Iwan ijkón namejwan ankiteititiaj nik melawak ankitlaso-jtlaj in Cristo. ¹¹ Pero nikneki kada de se amejwan ijkón xikchijtokan tlan kuale asta ikuak anmikiskej, iwan ijkón namejwan ankimatiskej nik in Dios amechmakas nochí tlan tikchiaj. ¹² Amo xiekan antlatziwkej, sino xikchiwakan ijkón ken nekatej katlej kiresibiroaj tlan Dios okijtoj techmakas porke yejwan tlaneltokaj iwan kimatij mochiaj.

¹³ Nijuak in Dios okikakitij in Abraham tlanon kimakas, yen Dios inewian ijkón okilwij porke mach onkaj akaj oksé katlej okachi ma weyikisto (ma weyitito) ken Dios como para kijtos “Dios tlachixtok”, sino yen Dios inewian okitemakak itlajtol porke Yej kichiwa tlan kijta. ¹⁴ Iwan Dios okilwij in Abraham: “Ipan melajka nik nimitziochiwas miek iwan nimitzinmakas miekej mowejkaixwiwan.” ¹⁵ Abraham okimatke omochixke iwan ijkón Dios okimakak tlan okilwij. ¹⁶ Nijuak in tlakaj kijtaj itlaj tlamantle iwan tla kinekij kijtoskej nik melawak tlan kijtaj, ikuakón kitenevaj itoka de akaj oksé katlej okachi weyikistok (weyititok) ke yejwan. ¹⁷ Ijkón noijki, Dios okinekke kiteitis nik melawak tlan okijtoj iwan nik mach kipatlas itlajtol de tlan okijtoj techmakas. Dios okijtoj tlanon kichiwas iwan ijkón okichij tlan okijtoj. ¹⁸ Dios otechmakak ome tlamantle katlej mach welis mopatlas. Achtój otechkakitij tlanon techmakas, iwan satepan okijtoj nik kichiwas tlan kijta, porke tikmatij nik in Dios mach tekajkayaj. Iwan ijkón welis timoyolosewiskej tejwan katlej tikneltokaj nik in Dios techmakixtis porke tikmatij nik in Yej kichiwas tlan yotechkakitij. ¹⁹ Iwan tikmatij nik in Dios techmakixtis ijkón ken Yej yokijtoj. Iwan yon kej yeskia tikpiaj in toyolo kuale ilpitok asta ilwikak iwan techwika asta ikuilapan kortina Kan Tlixpantzin kan kajki toTajtzin Dios. ²⁰ Jesúz yokalakke ompa ilwikak yotlayekanke para otechtlapolij ojtle para tejwan noijki ompa tikalakiskej. Iwan

ijkón Jesúس omochij weyi tiopixke iktlanke (ik tlami) ijkón ken oyeka weyi tiopixke in Melquisedec.

7

Jesús yen tiopixke ijkón ken oyeka tiopixke in Melquisedec

¹ Melquisedec oyeka rey de itech weyikan de Salem, iwan oyeka tiopixke de toTajtzin Dios weyikistok. Nijuak Abraham omokuepato de okintlanito in reytin katlej inwan okinmomagato, Melquisedec okiske okinamikito ipan ojtle iwan okitiochij. ² Tones Abraham okimakak in Melquisedec idiesmo de nochí tlan okitlanke kan otémagato. In tokayotl Melquisedec kijtosneki “rey de tlan kuale”. Iwan komo oyeka rey de itech weyikan de Salem, tones noijki kijtosneki “rey de yolosewilistle”. ³ Mach akaj kimati de kan ovalaj in Melquisedec. Mach akaj kimati akin ipapan iwan akin imaman, iwan nion akinmej iweyitajwan. Nion mach akaj kimati keman otlakatke iwan nion keman omikke. Iwan ijkón Melquisedec kajki kej se ejemplo de yen iKone in Dios, katlej axan kajki kej tiopixke para iktlanke (ik tlami).

⁴ Tones, xikmatikan nik sa tekitl oyeka weyikistok (weyititok) in Melquisedec, porke inewian Abraham in ya wejkawitl toweyitaj, okimakak idiesmo de nochí tlan okitlanke kan otémagato (otemakato). ⁵ In tlanawatile de Moisés kijta ke in tiopixkej katlej walajtokej nelwatl de Leví, ma kiresibirokan indiesmo de tlan kipiaj in tlakaj de Israel. In tiopixkej okitlajtlaniaj yon diesmo de tlan okipiayaj maski yejwan iwan tlakaj de Israel nochtin ovalajtokaj nelwatl de Abraham. ⁶ Pero Melquisedec mach ovalajtoka nelwatl de Leví, pero Abraham okimakak yon diesmo. Melquisedec okitiochij in Abraham, iwan yon Abraham yen katlej Dios okilwij tlanon kimakas. ⁷ Tinochtin tikmatij ke katlej okachi weyikistok kitiochiwa katlej mach okachi weyikistok (weyititok). ⁸ In tiopixkej levitas katlej kiresibiroaj diesmo, yejwan san tlaltik-paktlakaj katlej mikij. Pero in tiotlajkuilole kijta nik in Melquisedec yej yolitok. ⁹ Welis tikijtoskej nik in tiopixkej katlej walajtokej nelwatl de Leví, katlej kiresibiroaj diesmo, yejwan noijki okitemakakej indiesmo inawak Melquisedec. Iwan yon ijkón otlamochij nikuak Abraham okitemakak idiesmo inawak Melquisedec. ¹⁰ Welis tikijtoskej ke nikuak Melquisedec okiske okinamikito in Abraham, Leví yoyeka itech itlalnakayo in Abraham.

¹¹ In tlakaj de Israel okiresibirojkej in tlanawatile de Moisés por medio de yen tiopixkej levitas. Pero yon tlanawatile iwan yon tekitl katlej okichiwayaj in tiopixkej mach owelik otechchij tichipawakej de totlajtlakol. Porke tla weliskia

techchipawani de totlajtlakol, tonses in Dios mach ok techwaltitlanili oksé tiopixke kijtosneki yen Cristo. Pero Dios otechwaltitlanilij in Cristo katlej mach walajtok nelwatl de Leví, iwan kipia itiopixkatekiw ken okipixke Melquisedec iwan amo ken okipixke in Aarón.¹² Iwan komo omopatlakej in tiopixkej, noijklí omopatlak in tlanawatile.¹³ Iwan tikmatij nik in Jesucristo de katlej tlapoa in tiotlajkuilole, mach walajtok nelwatl de familia de Leví, sino walajtok nelwatl de oksé familia. Iwan mach akaj de yon familia omochij tiopixke.¹⁴ Iwan tikmatij nik in toSeñor walajtok nelwatl de familia de Judá, iwan itlanawatil in Moisés mach itlaj kijta kox yeskej tiopixkej katlej walajtokej nelwatl de Judá.

¹⁵ Iwan tikkomakaj kuenta nik yomopatlakej in tiopixkej, porke tikitaj nik yowalaj oksé tiopixke ken Melquisedec.¹⁶ Iwan Cristo mach omochij tiopixke kej yeskia otlatkatke de familia de Leví, ijkón ken itlanawatil in Moisés kijta kipia de yeskej tiopixkej katlej walajtokej de yon familia. Sino Yej omochij tiopixke porke kipia poder iwan porke yolitok iktlanke (ik tlami).¹⁷ Porke in tiotlajkuilole kijta tlan Dios okilwij in Cristo:

Tej tietos titiopixke iktlanke,
ijkón ken oyeka tiopixke in Melquisedec.

¹⁸ Tones, in tlanawatile katlej achtoj oyeka, mach ok itlaj ipatij. Porke mach kipia poder iwan mach techpalewia para techmakixtis.¹⁹ Porke yon tlanawatile mach keman owelik otechchipaj de totlajtlakol. Pero axan onkaj se yankuik tlajtole katlej okachi kuale porke yon yankuik tlajtole techchipawa de totlajtlakol, iwan ijkón ya tiwelij timikuaniaj inawak Dios.

²⁰ Nijuak in Dios okichij ma yeto tiopixke in Jesucristo iktlanke (ik tlami), achtoj okitekakitij nik ijkón kichiwas.²¹ Pero oksekimej katlej omochijkej tiopixkej, in toTajtzin Dios mach itlaj okitekakitij de yejwan. Pero Dios ijkón okilwij in Cristo: Nej nimoPapan Dios iwan nimitzkakitia nik nikchiwas tlan nimitzilwia,

iwan mach nikpatlas notlajtol:

“Tej tietos titiopixke iktlanke (ik tlami),
ijkón ken oyeka tiopixke in Melquisedec.”

²² Por yonik, itech Jesús melawak mochiwa in akuerdo katlej Dios okichij towan iwan yon okachi kuale iwan amo ken oksé akuerdo.²³ Ya wejkawitl miekej tiopixkej opanokej, porke nijuak se omikia oksé okalakia ipatka para kiseguiros kichiwas yon tekitl de tiopixke.²⁴ Pero komo in Jesús mach miki, tonses mach akaj oksé kipatkayotis kej tiopixke.²⁵ Por yonik Jesús weli kinmakixtia iktlanke (ik tlami) nochtin katlej

míkuaniaj inawak Dios níkuak tlaneltokaj inawak Jesú. Porke Jesú yolitok iktlanke iwan weli kitlatlawtia in toTajtzin Dios por nochtin katlej kineltokaj.

²⁶ Toneses, Jesú yen toweyi tiopixke katlej omonekia para tejwan. Yej chipawak, mach tlajtlakolej, mach akaj welis kistlakawis de itlaj, mach nemi inwan tlajtlakolejkej, iwan Dios okitlalij itech ilwikak kan weyikistok (weyititok) okachi de nochtin katlej ompa katej. ²⁷ Mach ken oksekimej wejweyin tiopixkej katlej omonekia nochtonale kinmiktiskej yolkamej para kimakaskej in toTajtzin Dios. Achtoj in tiopixke okimikiatiaya se yolkatl iwan okixpantiliaya in toTajtzin Dios para ma kitlapojpolwi de itlajtlakol, iwan satepan okimikiatiaya oksé yolkatl para ma kintlapojpolwi nochtin in tlakaj. Pero Jesú omomikilij san se buelta para iktlanke (ik tlami), níkuak Yej inewian Jesú omotemaktij (omotemaktilij) ma kimiktikan. ²⁸ Itlanawatil in Moisés okintlaliaya in tlakaj kej wejweyin tiopixkej katlej noijki tlajtlakolejkej ken tejwan. Pero satepan de yon tlanawatile de Moisés, Dios otechmakak itlajtol de tlan kichiwas satepan, iwan okitlalij yen iKone ma yeto yen weyi tiopixke, iwan okitlalij ma yeto sa tekitl kuale para iktlanke (ik tlami).

8

Jesú yen techtlajtolia de itech in yankuik akuerdo

¹ Katlej okachi importante de tlan namechilwjtak, kijtosneki in toSeñor Jesucristo yen toweyi tiopixke iwan omotlalij ik yekmaitl de yen siya kan Dios tlanawatia itech ilwikak.

² Jesucristo tekipanoa kej weyi tiopixke itech tiapan ompa itech ilwikak, kijtosneki katlej melawak tiapan katlej mach okichijkej tlakaj sino Dios okichij. ³ Nochtin in wejweyin tiopixkej okitekipanoayaj in toTajtzin Dios okimakayaj intlamanal in tlakaj iwan okitlamiktiliayaj ika yolkamej, toneses in toSeñor Jesucristo noijki omonekia kimakas in toTajtzin Dios se tlamanale. ⁴ Iwan tla Jesucristo nian yeni ixko yin tlaltikpak, nion mach siera yeni tiopixke, porke nian ixko yin tlaltikpak katej oksekimej tiopixkej katlej kitlamaniaj in toTajtzin Dios ijkón ken kijta itlanawatil in Moisés. ⁵ Pero yinmej tiopixkej iwan nochtonale kichiwas in mantajtiopan ijkón ken Nej yonimitzititij ipan tepetl.” ⁶ Pero toweyi tiopixke tekipanoa itech se tiapan katlej okachi kuale. Porke Yej techtlajtolia inawak Dios iwan techmaka se akuerdo katlej

okachi kuale, porke yon yankuik akuerdo techmaka miek tlamantle katlej sa tekitl kuale iwan amo ken achtoj akuerdo.

⁷ Porke tla nekáj achtoj akuerdo yeskia sa tekitl kuale, tones mach ok monekini oksé yankuik akuerdo. ⁸ Pero Dios okitak nik in tlakaj mach oweliaj okichiwayaj in akuerdo katlej Dios achtoj okinmakak, iwan por yonik in Dios okijtoj: In Señor kijta: Ajsis tonale nikchiwas se yankuik akuerdo inwan tlakaj de Israel iwan de Judá.

⁹ Mach yetos ken nekáj akuerdo katlej onikchij innawak in ya wejkawitl inweyitajwan, nijuak onikinmatilanke iwan onikinkixtij de itech país de Egipto.

Porke mach okichijkej in akuerdo katlej inwan onikchij, iwan por yonik Nej onikinkaj, kijta in Señor.

¹⁰ In yankuik akuerdo katlej satepan nikchiwas inwan tlakaj de Israel, yen yin:

Nej niktlalis notlanawatil ipan intlanamikilis, iwan nikikuilos ipan inyolo.

Nej nietos niinDios, iwan yejwan yeskej nokonewan.

¹¹ Mach monekis akaj tlakatl ma kimacthi akaj oksé it-lakaikni,

nion mach kilwis ikni ma kixmati in Señor.

Porke nochtin nechixmatiskej, desde katlej okachi tzikitzin asta katlej okachi weyi.

¹² Iwan nikintlapojpolwis de tlan amo kuale okichijkej non-awak,

iwan mach ok keman nikelnamikis intlajtlakol.

¹³ Nijuak in Dios tlapoa de se yankuik akuerdo, kijtosneki in achtoj akuerdo ya biejo. Iwan tlan ya biejo iwan mach ok kuale, yon san niman pojpoliwis.

9

In tiopan de ixko yin tlaltikpak iwan tiopan de ilwikak

¹ In achtoj akuerdo okipiaya itlanawatil (irreglamento) para kenik se kitiochiwas in Dios. In mantajtiopan kan okitiochiwayaj in Dios yon okichiwayaj in tlakaj. ² Iwan yon mantajtiopan otlajkotzaktoka ika se kortina, se lado oyeka itoka Kan Tlatiochiwalojan kan oyeka in kandelero iwan kan oyeka in mesa katlej ipan okitlaliwayaj in pan. ³ Iwan oksé lado ikuitlapan kortina oyeka itoka Kan Tlixpantzin. ⁴ Ompa oyeka se artal de oro kan okichichinoaya kopale, iwan ompa oyeka in tlatiochiwalkaja katlej oixaltitoka nochlado ika oro. Ijtik yon tlatiochiwalkaja oyeka se xoxtzin de oro katlej

ijtik oyeka in maná, iwan nojki ompa oyeka ikarrotij in Aarón katlej oseliak, iwan nojki ompa oyekaj in temej kan oijkeilitokaj in tlanawatiltin de yen akuerdo.⁵ Ikpak yon tlatichiwalkaja oyekaj omen angelestín de oro, iwan yon kijtosneki nik in Dios ompa oyeka, iwan yonmej angelestín okixtzaktokaj ika inmajaswan itzaka in tlatichiwalkaja. Iwan ipan yon tlatichiwalkaja in tiopixke ompa otlajzelwiaya ika inmeso in yolkamej para Dios ma kintlapojpolwi in tlakaj de intlajtlakol. Pero axan mach moneki okachi se kijtos de yon tlamantle.

⁶ Níkuak nochí tlamantle yokiyektlalijkej itech ilugar, in tiopixkej okalakiaj nochipa Kan Tlatichiwalojkan de yen mantajtiopan para okichiwayaj intekiw. ⁷ Pero Kan Tlixpantzín ompa okalakia san yen weyi tiopixke san se buelta se xiwitl. Iwan níkuak okalakia okitkia inmeso in yolkamej para okixpantiliaya in toTajtzin Dios para ika okitlaxtlawaya de yej itlajtlakol iwan nojki de intlajtlakol nochtin tlakaj. ⁸ In Espíritu Santo techmachtia se tlamantle de yen mantajtiopan katlej tlajkotzaktok. Kijtosneki mach nochtin tlakaj oweliaj okalakiaj Kan Tlixpantzín porke ok okichijtokaj tlan kijta in achtoj akuerdo katlej kijta kenik moneki kiweyikixtiskej in toTajtzin Dios. ⁹ Nochi yon techititia se ejemplo para tejwan katlej tikatej itech yin tiempo. Techititia nik in tlamanale iwan inmeso in yolkamej katlej okixpantiliaya in toTajtzin Dios, mach owelia okinyolchipawaya in tlakaj katlej ijkón okichiwayaj para okiweyikixtiaya in toTajtzin Dios. ¹⁰ In ya wejkawitl akuerdo okinpiaya miekej tlanawatiltin katlej okimilwiaya in tlakaj tlanon kikuaskej o noso tlanon koniskej, nojki kenik maltiskej iwan kenik mopajpakkaskej. Nochi yon omonekia ijkón kichijtoskej asta ikuak Dios okichiwako oksé yankuik akuerdo.

¹¹ Pero axan Cristo yowalaj, yen weyi tiopixke katlej otechwalkuilij miek tlamantle kuale. Yej mach tekipanoa de weyi tiopixke itech se mantajtiopan katlej okichijkej in tlakaj ixko yin tlaltikpak, sino Yej tekipanoa de weyi tiopixke itech se tiopan katlej okachi weyi iwan katlej okachi kuale, katlej mach okichijkej in tlakaj, kijtosneki mach de nian tlaltikpak. ¹² Cristo okalakke Kan Tlixpantzín katlej kajki ilwikak san semi iwan iktlanke (ik tlami), iwan mach okitkik inmeso tentzomej iwan inmeso bakajtin para kixpantilis in toTajtzin Dios, sino okixpantilij katlej de Yej ieso, iwan ijkón okitlaxtlaj totlajtlakol para welis timomakixtiskej iktlanke. ¹³ Achtoj ika inmeso torojtin iwan ika inmeso tentzomej, iwan nojki ika itlikonexo in bakajtzin katlej okinpixiliaya in tlakaj katlej amo chipawakej, nochí yon owelia okinchipawaya in tlakaj níkuak omoyolsokiotiaya. ¹⁴ Pero ieso in Cristo okachi kipia

poder iwan amo ken inmeso in yolkamej. Porke in Espíritu Santo katlej kipia nemilistle iktlanke (ik tlami), okipalewij in Cristo para ma motemakti (motemaktili) ma kimiktikan ijkón ken nijuak okimiktiliayaj in toTajtzin Dios se yolkatl katlej chipawak. Iwan Cristo Yej noijki chipawak porke mach okichij nion se tlajtlakole. Iwan Cristo ieso techchipawa ipan toyolo para ma tiwelikan ma tiktekipanokan toTajtzin Dios katlej yolitok, iwan mach ok moneki tikchiwaskej tlan kijta in ya wejkawitl tlanawatile katlej mach ok itlaj ipatij.

¹⁵ Por yonik, Cristo yen techtlajtolia inawak Dios de itech in yankuik akuerdo katlej axan tikpiaj. Iwan axan nochtin katlej Dios kinnotza para ma tlaneltokakan inawak Cristo, welis kipiaskej iktlanke (ik tlami) tlan Yej yokijtoj techmakas. Yon welis tikpiaskej porke Cristo omikke por tejwan para welis techtlapojpolwis de totlajtlakol katlej achtoj otikchijkej nijuak ok otiekaj itech achtoj akuerdo. ¹⁶ Namejwan ankimatij nijuak se tlakatl kichiwa se amatl kan kijta akin kikajtewilis tlan iaxka nijuak mikis, tonses mach akaj welis kimoaxkatis tlan kijta yon amatl asta ikuak ma miki yon tlakatl. ¹⁷ Porke se amatl ken yon mach itlaj serbiroa mientras ok onkaj akin okichij, sino serbiroa nijuak miki akin okichij. ¹⁸ Por yonik, in achtoj akuerdo katlej Dios okichij inwan tlakaj, noijki achtoj omonekke mikis se yolkatl para opéj serbiroa in yon akuerdo. ¹⁹ Nijuak Moisés okinlerilij nochtin tlakaj nochti in tlanawatile de toTajtzin Dios, okitzkij sekin ichkatl chichiltik iwan se imayo de se kuawitl itoka hisopo, okinsiaj ijtk estle nelitok ika atl de yen torojkonemej iwan tentzomej, iwan okajzelwij in libro kan oijkej tlamantin in tlanawatiltin iwan noijki okinmajzelwij nochtin tlakaj. ²⁰ Iwan Moisés okinmilwij: “Yin yen estle katlej kiteititia nik ya pewa tekipanoa in akuerdo katlej Dios towan kichiwa iwan katlej technawatia ma tikchiwakan.” ²¹ Moisés noijki okajzelwij ika estle in mantajtiopan iwan nochtin tlamantin katlej omotekipanoltiayaj ompa tlajtik. ²² Iwan ijkón, in tlanawatile de Moisés, techtitia nik oyekaj miekej tlamantin katlej omonekia mochipawanij ika estle. Iwan mach onkaj tlapojpolwilistle de tlajtlakole tla amo nokiwis estle.

Cristo omotemakak ma kimiktikan para welis techtlapojpolwis de totlajtlakol

²³ Nochi yon kajki san kej se ejemplo de tlan onkaj itech ilwikak. In tlamantin de nian tlaltikpak omonekia mochipawaskej ika inmeso in yolkamej. Pero in tlamantin katlej katej itech ilwikak noijki omonekia mochipawaskej ika ieso de akaj katlej okachi kuale, iwan amo ika ieso de se yolkatl. ²⁴ Iwan Cristo mach okalakke Kan Tlixpantzin

de yen mantajtiopan katlej okichijkej in tlakaj, katlej kajki san kej se ejemplo de katlej melawak tiopan. Sino Cristo okalakke ompa meroj itech ilwikak kan axan techtlajtolia inawak Dios. ²⁵Iwan Cristo okimakak in toTajtzin Dios katlej de Yej ieso, iwan mach moneki motemaktis (motemaktilis) para ma miki miekpa ken okichiwaya in weyi tiopixke okimiktiaya se yolkatl kada xiwitl, iwan okalakia Kan Tlixpantzin para okixpantiliaya in toTajtzin Dios inmeso in yolkamej iwan amo de yen ieso. ²⁶Tla ijkón yeni, toneses in Cristo omonekia mikini miekpa desde ikuak Dios okichij in tlaltikpak. Pero Cristo omonextiko itech yinmej iyakatlanka tonáltin, iwan omotemaktij san se buelta para omikke ken nikuak okimiktiaya se yolkatl, para ijkón welis kintlajtlakolkixtis in tlakaj, iwan mach ok itlaj moneki. ²⁷Iwan tejwan katlej titlaltikpaktlakaj tinochtin san se buelta timikiskej, iwan satepan Dios techixkomakas (techtzonmanas). ²⁸Iwan ijkón noijki, in Cristo omikke san se buelta nikuak omotemakak ma kimiktikan para okintlajtlakolkixtij miekej tlakaj. Iwan Cristo oksemi witz, pero mach ok witz para techtlajtlakolkixtis, sino witz para techmakixtis tinochtin katlej tikchiaj ma wiki.

10

Itlanawatil in Moisés mach weli techtlajtlakolkixtia

¹ Itlanawatil in Moisés oyeka san se ejemplo de yen kuale tlamantin katlej satepan owalaj itech Cristo. Miekej tlakaj okinekiaj mijuaniskej inawak Dios nikuak okinmiktiaya yolkamej iwan okixpantiliaya in toTajtzin Dios nochí xiwitl. Pero yon tlamantle mach keman owelik okinyolchipaj de intlajtlakol in tlakaj para momakixtiskej. ² Porke tla ika yon welini momakixtianij, toneses mach monekini kinmiktianij miekej yolkamej, sino san ika se. Iwan ika yon ya mokawanij ya chipawakej iwan mach ok momachilianij ok tlajtlakolejkej. ³Pero kada xiwitl nikuak okimiktiaya se yolkatl para okixpantiliaya in toTajtzin Dios, yon okinmelnamiktiaya in tlakaj nik tlajtlakolejkej. ⁴ Porke inmeso in torojtin iwan inmeso tentzonkonemej mach weli tetlajtlakolkixtiaj.

⁵ Por yonik, nikuak in Cristo owalaj ixko yin tlaltikpak, okilwij in toTajtzin Dios:

Tejwatzin mach tikneki ma mitzmiktilikan se yolkatl katlej mitzmakaj in tlakaj para ika xikintlapojojpolwi.

Sino otinechmakak notlalnakayo para ma nimiki ijkón ken nikuak mitzmiktiliaj se yolkatl para ika tikintlapojojpolwia in tlakaj.

⁶ Tejwatzin mach tikwelita ma mitzinmakakan yolkamej katlej kinmiktiaj iwan katlej kinchichinoaj, iwan mitzinmixpantiliaj para ika xikintlajtlakolkixti in tlakaj.

⁷ Toneses onikijtoj: “Nian nikaj tejwatzin Dios, para nikchiwas tlan tikmonekiltia,

ijkón ken kajki ijkuitlakol itech tiotlajkuilole tlanon moneki nikchiwas.”

⁸ Achtoj kijta nik in Dios mach kiwelita ma kinmakakan yolkamej katlej kinmiktiaj iwan katlej kinchichinoaj iwan kinmixpantiliaj para ika ma kintlapojpolwi. Nochi in yon mach kiwelita. Maski itlanawatil in Moisés ijkón kijta ma kichiwakan. ⁹ Iwan satepan Cristo okilwij in toTajtzin Dios: “Nian nikaj tejwatzin Dios, para nikchiwas tlan tejwatzin tikneki.” Kijtosneki, kipojpoloa in achtoj akuerdo iwan kit-lalia oksé yankuik akuerdo. Mach ok moneki kitlamiktiliskej in toTajtzin Dios para ma kintlapojpolwi in tlakaj de int-lajtlakol, sino yen Cristo omotemaktij (omotemaktilij) ma kimiktikan para techtlajpojpolwis. ¹⁰ Cristo okichij tlan Dios okinekia. Tejwan yotichipawikej de totlajtlakol porke Cristo omotemaktij ma kimiktikan. Iwan omotemaktij san se buelta para iktlanke (ik tlami) iwan mach ok moneki oksemi ijkón kichiwas.

¹¹ Nochtin tiopixkej judiojtin nochitona okitekipanoaya in Dios ika yonmej yolkamej katlej okinmikiayaj iwan okinmixpantiliayaj in toTajtzin Dios. Iwan miekpa ijkón okichiwayaj, iwan mach keman owelik otlajtlakolkiskej in tlakaj.

¹² Pero Cristo san semi omotemakak ma kimiktikan por yen totlajtlakolwan. Iwan yon okichij para iktlanke (ik tlami). Iwan axan kajki ilwikak ewatok ik iyekma in toTajtzin Dios.

¹³ Iwan ompa mochixtok asta ikuak Dios kitlalis tlayekanke de yejwan katlej kikokoliaj. ¹⁴ Cristo omikke san semi, iwan ika yon okichij ma weli ma tiekan tichipawakej de totlajtlakol para iktlanke (ik tlami). Iwan ijkón axan tejwan timochipajtokej inawak Dios katlej otechpejpenke para ma tiekan iaxkawan. ¹⁵ Iwan tejwan tikmatij nik in yon melawak porke in Espíritu Santo no ijkón techilwia itech tiotlajkuilole. Achtoj kijta:

¹⁶ Yin yen akuerdo katlej nikchiwas satepan inwan nokonewan, kijta in Señor.

Niktlalis notlanawatil ipan inyolo,

iwan nikikuilos ipan intlalnamikilis.

¹⁷ Iwan satepan in Espíritu Santo kijta:

Mach ok keman nikelnamikis intlajtlakol iwan nochitlan amo kuale tlan okichijkej.

18 Ijkón kiné, tla Dios yotechtlapojojpolwij de totlajtlakol, toneses mach ok moneki tkmiktiskej ok akaj yolkatl para tikixpan-tiliskej toTajtzin Dios para ma techtlapojojpolwi.

Ma timijkuanikan inawak Dios

19 Por yonik, nokniwan, axan mach ok timomawtiskej para tikalakiskej Kan Tlixpantzin, porke in Jesús yokinokij ieso itech krus nijuak omikke. 20 Jesús otechtlapolij se ojtle katlej yankuik iwan katlej yolitok, kijtosneki Jesús yen ojtle. Porke nijuak Jesús okitemaktij (okitemaktilij) itlalnakayo para omikke, ikuakón otlajkotzayanke iwan otlapowik in kortina katlej okitzaktoka Kan Tlixpantzin de yen tiopan. Yon kijtosneki yen Jesús itlalnakayo otzayanke iwan otlapowik. 21 Iwan ijkón ya kuale tikalakij inawak Dios, porke tikpiaj se weyi tiopixke katlej tekipanoa itech ichan toTajtzin Dios para kinpalewis nochtin katlej ikonewan. 22 Por yonik, moneki ma tikalakikan kan kajki in toTajtzin Dios ika toyolo katlej melawak ika titlaneltokaj. Porke Yej yotechchipaj para mach ok ma timomachilikan ok tikpiaj ok itlaj tlajtlakole, iwan yokipajpakke totlalnakayo ika atl chipawak. 23 Moneki melawak ma tikneltokakan nik tikresibiroskej nochti tlan oksekimej tikinmilwiaj tikchiaj, porke kuale tikmatij nik in Dios techmakas nochti tlan yotechilwij. 24 Ma tiktemokan kenik welis timopalewiskej se iwan oksé para okachi timotlasojtlaskej iwan para welis tikchiwaskej tlan kuale. 25 Amo ma tikkawan de timololoskej inwan oksekimej tlaneltokakej. Amo ma tikchiwakan ken oksekimej katlej mach ok kinekij mololoskej. Sino ma timololokan iwan ma timoyolojchikawan axan okachi porke tikmatij nik ya ajsi tonale nijuak witz in toSeñor.

26 Tla akaj ok kiwelita tlajtlakojtos, maski ya kimati tlan melawak, ma kimati nik mach ok mikis akaj oksé tlakatl ken Cristo omikke para welis kitlapojpolwis de itlajtlakol. 27 Akin ijkón kichiwa ma sa kichixto in temawtij tlajyowilitle katlej ipan witz. Dios kitlajtlakolmas iwan kitlajyowiltis ijtik tlitl katlej xotlatok kan kintlajyowiltis noijki nochtin katlej kikokoliaj in Dios. 28 Ya wejkawitl nijuak akaj mach okitlakitaya itlanawatil in Moisés, iwan tla oyekaj omen o noso eyin testigojin katlej okistlakawiayaj de tlan okichij, toneses okimikiayaj iwan mach okiknomatiaj. 29 Tones, ¿amo ankiyejyekoaj namejwan nik in Dios okachi kitlajyowiltis in tlakatl katlej kixpanawia iKone in Dios? Dios sa tekitl kitlajyowiltis yon tlakatl porke kita kej yeskia mach itlaj ipatij imikilis in Cristo, katlej okinokij ieso para ika okichij se yankuik akuerdo iwan Dios, iwan katlej ika yotechchipaj de totlajtlakol. Por yonik in Dios sa tekitl kitlajyowiltis

porke kiwikaltia in Espíritu Santo katlej techititia nik sa tekitl techtlaosjtla in Dios. ³⁰ Tejwan tikmatij tlanon kichiwas in Dios, porke Yej okijtoj: “Nej nechtokaroa nikinkuepaltis akinmej kichiwaj tlan amo kuale, yejwan nechtlaxtlawiliskej ken moneki.” Iwan oksé lado itech tiotlajkuilole kijta: “In Señor kinmixkomakas (kintzonmanas) ikonewan.” ³¹ Sa tekitl temawtij nikuak in Dios katlej yolitok, kintlajyowiltis in yonmej tlakaj.

³² Xikelnamikikan namejwan nekatej tonaltin nikuak ankixmatkej itlajtol in Dios. Namejwan ankixikojkej miek tlajyowilistle katlej anpanokej. ³³ Miekpa oamechwikaltiayaj iwan oamechkojkokojej teixpan, iwan nikuak oksekimej amokniwan otlajyowiayaj, namejwan no inwan antlajyowiayaj. ³⁴ Namejwan ankinmiknomatkej katlej otzaktokaj telpiloyan. Iwan asta ika pakilistle anmotekawilijkej ma amechkixtilikan tlan namoaxka, porke namejwan ankimatiij nik itech ilwikak ankipiaj katlej okachi kuale iwan katlej mach keman tlamis. ³⁵ Por yonik, amo xikpolokan namotlaneltokalis katlej amechmakas weyi amotlaxtlawil itech ilwikak. ³⁶ Namejwan xikmatikan ximochiakan iwan xikchiwakan tlan Dios kimonekiltia, para welis ankiresibiroskej tlan Dios yokijtoj techmakas. ³⁷ In tiotlajkuilole kijta:

Mach ok wejkawitl

ejkos akin yokijtoj witz, mach ok wejkawas.

³⁸ Akin kitlalis itlaneltokalis inawak Dios, in Dios kitas ya chipawak de nochí itlajtlakol iwan ijkón welis kipias nemilistle nochipa.

Pero tla mokuepas oksemi ik tlakuitlapan iwan mach ok kineltokas, mach kipaktis in Dios.

³⁹ Pero tejwan mach ken yonmej katlej mokuepaj ik tlakuitlapan iwan mopoloaj para satepan Dios kintlajyowiltis iktlanke (ik tlami), sino tejwan tipowij inwan tokniwan katlej tikneltokaj Dios para ijkón momakixtis in toanima.

11

Tlaneltokalistle

¹ In tlaneltokalistle kijtosneki kuale tikneltokaj nik tikresibiroskej itlaj tlamantle tlan Dios kijta techmakas. Iwan maski ayamo tikitaj in yon tlamantle, tikmatij nik tikresibiroskej.

² Dios opakke innawak in ya wejkawitl toweyitajwan, porke okipixkej tlaneltokalistle.

³ Por yen tlaneltokalistle, tigmomakaj kuenta nik in Dios okichij in tlaltikpak ika itlajtol. Nochi tlamantle tlan axan tikitaj achtoj mach oyeka, iwan mach omochij ken nikuak mochiwa itlaj tlamantle katlej mota.

⁴ Por yen tlaneltokalistle, Abel okimiktilij in toTajtzin Dios se yolkatl katlej okachi kuale iwan amo ken tlan okixpantilij in Caín. Por yonik in Dios okitak in Abel nik yolchipawak iwan Dios okiresibiroj in yolkatl katlej okixpantilij. Tonses, maski yomikke in Abel, ok techmaka se ejemplo para tejwan no ijkón ma titlaneltokakan.

⁵ Por yen tlaneltokalistle, Enoc mach omikke porke Dios okiwikak ilwikak yolitok. Por yonik mach keman okajsikej itlalnakayo. In tiotlajkuilole kijta ke antes de kiwikanij para ilwikak, Enoc okipaktij in Dios ika imelajkanemilis. ⁶ Pero tla amo se kipias tlaneltokalistle, tonses mach welis se kipaktis in Dios. Porke para se mijkuanis inawak Dios, moneki se kineltokas nik in Dios onkaj, iwan nik melawak kintlaxtlawis nochtin akinmej kitemoaj.

⁷ Por yen tlaneltokalistle, Dios okilwij in Noé nik panos se tlamantle katlej mach ya omotaya, iwan Noé okineltokak iwan okichij se weyi barko para ika okimakixtij ifamilia. Por yen tlaneltokalistle, Noé okichij tlan kuale ken Dios okinekia iwan ijkón okiteititij nik nochtin in tlaltikpaktlakaj oyekaj mach kualtin porke okichiwayaj tlan mach kuale, iwan ijkón Dios okitak in Noé nik yolchipawak porke okineltokak tlan okilwij.

⁸ Por yen tlaneltokalistle, Abraham okichij tlan Dios okinawatij, de ma wia itech oksé tlale katlej Dios okilwij kimakas. Abraham okiske de itech itlal iwan oyáj itech nekáj tlale katlej mach okimatia kanin kajki. ⁹ Por yen tlaneltokalistle, Abraham ochantik itech oksé tlale katlej Dios okilwij kimakas. Abraham ochantik ijtk mantajkaltin, ijkón ken Isaac iwan Jacob noijki ochantikej ijtk mantajkaltin porke yejwan noijki okinmilwij in Dios nik kinmakas in yon tlale. ¹⁰ Abraham okichij tlan Dios okilwij porke okichiaya yetos itech nekáj weyikan katlej kipia chikawak icimiento katlej mach keman wetzis. Iwan yon weyikan yen Dios okiyejyekoj kenik yetos iwan yen okichij.

¹¹ Por yen tlaneltokalistle, in Sara maski mach owelia okipiaya ikone iwan oyeka ya tenantzin, okajsík chikawalistle iwan owelik omokonetij iwan okitlakatilij se ikone porke okimatia nik in Dios kimakas se ikone ijkón ken Dios okilwij. ¹² Noijki in Abraham maski oyeka ya tetajtzin iwan sa okichixtoka keman mikis, Abraham ok owelik okipixke ikone iwan satepan okinpixke sa tekitl miekej iwejkaixwiwan asta mach akaj welis kinpoas, porke sa tekitl miekej sa ken sitlaltin o noso sa ken xale katlej onkaj itempan atl.

¹³ Nochtin yonmej tlakaj okipixkej tlaneltokalistle asta ikuak omikkej. Yejwan omikkej iwan mach keman okire-

sibirojkej tlan Dios okinmilwij kinmakas, pero ika intlaneltokalis okitakej san wejka iwan opakej. Iwan okijtojkej nik san opanokoj ixko yin tlaltikpak kan mach se yetos nochipa. ¹⁴ Iwan nijuak ijkón okijtojkej, kijtosneki ok okitemoayaj oksé lugar kan chantiskej katlej amo kajki nian ixko yin tlaltikpak. ¹⁵ Tla yejwan kiyejyekojtonij yaskej itech nekáj tlale katlej okiwalkajtejkej, tonses welini mokuepanij itech yon tlale. ¹⁶ Pero yejwan okinekiaj se tlale katlej okachi kuale para ompa chantiskej, kijtosneki yejwan okinekiaj chantiskej ilwikak. Por yonik in Dios mach pinawa de ma kinotzakan nik yen Dios de yejwan. Porke Yej yokinchiwili se weyikan itech ilwikak.

¹⁷ Por yen tlaneltokalistle, Abraham okitzkij in Isaac para kimiktiani in toTajtzin Dios nijuak in Dios okijejyekoj itlaneltokalis in Abraham. Abraham okineltokak tlan Dios okilwij ma kichiwa iwan ya meroj kimiktiani ikone, maski Dios okilwij in Abraham nik kinmakas miekej iwejkaixwiwan por medio de Isaac. ¹⁸ Porke in toTajtzin Dios okilwij: "Tikinpias miekej mowejkaixwiwan por medio de Isaac." ¹⁹ Abraham okimatisa nik in Dios kipia poder para oksemi welis kinyolitis in mikkamej. Iwan welis tikijtoskej Isaac omikka iwan satepan Dios oksemi okiyolitij iwan okimaktlij in Abraham.

²⁰ Por yen tlaneltokalistle, Isaac okintiochij in Jacob iwan Esaú iwan okinmilwij kenamij nik yeskej satepan. ²¹ Iwan por yen tlaneltokalistle, nijuak ya meroj ixpoliwis in Jacob, okintiochij ikonewan José seseisenmej, iwan okiweyikixtij in toTajtzin Dios omotlakxilijtoka ika ikarrotij. ²² Por yen tlaneltokalistle, nijuak ya meroj ixpoliwis in José, okijtoj nik ajsis tonale in tlakaj de Israel kisaskej de itech país de Egípto, iwan noijki otlanawatij nijuak kisaskej ma kinmitkikan iomowan.

²³ Por yen tlaneltokalistle, nijuak otlakatke in Moisés, itajwan okitlaatijtokaj eyi metztle. Porke okitakej nik sa tekitl kuakualtzin konetl, iwan mach omomawtijkej por amo okitlakitakej tlan otlanawatij in rey. ²⁴ Iwan por yen tlaneltokalistle, nijuak Moisés omotlanke weyi tlakatl, mach okinekke ma kinotzakan kej ikone de yen ichpoch in rey de Egípto. ²⁵ Sino okachi kuale okinekke tlajyowis inwan ikonewan Dios, porke okimatisa nik tlajtlakole nochí tlamantle katlej kitemaka pakilstle san kanaj keski tonale. ²⁶ Moisés mach okinekke mokawas itech país de Egípto para kipias nochí in rikojoyotl de yon país, sino okachi kuale okinekke tlajyowis por yen Cristo, porke yej okichiaya itlaxtlawil katlej Dios satepan kimakani. ²⁷ Por yen tlaneltokalistle, Moisés okiske de itech país de Egípto, iwan mach omomawtij maski ma

kualani in rey. Moisés mach omosotlaj porke okimatiá nik in Dios iwan oyeka maski mach owelia okitaya.

²⁸ Por yen tlaneltokalistle, Moisés okichij ilwitl itoka pascua iwan otlanawatij ma tlajzelwikan ika estle itech puertajtin. Iwan ijkón, nijuak in ángel opanok itech inkalwan mach okimiktij nion se inkone tetiachka de yen tlakaj de Israel.

²⁹ Iwan por yen tlaneltokalistle, in tlakaj de Israel opanokej ijistik atl katlej itoka Mar Chichiltik, kej yeskia opanokej ipan tlale wakke. Iwan nijuak in egipciós no ijkón okinekiaj kichiwanij, omelsinkej iwan omikkej ompa tlatlajko atl.

³⁰ Por yen tlaneltokalistle, in tlakaj de Israel okiyayawalojkej chikome buelta in weyikan de Jericó, iwan por yonik owetzke in tepamitl katlej okiyawalojtoka in weyikan de Jericó. ³¹ Por yen tlaneltokalistle, in siwatl momekatij itoka Rahab, mach omikke inwan oksekimej tlakaj katlej mach okitlakitayaj Dios, porke yej kuale okinresibiroj in tlakaj de Israel katlej otlastlakotoj itech weyikan de Jericó.

³² ¿Tlan okachi welis nikijtos? Mach onkaj tiempo para namechtlapowis de Gedeón, de Barac, de Sansón, de Jefté, de David, de Samuel iwan de yen profetajtin. ³³ Por yen tlaneltokalistle, yejwan okintlankej oksekimej paismej, kuale otlanawatijkej ika melajkayotl, iwan okiresibirojkej tlan Dios okinmilwij kinmakas. Iwan por yen tlaneltokalistle, okinkamatzakej lionmej, ³⁴ okinsewijkej wejweyin tlimej iwan omomakixtijkej de mikisej ika espada. Iwan nijuak sekimej mach okipiayaj chikawalistle, in toTajtzin Dios okinmakaya chikawalistle. Okajsikej chikawalistle para owelikej ottemagakej (okinmakakej) itech guerra iwan okintlankej in soldadojtin katlej inkontraswan. ³⁵ Por yen tlaneltokalistle, in siwamej okinmitakej oksemi omoyolkuikej infamiliareswan.

Oksekimej tlaneltokakej mach okinekej okikajkej in Dios maski okinmijilpiayaj iwan okintlajyowiltiayaj asta okinmikitayaj, iwan okinmilwiayaj kinkajkawaskej tla kikawaskej de kineltokaskej in toTajtzin Dios. Yejwan okineltokakej in Dios maski okinmiktijkej, porke okinekiaj kipiaskej tlan okachi kuale itech ilwikak nijuak nochtin moyolkuiskej (moyolitiskej). ³⁶ Oksekimej tlaneltokakej okinpipinatijkej iwan okinwitekej. Oksekimej okinmijilpiayaj ika kadena iwan okintzakuayaj telpiloyan. ³⁷ Oksekimej tlaneltokakej okinmiktijkej ika tetl. Oksekimej okintlajkotekej ika sierra. Oksekimej okixikojkej nijuak okintoktiayaj ma tlajtlakokan pero mach otlajtlakojkej. Oksekimej okinmiktijkej ika espada. Oksekimej tlaneltokakej onenkej nian nepa, iwan omotzotzolitayaj san ika iewayo ichka o noso ika iewayo tentzon. Ok-

sekimej tlaneltokakej oyekaj pobrestin, okintlajyowiltiayaj iwan okintoktiayaj miek tlamatle mach kuale.³⁸ Nochtin yonmej tokniwan okichijkej tlan kuale innawak oksekimej tlaltikpaktlakaj, pero yonmej tlaltikpaktlakaj mach intech opowia para kinpianij in yonmej tokniwan. Pero yonmej tokniwan onenkej kan tlawaki, onenkej kan tepeyoj, ochantiaj ijtk kuyoktin iwan ijtk olwastin para omotlaatiayaj de yen tlakaj mach kualtin.³⁹ Pero nochtin yejwan mach okiresibirojkej tlan Dios okinmilwij kinmakas, maski in Dios okipaktij porke otlaneltokakej inawak.⁴⁰ Porke Dios yokipiaya se tlamatle katlej okachi kuale para tejwan. Para ijkón yejwan kiresibiroskej tlan kinpoloa san sekan iwan tejwan.

12

Ma tiktlalikan totlachialis inawak Jesús

¹ Nochtin yonmej tlakaj okipixkej tlaneltokalistle iwan por yonik okixikojkej tlan opanokej. Iwan nochtin yonmej axan techyawalojtokej iwan techmatiltiaj no ijkón ma tikneltokakan nik melawak tlan Dios kijta. Iwan ma tikkawakan se lado nochi tlan techtzakuilia iwan ma tikkawakan in tla-jtlakole katlej kineki techmayawis. Ma tikxikokan nochi tlan tipanoskej, para welis timotlaloskej kej yeskia timotlaloaj se karrera ipan ojtle katlej Dios otechmakak.² Ma tiktlalikan totlachialis inawak Jesús. Porke Yej otechititij kenik moneki titlaneltokaskej, iwan Yej techpalewia para ma tikneltokakan nochipa. Jesús okixikoj in tlajyowilistle nijuak omikke itech krus, iwan maski oyeka sa tekitl tepinatij yon miklistle in Yej mach okichij kuenta. Porke okimatisa nik satepan de panos yon tlajyowilistle kipias miek pakilstle. Iwan por yonik axan ewatok ik iyekma de yen isiya in toTajtzin Dios.

³ Por yonik, nijuak namejwan anmosotlawaskej iwan amoyolotlamitiskej, ikuakón xikelnamikikan in Jesús. Porke Yej okixikoj in tlajyowilistle katlej okitoktijkej in tlakaj tlajt-lakolejkej.⁴ Namejwan ankixikojtokej in tlajyowilistle katlej anpanotokej para amo antlajtlakoskej, pero asta axan mach akaj ya amechmiktia por yon.⁵ ¿Kox ankelnamikij namejwan tlan Dios otechilwij tejwan katlej tiikonewan? Porke itech tiotlajkuilole ijkín techilwia:

Nokone, xikchiwa kuenta nijuak Nej nimoTeko nimitzlajy-
owiltia,

iwan amo ximokuejso nijuak nimitznajnawatia.

⁶ Porke Nej nikyekketza akin niktlasoxtla,

iwan nikintlajyowiltia nochtin katlej nikinresibiroa ma
yekan nokonewan.

⁷ Namejwan xikxikokan nikuak Dios amechtlajyowiltia porke amechtitia nik namejwan anikonewan. ¿Kox onkaj akaj tetaj katlej amo ma kiyekketza ikone? ⁸ Tla Dios amo amechyekketzas, ijkón ken kichiwa se tetaj, tones ki-jtosneki namejwan mach melawak anikonewan sino san anmichtakapiltin. ⁹ Tinochtin otikinpixkej totajwan ixko yin tlaltikpak katlej otechyekketzkej iwan tejwan otikintlakitakej. ¿Tlanik kiné amo ma tiktlakitakan okachi in toPapan de yen toanima para ijkón welis tikpiaskej nemilistle inawak? ¹⁰ Totajwan de yin tlaltikpak otechyekketzkej san kanaj keski xiwitl, porke yejwan okiyejyekojkej yon se kuale para tejwan. Pero Dios techyekketza para techpalewis ma tiekan tiyolchipawakej ijkón ken Yej yolchipawak. ¹¹ Nikuak in Dios techyekketza para ma tiekan ken Yej kineki, tejwan mach tikwelitaj sino yej techyolkokoa. Pero tla tkmokawiliskej in Dios ma techyekketza, tones tikpiaskej yolosewilistle iwan tieskej ken Dios kineki.

Moneki ma tikchiwakan kuenta tlan Dios techilwia

¹² Por yonik, moneki ximoyolojchikawan iwan oksemi xikitzkikan chikawalistle porke ya ansotlawakej. ¹³ Xiwian ipan kuale ojtle, iwan tlakaj katlej intlaneltokalis ayamo chikawak, yejwan amechitaskej iwan noijki yaskej ipan yon kuale ojtle.

¹⁴ Xikchiwakan de xiekan ika kuale inwan nochtin oksekimej. Iwan xiekan ika yolchipawalistle porke tla amo se yetos ika yolchipawalistle, mach welis se kitas in toSeñor. ¹⁵ Xikpiakan kuidado para ke nion se de amejwan amo ma kipolo iteiknotlamachilis in Dios. Nion se de amejwan amo ma yeto ken bierojxiwitl, porke in tlamo welis kinmijtlakos in oksekimej tokniwan. ¹⁶ Xikpiakan kuidado, amakaj de amejwan ma momekati. Amakaj ma kita kej yeskia mach itlaj ipatij tlan Dios techmaka, ken Esaú okitak kej yeskia mach itlaj ipatij in tlatiochiwalistle katlej kimakanij, porke yej oyeka tekone tetiachka. Iwan yon tlatiochiwalistle katlej oyeka para yej, okinamakak san por se plato de tlakuale nikuak otiojsij. ¹⁷ Iwan namejwan ankimatij, nikuak Esaú okinekia kiresibiroani yon tlatiochiwalistle, ipapan mach ok okimakak. Maski sa tekitl ochokak, mach ok owelik omoyektlalij tlan yokichij.

¹⁸ Iwan namejwan mach anmijkuanijkej itech tepetl Sinaí katlej weli se kikitzkia ken nikuak in tlakaj de Israel omi-jkuanijkej itech yon tepetl, nikuak yejwan okiresibirojkej in tlanawatile de Dios. Itech yon tepetl otlikuitoka se weyi titl, omixtlatleyuak iwan oyeka tlatleyualotl iwan noijki oejekaya chikawak. ¹⁹ Yejwan okikakej se chikawak tlapitzalistle

iwan okikakej itlajtol in Dios. Iwan nikuak ijkón okikakej, yejwan sa tekitl omomawtijkej iwan omotlatlawtijkej mach ok ma kintlapowi. ²⁰ Yejwan omomawtijkej nikuak Dios okinmilwij: “Tla akaj tlakatl o noso yolkatl kitzkis in tepetl, kipia de mikis ika tetl o noso ika se lanza.” ²¹ Oyeka sa tekitl temajmawtij tlan yejwan okitakej asta yen Moisés noijski okijtoj: “Sa tekitl nimomawtia asta nipapatlaka (nibibioka).”

²² Pero namejwan mach anmikuaniijkej itech yon tepetl Sinaí, sino namejwan anmikuaniijkej itech tepetl Sión kan kajki iweyikan Dios, katlej nochipa yolitok. Kijtosneki yen weyikan de Jerusalén katlej kajki ilwikak. Itech yon weyikan ompa mololoaj miekej angelestn asta mach welis se kinpoas, yejwan ompa mololoaj para kiweyikixtaj in toTajtzin Dios ika pakilstle. ²³ Noijski ompa ololitokej ikonewan Dios katlej tetiachkamej katlej intoka ya kajki ijkuitolok ompa ilwikak. Namejwan ya ankatej ompa kan kajki in toTajtzin Dios, katlej kinmixkomakas (kintzonmanas) nochtin tlakaj. Noijski ompa katej inmespíritu katlej okichijkej tlan kijta itlajtol in Dios iwan ya katej chipawakej ken Dios kineki. ²⁴ Namejwan ankatej ompa inawak Jesús katlej techtlajtolia inawak Dios. Jesús yen katlej otechmakak se yankuik akuerdo iwan Dios, iwan noijski katlej ika ieso otlajzelwij para otechchipaj de totlajtlakol. Iwan ieso in Jesús okachi kuale porke techtlapopolwia iwan amo ken ieso in Abel.

²⁵ Por yonik, xikpiakan kuidado iwan moneki xikchiwakan kuenta tlan Dios amechilwia. Porke nekatej katlej mach okichijkej kuenta itlajtol in Dios nikuak Yej okintlapowiyaya nian ixko yin tlaltikpak, in Dios okintlajyowiltij. Iwan tejwan okachi techtlajyowiltis tla amo tikchiwaskej kuenta nikuak Yej technotza ika chikawak desde ilwikak. ²⁶ Itech nekáj tonale, nikuak Dios okintlapowij in tlakaj de Israel, ot-lalolinke. Pero axan Yej ijkín kijta: “Nikuak nitlajtos, ok-semi tlalolinis ixko yin tlaltikpak iwan noijski tlalolinis itech ilwikak.” ²⁷ Iwan nikuak okijtoj “oksemi”, kijtosneki nochitlan Dios okichij, nochitlan weli molinia pojpoliwis iwan mokawas sa yen tlan mach weli molinia. ²⁸ Dios techmaka se lugar kan titlanawatiskej katlej mach welis molinis. Por yonik moneki ma tiklasojkamachilikan toTajtzin Dios, ma tikweyikixtikan ken Yej kipaktia, ika tetlakitalistle iwan ika nemawtile. ²⁹ Porke in toTajtzin Dios Yej kej yeskia se tlilt katej weli kichichinoa nochitlan onkaj.

13

¹ Ma timotlasojtlakan nochipa se iwan oksé kej tiiknimej.
² Amo xikelkawakan de ankinkalotiskej ika kuale akinmej amechwaltlajpalooj amochan. Porke ya wejkawitl sekimej katlej otekalotijkej mach okimomakakej kuenta kox yen angelestín okinkalotijkej.

³ Xikinmelnamikikan katlej tzaktokej telpiloyan iwan xikinpalewikan, kej yeskia namejwan noiiki inwan antzaktokej. Xikinmelnamikikan katlej kintlajyowiltiaj iwan xikinpalewikan, porke namejwan noiiki ankipiaj namotlalnakayo katlej mostla wiptla no welis tlajyowis.

⁴ Se tlakatl iwan se siwatl katlej ya tlanamiktiltin moneki ma motlakitakan iwan amo ma momekatikan, sino moneki ma chipawkanemikan. Porke Dios kintlajyowiltis katlej momekatiaj katlej tlanamiktiltin iwan katlej mach tlanamiktiltin.

⁵ Amo wel xikwelitakan in tomin. Xipakikan ika tlan ya ankipiaj, porke Dios kijta: "Mach keman nimitzkawas, porke Nej nochipa mowan nietos." ⁶ Por yonik in tejwan tiwelij tikitaj ika nochí toyolo:

In Señor nechpalewia.

Mach nikinmiimakasi in tlakaj maski ma nechtoktikan tlan amo kuale.

⁷ Xikinmelnamikikan in tokniwan katlej oamechyekankej ipan iojwi in toTajzin Dios, katlej oamechmatiltijkej itlajtol in Dios. Xikyejyekokan nochí tlan kuale tlan yejwan okichijkej nikuak ok oyolitokaj, iwan xitlaneltokakan inawak Dios ijkón ken yejwan otlaneltokakej.

⁸ Jesucristo mach keman mopatla. Desde ya wejkawitl, asta axan, iwan iktlanke (ik tlami) mach keman mopatlas. ⁹ Amo ma amechkajkayawan ika oksekimej tlamachtilltin katlej mach ijki tlan kiteititiaj. Moneki ma timoyekketzakan ipan toyolo ika iteiknotlamachilis in Dios. Amo xikyejyekokan ke anweliskej anmoyekketzaskej inawak Dios por ankikawaskej de ankikuaskej itlaj tlakuale. Porke yon tlamachtile mach kinpalewia akinmej ijkón kichiwaj.

¹⁰ Tejwan tikpij se artal iwan de ompa mach itlaj welis kikuaskej in tiopixkej katlej ok tekipanoaj itech mantajtiopan. Kijtosneki, nochtin katlej kinekiskej momakixtiskej ika itlanawatil in Moisés, mach itlaj welis kinpalewis imikilis in Cristo. ¹¹ Ya wejkawitl in weyi tiopixke okitkia inmeso yolkamej ijtitk tiopan Kan Tlixpantzin. Ompa okixpantiliaya in toTajzin Dios yon estle para ika okintlapojojpolwiaya in tlakaj, pero innakayo de yonmej yolkamej katlej okinmiktiaya j okinchichinoayaj kalan de yen weyikan. ¹² Ijkón noiiki in Jesúz otlajyowij iwan okimiktijkej kalan de yen weyikan, iwan ika ieso okinchipaj in tlakaj de intlajtlakol. ¹³ Por yonik

tejwan noijki moneki ma tikisakan kalan para ayakmo tieskej ijtik yon weyikan ika intiotlamachtil in tlakaj de Israel. Iwan ijkón tieskej inawak Jesús. Iwan ma tikxikokan in pinawalistle ijkón ken Yej opanok. ¹⁴ Porke nian ixko yin tlaltikpak mach onkaj nion se weyikan katlej yetos iktlanke (ik tlami). Pero tejwan tikchiah se weyikan katlej satepan yetos. ¹⁵ Por yen tlan Jesucristo okichij por tejwan, moneki nochipa ma tikweyikixtikan toTajtzin Dios. Yon weyikixtilistle kijtosneki yen tlamanale katlej moneki tikmakaskej in toTajtzin Dios. Moneki kiné ma tikweyikixtikan itoka in toTajtzin Dios ika toten. ¹⁶ Amo xikelkawan de ankichiwaskej tlan kuale iwan xikinpalewikan oksekimej ika tlan ankipiaj. Porke nochí yon tlamanle kipaktia in toTajtzin Dios kej yeskia ankimakaj se tlamanale ika tlasojkamachilistle.

¹⁷ Xikintlakitakan katlej amechyekanaj iwan xikchiwakan tlan yejwan amechnawatiaj. Porke yejwan kimonekuitlawiaj namoanima porke yejwan kimatij nik kipiaj de kitemakaskej kuenta inawak Dios. Moneki xikintlakitakan para yejwan ma tekipanokan ika pakilstle, iwan amo ika neyolkokole. Porke mach itlaj amechpalewis tla amejwan ankinyolkokoskej.

¹⁸ Ximotiotzajtzilikan por tejwan. Tejwan kuale tikmatij ipan totlalnamikilis nik tikatej kuale inawak Dios, porke nochipa tiknekij tikchiwaskej nochí tlan kuale. ¹⁹ Nikneki ximotiotzajtzilikan inawak Dios por nej, para Dios ma nechkawili ma namechitati niman.

Okonintlajpalojkej iwan okonintiochijkej in tlaneltokakej hebreos

²⁰ In Dios katlej techmaka yolosewilistle, katlej okiyolitij in toSeñor Jesucristo satepan de omikke, in toweyi Tlajpixke de tejwan tiichkawan, katlej ika ieso okichikaj iktlanke (ik tlami) in yankuik akuerdo katlej nochipa yetos, ²¹ ma amechmaka nochí tlamanle tlan kuale katlej moneki ankitekipanoltiskej para ankichiwaskej tlan Dios kineki. Iwan por medio de Jesucristo ma kichiwa itech amonemilis tlan Dios kipaktia. Ma tikweyikixtikan Cristo nochipa. Ijkón ma yeto.

²² Nokniwan, namechtlatlawtia xikresibirokan ika kuale yin amatlajkuilole katlej onamechijkuililij kanaj keski tlajtole para ika namechnajnawatia. ²³ Nikneki namejwan xikmatikan nik in tokni Timoteo yokikixtijkej de kan telpiloyan, mach ok tzaktok. Iwan tla witz niman, nikwikas niikuak nias namechitati.

²⁴ Xikonintlajpalokan nochtin akinmej amechyekanaj, iwan noijki amechontlajpaloa j nochtin tokniwan yolchipawakej. In tokniwan de nian país de Italia amechontlajpaloa j.

25 Ma Dios amechtiochiwa aminochtin. Ijkón ma yeto.

SANTIAGO ITLATITLANIL IN DIOS OKIJKUILOJ YIN AMATLAJKUILOLE

Santiago okintlajkuililij katlej xintokej itech noch i tlaltik-pak

¹ Nej niSantiago, niitekipanoj in toTajzin Dios iwan toSeñor Jesucristo. Namechijkuililia yin amatlajkuilole iwan namechtajpaloa namejwan anmajtlaktin iwan ome familias de Israel, katlej anxintokej itech noch i tlaltikpak.

Ixtlamachilistle katlej Dios kitemaka

² Nokniwan, moneki sa tekitl xipakikan nijuak anpanoskej itlaj tlajyowilstle. ³ Porke ya ankimatiq nik in Dios amechyejyekoa itech namotlaneltokalis para kitas kox melawak ankineltokaj. Para ijkón namejwan anka-sij chikawalistle para welis okachi antlaxikoskej. ⁴ Iwan xikxikokan kuale para ijkón anyeskej antlakaj katlej ankipiaskej noch ajsitok namotlaneltokalis iwan namotlalnamikilis, iwan ijkón ankipiaskej noch tlan moneki para anyeskej ken Dios kineki.

⁵ Tla akaj de amejwan kipoloa ixtlamachilistle, ma kitlajtlanili in Dios, iwan Dios kimakas. Porke Dios kineki kinmakas miek ixtlamachilistle akinmej kitlajtlaniliskej, iwan Dios amo techajwa nijuak tiktajtlaniliaj. Tones tla akaj kitlajtlanilis, Dios kimakas. ⁶ Pero ma kitlajtlani ika noch i tlaneltokalis, iwan amo ma kimolwi kox kimakas o noso amo. Porke akin ijkón kimolwia, yon ken atl katlej motlatlamotla iwan kiitki in ejekatl san kanik kineki. ⁷ Akin ijkón kimolwia, amo ma kiyeyjyeko nik in toSeñor itlaj kimakas. ⁸ Porke akin kipia ome itlayeheyekol, yon mach kajki seguro nion itech itlaj de tlan kichiwa.

In tlaneltokakej amo ma kitlalikan inyolo itech rikoyotl

⁹ In tokni katlej pobre, ma paki porke inawak Dios sa tekitl miek ipatij. ¹⁰ Iwan tokni katlej riko, ma paki inawak Dios de ke irikoyyo mach itlaj ipatij. Porke in riko yon ken se xochitl katlej mach wejkawa iwan waki. ¹¹ Nijuak kisa in tonale iwan tlatotonia chikawak, in xiwitl waki iwan ixochio tepewi, iwan ikuakualtzinyo poliwi. Noijki ijkón panos in riko ika noch tlan kipia nijuak mikis.

In tlaneltokakej moneki kixikoskej nijuak itlaj panoskej

¹² Ma paki in tlakatl katlej kixikos noch tlan panos, porke nijuak kuale yokixikoj noch, kiresibiros kej se korona in yankuik nemilistle katlej mach keman tlamis, katlej Dios

yokijtoj kinmakas akinmej kitlasojojtaj. ¹³ Iwan nijuak se tlajtlakole mitzyoltilana para xikchiwa tlan amo kuale, amo xikmolwi nik yen Dios mitzyoltilana para xitlajtlako. Porke in Dios mach techyoltilana para ma titlajtlakokan iwan nion Yej mach itlaj weli kiyoltilana para ma tlajtlako. ¹⁴ Sino, nijuak akaj kichiwa tlan amo kuale es porke kimokawilia ma kitlani ielewilis mach kuale. Iwan ijkón nik se wetzi ipan tlajtlakole. ¹⁵ Yon elewilistle mach kuale kiyokoya (kiyolitia) in tlajtlakole. Iwan yon tlajtlakole nijuak se yokichij, ya se miki iwan mach ok keman welis se yetos iwan Dios.

¹⁶ Notetlasojkaikniwan, amo ximokajkayawan. Amo xikyejyekokan yen Dios amechyoltilana para xitlajtlakokan. ¹⁷ ToTajtzin Dios katlej kajki ilwikak, okichij in tonale, in metztle iwan nochtin in sitlaltin. Yej techtliokolia iwan techmaka nochti tlan kuale. Iwan Yej itlanex mach keman mopatla ken tonale mopapatla nijuak kitzakuilia in mixtle. ¹⁸ Yej, okimonekiltij, otitlakatkej oksemi nijuak otikneltokakej itlajtol katlej melawak. Yej okimonekiltij tejwan achtoj ma tiekan tiikonewan de nochtin katlej satepan noijki yeskej ikonewan.

Ma tikkakikan itlajtol in Dios iwan ma tikchiwakan tlan techilwia

¹⁹ Por yonik, notetlasojkaikniwan, aminochtin namejwan kuale xitlakakikan nijuak akaj amechtlapowia. Pero amo ximomachtikan san niman xitlajtowan, iwan nion amo ximomachtikan san niman xikualanikan. ²⁰ Porke nijuak se tlakatl kualani, mach itlaj weli kichiwa tlan Dios kipaktia. ²¹ Ijkón kiné, xikkawakan se lado nochti tlan amo chipawak iwan nochti tlamantle mach kuale katlej ankichiwaj. Ika amoyolo yamanke xikneltokakan in kuale tlajtole katlej yomotookak ipan namoyolo, porke yon kuale tlajtole kipia poder para amechmakixtis.

²² Pero xikchiwakan tlan amechilwia in yon kuale tlajtole, iwan amo san xikkakikan. Porke akin san kikaki mokajkayawa san yej iselti. ²³ Iwan tla akaj san kikaki in yon kuale tlajtole iwan amo kichiwa tlan kilwia, yon kej yeskia se tlakatl katlej motlata itech se teskatl. ²⁴ Iwan satepan de tlami motlata, kikawa in teskatl, iwan niman kelkawa kenamij mota. ²⁵ Pero akin kitlalia kuidado itech yon tlanawatile katlej sa tekitl kuale, iwan kuale moyekketok itech yon tlanawatile, in yon tlakatl ma paki porke kichiwa tlan kilwia. Itlajtol in Dios techkawilia ma tikchiwakan tlan Yej kineki.

²⁶ Tla akaj kiyejyekoa nik sa tekitl tlaneltoka inawak Dios, pero amo motlajtolijmati de tlan kijta, inewian mokajkayawa iwan mach melawak tlaneltoka inawak Dios. ²⁷ Akin melawak tlaneltoka inawak toPapan Dios iwan amo kichiwa

itlaj biero, toneses kijtosneki kinpalewia katlej iknomet iwan katlej viudajtin ika tlan kinpoloa, iwan momalwia para amo tlajtlakolchiwas ika tlan amo kuale de tlan onkaj ixko yin tlaltikpak.

2

Amo xikintlasojtlakan san sekimej iwan oksekimej amo

¹ Nokniwan, namejwan katlej ankineltokaj in toweyi Señor Jesucristo, amo xikintlasojtlakan san sekimej iwan oksekimej amo. ² Por ejemplo, tla se tlakatl kalakis tiopan kan namejwan anmololoaj iwan kitki ianiyo de oro iwan konakijtiw itzotzol katlej kuale. Iwan tla noijki kalakis se tlakatl pobre katlej konakijtiw itzotzol katlej ya tlajtlantok, ³ iwan tla namejwan ankilwiskej katlej konakijtiw kuale itzotzol: “Ximotlali nian itech yin kuale siya”, iwan katlej pobre ankilwiaj: “Tej ompa ximoketo, o noso ximotlali nian ipan tlale”, ⁴ tla namejwan ijkón ankichiwaj, kijtosneki ankintlasojtlaj san sekimej iwan oksekimej amo, iwan ankichiwaj ika namotlayeje yekolis mach kuale.

⁵ Notetlasojkaikniwan, xikkakikan. Dios okinpejpenke katlej pobrestin de ixko yin tlaltikpak, para ma yekan rikojtin itech intlaneltokalis, iwan para kinmaxkatis in yankuik nemilistle kan Dios tlanawatia, ijkón ken Yej okijtoj kinmakas akinmej kitlasojtlaj. ⁶ Pero namejwan ankinpinatiaj in pobrestin. ¿Amo yejwan in rikojtin katlej amechtlajyowiltiaj iwan amechwikaj ika chikawak inmak in tekiwajkej? ⁷ ¿Amo yejwan noijki tlajtoaj biero de itokatzin in toSeñor Jesucristo katlej ika itokatzin timotokayotiaj tikristianostin?

⁸ Ijkón kiné, tla amejwan ipan melajka ankichiwaj tlan kijta in weyi tlanawatile de Cristo katlej kijta: “Xiktlasojtla mokni ken tej timotlasojtla”, toneses, kijtosneki ankichiwaj tlan kuale. ⁹ Pero tla namejwan ankintlasojtlaj san sekimej iwan oksekimej amo, ankichiwaj tlajtlakole, iwan Dios amechtlajtlakoltis porke mach ankichiwaj tlan kijta itlanawatil. ¹⁰ Tla se tlakatl kichiwa nochí tlan kijta itlanawatil in Dios, pero ixkopanoa se tlanawatile, kijtosneki tlajtlakojtok itech nochtin in tlanawatiltin. ¹¹ Porke Dios okijtoj: “Amo ximomekati”, iwan noijki okijtoj: “Amo xitemiki.” Toneses, tla akaj amo momekatia pero temiktia, kijtosneki ixkopanoa in tlanawatile porke amo kichiwa tlan kijta. ¹² Namejwan nijuak itlaj ankijtoskej iwan nijuak itlaj ankichiwaskej, xikmomakakan kuenta nik in Dios amechixkomakas (omechtzonmanas) ika yon tlanawatile katlej techkawilia ma tikchikwakan tlan Dios kineki. ¹³ Porke akinmej amo teiknomatkej, Dios noijki mach kinmiknomatis nijuak kinmixkomakas

(kintzonmanas). Pero akinmej teiknomatkej, kisaskej kuale nikuak kinmixkomakaskej.

Tlan tikneltokaj iwan tlan tikchiwaj

¹⁴ Nokniwan, ¿tlan kipalewis tla se tlakatl kijtos kineltoka Dios, pero mach kichiwa tlan kineltoka? ¿Kox welis kimakixtis itlaneltokalis? Pues amo. ¹⁵ Tla se tokni siwatl o noso okichtle amo kipia itzotzol iwan amo kipia tlan kikuas, ¹⁶ iwan tla akaj de amejwan kilwis: “Xiwia ika kuale, ximotlajtlakenti iwan xitlakua”, pero amo kimaka nion siera se tzotzole iwan nion siera se tlaxkale, ¿yon kox itlaj kipalewis de tlan kilwia? ¹⁷ Ijkón noijki, tla akaj kijta kineltoka Dios pero mach kichiwa tlan kineltoka, mach itlaj ipatij kiné tlan kineltoka, yon kijtosneki miktok itlaneltokalis.

¹⁸ Pero akaj welis kijtos: “Tej tikijta tikneltoka Dios, pero nej nikchiwa tlan nikneltoka.” Iwan akin ijkón kijtos, nej nikneki nikilwis nik mach welis tinechititis nik melawak tikneltoka Dios porke mach tikchiwa tlan tikneltoka, iwan nej nimitzititis nik melawak nikneltoka in Dios porke nikchiwa tlan nikneltoka. ¹⁹ Tej tikneltoka nik onkaj san se Dios, iwan yon kuale tlan tikneltoka. Pero xikmati nik in demoniojtin noijki kineltokaj, iwan kimakasij asta papatlakaj (bibiokaj) porke kineltokaj. ²⁰ Pero tej katlej titlapoaj kej yeskia tikuatlapolojtok, xikmati nik tla tejwan tikijtoskej tikneltokaj Dios iwan amo tikchiwaskej tlan technawatia, toneses kijtosneki mach melawak tikneltokaj Dios. ²¹ Por yonik in Dios okijtoj nik in ya wejkawitl toweyitaj Abraham mach ok okipiaya itlaj tlajtlakole, porke Abraham okichij tlan Dios okilwij nikuak okimaktilij ikone Isaac ipan artal. ²² Toneses Abraham mach san okineltokak sino noijki okichij tlan Dios okilwij, iwan ijkón okiteititj nik melawak kineltoka. ²³ Iwan ijkón omochij tlan kijta in tiotlajkuilole: “Abraham okineltokak in Dios, iwan ika itlaneltokalis Dios okiresibiroj kej se tlakatl katlej mach kipia tlajtlakole.” Iwan Abraham okinotzayaj amigo de Dios.

²⁴ Ijkón kiné, ya ankimati j nik in Dios kiresibiroa se tlakatl kej yeskia mach ok kipia itlaj tlajtlakole noijki por yen tlan kichiwa, iwan amo san por yen tlan kineltoka. ²⁵ Iwan Dios noijki okiresibiroj in Rahab kej yeskia se siwatl katlej mach ok okipiaya tlajtlakole. Porke in Rahab, katlej oyeka momekatij, kuale okinresibiroj in tlastlakojkej iwan okinpalewij ocholojkej, iwan okintitlanke ma wian itech oksé ojtle. ²⁶ Porke tla totlalnakayo mach ok kipias toanima, mach ok tiyolitoskej. Ijkón noijki, tla tikijtaj tikneltokaj Dios iwan amo tikchiwaj tlan tikneltokaj, kijtosneki tikatej kej se mikkatl katlej mach ok weli kineltoka Dios porke yomikke.

3*Tonenepil*

¹ Nokniwan, amo san akin ma kineki yetos tlamachtij de itlajtol in Dios. Porke Dios okachi techtlajyowiltis tejwan katlej titlamachtiaj, tla amo titlamachtiaj kuale. ² Kemanti tinochtin tikchiwaj tlan amo kuale. Pero tla akaj amo keman kijta itlaj tlan amo kuale, kijtosneki yon tlakatl sa tekitl kuale, iwan kualti kinawatia nochi itlalnakayo. ³ Nijuak tikinkamateposotiaj in kabayojtin para ma techtlakitakan, tejwan tикинwikaj san kan tejwan tiknekij. ⁴ Xikinmitakan noijki in barkojtin. Maski sa tekitl wejweyin iwan maski sa tekitl chikawak in ejekatl katlej kintopewa, in chofertin de yonmej barkojtin welij kinwikaj ika se tlamanle tzikitzin kej bolante, iwan welij kinwikaj san kan yejwan kinekij. ⁵ Ijkón noijki in tonenepil. Maski tzikitzin katlej tikpixtokej itech totlalnakayo, nijuak tlajtoa weli kinkojkokoa miekej. Ken se tlitzintle weli kichichinoa se weyi kuawyoj. ⁶ Iwan tonenepil yon kej se tlrtl katlej tlaxotlaltia. Kajki itech totlalnakayo iwan kijta nochi tlan amo kuale tlan onkaj ixko yin tlaltikpak. Techijtlakoa nochi ika tlan kijta in tonenepil. Kej yeskia kixotlaltia nochi in tonemilis iwan mach weli se kisewia, kej yeskia kixotlaltia ika tlrtl de tlajtlakole katlej walajtok de tliko. ⁷ In tlakatl weli kinmansojtilia nochi tlamanle de yolkamej, totomej, koamej, iwan yolkamej katlej katej ijtik atl, iwan asta weli kintoktia ma kichiwakan tlan yej kineki. ⁸ Pero in tlakatl mach weli kimansojtilia inenepil. In nenepile sa tekitl mach kuale iwan amo keman mosewia de tlajtoa, iwan teijtlakoj kej yeskia veneno katlej temiktij. ⁹ Ika tonenepil tikweyikixtiaj in toPapan Dios, iwan noijki ika tикинwikaltiaj in tlakaj katlej Dios okinchij ken Yej. ¹⁰ De itech se kamakte kisa tlan kuale iwan tlan amo kuale de tlan se kijta. Nokniwan, amo ijkón ma yeto. ¹¹ ¿Kox weli kisa de itech se ameyale atl tzopelik iwan atl chichik? ¹² Nokniwan, ¿kox weli kitlakilia tempixkistle se igoskuawitl, o noso kox weli kitlakilia igos se uvaskuawitl? ¡Pues amo! Nimpot mach welis kisas atl tzopelik iwan atl puyek de itech se ameyale.

Katlej melawak ixtlamachilistle

¹³ Tla entre namejwan onkaj se katlej momachilia kipia ixtlamachilistle iwan sa tekitl kimati, ma kiteititi kiné itech inemilis nik kichijtok tlan kuale, iwan amo ma moweyineki por tlan kichiwa. Ijkón kemaj kiteitis nik kipia ixtlamachilistle. ¹⁴ Pero tla namejwan ankipiaj nexikolistle iwan amoweyinekij, tones amo ximoweyinekikan ika namoixtlamachilis. Porke tla ijkón ankichiwaj, kijtosneki antlaka-

jkayawaj itech tlan melawak. ¹⁵ Porke yon ixtlamachilistle mach witz de Dios, sino yon ixtlamachilistle kisa de ixko yin tlaltikpak, kisa san de yen tlakaj iwan de yen diablo. ¹⁶ Porke kan onkaj nexikolistle iwan motlawelitaj se iwan oksé, tones mach akaj moyekwika iwan onkaj nochi tlamantle katlej mach kuale. ¹⁷ Pero akin kipia ixtlamachilistle katlej witz de Dios, nemi ika inemilis chipawak. Mach tenonotzke, kímati tetlasojtla, kuale tlakatl, teiknomatke iwan kitechwilia tlan kuale. Amo san mawiltia, iwan nion amo teixkajkayaj. ¹⁸ Iwan tlakaj katlej kitookaj yolosewilistle, yonmej kipixkaskej chipawkanemilistle.

4

Amo ma tiekan tiikontraswan Dios

¹ ¿De kanin witz nijuak anmokualaniaj iwan ankimomagaj (onkimomakaj) entre namejwan? Yon witz de yen mach kuale amotlalelewilis porke ankinekij ankipiaskej nochi tlan ankitaj, iwan namotlalnakayo kineki kipias tlan Dios mach kipaktia. ² Namejwan ankinekij itlaj, iwan komo mach anwelij ankipiaj, antemiktiaj. Anmoxikoaj de itlaj, iwan komo mach anwelij ankipiaj, ankualanij iwan antemagaj (ontemakaj). Mach ankipiaj tlan ankinekij, porke mach ankitlajtlaniliaj in Dios. ³ Iwan tla ankitlajtlaniliaj, mach amechmaka porke ankitlajtlanij ika amoelewilis mach kuale. Porke ankinekij san para ika anmopaktiskej. ⁴ ¡Melawak mach ankitlakitaj in Dios! Porke tla ankinekij ankichiwaskej ken kichiwaj in tlaltikpaktlakaj katlej mach kixmatij Dios, kijtosneki anmokuepaj kej ikontraswan Dios. Porke akin kineki kipias iyolo ken kipiaj in tlaltikpaktlakaj, kijtosneki mokuepa kej ikontra in Dios. ⁵ Por yonik in tiotlajkuilole kijta: “In Espíritu Santo katlej Dios otechmakak ipan toyolo, Yej techtlasojtla iwan mach kineki akaj oksé ma tiktlasojtlakan, sino san Yej.” ⁶ Pero Dios ika iteiknotlamachilis techpalewia para ma tikchiwakan tlan kuale tlan Yej kineki. Por yonik in tiotlajkuilole kijta: “Dios mach kinneki katlej moweyinekij, pero ika iteiknotlamachilis kinpalewia katlej moiknomatij inawak.” ⁷ Por yonik kiné, ximotemaktikan (ximotemaktilikan) inawak Dios. Ximochikawan para amo ankichiwaskej tlan kineki in diablo, iwan ijkón yej cholos de amonawak. ⁸ Ximijkuanikan inawak Dios, iwan Yej mijkuanis amonawak. Namejwan katlej antlajtlakolejkej, ximochipawakan de yen tlajtlakole katlej ankichiwaj. Iwan namejwan katlej ankinekij ankitlasojtlaskej Dios iwan noijki ankinekij ankitlasojtlaskej tlan onkaj ixko yin tlaltikpak, ximoyolchipawakan. ⁹ Sa tekil ximoyolkokokan iwan

xichokakan. Namowetzkalis ma mokuepa chokilstle, iwan namopakilis ma mokuepa neyolkokole.¹⁰ Ximoiknomatikan inawak Dios, iwan Yej amechweyijkatlalis.

Amitlaj ma tikijtowan tlan amo kuale de se tokni

¹¹ Nokniwan, amo xikijtowan itlaj tlan amo kuale de se iwan oksé. Akin tlapoa mach kuale de se tokni o noso kitlajtlakolmamaltia, kijtosneki mach kitlakita itlanawatil in Dios katlej technawatia ma timotlasoijtlakan tinochtin. Akin ijkón kichiwa kijtosneki mach kiwelita in tlanawatile. Mach ok kichiwa tlan kijta in tlanawatile porke ya mochiwa kej jues para kijtos kox kuale o noso amo kuale itlanawatil in Dios. ¹² Pero onkaj san se katlej techmaka itlanawatil, yen toTajtzin Dios katlej Jues. Iwan Yej noiiki welis techmakixtis o noso techixpolos ijtk tliko. Pero, ¿akin tej para tikijtos kox kuale o noso amo kuale tlan se kichiwa?

Mach tikmatij tlan tlapanos in mostla

¹³ Axan, xikkakikan, namejwan katlej ijkín ankijtaj: “Axan o noso mostla tiaskej itech nekáj weyikan o noso itech nekáj oksé weyikan, iwan ompa titlanamakaskej se xiwitl iwan tik-tlaniskej tomin.” ¹⁴ Iwan nion mach ankimatij tlan tlapanos in mostla. ¿Kox ankimatij nik ok anyolitoskej? Porke namone-milis yon kej yeskia ken mixtle katlej walmonextia iwan noi-jki san niman walpojpoliwi. ¹⁵ Okachi kuale ijkín xikijtowan: “Tla in toSeñor kimonekiltis ok techmakatos tonemilis, tones tikchiwaskej yin tlamantle o noso tikchiwaskej nekáj oksé tlamantle.” ¹⁶ Pero namejwan mach ijkón ankijtaj, sino yej anmoweyinekij, iwan annomachiliaj kuale tlan ankichiwaj. Nochi yon namoweyinekilis mach kuale. ¹⁷ Iwan tla se tlakatl kigmati tlan kuale katlej moneki kichiwas iwan amo kichiwa, tones in yon tlakatl kichiwa tlajtlakole.

5

Ma kikakikan katlej rikojtin

¹ ¡Xikkakikan namejwan katlej anrikojtin! Xichokakan iwan xitzajtzikan por yen tlajyowilistle katlej anpanoskej.

² Namorikojyo yopalanke, iwan katlej kualemej namotzot-zolwan yokuakualokej. ³ Namooro iwan namoplata mach ok itlaj inpatij kej yeskia yoxawaloakej. Iwan yon kiteiti-tia nik okachi amechtekipachoa in tomin. Namejwan an-pojpoliwisej ijkón ken namotomin pojpoliwis, kej yeskia amechchichinos in tlitl, porke namotomin mach amech-palewis. Ya ankololojkej miek rikoyotl para itech nekáj

sa iyakatlanka tonaltin.⁴ Xikkakikan namejwan anrikotjin. Namejwan mach ankintlaxtlawiaj namotekipanoykawan katlej ankintlakewaj ma amechpalewikan itech namomil. San ankinkajkayawaj. Pero yejwan chokaj inawak Dios. Iwan Dios katlej tlayekanke de soldadojtin de ilwikak yokinkakilij inchokilis in yonmej tekipanojkej.⁵ Nian ixko yin tlaltikpak namejwan ankipiaj noch i tlan ankinekij iwan sa tekitl anmopaktiaj. Namejwan ya anmotomajkej ken yolkamej katlej yoajsik tonale para se kinmiktis.⁶ Namejwan ankintlajtlakoltiaj iwan ankinmiktiaj katlej kualtin tlakaj, iwan yejwan nion mach itlaj welij kichiwaj para mopalewiskej.

Ma timochiakan ipan yolik iwan ma timotiotzajtzilikan

⁷ Por yonik, nokniwan, namejwan ximochiakan ipan yolik asta ikuak toSeñor ma wiki. Se katlej tlatoookak kichia ipan yolik kipixkas in tlakilotl, iwan kichia ipan yolik ma ajsiki in tonaltin de kiawtlaj para ma tlatlaki. Kichia in yakinika kiawatl iwan noijki kichia in kiawatl katlej satepan witz.⁸ Namejwan noijki ximochiakan ipan yolik, iwan ximoyolojchikawakan, porke ya ajsi in tonale para walmuikas in toSeñor.⁹ Nokniwan, amo ximoistlakawijtinemikan se iwan oksé, porke tla ijkón ankichijtoskej, Dios amechtlajtlakoltis. Iwan Dios katlej Jues mach ok wejkawas para witz.¹⁰ Nokniwan, in ya wejkawitl profetajtin katlej otetlapowiayaj de itlajtol in Dios, yejwan okixikojkej noch i tlajyowilistle tlan opanokej. Tones namejwan noijki moneki xikxikokan tlan anpanoskej.¹¹ Porke tejwan tikmatij nik kipiaj miek pakistle akinmej kixikoaj noch i tlajyowilistle. Namejwan ya ankikakej kenik in Job okixikoj in tlajyowilistle tlan opanok, iwan ya ankimatij kenik in Señor okitiochij ika tlan kuale nijuak otlanke otlajyowij. Porke in toSeñor sa tekitl tetlasoxtlak iwan teiknomatke.

Amo xikijtowan Dios tlachixtok

¹² Axan, nokniwan, nikpia se tlajtole katlej importante iwan nikneki namechilwis. Nijuak itlaj ankijtoskej, amo xikijtowan tlachixtok in ilwikak, o noso tlachixtok in tlaltikpak, o noso tlachixtok itlaj oksé tlamantle nijuak ankijtoskej nik melawak tlan ankijtaj. Okachi kuale nijuak ankijtoskej “Kuale kajki”, ma yeto kiné kuale kajki, iwan nijuak ankijtoskej “Amo”, ma yeto kiné amo. Para ijkón Dios amo ma amechtlajtlakolti.

Moneki ma se motiotzajtzili ika tlaneltokalistle

¹³ Tla akaj de amejwan tlajyowijtok, ma motiotzajtzili inawak Dios. Tla akaj paki, ma kitlakuikili in toTajzin Dios.

¹⁴ Tla akaj mokokoa, ma kinnotza in tiopantlayekanek para ma motiotzajtzilikan por yej, iwan ma kitlalilik an-
itokatzin in toSeñor. ¹⁵ Iwan namotiotzajtzilis katlej an-
kichiwaskej ika tlaneltokalistle kipajtis in yon kokoxke, iwan
toSeñor kewaltis. Iwan tla okichij itlaj tlajtlakole, in Dios
kitlapojpolwis. ¹⁶ Por yonik, xikmokuitikan namotlajtlakol
se iwan oksé, iwan ximotiotzajtzilikan se iwan oksé para
xipajtikan. Se katlej yolchipawak nikuak motiotzajtzilia
ika nochí iyolo, itiotzajtzilis sa tekitl kipia poder iwan weli
kichiwa miek tlamantle. ¹⁷ In profeta Eliás oyeka se tlakatl
noijki ken tejwan. Iwan nikuak omotiotzajtzilij ika nochí
iyolo para amo ma kiawi, tonses mach ok okiawik ixko yin
tlaltikpak eyi xiwitl iwan tlajko. ¹⁸ Iwan satepan oksemi
omotiotzajtzilij para ma kiawi, iwan oksemi okiawik ixko yin
tlaltikpak iwan otlakke miek tlakilotl.

¹⁹ Nokniwan, tla akaj tokni kikawa iojwi in Dios katlej
melawak, iikuakón moneki akaj de amejwan ma kipalewi
ma mokuepa oksemi inawak Dios. ²⁰ Iwan akin kipaleewis
ma mokuepa inawak Dios se katlej nemí itech iojwi mach
kuale, kijtosneki kimakixtilia ianima de itech tlajtlakolej de
yen mikilistle. Iwan nikuak akaj ijkón kichiwa, ikuakón
toTajtzin Dios tetlapojpolwia de miek tlajtlakole.

SAN PEDRO ITLATITLANIL IN DIOS YAKINNIKA OKIJKUILOJ YIN AMATLAJKUILOLE

Pedro okintlajkuililij in tokniwan tlaneltokakej katlej xin-tokej itech oksekimej paismej

¹ Nej niPedro, niitlatitlanil in toSeñor Jesucristo. Namecht-lajkuilia namejwan katlej ankajtejkej amochan iwan anya-jkej anmochantitoj intech oksekimej paismej de Ponto, de Galacia, de Capadocia, de Asia iwan de itech país de Bitinia.

² Dios oamechpejpenke desde ya wejkawitl iwan okimatia nik se tonale namejwan ankineltokanij in toSeñor Jesucristo para ijkón anyeskej ikonewan Dios. Iwan por yonik in Espíritu Santo oamechyolchipaj ika ieso in toSeñor Jesucristo para xi-welikan xiktlatitakan. Ma Dios kipia weyi iteiknotlamachilis amonawak iwan ma amechmaka yolosewilistle.

Tonemilis katlej tikpiaj inawak Jesucristo

³ Ma tikweyikixtikan toTajtzin Dios katlej iPapan toSeñor Jesucristo. Porke toTajtzin Dios okipixke weyi iteiknotla-machilis towan iwan otechmakak yankuik nemilistle inawak Jesucristo katlej Yej okiyolitij satepan de omikke. Iwan por yonik axan tejwan tikchiaj tlan satepan techmakas. ⁴ Porke ompa ilwikak techpialijtok tlan Yej yokijtoj techmakas, katlej mach palanis iwan nion mach ijtlakewis, iwan nion mach pojpoliwis ken xochitl nijuak piliwi. ⁵ Iwan komo namejwan ankipiaj tlaneltokalistle inawak Dios, por yonik in Yej amech-monekuitlawijtos ika ipoder. Iwan nijuak ajsis in sa iyakat-lanka tonale, ikuakón Yej amechititis kenik amechmakixtis.

⁶ Por yonik moneki sa tekitl xipakikan, maski ok antlajy-owiskej miek tlamantle de neyolkokole kanaj ok keski tonale.

⁷ Iwan ijkón ken nijuak in tlakaj kiyejyekoaj in oro ijtit tlitl para kipiaskej in oro katlej sa tekitl kuale, toTajtzin Dios no ijkón kichiwa towan. Yej kitekawilia ma tipanokan tlajyow-ilistle para kiyejyekos totlaneltokalis para kitas kox melawak kuale tikneltokaj. Iwan nijuak kiyejyekoa totlaneltokalis, yon okachi ipatij iwan amo ken oro katlej ajsi tonale tlami. Tones, tla tejwan melawak kuale tikneltokaj in toSeñor Je-sucristo, in toTajtzin Dios Yej techweyikixtis, techweyimatis iwan techpialis tetlakitalistle nijuak in toSeñor Jesucristo walmuikas oksemi.

⁸ Namejwan ankitlasojtlaj in toSeñor Jesucristo maski mach keman ankitaj. Maski namejwan axan mach ankitaj, namejwan ankineltokaj, iwan sa tekitl anpakij. Iwan yon pakilstle sa tekitl weyi katlej ankipiaj ipan amoyolo ke asta mach anwelij ankijtaj ika tlajtole. ⁹ Namejwan ankipiaj pakilstle porke Dios kimakixtia namoanima ijkón ken Yej okijtoj kichiwas tla amejwan ankineltokaskej.

¹⁰ Ya wejkawitl in profetajtin okijuilojkej kenik in Dios kipias weyi iteiknotlamachilis towan, pero yejwan mach okimomakakej kuenta tlan okijuilojkej. Yejwan okimomachtijkej tlan okijuilojkej porke okinekiaj kimatiskej kenik in Dios techmakixtis. ¹¹ Cristo iEspíritu oyeka intech in profetajtin, iwan okinmakak tlalnamikiliste para ma kikuilokan tlan Cristo panoani de yen tlajyowilistle. Iwan noijki okijuilojkej kenik in Cristo satepan kipiani weyi tlanawatijkayotl. Yejwan okinekiaj kimatiskej akin yon tlakatl katlej ijkón tlajyowiani iwan keman ijkón tlapanoani. ¹² Pero Dios okichij ma kimomakakan kuenta ke tlan okijuilojkej mach para yen tlakajtin katlej oyekaj itech yon tiempo. Sino okijuilojkej para yen tejwan katlej axan tikkakij itlajtol in Dios para ma tikmomakakan kuenta. Iwan katlej oamechmatiltijkej in kuale tlajtole katlej temakixtia, oamechmatiltijkej ika ipoder in Espíritu Santo katlej Dios okualtitlanke de ilwikak. Iwan tlan namejwan oamechmatiltijkej kijtosneki yen yon tlajtole katlej ya wejkawitl okijuilojkej in profetajtin. Iwan onkaj sekin tlamantle ke asta yen angelestин kinekij kimomakaskej kuenta nochi tlan Dios techilwia de yen Cristo.

Dios kineki ma tchipawkanemikan

¹³ Por yonik, xikchiakan namotlalnamikilis para ankichiwaskej tlan kuale. Xikchiakan ika nochi amoyolo tlan Dios ika iteiknotlamachilis amechmakas nijuak in toSeñor Jesucristo walmuikas oksemi. ¹⁴ Moneki xiktlakitan Dios porke namejwan anikonewan. Ayakmo xitlajtlakokan ika namotlalnakayo ken achtoj ankichiwayaj nijuak ayamo ankixmatiaj itlajtol in Dios. ¹⁵ Sino, moneki ke nochi tlan ankichiwaskej xikchiwakan ika amoyolo chipawak, ijkón ken Dios Yej yolchipawak katlej oamechnotzke para xiekan anikonewan. ¹⁶ In tiotlajkuilole ijkín kijta: “Namejwan xiekan anyolchipawakej porke Nej niyolchipawak.”

¹⁷ Tla amejwan ankilwiaj “Papan” in toTajtzin Dios nijuak ankinotzaj, in yon kuale kajki, pero moneki nochipa xiktlakitan asta ikuak anmikiskej de ixko yin tlaltikpak, porke Yej mach kinchichikotlasojtlas in tlakaj nijuak tlaixkomakas (tlatzonmanas). Yej kinmixkomakas nochtin tlakaj katlej kichiwaj tlan kuale iwan katlej kichiwaj tlan amo kuale.

18 Namejwan ankimatij nik mach itlaj ipatij in nemilistle katlej achtoj ankipiayaj. In ya wejkawitl namoweyitajwan no ijkón oyekaj, iwan yejwan oamechititijkej ijkón xikchiwakan. Pero Dios oamechmakixtij de itech yon nemilistle katlej mach itlaj ipatij. Yej okitlaxtlaj para oamechmakixtij iwan mach okitlaxtlaj ika oro o noso ika plata katlej ajsi tonale tlami. ¹⁹ Sino okitlaxtlaj ika ieso in toSeñor Jesucristo nijuak omikke, iwan yon ieso sa tekitl patíoj. Ya wejkawitl in tlakaj okimikiayaj se ichkatzin katlej sa tekitl kuale iwan chipawak para okimakayaj in toTajtzin Dios kej se tlamanale, Cristo no ijkón omikke por tejwan maski mach okipixke nion se tlajtlakole. ²⁰ Ya wejkawitl desde ikuak ayamo oyeka in tlaltikpak, in toTajtzin Dios desde ikuakón okipejpenke in Cristo para ma miki por amejwan iwan ijkón welis amechmakixtis itech yinmej tonaltin porke Yej sa tekitl amechtlasojtla. ²¹ Iwan por yen tlan Cristo okichij, namejwan ankineltokaj in Dios katlej okiyolitij in Cristo satepan de omikke, iwan satepan okimakak weyi tlanawatijkayotl. Iwan ijkón axan namejwan ankitlaliaj nochí namotlaneltokalis inawak Dios iwan ankiciaj se tonale anyeskej inawak.

²² Axan namejwan ya anyolchipawakej porke ankinel-tokakej itlajtol in Dios katlej melawak, iwan ijkón axan welis ankintlasojtlaskej in tokniwan. Por yonik moneki sa tekitl ximotlasojtlakan se iwan oksé ika nochí amoyolo. ²³ Namejwan ya antlakatkej oksemi, pero amo antlakatkej oksemi de intech amotajwan katlej ajsi tonale mikij, sino namejwan antlakatkej itech itlajtol in Dios katlej amechmaka yankuik nemilistle katlej mach keman tlamis. Porke itlajtol in Dios yolitok iwan yetos iktlanke (ik tlami). ²⁴ In tiotlajkuilole ijkín kijta:

Nochtin tlaltikpaktlakaj katej ken xiwitl porke mach wejkawaj.

Iwan nochí tlan kipiaj in tlaltikpaktlakaj yon ken xochitl katlej ajsi tonale piliwi.

In xiwitl waki iwan ixochio tepewi.

²⁵ Pero itlajtol in Dios yetos iktlanke (ik tlami).

Iwan yin itlajtol in Dios yen katlej namejwan ya ankikakej.

2

¹ Por yonik, xikkawakan se lado nochí tlan amo kuale iwan ayakmo keman xitlakajkayawan, ayakmo xiekan anteixkajkayajkej, ayakmo intech ximoxikokan in oksekimej, iwan ayakmo xiekan antlajtoltatlalijkej. ² Ijkón ken sellikonemej kinekij leche para ika moskaltiaj, namejwan noiiki xiknekikan itlajtol in Dios katlej melawak para ika

ximoskaltikan iwan ika ximomakixtikan. ³ Namejwan ya ankimomakakej kuenta nik in Dios sa tekitl kuale tlakatl.

Cristo kajki kej se tetl katlej yolitok

⁴ Ximijkuanikan, kiné, inawak in toSeñor Jesucristo katlej kajki kej se tetl katlej kipia nemilistle. In tlakaj mach okinekej iwan okitlalijkej se lado, pero yon tetl yen katlej Dios okipejpenke. Yon tetl para Dios sa tekitl patíoj iwan sa tekitl kuale. ⁵ Iwan tejwan titlaneltokakej katlej tikpiaj yankuik nemilistle noijki tikatej ken temej katlej Dios ika kichiwa se tiopan katlej mach mota. Iwan namejwan ankitekipanoaj in Dios itech yon tiopan kej antiopixkej anyolchipawakej, iwan ankimakaj in toTajtzin Dios namonemilis kej se tlamanale katlej kipaktia porke namejwan ankineltokaj in Jesucristo. ⁶ Por yonik in tiotlajkuilole noijki kijta:

Xikitakan, Nej niktlalia itech weyikan de Sión se tetl katlej Nej onikpejpenke, katlej okachi kichikajtos notiopan, iwan katlej sa tekitl patíoj.

Iwan akin tlaneltokas inawak yon tetl mach keman mopinatis.

⁷ Para tejwan katlej tikneltokaj tikitaj in yon tetl nik sa tekitl patíoj. Pero in tlakaj katlej amo kineltokaj, mochiwa tlan kijta in tiotlajkuilole:

In tetl katlej in kalchijkej mach okinekej,
omochij yen tetl katlej okachi kichikajtok in kale.

⁸ Iwan noijki mochiwa tlan kijta in tiotlajkuilole:
Se tetl katlej ika motepotlamiskej, se tetl katlej kinmayawis.
Yejwan motepotlamiaj iwan mopolaoj porke mach kineltokaj itlajtol in Dios. Dios ijkón yokitlalij ma panokan.

Katlej iaxkawan Dios

⁹ Pero namejwan Dios oamechpejpenke para xipowikan itech ipueblo, namejwan antiopixkej de yen toRey. Namejwan ankatej kej se pueblo de tlaneltokakej yolchipawakej katlej iaxkawan Dios. Dios oamechpejpenke para xiktematiltikan tlan kuale katlej Dios kichiwa. Yej oamechnotzke para xikisakan de ijtek tlatleyualotl iwan xikalakikan ijtek tlanextle katlej sa tekitl kuakualtzin. ¹⁰ Achtoj namejwan mach anpowiaj itech ipueblo in Dios, pero axan ya anpowij itech ipueblo. Achtoj namejwan mach akaj oamechiknomatia, pero axan Dios yoamechiknomatke.

Xiekan para ankitekipanoskej in toTajtzin Dios

¹¹ Notetlasojkaikniwan, namejwan ankimatij nik anpowij ompa ilwikak maski axan san anpanokoj kanaj keski tonale ixko yin tlaltikpak. Por yonik, namechtlatlawtia xikkawakan se lado tlan amo kuale tlan kiyoltilana namotlalnakayo katlej

kineki kijtlakos namoanima. ¹² Xichipawkanemikan inmixpan tlakaj katlej mach kixmatij Dios. Iwan maski yejwan ma tlapoakan de amejwan iwan ma kijtokan mach ankualtin, yejwan kitaskej tlan kuale katlej ankichiwaj, iwan ijkón yejwan welis kiweyikixtiskej in toTajtzin Dios nijuak Yej witz para kinmixkomakas (kintzonmanas).

¹³ Xikintlakitakan nochtin in tlatlanawatijkej katlej in tlakaj kintlaliaj ixko yin tlaltikpak porke toTajtzin Dios ijkón kineki ma tikintlakitakan. Xiktlakitakan in weyi tlanawatij rey, porke yej kipia okachi weyi tlanawatijkayotl ke oksekimej. ¹⁴ Iwan noijki moneki xikintlakitakan in gobernadortin tekiwajkej, katlej in rey kintlalia para ma kintlajyowiltikan katlej kichiwaj tlan amo kuale, o noso para ma kinweyimatican katlej kichiwaj tlan kuale. ¹⁵ Porke Dios kineki ma tikchiwakan tlan kuale, para ijkón katlej mach tlalnamikilisejkej amo ma techistlakawikan de itlaj tlamantle katlej yejwan mach kimati.

¹⁶ Namejwan Dios yoamechmakixtij de imak in Amo Kuale Tlakatl, pero amo ok xitlajtlakokan maski ya anmomakixtijkej. Sino xiktekapanokan toTajtzin Dios porke Yej oamechkoj para xiekan iaxkawan. ¹⁷ Moneki xikintlakitakan nochtin tlakaj. Xikintlasojtlakan nochtin tokniwan, xikimakasikan toTajtzin Dios, iwan xiktlakitakan katlej okachi weyi tlanawatij rey.

Ma tikxikokan in tlajyowilistle ken Cristo okixikoj

¹⁸ Namejwan antlakaj katlej oamechkojkej, moneki xikintlakitakan namotekowan iwan xikchiwakan tlan yejwan amechnawatiaj. Tla namotekowan kuale inyelis o noso amo kuale inyelis, namejwan xikintlakitakan. ¹⁹ Tla anpanoskej tlajyowilistle iwan ankixikoskej, maski mach ankichiwaj tlan amo kuale, in Dios amechtiochiwas porke namejwan ankinerij ankichiwaskej tlan Yej kineki. ²⁰ Pero tla amejwan amechtlajyowiltaj porke ankichiwaj tlan amo kuale, toneses mach se amechweyikixtis tla ankixikoskej in tekokojkayotl. Pero tla ankichiwaskej tlan kuale iwan ankixikoskej in tlajyowilistle, toneses Dios amechtiochiwas. ²¹ Dios oamechnotzke namejwan para xikxikokan yon tlajyowilistle porke Cristo noijki otlajyowij por amejwan, iwan oamechmakak se ejemplo para noijki xikxikokan ijkón ken Yej okixikoj. ²² Yej mach okichij nion se tlajtlakole, iwan nion mach keman akaj okikajkayaj ika itlajtol. ²³ Nijuak okiwijwikaliyaj in Cristo, in Yej mach itlaj okinnankiliaya. Nijuak okitlajyowiltiayaj, Yej mach okinmajmawtiaya itlaj kintoktis, sino noch i okikawaya imak toTajtzin Dios katlej nochipa tlaixkomaka (tlatzonmana) ken moneki. ²⁴ Iwan Cristo okitlaxtlaj

in totlajtlakol itech itlalnakayo níjkuak omikke itech krus. Para ijkón tejwan welis tikkawaskej in tlajtlakole iwan welis tikpiaskej in tonemilis chipawak ken Dios kineki. Cristo okioxjxolejkej itech itlalnakayo para tejwan otipajtikej de yen tlajtlakole, kijtosneki Cristo omikke para otechmakixtij de itech tlajtlakole. ²⁵ Tejwan achtoj otinemiaj kej ichkamej níjkuak mopolojtinemij, pero axan yotimokuepkej inawak toSeñor katlej kajki kej toTlajpixke iwan kej toTlamonekuit-lawij de toanima.

3

Kenik moneki yeskej katlej tlanamiktiltin

¹ Ijkón noijki, namejwan katlej ansiwamej katlej anmochichwajkej, moneki xikinkawilikan namookichwan yejwan ma amechyekanakan. Ijkón tla akaj se de amejwan kipia iokich katlej amo kineltoka itlajtol in Dios, iwan kitas isiwa kichiwa tlan kuale iwan tetlakitak, tonses iokich welis kinel-tokas itlajtol in Dios maski isiwa amo ma kitlapowi. ² Porke yej kimomakas kuenta nik melawak chipawkanemi isiwa iwan melawak tetlakitak. ³ Namejwan ansiwamej níjkuak anmochijchiwaskej, amo xikyektlalikan namotzonkal para ika anmoweyinekiskej, amo ximochijchiwakan ika oro, o noso ika amotzotzol patíoj. ⁴ Sino xiekan ankualtin tlakaj iwan xiekan anpasensiajtin, iwan ijkón ankipiaskej amochichikayo katlej mach keman tlamic, iwan yen yon katlej okachi ipatij inawak Dios. ⁵ Porke ya wejkawitl ijkón nik omochijchiwayaj in siwamej yolchipawakej. Yejwan okitlali-ayaj nochí intlaneltokalis inawak Dios iwan okinkawiliayaj inmokichwan ma kinyekanakan. ⁶ Ijkón ken Sara noijki okitlakitat in Abraham katlej oyeka iokich iwan okinotzaya “tataj”. Iwan namejwan welis anyeskej kej anteichpokawan de Sara tla ankichiwaskej tlan kuale ken yej okichij, iwan ijkón mach anmomawtiskej de itlaj.

⁷ Ijkón noijki namejwan tlakajtin katlej ansiwayejkej, moneki xiekan ika kuale inwan namosiwawan, iwan xikmomakakan kuenta nik in siwamej mach chijchikawakej ken namejwan anmokichtin. Moneki xikintlakitan namosiwawan, porke Dios ika iteiknotlamachilis noijki kinmaka in siwamej yankuik nemilistle kej se tlatliokolile ijkón ken namejwan amechmaka. Tla ijkón ankichiwaskej, tonses mach itlajkitzakuilis namotiotzajtzilis para amechnankilis in toTajtzin Dios.

Tlakajtin katlej tlajyowiaj porke kichiwaj tlan kuale

⁸ Iwan axan nikneki namechilwis yin tlajtole. Aminochtin xikpiakan san se namotlalnamikilis. Tla namokniwan pakij

o noso moyolkokoaj, namejwan noijki xipakikan o noso xi-moyolkokokan ken yejwan. Xikintlasojtlakan amokniwan, xiteiknomatikan iwan xiekan ankualtin tlakaj.⁹ Tla akaj amechtoktia itlaj mach kuale, amo xikkuepaltikan. Tla akaj amechilwia san tlan amo, namejwan amitlaj xikilwikan. Sino moneki xiktlajtlanilikan in Dios ma kintiochiwa, iwan tla amejwan ijkón ankichiwaskej, toneses in Dios amechtiochi-was.¹⁰ In tiotlajkuilole kijta:

Akin kineki yetos ika kuale iwan kineki kipias pakilstle, moneki ayakmo ma kijto tlan amo kuale iwan ayakmo keman ma tlakajkayawa.

¹¹ Moneki kikawas se lado tlan amo kuale, iwan ma kichiwa tlan kuale.

Moneki ma kitemo de kenik yetos ika kuale inwan oksekimej, iwan yen yon ma kitemojto nochipa.

¹² Porke toTajtzin Dios kinmonekuitlawia katlej kichiwaj tlan kuale

iwan kinkakilia intiotzajtzilis.

Pero Dios mach kinwelita katlej kichiwaj tlan amo kuale.

¹³ Tla amejwan ankichiwaskej tlan kuale, toneses mach akaj mixewis amechtoktis itlaj mach kuale.¹⁴ Iwan maski in tlakaj ma amechtlajyowiltikan por ankichiwaj tlan kuale, namejwan xipakikan. Namejwan amo xikinmiimakasikan iwan nion amo ximomawtikan.¹⁵ Sino moneki xiktlakitakan in Cristo ipan namoyolo porke yen namoTeko. Tla akaj amechtlajtlanis tlanik ankineltokaj in Cristo iwan tlanik anmochiaj inawak, namejwan xikmatikan kenik ankinnankiliskej, pero xikinnankilikan ika kuale amoyolo iwan ika tetlakitalistle.¹⁶ Xichipawkanemikan para ma chipato namotlalnamikilis. Iwan katlej tlapoaj mach kuale de amejwan pinawaskej porke nochtin kimatiskej nik namejwan ankichiwaj tlan kuale porke antlaneltokaj inawak Cristo.¹⁷ Tla namejwan antlajyowiskej por ankichiwaj tlan kuale, toneses xitlajyowikan kiné, tla Dios ijkón kimonekiltis. Pero tla namejwan antlajyowiskej por ankichiwaj tlan amo kuale, toneses yon kemaj mach kuale kaj.

¹⁸ Porke Cristo noijki otlajyowij iwan omikke san se buelta iwan okitlaxtlaj in totlajtlakol. Yej mach oyeka tlajtlakolej pero Yej omikke por tejwan katlej titlajtlakolejkej para techwikas inawak Dios. Iwan maski in tlakaj okimiktijkej itlnakayo, Yej omoyolkuij ika iEspíritu.¹⁹ Iwan ika iEspíritu in Jesucristo oyáj iwan okinmatiltij de itlajtol in espíritus katlej axan tzaktokej kan Dios okintlalij ma tzaktokan,²⁰ katlej ya wejkawitl mach okineltokakej in toTajtzin Dios. Dios okipixke pasensia iwan okinchixtoka miek tonale para ma moyolkuepakan mientras Noé okichiwaya in weyi barko. Iwan

yon barko okinmakixtij san chikueyi tlakaj de ijtk atl.²¹ Iwan nekáj atl axan tejwan noijki techmakixtia, porke nikuak timokuateekiaj tikteititiaj nik ya tikpiaj yankuik nemilistle porke Cristo omoyolkui. Pero amo timokuateekiaj para ma chipawi totlalnakayo, sino para ma techmakixti de totlajtlakol iwan ijkón welis timijkuaniskej inawak Dios ika totlalnamikilis chipawak.²² Iwan Jesucristo oyáj para ilwikak iwan ompa kajki ik iyekma in toTajtzin Dios. In toSeñor Jesuscristo kinnawatia nocthin angelestín, iwan nocthin katlej kipiaj tekiwajkayotl, iwan nocthin katlej kipiaj poder.

4

Tla tikneltokaj in Cristo moneki noijki titlajyowiskej

¹ Cristo otlajyowij itech itlalnakayo nikuak omikke, iwan por yonik in tejwan noijki moneki amo ma tikimakasikan nikuak titlajyowiskej por Yej. Porke akin tlajyowia itech itlalnakayo kijtosneki yokikaj in tlajtlakole,² para ayakmo kichiwas tlan kineki itlalnakayo. Sino kineki kichiwas tlan Dios kineki asta ikuak mikis de ixko yin tlaltikpak.³ Namejwan ankichiijkej miek tlajtlakole nikuak anyekaj ken tlakaj katlej mach kixmatij Dios. Achtoj namejwan anmomekatiayaj iwan ankichiwayaj miek tlamantle mach kuale katlej okinekia namotlalnakayo. Namejwan antlawanayaj, anmopaktiayaj biero itech ilwimej asta ankuawtzajtziaj, ankichiwayaj ilwitz para antlawanaskej, iwan ankinweyikixtiayaj namosantowan katlej Dios mach kineki ma se kinweyikixti.⁴ Iwan axan katlej mach kixmatij Dios, mach kimomakaj kuenta tlanik mach ok inwan anmoneloaj para ankichiwaskej tlan amo kuale ken yejwan kichiwaj, iwan por yonik amechpojpoaj.⁵ Pero yejwan kipia de kitemakaskej kuenta inawak Cristo de tlan kichijtokej. Porke in Cristo ya mochixtok para kinmixkomakas (kintzonmanas) in tlakaj katlej axan yolitokej iwan noijki katlej yomikkej.⁶ Por yonik, in kuale tlajtole katlej temakixtia, noijki okinmatiltijkej katlej yomikkej. Iwan maski yejwan yomikkej ijkón ken mikij nocthin tlaltikpaktlakaj, iwan tla yejwan okineltokakej itlajtol in Dios, tonses inmespíritu kipias nemilistle ijkón ken Dios kipia.

⁷ Ya ajsi tonale para tlamis in tlaltikpak. Iwan por yonik moneki namejwan xikpiakan kuale namotlalnamikilis iwan xikixkawikan (ximomelikaj) ximotiotzajtzilikan inawak Dios.⁸ Iwan tlan okachi moneki xikchiwakan yen ximotlasojtlakan se iwan oksé. Porke akin kitlasojtla ikni, weli kitlapojpolwia maski ma tlajtlako miek buelta inawak.⁹ Xikinkalotikan amokniwan katlej amechontlajpalooaj itech

amochan iwan amo xikintlatzotzokatilikan. ¹⁰ Dios otechmakak tlatlamantle poder kada se de tejwan para ma tiwelikan ma titekipanokan inawak Dios. Moneki kiné xiktekipanoltikan yon poder para ika xikintekichiwiikan oksekimej. Iwan ijkón namejwan anyeskej kuale antekipanojkej porke ankimatiј kenik ankitekipanoltiskej in poder katlej Dios oamechmakak kada se de amejwan ika iteiknotlachilis. ¹¹ Tla akaj de amejwan tlapoa de itlajtol in Dios, ma tlapoa kiné kej yeskia yen Dios tlapoa. Tla akaj kinpalewia oksekimej, ma kinpalewi kiné ika nochi ichikawalis katlej Dios kimaka. Nochi tlan ankichiwaskej ma yeto para ika ankiweyikixtiskej in toTajtzin Dios porke namejwan ankineltokaj in toSeñor Jesucristo, katlej kipia imawisotlanex iwan kipia ipoder nochipa.

Tlajyowilistle katlej tipanoaj

¹² Notetlasojkaikniwan, amo ma amechmajmawti nikuak anpanoskej tlajyowilistle. Amo ximomawtikan porke Dios ijkón nik amechyejyekos para kitas kox melawak antlaneltokaj. Amo ankijtoskej tlanik ijkón anpanoaj. ¹³ Sino moneki sa tekitl xipakikan porke antlajyowiaj ijkón ken Cristo otlajyowij, iwan ijkón namejwan noiji sa tekitl anpakiskej nikuak Yej walmonextis ika imawisotlanex. ¹⁴ Tla sekimej amechilwiaj itlaj tlajtole biero porke ankineltokaj in Cristo, namejwan sa tekitl xipakikan. Porke iEspíritu in toTajtzin Dios kajki amotech ika imawisotlanex. Yejwan tlapoaj biero de Dios, pero namewan ankiweyikixtiaj. ¹⁵ Tla namejwan antemiktiaj, antlachtekij, ankichiwaj tlan amo kuale o noso anmokalakiaj kan amo amechtokaroa, tones moneki antlajyowiskej iwan ma amechpijpinatikan. ¹⁶ Pero tla akaj de amejwan tlajyowia por kineltoka in Cristo, amo ma pinawa. Sino moneki ma motlasojkamati inawak Dios porke kikawilia ma tlajyowi por kineltoka in Cristo.

¹⁷ Yoajsik tonale para Dios kinmixkomakas (kintzonmanas) nochtin tlaltikpaktlakaj. Achtoj techixkomakas tejwan katlej tiikonewan. Iwan tla yen tejwan achtoj techixkomakas katlej tikneltokaj Dios, tones ¿kenamij panoskej nekatej katlej mach kineltokaj itlajtol in Dios katlej temakixtia? ¹⁸ In tiotlajkuilole kijta:

Tla ika miek trabajo momakixtiaj katlej kualtin tlakaj, tones ¿kenamij nik momakixtiskej nekatej katlej mach kualtin iwan tentokej de tlajtlakole?

¹⁹ Ijkón kiné, tla Dios kimonekiltia namejwan xitlajyowikan, xikseguirokan xikchijtowan tlan kuale iwan moneki ximotemaktikan (ximotemaktikan) inawak Dios katlej otechchij iwan katlej nochipa kichiwa tlan kijta.

5

Xikinmonekuitlawikan ikonewan Dios

¹ Axan nikneki namechilwis se tlajtole namejwan katlej ankatej kej antlayekankej de tiopan. Nej noijki nikaj kej nitlayekanke ken namejwan. Nej onikitak nikuak in Cristo otlajyowij iwan omikke. Iwan nej noijki nikresibiros tlan nechtokaroa itech nekáj tonale nikuak walmونextis imawisotlanex in Dios. ² Namechtlatlawtia xikinmonekuitlawikan ikonewan Dios katlej Yej oamechinmaktilij, xikinmonekuitlawikan ijkón ken se tlajpixke kinmonekuitlawia ichkawan. Xikinmonekuitlawikan ika kuale amoyolo. Amo xikyejyekokan akaj amechafuersajtia xikchiwakan yon tekitl, nion amo xikchiwakan porke ankinekij ankitlaniskej tomin. Sino xikinmonekuitlawikan ika pakistle, ijkón ken Dios kineki. ³ Amo xikinnawatikan ika chikawak ikonewan Dios katlej Yej oamechinmaktilij, nion amo xikchiwakan kej yeskia antekomej. Sino namejwan xiekan amejemplotjin para yejwan no ijkón ma kichiwakan. ⁴ Iwan nikuak walmونextis in toweyi Tlajpixke de nochtin tlajpixkej, Yej amechmakas se korona katlej kipia imawisotlanex katlej mach keman ijt-lakawis.

⁵ Noijki namejwan katlej antelpokamej, nikneki xikchiwakan tlan amechnawatiaj in tlayekankej de tiopan. Iwan aminochtin ximotlakitakan se iwan oksé ika kuale amoyolo, porke itech tiotlajkuilole kijta:

Dios mach kinneki katlej moweyinekij,
pero Dios kipia weyi iteiknotlamachilis para katlej mach moweyinekij.

⁶ Tla namejwan anmoiknomatiskej inawak Dios katlej kipia weyi ipoder, ajsis tonale Yej amechweyikixtis. ⁷ Xikilwikan toTajtzin Dios nochti tlan amechtekipachoa iwan xiktlalikan ipan imatzin, porke Yej nochipa amechmonekuitlawia.

⁸ Xikpiakan kuale namotlalnamikilis iwan ximotlachilij-tokan, porke in diablo namokontra kineki amechixpolos. In diablo nemi kej se lión tekuani katlej tzajtzitinemi kitemojtinemi akin kikuas. ⁹ Amo xikkawilikan ma amechtlani in diablo iwan ximoyekketokan itech namotlaneltokalis. Namejwan xikmatikan ke oksekimej tokniwan tlaneltokakej katlej katej ixko yin tlaltikpak noijki panoaj tlajyowiliste ken namejwan. ¹⁰ Iwan nikuak ya antlajyowijkej kanaj keski tonale, in toTajtzin Dios kichiwas namejwan xiekan sa tekitl ankuaultin itech nochti tlamatle. Kichiwas xiekan anchijchikawakej iwan kichiwas kuale ximoyekketokan inawak, para amo keman xiwetzikan de itech namotlaneltokalis. Dios ika iteiknotlamachilis otechnotzke para ma tikpiakan parte itech imawisotlanex katlej yetos iktlanke (ik tlami), porke

tisetitokej san se iwan Jesucristo. ¹¹ Nochipa ma kipia imaw-isotlanex iwan ipoder. Ijkón ma yeto.

Pedro okonintlajpaloj in tokniwan

¹² Onamechijkuilij kanaj keski tlajtlole itech yin amatla-jkuilole, katlej namechtitlanilia iwan tokni Silvano katlej sa tekitl kineltoka in toTajtzin Dios. Iwan itech yin amatla-jkuilole namechnajnawatia iwan namechmatiltia nik in Dios sa tekitl kipia weyi iteiknotlamachilis towan ijkón ken namejwan ya ankimatij. Ximelajkanemikan itech iteiknotlamachilis in toTajtzin Dios.

¹³ In tokniwan tiopantlaneltokakej katlej katej itech weyikan de Babilonia amechontlajpalaoj. ToTajtzin Dios noijki okinpejpenke in yonmej tokniwan ijkón ken namejwan noijki oamechpejpenke. Noijki amechontlajpaloa in Marcos katlej kajki kej nokone inawak Dios. ¹⁴ Ximotlajpalokan ika tlasoxtalistle se iwan oksé ken Dios kineki.

Xiekan ika yolosewilistle aminochtin namejwan katlej an-powij inawak Jesucristo. Ijkón ma yeto.

SAN PEDRO ITLATITLANIL IN DIOS IPAN OJPA OKIJKUILOJ YIN AMATLAJKUILOLE

Pedro okonintlajkuililij in tlaneltokakej

¹ Nej niSimón Pedro, nitekipanoj iwan nitlatitlanile de Jesucristo. Namechtlaajuililia namejwan katlej ankipiaj namotlaneltokalis katlej sa tekitl miek ipatij ijkón ken tejwan tikpiaj. Namejwan ankipiaj yon tlaneltokalistle porke in toDios Jesucristo katlej toTemakixtij, Yej kichiwa tlan kuale ken moneki. ² ToTajtzin Dios ma kipia weyi iteiknotlamachilis amonawak iwan ma amechmaka yolosewilistle nochipa porke ya ankixmatiwej nochi tonale in toTajtzin Dios iwan toSeñor Jesús.

Dios techmaka nochi tlan moneki para kuale ma tiekan inawak

³ Cristo ika weyi ipoder techmaka nochi tlan moneki para ika ma timopanoltikan iwan para okachi ma timotemaktikan (timotemaktilikan) inawak Dios. Nochi tlan moneki tejwan tikpiaj porke tikixmatij in Cristo Jesús. Yej otechnotzke ika imawisotlanex iwan ika ipoder. ⁴ Iwan ika yon poder, in Dios techmaka tlan yotechkakitij katlej sa tekitl weyi iwan miek ipatij. Iwan techmakixtia de itech tlan amo kuale katlej in tlaltikpaktlakaj kichijtinemij ika inmelewilis mach kuale. Iwan techmaka se yankuik nemilistle ijkón ken Dios inemilis porke ijkón otechkakitij techmakas. ⁵ Por yonik, xikchiwakan de amo san xitlaneltokakan, sino noijki xikchiwakan tlan kuale itech namonemilis. Iwan amo san xikchiwakan tlan kuale itech namonemilis, sino noijki moneki xikmatikan tlanon Dios kineki. ⁶ Iwan amo san xikmatikan tlanon Dios kineki, sino noijki xikmatikan xikmoxikoltikan para amo antlajtlakoskej. Iwan amo san xikmoxikoltikan para amo antlajtlakoskej, sino noijki xikmatikan xikxikokan tlan anpanoaj. Iwan amo san xikmatikan xikxikokan, sino noijki ximotemaktikan (ximotemaktilikan) okachi inawak Dios. ⁷ Iwan amo san ximotemaktikan inawak Dios, sino noijki xikmochiwilikan tlan kuale se iwan oksé kej anmiknimej inawak Dios. Iwan amo san yon, sino noijki ximotlasojtlakan.

⁸ Tla namejwan ankichiwaskej iwan ammoskaltiskej okachi itech yon tlamantle, tonses toTajtzin Dios amechtekimakas itech itekiw para namonemilis ma serbiro. Iwan ijkón mach yetos san tekitl ankixmatij in toSeñor Jesucristo. ⁹ Pero akin amo kichiwa yon tlamantle, kajki kej yeskia mach tlachia o noso mach yektlachia, iwan yokelkaj nik

in Dios yokichipaj de itlajtlakol katlej achtoj okichiwaya. ¹⁰ Nokniwan, Dios oamechnotzke iwan oamechpejpenke. Iwan por yonik ximochijchikawakan de xinemikan ijkón ken nej yonamechilwíj, iwan tla namejwan ijkón ankichiwaskej, mach ok keman anwetziskej itech tlajtlakole. ¹¹ Iwan toSeñor Jesucristo katlej toTemakixtij, Yej amechlatlapolis ompa ilwikak iwan amechresibiros ika pakilstle nijuak ompa anmajsitiwej kan Yej tlanawatijtos nochipa.

¹² Por yonik nochipa namechelnamiktis yon tlamantle, maski namejwan ya ankimatij iwan ya anmoyekketokej itech itlajtol in Dios katlej melawak. ¹³ Nej nikyejyekoa nik moneki namechelnamiktijtos in yon tlamantle mientras ok nikaj ixko yin tlaltikpak, para amo xikelkawakan. ¹⁴ Nej nikmati nik ya ajsi tonale para nimikis porke ijkón yonechmatiltij in toSeñor Jesucristo. ¹⁵ Pero nikchiwas asta kan niwelis para ke satepan de ikuak yonimikke, namejwan amo keman xikelkawakan nochi yon tlamantle katlej yonamechilwíj.

Pedro iwan oksekimej tlakaj okitakej imawisotlanex in Cristo

¹⁶ Nijuak otamechtlapowijkej de ipoder in toSeñor Jesucristo iwan de yej nijuak witz oksemi, mach otamechka-jkayajkej kej yeskia otamechilwijkej se kuento, sino nej iwan oksekimej tlakaj otikitakej imawisotlanex ika toixtololowan. ¹⁷ Tejwan otikkakej nijuak toPapan Dios okiweyikixtij iwan okitak ika tetlakitalistle iKone Jesucristo desde ilwikak, iwan Dios okijtoj ika se tlajtole kuakualtzin: “Yin yen notlasojKone, katlej inawak nipaki.” ¹⁸ Tejwan tonewian otikkakej yon tlajtole katlej omokakke de ilwikak, porke tejwan otiekaj iwan toSeñor Jesús ipan nekáj tepetl tlatiochiwaloj.

¹⁹ Tejwan tikpiaj tlan okikuilojkej in profetajtin katlej moneki itech timokitzkiskej. Iwan namejwan moneki kuale xikmomakakan kuenta tlan yejwan okikuilojkej. Iwan ijkón tlan yejwan okijtojkej yetos ken tlanextle katlej tlawia ijtk tlatleyualotl asta ikuak walanesi. Iwan sitlale katlej kisa kualkan witz para amechtlawilis ipan namoyolo. ²⁰ Pero moneki xikmatikan ke nochi tlan okikuilojkej in profetajtin, mach okiske de itech itlayeheyekol akaj tlakatl iwan nion mach tikmomakaj kuenta ika totlayeheyekol. ²¹ Porke in profetajtin mach okikuilojkej yon tlajtole san por yejwan okiyejyeko-kej, sino in yonmej tlakaj yolchipawakej otajtojkej de itlajtol in Dios tlan Espíritu Santo okinmilwiaya ma kijtokan.

2

*Tlamachtijkej katlej tekajkayajkej
(Judas 4-13)*

¹ Ya wejkawitl entre yejwan tlakaj de Israel oyekaj profetajtin tekajkayajkej, iwan entre namejwan noiiki yeskej tlamachtijkej tekajkayajkej. Tlamachtiskej ichtaka de tlan amo melawak iwan nochtin akinmej kineltokaskej, moixpoloskej. Iwan yonmej tlamachtijkej asta kijtoskej nik mach melawak in Jesucristo okinkoj ika ieso nikuak omikke itech krus. Pero Dios san niman kinmixpolos porke yejwan innewian kimotetemiliaj yon tlajtlakole. ² Miekej kichiwaskej tlan yejwan kinmachtiskej tlan mach kuale. Iwan por yonik miekej tlakaj tlapoaskej biero de iojwi in toTajtzin Dios katlej melawak. ³ Yonmej tlamachtijkej tekajkayajkej kinekiskej namotomin, iwan por yonik amechkajkayawaskej ika tlajtole katlej mach melawak. Pero Dios ya kinpialijtok se lugar desde ya wejkawitl kan yejwan tlajyowiskej iwan mach welis mopalewiskej nikuak ajsis ora.

⁴ Dios mach okintlapojpolwij in angelestин katlej otlajtlakojkej, sino okintlamotlak ijтиk tliko iwan ompa okintzakke ijтиk tlatleyualotl, iwan ompa mochiaj asta nekáj tonale nikuak in Dios kinmixkomakas (kintzonmanas). ⁵ Iwan Dios noiiki mach okintlapojpolwij in tlakaj katlej oyekaj ya wejkawitl, sino okititlanke se tlamawisolkiawatl inpan nochtin tlakaj katlej mach kualtin. Iwan Dios okimakixtij san yen Noé iwan oksekimej chikomen tlakajtin, porke Noé okitematiltiayaj kenik se welis yetos chipawak inawak Dios. ⁶ Dios noiiki okintlajyowiltij in tlakajtin mach kualtin katlej ochantiaj itech weyikan de Sodoma iwan itech weyikan de Gomorra, iwan okinmixpoloj ika titl iwan omokaj sa puro tlikonextle. Dios ijkón okichij para kinmakas se ejemplo in tlakaj katlej satepan mach kinekiskej kineltokaskej in Dios. ⁷ Pero Dios okimakixtij in Lot katlej oyeka kuale tlakatl, katlej sa tekitl omotekipachoaya por yen tlakaj mach kualtin katlej okichiwayaj san tlan okinekia intlalnakayo. ⁸ Porke in Lot katlej oyeka kuale tlakatl, ochantia inwan yonmej tlakaj mach kualtin, iwan yej okitaya iwan okikakia nochí tlan amo kuale tlan yejwan okichiwayaj. Iwan por yonik in Lot sa tekitl omoyolkokoaya ipan iyolo chipawak nochí tonale. ⁹ Por yonik tkmomakaj kuenta nik in Dios kimati kenik kinmakixtis in tlakaj katlej motemaktiaj (motemaktiliaj) inawak para ke in Amo Kuale Tlakatl amo ma kintokti ma tlajtlakokan. Iwan Dios kimati kenamij kintialis se lado in tlakaj katlej mach kualtin asta ikuak ajsis ora para kinmixkomakas (kintzonmanas) iwan kintlajyowiltis.

¹⁰ Pero Dios okachi kintlajyowiltis in tlakaj katlej mach kualtin katlej kichiwaj miek tlamantle biero ika intlalnakayo iwan amo kitlakitaj itlanawatil in Dios. Yonmej tlamachtijkej

tekajkayajkej mach kimatij tlakakij iwan kichiwaj san tlan yejwan kinekij, iwan mach momawtiaj de kinwikaltiaj in espíritus katlej kipiaj miek tlanawatijkayotl itech ilwikak. 11 Pero in angelestín, katlej katej ixpan toTajtzin Dios, maski kipiaj okachi miek chikawalistle iwan poder, mach siera mixewiaj tlapoaj biero de yen espíritus katlej kipiaj miek tlanawatijkayotl.

12 Pero yonmej tlamachtijkej tekajkayajkej katej kej yolkamej katlej mach kipiaj intlalnamikilis. Porke in yolkamej mach kimatij kiyeyekoaj tlan kichiwaj, yejwan sanwel katej para se kinkitzkis iwan se kinmiktis. In yonmej tlamachtijkej tekajkayajkej tlapoaj biero de tlan yejwan mach kimomakaj kuenta, iwan por yonik yejwan noijki mikiskej ken yolkamej. 13 Yejwan kintlajyowiltiaj in oksekimej iwan por yonik in Dios noijki kintlajyowiltis in yejwan. Yejwan maski tonayan mopaktiaj itech tlajtlakole katlej kinmaka pakilstle. Sa tekitl tepinatij tlan kichiwaj iwan biero motaj nikuak yawij itech namoilwiw, yejwan tlakuaj amowan kej yeskia kualtin tlakaj pero pakij porke amechkajkayawaj.

14 Yejwan nikuak kitaj se siwatl niman pewa kixelewiaj. Mach keman kikawaj de tlajtlakoaj. Yejwan kinkajkayawaj katlej mach ya kuale kineltokaj Dios para ma tlajtlakokan noijki ken yejwan. Kiwelitaj tomin iwan kimatij kenik ki-moaxkatiskej tlan amo inmaxka. In yonmej tlakaj katlej ijkón kichiwaj sa tekitl tlajyowiskej ijlik tliko. 15 Yejwan yomopolijkej porke okikajkej in kuale ojtle. Kichiwaj ijkón ken okichij in Balaam ikone in Beor, katlej ya wejkawitl okiwelitaya kitlanis tomin ika tlan amo kuale. 16 Iwan iburra in Balaam otlahtoj iwan okajwak por itlajtlakol, maski in burrojtin mach tlajtoaj. Pero in Dios okitoktij ma tlajto in burra ijkón ken tejwan titlajtoaj, iwan okilwij nik mach kuale tlan kichiwa. Iwan mach okikawilij ma kichiwaj tlan yej okinekia kichiwani ika ilokojo.

17 Yonmej tekajkayajkej katej ken atekaltin katlej mach kipiaj atl, iwan noijki katej ken mixtle katlej mach kipiaj atl iwan kitki in ejekatl. Dios kintlalis in yonmej tekajkayajkej kan sa tekitl tlatleyua iwan ompa yeskej iktlanke (ik tlami). 18 Yejwan moweyinekij nikuak tlapoaj maski mach itlaj ipatij tlan kijtaj. Tlakajkayawaj iwan kintlatlalwiaj in tlakaj katlej ika miek trabajo yokikajkej in tlajtlakole. Kintlatlalwiaj para ma kichiwakan tlan amo kuale tlan kielewia intlalnakayo iwan kintlatlalwiaj ma kichijinemikan oksekin tlajtlakole. 19 Yejwan kijtaj welis kinmakixtiskej in oksekimej para amo ma ilpitokan itech tlan amo kuale, pero mach welis porke yejwan noijki ilpitokej ijlik tlajtlakole. Porke tla se tlakatl

mach welí kikawa itlaj tlajtlakole, tonses in yon tlajtlakole kijtosneki kinawatijtok in yon tlakatl. ²⁰Tla yejwan omomakixtijkej de itech tlan amo kuale katlej kichiwaj in tlaltikpaktlakaj níkuak okixmatkej in toSeñor Jesucristo toTemakixtij, iwan satepan oksemi omokuepkej iwan oksemi opéj kichijtinemij in yon tlajtlakole, tonses kijtosneki mokuepaj okachi tlajtlakolejkej iwan amo ken achtoj. ²¹Porke okachi kuale yetoskia tla amo kixmatinij in kuale ojtle de toTajtzin Dios. Porke sa tekitl tlajtlakole tla ya kixmatij in kuale ojtle iwan satepan kikawaj iwan ayakmo kineltokaj itlanawatil in Dios katlej chipawak. ²²Porke itech yejwan melawak mochiwa in tlajtote katlej kijta: “In itzquintle oksemi kikua itlakuepal. In pitzotl maski ma kaltikan, oksemi kalaki ijtk akuitlatl.”

3

ToSeñor Jesucristo witz oksemi

¹ Notetlasojkaikniwan, yin yen ya ipan ojpa amatlajkuilole katlej namechijkUILilia. Iwan itech san ken omen amatlajkuiloltin nikneki namechonyolojchikawas namejwan katlej ankipiaj kuale namotlalnamikilis iwan namechelnamiktis de tlan ya ankimatij. ² Porke nikneki xikelnamikikan tlan ya wejkawitl okijtokej in profetajtin yolchipawakej. Iwan noijki xikelnamikikan de tlan toSeñor toTemakixtij otechnawatij tejwan katlej tiitlatitlanilwan iwan satepan tejwan noijki otamechilwijkej.

³ Nikneki kuale xikmatikan yin tlan namechilwis. Itech sa iyakatlanka tonaltin yeskej tlakaj katlej san ika wetzkaskej de nochí tlan tejwan tikneltokaj, iwan kichiwaskej tlan amo kuale de tlan kineki intalnakayo. ⁴ Iwan amechilwiskej: “Namejwan ankijtaj nik in Cristo okijtoj witz oksemi. ¿Kanin kaj kiné? In ya wejkawitl toweyitajwan yomikkej, iwan nochí kajki ken achtoj desde ikuak omochij in tlaltikpak.” ⁵ Pero yejwan mach kinekij kimomakaskej kuenta tlan Dios okichij, porke ya wejkawitl ika itlajtol okichij in ilwikak iwan tlaltikpak. In tlaltikpak opankiske itech atl, iwan Dios okiseladojxitij in atl para ma yeto in tlaltikpak. ⁶ Satepan, in tlaltikpak oapachiwik iwan oixpolikej nochtin tlaltikpaktlakaj ika se tlamawisolkiawatil. ⁷ Pero in ilwikak iwan tlaltikpak katlej axan katej ika itlajtol in Dios kinkajtok para kinpojpolos ika tlilt. Dios kinkajtok asta ma ajsi nekáj tonale níkuak kinmixkomakas in tlaltikpaktlakaj iwan kinmixpolos in tlakaj katlej mach tlaneltokakej.

⁸ Noijki, notetlasojkaikniwan, amo xikelkawan yin tlan namechilwis. ToTajtzin Dios para Yej se tonale kej yeskia se mil xiwitl, iwan se mil xiwitl kej yeskia se tonale. ⁹ToTajtzin

Dios mach yokelkaj para kichiwas tlan yotechilwij, ken sekimej kijtaj, sino Yej ok kinmakatok ok kanaj keski tonale para ma moyolkuepakan in tlajtlakolejkej. Dios mach kineki ma mopololo nion se tlaltikpaktlakatl.

¹⁰ Pero itech nekáj tonale nijuak witz in toSeñor, witz ijkón ken nijuak se ichtekke mach akaj kimati keman witz. Ijkuakón ilwikak pojpoliwis ika se tlatikuinalistle chikawak, iwan nochi tlan onkaj itech, tlatlas ika tlitl. In tlaltikpak iwan nochi tlamatle katlej okichijkej in tlakaj itech, nochi pojpoliwis ika tlitl.

¹¹ Iwan komo ya ankimatij nik in Dios ijkón nik kipojpolos nochi tlan onkaj, tones moneki okachi xichipawkanemikan iwan okachi ximotemaktikan (ximotemaktikan) inawak Dios. ¹² Xikchiakan nekáj tonale nijuak witz in toTajtzin Dios. Iwan xikchiwakan nochi ken Dios kineki para niman ma ajsi in yon tonale iwan ayakmo ma wejkawa. Itech nekáj tonale in ilwikak tlatlas ika tlitl iwan nochi tlan onkaj itech patis porke yetos sa tekitl totonik. ¹³ Pero tejwan tikchiaj tlan Dios yotechilwij, tikchiaj se yankuik ilwikak iwan se yankuik tlaltikpak kan nochtin kichiwaskej tlan Dios kineki.

¹⁴ Por yonik, notetlasojkaikniwan, mientras ankchiaj ma pano yon tlamatle, xikchiwakan de amo antlajtlakoskej para amo amechistlakawiskej de itlaj ixpan Dios. Xiekan ika kuale se iwan oksé para ijkón Dios pakis amonawak nijuak Yej witz. ¹⁵ Iwan xikmatikan nik in toSeñor mach ya ejko porke Yej ok kichia ma momakixtikan in tlakaj de intlajtlakol. In totetlasojkaikni Pablo noijki yoamechtlaikuiilij de yin tlamatle ika ixtlamachilistle katlej Dios okimakak. ¹⁶ Itech kada se iamatlajkuilol yej yoamechtlapowij de yon tlamatle, maski sekin sa tekitl owij para se kimomakas kuenta, iwan sekimej katlej amo momachtiaj itlajtol in Dios iwan amo moyekketokej itech intlaneltokalis, kipatlaj itlajtol in Pablo iwan noijki kipatlaj oksekin tlajtole katlej kajki itech tiotlakuilole. Iwan ijkón yejwan innewian mopololoaj iktlanke (ik tlami).

¹⁷ Por yonik, notetlasojkaikniwan, como ya ankimatij yon tlamatle, moneki ximotlachilikan iwan amo xikinkawilikan nekatej tlamachtijkej mach kualtin ma amechkajkayawakan ika intlamachtil iwan amo xikpolokan namotlaneltokalis.

¹⁸ Sino namejwan moneki okachi xikixmatikan in toSeñor Jesucristo toTemakixtij, iwan ximoskaltikan okachi itech it-lasojtlalis. Moneki ma tikweyikixtikan axan iwan nochipa. Ijkón ma yeto.

SAN JUAN ITLATITLANIL IN DIOS YAKINIIKA OKIJKUILOJ YIN AMATLAJKUILOLE

In tlajtole katlej kitemaka nemilistle

¹ Jesucristo katlej noiжиki tiktokayotiaj Tlajtole katlej kitemaka nemilistle, Yej yoyeka desde iikuak ayamo oyeka nochи tlan onkaj. Tejwan otikkakej iwan otikitakej ika toixtololowan tlan okichij. Tejwan otikyekitakej iwan otikitzkijkej ika toma. ² Yon nemilistle Dios otechnextilij, porke omochij Tlakatl. Iwan tejwan otikitakej yon Tlakatl iwan yotamechtlapowijkej de Yej. Axan, tejwan tamechtlapowiaj de yon nemilistle katlej mach keman tlamic, iwan yon nemilistle yoyeka iwan toPapan Dios, iwan satepan otechnextilij nijuak ovalaj ixko yin tlaltikpak. ³ Tamechtlapowiaj, kiné, de tlan otikitakej iwan de tlan otikkakej, para namejwan xisetitokan towan, ijkón ken tejwan melawak tisetitokej iwan toPapan Dios iwan iKone Jesucristo. ⁴ Iwan axan tamechijkuililiaj yin tlajtote para xikpiakan miek pakilstle.

Dios yen tlanextle

⁵ In tlamachtile katlej Jesucristo otechmachtij iwan katlej tamechmatiltiaj namejwan yen yin: toTajtzin Dios yen tlanextle, iwan mach onkaj itlaj tlatleyualotl itech Yej. ⁶ Tla tikijtaj tisetitokej iwan Dios, pero ok tikatej ijlik tlatleyualotl de ipan tlajtlakole, tonses mach melawak tlan tikijtaj iwan mach tikchijtokej tlan melawak. ⁷ Pero tla tinemij itech tlanextle, ken Dios kajki itech tlanextle, tonses kijtosneki tisetitokej se iwan oksé, iwan ieso in Jesucristo, iKone in Dios, techchipawa de nochи tlajtlakole.

⁸ Tla tikijtaj mach tikpiaj tlajtlakole, tonses san tejwan timokajkayawaj iwan mach tikpiaj ipan toyolo tlan melawak. ⁹ Tla tikmokuitiskej inawak Dios nochи totlajtlakol, Dios techtlapopolwis, iwan techchipawas de nochи tlan amo kuale. Porke Dios kichiwa tlan kijta iwan welis tiktaliskej totlaneltokalis inawak. ¹⁰ Tla tikijtaj amo keman tikchiwaj tlajtlakole, tonses kijtosneki tikchiwaj kej yeskia in Dios tekajkayaj, iwan itlajtol amo kajki ipan toyolo.

¹ Nokonetzitzinwan, namechijkUILILIA yin tlamantle para amo xitlajtlakokan. Pero tla akaj tlajtlakoa, xikmatikan nik tikpiaj se totepalewij katlej techpalewis inawak Dios para techtlapojpolwis. Totepalewij yen Jesucristo katlej kichiwa tlan kuale. ² Yej okitlaxtlaj in totlajtlakol nikuak omikke itech krus para omoyolosewij in toTajzin Dios de totlajtlakolwan. Iwan amo san de yen tejwan totlajtlakol okitlaxtlaj, sino noijki de nochtin in tlaltikpaktlakaj.

³ Tla tikchiwaj tlan techilwia in toTajzin Dios, toneses tikmatij nik tikixmatij. ⁴ Pero tla akaj kijta kixmati Dios iwan amo kichiwa tlan kilwia, toneses in yon san tekajkayaj iwan amo kipia ipan iyolo tlan melawak. ⁵ Pero katlej kichiwa tlan Dios kijta, kijtosneki melawak nik kitlasojtla in Dios por nochti tlan kichiwa. Iwan ijkón nik tikmatij nik melawak tisetitokej inawak Dios. ⁶ Akin kijta kajki setitok iwan Dios, moneki nemis ken Jesucristo onenke.

Se yankuik tlanawatile

⁷ Nokniwan, mach namechijkUILILIA se yankuik tlanawatile, sino san yen ya wejkawitl tlanawatile katlej ya ankikaktiwitezj iwan ya ankipiaj desde ikuak ankineltokakej in Cristo. ⁸ Pero yin tlan namechijkUILILIA mochiwa kej se yankuik tlanawatile, porke Cristo okijtoj iwan okichij yon tlanawatile iwan axan namejwan noijki ankichiwaj tlan kijta. Tikmatij nik in yin tlanawatile melawak porke nikuak tikchiwaj yin yankuik tlanawatile, de timotlasojtlaskej se iwan oksé, in tlatleyualotl de tonemilis pojpolitiw iwan tlanextle de yankuik tonemilis itech Cristo techtlawilijtiw.

⁹ Tla akaj kijta nemi itech tlanextle, pero kikokolia ikni, kijtosneki ok nemi ijtk tlatleyualotl. ¹⁰ Akin kitlasojtla ikni, kijtosneki nemi itech tlanextle, iwan mach itlaj welis kitoktis ma wetzi ipan tlajtlakole. ¹¹ Pero akin kikokolia ikni, kijtosneki nemi iwan kajki ijtk tlatleyualotl, iwan mach kimati kanin yawi, porke in tlatleyualotl yokixtzajtzakke.

¹² Nokonetzitzinwan, namechtlajkuililia namejwan porke Dios yoamechtlapojpolwij de amotlajtlakol porke Cristo omikke por amejwan. ¹³ Tetajmej, namechtlajkuililia namejwan porke ya ankixmatkej in Cristo katlej yoyeka desde ikuak opejke nochti tlan onkaj. Telpokamej, namechtlajkuililia namejwan porke ya ankitlankej in diablo.

Nokonetzitzinwan, namechtlajkuililia namejwan porke ya ankixmatkej in toPapan Dios. ¹⁴ Namechtlajkuililia namejwan, tetajmej, porke ya ankixmatkej katlej yoyeka desde ikuak opejke nochti tlan onkaj. Namechtlajkuililia noijki

namejwan telpokamej, porke anchijchikawakej iwan ya ankineltokakej itlajtol in Dios ipan namoyolo, iwan porke ya ankitlankej in diablo.

¹⁵ Amo xikchiwakan ken tlan kichiwaj in tlajtlakolejkej, nion amo xikixelewikan tlan onkaj ixko yin tlaltikpak. Tla akaj kichiwa ken tlan kichiwaj in tlajtlakolejkej iwan kixelewia tlan onkaj ixko yin tlaltikpak, kijtosneki mach kitlasojtla in toPapan Dios. ¹⁶ Porke ixko yin tlaltikpak in tlakaj kinekij kichiwaskej tlan kipaktia intlalnakayo, kinekij kimoaxkatiskej nochi tlan kitaj, iwan moweyinekij por nochi tlan kipiaj. Nochi yin tlamantle mach witz de toPapan Dios, sino de ixko yin tlaltikpak. ¹⁷ Pero nochi yin tlaltikpak san panos ika nochi tlan amo kuale tlan yejwan kineki kichiwaskej, pero akin kichiwa tlan Dios kineki yolitos iktlanke (ik tlami).

Katlej melawak iwan katlej mach melawak

¹⁸ Nokonetzitzinwan, ya tikatej itech sa iyakatlanka tonaltin. Namejwan ya ankikakej nik witz in tlakatl katlej kinekis kipojpolos tlan kichiwa in Cristo. Iwan yomonextijkej miekej katlej axan ya kinekij kipojpoloskej tlan kichiwa in Cristo. Por yonik tikmatij nik tikatej itech sa iyakatlanka tonaltin. ¹⁹ Yejwan omoxelojkej de tejwan, pero tikmatij nik mach melawak oyekaj de tejwan, porke tla yenij de tejwan, toneses mokawanij towan. Pero yejwan omoxelojkej de tejwan, para ma mota nik mach nochtin powij towan.

²⁰ Pero Cristo katlej yolchipawak oamechmakak iEspíritu Santo, iwan por yonik aminochtin namejwan ankimatij nik itlajtol in Dios melawak. ²¹ Namechtajkuilia kiné, mach por amo ankimatij nik itlajtol in Dios melawak, sino porke ankimatij. Iwan namejwan ankimatij nik itech itlajtol in Dios mach onkaj itlaj tlan amo melawak.

²² ¿Akin yon tekajkayaj? In tekajkayaj yen katlej kijta ke Jesús amo yen Cristo katlej Dios okipejpenke para techmakixis. Yen yon katlej kineki kipojpolos tlan kichiwa in Cristo, porke mach kineltoka in toPapan Dios iwan mach kineltoka iKone. ²³ Nochtin akinmej kijtaj ke Jesucristo mach yen iKone in Dios, tones mach kipiaj ipan inyolo in Dios kej inPapan. Pero akinmej kijtaj ke Jesucristo yen iKone in Dios, toneses noijki kipiaj ipan inyolo in Dios kej inPapan.

²⁴ Por yonik, ma mokawa ipan namoyolo itlajtol in Dios katlej ankikakej desde ikuak ankineltokakej in Cristo. Iwan tla itlajtol in Dios mokawa ipan namoyolo, toneses namejwan anyeskej iwan iKone in toTajtzin Dios iwan noijki anyeskej iwan toPapan Dios. ²⁵ Iwan Jesucristo yokijtoj nik techmakaas in yankuik nemilistle katlej mach keman tlamic.

²⁶ Namechijkuililia nochi in yin para xikmatikan nik in sekimej kinekij amechkajkayawaskej. ²⁷ Pero namejwan ankipiaj in Espíritu Santo katlej Jesucristo oamechmakak. Iwan ijkón mach ok moneki ok akaj ma amechmachtí, porke iEspíritu toTajtzin Dios amechmachtia nochi tlamantle. Iwan nochi tlan amechmachtia melawak, porke Yej mach tlakajkayawa. Ijkón kiné, xiekan inawak Cristo ijkón ken namechmachtia in Espíritu Santo.

²⁸ Axan kiné, nokonetzitzinwan, nochipa xisetitokan iwan Cristo, para ijkón tikpiaskej konfiansa nijuak Yej witz, iwan mach tipinawaskej iyakapan nijuak Yej onkisaki. ²⁹ Namejwan ya ankimatij nik in Jesucristo Yej kichiwa tlan kuale, iwan nochtin in tlakaj katlej kichiwaj tlan kuale, yejwan tekonewan de Dios.

3

Tejwan titekonewan de Dios

¹ Xikmomakakan kuenta kech amo techtlasoxtla in toPan Dios, asta technotza tiikonewan, iwan melawak nik tiikonewan. Por yonik in tlaltikpaktlakaj katlej mach ikonewan in Dios, mach welij kimomakaj kuenta akin tejwan, porke yejwan mach kixmatij Dios porke mach kimomakaj kuenta akin Jesús. ² Notetlasojkaikniwan, tejwan ya titekonewan de Dios. Iwan asta axan mach ya tikmatij kenik tieskej satepan ompa ilwikak. Pero tikmatij ke nijuak witz in Cristo, tieskej ken Yej, porke tikitaskej ken Yej kajki. ³ Iwan nochtin akinmej kichiaj yeskej ken Cristo, kipia de mochipajtoskej itech innemilis, ijkón ken Cristo inemilis chipawak.

⁴ Nochtin akinmej tlajtlakoaj kijtosneki kixpanawiaj itlanawatil in Dios. Porke tlajtlakole nijuak se kixpanawia itlanawatil in Dios. ⁵ Namejwan ya ankimatij nik in Jesucristo ovalaj ixko yin tlaltikpak para techkixtilis in totlajtlakol, iwan ankimatij nik in Yej mach itlaj tlajtlakole kipia. ⁶ Ijkón kiné, nochtin akinmej nemij inawak Cristo mach tlajtlakoaj. Pero nochtin akinmej nemij ipan tlajtlakole, mach kimatij akin Cristo iwan nion mach kixmatij ipan inyolo. ⁷ Nokonetzitzinwan, amakaj ma amechkajkayawa. Akin kichiwa tlan kuale, kijtosneki kuale tlakatl ijkón ken Cristo Yej kuale tlakatl. ⁸ Pero akin kichijtinemi tlajtlakole, yon iaxka in diablo, porke in diablo kichijtiwitz tlajtlakole desde ikuak opéj in tlaltikpak. Iwan por yonik ovalaj ixko yin tlaltikpak iKone in Dios para kipojpolos tlan kichiwa in diablo.

⁹ Se katlej tekone de Dios mach ok kichijtinemi tlajtlakole, porke ya kipia yankuik nemilistle katlej Dios okimakak,

iwan por yonik mach ok kichiwa tlajtlakole, iwan porke yotlakatke inawak Dios. ¹⁰ Ijkón nik welis ankimatiskej akinmej tekonewan de Dios iwan akinmej tekonewan de diablo. Tla akaj mach kichiwa tlan kuale ken Dios kineki o noso mach kitlasojtla ikni, kijtosneki mach tekone de Dios.

Ma timotlasojtlakan se iwan oksé

¹¹ Namejwan ya ankikaktiwitzej desde ikuak ankinel-tokakej in Cristo nik moneki timotlasojtlaskej se iwan oksé. ¹² Amo ma tikchiwakan ken Caín okichij, katlej oyeka tekone de diablo, iwan okimiktij ikni. ¿Iwan por tlanik okimiktij? Porke in Caín okichiwaya tlan amo kuale, iwan ikni okichiwaya tlan kuale.

¹³ Nokniwan, amo ximotlajtlachialtikan (ximomaj-mawtikan) tla amechkokoliaj in tlaltikpaktlakaj katlej mach kixmatij Dios. ¹⁴ Tejwan otiekaj kej timikkamej, iwan axan yotikiskej de itech yon mikilistle iwan yotipanokej itech se yankuik nemilistle. Tikmatij nik tikatej itech se yankuik nemilistle porke tikintlasojtlaj in tokniwan. Akin amo kitlasojtla ikni, kijtosneki ok miktok. ¹⁵ Akin kikokolia ikni kijtosneki temiktij, iwan namejwan ankimatij se katlej temiktij mach kipia nemilistle katlej mach keman tlamis. Yon nemilistle mach kipia ipan iyolo. ¹⁶ Tikmatij tlanon kijtosneki in tlasojtlalistle. Tikmatij porke Cristo otechtlasojtlak nijuak omikke por tejwan. Iwan axan tejwan nojki moneki timotlasojtlaskej iwan tikinpalewiskej in tokniwan maski ma techmiktikan por yejwan. ¹⁷ Iwan tla se katlej kimopialia iwan mach keman itlaj kipoloa, iwan kita se ikni mach kipia tlan ika mopanoltis, iwan mach kineki itlaj kitliokolis, kijtosneki mach kipia tlasojtlalistle de Dios ipan iyolo. ¹⁸ Nokonetzitzinwan, amo san ma tikijtukan nik tikintlasojtlaj in tokniwan, sino moneki ma tikinchiwilikan tlan kuale para ma mota nik melawak tikintlasojtlaj.

Ma timoyolojchikajtukan inawak Dios

¹⁹ Tla ijkón tikintlasojtlaskej in tokniwan, tonses tikmatij nik melawak titekonewan de Dios, iwan mach timomawtiskej nijuak timoteixpantiskej inawak Dios. ²⁰ Tla toyolo techilwia nik mach kuale tlan tikchiwaj, ma tikmatikan nik in Dios okachi kimati iwan amo ken toyolo, porke Yej nochí kimati. ²¹ Ijkón kiné, notetlasojkaikniwan, tla toyolo techilwia mach tikpiaj itlaj tlajtlakole, tonses kuale tikmatij nik in Dios kita nik kuale in toyolo. ²² Iwan nochí tlan tiktlatlaniliskej Yej techmakas, porke tikchiwaj tlan technawatia iwan tikchiwaj tlan Yej kipaktia. ²³ Iwan Yej technawatia

ma tikneltokakan in Jesucristo katlej iKone, iwan ma timot-lasojtlakan se iwan oksé, ijkón ken Jesucristo yotechnawatij ma tikchiwakan.²⁴ Tla tikchiwaj tlan Dios technawatia, kijtosneki tikatej iwan Dios iwan Yej kajki towan. Dios otech-makak iEspíritu Santo iwan por yonik tikmatij nik in Dios towan kajki.

4

Katlej kipia Espíritu de toTajtzin Dios iwan katlej mach kipia yon Espíritu

¹ Notetlasojkaikniwan, amo xikinneltokilikan nochtin katlej kijtaj tetlapowiaj ika iEspíritu in toTajtzin Dios. Moneki achtoj xikinyejyekokan kox melawak tetlapowiaj ika iEspíritu de toTajtzin Dios o noso tetlapowiaj ika oksé espíritu. Porke katej miekej profetajtin tekajkayajkej ixko yin tlaltikpak, katlej kijtaj tetlapowiaj de Dios iwan mach melawak.² Namechilwis kenik welis ankimatiskej akin kipia iEspíritu de toTajtzin Dios iwan akin amo kipia. Nochtin katlej kijtaj nik in Jesús yen Cristo katlej Dios okipejpenke, iwan omochij tlakatl nijuak owitza ixko yin tlaltikpak, tones kipia iEspíritu de toTajtzin Dios.³ Pero katlej kijta ke Jesús amo yen Cristo katlej omochij tlakatl nijuak owitza ixko yin tlaltikpak, tones mach kipia iEspíritu de toTajtzin Dios, sino kipia iespíritu de yen katlej kineki kipojpolos tlan kichiwa in Cristo. Namejwan ya ankitakej nik witz, iwan axan ya kajki ixko yin tlaltikpak katlej kineki kipojpolos tlan kichiwa in Cristo.

⁴ Nokonetzitzinwan, namejwan anpowij inawak Dios, iwan yonmej katlej kinekij kipojpoloskej tlan kichiwa in Cristo mach owelikej oamechkajkayajkej ika intlamachtil. Porke in Espíritu Santo katlej kajki amotech okachi kipia poder iwan amo ken diablo katlej kajki intech in tlaltik-paktlakaj tekajkayajkej katlej mach kixmatij Dios.⁵ Yonmej tlakaj powij kej tekonewan de nian tlaltikpak porke yejwan tlamachtiaj ika tlamachtile de nian tlaltikpak, iwan por yonik noijki in tlakaj katlej tekonewan de nian tlaltikpak okachi kinkakiliaj tlan yejwan tlamachtiaj.⁶ Pero tejwan tipowij inawak Dios. Iwan katlej kixmati Dios, techkakilia tlan tikit-taj. Pero katlej amo powi inawak Dios, mach techkakilia tlan tikit-taj. Ijkón nik tikmatij akin kipia in Espíritu Santo katlej techmachtia tlan melawak, iwan noijki tikmatij akin kipia in espíritu mach kuale katlej tekajkaya.

⁷ Notetlasojkaikniwan, ma timotlasojojtlan se iwan oksé, porke in tlasojojtlistle witz de Dios. Nochtin akinmej tetlasojojtaj yonmej tekonewan de Dios iwan kixmatij Dios. ⁸ Akin amo tetlasojojtla, kijtosneki mach kixmati Dios, porke Dios Yej tetlasojojtak. ⁹ Dios otechititij nik techtlasojojtla nikuak otechwaltitlanilij ixko yin tlaltikpak katlej san yej se iKone. Otechwaltitlanilij para ma tikpiakan yankuik nemilistle inawak iKone. ¹⁰ Mach yen tejwan achtoj otiktlasojojtlakej in Dios, sino Yen achtoj otechtlasojojtak. Porke otechwaltitlanilij iKone para ma mikiki itech krus para ijkón ma techtlapopolwi de totlajtlakol. Por yonik axan tigmomakaj kuenta tlanon kijtosneki in tlasojojtlistle.

¹¹ Notetlasojkaikniwan, tla ijkón nik otechtlasojojtak toTajzin Dios, tonses moneki tejwan noijki ma timotlasojojtlan se iwan oksé. ¹² Maski tejwan mach keman tikitaj toTajzin Dios, pero tla tejwan timotlasojojtaj se iwan oksé, tonses tikmatij nik in Dios kajki ipan toyolo, iwan itlasojojtalis kichiwa kuale ma timotlasojojtlan ken Yej kineki. ¹³ Dios otechmakak iEspíritu ipan toyolo, iwan por yonik tejwan tikmatij nik tikatej iwan Dios, iwan Yej noijki kajki towan ipan toyolo. ¹⁴ Iwan tejwan otikitakej in Jesucristo, iwan tiktematiltiaj nik in toTajzin Dios okualtitlanke iKone ixko yin tlaltikpak para kinmakixtis in tlaltikpaktlakaj de intlajtlakol. ¹⁵ Akin kineltoka iwan kijta inmixpan nochtin in tlakaj nik in Jesús yen iKone in Dios, kijtosneki Dios kajki iwan yej, iwan yej kajki iwan Dios.

¹⁶ Ijkón tejwan tikmatij iwan tikneltokaj nik in Dios techtlasojojtla. Dios Yej tetlasojojtak. Iwan akin tetlasojojtla, kijtosneki kajki iwan Dios, iwan Dios kajki iwan yej. ¹⁷ Ijkón kiné, tejwan titetlasojojtaj ken Dios kineki ma titetlasojojtakan, para amo ma timomawtikan itech nekáj tonale nikuak in Dios kinmixkomakas (kintzonmanas) nochtin in tlakaj. Mach timomawtiskej porke tejwan tikintlasojojtaj in tokniwan ixko yin tlaltikpak ijkón ken Cristo kintlasojojtla. ¹⁸ Mach moneki tikimakasiskej katlej ipan melajka techtlasojojtla ika nochiyolo. Porke akin melawak kitlasojojtla in toTajzin Dios, mach weli kiimakasi. Tla akaj kiimakasi, kijtosneki kiimakasi de ma kitlajyowilti, iwan ika yon kiteititia nik mach ya kuale kimomaka kuenta kenik in Dios techtlasojojtla iwan por yonik mach weli kitlasojojtla ika nochiyolo.

¹⁹ Tejwan tikintlasojojtaj in toTajzin Dios porke Yej achtoj otechtlasojojtak. ²⁰ Pero tla akaj kijta: “Nej niktlasojojtla in Dios”, pero kikokolia ikni, tonses mach melawak tlan kijta. Porke tla akaj amo kitlasojojtla ikni katlej kita, tonses no mach welis kitlasojojtas in Dios katlej mach weli kita. ²¹ Dios otech-

makak yin tlanawatile: akin kitlasojtla in Dios moneki noijki ma kitlasojtla ikni.

5

Yotiktlankej nochí tlan amo kuale ixko yin tlaltikpak

¹ Nochtin akinmej kineltokaj nik in Jesús yen Cristo katlej Dios okipejpenke, yonmej tekonewan de Dios. Nochtin akinmej kitlasojtlaj in toPapan Dios, noijki kintlasojtlaj ikonewan. ² Ijkón kiné, nikuak tiktlasojtlaj in toTajtzin Dios iwan tikchiwaj tlan technawatia, tonses tikmatij noijki nik tikintlasojtlaj ikonewan. ³ Tla tiktlasojtlaj in Dios tonses ma tikchiwakan tlan technawatia. Iwan tlan Yej technawatia ma tikchiwakan mach sa tekitl tesotlaj. ⁴ Porke nochtin akinmej tekonewan de Dios kitlanij nochí tlan amo kuale de ixko yin tlaltikpak. Tiktlanij tlan amo kuale porke tikneltokaj in toSeñor Jesucristo iwan Yej techpalewia ma titlatlanikan. ⁵ Iwan akin kineltoka nik in Jesús yen iKone in Dios, yen yon akin weli kitlani tlan amo kuale de ixko yin tlaltikpak.

IEspíritu in toTajtzin Dios techmatiltia de Cristo

⁶ Jesucristo ovalaj ixko yin tlaltikpak. Omokuateekij ika atl. Okinokij ieso nikuak omikke itech krus. Amo san omokuateekij, sino noijki okinokij ieso. Ijkón techmatiltia in Espíritu Santo porke Yej kitematiltia tlan melawak. ⁷ Iwan katej eyin itech ilwikak katlej techmatiltiaj nik in Jesucristo yen iKone in Dios: yen toPapan Dios, in toSeñor Jesucristo, iwan Espíritu Santo. Iwan yinmej eyin san se. ⁸ Iwan nian ixko yin tlaltikpak noijki katej eyin katlej techmatiltiaj nik in Jesucristo yen iKone in Dios: yen Espíritu Santo katlej techmatiltia ipan toyolo nik melawak tlan techilwia, iwan noijki yen atl nikuak in Jesucristo omokuateekij, iwan noijki yen estle porke Cristo omikke iwan okinokij ieso. Iwan yinmej eyin techmatiltiaj san se tlamanter, nik in Jesucristo yen iKone in Dios. ⁹ Nikuak se tlakatl techilwia itlaj tlan melawak, tejwan tikneltokaj. Tones, moneki okachi tikneltokaskej tlan Dios techmatiltia, porke Yej techmatiltia nik in Jesucristo yen iKone in Dios. ¹⁰ Akin kineltoka iKone in Dios, kuale kimati ipan iyolo nik melawak tlan kineltoka. Akin amo kineltoka in Dios, kijtosneki kichiwa kej yeskia tekajkayaj in Dios, porke amo kineltoka tlan Dios techmatiltia nik in Jesús yen iKone. ¹¹ Iwan yen yin tlan techmatiltia: nik in Dios techmaka yankuik nemilistle katlej mach keman tlamic, iwan yon nemilistle techmaka itech iKone. ¹² Akin kipia iKone in Dios ipan iyolo, noijki kipia yankuik nemilistle. Pero akin amo kipia iKone in Dios ipan iyolo, tonses mach kipia yon nemilistle.

Dios techkaki

¹³ Namechtlajkuililia namejwan katlej ankineltokaj iKone in Dios, para kuale xikmatikan nik ya ankipiaj yankuik nemilistle katlej mach keman tlamis.

¹⁴ Iwan kuale tikmatij ipan toyolo ke tla tiktlajtlaniliskej in Dios ijkón ken Yej kimonekiltia, kuale tikmatij nik in Yej techkakis. ¹⁵ Iwan tla tikmatij nik in Dios techkaki nikuak timotiotzajtziliaj inawak, toneses ma tikmatikan nik ya tikpiaj tlan tiktlajtlaniliaj.

¹⁶ Tla akaj kitas ikni kichijtok itlaj tlajtlakole katlej mach kiwikas itech mikilistle, moneki ma motiotzajtzili por yon ikni, iwan Dios kimakas yankuik nemilistle yon ikni, tla melawak okichij itlaj tlajtlakole katlej mach kiwikas itech mikilistle. Onkaj tlajtlakole katlej se kiwikas itech mikilistle, iwan nej amo namechilwia ximotiotzajtzilikan por akin kichiwa yon tlajtlakole. ¹⁷ Nochi tlan amo kuale tlan se kichiwa yon tlajtlakole. Pero onkaj tlajtlakole katlej mach se kiwika itech mikilistle.

¹⁸ Tikmatij ke akinmej tekonewan de Dios mach kichijtine-mij tlajtlakole, porke Cristo katlej iKone in Dios kinmonekuit-lawia, iwan diablo mach weli itlaj kintoktia.

¹⁹ Tejwan tikmatij nik titekonewan de Dios, iwan noijki tikmatij nik in diablo kinnawatijtok nochtin oksekimej tlaltik-paktlakaj.

²⁰ Noijki tikmatij nik iKone in Dios owalaj, iwan otechmakak tlalnamikilistle para ma tikixmatikan katlej melawak Dios. Iwan axan tikatej iwan katlej melawak Dios, kijtosneki tikatej iwan iKone, yen Jesucristo. Yen yin katlej melawak Dios iwan yen katlej techmaka yankuik nemilistle katlej mach keman tlamis. ²¹ Nokonetzitzinwan, xikpiakan kuidado de amo xikinweyikixtikan katlej mach melawak diosmej, o noso itlaj oksé tlamantle katlej welis kimoaxkatis namoyolo, katlej welis amehtoktis xikkawakan in Dios. Ijkón ma yeto.

SAN JUAN ITLATITLANIL IN DIOS IPAN OJPA OKIJKUILOJ YIN AMATLAJKUILOLE

Ma timotlasojojtakan se iwan oksé

¹ Nej, nitetajtzin, katlej nitlayekanke de yejwan katlej kinel-tokaj in toSeñor Jesucristo, nikijkuiло yin amatlajkuihole para tejwatzin siwatl katlej Dios omitzpejpenke, iwan noijki para mokonewan. Nej namechtlasojojtla, iwan amo san yen nej, sino noijki amechtlasojojtaj nochtin katlej yokixmatkej itlajtol in Dios katlej melawak. ² Tejwan tamechtlasojojtaj porke tikpiaj tlan melawak ipan toyolo, iwan tikpiaskej para iktlanke (ik tlami). ³ ToPapan Dios iwan toSeñor Jesucristo, iKone in toPapan Dios, ma techmakakan intlatiochiwalis, inteiknotlamachilis iwan inyolosewilis, porke tikixmatij tlan melawak iwan timotlasojojtaj se iwan oksé.

⁴ Nikpia miek pakilstle porke onikmatke nik sekimej de mokonewan kichiwaj tlan kijta itlajtol in Dios katlej melawak, ijkón ken toPapan Dios otechnawatij ma tikchi-wakan. ⁵ Iwan axan, tej nokni siwatl, nimitzlatlawtia ma timotlasojojtakan tinochtin. Yin tlan nimitzikuilia mach se yankuik tlanawatile, sino san yen tlanawatile katlej ya tikpiaj desde ikuak opéj tikneltokaj in Cristo. ⁶ Tla timotlasojojtaj, kijtosneki tikchijtokej nochti tlan Dios technawatijtok. Iwan tlan Dios technawatijtok, yen yin: ma timotlasojojtakan, ijkón ken otechilwij desde ikuak opéj tikneltokaj in Cristo.

Nemij miekej tekajkayajkej

⁷ Porke nemij miekej tekajkayajkej ixko yin tlaltikpak katlej kijtaj ke Jesucristo mach owitza ixko yin tlaltikpak ika itlal-nakayo ken tejwan. Akin ijkón kijta, kijtosneki tekajkayaj iwan kineki kipojpolos tlan kichiwa in Cristo. ⁸ Xikpiakan kuidado, para amo ma amechkajkayawakan iwan para amo xikpolokan namotlaxtlawil por ankitekipanoaj in toTajtzin Dios. Xikpiakan kuidado iwan Dios amechmakas ajositok namotlaxtlawil.

⁹ Tla akaj kineltoka itlaj oksé tlamachtile iwan ayakmo kineltoka in tlamachtile de Cristo, kijtosneki mach kipia in Dios ipan iyolo. Pero tla akaj kineltoka in tlamachtile de Cristo, kijtosneki kipia in Dios iwan iKone ipan iyolo. ¹⁰ Tla akaj tlamachtij witz amonawak iwan amo amechmachtia ika Cristo itlamachtil, amo xikkalakikan namokalijtik iwan nion amo xikilwikan: “Xiwalmuika tejwatzin.” ¹¹ Porke akin ijkón

kilwis, kijtosneki in yej noi jki kajki de akuerdo itech tlan amo kuale tlan yej kichiwa.

Juan okoninyolopachoj

¹² Nikpia miek tlan nikneki namechilwis, pero mach nikneki nikijkuilos itech yin amatlajkuilole. Porke nikneki nias namechitati iwan nikneki namechtlapowis, para ijkón tikpiaskej miek pakilistle.

¹³ Mitzontlajpalooaj ipilwan in mokni siwatl katlej Dios noi jki okinpejpenke. Ijkón ma yeto.

SAN JUAN ITLATITLANIL IN DIOS YA EYI BUELTA OKIJKUILOJ YIN AMATLAJKUILOLE

Kuale tlapoaj de Gayo

¹ Nej, nitetajtzin, katlej nitlayekanke de yejwan katlej kinel-tokaj in toSeñor Jesucristo, nikikuiloa yin amatlajkuirole para tejwatzin, Gayo, katlej nej ipan melajka nimitztlasojtla.

² Notetlasojkaikni, nimotiotzajtzilia inawak Dios por tej. Niktlajtlanilia in toTajtzin Dios xieto ika kuale itech nochitlamantle, iwan xichikawato, ijkón ken moanima kajki kuale inawak Dios. ³ Onikpixke miek pakilistle nijuak ovalajkej sekimej tokniwan iwan onechilwijkej nik tiktakita tlan kijta itlajtol in Dios katlej melawak, iwan nik tikchiwa ijkón ken tlan kijta yon tlan melawak. ⁴ Mach onkaj itlaj oksé katlej okachi ma nechpakti, sino san yen nijuak nikkaki nik nokonewan kichiwaj ijkón ken techilwia in Dios itlajtol katlej melawak.

⁵ Notetlasojkaikni, sa tekitl kuale tlan tikchiwa porke tikinpalewia in tokniwan maski sekimej mach tikinmixmati katlej witzej de oksekan. ⁶ Nian ijtit tiopan iwan inmixpan nochtin tokniwan tlaneltokakej, yejwan okijtojkej de kenik tikinpalewia ika miek tlasojtlaliste. Nimitztlatlawtia, xikinpalewi nijuak oksemi yaskej ipan inmojwi para amitlaj ma kinpolo ipan ojtle, xikinpalewi ijkón ken Dios kipaktia. ⁷ Porke yejwan okiskej para kitekipanoskej in toSeñor Jesucristo, iwan yejwan mach kiresibiroaj itlaj tlapalewile de oksekimej katlej mach kixmatij Dios. ⁸ Por yonik moneki tejwan tikinpalewiskej ika tlan yejwan kinpoloa. Para ijkón tejwan noijki tisepantekipanoskej inwan, tikinpalewijtoskej para ma kitematiltikan itlajtol in Dios katlej melawak.

Diótrefes mach kuale iyelis

⁹ Nej onikikuiloj se amatlajkuirole para yen tokniwan tiopantlaneltokakej, pero Diótrefes kineki yen tlayekantos de entre namejwan, iwan mach kineki techkakilis tlan tikilwiaj.

¹⁰ Por yonik, nijuak nej nias ompa, namechilwis tlan biero kichijtok. Nechislakawijtinemi ika tlan amo melawak iwan tlapojinemi biero de nej. Iwan amo san yon, sino noijki mach kineki kinresibiros in tokniwan katlej ompa ajsij. Iwan akinmej kinekij kinresibiroskej in tokniwan, yej mach kinkawilia, iwan asta kinkixtia iktlanke (ik tlami) de itech tiopan.

¹¹ Notetlasojkaikni, amo xikchiwa tlan amo kuale ken kichiwaj in tlakaj katlej mach kualtin, sino xikchiwa tlan kuale ijkón ken kichiwaj in tlakaj katlej kualtin. Akin kichiwa tlan kuale kijtosneki tekone de Dios, pero akin kichiwa tlan amo kuale kijtosneki mach kixmati in Dios.

Ichipawkanemilis in Demetrio

¹² Nochtin kijtaj nik kuale chipawkanemi in Demetrio, iwan nochtin kimatij ke tlan kijta iwan tlan kichiwa melawak. Tejwan noijki kuale tikmatij nik kuale chipawkanemi iwan namejwan noijki ankimatij nik melawak tlan tikjtaj.

Juan okoninyolopachoj

¹³ Nikpia miek tlan nikneki nimitzilwis, pero amo nikneki nikijuilos nochi itech yin amatlajkuilole. ¹⁴ Porke nikneki nias nimitzitati san niman, iwan ijkuakón kemaj welis timotlapowiskej.

¹⁵ Ma Dios mitzmaka yolosewilistle ipan moyolo. Motetlasojkaikniwan katlej nian katej mitzontlajpalooaj. Nimitzontlatlawtia noijki xinechonintlajpalili nochtin totetlasojkaikniwan katlej ompa katej.

SAN JUDAS ITLATITLANIL IN DIOS OKIJKUILOJ YIN AMATLAJKUILOLE

Judas okonintlajpaloj ikonewan Dios

¹ Nej niJudas, nej nokni in Jacobo iwan niktekipanoa in toSeñor Jesucristo. Namechijkuililia yin amatlajkuibole namejwan katlej toPapan Dios oamechnotzke para xiekan de Yej iaxkawan, iwan amechmonekuitlawia inawak Jesucristo porke Iwan ansetitokej. ² Dios ma amechiknomati iwan ma amechtlasojtla miek, iwan ma amechmaka miek yolosewiliste.

*Dios kintlajyowiltis in tlamachtijkej tekjkayajkej
(2 Pedro 2:1-17)*

³ Notetlasojkaiknian, ipan melajka oniknekia namechtlajkuililis de yen totemakixtilis katlej tinochtin tikpiaj inawak Dios. Pero axan nikmomaka kuenta nik moneki namechtlajkuililis para namechyolojchikawas. Namechtlalawtia ximochijchikawan para amo xikpolokan tlan tikneltokaj, katlej Dios san semi iktlanke (ik tlami) otechmakak tejwan katlej tiaxkawan. ⁴ Porke oichtakakalakej amonawak sekimej tlakaj, katlej Dios ya kinkajtok para kintlajyowiltis ijkón ken kajki ijkuitlakaj itech tiotlajkuilole desde ya wejkawitl. Yejwan mach kineltokaj Dios. Porke yejwan tlamachtiaj kijtaj welis ankichiwaskej itlaj tlajtlakole san tlan amejwan ankinekiskej, iwan kijtaj ke Dios kipia weyi iteiknotlamachilis iwan mach amechtlajyowiltis. Yejwan mach kineltokaj in Jesucristo katlej san yen se toTeko iwan san yen se toSeñor katlej tikpiaj.

⁵ Nej nikneki namechelnamiktis se tlamantle katlej namejwan ya ankimati: nik in Dios okinmakixtij ikonewan nijuak okinkixtij de itech país de Egipto, pero satepan okinmixpoloj katlej mach otlaneltokakej inawak. ⁶ Iwan noijki xikelnamikikan tlan Dios okintoktij in angelestín katlej mach okimalwijkej inlugar kan otlanawatiaya, iwan okajtejkej yon lugar kan oyekaj porke otlatlakojkej. Dios okintlalij ijlik tlatleyualotl iwan okinmilpij ika kadena iktlanke (ik tlami). Axan yejwan ompa mochiaj para kintlajyowiltiskej itech nekáj weyi tonale nijuak in Dios kinmixkomakas (kintzonmanas) por yen tlan mach kuale okichijkej. ⁷ Noijki xikelnamikikan in weyikan de Sodoma iwan de Gomorra iwan oksekimej weyikantin katlej ik ompa oyekaj. In tlakaj katlej ompa ochantiaj sa tekitl omomekatiaj iwan okichiwayaj oksekin tlamantle biero ika intlnakayo. Por yonik in Dios

okintlajyowiltij ika tlitl katlej mach keman sewi, iwan yon tejwan techmaka se ejemplo para ma tikmatikan tlanon welis tipanoskej tla tejwan noijki titlajtlakojtoskej.

⁸ Maski ijkón ya techmatiltia in Dios ika itlajtol, in yonmej tlakaj katlej ompa kalaktoej amowan, yejwan katej kej yeskia teemiktoej porke mach kimomakaj kuenta de tlan melawak, yejwan kiyeyekoaj mach itlaj panoskej maski ma tlajtlakokan ika intlalnakayo. Yejwan mach kitlakitaj iteki-wajkayo in Dios, iwan asta kinwijiwikaltiaj in espíritus katlej kipiaj weyi tlanawatijkayotl itech ilwikak. ⁹ Iwan nion se ángel mach ijkón nik tlapoa. Nion yen arcángel Miguel, katlej tlayekanke de yen angelestín, níkuak omotlatlajtolkuepke iwan diablo para akin de yejwan kitkis itlalnakayo in Moisés katlej ya mikkatl, in arcángel Miguel mach omixewij okilwij itlaj tlajtote biero, sino yej san okilwij: “Ma Dios mitzajwa chikawak.” ¹⁰ Pero yonmej tlakaj tlapoaj biero de yen tlamantin katlej mach kimomakaj kuenta. Katej kej yolkamej porke mach ompa tlan kiyeyekoaj iwan nion mach ijki tlan kichiwaj. Iwan por yonik yejwan innewian mopoloaj.

¹¹ ¡Pobrestin de yejwan! Dios sa tekitl kintlajyowiltis. Porke yejwan yomopolojkej ijkón ken omopoloj in Caín. Yejwan kinekij kitlaniskej tomin ika tlakajkayawalistle ijkón ken Bal-aam otlakajkayaj. Iwan por yonik mikiskej ken Coré omikke katlej Dios okimiktij porke mach okintlakitak in tlayekankej katlej Dios okintlalij. ¹² Yejwan kichiwaj tlan tepinatij níkuak anmololoaj antlakuaj ika tlasojtlalistle. Porke yejwan san yawij tlakuatiwej iwan mopaktitiwej iwan mach siera kitlakitaj in Dios. Yejwan san tekajkayajkej ken mixtle katlej mach techwalkuilia kiawatl iwan san kitki in ejekatl. Katej ken kuanmej katlej mach kitlakilaj intlakilo maski ajsi tonale para tlakiskej. Yejwan katej kej yeskia yomikkej ome buelta porke mach tlakij, yejwan kinwiwitlaskej ika nochin innelwayo iwan mach ok keman kipiaskej nemilistle. ¹³ Yejwan katej ken atl níkuak chikawak motlatlamotla asta kisa iposokyo. Yejwan kichiwaj miek tlamantle tepinatij ken níkuak in atl motlatlamotla asta posoni. Yejwan katej ken sitlaltin katlej mach ok katej ipan inmojwi iwan mach ok kimatij kanin yawij. Pero Dios kinpialijtok se lugar kan sa tekitl tlatleyua kan ompa yeskej iktlanke (ik tlami).

¹⁴ Enoc katlej otlakatke ipan chikome tlakatl satepan de Adán, noijki okijtoj de tlan Dios okilwij ma kijto de tlan panoskej in yonmej tlakaj katlej kichiwaj tlan amo kuale. Okijtoj: “Xikitakan, in toSeñor ompa witz kinwalinwika miek miles de angelestín yolchipawakej, ¹⁵ para kinmixkomakas (kintzonmanas) nochtin in tlaltikpaktlakaj. Iwan kintlajyow-

iltis nochtin in tlakaj katlej mach kualtin por nochi tlan mach kuale okichijkej iwan por nochi tlan mach kuale okijtojkej inawak Dios.”¹⁶ In yonmej tlakaj mach kualtin katlej katej amowan san tepojpojkej iwan mach itlaj kiwelitaj. Yejwan motekipachoaj san para kipaktiskej intlalnakayo. Ika intlatjol moweyinekij iwan tlapoaj kuale de oksekimej san por kinekij kitlaniskej itlaj.

Judas kinnajnawatia in tlaneltokakej

¹⁷ Pero namejwan notetlaso jkaikniwan, amo xikchiwakan ken tlan yejwan kichiwaj. Xikelnamikikan de tlan okijtojkej in tlatitlaniltin de toSeñor Jesucristo.¹⁸ Yejwan oamechilwi jkej: “Nijuak sa iyakatlanka tonaltin, yeskej tlakaj katlej san ika wetzkaskej itlajtol in Dios, iwan kinyekanas inmelewilis mach kuale.”¹⁹ Yejwan san kinxexeloaj in tokniwan para amo ma yekan san se tlajtole nochtin. Yejwan kintekipachoa yen tlan kineki intlalnakayo, porke mach kipiaj iEspíritu in toTajtzin Dios ipan inyolo.

²⁰ Pero namejwan notetlaso jkaikniwan, amo xikchiwakan ken yejwan kichiwaj. Namejwan kuale ximoyekketzakan itech nochi tlamatle chipawak katlej ankineltokaj. Ximotiotzatzilikan inawak Dios ika ipoder in Espíritu Santo.²¹ Xikchiwakan de xiekan itech itlaso jtlalis in toTajtzin Dios. Iwan xikchiakan ika pakilstle in yankuik nemilistle katlej mach keman tlamicatle toSeñor Jesucristo techmakas ika iteiknotlamachili.

²² Katlej ayamo kuale tlaneltokaj inawak Dios, xikinmiknomatikan iwan xikinpalewikan para kuale ma tlaneltokakan.²³ Sekimej de yejwan xikinmakixtikan kej yeskia ankinmakixtiaj de ijtik tlitl. Iwan oksekimej xikinmiknomatikan ika tlaso jtlalistle. Pero xikpiakan kuidado de amo antlajtlakoskej ken yejwan. Xikkokolikan intlajtlakol iwan xikitakan kej itlaj tzotzole sokioj iwan tetlajyaltij por yen tlan mach kuale kichiwaj.

Judas kiyektenewa in toTajtzin Dios para ika kiyakatlama yin amatlajkuilole

²⁴ Dios kipia poder para techmonekuitlawis (techkuidaros) para amo ma tiwetzikan itech tlajtlakole, iwan kipia poder para techkawilis ma tikalakikan inawak kan Yej kajki ika imawisotlanex. Ompa inawak sa tekitl tikpiaskej pakilstle porke mach ok tikpiaskej nion se tlajtlakole.²⁵ San yen se Dios onkaj katlej kipiaj weyi tlalnamikilistle. Por yen Jesucristo, in Dios techtlajtlakolkixtia. Dios nochipa ma kipia imawisotlanex, nochipa ma weyikisto (ma weyitito), nochipa ma kipia poder iwan nochipa ma kipia tekiwajkayotl, desde achtoj, desde axan iwan para nochipa. Ijkón ma yeto.

JESUCRISTO OKITITIJ IN SAN JUAN TLAN SATEPAN TLAPANOS

Tlan Jesucristo okititij in Juan

¹ Itech yin tiotlajkuilole nikijta tlan Jesucristo onechititij katlej mach ok wejkawitl para tlapanos. Dios okimakak in Jesucristo yin tlamantle para ma techititi in tejwan titekipanojkawan. Iwan Jesucristo onechhwaltitlanilij se iángel para ma nechititiki yin tlamantle. Nej niJuan niktekipanoa in toTajzin Dios. ² Nej namechilwia nochi tlan melawak de tlan onikitak iwan tlan Jesucristo onechilwij de itlajtol in Dios.

³ Ma paki akin kileroa yin tlajtole de tlan satepan tlapanos, iwan ma paki akin kikaki iwan kichiwa nochi tlan nian ijkuitlitok. Porke ya ajsitiwitz in tonale.

Juan okintlajkuililij in tokniwan tlaneltokakej de itech chikomen tiopanmej

⁴ Nej niJuan, namechtlajkuililia namejwan antlaneltokakej de itech chikomen tiopanmej katlej ankatej itech estado de Asia. Ma Dios amechtiochiwa iwan ma amechmaka yolosewilistle. Jesucristo yen katlej achtoj yoyeka, yen katlej axan onkaj, iwan yen katlej satepan witz. Iwan chikome espíritus noijki ma amechtiochiwakan iwan ma amechmakakan yolosewilistle, katlej katej iyakapan Dios kan tlanawatia. ⁵ Noijki Jesucristo ma amechtiochiwa iwan ma amechmaka yolosewilistle katlej inawak tiktlaliaj nochi totlaneltokalis itech nochi tlan kijta, katlej omikke porke okijtoj tlan melawak. Yen katlej achtoj omoyolkuiq satepan de omikke iwan mach oksemi mikis, iwan yen kinnawatia nochtin in tlatlanawatijkej de ixko yin tlaltikpak. Jesucristo techtlasojtla iwan ika ieso yotechchipawilij toyolo de nochitotlajtlakol. ⁶ Yej otechmakak poder para tieskej kej titlanawatijkej, iwan para tiktekipanoskej iPapan in toSeñor Jesucristo kej titiopixkej. In weyikixtilistle iwan poder ma yeto nochipa iaxka. Ijkón ma yeto.

⁷ Xikitakan, Cristo witz ijtk mixtle. Nochtin in tlakaj kitaskej, iwan noijki kitaskej nekatej tlakaj katlej okkestzopotijkej. Iwan nochtin in tlaltikpaktlakaj chokaskej nikuak kitaskej. Melawak, ijkón tlamochiwas.

⁸ “Nej niachtoj iwan Nej niitlamian de nochti tlamantle, ijkón ken abecedario pewa ika A iwan tlami ika Z”, ijkón kijta in toSeñor, katlej kipia nochti poder, katlej achtoj yoyeka, katlej axan onkaj, iwan katlej satepan witz.

Juan okitak in Cristo itech imawisotlanex

⁹ Nej namokni Juan, nej noiiki nitlajyowia ken namejwan por yen toSeñor Jesucristo. Iwan nej, noiiki ken namejwan, nikchia ika yolchikawalistle katlej nechmaka in Jesucristo, nik se tonale tieskej ompa kan Dios tlanawatia. Nej onieka ipan se tlale katlej pankistok itech atl itoka Patmos. Ompa onechkawatoj katlej kikokoliaj in toTajtjin Dios porke nej onikintlapowiaya in tlakaj de itlajtol in Dios iwan onikin-matiltiaya de tlan nikmati de Jesucristo. ¹⁰ Itech se tonale domingo, in Espíritu Santo onikmachilij ovalaj notech, iwan onikakke ik nokuitapan se tlajtole chikawak kej se tlapitzal-istle. ¹¹ Onechilwij:

—Nej niachtoj iwan Nej niitlamian de nochí tlamantle, ijkón ken abecedario pewa ika A iwan tlami ika Z. Xikikuilo tlan tikita, iwan tlan tikijkuilos xikintitlanili in tlanel-tokakej katlej katej itech nekatej chikomen tiopanmej de estado de Asia, kijtosneki katlej katej itech weyikan de Éfeso, itech weyikan de Esmirna, itech weyikan de Pérgamo, itech weyikan de Tiatira, itech weyikan de Sardis, itech weyikan de Filadelfia iwan itech weyikan de Laodicea.

¹² Nej onimokuepke para nikitas akin nechtlapowia, iwan níkuak onimokuepke, onikitak chikome kandelerojtin de oro, ¹³ iwan tlataljko de yen yonmej chikome kandelerojtin, onikitak yen katlej omochij tlakatl, otzotzolejtoka ika itzot-zol weyak asta itech ikxiwan, iwan okipiaya se itlajkoipika de oro patlawak asta ielpan. ¹⁴ Itzonkal oyeka istak ken ichkatl istak, o noso istak ken tesiwitl, iwan ixtololowan oxotlatokaj ken titl. ¹⁵ Ikxiwan opetlaniaj ken tepostle de bronce kostik ken níkuak kipatiltiaj ijtik titl. Iwan itlajtol omokakia chikawak ken níkuak kukuyokaj miekej weyamej. ¹⁶ Itech iyekma okinpiaya chikome sitlaltin, iwan de ijtik itenko okisaya se espada de ojkan itlatekia. Ixko sa tekitl opetlania ken tonale níkuak chikawak petlani.

¹⁷ Níkuak onikitak, oniwetzito ikxitlan kej nimikkatl. Pero Yej okitlalij iyekma nopan iwan onechilwij:

—Amo ximomawti. Nej niachtoj iwan Nej niitlamian de nochí tlamantle, ¹⁸ Nej katlej niyolitok. Nej onimikka, pero axan niyolitok iwan mach ok keman nimikis. Nej níkinpixtok in yabejtin para welis niktlapos o noso niktzakuas in puerta de yen mikilistle iwan de yen puerta kan katej in animajtin katlej yomikkej. ¹⁹ Xikikuilo kiné, nochí tlan yotikitak, tlan axan tlamochiwa, iwan tlan satepan tlamochiwas. ²⁰ Axan nimitzilwis katlej mach akaj kimati tlan kijtosneki in chikome sitlaltin katlej otikinmitak itech noyekma, iwan de

yen chikome kandelerojtin de oro. In chikome sitlaltin kijtosneki yen tlayekankek katlej kinmonekuitlawiaj in chikome tiopanmej. Iwan in chikome kandelerojtin kijtosneki yen chikome tiopanmej.

2

Kintlajkuililiaj in tiopantlaneltokakej katlej katej itech weyikan de Éfeso

¹ Xiktlajkuilili in tlayekanke de yen tiopan katlej kajki itech weyikan de Éfeso iwan ijkín xikilwi: “Ijkín kijta katlej kinpia chikome sitlaltin itech iyekma, iwan nemí tlatlajko de yen chikome kandelerojtin de oro: ² Nej nikmati nochí tlan tikchiwa, iwan kenik titekipanoa chikawak iwan tikxikoa nochí tlan tipanoa. Iwan nikmati nik mach tikinxikoa in tlakaj katlej mach kualtin, iwan tikinyejyeckoá katlej kijtaj nik yejwan tlatitlaniltin de Dios iwan mach melawak, iwan tikmomaka kuenta nik san tekajkayajkej. ³ Nikmati nik titlajyowia iwan tikxikoa nochí tlan tipanoa, iwan titekipanoa chikawak por Nej iwan mach timosotlawa. ⁴ Pero nikpia se tlamantle katlej moneki nimitzilwis. Mach ok tinechtlasojtla ken achtoj otinechtlasojtlaya. ⁵ Por yonik, xikelnamiki kenik otinechtlasojtlaya in achtoj, iwan ximoyolkuepa iwan xikchiwa ken achtoj otikchiwaya. Tla amo ijkón tikchiwas, niwitz iwan nimitzkixtilis mokandelero de Éfeso kan katej in tiopantlaneltokakej, tla amo timoyolkuepas. ⁶ Pero onkaj se tlamantle katlej kuale tikchiwa: mach tikwelita tlan kichiwaj in nicolaítas, ijkón ken Nej noijki mach nikwelita tlan kichiwaj. ⁷ Akin kineki kimomakas kuenta, ma kikaki tlan iEspíritu in toTajtzin Dios kinmilwia in tiopantlaneltokakej. Akinmej tlatlaniskej, Nej nikinmakas ma kikuakan itlakilo in tlatokkuawitl katlej kitemaka nemilistle, katlej kajki kan paraíso kan sa tekitl tlakualkan, kan kajki in toTajtzin Dios.”

Kintlajkuililiaj in tiopantlaneltokakej katlej katej itech weyikan de Esmirna

⁸ Xiktlajkuilili noijki in tlayekanke de yen tiopan katlej kajki itech weyikan de Esmirna iwan ijkín xikilwi: “Ijkín kijta katlej yen achtoj iwan yen itlamian de nochí tlamantle, katlej omikka iwan oksemi omoyolkuij: ⁹ Nej nikmati nochí tlan tikchiwa, nochí in tlajyowilistle katlej tipanoa, iwan nikmati nik tipobre maski melawak tiriko inawak Dios. Iwan nikmati nik sa tekitl tlapoaj mach kuale de tej katlej motenewaj judiojtin, o noso ikonewan Dios, iwan mach melawak sino yejwan katej kej se grupo de itekipanojkawan in Satanás. ¹⁰ Amo

ximomawti de tlan tipanos. Porke in diablo kintzakuas telpiloyan sekimej de amejwan para amechyejyekos, iwan antlajyowiskej majtlakte tonale. Pero xitlaneltokato nonawak asta ikuak timikis, iwan Nej nimitzmakas kej tlaxtlawile in yankuik nemilistle katlej mach keman tlamis.¹¹ Akin kineki kimomakas kuanta, ma kikaki tlan iEspíritu in toTajzin Dios kinmilwia in tiopantlaneltokakej. Akinmej tlatlaniskej mach ojpa mikiskej, kijtosneki mach yaskej ijtk tliko kan mach keman sewis in tlilt."

Kintlajkuililiaj in tiopantlaneltokakej katlej katej itech weyikan de Pérgamo

¹² 'Xiktlajkuilili noijki in tlayekanke de yen tiopan katlej kajki itech weyikan de Pérgamo iwan ijkín xikilwi: "Ijkín kijta katlej kipia iespada de ojkan itlatekia: ¹³ Nej nikmati nochí tlan tikchiwa iwan nikmati kan tichanti. Tichanti kan Satanás tlanawatia, pero maski ompa tichanti, tej ok titlaneltokatok nonawak. Maski okimiktijkej in Antipas katlej otetlapowiaya de Nej, ompa kan chanti Satanás, tej mach keman otinechkaj. ¹⁴ Pero nikpia kanaj keski tlajtole katlej moneki nimitzilwis. Ompa mowan katej sekimej katlej kichiwaj tlan kijta itlamachtil in Balaam. Porke in Balaam okimachtij in Balac kenamij kichiwas para ma tlajtlakokan in tlakaj de Israel. Okinmilwij ma kikuakan in tlamanale katlej kinmanilia in santojtin iwan ma momekatikan. ¹⁵ Noijki ompa mowan katej sekimej katlej kichiwaj tlan kijta intlamachtil in nicolaítas, katlej Nej mach nikwelita. ¹⁶ Por yonik, ximoyolkuepa porke tla amo timoyolkuepas, niwitz iwan nikinmagas (nikinmakas) ika noespada katlej kisa de ijtk noten. ¹⁷ Akin kineki kimomakas kuanta, ma kikaki tlan iEspíritu in toTajzin Dios kinmilwia in tiopantlaneltokakej. Akin tlatlanis, nikmakas ma kikua in tlakuale itoka maná katlej tlatitok ilwikak. Iwan noijki nikmakas se tetzintle istak kan ikuilitos se yankuik tokayitl (tokayotl) katlej mach akaj kixmatis, sino san yen akin kiresibiros."

Kintlajkuililiaj in tiopantlaneltokakej katlej katej itech weyikan de Tiatira

¹⁸ 'Xiktlajkuilili noijki in tlayekanke de yen tiopan katlej kajki itech weyikan de Tiatira iwan ijkín xikilwi: "Ijkín kijta iKone in Dios, katlej kinpia ixtololowan katlej xotlatokej ken tlilt iwan kinpia ikxiwan petlantokej ken tepostle bronce: ¹⁹ Nej nikmati nochí tlan tikchiwa. Nikixmati motlasojtlalis, motlaneltokalis, motekitilis inawak Dios iwan noijki nikmati nik tikxikoa tlan tipanoa. Noijki nikmati nik axan okachi titekipanoa iwan amo ken achtoj. ²⁰ Pero nikpia se tlajtole katlej moneki nimitzilwis. In siwatl Jezabel katlej motenewa

profeta, tikkawilia ma kinmachti notekipanojkawan. Kinmachtia ma momekatikan iwan ma kikuakan in tlamanale katlej kinmaniliaj in santojin.²¹ Yon siwatl Nej yonikmakak tiempo para ma moyolkuepa para ayakmo ma kinmomekati in tlakaj, pero mach tlakaki.²² Por yonik, in yon siwatl niktoktis ma mokoko chikawak asta ma sa weto ipan itlapech, iwan noijki akinmej kinmomekatia noijki nikintoktis ma mokokokan iwan ma tlajyowikan miek tla amo kikawaskej yon tlajtlakole katlej kichiwaj ken yon siwatl kichiwa.²³ Iwan ikonewan in yon siwatl nikinmiktis. Ijkón, nochtin in tiopantlaneltokakej kimomakaskej kuenta nik in Nej nochti kuale nikmati tlanon kiyejyekoaj in tlakaj ipan intlalnamikilis iwan ipan inyolo. Iwan kada se de amejwan namechmakas según tlan ankichijkej.²⁴ Pero namejwan katlej ankatej ompa Tiatira, katlej mach ankitlakitaj yon tlamachtile iwan mach ankixmatij tlan yejwan kitenevaj weyi tlamachtile de Satanás katlej miekej mach kimatij, para amejwan mach itlaj oksé tlamantle namechnawatia.²⁵ Pero xikneltokatokan in tlamachtile katlej ya ankimatij asta ikuak oksemi niwitz.²⁶ Akinmej tlatlaniskej iwan kichijtoskej tlan Nej nikneki asta ikuak mikiskej, Nej nikintalis yejwan ma tlanawatikan itech nochtin in paismej²⁷ ijkón ken noPapan onechtlalij ma nitlanawati. Iwan ika se vara de tepestle ken ivara in tekiwaj ika kintlajtlamiskej in paismej, kej yeskia kintlajtlapanaskej xoktzinmej.²⁸ Nej nikpalewis akin tlatlanis para ma yeto nowan nikuak niwitz, porke Nej nikaj ken sitlale katlej kisa kualkan.²⁹ Akin kineki kimomakas kuenta, ma kikaki tlan iEspíritu in toTajzin Dios kinmilwia in tiopantlaneltokakej.”

3

Kintlajkuililiaj in tiopantlaneltokakej katlej katej itech weyikan de Sardis

¹ Xiktlajkuilili noijki in tlayekanke de yen tiopan katlej kajki itech weyikan de Sardis iwan ijkín xikilwi: “Ijkín kitja katlej kinpia chikome Espíritus de Dios iwan chikome sitlaltin: Nej nikmati nochti tlan tikchiwa, iwan nikmati nik miekej kijtaj tikpia nemilistle inawak Dios pero amo melawak, sino tikaj kej timikkatl.² Xiijsato, iwan xikchikajto katlej ok tikpixtok katlej ya ixpolitok. Porke nikita mach kuale tlan tikchijtok inawak Dios.³ Por yonik, xikelnamiki tlan omitzmachtijkej iwan tlan otikakke. Xikchiwa iwan ximoyolkuepa. Porke tla amo tijsatos, niwitz kej se ichtekke iwan mach tkmomakas kuenta tlan ora noonkisaki.⁴ Pero tikinpixtok ompa Sardis sekimej katlej mach ya kisokiotia

innemilis ika tlajtlakole. Yejwan nowan nemiskej ika intlaken istak, porke yejwan okichijkej tlan omonekia kichiwani. ⁵ Akinmej tlatlaniskej, tlakentitoskej de istak, iwan mach nikintokayopolos de itech libro kan ikuilitok intoka nochtin akinmej kipiaj yankuik nemilistle katlej mach keman tlamic, sino nikinteixmachtis (nikinteitis) ixpan noPapan iwan inmixpan iangelwan. ⁶ Akin kineki kimomakas kuanta, ma kikaki tlan iEspíritu in toTajzin Dios kinmilwia in tiopantlaneltokakej.”

Kintlajkuililiaj in tiopantlaneltokakej katlej katej itech weyikan de Filadelfia

⁷ Xiktlajkuilili noijki in tlayekanke de yen tiopan katlej kajki itech weyikan de Filadelfia iwan ijkín xikilwi: “Ijkín kijta katlej yolchipawak iwan yolmelawak, katlej kipia in yabe de yen rey David, katlej kipia poder para tlatlapos o noso tlatzakuas kan Yej tlanawatia. Nikuak Yej tlatlapoa mach akaj weli kitzakua. Iwan nikuak Yej tlatzakua mach akaj weli tlatlapoa: ⁸ Nej nikmati nochi tlan tikchiwa. Nej yonimitztlapolij se puerta katlej mach akaj welis kitzakuas. Maski mach tichikawak, tej tikchiwa tlan kijta notlajtol, iwan mach keman tikipta mach tinechixmati. ⁹ Ijkón kiné, in tlakaj katlej mach kualtin katlej powij iwan Satanás, katlej motenewaj judiojin o noso ikonewan in Dios, katlej san tejakayajkej, Nej nikchiwas ma motlankuaketzakan mokxitlan, para ma kimatikan nik Nej nimitztlasojtla. ¹⁰ Iwan komo tikchiwa tlan kijta notlajtol iwan tikxikoa ika tlajyowilistle, por yonik Nej nimitzpalewis para amo ma mitzajsi itech nekáj ora in tlajyowilistle katlej witz itech nochti in tlaltikpak, para nikinyejyekos nochtin in tlaltikpaktlakaj. ¹¹ Niwitz san niman. Xikneltokato nochipa notlajtol, para amakaj ma mitzkixtili motlaxtlawil katlej mitztokaroa. ¹² Akinmej tlatlaniskej, Nej nikchiwas yejwan ma yekan kej pilartin itech itiopan noDios, iwan mach ok keman kisasej de ompa. Iwan inpan nikikuilos itoka in noDios iwan itoka iweyikan noDios, katlej yankuik Jerusalén katlej waltemos de ilwikak kan kajki noDios. Iwan noijki inpan nikikuilos in yankuik notoka. ¹³ Akin kineki kimomakas kuanta, ma kikaki tlan iEspíritu in toTajzin Dios kinmilwia in tiopantlaneltokakej.”

Kintlajkuililiaj in tiopantlaneltokakej katlej katej itech weyikan de Laodicea

¹⁴ Xiktlajkuilili noijki in tlayekanke de yen tiopan katlej kajki itech weyikan de Laodicea iwan ijkín xikilwi: “Ijkín kijta katlej kisentlalia itlajtol, katlej kijta tlan melawak de Dios, iwan por Yej, in Dios okichij nochti tlan onkaj: ¹⁵ Nej

nikmati nochí tlan tikchiwa. Nikmati nik mach tisesek iwan nion mach titotonik. Okachi kuale tla tieni tisesek o noso titotonik.¹⁶ Pero como san tiyamankatotonik, iwan amo tisesek nimpor amo titotonik, tones Nej nimitzkixtis de nonawak ken nijuak nikixtia notlakuepal de ijtk noten porke tej san tiyamankatotonik.¹⁷ Porke tej tikipta tiriko, iwan tikipta mach itlaj mitzpoloa. Pero mach tikmomaka kuenta nik ixpan Dios in tej tipobre, mach itlaj tikpia, tiktemaka lástima, mach titlachia iwan tixitlatztik.¹⁸ Por yonik, Nej nimitzilwia xikkowa nonawak oro katlej yokichipajkej ijtk tlilt iwan ya chipawak para ijkón melawak xieto tiriko. Iwan nonawak xikkowa tzotzole istak para ximotzotzolti para ayakmo xipinawa por tixitlatztik. Iwan noijki nonawak xikkowa pajtle para moixtololwan para kuale xitlachia.¹⁹ Nej nikinmajwa iwan nikinkastigaroa akinmej nikintlasojtla. Ijkón kiné, xinechtlakita ika nochí moyolo iwan ximoyolkuepa.²⁰ Xikkaki. Nej nikaj kan puerta nitlatatalatok. Tla akaj kikakis notlajtol iwan kitlapos in puerta, Nej nikalakis iwan nitlakuas iwan, iwan yej noijki tlakuas nowan.²¹ Akinmej tlatlaniskej, Nej nikinkawilis nowan ma motlalikan kan nitlanawatia, ijkón ken Nej onitlatlanke iwan onimotlalij iwan noPapan kan Yej tlanawatia.²² Akin kineki kimomakas kuenta, ma kikaki tlan iEspíritu in toTajtzin Dios kinmilwia in tiopantlaneltokakej.”

4

Kiweyikixtiaj in toTajtzin Dios ompa ilwikak

1 Satepan de yin, onikitak se puerta tlapotok ompa ilwikak. Iwan nekáj chikawak tlajtole kej tlapitzalistle, katlej achtoj onechtlapowij, onechilwij:

—Xiwaltlejko nian, iwan nimitzitis nochí tlan tlapanos satepan.

2 Ijkuakón in Espíritu Santo onikmachilij ovalaj notech, iwan onikitak se siya ompa ilwikak, iwan itech yon siya onikitak akaj ompa ewatok.³ Iwan katlej oewatoka itech yon siya omotaya kej se tetl petlantok itoka jaspe o noso cornalina. Iwan siya kiyawalojtok se akosamalotl, katlej opetlania kej se tetl itoka esmeralda.⁴ Yon siya noijki okiyawalojtokaj oksekimej senpoale iwan nawi siyajtin, iwan itech yonmej siyajtin oewatokaj senpoale iwan nawi tetajtzitzintin, otlakentitokaj de istak iwan okipiayaj itech intzontekon se korona de oro.⁵ Iwan kan kajki yon siya okisaya miek tlapejpetlanalistle, otlakukuyokaya iwan otlatijtikuinia. Iwan iyakapan siya otlikuitokaj chikome tlanextin, kijtosneki yen chikome espíritus de Dios.⁶ Iyakapan siya noijki oyeka itlaj kej se mar sa tekitl chipawak kej teskatl asta pepetlani.

Tlatlajko iwan ik iyawalojkan yon siya, oyekaj nawin katlej yolitokej katlej otentokaj de ixtololomej ik inyakapan iwan ik inkuitlapan. ⁷ Se katlej yolitok omotaya kej se lión, oksé omotaya kej se toro, oksé okipiaya ixko kej se tlakatl, iwan oksé omotaya kej se kuixin (águila) patlantok. ⁸ Nochtin yonmej nawin katlej yolitokej okinpiayaj chikuasen inmajaswan kada se, iwan ik tlrixko iwan ik tliltik okinpiayaj miekej ixtololomej. Tonayan iwan yuak mach omosewiayaj de okijtoayaj:

Santo, Santo, Santo,

Señor, Dios katlej kipia nochí poder,
katlej achtoj yoyeka, katlej axan onkaj iwan katlej satepan witz.

⁹ Iwan nijuak in yonmej katlej yolitokej okimakayaj weyikixtilistle, tetlakitalistle iwan tlasojkamachilistle, katlej ewatok ipan isiya, katlej yolitok iktlanke (ik tlami), ¹⁰ in senpoale iwan nawi tetajtzitzintin omotlankuaketzayaj iyakapan katlej ewatok ipan isiya, iwan okiweyikixtiayaj katlej yolitok iktlanke, iwan okitlaliayaj inkorona iyakapan siya, iwan okijtoayaj:

¹¹ ToTeko Dios, tejwatzin motech powi para timitzmakaskej miek weyikixtilistle iwan miek tetlakitalistle, porke tejwatzin tikpia weyi mopoder.

Tejwatzin otikchij nochí tlan onkaj,
tejwatzin otikmonekiltij ma yekan, iwan por yonik otikinchij.

5

Juan okitak in libro iwan Ichkatzin

¹ Ijkuakón onikitak itech iyekma de yen katlej oewatoka ipan siya, iwan onikitak se libro tetejkuixtok ijkuilitok ik tlrixko iwan ik tliltik iwan otzaktoka ika chikome seyojin.

² Iwan onikitak se ángel katlej kipia poder katlej otlajtlania chikawak:

—¿Akin itech powi kitlapos in libro iwan kintzayanas in seyojin?

³ Pero mach akaj oyeka ompa itech ilwikak nimpot ixko yin tlaltikpak nimpot itlampa in tlaltikpak akin ma itech powi kitlapos in libro, iwan nion para kitas tlanon ijkuilitok. ⁴ Iwan nej sa tekitl onichokak, porke mach oyeka nion se akin ma itech powi para kitlapos iwan kileros in libro, iwan nion para kitas tlanon ijkuilitok. ⁵ Ijkuakón se de yen tetajtzitzintin onechilwij:

—Amo xichoka, porke in lión katlej walajtok nelwatl de familia de Judá iwan noijklí de familia de David, Yej yotlatlanke para welis kitlapos in libro iwan kintzayanas in chikome seyojin.

⁶ Ijkuakón onikitak moketok se Ichkatzin tlatlajko de yen siya iwan tlatlajko de yen nawin katlej yolitokej, iwan tlatlajko de yen tetajtzitzintin. Yon Ichkatzin omotaya kej yokimik-tijkaj. Okinpiaya chikome ikuakuawan iwan chikome ixtololowan. In chikome ixtololowan kijtosneki yen chikome espíritus de Dios katlej okintitlankej ixko nochi in tlaltikpak. ⁷ Yon Ichkatzin oyáj kan kajki in siya, iwan okitzkij in libro katlej okipiyaya itech iyekma de yen katlej oewatoka itech siya. ⁸ Nijuak okitzkij in libro, in nawin katlej yolitokej iwan senpoale iwan nawi tetajtzitzintin, omotlankuaketzkej iyakapan Ichkatzin. Kada se de yonmej tetajtzitzintin okipiyaya se arpa, iwan okinmitkiaj kopajtin de oro tentokej de kopale, iwan yon kopale kijtosneki yen intiotzajtzilis de yen katlej iaxkawan in Dios. ⁹ Yejwan okitlakuikayaj (okuikayaj) se yankuik tlakuikale:

Tejwatzin motech powi para tikitzkis in libro iwan tikintzan yanás in seyojin.

Porke omitzmiktijkaj, iwan ika moeso otikinkoj para ma yekan iaxkawan in toTajtzin Dios,
nochtin in tlaltikpaktlakaj, nochtin katlej tlapoaj tlalamantle tlajtole, de nochtin pueblojin, iwan de nochtin paismej.

¹⁰ Iwan otikintlalij ma yekan kej tlanawatijkej iwan kej tiopixkej para kitekipanoskej in toTajtzin Dios,
iwan para tlanawatiskej ixko yin tlaltikpak.

¹¹ Satepan onitlachixke iwan onikinkakke miekej angelestín katlej okiyawalojtokaj in siya, iwan okinyawalojtokaj in nawin katlej yolitokej, iwan noijki okinyawalojtokaj in senpoale iwan nawi tetajtzitzintin. Oyekaj miekej miyones de angelestín. ¹² Iwan okijtoayaj chikawak:

In Ichkatzin katlej okimiktijkaj
itech powi ma kipia poder iwan ma kipia rikoyotl,
ma kipia ixtlamachilistle iwan ma kipia chikawalistle,
ma kipialikan tetlakitalistle, ma kimakakan weyikixtilistle
iwan noijki nochtin ma kiyektenewakan.

¹³ Iwan nochti tlamanle tlan Dios okichij, katlej katej il-wikak, katlej katej ixko yin tlaltikpak iwan katlej katej it-lampa yin tlaltikpak, iwan katlej katej ijlik atl, onikinkakke okijtokej:

Nochtin ma kiyektenewakan, ma kipialikan tetlakitalistle,
ma kimakakan weyikixtilistle iwan ma kipia poder,
iktlanke (ik tlami) ma yeto nochti iaxka katlej ewatok ipan
isiya iwan noijki ma yeto iaxka in Ichkatzin.

¹⁴ In nawin katlej yolitokej okijtoayaj:
—¡Ijkón ma yeto!

In senpoale iwan nawi tetajtzitzintin omotlankuaketzkej iwan okiweyikixtijkej katlej yolitok iktlanke (ik tlami).

6

In Ichkatzin okitzayanke in seyojin

¹ Ijkuakón onikitak in Ichkatzin okitzayanke se seyo de yen chikome seyojin, iwan onikakke se de yen nawi katlej yolitokej okijtoj chikawak kej se tlatikuinalistle:

—¡Xiwiki iwan xikita!

² Onitlachixke, iwan onikitak se kabayo istak, iwan katlej ipan oyetiaya okitzkijtoka se arko. Iwan okimakakej se korona, iwan okiske kej se tlatlanke para tlatlanis okachi.

³ Nijuak yon Ichkatzin okitzayanke ipan ome seyo, onikakke in oksé katlej yolitok, okijtoj:

—¡Xiwiki iwan xikita!

⁴ Iwan okiske oksé kabayo, oyeka chichiltik, iwan katlej ipan oyetiaya okimakakej se weyi espada iwan okimakakej poder para ma kichiwa mach ok ma motlasojoatlakan in tlaltik-paktlakaj iwan ma momijmiktikan san entre yejwan.

⁵ Nijuak yon Ichkatzin okitzayanke ipan eyi seyo, onikakke oksé katlej yolitok, okijtoj:

—¡Xiwiki iwan xikita!

Nej onitlachixke, iwan onikitak se kabayo tliliwik, iwan katlej ipan oyetiaya okipiaya se libra (librajxikale) itech ima.

⁶ Iwan onikakke se tlajtole tlatlajko de kan katej in nawin katlej yolitokej, okijtoayaj:

—Se kilo de trigo o noso eyi kilo de cebada ipatij tlan se tlakatl kitlani por tekipanoa se tonale. Pero amo san xikawilti in aseite iwan vino.

⁷ Nijuak in Ichkatzin okitzayanke ipan nawi seyo, onikakke noijki in ya ipan nawi katlej yolitok, okijtoj:

—¡Xiwiki iwan xikita!

⁸ Onitlachixke, iwan onikitak se kabayo kostik, iwan katlej ipan oyetiaya oyeka itoka Mikilistle. Iwan ikuitlapán owalaya in lugar kan yawij mikkamej. Iwan okimakakej poder para kinmijmiktis se kuarta parte de nochtin in tlaltik-paktlakaj. Para kinmijmiktis ika guerra, ika apostle, ika kokolistle, iwan ika yolkamej tekuanimej.

⁹ Nijuak yon Ichkatzin okitzayanke ipan makuile seyo, onikitak itlampa artal inmanimajwan de katlej okinmiktijkej porke okineltokayah itlajtol in toTajtzin Dios, iwan porke okitematiayaj itlajtol. ¹⁰ Iwan okijtoayaj chikawak:

—Señor, tejwatzin tiyolchipawak iwan nochipa tikija tlan melawak, ¿asta keman tikinmixkomakas (tikintzonmanas) iwan tikintlaxtlawaltis in tlaltikpaktlakaj katlej otechmikti-jkej?

¹¹ Ijkuakón okinmakakej intlaken istak, iwan okinmilwi-jkej ok ma mosewikan ok keski tonale, asta ma majxitikan nochtin oksekimej inmikniwan katlej kitekipanoaj in toTa-jtzin Dios katlej noijki kinmiktiskej ken yejwan.

¹² Nijuak in Ichkatzin okitzayanke ipan chikuasen seyo, onikitak sa tekitl chikawak otلالولىنىك. In tonale otliliwiak kej itzotzol se mikatl tliliwik, in metztle ochichiliwiak kej estle,¹³ iwan sitlaltin de ilwikak owetzkej ixko yin tlaltikpak, ijkón ken nijuak in ejekatl kitepewa itlakilo in igos. ¹⁴ In ilwikak opoliwik kej yeskia se amatl omotejkuixke, iwan nochtin in tepemej iwan tlalmej katlej pankistojej itech atl omijkuanijkej de kan oyekaj. ¹⁵ Iwan in tlatlanawatijkej de ixko yin tlaltikpak, in tlayekankej, in rikojtin, in kapitanmej de soldadojtin, in tlakaj katlej chijchikawakej, in tlakaj katlej tekipanoaj kej tlanamaktin, iwan katlej inselti monawatiaj, oyajkej omotlatitoj ijtk kuyoktin iwan ijtk tepejximej. ¹⁶ Iwan okinmilwiayaj in tepemej iwan tepejximej:

—Topan xiwetzikij, iwan xitechtlaatikan para amo ma techita nekáj katlej ewatok ipan isiya, iwan para amo ma techajsi in temawtij kualanilistle de yen Ichkatzin.

¹⁷ Porke yoajsiko in weyi tonale de ikualanilis, iwan mach akaj welis kixikos.

7

Okinseyarojkej 144, 000 judiojtin

¹ Satepan de yin, onikinmitak nawi angelestин moketokej itech nawi eskinajtin de yen tlaltikpak, katlej okintzakuilij-tokaj in nawi ejekamej para amo ma ejeka ixko yin tlaltikpak, nion ixko atl, iwan nion itech kuanmej. ² Noijki onikitak oksé ángel katlej otlekoya ik ikisan tonale, katlej okipiaya iseyo in Dios katlej nochipa yolitok. Yon ángel okintzajtzilij chikawak in nawi angelestин katlej okinmakakej poder para tlajitlakoskej ipan tlaltikpak iwan itech atl, okijtoj:

³ —Ayamo xikijtlakokan in tlaltikpak, nion ayamo xikijtlakokan in atl, iwan nion ayamo xikinmjtlakokan in kuanmej, achtoj moneki tixinseyaroskej itekipanojkawan in toTa-jtzin Dios ika se seyo itech inmixkuak.

⁴ Iwan onikakke okintenejkej se siento iwan omenpoale iwan nawi mil tlakaj katlej okinseyarojkej itech inmixkuak de nochtin in majtlaktin iwan ome familias de Israel.

⁵ De familia de Judá oyekaj majtlakte iwan ome mil katlej okinseyarojkej.

De familia de Rubén okinseyarojkej majtlakte iwan ome mil, de familia de Gad okinseyarojkej majtlakte iwan ome mil,

⁶ de familia de Aser okinseyarojkej majtlakte iwan ome mil,

de familia de Neftalí okinseyarojkej majtlakte iwan ome mil,
de familia de Manasés okinseyarojkej majtlakte iwan ome
mil,

⁷ de familia de Simeón okinseyarojkej majtlakte iwan ome
mil,

de familia de Leví okinseyarojkej majtlakte iwan ome mil,

de familia de Isacar okinseyarojkej majtlakte iwan ome mil,

⁸ de familia de Zabulón okinseyarojkej majtlakte iwan ome
mil,

de familia de José okinseyarojkej majtlakte iwan ome mil,

iwan de familia de Benjamín okinseyarojkej majtlakte iwan

ome mil.

Miekej tlakaj otlakentitokaj de istak

⁹ Satepan de yin, onitlachixke iwan onikinmitak sa tekitl miekej tlakaj asta mach akaj welis kinpoas. Ovalajkej de nochtin paismej, de nochti tlatlamantin tlakajtin, de nochtin pueblobjtin, iwan de nochtin katlej tlapoaj tlatlamantle tlajtote. Omoketokaj iyakapan siya iwan iyakapan in Ichkatzin. Okipiayaj intlaken istak iwan okikitzkijtokaj sekin soyatl itech inma. ¹⁰ Iwan chikawak otzajtziaj, okijoayaj:

Totemakixtilis witz de toTajtzin Dios,

katlej ewatok ipan isiya,

iwan noijski witz de yen Ichkatzin.

¹¹ Iwan nochtin in angelestin omoketokaj okiyawalojtokaj in siya iwan okinyawalojtokaj in tetajtzitzintin, iwan noijski okinyawalojtokaj in nawin katlej yolitokej. Iwan omotlankuaketzkej iyakapan siya asta okitennamikej in tlale iwan okiweyikixtijkej in toTajtzin Dios. ¹² Okijtojkej:

¡Ijkón ma yeto! Dios ma yeto iaxka axan iwan iktlanke (ik tlami) in yektenewalistle,

weyikixtilistle, ixtlamachilistle, tlasojkamachilistle,

tetlakitalistle, poder iwan chikawalistle. Ijkón ma yeto.

¹³ Ijkuakón se de yen tetajtzitzintin onechtlajtlanij:

—¿Akinmej yinmej katlej tlakentitokej ika intlaken istak, iwan de kan ovalajkej?

¹⁴ Iwan nej onikilwij:

—Señor, mach nikmati. Tejwatzin tikmati akinmej iwan de kan ovalajkej.

Iwan Yej onechhilwij:

—Yinmej yejwan katlej opanokej in temawtij tlajyowilistle. Iwan axan yokiskej iwan yokipakej intlaken ika ieso in Ichkatzin iwan yoistayakej. ¹⁵ Por yonik katej iyakapan isiya in Dios, iwan kitekipanoaj itech itiopan yuale tonale. Iwan katlej ewatok ipan isiya kinpaleewis porke inwan yetos. ¹⁶ Mach ok tiojsiwskej iwan mach ok amikiskej, mach ok

tonaltlatlaskej iwan nion mach ok tonalmikiskej. ¹⁷ Porke in Ichkatzin katlej kajki tlatlajko de yen siya, kinmonekuitlawis kej ichkamej iwan kinwicas itech ameyaltin katlej kitemakaj nemilistle. Iwan toTajtzin Dios kinwajwachilis inmixayo.

8

Okitzayankej in chikome seyo

¹ Nijuak in Ichkatzin okitzayanke ipan chikome seyo de yen libro, mach ok itlaj omokakke ompa ilwikak kej tlajko ora. ² Satepan onikinmitak chikome angelestин katlej omoketokaj iyakapan Dios, iwan kada se okimakakej se tlapitzale. ³ Satepan ovalaj oksé ángel iwan omoketzke iyakapan artal, iwan okipiaya se popochtepalkatl de oro. Iwan okimakakej miek kopale para ma kichichino iyakapan Dios iwan ma tlejko ipokyo san sekan iwan intiotzajtzilis de nochtin in tokniwan yolchipawakej. Iwan yon ángel okitlalij in kopale ipan artal de oro katlej oyeka iyakapan siya. ⁴ Ipokyo in kopale okiske de itech in popochtepalkatl katlej okipixtoka in ángel itech ima, otlejkok in poktle iwan intiotzajtzilis in tokniwan yolchipawakej iwan oajsito asta inawak Dios. ⁵ Ijkuakón in ángel okitzkij in popochtepalkatl, okitemitij ika tlixochtle de yen tlilt katlej oyeka ipan artal, iwan okitlamotlak ipan tlaltikpak. Opéj tlatiytikuini, tlakukuyoka, tlaejpetlani iwan tlalolini.

Otlapitzkej in angelestín

⁶ Satepan in chikome angelestín katlej okipiayaj in chikome tlapitzáljin omoyektlalijkej para tlapitzaskej.

⁷ Se ángel achtoj otlapitzke, iwan ijkuakón otesiwik ixko yin tlaltikpak iwan owetzke tlilt nelitok iwan estle. Iwan otlatlak se tercera parte de yen tlaltikpak, otlatlak nochi in kuawyoj iwan nochi in xiwyoj.

⁸ In ya ipan ome ángel otlapitzke, iwan ijkuakón owetzke ijtik atl kej se tepetl xotlatok. Iwan se tercera parte de yen atl omokuepke estle. ⁹ Se tercera parte de nochtin in yolkamej katlej oyekaj ijtik atl omikkej, iwan se tercera parte de nochtin in barkojtin oxakualikej.

¹⁰ In ya ipan eyi ángel otlapitzke, iwan ijkuakón se weyi sitlale owetzke de ilwikak katlej oxotlatiwalaya kej okotl. Owetziko ipan se tercera parte de nochtin in weyamej iwan ameyaltin katlej katej ixko yin tlaltikpak. ¹¹ In sitlale oyeka itoka Chichik. Iwan se tercera parte de nochi in atl de ixko yin tlaltikpak ochichiyyak, iwan miekej tlaltikpaktlakaj omikkej por okonikej in yon atl.

¹² In ya ipan nawi ángel otlapitzke, iwan ijkuakón se tercera parte de yen tonale, in metztle, iwan sitlaltin osewkej.

In tonale iwan metztle mach ok otlawijkej chikawak porke osewekej se tercera parte.

¹³ Satepan onikitak se ángel patlantinemi tlatlajko ilwikak, iwan onikakke okijtoj chikawak:

—¡Ay, ay! ¡Pobrestin katlej chantij ixko yin tlaltikpak nijuak tlapitzaskej in oksekimej eyin angelestин katlej ok poliwij!

9

¹ In ya ipan makuile ángel otlapitzke, iwan onikitak se sitlale katlej owetziko de ilwikak asta ipan tlaltikpak. Yon sitlale okimakakej in yabe para kitlapos in kuyoktle katlej mach kipia kan tlantok. ² Okitlapoj in yon kuyoktle, iwan okiske miek poktle kej yeskia ipokyo se orno. Yon poktle okitlatleyualtij in tonale iwan ejekatl. ³ De ijtil yon poktle okiskej miekej chapulimej katlej opatlaniaj ixko yin tlaltikpak. Iwan yonmej chapulimej okinmakakej poder para tetzopitiskej kej yeskia kolomej. ⁴ Okinnawatijkej amo ma kijtlakokan in xiwitl, nion itlaj katlej xoxowik, iwan nion se kuawitl, sino san yen tlaltikpaktlakaj katlej mach kipiaj iseyo in Dios itech immixkuak. ⁵ Pero mach okinkawilijkej ma kinmiktikan in tlaltikpaktlakaj, sino san ma kinkojkokokan makuile metztle. Oyeka sa tekitl tekokoj ken nijuak akaj kitzopitia se kolotl. ⁶ Itech yonmej tonaltin in tlaltikpaktlakaj kinekiskej ma mikikan pero mach welis. Iwan maski kinekiskej mikiskej, in mikilistle kincholilis.

⁷ In chapulimej (xolinmej) oyekaj kej kabayojtin katlej moesojkej para yaskej itech guerra. Itech intzontekon okipiayaj kej se korona de oro, iwan inmixko oyeka kej ixko se tlakatl. ⁸ Okipiayaj intzonkal kej itzonkal se siwatl, iwan intlanwan oyeka kej itlanwan se lión. ⁹ Itech intlalnakayo okipiayaj kej intlaken de tepestle katlej ika omotzakuili-ayaj. Iwan inmajaswan okukuyokayaj chikawak ken nijuak in kabayojtin kintlatlalochtiaj in karretajtin itech guerra. ¹⁰ Okipiayaj inkuitlapil kej ikuitlapil se kolotl iwan okipiayaj inmin (inmimij). Iwan okipiayaj poder itech inkuitlapil para kinkojkokoskej in tlaltikpaktlakaj makuile metztle. ¹¹ In chapulimej (xolinmej) okipiayaj se intlanawatij, yen ángel de yen kuyoktle katlej mach kipia kan tlantok. Yon ángel ika tlajtole hebreo itoka Abadón, iwan ika tlajtole griego itoka Apolión, kijtosneki teijtlakoj.

¹² Opanok in yakinika tekokojkayotl, pero ok opoliwia ok ome tekokojkayotl para panos.

¹³ In ya ipan chikuasen ángel otlapitzke, iwan onikakke se tlajtole katlej omokakke tlatlajko de yen nawi kuakuawmej katlej oyekaj itech artal de oro katlej oyekaj iyakapan Dios.

¹⁴ Yon tlajtole okilwij in ya ipan chikuasen ángel katlej okipix-toka itlapitzal:

—Xikinkajkawa in nawi angelestин katlej ilpitokej inakast-lan weyatл katlej itoka Eufrates.

¹⁵ In yonmej nawi angelestин yokinyektlalijkaj para kichi-waskej intekiw itech yon ora, itech yon tonale, itech yon metztle iwan itech yon xiwitl, iwan ikuakón okinkajkajkej para ma kinmiktikan se tercera parte de noctin in tlaltikpak-tlakaj. ¹⁶ Iwan nej onikakke okintenejkej ome siento miyones de soldadojtin katlej kipiaj inkabayojwan.

¹⁷ Ijkón onikinmitak in kabayojtin iwan katlej inpan oyeti-ayaj, onikinmitak kej yeskia oniteemiktoka. Iwan katlej inpan oyetiayaj okipiayaj inmelpantlaken de tepostle. Yon tepostle okipiaya eyi kolor. Oyeka chichiltik kej tlitl, asultik kej ilwikak, iwan kostik kej azufre. In kabayojtin okipiayaj intzontekon kej itzontekon se lión, iwan de ijtk inten okisaya tlitl, okisaya poktle, iwan okisaya azufre. ¹⁸ Ika yin eyi kokolistle, omikkej se tercera parte de noctin in tlaltikpak-tlakaj. Omikkej ika tlitl, ika poktle, iwan ika azufre katlej okisaya de ijtk inten in kabayojtin. ¹⁹ Porke in poder de yonmej kabayojtin okipixtokaj itech inten iwan itech inkuit-lapil. Porke inkuitlapil oyekaj kej koamej katlej okipiayaj intzontekon iwan otetzopitiayaj.

²⁰ Pero in oksekimej tlaltikpaktlakaj, katlej mach omikkej ika yonmej kokolistin, mach okikajkej de tlajtlakolchiwaskej. Sino okiseguirojkej okinweyikixtiayaj in mach kualtin ejekamej iwan santojtin de oro, de plata, de bronce, de tetl, iwan de kuawitl, katlej mach tlachiaj, nion mach tlakakij, iwan nion mach nejnemij. ²¹ Iwan nion mach okikajkej de temiktiskej, de texoxaskej (tebrujojwiskej), de momekatiskej, iwan de tlachtekiskej.

10

In ángel katlej okipiaya se librojtzin

¹ Satepan onikitak oksé ángel chikawak katlej owaltemoaya de ilwikak, kikentiwitz mixtle iwan ikpak okualkuia se akosamalotl. Ixko opetlania ken tonale, iwan ikxiwan omotayaj kej pilartin tlikuitokej. ² Okipixtoka itech ima se librojtzin tlapotok, iwan okitlalij iyekikxi ipan atl iwan iopochikxi okitlalij ipan tlaltikpak. ³ Iwan otzajtzik chikawak ken ikuak tzajtzi se lión. Iwan nikuak otzajtzik, omokakke chikome tlatikuinalistin okinankilijkej. ⁴ Iwan nikuak in yonmej chikome tlatikuinalistin owatlajtojkej, nej ya nikikuiloani, pero ikuakón onikakke se tlajtole de ilwikak onechilwij:

—Amo xikijkuilo tlan okijtojkej in chikome tlatikuinalistin, sino san tej xikmato tlan okijtojkej.

⁵ Satepan in ángel katlej onikitak moketok ipan atl iwan ipan tlaltikpak, okiketzke iyekma ik ilwikak ⁶ iwan okijto se tlajtole, asta okijto Dios tlachixtok katlej yolitok nochipa, katlej okichij in ilwikak, in tlaltikpak, in atl, iwan nochi tlan onkaj intech. Okijtoj:

—Ya ajsis ora, mach ok wejkawas. ⁷ Porke nijuak ajsis tonale nijuak in ya ipan chikome ángel tlapitzas, ikuakón panos nochi tlan ayamo okimatiaj in tlaltikpaktlakaj, tlan Dios ya wejkawitl okinmilwíj itekipanojkawan profetajtin de tlan tlapanos.

⁸ In tlajtole katlej onikakke katlej omokakke de ilwikak, oksemi onechilwíj:

—Xiwia, iwan xikitzki in librojtzin katlej tlapotok itech ima in ángel katlej moketok ipan atl iwan ipan tlaltikpak.

⁹ Oniaj kiné kan oyeka in ángel iwan onikilwíj ma nechmaka in librojtzin, iwan yej onechilwíj:

—Xikitzki iwan xikua. Ijtik moten tikmachilis tzopelik kej nektle, pero ik moiptyk tikmachilis chichik.

¹⁰ Ikuakón onikitzkij in librojtzin de itech ima in ángel iwan onikuaj. Iwan ijtik noten onikmachilij tzopelik, pero nijuak oniktoloj, ik noijtyk onikmachilij chichik. ¹¹ Satepan in ángel onechilwíj:

—Moneki oksemi tixinmatiltis in tlaltikpaktlakaj tlan Dios kijta. Xixinmatilti tlan panoskej katlej katej itech nochtin pueblojtin iwan paismej, katlej tlapoaj ika oksekin tlatlamante tlajtole iwan noijki katlej tlatlanawatijkej.

11

Omen testigojtin

¹ Satepan onechmakakej se kuawitl kej metro, iwan onechilwíjkej:

—Ximoketza iwan xiktamachiwa itiopian Dios iwan artal. Iwan xikinpoa keskimej katlej ompa kiweyikixtiaj in Dios.

² Pero amo xiktamachiwa in patio katlej kajki kalan de yen tiopian, porke yon patio yokinmactilijkej in tlakaj katlej mach judiojtin. Yejwan ipan tlajtlaksaskej iweyikan Dios omenpoale iwan ome metztle. ³ Iwan nej nikintitlanis ome notes-tigojwan profetajtin para ma kitematiltikan tlan tlapanos de tlan nej nikinmilwis. Yejwan kitematiltiskej notlajtol se mil iwan ome siento iwan eyinpoale tonaltin, iwan motzot-zoltiskej ika intzotzol tetzoztzipotij katlej konakiaj in tlakaj nikuak mikkayoaj.

⁴ Yonmej omen notestigojwan profetajtin kijtosneki yejwan ome olivoskuanmej iwan ome kandelerojtin, katlej katej iyakapan Dios katlej tlanawatia ixko yin tlaltikpak. ⁵ Iwan tla akaj kinekis itlaj kintoktis in yonmej omen, yejwan kixtiskej tlilt de ijtit inten iwan kinchichinoskej inkontraswan. Ijkón kiné, akin kinekis itlaj kintoktis, ijkón nik mikis. ⁶ Yonmej ome testigojtin profetajtin kipiaj poder para kitzakuaskej in ilwikak, para amo ma kiawi nijuak kitematiltiskej tlan tlapanos de tlan Dios kinmilwisi. Noijki yejwan kipiaj poder para kikuepaskej estle in atl, iwan noijki para kitlajyowiltiskej in tlaltikpak ika nochitlamantle kokolistle, san kech yejwan kinekiskej. ⁷ Iwan nijuak tlamiskej de kitematiltiskej tlan Dios okinmilwij, in amo kuale yolkatl katlej kisas de ijtit in kuyoktle katlej mach kipia kan tlantok, yas en kontra de yejwan, iwan kintlanis, iwan kinmiktis. ⁸ Intlalnakayo melatoskej ipan ojmej de yen weyikan de Jerusalén kan toSeñor Jesucristo okimajmasoltijkej itech krus. Yon weyikan kitokayoawiltiaj noijki Sodoma o noso Egipto. Porke in tlakaj de yon weyikan kipiaj inyolo mach kuale noijki ken tlakaj de weyikan de Sodoma iwan de país de Egipto. ⁹ In tlakaj de nochtin pueblojtin, de nochit tlatlamantin tlakajtin, de nochtin katlej tlapoaj tlatlamantle tlajtole, iwan de nochtin paísmej, kitaskej intlalnakayo de yonmej omen mikkamej melatoskej eyi tonale iwan tlajko, iwan mach kitekawiliskej ma kintookakan. ¹⁰ In tlaltikpaktlakaj pakiskej porke yomikkej in yonmej omen, sa tekitl kiwelitaskej iwan asta kimomamakaskej tlatliokoliltin se iwan oksé, porke in yonmej omen profetajtin mach ok tlakuejsoskej. ¹¹ Pero satepan de eyi tonale iwan tlajko, se espíritu katlej kitemaka nemilistle katlej Dios kititlanis, kalakis intech in yonmej omen profetajtin iwan mewaskej. Iwan nochtin akinmej kinmitaskej sa tekitl momawtiskej. ¹² Satepan yonmej omen testigojtin profetajtin kikakiskej se tlajtole chikawak, kinmilwisi:

—Xitlejkokan nian tlakpak.

Yejwan tlejkoskej ilwikak ijtit se mixtle iwan inkontraswan kinmitaskej. ¹³ San niman ikuakón chikawak tlalolilnis iwan se majtlakte parte de nochit in weyikan xitinis, iwan mikiskej chikome mil tlakaj ika yon tlalolinalistle. Oksekimej katlej mach mikiskej, sa tekitl momawtiskej, iwan kiweyikxitiskej in toTajtzin Dios katlej kajki ilwikak.

¹⁴ Ijkón nik opanok in ya ipan ome tekokojkayotl, pero ok opoliwia oksé tekokojkayotl katlej witz san niman para ajsis ya ipan eyi tekokojkayotl.

In chikome ángel otlapitzke

¹⁵ In ya ipan chikome ángel otlapitzke, iwan omokakej miekej tlajtoltin ompa ilwikak, okijtojkej chikawak:
Nochi in tlaltikpak kan tlanawatiaj in tlaltikpaktlakaj ya iaxka in toTajtzin Dios iwan de Jesucristo.

Iwan Yej tlanawatis iktlanke (ik tlami).

¹⁶ Ijkuakón in senpoale iwan nawi tetajtzitzintin katlej oewatokaj ipan insiya iyakapan toTajtzin Dios, omotlankuaketzkej asta okitennamikej in tlale iwan okiweyikixtijkej in toTajtzin Dios, ¹⁷ okijtojkej:

Timitztlasojkamachiliaj, Señor,
tejwatzin Dios katlej tikpia nochi poder,
tejwatzin katlej achtoj yotieka, katlej axan tikaj iwan katlej nochipa tietos,
timitztlasojkamachiliaj porke yotikonanke mopoder iwan yopéj titlanawatia.

¹⁸ In tlaltikpaktlakaj de nochtin paismej kualanij monawak, pero yoajsíko in tonale katlej ika mokualanalis tikintitlanis kan tlajyowiskej,
yoajsíko in tonale para tikinmixkomakas (tikintzonmanas) iwan tikintlaxtlawis in mikkamej.

Noijki yoajsíko in tonale para tikintlaxtlawis motekipanojkawan profetajtin,
iwan katlej otikinpejpenke ma yekan moaxkawan, iwan katlej mitztlakitaj,
wejweyin iwan tzitzikinmej.

Iwan noijki yoajsíko in tonale para tikinmixpolos katlej kixpoloaj in tlaltikpak.

¹⁹ Ijkuakón otlapowik itiopan Dios katlej kajki ilwikak, iwan ompa ijtitk tiopan omotaya in kaja kan oyeka in akuerdo katlej Dios okichij inwan itlaneltokakej. Chikawak otlapejpetlanke, otlakukuyokak, otlatijtikuinke, otlalolinke iwan chikawak otesiwik.

12

In siwatl iwan koatl

¹ Satepan omotak se weyi señal itech ilwikak. Omotak se siwatl petlantok ken tonale, iwan in metztle oyeka ikxitlan, iwan okikuaonakijtoka se korona de majtlakte iwan ome sitlaltin. ² Yon siwatl ootztitoka ika ikone, iwan otzajtzia chikawak porke ya tlakatis ikone. ³ Satepan omotak oksé señal itech ilwikak. Omotak se weyi koatl chichiltik, okinpiaya chikome itzontekonwan, majtlakte ikuakuawan, iwan se korona itech kada se itzontekon. ⁴ Ika ikuitlapil okintepej se tercera parte de nochtin in sitlaltin de ilwikak iwan okintlamotlak ixko yin tlaltikpak. Yon koatl omoketzke iyakapan

siwatl katlej ya kitlakatilis ikone, para kikualis san niman nikuak tlakatis.⁵ In siwatl okitlakatilij se chokotzin, katlej kinnawatis ika ivara de tepostle nochtin in tlaltikpaktlakaj de nochtin paismej. Ijkuakón ikone okikixtilijkej iwan okiwilkilijkej inawak Dios kan ewatok itech isiya para ompa Iwan yetos.⁶ In siwatl ocholoj iwan oyáj kan tlawaki, kan Dios yokiyektlalilijk se lugar para ompa ma kitlamakakan se mil iwan ome siento iwan eyinpoale tonaltin.

⁷ Satepan omochij se guerra itech ilwikak. In arcángel Miguel iwan oksekimej angelestin katlej yej kinyekana okichijkej guerra iwan yon koatl. In koatl iwan iangelwan noijki inwan okimomagakej (omomakakej),⁸ pero mach owe-likej otlatlankej, iwan mach ok oyeka lugar para yejwan itech ilwikak.⁹ Ijkuakón in koatl iwan iangelwan okinkixtijkej de ilwikak iwan okintlamotlakej asta ipan tlaltikpak. Yon koatl yen katlej yoyeka desde ya wejkawitl, katlej yokinkajkayaj miekej tlaltikpaktlakaj, katlej noijki itoka diablo o noso Satanás.

¹⁰ Ijkuakón onikakke se tlajtole chikawak ompa ilwikak, okijtoj:

—Yoejkok in tonale nikuak nochtin katlej iaxkawan in Dios kinmakixtiskej, yoneske ipoder in toTajtzin Dios iwan yopéj tlanawatia. Iwan Cristo noijki yokiresibiroj tekiwajkayotl, porke yokiwaltlamotlakej de ilwikak in Amo Kuale Tlakatl katlej teistlakawij de yen tokniwan, katlej okinmistlakawayaya yuale tonale iyakapan Dios.¹¹ In tokniwan okitlankej in Amo Kuale Tlakatl ika ieso in Ichkatzin iwan ika itlajtol Cristo katlej yejwan okitematiltijkej. Porke mach okimakaskej kipoloskej innemilis, sino omotemaktijkej (omotemaktilijkej) maski ma kinmiktikan.¹² Por yonik kiné, ma yeto pakilistle ompa ilwikak. Xipakikan namejwan katlej ankatej ilwikak. Pero, pobrestin katlej chantij ixko tlaltikpak iwan katlej katej ijistik atl. Porke in diablo yotemok kan amejwan ankatej, sa tekitl kualani, porke kimati nik sa keski tonale kipia para kichiwas tlan yej kineki.

¹³ Nikuak in koatl okimomakak kuenta nik yokiwaltlamotlakej ipan tlaltikpak, opéj kitemojtinemi in siwatl katlej okitlakatilij ikone.¹⁴ Pero in siwatl okimakakej ome iajaswan wejweyin de se weyi kuixin (águila), para ma patlani wejka de kan kajki in yon koatl iwan ma wia asta kan tlawaki, kan kitlamakaskej eyi xiwitl iwan tlajko.¹⁵ In koatl okikixtij miek atl de ijistik iten kej se weyatl para ma kiwika in siwatl.¹⁶ Pero in tlaltikpak okipalewij in siwatl. In tlaltikpak otlapowik iwan okitoloj in weyatl katlej in koatl okikixtij de ijistik iten.¹⁷ In koatl sa tekitl okualanke inawak in yon siwatl, iwan oyáj

inwan okimomagato (okinmomakato) oksekimej ipilwan in yon siwatl, katlej kichiwaj tlan Dios kijta iwan tetlapowiaj de Jesucristo. Iwan yon koatl omoketzato itempan atl ijtk xale.

13

Omen yolkamej amo kualtin

¹ Iwan onikitak okiske de ijtk atl se amo kuale yolkatl katlej okinpiaya chikome itzontekonwan iwan majtlakte ikuakuawan. Itech kada se ikuakuaw okipiaya se korona, iwan itech kada se itzontekon oijkeitlakaj se tokayotl bierotik katlej okiwikaltiaya in toTajtzin Dios. ² Yon amo kuale yolkatl omotaya kej se tigre, iwan okinpiaya ikxiwan kej ikxiwan se oso, iwan okipiaya iten kej iten se lión. In koatl okimakak ipoder in amo kuale yolkatl iwan okitlalij ipan isiya, iwan noijki okimakak weyi tekiwajkayotl. ³ Se de yen itzontekon in amo kuale yolkatl omotaya kej yeskia okikuatzontekej iwan omotaya kej ya mikkat. Pero yon kan okikuatzontekej opajtik, iwan nochtin in tlaltikpaktlakaj sa omotlajtlachialtijkej (omomajmawtijkej) iwan nochtin pewa yawij inawak in amo kuale yolkatl. ⁴ Okiweyikixtijkej in koatl porke okimakak tekiwajkayotl in amo kuale yolkatl, iwan noijki okiweyikixtijkej in amo kuale yolkatl. Okijtokej:

—Mach akaj oksé kipia poder ken yin amo kuale yolkatl.
¿Akin welis mokitzkis iwan yej?

⁵ Noijki okikawilijkej in amo kuale yolkatl ma moweyineki ika iten iwan ma kiwikalti in Dios. Iwan noijki okikawilijkej ma tlanawati omenpoale iwan ome metztle. ⁶ Iwan ijkón okichij. Otlawikaltij inawak Dios, okiwikaltij itoka iwan kan chant, iwan noijki okinwikaltij katlej chantij il-wikak. ⁷ Noijki okikawilijkej ma inwan kimomaga in tokniwan yolchipawakej asta ma kintlani. Iwan okimakakej poder para kinnawatis nochtin in tlaltikpaktlakaj, de nochtin pueblojin, de nochtin katlej tlapoaj tlatlamantle tlajtote, iwan de nochtin paismej. ⁸ Iwan nochtin in tlaltikpaktlakaj katlej mach kipiaj intoka ijkuitlakaj itech libro, kan nestok intoka de nochtin katlej kipiaj yankuik nemilistle, okiweyikixtijkej in amo kuale yolkatl. Yon libro omochij desde antes de kichiwani in Dios in tlaltikpak. In Ichkatzin katlej okimikijkej, yen kipia in yon libro.

⁹ Akin kineki kimomakas kuenta, ma kikaki. ¹⁰ Akin tetza-kuas, noijki kitzakuaskej. Akin temiktis, noijki kimiktiskej. Por yonik, in tokniwan yolchipawakej moneki kixikoskej tlan panoskej, iwan moneki kitlaliskej intlaneltokalis inawak Dios.

¹¹ Satepan onikitak oksé amo kuale yolkatl, pankistiwit de ipan tlaltikpak. Okinpiaya ome ikuakuawan kej ikuakuawan se ichkatzin, pero otlajtoaya kej se koatl. ¹² Iwan noijki okipiaya poder no ken oksé amo kuale yolkatl katlej achtoj omonextij iwan katlej ompa iwan okatka. Yin ya ipan ome amo kuale yolkatl okintoktij nochtin in tlaltikpaktlakaj ma kiweyikixtikan in achtoj amo kuale yolkatl, katlej oyeka kuatlatzontektle iwan opajtik. ¹³ Noijki okinchiwaya wejweyin señalestín, iwan asta okichiwaya ma wetzi tlilt de ilwikak asta ipan tlaltikpak inmixpan tlakaj. ¹⁴ Yon amo kuale yolkatl okinkajkayaj in tlaltikpaktlakaj ika yonmej señalestín katlej okikawilijkej ma kinchiwa ixpan oksé amo kuale yolkatl. Iwan okinnawatij ma kichiwakan se iretrato de yen achtoj amo kuale yolkatl, katlej oyeka kuatlatzontektle iwan opajtik. ¹⁵ In ya ipan ome amo kuale yolkatl noijki okimakakej poder para ma kijpitzá iretrato in achtoj amo kuale yolkatl, para ma weli ma tlajto yon retrato iwan ma kinmiki nochtin katlej mach kinekjí kiweyikixtiskej. ¹⁶ Noijki in ya ipan ome amo kuale yolkatl okintoktij nochtin in tlakaj, katlej wejweyin iwan katlej tzitzikinmej, katlej kimopialiaj iwan katlej mach kimopialiaj, katlej tlanamaktin iwan katlej mach tlanamaktin, ma kintlalilikan se marka itech inyekma o noso itech inmixkuak. ¹⁷ Iwan mach akaj owelia otlakowaya nimpor tlanamakaya tla amo okipiaya yon marka. Yon marka yen itoka in amo kuale yolkatl o noso inúmero yon yolkatl. ¹⁸ Moneki miek ixtlamachilistle itech yin tlamantle. Akin kimomaka kuenta ma kixyejyeko inúmero in amo kuale yolkatl porke onkaj se número katlej kimatij in tlakaj. In número yen chikuasen siento iwan eyinpoale iwan chikuasen (666).

14

Intlakuikal de yen 144,000 tlakaj

¹ Satepan onikitak in Ichkatzin moketok ipan tepetl itoka Sión. Iwan ompa Iwan oyekaj se siento iwan omenpoale iwan nawi mil tlakaj, katlej okipiayaj ikuilitok itech inmixkuak itoka de yen Ichkatzin iwan itoka de yen iPapan. ² Satepan onikakke ik ilwikak kej itlaj chikawak ken nikuak kukuyokaj miekej weyamej o noso ken nikuak chikawak tlatikuini. Onikakke kej otlatzotzonayaj miekej ika arpa. ³ Iwan okitlakuikayaj se yankuik tlakuikale, iyakapan siya iwan inyakapan nawin katlej yolitokej iwan inyakapan in tetajtzitzintin. Mach akaj owelia okitlakuikaya in tlakuikale, sino san yejwan in se siento iwan omenpoale iwan nawi mil tlakaj, katlej Cristo okinkoj ika ieso de intzalko nochtin in

tlaltikpaktlakaj.⁴ Yejwan mach otlajtlakojej inwan siwamej, sino omomalwijkej. Iwan san kan yawi in Ichkatzin yejwan noijki ompa yawij. Yejwan okinkojkej de intzalko nochtin in tlaltikpaktlakaj, para yejwan yeskej in yakinika iaxkawan Dios iwan Ichkatzin.⁵ Mach keman okijtojkej itlaj tlan amo melawak. Mach itlaj tlajtlakole kipiaj.

Eyin angelestin tlapoaj

⁶ Satepan onikitak oksé ángel opatlania tlatlajko ilwikak katlej okipiaya in yankuik tlajtote katlej temakixtia katlej mach keman tlamis, para kintlapowis in tlaltikpaktlakaj, de nochtin paismej, de nochti tlatlamantin tlakajtin, de nochtin katlej tlapoaj tlatlamantle tlajtote, iwan de nochtin pueblotjin.⁷ Iwan okijtoaya chikawak:

—Xikimakasikan toTajtzin Dios iwan xikweyikixtikan, porke yoajsik ora para tlaixkomakas (tlatzonmanas). Xikweyikixtikan katlej okichij in ilwikak iwan tlaltikpak, in mar iwan ameyaltin.

⁸ Oksé ángel oyáj ikuítłapan katlej achtoj ángel iwan okijtoj:

—Yowetzke, yowetzke in weyikan de Babilonia, katlej oyeka kej se siwatl mach kuale katlej kintlatlapololtia in tlakaj iwan kintoktia ma tlajtlakokan ken yej, iwan kintlawantia ika tlajtlakole. Yon weyikan de Babilonia ijkón okintoktiaya in tlakaj de nochti in tlaltikpak.

⁹ Satepan in ya ipan eyi ángel oyáj ikuítłapan nekatej ome angelestin iwan okijtoj ika chikawak tlajtote:

—Tla akaj kiweyikixtia in amo kuale yolkatl iwan iretrato, iwan motekawilia ma kitlalilikan imarka itech ixkuak o noso itech ima,¹⁰ Dios kitlajyowiltis ika nochti ichikawalis iwan ika nochti ikualanilis. Iwan kitlajyowiltiskej ika titl iwan ika azufre inmixpan iangelwan in Dios iwan ixpan Ichkatzin.¹¹ Iwan nochipa tlejkotos in poktle de yen titl katlej kitlajyowitztos nochipa iwan mach keman sewis. Iwan mach keman kipiaskej nesewile nion tonayan nion yuak nochtin katlej kiweyikixtiskej in amo kuale yolkatl iwan iretrato, iwan nochtin katlej motekawiliskej ma kintlalilikan imarka de yen itoka in amo kuale yolkatl.¹² Por yonik moneki amo ma mosotlawakan iwan ma kixikokan in tlajyowilistle nochtin in tokniwan yolchipawakej, katlej kitlakitaj itlanawatil iwan kitlaliaj intlaneltokalis inawak Jesús.

¹³ Ijkuakón onikakke se tlajtote de ilwikak. Onechilwij:

—Xikikuilo tlan nimitzilwis: “Ma pakikan katlej mikiskej de nian para tlayakapan nochtin katlej kineltokaj in toSeñor.” In Espíritu Santo noijki kitja: “Melawak, sa tekitl ma pakikan, porke yejwan mosewiskej de intekiw, iwan Dios kintlaxtlawis ompa ilwikak por tlan okichijkej.”

Pixkalistle ixko tlaltikpak

¹⁴ Ijkuakón onikitak se mixtle istak. Iwan ipan mixtle oewatoka yen katlej omochij tlakatl. Okipiaya se korona de oro ipan itzontekon iwan okitzkijtoca se oso (ojoso) sa tekitl tlateki. ¹⁵ Iwan oksé ángel okiske de ijtk itiopan Dios iwan okitzajtzili chikawak katlej ewatok ipan mixtle:

—Xikteki ika mooso in tlakilotl. Porke yochikawak iwan yoajsik in tonale para se kololos.

¹⁶ Ijkuakón katlej ewatok ipan mixtle okitemowij ioso ipan tlaltikpak iwan okitekke in tlakilotl.

¹⁷ Satepan oksé ángel okiske de ijtk itiopan Dios katlej kajki ilwikak, iwan noijki okiplaya se oso sa tekitl tlateki. ¹⁸ Iwan noijki okiske oksé ángel de itech artal katlej okiplaya poder ika tlitl. Iwan okinotzke ika chikawak tlajtole in ángel katlej kipia ioso tlateki. Okilwij:

—Xiktemowi mooso tlateki, iwan xikololo itlakilo in uvas katlej onkaj ixko tlaltikpak porke yochikawak.

¹⁹ In ángel okitemowij ioso iwan okololoj in uvas de ixko tlaltikpak. In uvas okitenke ijtk se tanke para ompa mopatzkas. Iayo yon uvas kijtosneki yen inmeso de yejwan katlej kichiwaj tlan amo kuale, katlej Dios sa tekitl kintlajy-owiltis porke sa tekitl kikualaniaj. ²⁰ Yon uvas okipatzkakej kalan de yen weyikan de Jerusalén. Iwan kan oyeka in tanke kan okipatzkakej in uvas okiske estle. Oyeka sa tekitl miek estle iwan otlejkok asta itech infreno in kabayojtin, iwan omotlaloj in estle kanaj eyi siento kilómetro de wejka.

15

Chikome angelestín katlej okinpiayaj in salúltimo chikome kokolistin

¹ Onikitak itech ilwikak oksé señal sa tekitl weyi iwan sa onechtlajtlachialtij (onechmajmawtij). Onikinmitak chikome angelestín katlej okipixtokaj in salúltimo chikome kokolistin. Nijuak tlamiskej in yonmej chikome kokolistin, noijki tlamis ikualanilis in Dios de inwan tlaltikpaktlakaj.

² Noijki onikitak kej se mar de teskatl nelitok iwan tlitl. Iwan ompa omoketokaj ipan yon mar de teskatl katlej okitlankej in amo kuale yolkatl, katlej amo omotlankuaketzkej iyakapan iretrato, iwan nion amo omotekawilijkej ma kintlalilikán inúmero de itoka. Okinpixtokaj inmarpajwan katlej Dios okinmakak. ³ Iwan okitlakuikayaj (okuikayaj) se tlakuikale katlej Moisés okijkuijloj katlej okitekipanoaya in toTajtzin Dios, iwan noijki otlakuikayaj para yen Ichkatzin. Ijkín nik otlakuikayaj:

Weyi iwan tetlajtlachialtij (temajmawtij) nochि tlan tejwatzin otikchij,

Señor, tejwatzin Dios katlej tikpia nochि poder.

Tikchiwa tlan kuale iwan tlan melawak,
tejwatzin tiRey de nochtin paismej.

⁴ ¿Akin amo mitzimakasis, Señor?

¿Akin amo mitzweyikixtis?

San yen tejwatzin tiyolchipawak,

iwan nochtin tlaltikpaktlakaj de nochtin paismej witzej iwan mitzweyikixtiskej,

porke in tlaltikpaktlakaj kitaj nik tikchiwa nochि tlan kuale.

⁵ Satepan onikitak itech ilwikak in weyi tiopan iwan otlatlapowik Kan Tlixpantzin, kan kajki in akuerdo katlej Dios okichij inwan itlaneltokakej. ⁶ Ijtik in weyi tiopan okiskej in chikome angelestин katlej okinpixtokaj in chikome kokolistin. Otlakentitokaj ika tzotzole katlej kuale itoka lino, chipawak iwan opetlania. Noijki okipiayaj intlajkoilpika de oro asta inmelpa. ⁷ Satepan se de yen nawi katlej yolitokej, okinmakak kada se de yen chikome angelestин se kopa de oro tentok de ikualanilis in Dios katlej nochipa yolitok. ⁸ In weyi tiopan otenke de poktle katlej ovalaj de imawisotlanex iwan de ipoder in Dios. Iwan mach akaj owelia okalakia ijtik in weyi tiopan mientras in chikome angelestин ayamo otlamiaj okinnokiayaj in chikome kokolistin.

16

Chikome kopajtin de ikualanilis Dios

¹ Satepan onikakke se chikawak tlajtole katlej okiske de ijtik in weyi tiopan, iwan okinmilwij in chikome angelestин:

—Xiwian xikinnokitij ipan tlaltikpak in chikome kopajtin katlej tentokej de ikualanilis in Dios, para kintlajyowiltis in tlaltikpaktlakaj.

² Achtoj se ángel oyáj iwan okinokij ikopa ipan tlaltikpak, iwan nochtin in tlaltikpaktlakaj katlej okipiayaj imarka in amo kuale yolkatl iwan katlej okiweyikixtiayaj iretrato, intech okiskej tzotzomej sa tekitl bierotikej iwan sa tekitl tetonejkej.

³ In ya ipan ome ángel okinokij ikopa ijtik atl, iwan in atl omokuepke estle kej ieso se mikkatl, iwan nochtin in yolkamej katlej onemiaj ijtik atl omikkej.

⁴ In ya ipan eyi ángel okinokij ikopa ijtik weyamej iwan ijtik ameyaltin, iwan nochи in atl omokuepke estle. ⁵ Satepan onikakke in ángel katlej kinawatia in atl. Okijtoj:

—Tejwatzin otikchij ken moneki, Señor, tejwatzin tiyolchipawak, tejwatzin katlej axan tikaj iwan katlej achtoj

yotieka. ⁶ Porke yejwan okinmiktijkej katlej moaxkawan iwan moprofetajwan. Iwan axan tejwatzin tikinmaka ma konikan estle, para ma kitlaxtlawakan por tlan okichijkej.

⁷ Noijki onikakke se tlajtole katlej omokakke desde itech artal. Okijtoj:

—Melawak, Señor, tejwatzin toTajtzin Dios katlej tikpia nochí poder, yon tlan tejwatzin tikchiwa para tikintlajyowitzia in tlakaj, yon melawak iwan tikchiwa ijkón ken intech moneki.

⁸ In ya ipan nawi ángel okinokij ikopa ipan tonale, iwan tonale okimakakej poder para ma kinchichino in tlakaj ika itliyo. ⁹ Iwan tlaltikpaktlakaj sa tekitl otlatlakej ika itliyo in tonale, pero mach omoyolpejpenkej (omoyolkuepkej) iwan nion mach okiweyikixtijkej in toTajtzin Dios, katlej kipia poder itech in yonmej kokolistin katlej kintitlanilijtok, sino yej okiwikaltijkej in Dios.

¹⁰ In ya ipan makuile ángel okinokij ikopa ipan isiya in amo kuale yolkatl, iwan kan tlanawatia otlatleyuak chikawak. Iwan tlakaj asta omonenepiltetexoayaj porke sa tekitl otlajyowiayaj. ¹¹ Iwan okiwikaltiayaj in toTajtzin Dios katlej kajki ilwikak, porke otlajyowiayaj iwan porke otenkej de tzotzomej, pero maski ijkón, mach okikajkej tlan amo kuale.

¹² In ya ipan chikuasen ángel okinokij ikopa ijistik in weyatlı itoka Eufrates, iwan in atl owakke, para ijkón otlapowik se ojtle kan panoskej in reytin katlej witzej ik ikisayan tonale.

¹³ Satepan onikitak de ijistik iten in koatl, iwan de ijistik iten in amo kuale yolkatl, iwan noijki de ijistik iten in profeta tekajkayaj, okiskej eyin ejekamej mach kualtin katlej omotayaj kej kalamej (ranas). ¹⁴ Yonmej iejekawan in Amo Kuale Tlakatl oweliaj okinchiwayaj wejweyin señailestin. Okisayaj para kinmololoskej nochtin reytin de ixko yin tlaltikpak para momagaskej (momakaskej) iwan Dios itech nekáj weyi tonale katlej yokitlalij in Dios katlej kipia nochí poder. ¹⁵ Ijkuakón Jesucristo okijtoj: “Xikkaki, mach akaj kimati keman niwitz, porke Nej niwitz ijkón ken nijuak witz se ichtekke. Ma pakí akin ijsatos iwan kimalwijtos itzotzol, para satepan amo nemis xitlatztik iwan amo pinawas nijuak kitaskej.”

¹⁶ Iwan eyin ejekamej mach kualtin okinmololojkej in reytin se lugar kan kitokaxtiaj ika tlajtole hebreo Armagedón.

¹⁷ In ya ipan chikome ángel okinokij ikopa ixko ejekatl, iwan omokakke se tlajtole chikawak de kan weyi tiopan de ilwikak, iwan omokakke okiske kan kajki in siya. Okijtoj:

—Nochi yotlanke yomochij.

¹⁸ Ijkuakón otlapejpetlanke, otlakukuyokak iwan otlatijtikuinke. Otlalolinke sa tekitl chikawak ixko yin tlaltikpak

ke mach keman ijkón nik tlalolini desde ikuak oneskej in tlakaj ixko yin tlaltikpak.¹⁹ In weyikan de Babilonia katlej sa tekitl weyi, otlapanke iwan omochij eyi pedaso, iwan in weyikantin de nochti in tlaltikpak oxixitinkej. Dios mach okelkaj in weyikan de Babilonia para kitlajyowitzh chikawak ika ikualanilis.²⁰ Nochtin in tlalmej katlej pankistoje i tech atl iwan nochtin in tepemej opolikej.²¹ Noiiki owetzke wejweyi tesiwitl de ilwikak iwan otepewik inpan tlaltikpaktlakaj. Kada se tesiwitl oyeka etik kej omenpoale kilo. Iwan tlaltikpaktlakaj okiwikaltijkej in toTajtzin Dios por okintilanilij yon kokolistle de tesiwitl katlej oyeka sa tekitl teixpoloj.

17

In siwatl katlej weyi momekatij

¹ Ijkuakón ovalaj se de yonmej chikome angelestín katlej okinpiayaj in chikome kopajtin, iwan onechilwíj:

—Xiwiki iwan nimitzítitis tlan panos in siwatl katlej wel momekatij, katlej ewatok inpan miekej amej.² In reytiñ de nochti in tlaltikpak okimomekatijkej in yon siwatl. Iwan tlaltikpaktlakaj omotlawantijkej ika ivino, kijtosneki in tlaltikpaktlakaj okimomekatijkej in yon siwatl.

³ Satepan in Espíritu Santo notech ovalaj iwan onechwikak kan tlawaki, iwan onikitak se siwatl ewatok ipan se amo kuale yolkatl chichiltik. Yon amo kuale yolkatl otentoka de tokayomej katlej ika okiwikaltiayaj in toTajtzin Dios, iwan okinpiaya chikome itzontekowan iwan majtlakte ikuakuawan.⁴ In siwatl otzotzolejtoka ika itzotzol moradotik iwan chichiltik. Ochijchitoka ika oro, ika perlas iwan ika tetzitzintin katlej petlanij iwan patiojkej. Okitzkijtoka se kopa de oro tentok de tlajtlakole bierotik katlej Dios mach kiwelita, iwan noiiki tentok de tlajtlakole mach kuale ken nikuak in tlakaj kinneltokaj oksekimej diosmej.⁵ Itech ixkuak ojkuilitoka se tokayotl katlej mach akaj okimomakaya kuenta tlan kijtosneki. Yon tokayotl ijkín okijtoayaj: “Weyikan de Babilonia, in tenan de nochtin in siwamej momekatijkej, iwan de nochtin katlej kinneltokaj oksekimej diosmej, iwan de nochti tlajtlakole pitzotik de ixko yin tlaltikpak katlej Dios mach kiwelita.”⁶ Iwan onikmomakak kuenta nik in yon siwatl oiwititoka ika inmeso de yen tokniwan yolchipawakej iwan ika inmeso de katlej okinmiktijkej por otetlapowiajaya de Jesús. Nikuak ijkón onikitak, sa tekitl sa onitlajtlachixke (onimomajmawtij).⁷ Ijkuakón in ángel onechilwíj:

—¿Tlanik wel timotlajtlachialtia (timomajmawtia)? Nimitzilwis tlanon kijtosneki tlan otikitak de yon siwatl iwan de yen amo kuale yolkatl katlej ipan yetiw, katlej kinpia

chikome itzontekonwan iwan majtlakte ikuakuawan.⁸ In amo kuale yolkatl katlej otikitak yen katlej achtoj yoyeka, pero axan mach ok yolitok. Pero maski mach ok yolitok, yej walkisas de ijtk kuyoktle katlej mach kipia kan tlantok, iwan satepan yas kan nochipa tlajyowijtos. Iwan nochtin in tlaltikpaktlakaj, katlej mach nestok intoka itech libro kan ikuilitok intoka nochtin katlej kipiaj yankuik nemilistle desde ikuak opéj in tlaltikpak, sa tekitl motlajtlachialtiskej (momajmawtiskej) nikuak kitaskej in amo kuale yolkatl, katlej achtoj yoyeka, pero axan mach yolitok, iwan katlej oksemi witz.

⁹ 'Nian onkaj sekin tlamantle para katlej kipiaj kuale intlanamikilis: In chikome itzontekonwan in amo kuale yolkatl kijtosneki chikome tepemej katlej ipan ewatok in siwatl,¹⁰ iwan noijki kijtosneki chikomen reytin. Makultin de yonmej reytin yomikkej. Se de yonmej reytin axan tlanawatijtok, iwan oksé asta axan mach ya witz. Pero nikuak witz in yon rey katlej poliwi, mach wejkawas tlanawatis. ¹¹ In amo kuale yolkatl katlej achtoj yoyeka, iwan katlej axan mach ok yolitok, yen ya ipan chikueyi rey. Yej noijki inwan powi in chikome reytin iwan katlej tlanawatis oksemi, pero satepan yas kan nochipa tlajyowijtos.

¹² 'In majtlakte kuakuawmej katlej otikinmitak kijtosneki majtlakte reytin katlej mach ya tlanawatiaj. Pero kinmakaskej tekiwajkayotl de reytin san sekan iwan amo kuale yolkatl, iwan mach wejkawaskej tlanawatiskej. ¹³ Yonmej majtlakin reytin motlaliskej san se tlajtole, intekiwajkayo kimakaskej in amo kuale yolkatl. ¹⁴ Yejwan kimomagaskej (kimomakaskej) iwan Ichkatzin, pero in Ichkatzin kintlanis. Porke in Ichkatzin yen in Teko de nochtin in tekomej iwan yen Tlanawatij de nochtin in tlatlanawatijkej. Iwan katlej katej iwan Ichkatzin, Dios okinnotzke iwan okinpejpenke, iwan nochipa okitlakitakej in Ichkatzin.

¹⁵ In ángel noijki onechilwij:

—In yonmej amej katlej otikinmitak, katlej inpan ewatok in siwatl momekatij, kijtosneki yen nochtin in tlaltikpaktlakaj de nochtin pueblotin, de nochtin katlej tlapoaj tlalamantle tlajtole, iwan de nochtin paismej. ¹⁶ Iwan yonmej majtlakin kuakuawmej katlej otikinmitilij in amo kuale yolkatl, kikokoliskej in siwatl momekatij. Kikixtiliskej nochitlan kipia iwan kixitlatzoskej. Kikuaskej itlalnakayo iwan kichichinoskej ika tlitl. ¹⁷ Dios okintlalilij ipan inyolo in reytin para ma kichiwakan tlan Dios kineki. Yejwan motlaliskej san se tlajtole iwan kimakaskej intekiwajkayo in amo kuale yolkatl, para ma tlanawati asta ikuak ma mochiwa

nochi tlan Dios yokijtoj tlapanos. ¹⁸ Iwan siwatl katlej otikitak, kijtosneki yen weyi weyikan katlej kinnawatia nochtin in reytin de ixko yin tlaltikpak.

18

Wetzi in weyikan de Babilonia

¹ Satepan de yin, onikitak oksé ángel katlej owaltemoaya de ilwikak ika weyi ipoder. Iwan okitlawilij nochti in tlaltikpak ika itlanexo. ² Iwan otzajtzik chikawak, okijtoj:

—Yowetzke, yowetzke in weyikan de Babilonia, axan ompa yomochantijkej in demoniojtin, yomochij inchan in ejekamej mach kualtin, iwan ompa yomotepajtsoltijkej nochti tlamantle de totomej mach kualtin iwan mach chipawakej. ³ Porke nochtin in paismej yomotlawantijkej ika ivino katlej okintoktij ma tlajtlakolchiwakan iwan amo ma kitlakitakan Dios. Kijtosneki nochtin in reytin de ixko yin tlaltikpak okintoktij ma kinneltokakan idioswan. Iwan tlasemankej de nochti in tlaltikpak omorikojtilijkej ika nochti tlamantle tlan kipia in yon weyikan.

⁴ Satepan onikakke oksé tlajtole de ilwikak, okijtoj:

—Xikisakan de itech yon weyikan, namejwan katlej annoaxkawan, para amo inwan xitlajtlakokan, iwan para amo inwan antlajyowiskej. ⁵ Porke yejwan sa panoa kuenta tlajtlakoaj iwan intlajtlakol yoajsito asta ilwikak. Iwan axan Dios yokelnamikke nochti tlan amo kuale tlan kichiwa yon weyikan. ⁶ Xikkuepaltikan tlan amo kuale in yon weyikan ijkón ken yej okintoktij tlan amo kuale in oksekimej. Xikkuepaltikan ome tanto de tlan okichij. Ijkón ken yej okichichilij in tlaonilistle para okinmakak in oksekimej, axan yej noijki xikchichililikan in tlaonilistle ome tanto okachi chichik iwan ma koni. ⁷ Xikmakakan tekokojkayotl iwan tlajyowilistle no ijkón ken omoweyineke iwan omopaktij ika irikojyo. Porke ipan iyolo kijta: “Nej nian niewatok kej nireina, mach niviuda, iwan mach keman nimoyolkokos.” ⁸ Por yonik, san itech se tonale ipan witz tlajyowilistle. Panos mikilistle, neyolkokole, apostle iwan tlatlas. Porke in toSeñor kipia weyi ipoder para kitlajyowiltis.

⁹ In reytin de ixko yin tlaltikpak katlej okimomekatijkej iwan omopaktijkej ika inrikojyo, chokaskej iwan moyolkokoskej nijuak kitaskej ipokyo in tlitl nijuak tlatlas in weyikan. ¹⁰ Yejwan san wejka konitoskej porke kimakasiskej itlajyowilis tlan panos, iwan kijtoskej:

—¡Ay! Pobre de tej, weyikan de Babilonia katlej okachi otitlatlantoka de nochtin. Axan san totokatijkak mopan owalaj motlajyowilis.

¹¹ In tlasemankej de nochí in tlaltikpak noijki chokaskej iwan moyolkokoskej por yon weyikan, porke mach ok akaj kinkowilis tlan yejwan kinamakaj. ¹² Mach ok kikowaskej oro, plata, tetzitzintin katlej petlanij, perlas, tzotzole de lino katlej kuale, tzotzole de seda, iwan tzotzole katlej moradotik iwan chichiltik. Noijki nochí tlamanle de kuawitl ajwiak, nochí tlamanle tlachiwale ika marfil, ika kuawitl kuakualtzin, ika tepostle de bronce, ika tepostle de hierro iwan ika tetl de marmol, ¹³ canela, xiwitl ajwiakayotl, kopale, mirra, ajwiakayotl katlej se kimotlalilia, vino, aseite, arina katlej kuale, trigo, yolkamej katlej tlamacaj, ichkamej, kabayojojin, karretajtin, iwan asta tlakaj katlej tlanamakin, kijtosneki in tlakaj katlej kinnamakaj para kitekipanoaj oksé tlakatl nochipa. ¹⁴ Iwan kilwiskej yon weyikan:

—Mach ok tikpia in welik tlakilotl katlej otikwelitaya. Iwan axan iktlanke (ik tlami) yotikpoloj nochí tlan kuale iwan nochí tlan otikwelitaya.

¹⁵ In tlasemankej de yonmej tlamanin, katlej omorikojtilijkej itech yon weyikan, san wejka konitoskej in weyikan porke kimakasiskej itlajyowilis tlan panos, iwan yejwan chokaskej iwan moyolkokoskej. ¹⁶ Iwan kijtoskej:

—¡Ay! Pobre weyikan. Oyeka kej se siwatl otlakentitoka ika kuale tzotzole itoka lino iwan ika tzotzole moradotik iwan chichiltik. Ochijchitoka ika oro, ika tetzitzintin patiojkej katlej petlanij iwan ika perlas. ¹⁷ Axan san totokatijkak otlanke nochí in rikojyotl.

Nochtin kapitanmej de yen barkojtin, nochtin katlej okitlaxtlajkej para yaskej itech barko, nochtin katlej tekipanoaj itech barko, iwan nochtin katlej tekipanoaj itech atl, san wejka konitoskej in weyikan. ¹⁸ Iwan nikuak kitaskej ipokyo in tlitl nikuak tlatlatos in weyikan, kijtoskej:

—Mach oyeka oksé weyikan katlej okachi ma tlayekanto ke yin weyikan.

¹⁹ Yejwan mokuatlaltemiskej kej se señas nik sa tekitl moyolkokoaj. Chokaskej iwan moyolkokoskej, kijtoskej:

—¡Ay! Pobre weyikan. Ika irikojyo omorikojtilijkej nochtin katlej okinpiayaj inbarkojwan. Iwan axan san totokatijkak nochí otlanke.

²⁰ Pero xipakikan namejwan katlej ankatej ilwikak porke in weyikan yokixpolojej. Noijki xipakikan namejwan antlatitlaniltin, namejwan antokniwan yolchipawakej iwan namejwan anprofetajtin, porke Dios yokitlajyowiltij in weyikan por yen tlan amo kuale oamechtoktij.

²¹ Ijkuakón se ángel ika ichikawalis okajkokke se weyi tetl kej imetlayo in molino, iwan okitlamotlak ijtk atl. Iwan okijtoj:

—Ijkín noijki kitlamotlaskej in weyikan de Babilonia, iwan mach ok keman akaj kitas. ²² Mach ok keman se kinkakis kintzotzonaskej arpajtin, flautajtin iwan tlapitzaltin itech yon weyikan. Iwan ayakmo yetos nion se tekipanoj de itlaj tlamatle tekitl, iwan mach ok keman mokakis ma tlapayana se molino. ²³ Nion se tlanextle mach ok tlawis itech moweyikan, iwan mach ok keman mokakis ilwichiwaj kan monamiktiaj. Porke motlasemankej oyekaj wejweyikistokej (wejweyititokej) de ipan tlaltikpak, iwan ika motexoxalis (mobrujojkayo) otikinkajkayaj nochtin in paismej.

²⁴ Tej weyikan de Babilonia, por tej motlajtlakol, okinmiktijkej in profetajtin iwan katlej Dios iaxkawan, iwan nochtin katlej okinmiktijkej ixko yin tlaltikpak.

19

Omokakke weyikixtilistle itech ilwikak

¹ Satepan de yon, onikinkakke miekej otlaajoayaj chikawak ompa ilwikak. Okijoayaj:

Ma tikweyikixtikan in toTajtzin Dios porke Yej techmakixtia. Ma tikweyikixtikan porke Yej kipia weyi ipoder.

² Yej tlaixkomaka (tlatzonmanas) ika melajkayotl ijkón ken moneki.

Yokitlajyowitzij in siwatl katlej weyi momekatij, katlej ika imomekatisilis okinmijtlakoj in tlaltikpaktlakaj. Dios yokikuepaltij in siwatl momekatij inmikilis de yen itekipanojkawan in Dios.

³ Iwan oksemi okijokey:

—¡Ma tikweyikixtikan toTajtzin Dios! Porke ipokyo in yon weyikan katlej yokixpolokey nochipa tlejkotos ipokyo.

⁴ In senpoale iwan nawi tetajtzitzintin iwan in nawin katlej yolitokey, omotlankuaketzkej ipan tlale iwan okiweyikixtijkej in toTajtzin Dios, katlej oewatoka ipan isiya. Iwan okijokey:

—¡Ijkón ma yeto! ¡Ma tikweyikixtikan toTajtzin Dios!

⁵ Ijkuakón omokakke se tlajtole katlej okiske kan kajki in siya iwan okijoaya:

Nochtin namejwan katlej ankitekipanoaj iwan katlej ankimakasij in toTajtzin Dios, wejweyin iwan tzitzikinmej, xikweyikixtikan toTajtzin Dios.

Monamiktia in Ichkatzin iwan kiilwichiwiwij

⁶ Noijki onikakke kej intlajtol de miekej tlakaj, ken niikuak mokaki kukuyokaj miekej weyamej iwan chikawak tlatijtikuini. Okijoayaj:

¡Ma tikweyikixtikan toTajtzin Dios! Porke yopéj tlanawatia in toSeñor, in toTajtzin Dios katlej kipia nochí poder.

⁷ Ma tipakikan, ma titemikan ika pakilstle iwan ma tikweiyik-ixtikan toTajzin Dios,
porke yoajsiko in tonale para monamiktis in Ichkatzin,
iwan katlej yetos isiwa yomoyejyektlalij.

⁸ Iwan okimakakej ma motzotzolti ika itzotzol de lino katlej
kuale, chipawak iwan petlantok.

Lino katlej kuale kijtosneki yen inmelajkanemilis in tokni-wan yolchipawakej.

⁹ Ijkuakón in ángel onechilwij:

—Xikikuilo: “Ma pakikan akinmej okinnotzkej para tlakuaskej itech ilwítl níkuak monamiktis in Ichkatzin.”

Iwan noijki onechilwij:

—Yin tlajtole melawak itlajtol in Dios.

¹⁰ Nej onimotlankuaketzke ikxitlan ángel para nikweiyikitis, pero yej onechilwij:

—Amo xinechweiyikixti. Porke nej noijki niktekipanoa in toTajzin Dios ijkón ken tej iwan mokniwan katlej kichijtokej tlan kijta itlamachtil in Jesús. Moneki xikweiyikixti yen toTajzin Dios.

Tlan se kitematiltia de Jesús yen yon tlan okachi okintekipa-choaya kitematiltiskej in profetajtin.

Katlej ipan oyetiaya in kabayo istak

¹¹ Satepan onikitak in ilwikak tlapotok, iwan owalmonextij se kabayo istak. Iwan katlej ipan oyetiaya itoka Kichiwa Tlan Kijta iwan noijki itoka Melawak. Porke tlaixkomaka (tlatzonmana) iwan temaga (temaka) ken moneki.

¹² Ixtololowan oxotlatokaj kej titl, iwan itech itzontekon okinpiaya miekej koronajtin. Iwan okipiaya itoka ijkuitlitok katlej mach akaj okimatia tlanon kijtosneki, sino san Yej okimatis.

¹³ Otzotzolejtoka ika itzotzol sa matztik ika estle, iwan itoka Dios iTlajtol. ¹⁴ In soldadojtin de ilwikak ikuitlapán owalayaj ipan kabayojtin istakej, otlakentitokaj ika intlaken de lino katlej kuale, istak iwan chipawak. ¹⁵ De ijtitk iten okisaya se espada sa tekitl tlateki, katlej ika kinmagas nochtin in paismej. Iwan Yej kinnawatis ika se vara de tepestle kej tekiwaj. Iwan kintoktis ken kitoktiaj in uvas níkuak ipan tlajtlaksaj para kipatzkaj, kijtosneki sa tekitl kintlajyowiltis ika ikualanilis in Dios katlej kipia nochti poder.

¹⁶ Itech itzotzol iwan itech imetztomawakan oijkuitlitoka yin tokay-otl: “Tlanawatij de nochtin tlatlanawatijkej iwan inTeko de nochtin tekomej.”

¹⁷ Satepan onikitak se ángel katlej omoketoka ipan tonale iwan okintzajtzilij chikawak nochtin in totomej katlej pat-lantinemij ilwikak:

—Xiwikikan iwan ximololokan para ankikuaskej se weyi tlakuale katlej Dios amechmakas. ¹⁸ Ankinkuaskej intlalnakayo in reytin, intlalnakayo in kapitanmej iwan intlalnakayo in tlakaj katlej chijchikawakej. Noijki ankinkuaskej innakayo in kabayojtin iwan intlalnakayo katlej inpan yetinemij, intlalnakayo de nocthin tlakaj, maski tlanamaktin o noso amo tlanamaktin, maski wejweyin o noso tzitzikinmej.

¹⁹ Ijkuakón onikitak in amo kuale yolkatl iwan nocthin reytin de ixko yin tlaltikpak iwan insoldadojwan, omolololijkej para kimomagaskej iwan katlej ipan oyetiaya in kabayo istak iwan isoldadojwan. ²⁰ In amo kuale yolkatl okikitzkijkej, iwan noijki okikitzkijkej in profeta tekajkayaj katlej owelia okinchiwaya wejweyin señaleston ixpan amo kuale yolkatl. Ika yonmej señaleston okinkajkayaj katlej omotekawilijkej ma kintlalilikan imarka in amo kuale yolkatl iwan okiweiyikixtijkej iretrato. In amo kuale yolkatl iwan profeta tekajkayaj, nocthin omen okintlamotlakej san ken yolitokej ijlik tlico kan xotlatok in tlilt ika azufre. ²¹ Iwan nocthin oksekimej insoldadojwan okinmiktijkej ika iespada tlateki katlej okisaya de ijlik iten de yen katlej oyetiaya ipan ikabayo istak. Iwan nocthin in totomej otlakuajkej ika yon nakatl asta kan oixwikej.

20

Panoa mil xiwitl

¹ Satepan onikitak se ángel owaltemoaya de ilwikak kitzkijtiwitz se kadena itech ima iwan se yabe de yen kuyoktle katlej mach kipia kan tlantok. ² In ángel okitzkij in koatl, yen katlej yoyeka desde ya wejkawitl, katlej noijki itoka diablo o noso Satanás, iwan okilpij ika kadena para ma ilpito mil xiwitl. ³ In ángel okitlamotlak in Satanás ijlik in kuyoktle katlej mach kipia kan tlantok iwan ompa okitzakke. Noijki kuale okitzakke in puerta para amo welis kisas in Satanás, para ayakmo ma kinkajkayawa okachi in tlaltikpaktlakaj de nocthin paismej, asta ikuak ma pano mil xiwitl. Nijuak tlamic in yon mil xiwitl, kikajkawaskej kanaj keski tonale.

⁴ Satepan onikinmitak miekej siyajtin iwan inpan oewatokaj katlej okinmakakej tekiwajkayotl para tlaixkomakaskej (tlatzonmanaskej). Iwan onikinmitak inmanimajwan de yejwan katlej okinkechtzontekej por okitematiltiayaj in tlamachtile de Jesús iwan por otetlapowiyayaj de itlajtol in Dios. Yejwan mach okiweiyikixtijkej in amo kuale yolkatl iwan iretrato, iwan nion mach omotekawilijkej ma kintlalilikan imarka in amo kuale yolkatl itech inmixkuak o noso

itech inma. Onikinmitak omoyolkuikej iwan otlanawatiskej iwan Cristo mil xiwitl.⁵ Yonmej yejwan katlej achtoj omoyolkuikej. Pero in oksekimej mikkamej mach moyolkuiskej (moyolitiskej) asta ma pano in mil xiwitl.⁶ Sa tekitl ma pakikan in tokniwan yolchipawakej katlej achtoj moyolkuiskej. Yejwan mach mikiskej ojpa ken oksekimej, sino yejwan yeskej tiopixkej inawak Dios iwan inawak Cristo. Iwan tlanawatiskej iwan Cristo mil xiwitl.

⁷ Nijuak panos in yon mil xiwitl, Satanás mach ok tzaktos, sino kikajkawaskej.⁸ Kisas para kinkajkayawas in tlaltikpak-tlakaj de nochtin paismej. Kijtosneki yen Gog iwan Magog. Kinmololos nochtin para kichiwaskej guerra. Yeskej sa tekitl miekej sa ken xale katlej onkaj itempan atl.⁹ Witzej de nochti in tlaltikpak iwan kiyawaloskej kan yeskej in tokniwan yolchipawakej iwan weyikan katlej Dios kitlasojtla. Pero Dios kiwaltitlanis tlilt de ilwikak iwan kinchichinos nochtin.¹⁰ Iwan diablo, katlej okinkajkaya, kitlamotlaskej ijtit tliko kan xotlatok in tlilt ika azufre, kan kajki in amo kuale yolkatl iwan profeta tekajkaya. Ompa tlajyowijtoskej iktlanke (ik tlami) yuale tonale.

Dios tlaixkomakas (tlatzonmanas)

¹¹ Satepan onikitak se weyi siya istak, iwan noijki onikitak katlej ompa ipan oewatoka. Iwan ompa ixpan, in tlaltikpak iwan ilwikak san owalpolikej, porke mach ok oyeka lugar para yejwan.¹² Iwan onikinmitak in mikkamej, wejweyin iwan tzitzikinmej, omoketokaj iyakapan Dios. Iwan toTajzin Dios okintlapoj in librojtin, iwan noijki okitlapoj in oksé libro kan oijkuitolokaj intoka nochtin katlej kipiaj yankuik nemilistle. Dios okinmixkomakak in mikkamej iwan okinmakak in lugar segün tlan okichijkej, iwan segün tlan oijkuitoloka itech yonmej librojtin.¹³ In mikkamej katlej oyekaj ijtit atl okiskej, noijki in mikilistle iwan lugar kan oyekaj animajtin de katlej yomikkaj, okintemakakej in mikkamej katlej okinpixtokaj. Iwan nochtin okinmixkomakakej iwan okinlugartijkej segün tlan okichijkej.¹⁴ Satepan in mikilistle iwan lugar kan oyekaj in animajtin de katlej yomikkaj, okintlamotlakej ijtit tliko. Yon tliko yen ya ipan ojpa mikilistle.¹⁵ Iwan noijki ompa okintlamotlakej nochtin katlej mach onestokaj intoka itech libro kan ijkuitolokej nochtin katlej kipiaj yankuik nemilistle.

21

Yankuik ilwikak iwan yankuik tlaltikpak

¹ Satepan onikitak se yankuik ilwikak iwan se yankuik tlaltikpak. Porke in achtoj ilwikak iwan achtoj tlaltikpak opolikej, iwan mach ok oyeka in atl.² Nej niJuan, onikitak

se weyikan chipawak, yen yankuik weyikan de Jerusalén, owaltemoaya de ilwikak kan kajki in toTajtzin Dios. Sa tek-
itl kuakaultzin omotaya ken se novia nikuak mochijchiwa para monamiktis iwan iokich. ³ Iwan onikakke se tlajtole chikawak de ilwikak. Okijtoj:

—Xikita. Dios axan chanti inwan tlakaj. Yej inwan chantis iwan yeskej iaxkawan, Yej inewian inwan yetos iwan Yej yetos inDios. ⁴ Dios kinmixayowajwatzas, iwan mach ok yetos mikilistle, nion chokilistle, nion neyolkokole, iwan nion tekokojkayotl, porke nochi tlan achtoj oyeka, yopanok.

⁵ Ijkuakón katlej oewatoka ipan isiya, okijtoj:

—Xikita. Nej nikchiwas nochi tlamantle yankuik.

Noijki okijtoj:

—Xikikuilo tlan nimitzilwia, porke melawak tlan nimitzilwia iwan kuale para kineltokaskej.

⁶ Iwan onechilwij:

—Nochi ya kuale kajki. Nej niachtoj iwan Nej niitlamian de nochi tlamantle ijkón ken abecedario pewa ika A iwan tlami ika Z. Akin amikis, Nej nikmakas atl de yen ameyale katlej kitemaka yankuik nemilistle, iwan san niktliokolis. ⁷ Akin tlatlanis itech nochi tlan amo kuale tlan panos, nikmakas nochi yin tlamantle kej herencia. Iwan Nej nietos niiDios iwan yej yetos nokone. ⁸ Pero katlej kimakasij tlajyowiskej nonawak, iwan katlej mach kineltokaj notlajtol, iwan katlej kichiwaj tlan amo nikwelita, iwan katlej temiktijkej, iwan katlej momekatiaj, iwan katlej texoxkej (brujojtij), iwan katlej kinweyikixtiaj in santojin, iwan nochtin katlej teka-jkayajkej, yejwan yaskej ijtitk tliko kan xotlatok in tlitl ika azufre. Yen yon katlej ya ipan ojpa mikilistle.

In yankuik weyikan de Jerusalén

⁹ Satepan owalaj se de yen chikome angelestín katlej ok-inpixtokaj chikome kopajtín tentokej ika nochí in salúltimo chikome kokolistín. Iwan onechilwij:

—Xiwiki, iwan nimitzititis in ichpochtle katlej yetos isiwa in Ichkatzin.

¹⁰ In Espíritu Santo notech oyeka iwan onechwíkak ipan se tepetl weyi iwan wejkapan, iwan ompa onechititij in chipawaktzin weyikan de Jerusalén, owaltemoaya de ilwikak kan kajki in Dios. ¹¹ In weyikan opetlania ika imawisotlanex Dios. Ipetlanilis oyeka kej ipetlanilis se tetl kuakaultzin katlej petlani, kej se tetzintle de jaspe katlej mota kej teskatl. ¹² In weyikan okiyawalojtoka se tepamitl weyi iwan wejkapan, iwan okinpiaya majtlakte iwan ome puertajtin, iwan noijki oyeka se ángel itech kada se puerta. Iwan itech yonmej

puertajtin oijkeilitokaj intoka de yen majtlakte iwan ome familias de Israel.¹³ Oyekaj eyi puertajtin ik ikisayan tonale, eyi puertajtin ik ajko, eyi puertajtin ik tlani iwan eyi puertajtin ik ipoliwian tonale.¹⁴ In tepamitl de yen weyikan okinpiaya majtlakte iwan ome cimientos de temej, iwan itech yonmej temej oijkeilitokaj intoka de yen majtlakte iwan omen itlati-tlanilwan in Ichkatzin.

¹⁵ In ángel katlej onechtlapowijtka okipiaya se tlata-machiwalkuawitl (metro) de oro, para ika kitamachiwas in weyikan, ipuertajwan iwan itepanyo.¹⁶ In weyikan oyeka kuadrado. De weyak iwan de patlawak oyeka san se parejo. In ángel okitamachij in weyikan ika tlata-machiwalkuawitl, iwan okipiaya ome mil iwan ome siento kilómetro kada se lado. De weyak iwan de wejkapan iwan de patlawak oyekaj san se parejo.¹⁷ Satepan okitamachij in tepamitl, iwan okipiaya eyinpoale iwan nawi metro. In ángel olatamachij ika itlatamachiwal ijkón ken tejwan titlatamachiwaj.

¹⁸ In tepamitl oyeka tlachiwale ika tetl de jaspe, iwan weyikan oyeka tlachiwale ika oro katlej omotaya kej vidrio chipawak.¹⁹ In temej de yen cimiento in tepamitl ochij-chitokaj ika miek tlamantle de tetzitzintin kuakualtzitzintin. Ipan se cimiento ochijchitoka ika jaspe, ipan ome cimiento ochijchitoka ika zafiro, ipan eyi cimiento ochijchitoka ika ágata, ipan nawi cimiento ochijchitoka ika esmeralda,²⁰ ipan makuile cimiento ochijchitoka ika ónica, ipan chikuasen cimiento ochijchitoka ika cornalina, ipan chikome cimiento ochijchitoka ika crisólito, ipan chikueyi cimiento ochijchitoka ika berilo, ipan chiknawi cimiento ochijchitoka ika topacio, ipan majtlakte cimiento ochijchitoka ika crisoprasa, ipan majtlakte iwan se cimiento ochijchitoka ika jacinto, iwan ipan majtlakte iwan ome cimiento ochijchitoka ika amatista.²¹ In majtlakte iwan ome puertajtin oyekaj tlachiwaltin ika majtlakte iwan ome perlas. Kada se puerta oyeka tlachiwale ika se perla. In ojtle katlej okachi weyi de yon weyikan oyeka de oro chipawak kej teskatl.

²² Mach onikitak nion se tiopan itech yon weyikan, porke in toSeñor, in Dios katlej kipia nochí poder, iwan Ichkatzin, ompa katej iwan por yonik mach ok moneki tiopan.²³ Itech yon weyikan mach moneki tlawis in tonale nion metztle, porke imawisotlanex in Dios iwan Ichkatzin yejwan kittawiliaj.²⁴ In tlaltikpaktlakaj de nochtin paismej nemiskej ijtik tlanextle de yon weyikan. Iwan in reytin de nochí in tlaltikpak kiwalkuiskej itech yon weyikan nochí tlan kuale tlan kipiaj.²⁵ In puertajtin nochipa tlapotoskej. Mach keman motzakuaskej. Porke nochipa tlanestos iwan mach

keman tlatleyuas. ²⁶ In tlaltikpaktlakaj de nocthin paismej kiwalkuiskej itech yon weyikan noch i tetlakitalistle iwan noch i tlan kipiaj kuakualtzin. ²⁷ Pero mach keman kalakis itech yon weyikan tlan amo chipawak, nion katlej kichiwaj tlan amo kuale katlej mach kiwelita in Dios, iwan nion katlej tlakajkayawaj. Sino kalakiskej san yejwan katlej nestos intoka itech libro kan ijkuitlakaj de nocthin katlej kipiaj yankuik nemilistle, yejwan katlej iaxkawan in Ichkatzin.

22

¹ Satepan in ángel onechititij se weyatl chipawak, katlej kitemaka yankuik nemilistle. Yon atl oyeka chipawak kej teskatl, iwan owalkistoka de kan isiya in toTajtzin Dios iwan de yen Ichkatzin. ² Yon atl opanotoka tlatlajko ojtle de yen weyikan. Iwan ojkan lado atlatentle de yen weyatl oyekaj in kuawmej katlej kitemakaj yankuik nemilistle. Yonmej kuawmej tlakij kada metztle, kijtosneki majtlaktle iwan ome buelta se xiwitl, iwan inxiwyo serbiroa para ika mopajtiskej in tlaltikpaktlakaj de nocthin paismej. ³ Itech yon weyikan mach ok yetos itlaj tlan amo kuale katlej Dios moneki kitlajy-owiltis. Isiya in toTajtzin Dios iwan isiya in Ichkatzin yetoskej itech yon weyikan. Ompa itekipanojkawan kitekipanoskej iwan kiweiyikixtiskej. ⁴ Iwan kitaskej ixko iwan kintlaliliskej ipan inmixkuak itoka in Dios. ⁵ Ompa mach ok keman tlatleyuas. Iwan katlej ompa chantiskej mach ok kinekiskej itlaj tlanextle para ika motlawiliskej, nion mach ok monekis ma kintlawili in tonale, porke in toSeñor Dios Yej kintlawilis. Iwan yejwan tlanawatiskej iktlanke (ik tlami).

Jesucristo mach ok wejkawitl para walmukuepas

⁶ Satepan in ángel onechilwij:

—Yin tlajtole melawak iwan kuale para kineltokaskej. Iwan toSeñor Dios katlej kinmatiltia in profetajtin tlan tlapanos, okualtitlanke iángel para kinnextilis itekipanojkawan tlan tlapanos san niman.

⁷ Iwan Jesús okijtoj:

—¡San niman niwitz oksemi! Ma paki akin kichiwas tlan kijta in tlamachtile katlej ijkuitlakaj de nocthin libro katlej kitematiltia tlan tlapanos.

⁸ Nej níJuan, onikakke iwan onikitak noch i yin tlamantle. Iwan satepan de onikakke iwan onikitak, onimotlankuaketzke ikxitlan ángel katlej onechnextilij noch i yon tlamantle para nikweiyikixtis. ⁹ Pero yej onechilwij:

—Amo xinechweiyikixti. Porke nej noijki niktekipanoa in toTajtzin Dios ijkón ken tej iwan mokniwan profetajtin,

iwan nochtin katlej kichiwaj tlan kijta in yin libro. Moneki xikweyikixti yen toTajtzin Dios.

¹⁰ Noijki onechilwj:

—Amo san tej xikmato, sino xikinmatilti nochtin tlan kijta itlajtol in Dios katlej ijkuitol itech yin libro. Porke ya ajsi tonale para tlamochiwas nochí tlan kijta in yin libro. ¹¹ Iwan tla akaj kineki kichijtos tlan amo kuale, ma kichijto kiné. Iwan akin kineki nemis ika inemilis bierotik, ma nemi bierotik kiné. Iwan akin kineki kichijtos tlan kuale, ma kichijto tlan kuale kiné. Iwan akin kineki moyolchipajtos inawak Dios, ma moyolchipajto kiné.

¹² Iwan Jesús okijtoj:

—¡San niman niwitz oksemi! Nikkualkuis in tlaxtlawile para nikmakas kada se tlakatl según tlan okichij. ¹³ Yen Nej niachtoj iwan Nej niitlamian de nochí tlamantle ijkón ken abecedario pewa ika A iwan tlami ika Z.

¹⁴ Ma pakikan katlej kipakaj intlaken para welis kalakiskej itech puerta de yen weyikan para kikuaskej itlakilo in tlatokkuawitl katlej kitemaka yankuik nemilistle. ¹⁵ Pero mokawaskej kalan katlej kipiaj mach kuale inyolo, katlej texoxkej (brujojij), katlej momekatiaj, katlej temiktijkej, katlej kinweyikixtaj insantojwan, iwan nochtin katlej tlakayawaj iwan kiwelitaj tlakayajtinemiskej.

¹⁶ 'Nej niJesús, onikkualtitlanke noángel para ma amechmatilti nochí in yin tlamantle namejwan katlej antiopantlaneltokakej. Yen Nej ninelwatl katlej niwalajtok de yen rey David, iwan yen Nej niteixwi de yen rey David. Iwan noiíki yen Nej nisitlale katlej kisa kualkan.

¹⁷ In Espíritu Santo iwan isiwa in Ichkatzin kijtaj:

—Xiwiki.

Iwan akin kikaki, noiíki ma kijto:

—Xiwiki.

Iwan tla akaj amiki ipan iyolo, iwan kineki konis in atl katlej kitemaka yankuik nemilistle, ma wiki, iwan ma koni iwan mach itlaj moneki kitlaxtlawas.

¹⁸ Nochtin akinmej kikakij tlan kijta in tlamachtile katlej ijkuitol itech yin libro, nikneki namechilwis se tlajtole: Tla akaj kajxitilia oksekin tlajtole de tlan ya kajki ijkuitol itech yin libro, Dios kitlajyowiltis okachi ika yen kokolistle katlej kajki ijkuitol itech yin libro. ¹⁹ Iwan tla akaj kikxitilia itlaj tlajtole de tlan ya kajki ijkuitol itech yin libro, Dios noiíki kikxitilis tlan okitokaroaya de yen nekáj tlatokkuawitl katlej kitemaka yankuik nemilistle iwan mach kikawilis ma kalaki itech nekáj chipawaktzin weyikan de tlan ya kijtojtok in yin libro.

²⁰ Jesús katlej techmatiltia in yin tlamantle kijta:

—Ipan melajka, san niman niwitz.
Ijkón ma yeto. Xiliki, Señor Jesús.

²¹ In toSeñor Jesucristo ma amechmaka iteiknotlamachilis
aminochtin. Ijkón ma yeto.